



四川大學古籍整理研究所編

儒藏

史部
第四十七冊

四川大學出版社





儒藏



四川大學古籍整理研究所 編

儒藏·史部

儒林碑傳

第十一冊

四川大學出版社 二〇〇五年

目錄

明儒碑傳集二（卷五一至卷一〇〇） 刁忠民 校點 郭齊 審稿 一



明儒碑傳集卷五十一

鄒守益

明故中順大夫南京國子監祭酒前太常少卿兼

翰林院侍讀學士追贈禮部侍郎諡文莊東廓

先生行狀

宋儀望

世有大儒曰東廓先生姓鄒氏諱守益字謙之吉之安福人其先系出幽州范陽後家宜黃徙永豐八世祖天成因族父淵從文丞相起兵尋敗於元乃自永豐徙居安福城岡傳二世而當元季紅巾之亂諱思貞以智勇為鄉里所推有保障功入國朝諱克修始居澈源里子孫漸以儒術起家曾祖竹坡府君諱仕魯祖毅軒府君諱思傑俱隱德弗仕毅軒公以子貴封大理寺左評事考即易齋大夫諱賢弘治丙辰進士歷官福建僉事致仕母夫人周氏有賢德封孺人先是易齋公夢先聖孔子立於門之石橋母夫人亦夢日墮於懷尋以弘治辛亥二月二日生先生於澈源之第稍長即穎敏不羣已

從易齋公游宦留都讀書至忘寢食是時彭公禮巡撫南畿一見大奇之曰是兒出必爭鋒天下易齋公遣從司寇胡南津公建受學多所問難丁卯先生年十七以春秋中江西鄉試是年娶夫人王氏尋丁母夫人憂少間乃受徒講春秋陽明王公移令廬陵先生慕其名見之極相稱許辛未王公由吏部主事同考會試時主考得先生卷甚喜謂王公曰子素知文善識此為誰者曰此必安福鄒某先生遂冠南宮廷試及第第三人尋授翰林院編修方是時先生年弱冠丰格異同榜中望之如玉映山立主考內閣野亭劉公深以國器待之時易齋公在漳南得報喜曰吾志有托矣竟致其事去先生任翰林踰年念易齋大夫不置遂抗疏養病歸四方人士慕先生名咸來受學一日與諸生論及中庸輒慨然曰子思學於曾氏今程朱補大學必先格致中庸乃首言戒懼慎獨而不及格致何也時諸生辨難良久先生終不釋然丙子丁外艱悉力喪葬待庶母弟三人咸



儒藏

遵易齋公遺言、撫愛有加。己卯、謁陽明王公於虔臺、因論及格致之學、王公乃盡語以致良知之說、反覆辨論、先生翻然悟曰、道在是矣。遂執子弟禮。未幾、宸濠反、江西王公起兵吉安、先生聞變、星馳軍門。王公喜曰、君臣師生之誼、在此一舉。企江西功成、王公力薦先生、先生乃疏讓同列。先生既受徒、山房乃以聞於王公者、精思力行、沛然有得。既又探之周程、以適孔顏、考之濂洛諸書、以證六經、若同軌合轍、無復疑二。於是作學說、以警同志。今上登極之明年、錄用舊臣、先生將戒行北上、尤惓惓作祠堂規、立鄉約、置義田、周鄉族有差、作別同志說、語甚警切。明年癸未、復謁王公於越中、參訂月餘。既別、王公悵望不已。門人問曰、夫子何念謙之之深也。公曰、曾子所謂以能問於不能、云云。若謙之、可謂近之矣。入京、復授館職、與經筵修國史、進階文林郎。於是贈父易齋公奉政大夫、母進宜人、王夫人封孺人。會大禮議起、先生率同館上疏、不報。明年甲申、先生復上疏、忤旨、

下詔獄。是時修撰呂君柟繼疏入下獄。先生與呂君曰、講學不報、有獄裏雙况集。尋謫廣德州判官。復入會稽省王公、聞如保赤子之教。先生自是蒞官臨民、務以誠心相感觸、作諭俗文、以訓父老子弟、長吏亦加敬信。遂撤淫祠、建復初書院。先生自為記。從游之士、自四方來者、日衆。所著有時習講章、學者爭相傳誦、感發然。先生雖由文學起家、至判州、動能發表摘伏、一時稱為神明。民有通其室者、值某甲冒爭而訟、先生飾為婦試之、輒冒以為妻。先生笑曰、此僮也、庸可冒耶。遂屈服。陳姓者兄弟皆黠盜、逮其弟而兄逸、監司詰捕不已。會先生攝篆、逮者之妻稱枉。先生故麾去之、密遣人伺之、果有私訊者。於是逸盜立獲。部民有婢竊其藏、以逃、詰朝婢墮於他所、莫可蹤跡。先生廉得其人、拷訊不服、乃授練方畧、捕其幼子至、訊之、果得藏物。富民步氏因繼爭產、連年不決。先生審其應立者、諭之以理、尋又處分其餘為祭祀宗族之需、其人悅服。仍願割其田三百畝助給書



院在廣德三年、乃轉為南京禮部主客司郎中。先生既去、廣德父老子弟送至白茆、涕泣以別。先生以詩慰遣之、民乃為立生祠。既至南都、日與海內同志砥礪於學。歲戊子、陽明王公征田州班師、卒於南安、遂率同志為位以哭。是歲、撰九華山陽明書院記於良知之學大相發明。其後甘泉湛公、涇野呂公與先生咸聚南都、講學之風於是為盛。又三年辛卯四月、先生給由至真州、痔作、遂上疏乞養病。由吳中就醫、與魏莊渠諸公力論知行合一之旨。既趨會稽、哭陽明公、與同志大會於天真書院。是冬、進階奉政大夫、封王夫人宜人。先生既南歸、家事悉置度外、日與門生故人商確問學、如饑如渴。每歲會同志於青原、白鷺之間、又數入吉水、永豐、泰和、萬安、永新、樂安、崇仁、臨川、南昌。既又徧歷名山、從遊之士自大江南北、楚廣閩越之間、去來恒數百十人。海內交遊以書問學者、日不暇給。丙申歲、松溪程公文德量移安福、先生喜曰、昔人謂移風易俗莫善於學、其在此乎。

乃相與行鄉約、併里役、省糧長、朔望聚諸生論學於明倫堂。已乃建復古書院、先生為記。十七年戊戌、累用薦者起南京吏部考功郎中。道南浦時、今師相徐公督學江西、乃約藩臬諸公率諸生、肅先生聚講於貢院。先生發明性善之旨、痛快明白、一時聞者莫不躍然省悟。明年、由考功改司經局洗馬。時同以召入者如渭厓霍公、少湖徐公、念菴羅公、荆川唐公、浚谷趙公等、皆負一時重望。會先生與霍公同繪聖功圖及疏以獻、上初下禮部叅勘、既念納忠免罪、尋題充經筵講官。庚子、先生年五十、應詔議、薛文清公從祀、評品精當、見者數服不已。夏、陞太常少卿、兼翰林侍讀學士、掌南院事。同志集京師者咸不樂先生遠去、先生作醫說以別。六月、履任、會逐次酷暑、王夫人病渴不起。時季子善侍側、二子義美、尋自計所奔至、乃命義扶掖歸。十二月、陞南京國子監祭酒。今相國南渠李公為司業、先生相與興教化、申明約束、端嚴士氣、一時士習丕然為之一變。雖外國入肄

業及武臣輩亦津津受學不已。歲辛丑會九廟災有旨兩京文武大臣著自陳時政闕失故事諸大臣多惶懼引罪自解先生乃惓惓於上下交修之義至引殷中宗高宗反妖為祥之說語甚懇切已遂落職閒住先生乃遍遊金焦張公洞玉女潭諸勝既歸遂卜築東陽行窩四方學者日衆王夫人既卒中饋失助先生始議繼室壬寅五月娶今夫人李氏癸卯春遊衡嶽登嶽麓諸峯謁諸先正祠有南嶽風詠稿歸歷攸邑聚講金仙洞先生自以身棄草莽不得進輔天子弼亮左右所藉以明已志而酬上恩惟有培養人才講明學術為生平實際每歲出會青原白鷺郡中諸賢先後來集已同志又建連山後真書院先生歲主教其中其在各邑以企撫虔南昌袁廣江浙徽寧諸郡或一至再至未有厭倦至赴冲玄齊雲象山廬嶽天真諸會動經數月其答同志金門人問辨皆隨器成就因事辨晰其言明白簡易學者多所啟悟前後會語俱載集中歲庚戌先生屆六十九

邑士大夫以及門生親識俱赴後古書院為壽無慮千餘人先生家居既久凡邑有疾苦若惻瘼乃身如舉安福丈量則以一人嘏嘏其間不便者日為訕謗先生不少移節推危君獄實克成其事百姓至今賴之所著有危君遺愛集序甲辰乙巳連歲大饑先生率諸子出粟賑贍其鄉又數為書請糴於郡邑乞發於當道甚至為粥以餉餓殍既又勸義倉歲計贏餘以贍宗戚鄉人貧窘不能自活者則多方恤憐之嘗率諸子企鄉人修建橋梁躬自督勸至於清邑稅復沙米減額外機兵復水夫常數及議帶徵諸凡利於民者先生力贊有司致書懇於當道悉施行之鄉之父老子弟以及田野細氓無不陰德鄒氏至有額天以祈報者諸子及孫前後以科第發身每捷至邑中人輒曰此為善之報也人或以橫逆相加惟閉門講授若不知聞平居無他嗜好每與客延坐和氣盎然可掬往來與諸子諸孫書惟惓惓勉以問學於世之富貴利達泊如也季子善自丙辰登第歷



刑部郎中庚申以考績奉特恩先生復原職致仕母夫人俱進贈封恭人是歲先生壽七十海內士大夫仕於朝食於家者咸肅幣陳辭以獻祝誦視昔有加辛酉善奉命恤刑湖廣便道歸省先生深以欽恤民命戒之壬戌九月先生寢疾邑之髦倪交額奔禱諸子諸孫咸侍先生惓惓以母使人產毋縱家人生事毋傷骨肉和氣為訓疾之先月猶與同志大會優真書院發明言行合一之旨愈加緊切至十一月九日王龍溪儀至自浙入問疾先生拱手以別次日疾亟命義美扶坐正衣冠端然而逝訃聞通邑大夫士民奔走於堂深山窮谷不能至者皆會哭於其鄉諸生依各書院為位朝夕奠哭其在各邑亦然嗚呼先生可謂有始有終完名全歸者矣王夫人出嘉溪少叅公理孫女有賢行事載念慈嚴公所為誌中李夫人出瓜畝巨族子五人長義癸卯江西鄉薦美辛酉順天鄉薦俱入高等次善由乙卯鄉薦再登進士歷今官俱王恭人出次養次益俱李恭人出義

娶廬陵黃氏提督僉事國用女其初娶王氏御史文女繼娶周氏善娶臨川陳氏禮部郎中九川女養聘劉氏員外郎文孫女蓋聘伍氏同知守女女三人長適劉方伯佐子紹藩太學生次適廬陵楊少叅儲子應植幼許聘今吏部侍郎萬安朱公子維京孫男十一人德源德源俱邑諸生德涵戊午中江西鄉薦德溥德溫德治德泳德濟德洙德汴德添孫女九人曾孫男八人主庚京立唐玄庸聚曾孫女二人娶聘俱名族先生既卒之數月諸子遑遑經營墓事乃獲地於同里白竹岐之原期以甲子閏二月甲申裏事先期義等相率肅齋稽首泣謂儀望曰先大夫墓且有期純德純行不可殫述願吾子狀其實將請銘於當時鉅儒予惶懼力辭不獲乃謹按年譜次第書之卒乃申言曰嗟乎斯道在天地間自孔孟既沒異端蜂起性命之精淺微寔域至宋周程氏起而吾道正脉復有指歸乃再傳而門人私淑者互持所見競立門戶而其議遂紛然矣迄至我明陽明王公

勃起於困踣顛蹙、力求本心、乃恍然特悟於致良知一脈、以為直接千古聖門不傳之秘。於是海內學者翕然歸之。顧王公所言良知、明白直截、言下立悟、於是習聞其說者、立以聖人為必可至、其於躬行實踐多所缺畧。平昔所稱高明頓達、又多從意見悟入、各持所得以授學者。甚者參以老佛之說、自以為得良知妙悟。嗟乎、二氏之教、先儒以為闢之甚難、溺之甚易。吾輩乃又從史之、若云與吾道互相發明、何其悖也。先生蚤歲博極羣書、自六經子史以及百家、一經誦習、終身不忘。弱冠登第、即以文章氣節命一時。然自度臺一見王公、遂盡棄舊學、終身師事其說。平日著為文章、發為述答、自六經學庸語孟之外、惟元公聖學篇、純公定性書、並為學者稱之。今觀先生語錄、如跋大學古本、企問一篇、其於王公之學、互相發明。至論寂感、則云、四時常行、不論寒暑、百物常生、不論閑飲。故寂感無二時、體用無二界。論道器、則云、就其不可觀、不可聞、超然聲臭處、指為道、就

其可觀、可聞、體物不遺處、指為器。今人却以無形為道、有形為器。論良知、則云、昔見陽明先師時、便知從良知上致、只是認得良知粗了。故包漫世情、倚靠聞見、懸想精蘊、終於潔潔淨淨處、未肯著實洗刷。論真性、起脫、雖從無極太極悟入、則云、悟得此意、只在二氣五行流連中。故從四時常行、百物常生處、見太極、禮儀三百、威儀三千處、見真性。方是一濶出來。若隱隱見得真性本體、而日用應酬、湊泊不得、猶是有縫隙在。論聖學、則云、天命之性、純粹至善、而無形與聲、不可觀聞。學者於此、無從體認。往往以強索懸悟、自增障蔽。此學不受世態點汙、不賴聞見充拓、不須億中測度、不可意氣承擔、不在技節點檢、亦不在著迷繼往開來。凡有倚着、便涉聲臭、於洗心神明處、尚隔幾層。論費隱、則云、費是常發、隱是常未發。觀諸天道、四時常行、百物常生、而於穆無言、萬古如一日。吾輩知費而隱、隱而費、則日用云為、視聽言動、一於天則、而不可須臾離。論克己復禮、則云、以非禮



為己之私則可。以己為私欲。則禮安頓在何處。故克己復禮即是修己以敬。天下歸仁即是安人安百姓。論性善則云。形色天性。通一無二。以盡性而言性。即是氣。以踐形而言氣。即是性。嗚呼。斯道之傳。自濂洛以還。諸儒之說。具在其脉絡指歸。互有出入。求如先生之言。明白痛切。至當歸一。蓋亦罕矣。蓋先生之學。指受雖有所自。至其深造自得。彌老而篤。則今之學者。莫能至也。海內之士。謂陽明王公之學。所賴以不墜者。先生之功為大。誠知言矣。先生有集數十卷。大要主於扶天常。植人紀。不立異以駭俗。不銜奇以釣世。蓋其胸次豁達。精神瑩澈。恢恢然脫去藩籬。洞徹人我。其切磋善類。接引後學。涵以和氣。溫以春風。潤以時雨。故凡海內及門之徒。一見先生。傾心景慕。退則同聲而和曰。先生今之程伯子也。夫古之君子。懷才抱德。患不得遇休時。而際明主。先生自正德登第。迨巡館職。屢進屢退。彼其時勢艱危。年資未至。其引而退避。亦其宜也。今上以明聖睿武御極。

餘四十年。先生夙負重望。主上素知其名。然自嘉靖初。復運史局。尋以議禮貶逐。再宮洗。以上聖功圖不合。暨官祭酒。教國學。四方學者嚮風景從。乃復以自陳閒住。先生自遭廢家居踰二十年。前後薦者無慮數十輩。而卒莫能用。豈其汲引者未至耶。抑先生所遺。蓋有數存焉。而非人力所能與者。予觀明道在當時。遭遇神宗。欲用之者數矣。乃累以諫諍不合時事。卒為執政所扼。企後有登對者。至自洛。神宗輒問曰。程某在彼否。連言佳士。其注意如此。然竟莫之用也。以今先生觀之。其與淳公出處。可謂先後一轍矣。豈非天哉。先生平昔交遊多海內鉅儒長者。而在吾郡十居其三。及門之徒亦多以文章節誼自表見。前後躋膺仕樹功業者亦十數輩。若夫先生平生履歷及所論著。他日自當書於太史。播於金石。儀望竊以得於先生一二大者。僭為論次。以俟立言者採擇焉。隆慶元年。奉特恩追贈禮部右侍郎。諡文恭。蓋異數云。

（明文海卷四四四）

明故南京國子監祭酒贈禮部右侍郎諡文

莊郭公神道碑銘

公諱守益字謙之號東廓吉之安福人也年二十一冠多士於南宮。廷試。賜進士及第授翰林院編修其所爲文天下士爭傳以爲式然公不自謂足退而讀書山中數有疑於格致戒懼慎獨之說以質陽明先生先生曰致知者致吾心之良知於事物物也致吾心之良知於事物物則事事物物皆得其理矣致吾心之良知者致知也事事物物皆得其理者格物也獨卽所謂良知也慎獨者所以致其良知也戒謹恐懼所以慎其獨也故大學中庸之旨一也公大悟北面師事焉轉以其說告語門人弟子嘗記陽明書院曰良知者非自外至也天命之性靈昭不昧塗之人與聖賢同之特在不爲塵所縈而已戒謹恐懼如臨深淵如履薄冰所以保其靈昭之本體不使纖塵縈之也纖塵不縈斯廓然太公物來順應中立而和出天德純而王道備矣記主客之題名曰時無動靜學亦無動靜疲神外務汲汲焉以求可求成是用智者也凝神內照而脫略於人倫庶物是自私者也戒謹恐懼無繁簡無內外無須臾之離以求復

其性是去智與私而大公順應者也其赴南考功也予時督學江西延公於貢院公爲予誨諸生曰後世講學率自習染之後言之故退然以聖人爲不可學而不察夫良知本體原與堯舜無異邇來習聞良知之說矣復以意見測度自謂與聖人同體故遂以任意爲率性而不察許多病證見與堯舜不同斯二者其害道均也善學者必反觀內照直求本體果無所障則亦臨亦保亦式亦入纔是兢兢業業純亦不已一派源流及公自南雍歸士不遠數千里相率就公以學遊觀所至戶外之屨常滿公亦忻然與之辨義利析真僞闡慥慥肫肫之義申志學集義之說揭司儀之箴示學聖之要嚴講說聞見思索之戒推自卑自邇之可以光四表通神明抑虛談虛見之未可以爲知德凡爲會七十餘大會十答問訓迪疊疊不勌而其大指則惟在戒謹恐懼以致其良知至其謂世之豪傑孰不欲位育之運諸掌也而欠却中和孰不欲中和之體諸躬也而欠却戒懼聞見日博測度日巧摹擬日精至善日遠與所謂庸德之行庸言之謹時措於子臣弟友期相顧而慥慥是聖門規矩殺率者其言尤簡明警切故聞者莫不悚然興起隨其質



之高下功之疎密各有所得以成其身。羅文恭公稱公以爲能守其師傳而不疑能述其師之說而不雜。君子曰此天下之公言也。公爲人內剛外和色溫言厲長善救失出於誠心義所必行利害毀譽莫能撓奪。在嘉靖初其學已信於人田夫市儈時其講說趨而聽之惟恐或後。識者謂公大用卽古風動之化殆可庶幾。顧公仕于朝嘗顯矣而以直言勁節屢進屢躓竟不克一覩其道之行。夫豈非斯世斯民之不幸歟。初公以編修從陽明先生平寧庶人之亂加俸一級及大禮議起與涇野呂公先後上疏下詔獄謫判廣德州久之遷南京主客郎轉考功郎。

世宗皇帝將建儲以當事者所選官僚多出貨來不足備輔翼改命太宰松臯許公於是許公盡引一時之譽望而公召爲司經局洗馬兼翰林院侍讀。當事者以爲非已出不悅也。會公偕涇厓霍公上聖功圖小人相與構之禍幾不測賴涇厓故有寵得已。然公亦緣是見目爲迂南學士缺因以爲太常寺少卿兼侍讀學士掌院事改南祭酒。

九廟災公上疏自陳中引天人感應等語冀行所感動小人又因以爲讒詔閒住其居家祭民所不便。

言諸有司去苛役與其賦之不平者。緒橋梁廣陂堰。勸義倉恤災拯饑汲汲若不足事皆可書。然予以爲自孔孟沒正學不傳陽明先生出始一祛卑陋支離之弊而學者乃或失其宗旨競談玄虛而忘實踐便於無所拘檢而以戒懼爲窒於自然非公力排遣之其風靡波蕩不入於王何之爲不止。故公於斯道立坊樹準有大功焉。公之爲洗馬予實與同召及居京師予又從文恭諸君子日侍公予愛歸而公誦其後予濫竽內閣公賜之書倦倦以用易爲教及予幸未政方擬薦公未數月而公遽卒。

今皇帝卽位褒錄諸賢詔贈公禮部右侍郎諡文莊予始獲以職事少見意於誥詞則今著公功之大者以銘於碑固予責也。昔公序陽明先生集謂時有稱先生之文章政事氣節勲業而獨病其講學以爲去此則爲全人者先生笑曰其願從事講學一節盡除却四者亦是全人。今予銘公略於其四而於講學獨詳其亦公之意也夫。公生于弘治辛亥二月一日卒于嘉靖壬戌十一月十日享年七十二。後三年甲子閏二月甲申葬白竹陂之原。又後二年邑人士祠公學宮之左與其生祠之在廣德者皆以春秋薦。

組立焉。曾祖諱仕魯。祖諱思傑。考諱賢。舉弘治丙辰進士。仕至按察僉事。元配王氏。封宜人。贈恭人。生子三。義嘉。靖癸卯貢士。順天府通判。美辛酉貢士。善丙辰進士。山東提學副使。繼李氏。封恭人。生子二。養蓋。女三。長嫁太學生同邑劉紹藩。次嫁廬陵楊應禎。幼受萬安朱維京聘。孫男十。德源、德溶、俱邑庠生。德涵、戊午貢士。德溥、邑庠生。德溫、德治、德泳、德濟、德洙、德澡。孫女十。曾孫男女十五。詳見賀子世采等所輯公行實中。銘曰、

維古明道必資於言。洙泗以降其言日繁。道以言明。亦以言晦。玄虛眇微。皆道之累。昔在紹興。發明良知。格物慎獨。惟以致知。聽謬傳訛。異說則起。窮高極幽。而遺踐履。士樂其便。或眩其奇。謹叟奔走。公用嘆咨。闡我道真。闢彼淫說。曰惟戒懼。知乃可致。去爾測度。黜爾見聞。翼翼兢兢。以事天君。庸德庸言。慥慥篤實。是謂聖門。規矩毅率。士乃恍然。如客得歸。持節據守。道以不違。猗嗟正學。紹興始倡。幾晦而明。惟公是仗。公於斯道。其功實弘。乃其緒餘。世已競稱。我揭斯銘。公之神道。後有作者。尚其來倣。

徐階撰（世經堂集）卷一九

明故南京國子監祭酒致仕東廓鄒公墓志銘
夫學之始也。莫善於以言相啟。及其久也。莫不善於執言而離宗。知言有宗。不為所眩。性情相應。加損不形。而擔當負荷。屹然特立。此師道至難。古今一奇遇也。自陽明王公以學自命。遊其門者眾矣。融會敷行。傳之人者。無若東廓先生。故於其來也。虛席以待之。其去也。凝目而送之。以為斯人也。吾道之所寄也。嗚呼。其望之重如此。是可一日失之。使不得與於斯道也哉。先生名守益。字謙之。號東廓。姓鄒氏。鄒之先自永豐徙安福。至克脩居澈源里。始以儒起家。曾祖仕魯。祖思傑。父賢。登弘治丙辰進士。仕至福建按察僉事。母周夫人。以弘治辛亥二月一日生先生。有異夢。僉事官南都。而先生師胡司寇璉。年十七舉鄉試。娶王夫人。未幾周夫人卒。辛未鄉試。陽明公為同考官。賞識之。遂置第一。廷試及第第三。人授翰林院編修。而僉事遂解官。踰年先生亦告歸。自少舉業有聲。比歸授經山房。無異也。一日談論語。中庸。



訝曰。程朱補傳而先格致中庸。乃言慎獨何耶。積疑莫釋。已卯。就問於陽明公。論辨反覆。幡然悟曰。道在是矣。自是奉言無所違。宸濠反。從義起兵。今上登極。錄舊臣。先生始出。癸未。如越。既別。悵望不已。門人問之。公曰。曾子羨友。所謂以能問不能。彼幾之矣。既復職。與經筵加文林郎。於是贈僉事奉政大夫。母進宜人。封妻孺人。大禮議起。偕同官上疏。不報。甲申。復疏忤旨。下詔獄。與呂修撰。柙聯事。未幾。謫廣德州判官。復入。越久而復行。在官。未歷民事。至是。無敢退託。發奸摘伏。有未嘗試而剖析如見者。猶曰。若保赤子。愧未之能也。三年。擢南京主客郎中。戊子。服陽明公喪。辛亥。當給由而痔作。遂以病歸。冬。進奉政大夫。妻進宜人。丙申。程太史文德量移為令。為之翊化。任嫌不少辭。戊戌。用薦起為南京吏部考功郎中。以司經洗馬召。上聖功圖。有所犯。衆掇得免。在職。充經筵講官。上薛文清從祀議。品據精確。是夏。陞太常少卿。兼侍讀學士。掌南院。六月。王夫人沒。十二月。陞

南京國子監祭酒。以嚴為教。意不少回。辛丑。九廟災。上時政。拳拳解譬。冀有感動。語太直。致竟解官。明年。娶李夫人。已卯。至壬戌。四十餘年。學之不足。反而加密。蓋進退不知幾矣。而教之所施。莫大於自任之隆。無一日而眾不與聚。亦無一日而不與眾偕。中之自得。有名位卑高所不能移也。道之衰矣。士無承襲。故不得不力振。以為先馳。始而專求篤踐。無少疑滯。既惟恐其說之不明。已而心與言俱。言與聲應。又惟恐其傳之不廣。久則精神意氣。無有二事。欣欣朝夕。不知孰為在我耶。孰為在人耶。與之俱忘。不自覺也。蓋紹興之學興。而致良知之說。莫不甚習。眾口交騰。是非互出。未有即其心所安者。先生引誘其入。不至相忤。既得底裏。而唯諾應對。又皆足以發之。舉其似者。不聞則已。聞則莫不盡其情。執而疑者。不見則已。見則莫不平其氣。欲究陽明之說者。探之而愈深。欲伸百家之喙者。辨之而不得。溫言和氣。隨處轉授。無往而非可教之人。曲譬廣證。隨事發揮。無感

而非可動之聽。雖未嘗立奇異以駭常。而隨問隨答。莫不各中其節。而得所欲。雖不必懷饑渴以慰意。而無小無大。莫不各吐其衷。而遂所長。入門者得指摘。以為持守之階。向風者取形。以為開鑰之助。故與先生交者。徧天下。而尊王公之學者。至於今不忘。然冰玉皎潔。有如神明。怡怡可親。無復嫌忌。惠愛為德。被以春溫。怒者忘。躁者釋。如奏雅樂。聞九韶。聽之不厭。即之而莫能舍也。蓋其得於天者厚。故出之而有餘。成於學者多。故泯之而益競。獎人之善。能悅服矣。不以志合而益增其高。拯人之愚。能含容矣。不以跡殊而始張其大。雖家庭耳目之近。言皆可師。而衽席屏帷之間。曲而不隱。蓋躋之使前。不可得而克肖也。知教之不可不豫也。則立書院。建祠宇。廣鄉約。以清其源。知弊之不可不革也。則舉清量。明戶役。以正其始。其他賑貸周族。睦隣施義。繕道橋。廣陂堰。又若恫瘝在身。不容但已。恐去害之不速。不知永利之垂也。至於文辭翰墨。巨冊十餘。咸主從心。獨出

已見。若寂感之無界。道器之無分。良知之無倚。真性之無待。聖學之無染。實隨之無間。性善之無二。又皆發先儒之所未發。實則根約理緒。會無勦襲。然則先生不朽於世。遠而必傳者。是可以輕擬妄億哉。庚申。先生以季子考績恩復職致仕。妻王氏。李氏。進恭人。是年先生七十。海內學者咸祝誦之。又明年壬戌。偶病不愈。病亟。召家人訓飭之。不異平時。十一月十日。無言而卒。病之稍加。走而禱者。交于途。變之驟起。哭而奠者。屬于道。嗚呼。希矣。夫人王氏。嘉溪少叅公理孫女。李氏。出瓜畬巨族。五子。義舉。癸卯鄉試。娶廬陵黃氏。提學僉事國用女。美。舉辛酉順天鄉試。娶王氏。御史文女。繼周氏。善。登進士。刑部郎中。娶臨川陳氏。禮部郎中九川女。出王氏。養。聘劉氏。員外郎文孫女。蓋。聘伍氏。同知宇女。女三。長適劉。布政使佐子紹藩。大學生。次適廬陵楊叅議。儲子應貞。幼聘萬安朱吏部侍郎衡子維京。出李氏。孫男十一人。德源。德濬。俱諸生。德源。舉戊午鄉試。德濬。德溫。德治。德

泳德濟、德沐、德汗、德深。孫女九人。曾孫男八人。曾孫女二人。娶聘皆名族。又明年閏二月甲申、義等奉柩安于里之白竹陂、首震趾兌。先期請銘。洪先少先生十有三歲、後進行也。每勞汲引、不過鄙夷。已亥之徵、得與同列。辛丑遠播、事異跡符。香社精廬、追隨實久。閉戶三載、何遽見遺。曾不踰年、雙江亦逝。行輩漸寡、附麗安從。嗚呼、豈不悲哉。惟先生所營、關係萬古、一日之是、人心所同。矧會大方、立辨諸起。既執要領、且獲依歸。秉妙鑒而群分、賦異質而深造。尚友之士、亦有考于斯乎。銘曰、

惟道在人、如水隨器。盡其所容、皆以為是。哲人器巨、言與道稽。或就質問、響答無疑。繼師作人、幾四十歲。有覺方來、陽明之裔。早繙帝紀、違俗求之。應時而出、為夢為夷。入聽不諧、一斤南服。親歷諸難、郎曹再屬。宮臣載召、于國有華。手綰正印、日麗天葩。立之司成、士有歸命。不諒其忠、奉身以正。歛於旁達、守嘿時揚。一時之遇、百世之光。惟道之精、多與時會。孰奮而存、

孰施而潰。孰引孰尼、惟是之歸。於乎斯藏、來世其依。

羅洪先撰（念菴文集）卷一五



藏

明儒碑傳集

卷五一

東廓鄒先生守益傳

王時槐

東廓鄒先生守益字謙之安福人。正德六年會試中式第一。廷試賜進士及第。第三人授翰林編修。踰年告歸。一日與士人談中庸。嘆曰。程朱補大學格致傳而中庸乃首言慎獨。不及格致。何耶。積疑莫釋。十四年謁陽明王公於虔臺。論辨反覆。幡然悟曰。道在是矣。遂執弟子禮。宸濠反。從義起兵。嘉靖改元。錄舊臣先生始出。復謁王公于越。請益月餘。既別。王公悵望不已。門人問曰。何念謙之之深也。公曰。曾子所謂以能問於不能。云云。若謙之良近之矣。大體議起。上疏忤旨。下詔獄。謫廣德州判官。復入越。久之乃蒞任。作諭俗文以訓民。撤淫祠。建復初書院。與四方來學者講授其中。而決事發奸。捷伏剖析如見。猶曰。如保赤子。吾愧未之能也。擢南京禮部主客郎中。任滿告歸。程太史文德量移安福令。相與舉行鄉約。建復古書院。後學多所興起。用薦起爲南吏部考功郎中。以司經洗馬召。上聖功圖。幾得罪。衆抹得免。尋上薛文清從祀議。陞太常少卿。兼侍讀學士。掌南院。陞南國子祭酒。以嚴立教。士習爲之一變。九廟災。有旨諸大臣自陳。諸大臣皆惶恐引罪。先生獨上疏。惓惓於上下

交修之義。至引殷中宗高宗反妖爲祥語。甚懇切。遂落職閒住。先生自以身退草野。學不大行於世。惟有講明道術。覺人垂後。爲吾儒分內事。於是一以興起斯文爲已任。四方學者雲集。福藜先生溫粹寬博。士無賢不肖。悉容納攝受。隨材而牖迪之。學者望其容冰玉皎潔。如神明之恍臨。而鄙心自消。聽其言平易融微。如天籟之清響。而宿蔽自釋。觀其泛應曲酬。慈煦惻怛。出於至誠。惟恐一物不得其所。如春風披拂。藹然天地生生之德。莫不心醉而神怡也。凡得見先生。卽孤介者自愧其隘。執見者自覺其偏。博綜者自傷其支。而負材抱奇。擅長一得之士。咸輿然自失。如涉滄溟。而自知川渚之小也。先生之學。以萬物一體爲大。以子臣弟友。慥慥相顧爲實地。以戒慎恐懼。健行不息爲真功。以寂感體用。通一無二爲正學。以胞胞。皜皜合德。天地爲極致。語具在遺集中。先生不立異同。不設險與。百家羣議。卒不能出其範圍之內。而精明純一。能使海宇之士聞風而嚮服。蓋陽明王公之學。盛於東南。實賴先生力也。居鄉深念細民利病。如痼瘕厭躬。屢畝平賦。省役賑饑。恤患之類。其事不可縷數。皆達於部。使郡邑罷行之。皇皇如弗及。邑人

沾蒙惠利、愛戴不啻所生。疾亟、召諸子孫、以篤倫哉。下愛人爲訓。正衣冠、端默而逝。年七十有二。隆慶元年、詔贈禮部右侍郎、謚文莊。蓋異數云。諸子及孫登進士鄉薦者繼踵、皆能世其家學云。

《國朝獻徵錄》卷七四

東廓鄒先生傳

先生諱守益、字謙之、號東廓、姓鄒氏。其先自永豐徙安福。至克脩居澈源里。始以儒起家。生仕魯。仕魯生思傑。思傑生賢。登弘治丙辰進士。仕至按察僉事。僉事一夕夢孔子立于門。厥配周宣人亦夢白鵲于懷。乃弘治辛亥二月一日先生生。先生生而穎敏。循齊九歲從僉事公南大理宦邸。羅整庵公_欽見而奇之。已游胡司寇璉之門。力學精思。德器日粹。棘寺察案相慶。署中有頌子云。正德丁卯先生年十七。以春秋中鄉試。其年婚娶王氏。尋母周宜人卒。治葬廬墓側。越辛未先生年二十一。會試第一。先是文成王公移今廬陵。先生慕而謁之。一見期許。是歲王公以吏部主事司分校。主試者知王公有精鑒。出諸雋卷取敷。王公閱及先生卷曰。此必安福鄒某也。亡論文其人品亦冠天下者。遂冠南宮。廷試及第第三人。授翰林編脩。僉事公時任閩。遂解官歸。踰年先生亦引疾歸侍養。四方人士



儒藏

來受學。一日讀大學中庸。訝曰。子思受學曾子者。大學先格致中庸首揭慎獨。何也。積疑不釋。已卯先生年二十九就質王公于慶臺。王公曰。致知者。致吾心之良知于事。物。二也。致吾心之良知于事。物。二。則事。物。二。皆得其理矣。獨即所謂良知也。慎獨者。所以致其良知也。戒謹恐懼。所以慎其獨也。大學中庸之旨。一也。先生豁然悟。遂爾贅師事焉。逾月。再如慶臺。未幾。宸濠反。先生聞變。率昆季群從超吉郡。從義起兵。王公喜曰。君臣師友義在此舉矣。嘉靖壬午。世宗登極。錄舊臣。逾年。先生始出。如越。謁王公。參訂月餘。既別。王公張望不已。門人問曰。夫子何念謙之之深也。王公曰。曾子云。以能問不能。以多問寡。若無若。虛犯而不校。謙之近之矣。入京。復職興。經筵加文林郎。贈食事公奉政大夫。母宜人妻孺人。會大禮議起。先生偕同官上疏。不報。甲申復疏。上怒。下詔獄。謫廣德州判官。取道于越省王公。而後履任。先生未歷吏事。

而莅官臨民。務以誠心相感。發奸摘伏。人稱神明。而猶常自訟曰。如保赤子。未能也。撤淫祠。建復初書院。延同門王心齋良暨諸賢講學典禮。風動隣郡。寧徽池太間志學風至今。冠江左先生啓之也。丁亥。先生年三十七。陞南京王客郎中。逾年。王公卒于師。先生服心喪。九華書院成。先生記之。其畧謂良知即天命之性。靈昭不昧。塗人與聖賢同。惟能戒謹恐懼。保其本體。斯廓然大公。物來順應。中立和出。而天德純王道備云。在部日與耳泉。林涇野。郝聚講。一日病。同門王心齋。薛中離。倪鉞。緒山。洪。王龍溪。嚴幾。偕來商兌。先生臥聽之。嘗自省曰。從前就事體。念尚非本體流行。不免起滅云。記主客司題名。明學無分。而神外驚求。可求成是用智者也。凝神內照。而脫畧於倫物。是自私者也。戒謹恐懼。無內外。無須臾離。以求復其性。方是去智與私。而大公順應云。辛卯。給由至真州。痔作。請告歸。過蘇常。訪親。蒞渠校諸公。發知行敬義合一旨。秋



趨舍稽哭王公存撫其孤聚同門講學於天真書院還里會桂太史文時量移爲其邑令贊之方田均賦不避嫌怨邑民至今賴之甲午叙文成文錄中稱文成之道愈簡易愈廣大愈切實愈高明其文章政事氣節勲烈皆一良知流行云丙申大會於復古作惜陰說以警同志畧云天道無停機元亨利貞以時行而百物生良知無停機仁義中正以時出而萬化成云戊戌先生年四十八薦起爲南京吏部考功郎中時徐文貞階督學江西約藩臬諸公率諸生肅先生開講於貢院先生發明性善之旨畧曰後世講學率自習染之後言之故退然以聖人爲不可學而不察夫良知本体原與堯舜無異近來習聞良知之說矣復以意見測度自謂與聖同体故遂以任意爲率性而不察許多病証見與堯舜不同斯二者其害道均也孟子道性善是直指本体使學者反身切己自成自道中間種過惡皆是自欺自盡不是性中帶來善學者反

觀內照直求本体果無所障則亦臨亦保亦式亦入總是兢業三業三純一不已一派源流云已亥世宗將建儲太宰許奉旨簡官僚先生以譽望召入爲司經洗馬當事者以非已出不悅會公偕霍公上聖功圖因搆之禍幾不測賴衆救免充經筵講官應詔上薛文清從祀議具奏時與徐文貞羅文恭洪趙浚谷唐荆川順相資切待御毛介川愷張浮峯元胡梅林宗咸從之游士類興起甚衆居頃之陞太常少卿兼侍讀學士掌南院蓋當事者忌而遠之也毛介川上疏留亦調外任先生出京時著醫說爲同志留別畧云善教之淑群才也猶醫療病學者思淑身猶抱病而求療也夫直而不至於溫不足爲直寬而不至於栗不足爲寬剛而不免於虐簡而不免於敖不足爲剛且簡唐虞數學醫案具可覆云六月抵南都王夫人卒尋改南京國子監祭酒先生遵成憲申章矩立誦冊俾出入相友淑慝相規勸歌詩習禮六館

士相慶得師。居無何。九廟災。太臣該自陳。先生疏中寓交儆意。謫者因中傷之。竟解官歸。是歲嘉靖辛丑。先生年五十有一也。明年夏。繼娶李夫人。秋會西里。明年癸卯。遊南嶽。申濂溪無欲篇示楚學者。又曰。除却自欺便無病。除却慎獨便無學云。歸歷攸邑。諸生聽講於金仙洞。語諸生格致旨。謂子臣弟友庸德庸言。至於相顧而慙。二是聖門致知格物工課云。甲辰會北里。發易損卦旨。云懲忿則火不炎上。窒欲則水不流。是謂水火既濟。長生久視之方云。乙巳會富池。申師訓云。聖門志學是志。不踰矩之學。吾儕講學以脩德。而日用踰矩處乃安之。何以手善。協一秉彝之良。必不能安。自戒自懼。顧明命而順帝則。此是時。二下學。時。二上達。時。二無愧。作。崇四海。侯百聖。合德合明。合序合吉。凶只是。一矩云。丙午大會於青原。遂會白鷺。發孟子大丈夫旨。丁未遊廬山。開講於白鹿洞。揭濂溪易惡至中語。是聖學正脉。舉晦菴脫凡近遊高明。

四語。是喚醒來學。趨避關頭。舉象山。論義利。講義。是指出本心。斬截支離葛藤。未申中庸戒懼。不觀不聞。裁成輔相。舉自中和。流出。乃是學術。王伯訣竅云。又著學聖篇。畧云。無欲爲要。是希聖希天。徹上徹下語。古聖於逸樂聲色。周游罔淫。不運不殖。猶惻。勸規如是。吾儕不猛自洗刷。而依違其中。安望其入聖域而達天德哉。戊申。會復古石屋。友有嗟苦世界磨者。先生謂善學者。以拂辭爲玉成。不善學者。以榮華爲桎梏。知無入而不自得。乃可以語須臾。不可離學術云。其年九月。會吉水之龍華。語羅文恭及諸同志云。古人發育萬物。只從此三千三百究拓。不是懸空擔當。二千三百只從戒懼真體。流注不是枝節檢點。自天子至於庶人。一是皆有中和。一是皆有位育。中和不在戒懼外。只是喜怒哀樂。大公順應處。位育不在中和外。只是大公順應處。君臣父子交接處云。又云。學分動靜。分有無。不是。正脉。仰觀於天。常運。俯察於川。



常流內省於良知昭然常虛常靈。日入虞淵未嘗不照。水渴未嘗不流。心遇岑寂未嘗不知。故慎獨之學。晝夜獨知不慎。迷謬天則。更何言學。己酉會復古。作惜陰申約。畧云。惜陰之會。始丙戌。到今。開會之友。精進者少。因循者衆。喜怒哀樂遷而自以爲認真。言動多苟。而自以爲無傷。子臣弟友。宗族鄉黨。多少不盡分處。而自以爲無貶虧。知者不肯言。言者不肯盡。而聞者亦不肯受。不幾于相率而爲善柔乎。循是以往。坐枉此生。上以貽玷師門。下以疑誤後學。中喪思之。極自然之可也。其年大會南浦。諸公論心。休自然。先生曰。天爵健而不已。聖學常勉而不息。健是太極之自然。強是眞性之自然。邇來學者。以因循爲平等。以嚴密爲過當。於古人戒懼恐懼。幾若長物。恐非自然宗旨云。有友云。眞性超脫之機。須從無極大極悟入。先生曰。只從四時常行百物常生處。見大極。禮儀三百威儀三千處。見眞性。見得眞性。本體而日用應酬。奏

泊不得。非下學上達之旨也。又述晦菴嘗云。有天地後。此氣常運。有此心後。此心常發。惟當於常運處。見太極。於常發處。見本性。若離常運而求大極。離常發而求真性。恐不免佛老之荒唐。此語甚精確云。庚戌先生年六十。其年至祈門。會講于東山。舉齊景公駟不及飯。夫管仲一匡取羞童子。以破世貪富功利之關。又舉考亭勿爲嬰兒而爲大人語。因引孟子語。夫有曰大曰小。曰賤三品申之。訂會約云。先生往。憂考亭舉小成。虛遠之旨。爲勸戒。寤而惕然。至是爲文以奠。中云。安於小成者。沾沾自足。而不求極致。至於不著不察。驚於虛遠者。累累自斃。而不察實病。至離物遺倫。耽景侵尋。猛自怨艾。以是取善四方。不遑寧處云。時聶雙江豹有歸寂說。先生致書畧云。良知一字。與天地同運。日月同明。假感無二時。體用無二界。惟能戒懼保本體。不以世情一毫自污。不以氣質自穢。不以聞見推測自鑿。方是合德合明。皜二脍二宗旨。若倚於

感則爲逐外、倚於寂則爲執內、病於本性均也。辛亥避暑武功、與學者發明孟子牛山章、問誰爲斧斤牛羊、諸生有以聲色貨利對者、曰此公劉、太王興王之具、而可咎耶、或以妻子爲累者、曰操井臼、承宗祀、此孝養之資、而可咎耶、諸子以斧斤牛羊其咎在已、先生然之、曰知自由已、而後自成自道、自暴自棄、更無躲避處、時先生教語多主默識、曰默識是不厭不倦、宗旨子思戒懼不聞不覩、正是默識工夫、此從唐虞相傳道心惟微來、末章上天之載、無聲無臭、正發此默識極則云、有以出處當先生者、先生云、順逆境界只是晴雨、出處節度只是語默、此中潔淨乃無往不潔淨也、壬子會復古、示學者曰、戒懼之功雖同、而其血脉各異、戒懼於事與念皆未也、惟戒懼不覩不聞者、念慮事爲一以貫之、是爲全生全歸、仁孝之極云、乙丑春、會復古極論好學辨志之旨、曰求飽求安、是千罪萬過之窠臼、從古聖賢皆從不求安飽煨燂出來、顏子之

樂從簞瓢陋巷中得、禹無間然、在非飲食惡衣服卑宮室、丙辰季子善登第、詩勗之、中云、國恩何以報、家範安可踰、爲諗同升友、全歸明命初、是歲耳泉湛公由衡山來青原、時公年九十、一而先生年亦六十六矣、率仲子及諸同志迎之、預誠同志體古憲老不乞言意、毋煩辨論、而先生晨夕躬定省、執爵執醕、一準古養老禮、惟謹、嗣冒大水、連舟送至虔、洒涕而別、湛公慰之曰、子慮此別不可再耶、踰十數年重來晤子也、湛公重嗟嘆王公之門得人如此、丁巳會白鷺、學以王敬所率生儒以千計聽講、先生發明學庸合一之旨、畧曰、大學以家國天下納諸明二德、中庸以天地萬物納諸致中和、天地萬物、家國天下之總名也、中和者、明德之異名也、明德新民而止、至善安焉、曰率性復焉、曰脩道而本、本源不越、慎獨一照、獨慎則意誠、誠則忿慥好樂無所滯、而心得其正、命之曰中、親愛賤惡無所辟、而身得其脩、命之曰和、立中達和、溥博



無藏

明儒碑傳集

卷五一

而時出之以言乎家庭曰齊以言乎閭里曰治以言乎四海九州曰天下平。人人有家國天下人人有天地萬物。自天子至於庶人無二學。自唐虞至於洙泗無二功。世欲位育而不致中和欲致中和而不戒愆聞見日博測度日巧摹擬日精而至善日遠矣。純公定性之功以大公順應學天地聖人之常無將迎無內外無動靜而川上一嘆揭天德王道之要歸諸慎獨。宛然聖門宗旨云。會香積學者問顏子克己曰。以非禮爲己之私則可以己爲私欲則不可。曰。爲仁由己正葬此已。視聽言動皆已也。問曾子爲人謀。肯曰。仁者人也。立人之道曰仁與義。以仁義存心而全歸是謂人道。賊仁賊義無惻隱羞惡之良則爲禽獸而非人。發憤忘食忘憂老至不知孔子爲人也。擇中庸得一善則服膺勿失。顏子爲人也。仁以爲己任死而後已。是曾子爲人謀而忠處不能仁爲己任則一善自足爲弗弘不能死而後已則半途而廢爲弗毅。非忠於自謀

者。交而信薄此學於友也。傳而習迪此學於師也。若以忠人之謀繆之是舍其田而芸人之田非其守約之學矣。問費隱曰。即博文約禮肯文也者。禮之見於外者散于事而萬殊故曰博。禮也者文之存于中者也。根于心而一本故曰約。五常百行三千三百罔不周備是文也。何費也。孰主宰是孰綱維是即之無所措之無定孰之無得是禮也。何隱也。知費而隱隱而費則寂感無二時體用無二界。日用營爲視聽言動一于天則而不可須臾離斯可與語欲罷不能。帝規帝矩無方無體而不可言象末斯可語欲從末由矣。問孟子性善曰。此即大學明德中庸率性一派源流。分氣質天地官性者離矣。其年又示季子書云。古之學脉只從齊明威服以事上帝事鬼神以明德物察人倫游衍出王更無二塗。轍先師謂齊明即惴惴威服即威儀良工苦心云。戊午會復古與雙江念菴師泉諸公究極寂感之旨。夏再會題同心卷慨仁之難成由人或

知趨于善者不知力學。知力學者不知歸道。而宿於仁云。冬復真書院成。示學者云。仁者人也。是聖人示做人正脉。須仁爲己任。方可頂天履地。立三才之極。否則無惻隱羞惡。便近於禽獸。然仁義之實。只從事親從兄。自通自卑。做去便可通神明。光四表云。時徐文貞當國。寓書勉之。用易。畧云。一陽之卦。賤富。有以自得。在初爲復。不遠復。無祗悔。而見天地之心。在二爲師。承天寵。以懷萬邦。在三爲謙。勞謙而有終。在四爲豫。朋盍簪。而大有得。在五爲比。三驅而邑人不戒。在六爲剝。得輿而民所。一六真純精粹。不受一毫陰邪汙染。是以朋來無咎。充實輝光。爲泰爲乾。以立三才之極云。已未。又書示季子云。學之正脉。只是慎獨。獨知不含晝夜。天運川流。三千三百。登峻極。皆由此出。不是聞見測度。講說得來。故曰上帝臨汝。無二爾心。戰兢臨臨。溪樓薄。古人事親事天。更無別塗轍。須臾離之。便於仁孝有虧云。庚申。先生年七十。赴懷玉會。

發孟子鷄鳴章是學脉。研幾利善之間。舜跖攸分。中更別無駐足處云。其年謁陽明祠。門人胡宗憲時總制浙東來迎。因入天真開講。語具浙遊講語中。或問知德者鮮。曰。此聖學入微脉路。虛談虛見。未可爲知德。子路聞善必行。告過必喜。勇矣而猶未知德。蓋善從開來。過從告來。非降衷靈明自充。自訟者。故惟擇中弗失。不善必知。德性用事。天運川流。始爲知幾。始爲知止。斯爲行著習察。致良知之傳。游武夷謁文公書院。及陽明甘泉祠。語具武夷荅問中。其年季子善以刑部主事給由。復先生原官致仕。贈封王氏李氏俱恭人。辛酉。會復古。發道心人心之旨。曰。動以天曰道心。無聲無臭。故曰微。動以人曰人心。作好作惡。紛然不安。故曰危。惟精者。慮道心之不一。而或雜也。惟一者。一於道心也。常精常一。是爲允執厥中云。壬戌。先生年七十有二。八月。大會復貞。開示學者益肥切。謂天下之道二。惟誠與僞。天下之學術二。惟言與行。庸行



庸言時措於子臣弟友相顧而慙慙是聖門之
規矩彀率云九月寢疾召家人訓飭之不異平
時十一月十日諸子扶坐端拱正衣冠而卒當
疾亟時走而禱者交於途計聞哭而奠者屬於
道爲位以哭服心喪者幾徧域中越二年甲子
塋於邑竹坡原羅文恭銘其墓徐文貞表之邑
人士呈請祠之學宮左春秋蒸嘗焉丙寅 禮
宗登極改元 詔贈禮部左侍郎謚文莊先生
生子伯義字某舉嘉靖癸卯江西鄉試仕 仲
美舉辛酉順天鄉試季善登嘉靖丙辰進士仕
累太常卿義生某善生德澍登隆慶辛未進士
仕至河南按察司僉事具別傳 德澍登萬曆癸
未進士見任翰林編脩美生德泳登萬曆丙戌
進士見任某道御史

楚黃耿生曰孔氏學脉歸于求仁學不識仁而
師友道喪久矣惟先生以天授現材弱冠魁天
下遺迹金馬蓋不待荐躋崇臚而燁二清華僉
參其地望隆重矣顧一聆文成致知旨而遂委

心遜志俛就弟子列何自抑損如是綜其終生
凡形之譔著見之答問家庭孺稚之訓飭解惟
閑閑之諭誠一惟師旨是發不少違異累豈不
能增一新諦特標一異幟哉蓋天寔啓之妙契
神解的見夫師所授育是孔氏爲仁正脉肇之
虞庭者本諸身心推之家國達之天下俟之百
世不容易矣且玩其緒言因証諸日履跡其顯
行寃朕隱衷蓋以身發師傳非若世學徒以言
詮知解承接者是故進而立朝抗論正議納約
失謨至忤種貴觸雷霆屢蒙嚴譴迨遭沒世而
無悔非以爲名也致其獨知不欲負所學以負
吾君也退而林居力替有司方田均賦卹災賑
饑與夫繕橋梁枵義倉廣陂堰凡創制剔弊雖
有嫌怨而不避非以爲德也致其獨知若瘝躬
納溝不容自己也自南雍免歸繼室之嘉禮甫
成踰月即出西里講學明年遊南嶽尋遊廬阜
若越之天真閩之武夷徼之齊雲寧之水西咸
一至焉而境內之青原白鷺石屋武功連山香

積歲每再二至。遠者經年，近者彌月。常會七十，會聚以百計。大會凡十，會聚以千。絳帷一啓，雲擁星羅，或更端承稟于函丈之前，或簪筆記述於比席之后。負牆側聆者肩摩，環橋跂覩者林立。而先生溫言和氣，隨機轉授，曲譬廣証，隨事發揮。若無往非可教之人，無感非可動之物。然者蓋先生居嘗齊順逆之境，若晴雨視榮貴之遇，如浮雲。而于會友明學，則若飢之于食，寒之于衣，植根自天而不容自己矣。緬懷自受學后，四十年間，歷壯至老，歲止抵暮。月朔至晦，日夕達旦，心之所營，趾之所措，曷常一息一念及私圖哉。蓋亦無間矣。又輒近承學有以縱任爲性，体自然者，先生既二焉。申戒謹恐懼，自明自強，不息爲真性，蓋懼后之流于蕩而約之于獨知也。有以寂靜方爲知体之良者，先生既二焉。示天運川流之幾，明寂感動靜無二界，蓋懼后之倚于內而一之于獨知也。又有以學從無極悟入方透向上一機者，先生既二焉。揭庸言庸行，

明下學上達無二途轍，蓋懼后之離而流于邪，而實之必物格知乃致也。凡以弘師旨之傳，廣與人爲善之量者，心獨苦矣。羅文恭誅之曰：先生以一身爲天下，以一日爲萬世。其愛知先生之獨知也哉。善哉乎！王心齋氏推言之也。嘗寓書謂先生曰：堯舜以不得禹、皋、陶爲已憂，孔子以不得顏、曾爲已憂，位分雖殊，其爲天地立心，爲生民立命一也。愚謂姚姒以君相爲仁，而仁覆天下；孔顏以師友爲仁，而仁流萬世矣。孔之顏故堯之舜也。昔文成稱先生幾顏子，所期者遠也。王心齋發所自悟大學止至善旨于先生，智亦足及之。乃先生則固神明默成之矣。惟我昭代，魏科膺仕，奕世雲仍多有之。顧此學一脉淵源世濟，如先生裔胤，不少樂見識者，僉稱先生弘大博厚，厥后浸昌浸盛，有以也夫。

明儒碑傳集卷五十二

張岳 童承叙 戚賢

明故資政大夫總督湖廣川貴軍務都察院

右都御史贈太子少保謚襄惠淨峯張公

墓誌銘

公諱岳字維喬號淨峯其先蓋出黃帝之後少昊氏有子曰揮能制弓矢教民帝賴其用命為弓正而封之尹城賜姓曰張其後世子孫益蕃代有顯者漢留侯良晉司空華唐文獻公九齡其尤著者也五代時始自曲江遷閩之惠安入明有為桐廬丞諱茂者公會大父也祖諱綸萍鄉令考諱慎英德令自萍鄉至英德皆有文行以公貴贈都察院右副都御史母鄭氏贈淑人公生而室有光桐廬異之曰是必亢吾宗名之岳岳大名也及長端凝不為羣兒戲好學不勌遂博極羣書弱冠試于鄉其所對策書紙背盡滿主司大奇之擢置第一舉正德丁丑進士授行人武皇帝寢疾豹房獨宦者數人侍公上疏請令大臣臺諫朝夕起居不報寧庶人謀逆聲播遠近上將南巡中外洶洶諫者數十輩已前繫詔獄公復率其僚切諫

上怒杖闕下既而釋之調南京國子監學正今皇帝即位盡還

武廟時諫者官復以公為行人居久之遷司副尋擢南京武選員外祠祭郎中丁祖母憂服闋補主客郎中由主客出為廣西提學僉事復改江西坐廣西所貢士廷試黜落七人貶廣東提舉初公為主客大宗伯與執政議禘禮不合執政知其出於公也忌之然未有以罪至是乃貶云甲午起知應州始教民田而嚴盜珠之禁民以不滿死改建學宮遷其俗覽親為講授廉用得去荒陬齒中州安南以亂久不克貢朝議將討之公疏言遠夷相攻殺不足為出兵勞弊中國既不報則遂治兵食立營堡計王師所從入水陸道里之詳事有緒矣會滿三載擢浙江提學副使尋擢布政司叅政以方有事安南調廣東至則莫福海已款鎮南關乞降公為督府畫所以受降之策甚備安南平詔賜金幣陞俸一級是年秋督府檄征崖黎涉海南攻羅活抱萬抱有諸洞破之再賜金幣陞俸一級於是天子以公果可大用壬寅拜僉都御史巡撫鄖陽改江西江西饑公疏留當輸京師銀五萬兩又請折正



儒藏

允改兌米數十萬石、民饑而不傷。乙巳、擢副都御史、總督兩廣軍務。從獲數寇、廣右公既久在兩廣、熟知其山川險易、與僮之情偽、至則以兵討、會封文德、文滑、腦諸巢、平之。遷兵部右侍郎。賜銀幣。明年、平融懷遠諸僮、進攻馬鞍山、窩平之。又陞俸一級。賜銀幣。召爲刑部侍郎。御史奏留、不果行。又明年、平連山、僮、兩廣無事。復召爲兵部侍郎。尋以前後平僮賊、功擢右都御史、總督湖廣、川貴軍務。先時湖之麻陽、鎮筸、貴之銅仁、諸苗叛、當事者僥倖苟安、曲意爲撫、由是貴苗益肆。而湖苗亦且伺釁以動。公既開府于沅、聚錢穀、飭戎伍、易將帥之不足任者、下令爲征勦計。而朝廷方議撫守二策、公力言其非。詔報可。苗始大恐、然猶欲藉口於撫、以追誅。乃放兵四出、寇印江、寇石阡、寇思恩。幸朝廷以失利去公、而罷兵。詔書切責。最後奪一官以激之。而公用兵愈急。以計獲其內調田應朝、斃諸獄。集土漢兵九萬二千有奇。檄諸將分道進勦。前後斬獲以數千計。其頗逃匿山箐、悉諭降之。苗既衰破、震懾其黨、皆自分必得、相繼擒首惡龍許保、吳黑苗以獻。三方遂寧。功未及奏而公卒。前數月、有大星隕西南。公曰、我當應之。至是果

卒。卒之三年、本兵覈上其功。上復公右都御史、贈太子少保、諡襄惠。廕子、賜祭葬。皆從中降。蓋特典也。公生於弘治壬子十月四日、卒於嘉靖壬子十二月二十四日、享年六十有一。配陳氏、封淑人。綜理內政、與公合德。後二年亦卒。子三。宓、太學生、娶黃大參潤女。官生、娶洪御史庭桂女。宿幼女一、適庠生李忱。孫男女各一。公識遠器弘、平居寡言笑、天性孝友、篤於人倫。其學宗宋大儒程朱。曰程朱之言如著龜、神明不可忽也。故其教學者、必以持敬窮理、反躬實踐爲務。而凡談說性命、一切指以爲籠罩揣摩、毅然排之而不顧。一時賢智之士、亦莫能屈焉。歷官風采毅然、不爲身計利害。時宰將以事罪公、士由廣西貢者、相約毋就試。公適在京師、強之曰、若輩涉萬里以求升斗之祿、奈何以吾故乃爾。及試、公果坐落職、亦無幾微見顏面。公始以文章氣節著名、及交南用兵、更推有將帥之略。雖蠻夷亦聞其威名。莫福海將入款、謂其人曰、向廉州太守安在也。然是時邊臣爲自全計、競餽遺用事者、公獨不通一書。故每用兵有功、常薄其賞。微失利輒被譴。賴天子明聖、卒能以功名終。兩廣沅皆立祠以祀。鄉人



徐階撰《世經堂集》卷一七

亦祀諸學。嗚呼、公可爲一代之名臣矣。公所著有惠安誌、古文要典、三禮經傳、宋元名輔事業、宋名臣奏議、載道集、大儒文集、聖賢正傳、歷代兵鑑、恭敬大訓、小山類稿、凡若干卷、藏于家、皆有補於世教云。公弟戶部主事峯、率宓等以其月日葬公許山、而乞銘于子。子故與公爲道義交、而兄事焉、乃爲銘曰：

張始受氏、以弓正封、植固而蕃、赫赫厥宗、旣振文譽、亦績武功、良籌垓下、華定江東、曲江策叛、半稱遺忠、矯矯衷惠、克配於先、三已無愾、百鍊彌堅、俎豆揖讓、文教屢宣、惟惺笑談、決勝萬全、有頑不庭、王師四征、或偏或專、功罔不成、黎惠旣息、蠻寇亦平、蠢茲鬼方、三年弗克、有謀盈庭、宜撫以德、公曰無庸、誓滅此賊、蠻方言言、王旅翼翼、罔入其阻、殪戎糾武、公始視師、衆論謂危、惟

皇之斷、信任弗疑、公之旣沒、寇亂始夷、惟皇之仁、褒錄弗遺、旣多受祉、生榮死哀、刻銘幽墟、以勸千來。

都察院右都御史張公岳傳

張岳字維橋、爲人沉毅簡重。正德癸酉解元、丁丑進士、授行人、寓慶壽寺、不苟接人、獨與郡同年陳琛、林希元閉戶讀書、出則三人徒步走市中、時稱泉州三狂。岳獨上書言事。武宗寢疾、豹房獨宦者侍、岳疏乞內閣九卿輪直嘗藥、庶防奸變、疏入不報。已卯四月、宸濠行賂、僞倖盡南巡、諫者數十人、多杖死。岳偕行人司疏上、鎖械膝跪廷中五日、掉下獄、又杖於闕下、幾死。謫南監。世宗卽位、復行人。俄丁父憂、釋服赴部、廖太宰取選科道、辭不就。轉司副、尋乞南、陞南武選員外、祠祭郎中。丁亥、復以憂歸。每言平日所爲、客氣用事、多病狂疎、於是深日刻勵、收斂益嚴、服除、補主客郎中、出廣西提學僉事。廣西士傑、岳懇懇與講文義。壬辰、調江西、令士習空虛、嚴責守程朱氏說、毋輒變。尋貶廣東提舉。岳爲郎時、上議禘祭、張閣老孚敬議推先代某祖爲所自出之帝、李宗伯時心知不可、又未知神位之衍之所書、疑以問岳。岳請書皇初祖位。堂堂天子之祭、精誠以臨之、雖遠而千百世、可假而至也、豈必附會某祖以爲重哉。李以岳言語張怒、以原議上、內批：皇初祖如岳言、於是爲

張所忌。出廣西。張又行選貢法。邊縣雜夷多不任貢。岳謂選第汰甚。衰謬者足矣。調停行之。拜表入京。又不候見。張而歸。張愈怒。故遂坐濫貢貶。轉守廉州。廉與交南隔一水。時方征交。張請吏部推岳征交。議譁甚。岳獨爭謂不可。疏六不可征之狀聞於朝。疏上。又陰飭兵食。立營堡。預征討之策。以待命。毛尚書伯溫出視師。莫登庸懼。密使岳求通款。已亥。陞浙江提學副使。轉叅政。伯溫頗用岳言。議撫處。登庸問曰。向廉州太守安在也。伯溫會督府蔡經奏。移岳廣東。守欽廉。莫首叩關。岳往受降。賦二詩予之。北虜盜邊入內地。詔陞僉都御史。撫治鄖陽。俄轉江西巡撫。岳言江西民困。用民一錢。如針刺吾體血。吾不忍也。陞副都御史。督撫兩廣。督府故饒供億。岳至盡革之。土官從征舊多納賄乞功。岳嚴禁絕。封川賊稱王橫劫。岳討平之。陞兵部右侍郎。再征柳州。破魚高馬鞍諸險巢。時稱奇功。岳不通相府一幣。總兵加太保。岳止陞俸。越年召爲刑部右侍郎。徐御史南金奏岳忠純果毅。有古大臣風。賀連反側未定。岳宜留。明年召爲兵部左侍郎。平連山賀縣捷聞。總兵又廢子。岳乃陞右都掌院事。湖廣苗倡叛。初設總督。衆方願望莫肯行。世

蕃請岳當之。徐相公階報岳曰。士君子爲國任事。禍福無擇。第其危幾在前。冥不知避。亦不可謂智也。蓋指嚴氏父子云。岳謂備國大臣。雖危無所避也。單車入楚。熟計苗情。諸撫臣異同。前卻而苗出劫日橫。上命易貴撫院。岳謝。上曰。充國湟中之議。初頗譁於衆口。裴度淮蔡之役。功竟成於獨斷。又曰。此賊不平。臣亦有何面目奉勅書以對將吏。於是條上用兵方略。詔下報可。岳自督戰。斬擒苗幾盡。土宣慰冉玄等糾苗爲叛。苗平懼誅。陰以兵喉龍許保。吳黑苗搶思州。玄又挾萬金入世蕃。幸世蕃去岳而罷兵。徐相公執不可。竟降兵部侍郎。岳生擒龍許保。而黑苗尚匿玄所。岳疏玄罪。併計其挾金事。世蕃益怒。日傾岳。岳不一貶。復擒黑苗以獻。三省底寧。兵部力請召岳。嚴氏不可。岳遂卒。是年夏。西南大星隕。岳曰。我當應之。卒後三省巡按奏岳功。岳復右都。賜祭葬。贈太子少保。謚襄惠。廢子。嚴氏擅政二十年。制閫不入一錢。沒得完其身名者。僅岳一人耳。岳長身玉立。隆準高顴。眉骨稜稜。天性孝友。篤人倫。學以程朱爲宗。嘗謂陽明與論持敬知行明德新民之旨。往還三日。陽明終不能絀。第曰。子亦閩中一豪傑也。歸家。於草堂中

立爲學則存養四條動作威儀之節十七條。出則輒以程朱徵義諄諄然言之。集中有與聶豹鄒守益歐陽德郭持平羅欽順張邦奇黃佐諸公書大畧如此。官所如沅柳州德慶廉瓊咸專祠。鄉則泉州祀郡學。思安志交南議稿征苗錄所輯禮經聖學正傳恭敬大訓等書凡數千卷。

（國朝獻徵錄）卷五八

左春坊左庶子童公承叙傳

童承叙字士時其先隨州人。元季始祖避兵居沔陽遂爲沔陽人。承叙方童時卽解聲律諳詞章十餘歲通經史百家言。登正德辛巳進士改翰林院庶吉士嘉靖壬午授編修。乙酉以父中憲憂倚廬哀毀遂致草病服闋買舟至清源聞大獄起且念兄承德鰥處輒嘆曰此尚可逐逐狗彘仕哉。率帆而返。未幾承德歿矣。人咸服承叙之爲智且孝。壬辰北上充經筵官。甲午充講官。時上御文華殿承叙進講周書立政篇極陳王業艱難周公夾輔之忠詞意婉切上改容聽焉。乙未充會試同考官。尋陞右春坊右中允。兩申以重責歷朝訓錄成陞司經局洗馬仍理司業事。承叙爲司業嘗疏明監規五事飭學政六事上之。

皆鑒鑒可紀。祭酒呂柟以推明正學爲已任乃計樂律典與禮崇先王之化承叙之志咸與協合。柟喜曰天作之合吾教其有與乎。己亥上因正冊儲位乃進承叙爲左春坊左庶子兼翰林院侍講慎輔導之選也。庚子奉命主順天鄉試檄棘之旦莫不以得士稱。權貴子弟被黜者或構之承叙弗理久之恬如也。壬寅以先墓歷歲弗省其疏乞假歸未幾卒。上賜諭祭。

（國朝獻徵錄）卷一九

刑科都給事中南玄威君賢行狀 羅洪先

嘉靖壬子九月全椒南玄威君病明年余始知之將遣人持藥往候以他故不果。會龍溪王汝中期余匡廬至則汝中已薨全椒哭君且留書以計余持之泣曰南玄竟止於是余乃竟不復見耶。尚忍聞之且其年纔六十二非甚衰且老之期也。世道姑勿論天獨不爲吾輩計耶。將自匡廬禔哭之值未果而諸孤遣使以狀請何忍嘿嘿也。卽日發書聯其所載行事與書所不及而獨得於余者合以爲狀。君名賢字秀夫初號南山晚歲更爲南玄。先世居溧陽本姓胡氏元末姑蘇盜起有初五者避亂江北經全椒樂其風土。



徙居之乃更姓戚。初五生勝三勝三生通。通爲人雄桀修幹長髯。累貲喜施。弱冠役京師。道遇達官貴人。與馬赫奕。屏足嘆曰。嗟乎。吾以七尺役於人。安得見吾子孫若是。灑吾辱乎。而妻鄒病難子。聞水滸有經。歷有女賢未聘。而其家故業。僞意得子必且傳其業也。媒納之。生敏剛敏。剛生永富。號思菴。思菴生二子。華與珊。皆世農不習儒。通至是年且九十二矣。垂絕。將床悲曰。天乎。吾家縱不得達官貴人。乃新一儒家兒耶。因歎歎卒。比葬有敝衣道人指其機謂思菴曰。葬此十年貴人生。且易汝衣。惜不令此老見之。至期思菴夜夢天門洞開。一兒從中躍下。褰裳走抱。覺而君生。弘治壬子八月某日也。思菴先後所生子四人。力農自食。獨君力弱不任耕。而穎拔多慧。嘗從家人開通垂絕語。輒憤憤誓必誦讀爲儒生。思菴性不好書。數數令負重苦楚之。卽數數丐免。不聽。母劉不能忍。日夜相持哭。隣翁聞而食之。卽走隣翁所誦讀。是時全椒少文墨吏。縣中聞有少年多識字。將逮爲佐書吏。君匿不見。會督學御史行縣。乃自外潛歸。請於思菴曰。某願爲秀才。奈何縣以佐書迫我。請死不就佐書。思菴感其言。任其所爲不之禁。君始出就試。御

史以爲才。遂補縣學附學生。明年爲正德壬申。補增廣生。君旣刻厲誦讀。家貧不能給朝夕。久之得血疾。未幾母劉卒。益不勝痛。病臥者數年。比疾愈。年二十有九。始婚于印氏。是爲印孺人。嘉靖壬午。江南北大饑。縣奉散給粥病者。例擇有行誼諸生二人督其事。旁縣聞君名。爭相屬。遂攝數縣。處分有法。活者甚衆。又明年。得陽明先生論學諸書。讀之心忽開發。文思空湧。乙酉。舉南畿鄉試。丙戌。會試禮部。三原馬公理賞其文。遂第進士。是年冬。授浙江歸安縣知縣。君嘗恨不得執弟子禮于陽明先生。至是遣使稟學先生。答之曰。此道在人心。皎如白日。雖陰晴晦明。千態萬狀。而白日之光未嘗增減變動。子以邁往之資。加之篤志問學。其於此道如掃雲霧而睹白日。何暇他求乎。君得書。遂主先生之言爲依歸。然猶間爲時忌所尼。汝中嘗過訪。目逆之曰。得無猶踏兩家船乎。君憤然愧謝曰。過矣。自是身任此學。居官行政。一斷之心。而世俗形迹不復拘。在衆人頗望退縮莫之前者。必且犯難爲之。矢激弦絕。不喻其果。雖竟以此蒙訕賈禍。不恤也。歸安隸湖州。以饒富名。異時官府廚傳供張不精侈。則使者銜有司爲慢已。有司疑畏。多厚餽。



以緩責。或陰藉爲身利。猝不辦。率仰富人。富人既得俸。則貧者日見傾奪。又轉輸例入羨金。破產以應。豪右把其短。恣行武斷。有司內顧。益與異不振。君酌廉稍節目。使足備儀。而罷其浮艷。歲省里家數千金。其諸徭役。視貧富爲等。轉輸者既無重困。更不復自隱行謁。暇日人郊野。問民何所疾苦。其在豪右。朝開夕發。其摧不貸。自謂縣令得近民。除道行失。拊巡意。斥去徒衛。以二隸導前。卽市肆交易。雞猪羊牛布縷果。新充溢街衢。不得收斂。民既稱便。而壟斷困貧弱者。倉卒不及掩避。卽易暴露。民嘗夜被盜。未曙君謁廟出河側。聞舟中密語曰。某之盜藏某所。不識有司能覺否。天且明。遣人獲盜賊來。具如所聞。被盜家猶未知也。君素有 heart 計。善劑算。能持小物得人情實。縣有蕭總管者。淫祠也。豪右欲詛有司。輒先賽廟。廟壯麗特甚。一日過之。值賽期。入廟中。列賽者階下。諭以福禍。恐其不解。譬之曰。天久不雨。若能禱神得雨。則善不爾。爾且毀罪不赦也。昇木偶道橋上。竟不雨。遂沉木偶如言。又數日。舟行。忽木偶自水躍舟中。侍人失色。走曰。蕭總管來。蕭總管來。君笑曰。是未之焚也。命繫之。顧岸傍有社祠。別遣黠隸易服入祠。戒之曰。伺

水中人出。械以來已。而果然。蓋策諸賽者必且賄沒人爲之也。君所至使人揀過不暇。大抵若此。縣中遭邇年遠繫人禍。及雞犬而老胥工揣摩。講張舞文。雖痛懲之不戒。至是斂手引去。期望謁廟畢。坐學官。與諸生講學。爲言訓詁詞章。不足以盡聖人之道。擇其篤行者優禮之。而黜其尤無良者。當是時。鹽城萬公雲鵬爲郡守。剛峻有聲。數以事相忤。君無所屈。戊子入覲。聞有甘心於萬者。獨奏吏部直其枉。詞氣激發。安仁桂公尊爲宰。其言得。不搖。縣令入吏部。非自理多不敢有言。爲宰字卽不聽。縣令言去而郡守人。所以爲難。庚寅。聞母羅氏訃。卽日歸。士民思之不置。將樹碑紀政。不果。後十二年。君已致仕。尚書蔣公瑤始竟其事。壬辰服除。補唐縣知縣。唐民愿而野。瘠而鮮食。君新學宮。興弦歌。教其諸生如歸安。訟者至。旣剖曲直。則勸以孝友仁讓之行。多泣下不終訟者。歲且饑。公爲賑糶。納券于粟。約期來償。銷佛像。伐淫祠。木製爲禮器。令毋得作佛事。禁誣逐使。民用不耗。繞三月。流移漸歸。而君以吏科給事中召。當是時。上厲精圖治。早朝晏退。君亦感激遭際。知無不言。甲午冬。考察入覲官。君念被黜者例不得復用。而

嘉靖間諸大臣有所嫌怒必假此中傷以快其私雖欲引援無由也乃豫爲論抹之以防其禍其言曰進退人才天下元氣所關然人品不同不可不辨跡之稍嫌者求其疵則無實才之不足者察其心或可原過誤貴於善懲忠直近於不遜孤臣孽子之流與善惡時局者相去何啻什百此雖過於容恕差等而存錄之可也須年以來內外黜陟不無偏枉遺漏食鄙者固多貶罰而忠盡者未盡褒揚短於才者固蒙器使而疑其跡者未入包荒小夫小人借冒崇階而孤臣孽子實構隱禍此皆以傳聞未定之說而民其憂國忠君之誠非所以廣自新之路也臣切惟人才難得願廣德意使忠良落罪者無計官之大小聽臣等即時論抹以共成正大光明之治上覽其言諭吏部曰咸賢所言愛惜人才之意其行之先是給事中葉洪劾冢宰汪某謫寧國縣丞而參議章商臣等素爲諸大臣嫌怒至是果皆被黜與所慮合既得卽論抹如旨又以汪所倚自固者內閣輔臣也復上其罪狀以爲陛下待輔臣可謂推誠不疑元首腹心千古之曠遇也而某乃不能與陛下同其休戚布腹心以收吏部進退之權懸利害以箝言官是非之口

吏部有所舉措言官有所論劾必先請白以觀意嚮之所在務欲事權歸己貨賂公行何忍相負一至此哉卽如考察一事陛下曲聽臣言許其卽時論抹正以防大臣之行私也比臣論抹洪等而某愈其中傷任意藏隱阻而窒之陛下有堯舜知人之明而某守負伯蘇方今之罪稔惡積怨卽加放流可也願陛下威斷洪等雖不抹然上因此重君之言汪與輔臣先後罷去君以一言去兩大臣其黨與亦稍稍逐朝廷爲之一新雖古之折檻牽裾不足多也明年與安遠侯柳瑋冊立荆王餽遺一無所取北虜寇陝西總制尚書唐公龍與巡按御史上功罪反異朝議遣給事中問狀且舉有才力者二人上請上特命君往旋進兵科右給事中君在邊舉劾簡平兵氣自倍歸擢工科都給事中漕河淤墊請如御史徐九臯議開范光湖月河以通運餉丙申在告戊戌丁繼母朱氏憂辛丑三月起復補刑科都給事中是年廷試進士上取對策高等御覽親第名次仍下內閣詳定務求其是又以皇太子漸長宜行奉先殿謁見禮兼欲舉庶吉士之選會輔臣有疾上溫言勞其良苦且以數事委之審議而士之緣幸以進者畧



無顧藉。君目擊心痛，以爲上之取士儲養，必求其是，皆所以爲燕胎之謀。輔臣蒙恩，禮亦已極矣。曾不悔改，以報知遇，是尚可以坐視乎？乃上疏曰：皇太子將出閣，官保不可無人。此聖諭拳拳盛心也。且今之庶吉士，卽他日之輔弼，可不豫求其人乎？臣見選舉令下，奔競日恣，行已有耻者，反從外望。又教養之法，徒事華藻，不培本根。背書作課，詭時諧俗，苞苴不戒，樹立者少，幾何能得真才也？臣願今歲所選，盡從人望，不必泥甲第限名數。仍擇仁賢爲之師模，言足以啟關鑰，動足以鎮浮妄，曲成善誘，砥礪名節，問德考業，以風馮翼孝德之修。庶幾善人多，而朝廷正。將來燕胎之謀，無出於是矣。故事，選庶吉士主於輔臣，而教養屬之館閣，皆據資序以遺，無所選擇。及上用公言，諸大臣叢怨，恐其復動上意。未幾，太廟災，諸大臣應詔自陳。君翼上因此有所更置，以盡修省之實。自諸大臣以下，極言論列，且舉海內才望同學之臣十四人以進。其論列者，旣皆據權寵有氣力，而十四人者，止南京二三大臣。所稱侍郎呂柟、太常卿魏校、郎中王畿，都給事中魏良弼、參議徐樾，又皆被廢與疎遠之人。且以講學取人，怒而王爲尤著。怒者

旣益衆，又機便可乘，遂坐左遷山東布政使司都事。君以：上恩雖寬，然勢不可復留。又思暮年且高，得請於巡撫都御史曾公銑致仕去。曾與大臣論薦者數四，皆不報。君旣去，士風自是遂一變矣。君嘗自病負意氣，嫉惡如讐，不能含忍。然其好善赴急，蹈水火，犯金革，一出於性成，無所矯強。故凡引補善類，提獎後進，惟恐不及。自爲縣以至入朝，出使臨邊，居家往來道塗，率皆講學之日。與人言皆以良知之說爲主，執之甚堅，而意氣足以發之。在廣坐中，隨事警物，注目含笑，吐露心膽。嘗曰：吾所言如是，汝之良知可明白否？能信此良知，可快樂否？其有議論不一者，則曰：吾聞之陽明先生，其說如是。反覆辨析，不明不已。海陽陳益撫、林敬夫輩始或與君角勝，久之咸入彀，率帖帖受約束，不能去。若是者先後不下十數人。君於此十數人，無間遠近疎戚，若與締肺腑親，嘗伺察微隱，考見誠僞。一聞缺失，若已有負，厲色正言，恨不速改。其有不幸罹禍與謬敗者，不遠千里，資遣而調護之。自陽明先生沒，講學者滿海內，而聲氣聯屬，微若不足。君與汝中汲汲維持於朋友之間。君嘗以悟性直捷應用圓融歸汝中，觸衆怒薦之朝。至於克己

爲義善鑒知人汝中恒自以爲不逮蓋其抱有爲之才不忍泯沒而又切世道之慮不獨朋友相昵而已此可與淺淺者道哉君歸鄉十餘年講學者遍江上莫不就問至則君率縣之子弟請益率數日乃去縣學久圯爲言于有司盡撤其故而侈大之開必關尼巷爲南譙書院分居諸生然以規過太切嫉惡太嚴罔里往往持私短君君聞之曾不介意治家謹于禮教思巷性難事有過必飲泣以諫待兄弟子女如其子其弟以盲廢業者人弗予婚多方營之弟旣死又分田廬給其婦子思巷卒于君歸之七年壽九十嘉靖甲午以君貴勅封文林郎唐縣知縣而母劉贈孺人於是印孺人亦得今封始思巷所聞葬時道人言至是一一皆驗。

明儒碑傳集卷五十三

陳九川 黃弘綱 胡天鳳 楊爵

陸燦

明故禮部主客郎中致仕明水陳公墓志銘

嘉靖辛丑某歸田始會明水陳先生于螺川上。又五年再晤于毘陵。繼是庚戌聚青原。壬子留玄潭。雪浪閣。甲寅過桐江。咸朝夕請益。既久乃別。最後丙辰大水。獨對於寓舍。尤盡傾倒。蓋先生之學得之陽明公。致良知為深。以為能致吾心之良知於事物感應之間。是謂格物。物格也者。事物感應各中天則之謂也。竊謂良知即未發之中。無分於動靜者也。指感應于酬酢之跡。而不於未發之中。恐於致良知微有未盡。方欲求決于先生。而先生亡矣。悲夫。悲夫。此宜交遊之情已乎。自念此學當諸極致。不負千載一時之機。而先生自任其重。負荷且堅。東南士人歸心。取平而卒無疑貳者。在吾有東郭雙江諸公。在撫則先生為倡首。蓋浙中所未有也。如是而

不得少延歲月以卒。所請豈不大可悲哉。先生名九川。字惟濬。初號竹亭。改明水。陳本宣之寧國人。高祖觀。擅智勇。高皇征偽漢。時實在行。以功進小旗。留撫州守禦所。既老返宣城。曾祖禮。代隸元帥金大望麾下。樂臨川風土。始留家。子孫遂為臨川人。祖溥。寡言笑。能前知。生崑。字獻璧。號間翁。娶吳氏。生先生。俊推恩。封文林郎。大常寺博士。母某氏。封孺人。常夢吞星而娠。先生幼善記誦。屬文十餘歲。里人辭不能師。乃遊行齋。饒某門。問難相長。饒喜得助。三試當入學校。三辭不赴。而肆其力於載籍。為督學崆峒李公所知。明年癸酉。與饒同舉鄉試。故事。舉鄉試。鼓樂譚之。獨徒步歸。甲戌登進士第。觀政禮部。與同舍共一驢。不避嫌毀。已而忽覺難仕。三疏請告。乙亥。師陽明公于虔。有所聞。盡火舊所為周易春秋詩禮諸書。丁丑起。告授太常博士。講習靡倦。已卯。武宗將南巡。眾莫計。獨與舒梓溪國裳。夏東洲良勝。萬五溪潮連。疏諫止。有旨。荷校跪午門外五日。杖五十。除名。直



儒藏

聲動朝野而病日甚。然南巡竟止。誠者壯之。庚辰卒業於虔。辛巳今上即位。拔諸諫臣。仍補太常。癸未進禮部儀制員外郎。冊封弋陽王。甲申侍陽明公于越。乙酉轉主客郎中。正貢獻名物。節犒賞費計且數萬。羣小懷叩。會是時有他甘心者。思藉為媒。嗾通事假夷語奏之下詔獄。數瀕死不變。言官論拯弗聽。丙戌戍鎮海衛。已丑郊祀覃恩解還。後兩遇詔得閑。仕致仕。凡再履危機而卒。不肯濡滯。依違以為身家之謀。而易其計。蓋性成然也。歸餘二年六旬。內連遭父母兄弟四喪。躬視歛含無遺憾。始末師陽明公。卓卓衆中。篤倫嚴禮。實恐玷缺。比務學。即謹喪祭。正廟制宗法。瑩域諸役。不一他譏。宗族不足者。捐已助之。間走寧國掃丘壠。以畢先志。嘗構別墅。術者羨其所宅。惻然曰。伯父久殯。敢私乎。遂奉之。而事仲兄如其父。陽明公既喪。自走越。紀其家而踪跡所經。北至毘陵。南盡東粵。徜徉鴈蕩。九華。匡廬。間登五老峯之絕標。窮三級泉之奇勝。結茅忘歸。自以為無地。非

學。無地非友。亦即無地而非講習之處。其說主於陽明公。以致良知為主。以物格為實下手處。不特定會期。擬覘臺與懷玉。浙東青原。玄潭。尋訪而已。先生卒後數月。即有東廓之變。嗚呼。此豈交游之情已哉。先生生弘治甲寅十月十六日。卒嘉靖壬戌八月某日。享年六十有九。諸生即以言之官。祀學官。未卒之春。痰上壅。耳不聰。至秋遂不能言。有星墮居旁。須臾暝。殯于家。隣不戒火。室盡燬。而櫬宮弗震。若有衛者。初娶潘氏。繼董氏。大理卿璜溪公女。側室王氏。李氏。子三。長本。嘉靖壬子舉人。娶張氏。合州善女。繼李氏。黃出。次朱。縣學生。娶樂貢士其任女。繼李氏。李出。幼休。聘何永興文明女。王出。女三。長適縣學生黃國紀。次適府學生吳朝禎。幼適安城刑部員外郎鄒善。皆潘出。孫男三。本子。文煥。未聘。朱子文燦。聘崇仁謝氏。文榮。未聘。孫女二。本女。許嫁曾如閩朱女。許嫁唐勝。本等將以明年癸亥某月某日。莖先生城北南岡山。首癸趾丁。近間翁之墓而封同潘。先期持衡

州推官舒化所為狀來請銘。予悲先生不可復得。又愧無以相報。虛其平日知待也。慨而銘之。銘曰。

良知之致。得者其誰。二紀相從。達矣奚疑。有來青衿。示以著龜。爰述所聞。可師可資。力主國是。不慮身危。載戍于閩。莫搖彼夷。迨其還歸。汝水之湄。邁邁何求。獨守我維。斯道若何。今屬舉之。既永斯藏。亦以志悲。

羅洪先撰（念菴文集）卷一五

明故雲南清吏司主事致仕洛村黃公墓銘

正德丁丑。陽明王先生以中丞督軍于虔。延見士人。輒語以聖學。是時虔中士人無少長。皆得其門。獨雋都洛村黃君與何善山兩人最有名。是時君以詩經舉丙子鄉試第七人。丁外艱。往兄弘曩。隨父贊不能償。父怒。將杖之。君憐焉。自代三百金以解。先生聞而異之。嘗謂士人曰。黃君來何遲也。既小祥。始上謁。三日而悟。心理合一之旨。凡所誦說。即能無悖於先生。先生之教士人也。擇資之近者。特置左右。時披獎頌。挂而造就之。知用力

矣。則又諄諄操習。其誦說與已無悖。士人初至者。令先以意接引。且察其性行何若。俟漸領畧。徐共面語。故已不勞而人易知。君首在造就中。自以接引得朋友益。故從先生去虔至歸越。不忍離者四五年。戊子冬。先生道卒。門人做築場義。歲擇一人紀其家。君居守二年。身處以禮而用情於人。內外大小咸信服。莫可指誅。於是士人出先生門者。無間遠近。莫不知有黃洛村矣。久之。思得一職自試。甲辰。授福建汀州府推官。厭世俗脂韋。背公無忌。執法明峻。不肯少失尺寸。巡按御史何公維柏而下。率倚為重。遇疑獄及人畏忌不敢發者。必以相屬。君亦感激知遇。不事姑息。能聲漸著。而望者亦衆。戊申。召為刑部雲南清吏司主事。又明年。北邊告警。皇上震怒。邊將多逮。西曹或不盡法。即加責問。畏罪者務深刻以希旨。君直據法遣之。不輕進退。往往忤人。兼質任剛直。既不能為軟熟語。即有容貸。又不能自暴示恩。以故讒者四起。辛亥。當考察期。聞之。望君者適當事。例子誦



儒藏

明儒碑傳集

卷五三

調。因上章請得原職致仕報可。蓋公鄉中多嗟惜之。故為曲全若此。既歸。每歲必放舟青原立潭間。與吉之雙江聶公東郭鄒公期會。先會必走書速予。與劉君方輿為後先。興未慊。或留蓮洞。更旬月乃能去。其體肥稍短。目長秀而聲厲。以舒。士人有所請質。瞻視注聽。不遽舉。似以俟意盡。衆論既畢。徐擇一二言諷之。不競談以眩所知。意態含蓄。未易涯涘。然善啖喜浴。曾不自異。已未臘。忽痰壅轉為風痺。歲加劇。辛酉五月二十八日。端坐而逝。距其生弘治壬子七月十八日。壽止七十。後善山者十年。憶予識君兩人旅中。善山慈和。曲意款納。而君嚴簡難近。未嘗假色笑於人。然予獨與心契。往來二十三年。而敬不衰。觀其學。亦且再變。始者持守甚堅。其後以不致纖毫之力。一順自然為主。至其平生終始。會未少變。大抵厚於自信。而薄迎合。長於持重。而短機械。倉卒不撼。可以鎮燥心。瑣屑不入。可以消鄙見。古之所謂不為嬰兒之態。而有大人之志者。庶幾近之。蓋望而知

為有道。不待言之出也。雩都士人多出兩人門。而邑中喪祭舊俗尚鬼。至君始還古云。君名弘綱。字正之。先世居贛縣下橫。自春源翁始徙雩都。生子敬。子敬生仲庸。仲庸生廷本。廷本生思盛。號靜軒。里中稱長者。娶于吳生君。君配易氏。有二女三子。女適易廷科。劉克端。子褒。歲貢國子生。次聚。聚皆縣學生。孫子十一人。璫。珍。珩。玖。璨。珙。璵。琛。珍。珩。縣諸生。孫女二。一適易紹音。一許何其。曾孫四人。某某。某某。曾孫女三人。君卒之十二月二十五日。褒等塗之西門外。生佛寺右。首巽而趾乾。何之殯也。予走雩都哭之哀。君訃至。而予卧病。則哭諸寢門。明年褒持劉君之狀來取銘。予泣曰。如君者。可復得耶。且我信矣。銘非我孰宜銘曰。

宋儒窮理。理實心虛。虛與實合。匪學弗居。君雖得師。速悟由已。一言而判。即心即理。持之既久。持以不持。流行坎止。自心不疑。感本寂中。寂非感外。心有本靈。嚴師斯在。維內之私。維外之疑。不隨不倚。胡施靡微。

我將質之逝矣弗作。載韻遺言。堅珉亦託。

羅洪先撰（念菴文集）卷一五

明故贈刑部雲南清吏司署員外郎晴岡胡君墓銘

贈署員外郎晴岡胡君泰和義禾田人也。名天鳳。字時鳴。父諱行恭。號謙齋。篤學慕古。行誼嚴振。嘗感時事。有所論著。識者謂可裨政議。羣居平恕。每歲里中弟子爭迎師。莫能舍。以是終身不去其鄉。君自少東家學。不更他師。性行方介。酷類父。既補縣學生。授經度之雋。都是時王陽明先生去歲未久。高第弟子雋人何公廷仁。黃公弘綱。傅先生學。主於求心而緩窮索居。聞之未即信。退而沉思。會冬夜。從友人所宵分歸。已熟寢。覺聞漏下不及三十刻。心訝之。已而數覺漏不加促。則疑守者怠。課披衣起立候天。暗比四問。雞未鳴也。愀然悟曰。漏非有永不永。由吾心動。聽聞亂耳。夫聽聞亂。故逆億起而愛憎移。不自知其妄也。不求諸心。吾之妄可勝計哉。於是積疑頓釋。乃著自信篇。以明已志。時時就何黃究所

傳。且曰。始吾未信先生之學。謂與宋儒異耳。夫性即理。與在物為理。皆宋儒語也。理在物猶可言外。謂性為外可乎。性非在外。理非在外。吾之窮索宜何從。於是復為理論申之。然君不獨能信其言。反諸已。自處獨至。接衆務與心應。以為快。嘗遇病。舉者旁有人云。孰予一金。當出奇藥起之。君即倒囊。從者疑曰。驗否。安知。君曰。吾心誠不自已。豈俟其驗哉。門人問見色不動。有道否。曰。人之自視子女。未嘗有動。視人猶子女。固其道矣。雋士雖以舉業從君。君所語多在舉業外。以是出其門者。即有聞御史袁淳訓導周文其最也。在雋三年。所學視昔大異。方以稱力澤物為已責。而竟卒於療。年纔三十有八。不及其成。里中嗟曰。謙齋阨矣。復阨君耶。後卒三十年。君之子直登進士。為刑部。致有今贈。未幾。出為湖廣按察僉事。念君待吉。淺土。玉歸下地於某山之原。面乙辰。負辛戌。將以辛酉正月五日下午寢。前期自撰世叙來請銘。僉事故與余遊。嘗疑有啟之者。其私淑先生也。志甚厲。而位漸進。將所謂稱力以澤物者。終有在乎。於是諾



藏

其銘以告諸幽。胡之先徙自金陵。宋慶歷進士。行官至尚書屯田員外郎。幾傳為伯雅。登永樂丙戌進士。進士之弟季和。生寶。砥訓導哲。哲生介。極君之高曾祖也。君生某年月日。卒某年月日。配周氏。生子三人。長按察次某某。孫男四人。孫女三人。世叙云。銘曰。

學晦識礙。如夜方寤。孰寤有聞。羣酣未悔。匪辭是修。自踐抑抑。命或格之。極詣未即。皇錫有赫。貴豈在名。惟古好德。乃福之榮。又何考祥。不曰有子。遺者方長。雖天弗死。

羅洪先撰 《念菴文集》卷一五

斛山楊先生

先生名爵。字伯修。號斛山。富平人。初誕時室中如火光起。人咸驚異之。長。美容。身滿七尺。家故貧。年二十始發篋讀書。苦無繼。晷資。嘗以薪代風。夜攻苦。每之隴上耕。即挾冊往。意欣欣也。居恒念人當以聖賢為師。一切不稟古昔。何所稱宇宙間。兄靖以掾誤罹法。先生徒步

百里外申厥寃。遂並繫獄。先生從獄中上書辭意激烈。邑令見而驚之。曰。奇士也。胡累至是耶。立出之。給油薪費。督之學。年二十八。聞朝邑韓恭簡公講理學。躬輦米往拜其門。公睇先生貌。行行壯也。欲卻之。父蓮峰老人謂曰。意若非凡人。數日叩其學。說曰。縱宿學老儒。莫是過。吾幾失人矣。既省。語言踐履。錚錚多古人節。嘆曰。畏友也。同門學者皆自以為不及。後與楊叔山稱韓門二楊云。年踰三十。督學漁石。唐公始首拔為邑諸生。嘉靖戊子秋。應試長安。就食食館。客有遺金者。先生守之。客至持館人急。先生詰其實。付以金。客謝寡取。先生峻不允。乃敦請家止宿焉。是秋。即以書舉第三名。明年成進士。授行人。三使藩國。饋贈俱讓不受。或以為矯。先生曰。彼雖禮來。名重天子使。吾獨不自重。天子使邪。聞者嘆服。壬辰。選山東道監察御史。時權臣當國。草疏將劾之。疏且具。會鄉人有以垂白在堂勸止者。乃移疾歸。歸未幾。母歿。毀瘠踰禮。廬墓三年。有冬笋。剝之。瑞服闋。家



居教授講學者又五年。庚子秋，以薦起河南道巡視南
城權貴欲避而所覩時事不勝扼腕。辛丑春二月初四
日上封事，娓娓數千言，大約天下事內而腹心，外而百
骸皆受病，足以失人心而致危亂者五：一則輔臣夏言
習為欺罔，翊國公郭勛為國巨蠹，所當急去；二則凍餒
民閭不憂恤，而為方士修雷壇；三則大小臣工弗覩朝
儀，宜慰其望；四則名器濫及縉黃，出入大內非制；五則
言事諸臣若楊最、羅洪先輩非死即斥去，所損國體不
小。是時中外頗以言為諱，疏入人皆愕然。上大怒，即逮
繫鎮撫司，窮究其詞，拷掠備至。先生一無訛。是日都城
風大作，人面不相覩，都人呼為楊御史風，其感動天地
如此。先生身晝夜桎鎖中，創甚，血淋漓下，死而復甦。先
是士大夫下獄，並未有桎鎖者，乃自先生始。蓋貴溪湖
國意也。戶部主事周公天佑巡按陝西御史浦公鏐
相繼申救，俱塞死獄中。守益戒嚴，人益為先生危，而先
生處之自若。刑部郎錢公德洪、工部郎劉公魁、吏科給

事中周公怡皆先生同志舊友，先後俱以事下獄，相得
甚驩。然自學問相勸勉外，各相戒不得言得罪事。錢先
釋獄，先生願有以為別。錢曰：靜中收攝精神，勿使遊放，
則心體湛一，高明廣大，可馴致矣。古人作聖之功，其在
此乎？先生敬識之。而乃日與周、劉切劘修詣，不少輟。
四子諸經百家，研精于易，著周易辨錄及中庸解若干
卷。諸所著作，畧無憤惋不平語。詩文倡和，身世頓忘。如
是者五年。乙巳秋八月十二日，上以受釐故放先生及
周、劉歸田里，而三人者猶相與取道潞水，講學舟中。適
臨清始別歸。會熊太宰以諫仙箕忤旨，復逮三人獄。先
生抵家甫十日，聞命即日就道。親朋揮淚為別，先生無
幾微見顏面。身幽圜扉者又三年。丁未冬十一月五日，
上建醮高玄殿，災火國中，恍聞呼三人名氏者。次日釋
歸為民。上之聖明保全諫臣如此。既歸，教授里中，貴人
莫得見其面。踰潞敵履，怡然自適。己酉冬十月九日卒
于家，年五十有七。病革時，援筆自誌，又悽悽以作第一

等事。做第一等人。教其子孫。無他辭。蓋先生為人。硬直不阿。而內實忠淳。自少至老。華學問。以韓范洛馬。給田為師。以楊椒山。周訥溪。劉晴川。錢緒山。蔡汝濱諸君子為友。險夷如一。初終不貳。磨礪精光。展拓胸次。其所涵養者。誠深。以故。鼎鑊湯火。百折不回。完名全節。鏗錫一代。不偶也。彼世之淺東寒暑。耽耽以氣節自多者。視先生當媿死矣。先生沒若干年。莊皇帝以世廟遺詔。贈光祿少卿。錄其後。今上用禮官議。諡忠介。

馮從吾撰 馮少墟集卷二〇

貞山先生給事中陸公綰墓表 黃佐

給事中陸公綰。字子餘。一字浚明。嘗讀書貞山。遠聞其學行。稱為貞山先生。其先得姓自姜。齊陸鄉。灰通。至漢。豫章都尉烈令吳。子孫因家焉。宋季辟亂。始居長洲之陳湖。曾祖諱瑄。祖諱泰。以別子貴。贈工部主事。考諱應賓。世傳儒業。旁通軒岐。為醫學正科。母胡氏。生公。郡城絃歌里。幼穎悟絕人。六歲日誦數千言。善屬對。能評漢史。塾師大奇之。九歲工為文。十有四。選入邑學。受業於伯氏煥。煥與季氏采皆太學生。並稱聰警。兄弟自相師友。鄉黨謂為三鳳云。後又傳經義于錢鴻臚貴。而學益進。布素謹敎。出入農畝。異貴游。人雅重之。先正震澤王文恪公。整見所作。嘆曰。此子當魁天下。今翰林無此文也。嘉靖乙酉。以春秋舉鄉薦第四。丙戌。舉會試第三。比廷對。石文隱公璫將置首。選忌者計沮。遂列名三甲。尋被選入翰林。為庶吉士。連七試居首。少師石琚楊公一清。稱為通儒。才足用世。非但文士而已。丁亥冬。詔簡五人充史職。公復居第一。內批改授工科給事中。與情駭異。故事所出者。蓋新貴人用事。公與同輩。不肯往揖。新貴人銜之。故有是命。拜官甫三日。聞邊警。即上疏請修

寧夏邊牆以退虜衝。又疏言古今禍亂之原每生於壘蔽壅蔽之害常起於上下之不交。故聖祖御製大誥首言君臣同游其慮至深遠也。請每日視朝罷退御便殿接見羣臣商確政事。至於經筵月惟三御寒暑又皆開歇。惟日講最爲親近。然接對不過數刻情意不交。請如洪熙時開弘文閣慎簡天下博聞有造之士置諸近侍更番入直聽政之暇從容下問講經史論治道涵養漸磨自然有益。又論人才不獨進士可大用舉人監生有賢能者亦宜同升。教職卓異有成效者暨王府官一體遷轉邊方長吏視內地尤當慎簡不宜以願就遠方苟圖利祿者充之。其考察才力不及調遠省者亦宜調停。今朝廷屢議通鹽法修馬政然太僕苑馬鹽運皆不擇人而徒變法無益也。又陳四事曰久任使慎考察汰冗官復制科。上皆承納。戊子春奉命考牧劾御馬太監閻洪欺罔因上十事。上允行之。宦官爲之奪氣。其秋始用朝官主試各省公往浙最稱得人。還朝適有張福秋母獄。廠衛與法司異斷未決。上命會鞠。熊都御史決請依法司所奏被譴以回護免官。公抗疏言大獄之疑必當詳慎不宜輕斥大臣。廠衛積威已久每株送囚

犯於法司法司雖知冤濫莫敢平反。今據理與爭輒黜誠恐法吏以決爲戒非國之福也。上震怒下公錦衣獄杖三十踰月釋之。適奏黃河清自靈寶達平陽凡六日廷臣欲稱賀鉅條以畏公言而止。自是代言者有新進立異之指矣。時張桂用事公夜草疏論之有鬼肅于庭公笑謂曰死即死爾吾義不可已也。言既嘯乃寂翌旦疏入自分必死杖下乃獲旨璫以原職尋落散官以尚書致仕。二人貴震天下一旦免黜百寮震悚都下謠稱奇男子。梓其疏紙爲蒲貴。岳司副倫王給事準繼有章。上內批曰陸粲等何不早言俱下詔獄。既而霍詹事賴上疏詆公辨專與已同薦王瓊初不受賄且謂石淙與腹心門生嗾公爲之。於是聖意頓回召璫還政府而石淙亦退矣。公謫丞貴州都鎮驛與倫準偕出都城有賦三生行美之者。公抵謫所旦夕讀書如常時。士子執經請業與之講授有擢科第者。壬辰稍遷知江西永新縣。縣素爲訟蕃盜號難治公損益伍法隨戶稽口召諸藏盜者與之好語令捕送自贖有出入可疑者保長率其甲夫捕之前後獲盜數百人。時彭陳二渠魁行劫江湖莫敢誰何。力請於郡出其黨周繼於獄釋其罪



而購以重賞、令設伏擒之以獻。又有邵美二劇盜、猝起郡邑間、公密布方略、旋亦就擒。土豪左鐸、擄殺殺人、暨咬訟號十虎三彪者、悉斃之杖下、道路稱快。有張軒者、客死廬陵、族衆誣害其幼子虎、欲私其產。公廉得其實、斷還虎業。其鋤暴植弱此類也。乃憲家禮、以教愚氓、邀士大夫共行鄉約、俸外革去私供堂餼、明清法律、修廣庠序、賑給師儒孝子貞婦、由是吏畏民懷、夜戶不闔、澆訛之俗漸於禮義、而江湖遂以肅清。嘗欲引疾求去、假寐齋廬、彷彿有人謂曰、昌黎子豈鄙夷陽山者耶。驚寤、以告趙別駕廷松、廷松署其堂曰夢韓尹學士臺爲之記。及童虎傳、皆實錄也。撫臺高都憲公韶、巡院李侍御循義、連章褒薦。癸巳冬、念太夫人春秋高、上疏乞休、卽日就道士民攀號、追送者數百里不絕。旣歸、養志惟謹、祭先惟敬。事寡姊撫孤甥、皆極恩禮。復特祠外王舅胡少恭、琮於居第之西、報其育已也。又畫王文恪、楊少師、錢鴻臚三像、懸而敬事之、報其知己也。陸長史鍾、張都水約、托孤皆撫之成人。徐文學元祿亦賴以成名、且又造就其子。嘗曰、爲人不以死生利害動其心、然後可以幹天下事。又曰、忠孝少虧、雖積百善、無足稱矣。優游林壑、

十有八年、尺牋不入京師。達官道吳、非就見不往、客饋遺一無所受。前後撫按推薦及科道會舉、章凡三十餘上、皆尼不行。大臣有僣事者、薦剡及公、公貽書友人曰、吾不幸乃爲匪人所污、其勁直每如此。已酉、侍太夫人疾、親調湯藥、衣不解帶。比宅憂、哀痛踰禮、苦由殯側、不入便寢、經理窵窳、日漸羸尪。者憂之、竟弗克終喪。病且革、清明不亂、顧其子曰、大丈夫當馬革裹尸、今待盡牖下、得無爲馬文淵笑耶。言迄、脣然而逝。辛亥十二月二十五日也。距其生弘治甲寅六月二十六日、春秋五十有八。嗚呼、公於忠孝之道盡之矣、而嚴氣正性、未嘗員刈委屈、所謂崑玉比質者也。憶予已亥起官僚北上、艤舟吳門、始晤公。公長身朗秀、美鬚髯、風采英發、貫穿經史、練達典故、而多心得。故其析疑經國、持論堅定、與之語輒中準繩、纔纔不休。王文恪嘗出所記、輒訂其疑似一二。在永新時、與羅文莊公欽順談道、亦訂其困知記數條。二公心服、皆翫然從之。博識古今奇字、見楊修棋、慎韻林、移書指摘、每相契合。又嘗索予所記革除遺事、證以所見、無不精確。姜憲副龍者、博達少所許可、嘗曰、文章、節行、政事三者、有一足以名世、求其全者、惟吾沒



明乎公著述雄深雅健。比子家居麗澤時寄數篇日以雋永。著左氏春秋雋及附注有前賢所未發者今行於世。文集及胡傳辨疑、煙霞山房書尺、庚巳編藏於家。他若禮史二記註釋、見聞隨筆、鉤玄挾秘諸錄皆未成書。公雖剛毅然見善恒若不及。後生有好奇古工文者必加推重與之莫逆。如彭君年其著者也。彭君狀公行謂公孝悌廉明如漢盧江太守忠諫節義如吳選曹尚書文章該洽如晉平原內史經術淹通如唐太子侍讀子深以爲然。嗚呼向使公登翊泰階得如宣公展其謀猷則格我聖明匪直貞元之世而已。惜公靖獻之初已沮於人甫行所學一斥弗復雖流風百世可以立懦而年僅下壽齋志以終嗚呼命也夫。嗚呼命也夫。

《國朝獻徵錄》卷八〇

給事中陸公傳

陸公者諱榮字子餘浚明其別字也。嘗讀書貞山學者稱貞山先生云。其先居吳自漢豫章都尉始。宋避亂居長洲之陳湖號陳湖陸代有顯人。公之父應賓爲醫學正科娶叅議胡公琮女館其家因生公。郡城弦歌里公超悟絕人六歲能屬對質疑義九歲能文章十有四選隸校官弟子與伯氏煥季氏采自相師友時稱三鳳。嘗受經錢鴻臚先生貴學益有名。王文恪公整讀其文歎曰他日我輩人也。嘉靖乙酉舉鄉試丙戌舉會試咸魁其經及廷對石文隱公珪將首薦公中忌者計不果。尋被選爲庶吉士連七試皆第一名聲大譟。少師楊公一清稱爲通儒。丁亥詔簡吉士五人充史官公名業已列上而會新貴人得權公不往揖心嫌之乃從中媒孽改授工科給事中。三日虜報至公奏請備邊悉合機宜又論致治用人累數百言大略言禍亂皆由上下不交而壅蔽生請退朝之後御便殿

接見羣臣、咨訪政事。經筵日講之外、如洪熙間開弘文閣故事、選儒臣更直、涵養漸摩、宜有益又言、今日用人、專重進士一科、非祖宗意。今舉人監生不預選取、教職不被超擢、王府官不獲叙遷、遠方長吏不擇賢否。太僕苑馬鹽運諸司屢議變法而不務得人、卽欲致理、其道無繇。臣請久任、使慎考察、汰冗官、復制科、則人才可盡得而治道可舉。上皆采納。戊子春、奉命考牧、劾御馬太監閻洪欺罔、因陳牧政十事。上允行之。宦官奪氣。其秋、各省始用京朝官典試。公往浙中、最稱得士。還朝、適厰衛與法司爭死獄未決。上令會訊。熊都御史決是法司議、坐奪官。公抗疏言、厰衛積威久矣、每傳致死、此卽冤濫。理官莫敢爭。今幸以法爭、輒黜大臣以戒爭者、非國之福也。上怒、杖公、下詔獄。踰月乃釋。是時張桂以議禮合。上意躡致宰執、紛易朝政。聞言官言輒不喜。曰是新進好異同者。至擬旨刺公公不爲沮。尋上疏極詆二相、方

夜草疏、聞鬼嘯于庭。公叱曰、疏已就、卽死吾安之。何物敢相恠耶。嘯乃寂。翌日疏入、公自分必死。少選得旨、二相皆罷。中外稱快。都人市其疏、轉相傳觀。或爭覩其面、至擁馬不得行。有歎息者曰、奇男子也。然二相一旦猝斥、上心憐之、而會霍詹事韜訟璵萼詆公、且謂楊少師實嗾之言。上乃召張還、而謫公都鎮驛丞。都鎮夷微公至、僦舍以居。考誦經史如故。諸生有請業者、親爲講授。士始知文學。有掇科第者。歲餘稍遷知永新縣。縣素蕃盜難理。公至則令民爲什伍而相叅稽。召諸舍盜者與好語。令捕送自贖。所獲盜數百人。彭、陳二渠克行略江湖、吏弗能禁。公出其黨於獄、誘以重賞。令甲夫隨之。卒俘以歸。里有左氏豪藪盜及諸刀兇號十虎三彪、悉考斃之境中肅清。張氏子虎者方幼、其父旅死、衆利其產、以計陷之。公廉得寔、竟按諸奸、歸虎業。時稱神明。語在尚書尹公臺重虎傳。又纂家禮、行鄉約、修廣庠序、振給師儒、旌異節孝。由是



澆訛之俗漸於禮義矣。癸巳，公念太夫人老，上疏乞休，即日就道。士民攀號送者數千人。去後猶見思。公既歸，則日承養太夫人，孝敬甚備。旦暮一室，手不停披，口不輟誦，足跡不踐公府十有八年。而太夫人沒，公竟以哀勞成疾。疾革，猶顧謂其子曰：「男兒不馬革裹尸，待盡牖下，令馬文淵笑人。」言訖，條然而逝。年五十有八。公長身玉立，髭髯朗秀，好讀書，於百氏之學無所不窺。尤練達典故，論經史，評古今，談議鑿鑿如矢。激刃解，悉中窾會。王文恪公嘗出所記示公，公輒爲訂其疑者。及羅文莊公欽順困知記，楊修撰慎轉注音略，黃詹事佐華除遺事，皆經公校讎。諸公竝心服焉。爲文章出入左馬，詩在選唐之間。所著有左氏鐫附注、胡傳辨疑、烟霞山房書尺、庚巳編及詩文若干卷，藏于家。性倨倨，遇事果激，期必達其志。諄諄倫理，事寡姊，撫孤甥，恩意甚篤。尤勇于赴義，周人之急甚已之私。故與徐先生元祿石交，庇之終始。陸長史鍾、張都水

約咸託之孤。卒，賴公成立。歲時祠外王父胡公，以報育已。繪王太傅、楊少師、錢鴻臚三像寓拜展，以報知己。嘗曰：「爲人不以死生利害動心，然後可以幹天下大事。」又曰：「忠孝苟虧，雖積百行，無足稱矣。」前後中丞、侍御史薦公，章三十餘上，皆不起。大臣有慶事者薦及公，公恥，語人曰：「吾不幸爲匪人所污，其介直多類此。」子延枝，太學生，以學行世其家。史氏曰：「余讀漢張文紀傳，至埋輪都亭，譏彈貴戚，亦矯矯壯激矣。及守廣陵，平劇盜，以恩信稱，蓋有良吏之風焉。余觀陸公劾張桂疏，慷慨峻切，一時忠直之名震天下，而永新之政略與廣陵等。方之文紀，殆庶幾哉。至其優游林泉，蟬蛻塵埜，軼材淵思，發爲文章，則度越文紀遠矣。姜憲副龍嘗稱公曰：「節行、政事、文章三者有一，足以名世，兼之者其浚明乎？」君子以爲知言。今世言用人者，獨曰「材難耳」。然材寔弗用，幸用矣，因事斥輒不復，竟汶汶死。余於陸公有概焉，爲列其大者以傳。」

校記

①十一人：下文所述僅十人，疑誤。

明儒碑傳集卷五十四

歐陽德 劉陽 萬表 周復俊
程梓 謝祐

明故太子少保禮部尚書兼翰林院學士文

莊歐陽公神道碑銘

公諱德字崇一別號南野舉嘉靖癸未進士授六安州知州遷刑部員外郎會

上選士大夫之有文行者以置翰林改編修仍其服色俸給踰年遷南京國子司業南京尚寶卿遷太僕少卿以親在南不樂也當軸者知其意奏以為南京鴻臚卿丁父憂服除留養其母蕭宜人以為南京鴻臚將為疏乞終養母不許遂奉以行未至遷南京太常卿尋召為太常卿掌祭酒事入白其母母遽曰吾幸無恙當與兒俱往矣至則遷禮部左侍郎上雅知公熟儀禮孝烈皇后葬遣監護諸司改

吏部左侍郎兼翰林院學士掌詹事府事充會典副總裁教庶吉士遣代拜先聖先師陪祀帝社稷主考庚戌會試皆儒臣所謂榮其夏以三品考績贈祖時勉父庸如其官祖母某為淑人封母太淑人踰月母卒賜祭葬嘉靖壬子春三月持服未終召

拜禮部尚書兼翰林院學士冬召直無逸時時同勳輔諸臣奉賜劄與聞大政中外咸慶喜以為且爰立又明年甲寅三月二十一日得疾卒距生弘治丙辰五月二日享年五十九訃聞

上震悼贈太子少保諡文莊賜祭幾壇命工部治葬事又蔭其弟昱為國子生而士大夫則相與咨嗟涕洟奄然失其所望嗚呼是可以觀公之槩矣初公領鄉薦陽明先生倡道於虔之行臺其說以為人心虛靈萬理畢具惟不蔽於欲使常廓然以公湛然以寂則順應感通之妙自出乎其中而世儒往往索諸口耳其力愈艱其於用愈窒非大學致知之本指於是舉孟子所謂良知者合之大學曰致良知蓋明明德之別名耳而士溺於舊聞譁以為禪公獨曰此正學也走受業於先生凡再不赴春官精思力踐日有所自得比入官則遂以其學施諸政事知六安時為二籍稽公使錢及其俸錢之出納曰非以為名吾屬所自檢防固當如是歲侵捐俸之半以倡吏民得粟若干石隨所在作粥食飢者活數萬人已乃為興水利汰冗役定經費省訟獄之追呼罷諸苛法作龍津書院進諸生教之問學民士咸附為編修奉詔



議郊禮、悉指陳禮家說之同異。終之曰：禮文乖錯，未可盡據，而土木一興，財費不貲，惟益修勤民之政，上當於天心，則異郊可也。同郊亦可也。於丘可也。於屋亦可也。特服其遠識。在南京國子故事司業當課其諸生爲文詞，公因引之於道，作講亭，進四方來學者，與諸生講論其間。或以疑質爲稽之經訓，證之事物，本之人情，參之世變，詰之使自識其迷謬，徐而論之，使得其心之所安。公固善論說，而誠意懇篤，氣象平易，士以是日親。及侍太淑人居于家，益與雙江聶公、東廓鄒公、念菴羅公以講學爲事。學者自遠而至。當是時，士咸知誦致良知之說，而稱南野門人者半天下。卽陽明無以加也。奉命教庶吉士，歎曰：此朝廷所厚養，以需大用者，不宜徒以文爲也。教之如國子，而繼之以時政之所急，聞者莫不興起。爲禮書，首請建儲，不報。會詔二王同出府而婚，公上疏曰：昔我

太祖以父婚子，諸王皆處禁中。至

孝宗以兄婚弟，諸王乃皆出府。今事與

太祖時同，宜如初制。又引黜命詞有承宗承家之說，請賜裁定。

上知公意，命分別成婚矣。既而降諭寢之，然婚亦竟不同日。祿王母康妃薨，公具喪儀，援憲廟淑妃例爲請。詔準鄭賢妃、淑妃者。孝宗之母賢妃者。

上之諸妃附葬。孝潔皇后墓側者也。公乃損益二儀行之，而特建墳園奉康妃以葬。秦府爲其中尉女請封，公曰：祖訓郡王孫六世以下世授奉國中尉，女則封號止於曾玄。蓋子女厚薄之差如此。今將軍中尉分封日繁，常賦不能給，勢不得復於祖制所略隆其恩禮。疏請斷自五世以下，授宗女宗壻之號，給冠服婚資，而聽其自便。崇陽王以罪賜死，例不得襲。又郡王絕嗣者，與親王異城，則襲，否則使將軍中尉一人以其官奉祀，而崇陽子援他郡王例乞襲封。公曰：事當慎始，此一府封，諸府之乞封者且踵至，民不堪矣。具言不當封狀，請下諸藩，禁毋妄有所乞。宗室以罪降爲庶人者，例計口給食，雖名抑之，其所入乃更多於中尉，故恒輕犯法而擅婚花生，雖禁之不止。公曰：此利養厚耳。爲裁定其數，率比中尉減三之一。上皆從之。天下有陰受公之賜而不自知者，弋陽建



安樂安諸王爭攝寧府事。嗾其宗人相攻訐。以幸已得。公曰。寧既已國除。復有府事。須攝耶。請令各治其府。而故郡王之以罪除國者。其宗人各以世系分屬之。爭遂息。公自始仕至宗伯。凡更十一官。每遇事。衆相顧未有處。或計利害。震動失色。公莫不立應。而意氣閒暇如無事時。或問公所以能此者。公曰。吾惟求諸心。心知其爲是。卽毅然行之。雖害有不顧。如知其非。雖利不敢爲。此吾所受於吾師而自致其良知者也。居家孝友。數撙節衣食。以周其族。凡賴以婚葬者若干人。置社倉於鄉。集子弟教以禮義。又爲立保伍法。使相救助。後歲凶。其鄉人果得免於流徙劫掠之患。故公之講學。士翕然從之者。以其修諸身。施諸事。能無媿於其言也。公先世長沙人。三徙而居泰和之蜀鄉。詳見予所爲巖溪翁碑。子男二。餘慶。廕補國子生。紹慶。江西壬子鄉試第二人。俱配康淑人。出女一。許嫁郭太守平川次子某。側室蕭出。孫男三。宗符。宗翰。宗發。女三。尚幼。餘慶等十。以丙辰某月某日葬公於某山之原。奉公高第弟子工部侍郎雷公狀。請予銘其神道之碑。予昔與公同舉進士。公時已稱名德。而予纔弱冠。於道未有聞。公朝夕與予論學。所以啓

迪夾持者。甚至及予佐吏部。念公不可使一日不立於朝。因薦公用之。後遂同總裁會典。相繼敎庶吉士於翰林。論議志意無一不相協。予自禮書入內閣。公又實代予。而公之未至。予攝篆以俟者七月。所以處二王之間。與夫杜宗室之妄請。予蓋開其端。而公能發明充廣之。以補予所未及。由是相得益深。公於當世之務。無不究心。其言之無不有條緒。以予淺薄。獲從輔臣之末。方期與公相左右。庶幾少有建立。而公遽已卒。予凡三哭之。慟。其與人語及公輒嗚咽。不能勝者。不知其幾也。然則銘公而因以抒死生之感。予固不得辭也。夫銘曰。

大江之西多名臣。文章事業垂聲均。以學發聞自公身。曰孔有軌吾所循。先於治已推之人。寂感順應虛乃神。公學以心非脂唇。深造實踐功力純。良知瑩然燭無垠。歷官中外名孔振。惟

帝知公久益真。召典三禮承諮詢。訃謨至計日數陳。潛植國本亨時屯。喁喁海內延頸頻。幸公旦夕持衡鈞。道誰尼之弗盡伸。星斗晦翳江漢堙。無能起公百感臻。我涕一日三沾巾。惟本學術刻貞珉。千載神道瞻嶙峋。公則逝矣光流新。以此塞悲悲孰倫。嗚呼以

此塞悲悲孰倫。

徐附撰《世經堂集》卷一九

資善大夫禮部尚書兼翰林院學士贈太子

少保謚文莊南野歐陽公墓誌銘

嘉靖壬子春、上虛禮卿位、特召泰和歐陽公于憂居、仍聽終制、辭不獲、以是年冬初至朝、詔兼翰林院學士、入內直、同勳輔元寮贊密謨、皆殊典也。公耆德宿望、自慶遭逢、慨然自任、以天下之重、而天下方隅喁然期治平也、迺甲寅三月二十三日卒於官。上震悼不能已、贈太子少保、謚文莊、命官護喪、營域、錄其弟昱為國子生、聖皇眷德之隆、賢臣始終之遇、誠曠視千古矣。然天不憖遺、典刑山斗、其所繫豈微哉。公諱德崇一字南野、先生學者稱之也。曾祖滌、祖時勉、考庸、世有隱德。祖考皆以公貴、贈吏部左侍郎兼翰林院學士。祖母郭氏、張氏、贈淑人。母蕭氏、封太淑人。公初娠、父母咸感異慶。幼神穎不群、讀書數行俱下。九歲以奇童稱邑尹延見、進退如成人。十三為弟子貢、督學北郡、李公大奇之、名動三楚。二十一舉于鄉、聞陽明先師講學、虔臺、裹糧從之。值春試者再、皆不赴、力踐精思、食貧自樂。癸未舉進士、與同年更僕共馬、講習舊聞、酒食徵逐不

與焉。授知六安州、至則興教化、省追呼、絕宴享之供、導原泉之利、憲臣行部、至過境不入、曰有賢守在。歲大饑、疫、捐俸倡賑、設糜煮藥、全活數萬人。丁亥、擢刑部員外郎、會輔臣薦公文行茂異、特改翰林編修、閉門誦讀、不隨眾謁候、預聖修會典、編摩獨該核。郊祀議起、倡者引公為助、堅不可仍、疏請憲章。祖制斟酌成周、庶費省民安、禮意不悖。壬辰、擢南京國子司業。日進諸生於龍下、誨以心身之要、聞風至者至不能容、乃復闢齋宇。周貧病、均勞逸、恩義藹然。時當事者不相悅、迺遷南尚寶卿。三載遷太僕少卿、又改南鴻臚卿。值外艱歸、服既除、太淑人踰八袞、依依不復出。暇則約予及鄒東廓、羅念菴諸君子、周旋于青原梅陂之上、相與求未發之真知、究先師之遺旨、斯斯若將終身焉。丙午、以薦起、仍舊任。丁未、晉南太常卿。尋召入掌國子祭酒事、遂擢禮部左侍郎。寅清風夜、簡在上心。已酉、改吏部、兼翰林院掌詹事、復命教庶吉士于翰林。公曰：是我朝儲相基也。詎文詞已哉。每試暇、輒聚一堂、考天人之際、探理亂之原、講經綸之畧、發疑難、士咸知所嚮往。庚戌、主會試、黜浮崇雅、最號得人。是夏、太淑人卒、特錫祭葬、弁祭侍郎公及正位春曹、值二王簡婚、康妃薨逝、



俱禮難沿襲。酌今稽古。曲盡情文。上嘉納焉。宗人
既行。踰僭日。聞。處高牆。供輸漫因。且監閣所至。橫撥
公深患之。會靖江中尉某當坐。公請即所在。開閣宇。畧
撤高牆。制居焉。泰邸中尉女請封公。稽祖訓本無。

將以丙辰年四月二十八日。葬公于萬安縣十五都上
宏崖山首庚趾甲之原。以銘請于子。子惟先師倡道東
南。一時豪傑雲集。景從。人人自以爲莫公若也。先師語
來學。必曰先與崇一論之。而公則自視歛然。子素遲鈍。
定交四十年。辯論啓發。寔公是資。乃垂晚被召。得侍
同朝。可面相訂正。以究此學之實。公每病。子拘狗不諧
世。而通和濟變。子不及公遠矣。方慶麗澤。而公遽止。此
子何能淑哉。悲夫。悲夫。且天之生賢。不數賢矣。而會逢
其際者。又不多見。公資稟兼人。躬逢聖主。方與元臣
碩輔。期翊熙明。而天亟奪之。冥理可致詰耶。計聞中外
哭者失聲。吊者失色。蓋非爲一人一家之私也。子拔淚
而銘之曰。聖遠言湮。大道斯晦。我師奮興。主盟命代。
及門濟濟。入室則公。獨知妙契。覺後包蒙。有政大施。
民用和樂。族爲文章。星虹炳若。孤忠一德。際我聖
明。爰置左右。眷莫與京。夙夜在公。嘉謀入告。贊協皋
夔。周行是好。有猷有爲。維國之禎。無讐無黨。寔世

之衡。篤生胡艱。而奪則速。自昔所嗟。生民無祿。潛
隱深衣。被既多。鴻名茂烈。未以不磨。卹典責終。皇
恩有赫。昭揭儒真。考終玄宅。

蕭約撰 雙江蕭先生文集卷六

御史劉先生陽傳

王時槐

三五劉先生陽。字一舒。安福縣人。自其見時。端重若
成人。恥私食。食必廣坐。年十三。請焚先世積券。弱冠
從彭石屋劉海源兩先生受學。兩先生深器之。陽明
王公撫虔時。先生亟慕。一見其人。稟學焉。而梅源先
生故是王公弟子。間示之語錄。則益嚮往。遂專如廬
除夕泊舟野水。風雪霏霏。齒牙下上。指麻木不得屈
信。先生顧津津然喜也。旦日見王公。稱弟子。王公聽
其修幹疎眉。飄飄然世外之態。顧謂諸生曰。此子特
享清福已。又謂先生曰。若能甘至貧至賤者。斯可爲
聖人。先生曉受教。自是日兩謁見。退則與冀君元亨
等互相稽切。越數月辭還。先是督學使者與王公持
論不合。則發策詆之。先生明正學以爲言。衆皆謂先
生且殿。而先生竟首選。嘉靖四年舉鄉試。任礪山知
縣。礪山盜警無虛日。先生捕其魁桀。格殺之。奸民相
顧。嚮懼不敢動。於是表孝子閭。祭節婦墓。百廢具興。

民俗丕變。邑苦河患。先生齋沐七日。率父老子弟。精禱。遂自疏者二十七里。待僚佐有恩意。煦煦然昆弟也。而僚佐亦以昆弟視先生。先生視身如寒士。時入。覲。裹俸金以行。不煩民一楮。居錫山四年。九被薦剡。徐志稱先生有介操。臨民愷悌。尤尙理學。政暇則引四民訓諭之。無賢愚皆獲其益。益實錄云。既召去。士民遮道哭聲震野。爲躬仁政祠去思碑。入拜福建道御史。則侃侃持風裁。世宗時。改建萬壽宮爲永禧仙宮。百官表賀。諸御史推先生。先生毅然曰。此當諫不當賀。已而廷臣有密促賀表者。以矢威臣測。衆洶洶歸過先生。先生曰。卽有譴。請自當之。不以累諸君。已而迄無患。故事。部院接疏。中官持疏南面。先生謂同官曰。疏在中官手。北面可爾。既授疏。猶侈然當尊。謂朝廷何。竟東向揖中官。中官雖甚恚。然迄不敢出一語。官舍蕭然。禪室日恒蔬食。或諷先生泰儉。先生曰。不聞青菜侍郎。長齋御史乎。居頃之。以病乞休。執親喪。墓棲者三年。哀吟嗚悲。感行路。既除服。被召。尋陪點光祿少卿。竟辭不起。而惟日與邑士人談學不倦。嘗會復真。羣公夜講罷。門弟子就先生遮牀趺坐。退若有得也。氣清明。燿然海鶴。嘗登泰山絕頂。遊衡嶽。

夜半坐祝融峯。被羊裘觀海日。超然遠覽。薄視色界一切。晚聞雲霞之館於三峯翠微。坐半雲洞天。與諸同志講道。飲泉茹蔬。悠然樂之。發爲詩文。自成一室。言皆根極理道。關切人倫。與人言依於踐履。嘗曰。堯舜之孝弟。而無稱於鄉黨。小溫公之誠實。而不踐其然諾。言獨言幽。乃無忌於可指可視。言著言察。乃未及乎行之習之。蓋深中學者之隱衷云。至其所以深造而獨得之者。則猶不容以易窺矣。先生每語人曰。孔子之學。率十年一進。藉令其壽加乎七十。又當有進於從心所欲不淪年者。卽是語推之。先生所以孜孜不懈者。蓋尙未有涯也。先生天性溫良。馴雅。自少至老。不能害物。與人交。仁經義緯。人人以先生親已。其言優游有餘味。能使聽者不迫於耳。尤諳達事體。善爲鄉人排紛批難。爭曲直者多不之有。司而之先生之廬。間有背先生指結訟者。有司曲直之一如先生言。人以是愈益歸服。沒之日。哭于其庭者以千數。相與祠祀之。至今不絕。

（國朝獻徵錄）卷六五

榮祿大夫南京中軍都督府都督同知萬公表

墓志銘

潘國集



古名將功在社稷者多矣。至以文學飾勲名如杜預、韋孝寬者，蓋間有之。若夫鎔裁九流，萃其要眇，以修身而繕性者，古今未有也。嘉靖中，唐應德，王汝中，羅達夫三先生者，以理學名於時，而聞鹿園萬公與之相頡頏，心竊異之。退而考公之平生，與其議論，然後知公殆方駕三先生而不啻過之，非獨能不愧而已。公歿，屬汝中爲狀而應德銘之。公何應德亦歿。迨今四十有七年，子達甫昭余京師，命補應德之闕，謂余庶能知公也。余則局解，按狀公諱表，字民望，別號鹿園居士。世居定遠。高廟起淮甸，始祖國珍首率義兵歸之，賜名斌，克萬戶。下滁和濠泗諸州縣，授武略將軍，滁州守禦副千戶。北伐，改永平衛副千戶。征沙漠力戰死，贈明威將軍，指揮僉事。斌生鍾，授龍驤衛副千戶，奉命備倭寧波，有功賜第，因家焉。以年勞詔授明威將軍，寧波衛世襲指揮僉事。鍾生武，無嗣，弟文繼。文生全，全生禧，禧生齡椿，卽公父也。仁厚儒雅，脫略世俗。家貧，以文史自娛。斌迄齡椿七閱世，而積德於公。公生有異相，玉色方頤，額有三文，風神炯炯，慷慨多大節，相者奇之，曰：異日當名高天下。讀書一日數行下。性孝友，父早世，母恭人王內訓斬斬，每事

規以義方。公奉教唯謹。居官，盡出治事，夜侍恭人，盡啓以日所行事。有一善，恭人色喜。公乃喜。卒，臥苦枕塊者三年。齋閣中懸一小像，晨昏出入必謁，或他往亦奉以行。至老，長子孫未嘗忘孝我之痛也。姊歸郡諸生張芳，芳食貧，恭人愛之。公慰曰：恭人生兒一人，幸有女兒，當甘苦共之。每宦游，奉母就祿，家產所息盡以付姊。從弟襄貧，爲校貲娶室。比卒，撫兩孤兒教之，相繼爲諸生。嘗十堯得佳地，卽以與弟曰：使他日大吾門也。年十七，嗣世職，志在鵲起，不事家人業。晝習騎射，夜燒燭讀書。揭孔明寧靜澹泊四言座右，曰：大丈夫當經營天下，如武侯然，何能頻首作求田問舍計乎。庚辰，武舉中式。石學士閱公卷，以爲奇，置第一。衆以所對多忤時語，稍抑之。尋授都指揮，督全浙糧運。晉視浙江閩篆，南都坐營錦衣，已爲漕運。恭將者二：漕運總兵挂印者二，及南京中軍都督府都督僉事，皆以宿望爲當軸所推轂。公歷漕既久，國計諸虛，河渠通塞，祖制及時弊當復當釐，靡不明習。嘉靖庚子，二洪水涸，漕舟竝阻，議者謂黃河改流。公者論析之，力言漕河惟用沈汝沂泗諸泉足以濟。正統十二年，黃河決榮陽，入漕河，潰沙灣入海。景泰四年，

都御史徐有貞塞之、乃分流自蘭陽東至徐入漕、必疏濬而黃水始來、稍稍與清合。至正德六年、黃船感來、漫衝決。方黃河來衝時、清河狹淺、水濶易盈、沿河設淺鋪、每年轉運無滯也。今二洪舊堤宛然可見、但向者黃河漫漫、一旦水落石出、清河淺涸、人心乍見、不能無異、其實則故河也。蓋自洪達濟、自會通至衛河、一路隄防原備、河衝入爲漕管。今二洪以下反用黃河之水而忘其故、及水不來、至疏濬以引之、此所謂以病爲藥也。渦河在淮之南、商船皆自淮入渦、至祥符銅瓦箱以達陽武、去衛河六七十里。議者欲鑿而通之、直至白河、則會通河可罷。公議會通河之塞、自濟寧至臨清計三百八十里、尚書宋禮發山東丁夫十五萬鑿河建閘、爲費不貲。以彼棄七十里之易而事三百八十里之難、此無異故蓋鑿而通之、則黃衛二水合、二水合則衝決非常、誰能障之。此會通之運誠永利、不可易也。若以衛輝置倉、歲以鳳陽諸衛之卒部鳳陽諸郡之糧、令由渦河達陽武、歷七十里輪於衛輝、其勢甚易。如昔山東流賊之變、運道中梗、又可爲備變一策。海運雖極險遠、第浙中海船於遠番皆能通之。松江與太倉通、泰州有沙船、淮安有

海雕船、皆由海至山東蓬萊貿易、云離天津不遠。若以松江、太倉近海歲糧、厚與僱直、量運三四萬石、使海道漸諳、爲事變之備、又一策也。太倉則例、每糧一石耗七升、至集斛若輕齋之羨、以還運卒、故卒有餘力、運無愆期。後官悉收之、版削四出、人不聊生。公憤曰、此其患不獨在貧軍、而且移之國計矣。大者瓌小者議、累累百千萬言、詳具國史漕運志中。且極陳本末通融、爲國長利、而又欲開河北山東圻內一帶荒田、重農薄賦、爲漸減歲漕之地、尤根本至論。識者聽之、歲甲寅海上倭亂起、公散家財募死士、奮欲往擊。會以都督僉書南京中府、道經姑蘇、與倭遇、妻門楊涇橋、公率所募及少林僧躬冒矢石、挂賊鋒、身中流矢、不爲止。遺書於子曰、我家世以戰功死王事、乃我獨持文墨議論、身不任兵、今晚年增一箭痕、不亦美乎。時賊據七團八圍爲巢、我軍數戰不利。公謂巡撫周公琬、賊據內地久、近賊處民不得力田、逋負日多、催科敦迫、相率去而爲賊、是驅之以助其勢也。宜亟請蠲積逋、懸賞格、使就中作計、以携其黨、兼下募兵、令土著之餉等客兵、則人人樂歸。如得士千、卽賊滅千人也。以校用他兵孰利。議行、歸者寢衆、賊寢衰。乃



進兵賊懼夜遁。賊之海上焚船艘若干。內地稍甦。因作海寇議。所爲籌畫甚具。賊方蜂屯諸島。而欽汪直者。以驍雄魁其曹。公策其疎。可誘而縛也。薦鄧人蔣洲。張惟遠。使爲間。兩人雅善直。其家坐通番。遠約復直以贖。且以上賞許之。日強聒前。路未及行。而公卒。後總督胡公宗憲卒。遣洲使。復山口諸島。果魁立致東南晏然。一時謂爲奇功。不知皆公本謀也。公策夷情。洞如指掌。而論北虜尤人所未發。嘗曰。古夷狄侮中國。未有中國人不爲之用。而能突入者。夫華夷異類。居處寢食。絕不相同。豈甘心棄衣冠爲犬羊役哉。不得已也。比年虜入太原。殺掠慘毒。上屋九重之憂。中外章疏。類多擊截之計。所薦用者。大都善戰善陣之人。而於善邊固本之道。則置而勿論。夫善戰善陣之人。急於截殺。乃一時救變之事。如醫家所謂急治其標者也。每督諸鎮之兵。日幸一擊虜以爲功。而他不暇顧。然卒不能禦。如病者屢投逐邪發表之劑。而邪卒不去。元氣不爲其所傷乎。古方製參蘇飲。發表逐邪。必用人參固本者。深有謂也。且諸邊自將權移。而邊政日廢矣。自屯田鹽法壞。而邊儲日不克矣。邊儲不克。而士卒殍死者衆矣。殍死者衆。而不

士心日益離矣。士心日離。叛亡日衆。凡叛亡之卒。虜皆厚遇之。與婦生子。給以牛馬。草息土俗。漸宜。心無變反。而後用爲智導。故地里之迂近。兵力之強弱。貨財盈虛。人心離固。將帥勇懦。事勢難易。皆得預知之。而諸邊饑餓。劬瘁之卒。聞先叛亡者。幸少須臾無死也。輒相繼以亡。而不亡者。亦無同志。是則深可憂耳。夫虜之來也不測。而我之禦也無時。諸邊日夕營營。以目前爲事。何暇爲邦本計乎。此所謂決隄以取魚。圖一軔之利者也。先是庚戌虜闖入塞內。傳大都公聞之。日夜束裝爲行計。曰。吾世受國恩。今憂及君父。豈臣子安臥時耶。尋事定乃已。夫倭變作。衆洶洶無所出。當事者恨不卽引去。公不難以身代之。北虜內訌。則公林居日耳。而聞一邊警。未嘗不慨然義形於色也。聞一時事。未嘗不精思其後也。而卒未竟其用以歿。然公則可謂鞠躬盡瘁死而後已者已。公少嗜玄學。已而閱內典。獨契於心。聞西釋自然者。以苦行鍊磨。得悟絕學。公與語大悅之。自是參究不輟。一日披衲入伏牛山。曉行見日升。忽大悟。嘗言學貴真悟。語言精切。不離見解。又言世論克己。淡之乎其論顯子也。夫視聽言動而溺焉已也。視聽言動而止焉已

也。視聽言動而不溺不止焉亦已也。禮者中也。即吾之性也。仁之體也。不可絲毫容意於其間也。是故無思無爲。感而遂通。不誠不知。順帝之則。克之至也。一日與達夫論道於臨江。達夫躍然而歸。遺書云。自聞教後。舟中終日忻忻。若出樊籠。見大世界。若入巨海。見龍宮藏。舉手動脚。無非道妙。其相契如此。公雖趨詣獨往。而諄諄導人以實行。謂夫子教人文行忠信。至命與仁。則罕言之。吾曾抗手談性命。而自愧於倫物。爲無爲語者。嗚耶。爲文敏給陳暢。直寫胸臆。所著有學庸志略。論語心義。孟子摘義。道經贊言。九沙騰言。玩鹿亭稿。及纂經濟文錄。灼艾集。玩鹿亭詩抄。濟世良方。玄門入道資糧。山中集諸書。行於世。公薄田。僅供體粥。諸爲德於鄉。如建橋賑饑。不可指數。故歷官四十年。家無餘財。餅鉢蕭疎。與野衲偕遊。見者不知其爲名將也。嘉靖丙辰正月二十六日。無疾端坐而逝。是夕大星隕於庭。光射數十丈云。距生弘治戊午八月二十二日。享年五十有九。嗟乎。公晰理窮微。細入毫芒。而臨陣出奇。有資育不可奪之氣。指揮三軍。風走電擊。不可狎視。而澹楊茶烟。至與緇流共其岑寂。枯形灰心。於物不留。而髮髯狗國之志。則至死

不能忘也。跡而論之。三先生若武不外究。而公文不內旋。總之。其名理之精。風采之偉。有足相發者。杜元凱云。若道德則吾豈敢。立功立言。或庶幾焉。公益加元凱一等矣。是可銘。銘曰。

維浙之西。以海爲池。噴雪撼山。萬椎千奇。哲人崛起。濯綬其眉。玄宗釋部。是究是追。寒波歸儒。孔孟我師。域中二大。維房與河。豈無謀臣。莫敢誰何。公紆石畫。旣富且多。厥維鯨鯢。東海弄波。公遇蘇門。振甲揮戈。以一杆竹。矢死靡他。賊氛以折。保此危城。人曰壯哉。公心靡盈。驅民于敵。冠是用張。何如收之。以躬爲殤。可謀一試。海若安瀾。誰實尸之。公其濫觴。文經武緯。乃施乃流。演進茫洋。小大畢浮。用止於斯。公則何尤。文藏於家。子衍厥澤。可以此闕。公所自得。日月有丘。其下冥冥。昭公無窮。太史之銘。

《國朝獻徵錄》卷一〇七

南京太僕寺卿周公復俊墓志 于慎行

于子曰。今世論士人操行。率取畸嶇爲名高。舉羣趨之。至優方尚質之士。詘而不稱。其談純文。以激戢幼眇。盛相夸詡。而沈深容齋。本原六籍者。亦弗貴也。舍軌迹而馮虛。倂規矩而錯巧。謂世道何。顧安得先民。



之典刑而風之。頃讀張文學所狀周太僕公。則俛仰而嘆曰。嗟夫。士之操行與枕文架。不在是耶。世胡莫之述也。蓋公浪而家中落。至孫玄暉。既貴。乃克營其墓石。故予得悉公之文行而爲之志。曰。公諱復俊。字子顯。館於木人涇之旁。嘗自號木涇子。自宋南渡以來。世居崑山之塗塋里。里有鼎姓三。亦謂之三家市。周其一也。國初有諱勝十者。于公爲六代祖。傳祖道祥。曾祖毅。並隱不仕。祖元學。以德誼稱。考諱在舉鄉進士。授養利州知州。辭疾不就。皆以公貴。贈通奉大夫。雲南左布政使。妣皆夫人。初。養利公兄弟六人。而已最少。出而室於吳。諸兄析產。斥不與分。曰。當受諸吳。吳亦不與分也。曰。當受諸周。養利公皆讓不言。而食貧治經。奮曰。丈夫墮地。顧自樹何如耳。安問周與吳爲。已而名果成。偕計長安。從日者卜。卜曰。君法故不當貴。有子乃貴耳。而吳太夫人夢龍翔于庭。是夕公生。相與異之。公生而器度純雅。風儀韶令。弱冠從諸生遊。試輒爲首。與方伯顧公夢圭。太史王公同祖齊名。號爲崑山三儒。嘉靖乙酉。南直省試中式。舉壬辰會試第七。明年授工部主事。奉命朱青滇南。尋進員外郎。庀材潞潞。闢四門于花。買人輪木。各從

其方。魚貫而入。無所留難。歎聲大譟。再進郎中。綜事鳩工。具有規程。司空倚重焉。東宮出閣。詔選郎官侍從。公名在牘。或賂而更。公不愜也。以望擢四川按察司副使。提督學校。中布功令。獨持風紀。貴要私請亦皆不行。以刻核見中。太夫人春秋高矣。謝病歸侍。五年不出。內艱。服除。以故官改補雲南備兵。鹿滄獠夷叛。西洱海中。遮略三郡。更不能制。公與隣道謀畫。誘致別種。取獠自効。西洱遂平。撫臺上公功最。相臣子用事。銜其無貲也。賞格不行。稍遷本省左參政。尋陞四川按察使。右布政使。仍轉爲雲南左布政使。考核吏治。無所阿。邑有岳牧體。故事。方伯久次。不滿而遷。還卽開府。公三年奏績。受策書矣。而以入覲。聞命還南京。太僕寺卿。例改別使入覲。兩臺弗許。公不得已北上。一日道中雨雪。先止候館。有御史某繼至。別宿民舍。心固不快。故以好謁公。語次爲言。孤遠之臣。中朝無援。浮沈滇黔數年。僅從量擢。又困是役。御史宵人也。幸其無當。遂劾公入覲非法。公默不置辨。亟上疏乞休。詔與致仕。穆廟登極。乃進今階。士論惜焉。狀稱公爲人儀貌簡重。言笑有常。在官三十年。貞介昭明。終始一節。監司所積贖鍰。舉付諸守藏。未嘗私

取。滇南寶貨出納，一無所染。有土酋嗣官者，旁支殷富，以賄奪適公，獨以法正之。適感公恩，因里人博士某以金瓶異寶為壽，直可萬緡，公正色卻之，亦不語人。博士歸里，為人誦說，乃知其事。今舉世浮慕清修，至譚揚太尉卻金，皆謂固然，無足異者，綜其實不爾。如公趣操，亦大難矣。天性孝友，內行純備。太夫人性嚴，時有不悅，卽長跪請謝，色解乃起。迎養入蜀，每至險道，輒步行夾轂扶掖而進。卽得平地，乃敢登車。少時嗜酒，嘗有酒過，太夫人力諫之，自此終身止飲。曰：吾法陶士行。兄伯伉直使酒，公能曲順之。及與分產，以腴田讓兄，自取其瘠。瘠田大穰，復分其入。至其敦睦羣從，奉事寡姊，恩禮篤至，爲人所稱，尤不可勝紀。云里居杜門掃軌，不修請謁，凝塵晏然，一如寒素。故蜀中諸生有宦于吳者，覆篋及門，方出一見，亦不使里人知也。其學淵源經藝，而稱說程朱之言，于子史群籍多所涉獵。尤嗜左馬屈宋諸家，獨不喜佛書，嘗著論聞之。少時與從兄子言以聲詩相和，及至滇中，交楊用脩太史，雅相矜許。太史校公集序之。公始以使至滇，愛其山水，圖之以歸。後爲監司，出入滇蜀間，幾若干歲，故所遊履歌吟，於西南爲多。所著有元史

彌遠、玉峰詩集、東吳名賢記及涇林詩集若干卷，行于世。別有詩十卷及涇林雜記、涇林類記、四書解、各若干卷，藏於家。嗟嗟，以公所操持韞藉而槩其文與行，可謂先民之典刑，非耶？吳卽多莊士材人，如公品第，宜亦無幾。而後進慕名，少所稱說，豈其耳目所涉遠而不及聞耶？抑風會之流，各有所趣入而不返也。故亟表而傳之，以爲世模楷，淳風幾可復焉。

（國朝獻徵錄）卷七二

贈四川布政使司左布政使程公墓碑

今天下爲方伯者，必積資二三十年，甫得而已。迫進於倦勤，而其階去公卿，纔一間，惟恐失之，不能無阿邑覲速化。又所職重錢穀，手足拮据，無復遊戲翰墨之日。而余出爲藩臬，所事方伯凡數十人，晚得永康程叔明公。公年踰艾，晨興夜作，卽居恒燕談，每有不盡之興。而又善爲古文辭，及晉人書，應之如流。其執義甚堅，却使者悍塞相撐，距不爲動。而一切出納明審，媒孽之卒無端。余甚異之。久而後知公之賢，蓋受其父方峰先生云。先生名梓，字養之。先世爲徽槐堂人，勝國有廉訪副使格者，避徙永康。二傳徙方巖，又二傳徙附馬堂。又三傳爲



伯詳娶于楊。即先生父母也。有三子。季則先生。先生生而明惠若神。六七歲無戲言。媒容臧獲不敢以情見。見輒詆訶之。既長。聞發有何王金許者。聖人之徒也。就外傳問學。傳不能對。久之。讀正學編。至所爲真實心地。克苦工夫者。躍然曰。學在是矣。又進而求之濂洛關閩。又進而求之鄒魯。未得則終夕不寐。已得則若饗大年。而其父不悅也。是安所當舉子業乎。先生長跼而請曰。世不乏公卿。惟聖賢不數。兒雖不敏。願大人爲聖賢父。父譙讓之。古公卿獨無聖賢耶。未聞合之兩傷。離之雙美也。先生乃出就試。輒褒然舉首。爲邑諸生矣。而是時王文成公學大行。先生與李生侯璧。周生德基。輩負笈執雉。文成奇先生年少而志銳。令從高第弟子錢仲實。王汝中。請居陽明洞中。其數則始乎誦經。終乎讀禮。其義則始乎爲士。終乎學聖人。端而言。蠕而動。一可以爲法則。凡六年。文成卒。先生謂邑故多大儒。自陳同甫以來。何寥寥也。乃偕從父文恭公及司丞應公爲五峰社。而推二公長之。衡藝括蒼諸郡邑人士。其從如雲矣。五峰故有招提。朱晦庵。呂東萊。陳龍川三賢所講學地。而中允率臺有晦庵遺書臺。傍多隙地。又石洞爽塏可居。謀於司丞及李周兩生。構屋數十楹。其與以祀三賢。而

左右个以居四方學者。命之曰麗澤之祠。學徒雲集。幾與陽明等。先生雖宗文成。而文成之徒往往以通脫無規檢爲得良知本體。流弊不可勝言。故壹是以真實心地爲本。瞬有存息有養。言動啓處不失尺寸。其意氣鮮所服下。而恒以謙受持之。穆穆落落。如渾金璞玉。事二人孝。一舉足出言未之或忘。沒而擗踊哀號。廬于墓者三年。弗忍歸葬。祭一準於禮。自曾大父以來。惑形家言不葬者數世。食指益繁。皆相仗無適任者。先生不愛重貲。悉爲卜地而厝之。不以煩衆子姓。伯氏貧而仲氏歸無子。先生事之沒身。衣食豐腆。逾於已。其喪也。附身若槨。無不誠信。盧生德卿者。故授徒。率僧舍。僧兄某里豪也。惡德卿而辱之。德卿訟諸官。懼無左驗。則陰署諸生名而首先生。豪訟先生及德卿以下若干人於御史臺。是建淫祠倡偽學。惑衆心者。御史故不善文成。而中發言。削先生諸生籍。廢祠。四方學者扼腕。薦紳大夫宗伯黃公綰。方伯應公良數十百人。詣臺言狀。復先生諸生籍。祠以不廢。先是。有司受臺檄。逮先生及德卿。德卿亡匿。而獨先生詣臺對簿。榜掠百方。無呼暴聲。又亟爲德卿明其無他。人言德卿實首難。而子爲受惡乎。先生曰。德卿以諸生爲豪所窘。固當洗之。且渠首署吾名。

正爲今日、賢者急病而讓夷、臧文仲固知之、吾所學何事而負德卿爲。德卿卒不挂爰書、更與同學如故、口不道前事矣。先生雅不樂爲諸生、奪于父命、已舉叔明善屬文、上書請除諸生籍、而數數誨其子曰、若太父所望爲公卿者、公卿而聖賢其人者也。士尚志、居仁由義、大入之事備矣。誠得爲聖賢、固不害爲公卿、不者取詬病、更易適足自點耳。所耳提面命、皆嘉言善行、無一及私。叔明舉進士、司理武昌、先生來視之、吾往所訓汝者何若、無負吾所學、則可以不負君。兀坐一室、左右琴書、啖葵羹麥飯而甘之、無令司理以養傷廉。居二年、語叔明、爾不嫌以葵羹麥飯養我、幸甚。然吾家固饒此、何更費爾。買舟從兩奚奴、負所攜囊衣琴書歸。而過匡廬、則晦庵講學地、盤桓久之乃去。自是叔明爲比部郎及陳真臬、皆不就矣。先生年七十有奇、無他房御、既喪其偶孫夫人、不復娶。素髮長委至地、步趨強駛、日與故友講學五峰、而稍及二氏家言。構亭五龍之嶺、顏之抱一。時據榻若卧者、而實未嘗欠伸、振襟跼蹐、賓客來造請、輒先知其候。亭瓦有朱光、月朔掌文作丹砂色、人異之以爲仙。叔明司理考最、繼爲比部主事、爲郎中、凡三封先生如其官。先生北鄉稽首拜璽書之辱、已服賜服朝于先

廟、索之不復御。足不履公府、郡守王公以鄉飲酒禮禮先生爲上賓者三、卒不應。邑大夫吳明故通家子、三年僅得一奉杖履、亦不報謝。而叔明爲主事、當國者以申韓治、至歲課誅戮多寡爲殿最。叔明決囚吳中、還上先生壽、先生酌而祝之、以無寧民壽我。而叔明坐決不滿品罰、先生顧大快樂之。尋以郎治獄山東、復勅厲如吳中時所平反、殆于餘人。還朝、遷副滇憲、事念先生老不欲行、先生艷然曰、緬夷從我邊鄙。天子旰食、兒官稱治兵使者、所部臨安當要害、食焉而避其難、吾不以爲子。老夫強飯、恨無階執父前、願戀膝下耶。卽定省溫清、有諸孫在。叔明強起之、瀕未二年先生卒矣。先生蓋下堂而傷其足、猶時令童子昇簾、荀眺望谿壑間、與至口占成韻語、諷諷可誦。於古好陶靖節、邵堯夫之爲人。所著白翁吟稿與擊壤同。卒之前一日、命諸兒治殮具、曰、吾逝矣。吾內省不疚、不倍學矣。小子勗哉。其與靖節委運去來又何符也。先生生弘治戊午八月一日、卒萬曆乙酉八月十有六日、年八十有八。葬于五龍山之陽。又十有四年、叔明以四川左布政使奏最、贈先生如其官。配孫四、贈爲夫人。丈夫子一、曰正誼、卽叔明娶吳、四封爲夫人。女子子一、爲邑諸生

徐文育婦。孫男子五人。明志、婦朱、叅政方孫女、繼盧、諸生仲呂女。明理、諸生婦黃、諸生伯新女。明允、諸生婦張、經歷泳女。明試、諸生婦徐、知縣顯臣女。明見、婦李、從祖文恭公外孫女。孫女一人。爲太學生黃志道婦。程於藝、歛爲望族。當嘉靖朝。文恭以斥大宰諂墨及不奉玄調。復以上疏忤旨罷。廩廩大臣風節。後進稱說之。實爲永康程起宗。至縫衣淺帶之士。浮英華而沈道德。則無如先生矣。先生學如射不失正鵠。其所旁綜兼該。雖小道必可觀。鴻生鉅儒。洵不可名以一家。卽位不逮文恭。而名埒之。多壽多賢子孫。殆有甚焉。叔明行且爲文恭。穀似穀異地則皆然耳。先生身先後四命。通奉大夫。學者畧不言。第目之方峰先生。余因以陳太丘郭有道例。爲樹碑表墓而銘之。其辭曰。其人士而其學希聖賢。其道正大而其游藝無所不詮。其跡田野而其遺澤在吳寧齊楚蜀滇。其福考終命而其示化若仙。宰木鬱然。有光燭天。是爲永康大儒程方峰先生之阡。

李維楨撰 《大泌山房集》卷二二

逸士謝葵山先生墓碣銘

於乎。此吾友謝葵山之藏也。葵山名祐。字天錫。廣州府庠生。棄去。從遊白沙先生于江門。聞混淪之學。自林南

川外。惟葵山獨得其指。曾從石翁遊古勞葵根山。石翁詩曰。手拍崑崙歌沈瀟。虹橋月下拜相邀。謝生卜築葵根宅。纔到葵根怕路遙。天錫遂結廬。栽茗爲生。曰。吾不猶多於雲卿之履屨乎。安貧樂道。糟糠不饜腹。布襪不掩脛。甘泉子與之詩。有曰。短襪度玄冬。其貧如此。晏如也。天錫生於甲寅年六月初八日。終於丙寅年九月二十日。一子宗濂。云。被人謀絕。初。甘泉子不肯會試者將十。二三年矣。天錫勸之。駕乃因母命赴禮闈。辱上第。天錫病。遺詩四首。中有曰。生從何處來。化從何處去。化化與生生。便見真元處。又曰。相歡不盡言。君歸我無口。已而果然。可哀也。甘泉子奉使安南。爲正德八年癸酉十二月。親往塋之。葵山已西向之原。至嘉靖癸丑十月。則甘泉子致南京兵部尚書事已十四年矣。遣守墓古真祠。天祐代奠之。天祐者。少服侍白沙先生。七十以上。不忘舊也。甘泉子既將龕公神位。與陳清江同祀于白雲尚友堂。時侍食于師側。蓋二君皆無後也。予哀之。遂修其墓而誌之。墓碣系以銘曰。於乎公乎。求志于葵。精神在于葵。予藏公體魄于葵。維手植茗于葵。白縣帖福祀于葵。於乎。瞻葵之陽。山高水長。公在宇宙。久而不亡。

湛若水撰 《甘泉文集》卷三



校記

①直無逸時：《明史》卷二八三《歐陽德傳》作「直無逸殿」，「時」字疑誤。

②「無」為原卷第十二頁尾字，此下原缺第十三頁約四百字。

③幾：當作「凡」。

明儒碑傳集卷五十五

林春 薛甲 陳讓 梁格

林東城墓誌銘 唐順之

嗚呼。吾友東城林君。古所謂敦行君子也。紛華盛麗。耳目之好。一不厭乎其外。機巧慧辨。機智之習。一不鈎乎其心。潔以律乎其身。一東脩之間。畏之若苞苴然。謹以裕乎其人。一與臺之賤接之。若賓友然。行必愜乎人之所安。故不為嵬崖霸截之行。言必衡乎力之所抵。故不為杳眇浮濶之言。嘉靖辛丑十一月二十日。以吏部文選司郎中卒於京師。年四十有四。出其橐。得銀四兩。不能棺。其寮友為之棺以歸。歸不能塋。郡守朱君。州守黎君。賻之錢以塋。而黎君又使君之友陸位等狀君之行。來請銘。朱君黎君。君在文選時所選。廉平吏治其鄉者也。君諱春。字子仁。始號方城。以其先福建福清縣方城里人。後改東城。祖諱某。父諱宏。母某氏。自君龔世而上。有諱閔者。始自福清。以從戎隸泰州守禦所。故君為泰

州人。林氏自從泰州。未有以儒顯者。為儒自君始。後君貴。始贈父宏為吏部文選司主事。而封母某氏為太安人。君始以寤。故幾廢書者屢矣。君讀書。居常以行箚注。膏繁衣帶間。惟所適。則出膏于筒。燃火讀書。君父為漕卒。君又獨與母。妻織屨。織屨讀書。率以夜不睡。嘗曰。不能炊。實米於鄰。不得。君行歌自若。家人頗非怪之。君自若。君是時堅苦已如是已。而受學於知州王君某。與其鄉先生王君汝止。兩王君故王陽明先生弟子。君因此始聞致良知之說。則心喜之。至夜中睡醒。無人虞。輒噴噴自喜不休。遂欲以躬踐之。則日以朱墨半點。記其意向。臧否醇雜。以自考鏡。久之。乃悟曰。此治病於標者也。於是駸駸有意乎反本矣。戊子舉鄉試。壬辰舉會試。第一。登進士第。選戶部廣西司主事。調禮部主客司主事。又自禮部調吏部文選司主事。吏部故於屋岸。鎖門謝賓客。雖親故人往拜。示自尊重。而吏部以提熱柄。故雖諸寮中。率以嫌隙相猜詆。君色溫氣柔。不以行能先人。



儒藏

其在諸寮中、悛悛下之唯謹。其在同志中、雖其名位絕不相埒者、悛悛下之唯謹。門無留賓。日旰出部、則徧走刺答諸賓客。或羅致諸賓客講學、意業蒸蒸如也。諸賓客人人自以林君親已。其尤厚者、則相與挾衾被櫛具、往宿觀寺中。講學竟夕、以為常。復為郎中、官重益多事矣。然猶如此。以此諸寮中、雖其志行與君絕不入者、亦謂君長者、不復猜也。而善類因君以聯者為多。君自束髮至蓋棺、未嘗一日不講學。然君本以長厚清苦繩墨自立其於學也、亦因其質之所近。君為主事、是時縉紳之士以講學會京師者數十人、其聰明解悟能發揮師說者、則多推山陰王君汝中。其志行樸實則多推君與吉水羅君達夫。羅君於朋友中最沉密矣。然君猶面疵羅君、以其露才也。君之自歛可知矣。王君汝中洒落而君小心周慎、畫尺寸不敢失。兩人操行不同、然君獨心敬王君。為主事久之、轉驗封員外郎。已而調文選司員外郎。居一年、母安人病瘵卧、君謝病歸養。君居鄉則益

悛悛謹甚。如故儒生時。家居無一錢、亦不以取於人家。有一錢、亦必以施於人。侍母安人病、病少間、則出富故所讀書處為書宮者、與其故時友人及鄉之後生講學。以其間走安豐、就其故師王君叩所疑義。每往必喜幸。以為聞所未聞。君於師推王君汝中、於友推王君汝中。君居官、有未識王汝中者、君與之言必曰、吾師心齋說如是。君居鄉、有未識王汝中者、君與之言必曰、吾友龍溪說如是。居久之、赴官補稽勲郎中、調文選郎中。君自為吏部主事、泰州守某黷而虐、君請於尚書黜之。泰君鄉也。尚書趙趙曰、某未有劾者、奈何。君曰、不實則罷主事。遂以其人調邊地。頃之、南御史劾章至、則其人也。竟黜之。後君赴官泊淮、淮守某以次謁諸過客舟、始及君、侯張又薄。若不知君為吏部者。後淮守入覲、考下當遠調。君為稽勲郎、具白尚書、以過淮事為其廉靜、懇乞留之。更得調永平內郡。二者其一遠、撫者不敢為其一怙勢者不能為。而君為吏部若此。然君長者、常護人短、其請

鼎泰州守事則尤為君所難。君既長選事，益思薦進賢人，慎擇監司守令，洗刷奉其職。然事有與掣，或不能盡如所欲為，則君自謂曰：選曹之職，欲上通於君，與相冢宰之心，下通於選人與天下人之心。相冢宰之心，未必選人與天下人之心。選人與天下人之心，未必相冢宰之心。選曹居其間，欲兩合焉，難矣。雖然，求無負乎吾心足矣。君始調文選會，御史論君受牌坊銀事，雖衆以為妄，然君獨自念東髮兢兢，砥行遺點，染居常引咎不愜，欲解官又業已為之，既任事又與掣，縮縮不自得。曾又多事，君日夜其間，固甚瘁，居無何病，一夕卒。卒之日，猶在曹，不自知病，病且革，乃昇歸舍。先是君嘗會朋友講，曾子啟手足，意慙慙，聞者皆怵惕。未數日，君遂卒。君問學幾二十年，其膠解凍釋，未知其何如也。然自同志中語實行者，必歸君。君娶李氏，封安人。子四人：曉、暉、曜、昕。曉樸而材，能似君者也。為庠生，妻某氏。暉，聘某氏女。一嫁王用賓。塋以卒之明年某月某日，塋在某所。君不喜

為華詞，其舉第一應試文字及後所為詩古文，務理道，質而不艷，如其人。始君幼不知書，父故苦貧，也不能資君以書，以餘子給事千戶王某所。某奇君，令與其子王烈同學書。君自是始學書。後父數見君諄諄，且喜且嘆之曰：兒讀書固善，然書可飽乎？因取其書欲燒之。君婉詞跪謝，乃解。後君貴，常思王氏厚報之，自王烈以下，禮節稱謂歲時起居，一不改於故。餘子時銘曰：君嘗有言：天然之門，盎然出之，不作好醜，不為我偶，不為人解。天心之窟，如彼日月，光煦四垂，樓臺殿閣，費壤泉穴，亦所不遺。藏疾於數，有如其垢。蓄德之資，有如寶然。玉金在前，其耀不施。君子若愚，暖暖姝姝，不其淺而，我願君語，勒石於墓，式昭世規。

《明文海》卷四四二

憲副畏齋薛公墓表

薛應旂

吾常至古延陵郡，吳公子札所封。札以禮樂見推於上國，迨卒，塋中浦。吾夫子表其墓曰：嗚呼，有吳延陵季子



儒藏

之墓。蓋謂其達於理學也。自是之後，兩極夢奠，禮壞樂崩。漢董仲舒、隋王仲淹、唐韓退之、傳孔門之餘緒，斯道賴以不墜。然皆西北之產，而東南則眇乎其未之有聞也。至宋政和間，楊中立承伊洛之傳，僑居於常。於是常之屬邑武進，則有鄒志完父子、周伯忱兄弟，無錫則有尤延之師弟，宜興則有唐彥思，皆知以道為學，而實為東南之倡矣。未幾，學禁旋作，宋祚遂衰。迨我洪武，崇尚理學，迄今二百年間，吾常謝處士子蘭、邵宗伯國賢、徐司徒用中、毛給事式之、唐中丞應德，皆以理學聞於時。江陰人文雖盛，其以理學聞者，則尚未之有也。畏齋薛公應登者，其殆裊然而崛起者乎？公諱甲，字應登，畏齋其別號也。常之江陰人。父浮休先生諱章憲，以文學名。娶張氏，生公。公生而穎敏，有異質。年二十五，中嘉靖壬午應天鄉試。己丑舉進士，選授兵科給事中，遂以言忤當路，謫湖廣布政司照磨。壬寅，量移浙江寧波通判。又三年乙未，陞保定同知。明年丙申，陞四川按察僉事，整飭

飭叙邏兵備。又四年庚子，陞江西南贛兵備副使。在贛五年，致仕。歷任政績，皆種種可述。具在公年譜中。而公平生所自為者，則不屑屑於是也。公自弱冠時，即謂文人之文於身心無益，遂潛心晦菴之學。迨入仕後，得陽明傳習錄讀之，遂遵其教，而以象山為宗。曰：解縛者陽明先生也，不然桎梏死矣。時四方從事陽明之學者，所在羣起，公皆歛衽下問。按公年譜，在京師則會於白塔寺，在江西則會於青原山，居鄉則約諸友為名山之游，往往會於僧舍。雖在會者，其人未必盡誠，而公之探討服行，務求良知之究竟，知行合一之本原，則皆真心實意，以真其必得所歸，而畧無徇外為人之私。故年逾邁而志愈勵，汲汲焉未嘗少懈。所謂朝聞夕死，斃而後已者，公實其人焉。歲辛未，公年且七十有四矣，特顧余山中。余迎之竹樹間，值雨，過石滑，公累步艱行，余進而扶之。公即笑而言曰：陳瓊生長東南，不識伯淳，猶可委也。吾為魯人，不識東家，可笑也哉。吾是以來。余問云：何公



謂近見君考亭錄謂晦菴之言孔子教人之法象山之言孟子教人之法不覺恍然而悟前人數百年之爭辨吾輩數十年之講求誠費辭矣不然良知之言又一桎梏也吾敢不以筋力為禮而不至君一拜耶余謝不敢當而心服公之真切為道蓋誠不在於附和趨時聲音笑貌間也余方將從公以永餘年詎謂不逾年而公遂易簀矣余既為文哭公而公之子達等乃表經詣余稽顙請表公墓余謂公之蒞官行政不表可知而江陰之以道為學則實自公始惟其道之是否而不惟其人之從違惟其言之當否而不惟其人之顯晦亦唯公為能之也謂公為豪傑之資聖賢之學亦何過哉是故表而出之俾過公之墓下者得以覽觀而興起也公生於弘治戊午十月二十四日卒於隆慶六年七月二十五日享年七十五娶華氏子男四長某次某縣學生次某恩貢生早卒次某太學生女幾孫男女幾具在誌狀中所著有易象大旨四書口義心學淵源錄藝文類稿行於世。

《明文海》卷四四四

江西副使薛次公甲傳

張時徹

薛次公者名甲字應登號畏齋江陰人也厥考曰洋休公章寇負不羈之才有經世之志倚馬命詞藻麗溢發其於榮名拾芥不啻也而早捐仕籍抗跡烟霞希仲長之樂志者王符之潛夫意與所屬輒輕數千里而赴之無留難者公受退庭之訓方在釋褐已丁解古文詞矣已又厲志作聖之方日尋經時翁之學動以為準因以畏名齊比諸耆紳云嘉靖壬午舉於應天已丑舉南宮觀政禮部時河間李尚書試諸進士以時正論公獨冠其特遂藉有景譽會選臺諫輒授兵科給事中蓋異數云公遂四上封章以匡違拂而其末攻排異端尤力時方士邵元節以左道得幸親為肺附與貴溪夏相國表裏為奸怒公之齟齬之也甚其黨饒秀劾公競進佞諛銓部謫湖廣布政司照磨當是時公以所學驗諸行事有未盡合益取象山陽明遺書而參伍之合異為同反博于約充然有得也壬辰陞浙江寧波府通判此兩職者蓋世所稱散曹也公事不避難歷試輒效而諸奸必良尤為華亭人曰世恒病遷吏輒遷任使罔功食祿奉上不當如是耶乙未陞保定府同知丙申陞四川敘府兵備

余事其地因戎蠻之所都也。捕噬也。繁閭闔無虛日。命吏率以夷委之。公曰。是不有政乎。鑿齒雖題。孰非吾民者。乃興利除害。寢兵息爭。解家撤累。世之賢靖。永播方萌之惠。談者多焉。庚子。陞江西按察司。贛州兵備副使。大張法紀。振刷宿倫。誅桀廷春之負國。拓半角水之堡城。而民知有遺育矣。他如清屯糧之隱蔽。却鹽稅之羨餘。立小學以收新民。議開採以飭部伍。峻防戍。潔潔一方之保障。不徒炫飾旦暮已也。時分宜嚴相方貴寵用事。而其子世蕃干紀亂政。罔罔日月。公治與之降。諸作奸犯科者。率藉嚴氏為城社。而公直行一意。罔所顧忌。苞苴問遺。又絕不與通。由是大忤嚴氏。而欲甘心焉。會大弊群吏風言官拾遺罷免。知者駭焉。曰。嗟哉。秉國之鈞。獨奈何求多於吾人乎。公語其子曰。物以不材得終其天年。吾能饒之性。不能適俗。若冒進不止。必有殺身之禍。今得正首丘。幸矣。幸矣。公既歸。不自給。乃與家人計口授田。自食其力。樹蔬隄防。曲盡方畧。所獲率倍他農。治田之外。一無他營。家居不入城府。縣官蒞任。始一修謁。有以公事來咨。則吐其衷應之。曰。庶幾小補於邑里耳。辛亥以後。倭寇陸梁。恭于內地。公請築揚舍之城。

罷諸鄉之堡。守君山之險。操國練之兵。嚴選將之法。軍器整可行。至於表錢尹之死忠。葬死綬之群族。捐粟以食寓戶。用審計以破內應。白庫役糧後均催之。大弊規水利之典復。皆人所扼腕與歎者也。晚節。斷家事。一切無得關白。蓋其神誠有所寓也。公嘗言。平生受益者三友。一曰貧。二曰病。三曰患難。貧故知節用。病故知保身。患難故知處世。學者未有不由此而能有成者也。平居無所容。待妻子如嚴賓。侵晨必入家廟肅揖。次至賓館。子弟後至者。呵責之。常曰。人五倫為大。故凡倫理所在。必本諸心。以求至當。如讓先世之產於伯氏。群族子弟而教誨之。特其一二大者耳。公自少力學。老而不衰。真於忘食忘憂者無異。而尤篤信象山陽明之遺訓。故其言曰。格物即所以致知。慎動即所以存養。成物即所以成己。無暴即所以持志。與夫一在精中。貫在一中。約在博中。恕在忠中。皆合一之旨。此意了了。則六經四書與夫大而乾坤。細而毫芒。無非此理。皆可一以貫之。此學之所以為易簡。而非遺棄物理。自計便互之謂也。其他與同志辯難。生徒授受。不下數千萬言。備載各集。今其傳者有曰。易象大旨。曰。四書口義。曰。心傳書院講義。

曰心學淵源錄曰藝文類稿曰藝文類稿續集海內
聞人若鄒東郭氏歐南野氏胡栢泉氏羅念菴氏唐
荆川氏林東城氏蕭鶴臯氏錢緒山氏王龍溪氏何
吉陽氏萬履庵氏管南屏氏朱近齋氏林艾陵氏趙
延陵氏皆公所與遊講明斯道者也論曰天下將治
而人尚行天下將亂而人尚言今之談道者其尚言
乎尚行乎余不能一一知之矣若薛次公者仕不致
操履不隨俗推講說之結言爲制行之彙的謂之尚
行非耶諺云桃李不言下自成蹊余故表將其事使
後之論世者有所考云

《國朝獻徵錄》卷八六

監察御史見吾陳公諱傳

張元忬

自考亭朱子倡道於閩中一時及門高弟砥行植節
者滿郡邑故閩中之學在有宋孝寧之世爲最盛迨
明興以來朱子之書布四方家傳而人誦之然特習
其說以獵取科第影響剽竊而朱子之宗旨轉晦夫
自蔡虛齋陳紫峯兩先生相繼出乃始一洗俗儒之
陋習獨採朱子之精微而閩中之學在皇明正嘉之
間又最盛見吾公益紫峯之從弟自少即稟學焉盡
得其衣鉢之傳而統承於虛齋者也然當兩先生時
王陽明子方講致良知之學獨異於朱子世之爲兩

先生之學者泥於舊聞相率而排之公既尊信兩先
生而亦無疑於陽明之說嘗與人論學有云陽明先
生懼人謂格物只是窮理窮理只是讀書故以格物
爲主于行懼人以致知爲致聞見之知故加一良字
於知之上非良知不足以言知非格物不足以言致
良知又云陽明之學入頭處在格物要妙處在慎獨
獨者獨知也獨只是良知慎獨卽是致良知此學初
無足異不知世人緣何而異之又云宋儒之學萬分
之中不無一失陽明發明其所未至將以爲宋儒之
忠臣益友而非欲拾彼之短以形己之長也今講陽
明之學者輒掇拾宋儒之短以爲口實語養德之學
則爲薄德語講學之事則無益於學而徒使陽明得
罪於先儒可爲深戒由是推之公於朱王二子之學
蓋皆超然自得而非徒依傍口耳私開戶牖者使論
學者人人如公則二子之說不惟不相悖而實相濟
矣尙何辨論之紛紛哉公姓陳名讓字原禮少穎異
不羣爲文奇崛遒勁不爲蹈襲語嘉靖辛卯舉閩省
第一尋登進士授紹興府推聽獄稱平暇則進諸生
校藝講學士彬彬興起天興祠之置圭田三江開之
捍海患公區畫贊襄之力爲多徵拜監察御史遇事



藏

敢言、無所諱避。肅皇帝既嗣大統、迎興獻太后入、仁壽張太后仍以藩妃禮遇之、兩宮以是有卻。巨俠劉東山者、睥睨兩宮間、將以奇論取富貴。乃令其黨構誣張鶴齡兄弟有逆謀、左道呪詛、詞連宮禁、逮繫無算、數十百人、都城騷動、諸司不敢出一語。公方視事東城、遂捕東山下獄、究其罪、東山度不可脫、益令其黨告變、且誣公爲張氏羽翼、併下公獄。公從獄中上疏、謂陛下有帝堯九族既睦之德、而東山乃敢對陛下倡言漢武巫蠱之禍。陛下有帝舜克諧底豫之孝、而東山乃敢對陛下公言恭泰違母之事。宜亟正典刑、以安宗社。上覽疏、意稍解。會西曹掾東山所奏悉無驗、併其黨坐欺慢伏誅。公得還職、京師宴如。當是時、微公仁壽宮危、人心搖矣。已而興獻太后登遐、廷議遷興獻帝合葬、天壽公以藩王不宜入祔。皇陵乃借堪輿家爲言、顯陵氣脉不可洩、又重於勞民、請以袞轅交葬便。上初覽奏、怒甚、投疏於地。少頃復取視、曰：此言亦是。於是遂定不遷之議、而執政從翁擠公竟賜罷。然公身雖退、而言則已行矣。公在臺中二年、疏屢上、皆侃侃大計、獨此二事尤人所不敢爲、不敢言者、咸謂公有社稷之功焉。

既退休里中、日夕靜坐讀書、孜孜學問、口不談當世事。惟地方利病所關、輒不惜齒頰、盡盡爲上官陳說。爲人剛方、廉介、兄者疎憚、然與之久處、談論慷慨、真意溢、出人益倍慕之。上自承天還、稍問公姓名。臺使者至、輒以公薦於朝、而執政終忌之、置不用。家居十五年而卒。隆慶改元、錄先朝諫者、贈公光祿少卿。所著有見吾文集二十卷、邵武府志若干卷、行于世。夫公始終出處大致如此、世之知公者、徒謂公爲廉吏、爲直臣、爲博雅之儒、爲剛介之士、而不知公之學其所見者定、其所造者深、其所養者粹、蓋真自以紹紫峯之家傳、振閩中之末響、凡其平生所表見、凜然偉然者、皆其學之緒餘、而非襲取于外也。公歿未幾、子孫無以具體朝。子往嘗見其子於深陽、徂徠不完、予甚憐之。頃者走三千里外來謁予、請爲公傳。且曰：吾父之事行、誌若狀、既備矣。惟學術所統承、未有發其微者、是以竊有請也。嗚呼！某之志若此、亦可謂知所重矣。故予傳公、特詳其學之所自、以附於誌狀之後。

（國朝獻徵錄）卷六五

南京兵科給事中定齋梁公墓表



南京兵科給事中定齋梁公以嘉靖壬寅十二月三日卒。明年癸卯附葬先兆。前侍御少京兆曲沃李公為銘誌納之墓中。其述公世行辭矣。公有三子。伯紀。仲綱。季維。俱通敏宏諒。為能以文行世其家。當公歿時。伯子已有齋庫序中。仲季方幼。迨後八年。為嘉靖己酉。而伯子舉于郎。又三年壬子。仲子繼之領省解。又六年戊午。而季子復繼舉焉。迨歲壬戌。仲子遂登進士。蓋公歿且廿年。而門祚奕奕。盛矣。夫君子修德學道。入以治身。出以澤物。咸所自盡者。非以要福于天而責效于後也。然德厚則享豐澤。深則報重。猶之源泉獲滋。植木蒙蔭。理有固然矣。其或厚積于躬而不延其享。博施于物而不食其報。則其淳蘊未艾之祉。必於嗣人發之。此天道也。公自髫年志學。誦詩讀易。陰師取友。奉父遺訓。與伯兄砥礪。期繼先業。以所聞見著之於躬行。而發為文詞。故其事親孝。事兄悌。與人忠。其汲汲獎導後進也。若不及而所著述。若窺易集。定齋存稿。皆鑿鑿有然要。不為空言。蓋其德之積于身者如此。登第後。為山東濟陽尹。濟陽劇邑也。久無善理。民以流移。公汰貪墨。抑豪右。懲暴惡。剔宿弊。未幾。邑理肅清。民相率復業。既又為之罷。無名之稅。以通商。發詭隱之田。以均賦。立期望。稽察之令。而

馬政修。定賓旅往來之式。而民供省。諸所措施。繩古循良吏風。嘗自榜其堂云。一鶴一琴。亦是身邊長物。匹夫匹婦。孰非膝下嬰兒。旨哉言也。仁政厥有本矣。至若韓島城之滯冤。而卻其餽。戢巨鎗之橫索。而使之服。則尤所表表者。于是撫按諸監司。亟稱之曰。賢署上考。是公道之徵於物者。又如此。使天假公以年。方當昌言讜論。以佐廟謨。兼濟廣施。以康黔庶。乃甫拜諫職。尋居憂而歿。不惟百鍊之刃。試于小割。千里之足。斲于遠到。使識者為國器惜。乃西河故里。薰善良之德者。望拱木而興悲。東土舊氓。懷悽悌之仁者。觀甘棠而發詠。衆心所思。衆口所頌。于是餘慶旁衍。膺在後哲。科第蟬聯。昆季競美。且將敷引未究之施。震久震昌。以永責于邦國。即往事而方來者。可必矣。維昔獲與公仲子同游臨川。皆所陳先生之門。己酉。又獲與伯子同舉。雖生晚不及觀公。然叨此世契。私淑風烈深矣。仲子既食豫臬。使燕京。徵維為文。以表于阡道。公行義甚多。語在李京兆誌中。茲不悉具。但著公之大都如此。以明屈仲相乘德福感應之不誣。俾為善者勸焉。若夫世次出處之畧。系在左方。按公諱格。字君正。號定齋。先世當勝國時。自絳徙稷山。祖鐸。貢入太學。任河南揚州巡檢。父淳。領弘治己酉鄉

薦歷官秦府右長史。母姚氏。以公貴。父贈奉政大夫母
封太宜人。公以弘治己未九月二十日生。以嘉靖乙酉
領鄉薦。以乙未登進士。以山東濟陽知縣擢南京兵科
給事中。殘年四十四。配郝氏。封孺人。仲子綱。貴。公進階
承德郎。孺人加封太安人。子紀。娶胡氏。綱娶郝氏。維
某氏。紀維俱舉人。綱今任河南按察司僉事。孫男二人。
惠。蕙。孫女十人。一適舉人裴賜。一適舉人王濟。一適史
大榮。一適庠生寧塾。餘幼。

張四維撰 《修德堂集》卷二五

明儒碑傳集卷五十六

何良俊 鄭曉 劉邦采 劉文敏

吳悌 胡應麟 沈謐

南京翰林院孔目何公良俊傳

良俊字元明，松江華亭縣人。以所居自稱柘湖居士。少與弟良傳皆負俊才，或以雲間二陸比之。良傳舉進士，爲南禮部郎。良俊假寒場屋不售，久之貢入太學。當事者重其才名，授南翰林院孔目。良俊故負勝情，喜南都山水奇麗，日與名人韻士相追隨，品題殆遍。會趙文肅公來視院策，一見相契，合引與深語。良俊談當世之務，登登然不覺膝之前於席也。後王論德，維禎至，待良俊亦如之。每出遊，必挾輿俱，唱和篇章，具載集中。二公既去，不樂與錄錄者處，輒棄去。其學無所不窺，下筆波委雲屬，千言立就。於金石古文書畫詞曲，精於鑒賞。卜居金陵，十年始歸。所著有何翰林集二十八卷、何氏語林三十卷、四友齋叢說三十卷、書畫銘心錄一卷。

（國朝獻徵錄）卷二四

刑部尚書端簡公曉傳

戚元佐

端簡公鄭氏，海鹽人，名曉，室甫其字，小字阿文。少好

嬉戲，乘屋緣木，騰捷自喜。八九歲時，夏月猶被絮襖，逐羣兒，塲塲循漢塹捕蚌也。里中王生見之，謂其父儒泰曰：「阿文昂穎豐顙，蒼顏鳳目，相當貴，奈何不令學哉？」儒泰曰：「吾父積學一生，乃官提舉，吾學數十年，卽碌碌不自拔。吾父子教授里中，弟子凡數百，而者凡幾，讀書良苦，又以苦之子耶？」久之，取大學序文試令識字，則盡識，解以半義，又盡解。於是授之經傳，不半歲遂通尚書論孟大旨。父喜，益博以諸經子史，且指古人成事，列其臧否，誡之曰：「如此則君子，如彼爲小人。苟其學如此，其人如彼，卽富貴無爲也。」公聞教，服之終身。其毅然必爲君子者，父教之也。嘉靖壬午，舉鄉試第一，明年舉進士。董文簡公力薦之，政府取府亦雅知公，願一見之。公竟不一謁政府，授兵部職方主事。日就省中，羅九朝故牘閱之。凡天下阨塞、士馬虛實、強弱之數，盡考覈而得其故。大司馬金公素重公，屬之曰：「子好學，幸爲我著九邊圖。」公於是屬藁爲撰次國誌三十卷。士林爭傳之。會大禮議起，公抗章諫，且偕諸司跪左順門，慟哭不已。上怒，下錦衣獄，杖闕下。大同辛辰，被其巡撫都御史當事者請宥之，公獨以爲不可，疏乞正法。疏留中不報。未幾，以母喪



歸。服除，補武選。又以父喪歸，家食者八年。已而言實薦者衆，用薦者言起考功主事，尋轉考功郎中。時巡按御史論劾疏至，不甚當，公曰：「御史論劾不當，何以服人？」乃反論謫御史。夏，桂溪罷相，嚴分宜繼之，欲藉考察去臺諫之異己者。公不聽，則反勸其所私者凡數人。癸卯，轉文選郎中。分宜于世蕃以治中求爲尚書，公據故事以謝，分宜益怒，密疏數公罪。詔貶和用判官，而世蕃遂起留尚書少卿。公既左遷，卽習治民事，視州治如家，求所以安輯和民者而布之。政民大悅。已轉大僕丞，又回翔南卿寺者幾十年，而癸丑遷刑部右侍郎。甲寅，改兵部，兼食都御史，出撫鳳陽。時倭奴倡禍，大江南北戈戟鋒列，吳會轉漕者至不得達，憂世者有隱憂焉。公至，則日夜謀戰守備，申部曲法，又選民兵及傭丁之驍悍者以張其銳。由是我衆厚集，計算已定，一鼓而擊之于通泰，則大勝。乘勢而掩之于如皋，又大勝。遂長驅而搗之于海門，又大勝。旣則破之于呂泗，繼之于狼山，又無不大勝。餘黨遁去，運道無梗，皆公力也。公生手博雅，手不釋書，人謂其偏嗜墳索而以文學取名天下。及撫淮，所至以武功顯，一時諸老將以爲不及，於是始知賢者運

用蓋不可測也。旣而遷吏部左侍郎，南京吏部尚書。世宗以公素知兵，出之南都，非宜，留爲右都御史，協理戎政。至則奏罷諸軍之役工作者，衆咸感以奮。戊午，改刑部尚書，兼兵部事。當是時，大司馬楊公方總督宣大，有欲留楊公久鎮北門者，遂興浮議。公疏以爲：「楊博還本兵，則九邊將帥皆得人，何患于宣大之偏隅者？」權總其要，臣自以爲有功於國家。於是世宗俞其言而從之。乃詔楊還本兵，公還刑部。刑部故與錦衣獄相通，近錦衣獄多羅織，不麗法比公論奏之，而因言五城御史受訟非制，請自今已之。便時張豺，董傳策，吳時來以忤時宰劾，郭希顏以諫立儲劾，提督憲臣王忬、阮鶚以誤軍機劾，又留都兵變殺侍郎黃懋官，王直通倭奴，倭亂旣然就擒，此數事皆當時大獄，公與分宜議皆不合。蓋公意在曲全諸臣，分宜則欲殺之。分宜欲寬假王直及亂平，公議則欲殺之。彼此互折，至以目皮相惡，公不顧也。會御史鄭存仁揣分宜偏指，以職掌奏公欲憾怒主上。公素嫻于職掌，具疏述故事甚悉，分宜不能奪，乃從中搆之，竟落職還。公旣還，角巾布衣，徒步郊野，時時共老農論桑麻晴雨，泊如也。居家與子輩博各一書室。

相對日探討經史。方其意有所得。即呼其子誦之。父子間自爲師友。會其婿項篤壽同履淳舉進士。前後告歸。恒過從門牆。論文道舊。公愈益喜。凡公所言皆忠孝。其教子婿必爲君子。即其少所聞於父者。此以見其事父能不怠矣。公生平小心惕慮。常有以自下者。至其蒞官。酬物憂動。長慮常在。數世之後。故歷任甚久。諸所關防案牘。無一毫註漏。大都善用其機。不特凝凝醇謹而已。乙丑。忽命履淳治後事。丙寅。秋。病卒。年六十八歲。履淳等念公履歷不勝誣訟之于朝。世宗詔復公官。穆宗皇帝改元。賜祭葬。贈太子少保。蔭一子入監。所著有吾學編。古言。今言。奏議文集。行於世。子履淳。穆宗朝爲尚寶丞。以言事廷杖百。削籍。今皇帝卽位。復其官。已晉光祿少卿。履淳詹事府主簿。其外孫項德禎。薊州兵備僉事。

維風編

鄧端簡公曉。官文選時。里中士宦有饒金首飾。承簪以將而上覆之。茅公直以爲苦也。受之人。夫人手撥若知之。面頰發赤。亟呼僕。趣請公入。以得公。公適然不動聲色。第整理其茗。覆能如初。出坐亭中。召其人還。謂曰。吾初以家適乏茗。故拜君惠。頃入內詢之。家尚

有餘茗。心謝尊意。已授之。令持歸。太宰孟山陽公爲北邊兵憲時。有將官名將子也。因事被勘於公所。公勘得其實。酌情法之中處之。將官心德公。故假公移郵筒中具揭。托名蔬菜。具中緘銀幣若干。致謝公。即公移中批發不收。且告誡之。賄時。公轉大參行。衆將官旅見其人。獨惴惴惶恐伏地。若無所容者。公佇立亭階。槩以溫語獎諭諸將官。至其人曰。汝父名將也。觀汝貌誠不媿將種。第汝年少。更事少。後當益努力。以承父業。其人神情恍然。若更生云。愚按鄧公之卻賄也。從容暇裕。若此。非素有養不能也。且卽其夫人若此。其刑于之化可知已。若楊公之卻賄。不獨裁之以義。抑且濡育以仁。卽一語間便令人有生色焉。若徒自皦皦立節。而令人惴惴懼懼終身。生機息矣。安能望之戮力於疆場哉。憶余往處關中。一州守事。義則未疚。仁則有媿於公也。

（國朝獻徵錄卷四五）

師泉劉先生邦采傳

王時槐

師泉劉先生邦采。字君亮。兩峰先生從弟也。自少英特不羣。初爲邑諸生。卽厭舉子業。銳然以希聖爲志。曰。學在求諸心。科舉非吾事也。偕兩峰先生及弟姪。



藏

九人超越中、謁陽明王公、稱弟子。王公與語稱之曰：若亮會得容易。先生資既穎敏、而行益卓峻。丁外艱、蔬水齋泉、哀誠篤至。服闋、不復應試、而士論益歸。嘉靖七年秋、當鄉試、督學憲使趙公淵檄下邑曰：劉某行修義端、宜勸起赴試。邑令勸之出不可、而趙公責邑令益急、固強之出、官爲具舟、屬丞偕之行。至南昌、先生欲以布衣往見、丞降禮卑詞、請具衣巾。曰：不爾、憲使且罪我。乃不得已具衣巾往。及門、遙望趙公未下階、卻步不進。趙公亟起延之。先生以棘闈故事、令諸生脫巾露體而入、非待士禮、某不願入也。於是延按御史儲公良材、令十三郡諸生、竝得以常服入闈、免其檢察。比揭榜、先生得中式。儲公批其卷曰：江右人望云。已乃授壽寧教諭、以正學起士、多所興起。以薦得內名、陞嘉興府同知、尋棄官歸。自陽明王公倡道東南、學者承襲口脛、浸失其真。先生有憂之、乃極言痛斥、以揣摩爲妙悟、恣縱爲樂地、情愛爲仁體、因循爲自然、混同爲歸一者之非。先生以心之體曰主宰、貴知止以造於惟一、心之用曰流行、貴見過以極於極精。是謂博約竝進、教誨不孤、性命兼修之學。如車輪鳥翼、不可偏廢。後學能領會者益鮮。晚乃著易

緼二篇、訓旨淵奧、實發其所自得、將以俟諸百世云。與諸同志聚講於復古、復真、青原、五雲、楚越之間、皇皇復引弗倦。先生思苦而造微、諸生叩請、能以一語開其宿痼、令人豁然有省。誦貞襄公嘗言、師泉力大而說辯、排闥之嚴、四座咸屈、人皆避席而讓舍、莫敢有擾其鋒。人以爲善狀先生者、比屬疾、知不可起、諸生環榻前、猶論學不輟。疾亟、門人朱調問先生此際視平時何如。荅曰：夫形豈累性哉。今吾不動者、自若也。第形如槁木耳。少頃遂卒。里中人士入哭皆盡哀。先生疾時、若有所遇、頗涉奇秘、而不言。及將殮、體更溫、久之乃已。亦其養盛而氣完之一驗云。年八十有六、遺命諸子毋得乞銘文及請祠。初、陽明公爲南鴻臚、吉郡士未有及門者、惟先生從子曉最先受學。歸以語先生、至老共學不衰。先生常稱爲嘉穀之種云。以鄉舉官新寧令。

（國朝獻徵錄）卷八五

兩峯劉先生文敏墓誌銘

王時槐

先生諱文敏、字宜克、姓劉氏、吉之安福三舍人。三舍之劉在邑爲鉅姓、所居東南有兩山屹立並峙、學者旣瞻望先生素養之高、不可及、以兩山之秀而特起



也。足以配先生之德。遂稱之曰兩峯先生云。先生自幼疑重端確。不妄言笑。飲食出入必稟命於父母。比就塾。竟日劬書。無少嬉情。既長。不治家人生事。矜莊堅勵。實天植之歲。壬午。先生年二十有三。則與其族弟師泉先生共學。思所以自立於天地者。或至夜分不能即枕。一夕語思泉先生曰。學苟小成。猶不學也。盍亟省之。已而讀陽明王公傳習錄。所論格物致知之旨。與宋儒異。展轉研思。恍若有悟。遂決信不疑。躬踐默證。久之。惟覺動靜未能融貫。乃嘆曰。非親承師授不可。則買舟越中。見王公。執侍門牆。往復三歷寒暑。歸而與師泉先生砥切于家。其學一以致知爲宗。而殫精畢志。操存克治。一瞬一息。不少懈逸。語默作止。事無鉅細。必昭準繩。深以未學馳騁空談。遺忽實行爲痛戒。每與學者言。知體虛明。皎如赤日。但依此知。日照自察。以祛習氣。務凡情纖瑕勿留。意念虛應。生生生化。務協天則。雲銷日朗。殆盡鑑明天全而性復矣。其教人大指如此。不涉多岐。詞簡而義切。貌肅而衷懇。及門之士。敬畏誠服。已在未言之先。蓋其貞毅直方。可爲金石。儀刑之矩。素定。而潛孚之機。有在也。同郡東廓鄒公。雙江聶公。念菴羅公。時時聚處。

共證所學。雙江公獨揭未發之中。與海內同志往復辨詰。而於先生最所欽伏。間舉主寂相質。先生曰。發與未發。非判然二也。能致其知。則寂存其中矣。嘗七宿松原。與念菴公極論盡。淺底裏。公初覺未一。已乃傾信。既別。公貽以詩曰。嘆息卓爾城。千載能幾諧。目擊中有存。意會言無乖。歲壬申五月。當誕辰。諸子姓上壽畢。先生退居一室。稱微疾。一日。忽語其孫弘傑曰。吾了當而歸矣。遂明日逝。先生早遊邑庠。已擅文書之譽。廩食需貢有期矣。一聞正學。卽棄去。不復應試。布袍蔬食。輒光晦景。茂齒不求人知。滁陽朱遜皋先生教寧州。乃具薦於學憲存齋徐公曰。劉某養深學粹。見大志遠。孝友利家。身任斯道。安於躬耕。無慕世用。乞賜錄拔。必有補於當時。徐公嘉之。然公微聘已先下。且欲召之貢。先生竟辭焉。先生雖棲跡林壑。邇世不悔。而實修則著。撫院學臺郡侯邑長往往引聖。知其不可招致。則降臨之。絨問老癯賢。以寓其懷。企之誠。蓋數數然也。卒之踰月。郡侯欲吾雷公未之知也。猶移文稱劉某。襁躬幅行。敦尚古誼。下邑延訪。已而郡邑諸士合詞請祀先生於賢祠。公嗟悼許之。未及行而學憲憤取。邵公下郡曰。劉某力探聖域。倡

明正學令所司具粟帛羊豕往佐其喪諸博士弟子其議所以應祀典者列狀以上吾將俎豆之以風未進嗟夫先生學不求知而聲光自溢所謂誠不可掩者非歟時槐與應陵陳子嘉謨弱冠時師事先生從執灑掃之役者迄今二十有年而賀子澤王子育仁已筮仕並委贄受學蓋嘗竊窺先生其峻特而不可正視也有嵩華壁立之氣其敦樸而不少絢飾也有大羹不和之味其光明瑩潔則日星炯炯之昭垂其精進勇詣則江河浩浩之排決其教旨直截則駕安驅良而振轡於如砥之周行也其推誠無隱則啓扇授鑰而洞開乎九陛之堂奧也其言行肅則果布帛之無以異於人而屋漏不愧於君子淵水寒火爆之必信於世也先生之學斷斷不為於天人死生之理如指諸掌乃其教人憊憊焉一循其本然之知以省克於念慮而實踐於倫物不為辟險曠之語歲已巳先生年八十猶陟三峯之巔

餘日已而語時槐曰夫道本自不離非力挽之使不離也先生未卒之先春且暮時槐方自關西謝病歸元生命舟來神岡西原之間時槐偕賀子陳子侍左右者旬日別之先生曰知體本虛虛乃牛生虛者

天地萬物之原也吾道以並爲宗汝曹念哉與後學言即驗轍不一慎勿違吾宗可耳夫先生豈預知其永訣乃嘆繁見囑俾二三子不終墜其緒耶嗚呼悲夫。

（國朝獻徵錄）卷二四

南京刑部右侍郎吳公梯傳

潘園集

公爲少司寇時與吳公嶽胡公松毛公愷稱南都四君子聲藉甚四公皆以耆舊談名理而公之學爲深前赴公爲廷尉京兆馬生妻心疾與其姑語相礪礪輒自剄死所司驗實以聞少司寇徐以他嫌深文坐之都人士大譁公投屍單所責傷指示衆曰卽如生殺婦能令婦自仰領以頸受刃耶且爲婦無故而令其夫手刃之非所宜有於是生之冤得稍稍解竟以無坐都人士萬口頌公謂張釋之于定國不過也公下世二十餘年仲子中翰君仁度與余同舉進士以公秩事屬爲傳余嘗往公甚切其曷能辭傳曰吳公諱梯字思誠號疎山江西金谿人金谿故名儒象山先生所生處公少慨然慕其爲人師事鄉先生黃卓峰黃故師事姚江其源流深遠矣而又時涉彭蠡登匡廬往來白鹿書院與四方名士相劇切故充然日



有聞。辛卯舉鄉試。壬辰第進士。初令樂安。爲政責大。指不肯細民譽日起。調繁宣城。至登以樂安之治治之。歲大侵。請賑上官。不待報而發廩。已山帑金若干。緡令彊幹者糴之。封以外而糴之。封內民不苦累。貴官不虧一糶。不費而民賴以濟。中丞謝銜公介特當公滿考。度且內召也。以邑積逋更六七令不能完者。特屬公以困之。邑人懼爲累。爭捐貲代償。不數日逋完。而公以召行。其得民心如此。丁酉授廣西道御史。數上書言事。會上閔南畿試錄。怒與試者逮之獄。議盡罷諸生制對。公具疏申救。詔併逮公。未幾上怒解。還公御史。諸生得上公車。後有起家九列者。已亥視兩淮釐政。海潮暴溢。廬舍深沒。亟疏請蠲恤通泰二州死者以澤量存者嗷嗷亡所得食。公親潛艘至。喜曰。是天所以哀吾民而不絕之粒也。或言須奏請乃可。公曰。彼其旦謀不及夕。而能少須邪。即上有所督過。某不難以一官易萬人命也。卽取漕粟散饑民。旋出官羨買償。所全活無筭。一日念母朱淑人引疾歸。癸卯復補河南道。尋出按部。議處宗藩祿米。改歸德州爲郡治。築臺辟睢州水患。中州至今稱焉。公爲御史久。資望隆重大。用有日矣。會鄉人竊

柄鴟張。力自求退。巖居餘二十年。柄臣敗。當事者引用者碩收人望。乙丑乃補公山西道御史。不赴。丙寅。趣有司勸駕。公強起赴臺。財七日。晉太常寺少卿。亡何。晉南太僕寺卿。亡何。晉大理寺卿。一歲中所翔貴公至此。益異數也。明年爲隆慶丁卯。晉南刑部右侍郎。無滯獄。無訛法。一時靡不稱平者。公氣和神靜。居常不言病。一日造請賓客。歸輒正襟危坐而卒。亦異已。公生平官績具奏議中。如議振風紀。議蠲賑。議禁私交。識者類能言之。至請表章古文孝經。正分析之謬。請聘處士王良復薦辟之。選請新伏義陵。似孔林之制所相。上表德章義。率世厲俗者。爲尤卓云。大都公爲人無所雕飾。而動與古合。始爲宣城。舊令都津要郡守。謀建祠悅之。公視舊政無狀。執不從。按行河南。伊藩憚公威名。奉尺牘稱道友。公報曰。殿下天子宗親。非某所敢友。某天子憲臣。非殿下所得友。不從。巨璫勢張甚。樹坊故里。願借公銜名。公又不從。而遇德人。則欲然以身下之。類朱文季。厭俗卑詔華競。一切交際取成禮而止。飯客藜魚蔬食。有貧士所不堪者。而公饒爲之。類羊與祖。兩爲巖邑。其伐石而碑與卜宮而祠者相望也。類朱仲卿。登第四十

年先後立朝僅七載進難而退易類錢潛成至其華
學好學所脩師友相上下一軌於正而恬澹寡營直
與古抱道術之深者等斯有典有則邇之著蔡者非
邪中翰君深湛而好義綽有父風故余聞而具述之
語云是父是子不虛耳

（國朝獻徵錄）卷四九

胡元瑞傳

胡元瑞者名應麟其字元瑞嘗自號少室山人已而慕
其鄉人黃初平叱石成羊事更號曰石羊生人亦曰元
瑞殆非人間人也仙而謫者也遂呼之石羊生元瑞父
曰按察公僖母宋宜人按察公爲行絕類萬石君而文
彩過之所至好行陰德名位不甚稱以雲南按察副使
歸今尚壯無恙元瑞爲兒時肌體玉雪眉目朗秀五歲
按察公口授之書輒成誦見客客使屬對必工九齡從
里社師日佔畢習經生業而心厭之已悉祛按察公篋
得古文尚書周易國風雅頌禮弓左氏莊列屈原兩司
馬杜甫諸家言讀之按察公奇其意弗禁也稍長遂能
爲歌詩藉藉傳里中而於經生業亦不廢十五補博士
弟子員非其好也會按察公拜尚書禮部郎挾與俱度
錢唐過吳閶汎揚子北歷齊魯趙魏之墟至燕市而止
所經錄弔古卽事往往於詩歌廢之而是時南海黎惟
敬歐棨伯梁思伯吳郡周公瑕吳興徐子與嘉禾嚴君



仲沈純甫永嘉康裕卿先後抵燕發元瑞藏詩覽之咸噴噴歎賞折行請交。至於琳宮梵宇高會雅集元瑞以齒坐末坐片語一出無不悅然披靡自失也曰使用昔賢隸事奉席側吾曾無坐所矣。臨淮小侯孝惟實慕元瑞甚使客集而致之爲上賓旬日不聽出惟實用是亦以詩名而周宗正灌甫者雅自負風雅有人倫之鑒貽元瑞三十韻首以北地信陽相屬元瑞益自信尋以按察公外除元瑞歸從母里中母患頭風甚劇元瑞委身醫藥間日夜扶持不休母頭風良愈而身過勞得清羸疾矣。因跳匿金華山中而會大司空萬安朱公衡還過蘭谿朱公故從燕見元瑞詩而驚賞者至是從山中蹤跡得元瑞以書要之而泊舟待三日元瑞感其意爲長歌七百言以贈朱公。朱公袖示督學使者滕君伯翰曰勿失之天下奇材也。滕君輒破格爲檄受館學宮且趣入試兩御史御史再試之再爲諸生千人冠已爲鄉書上公車報罷元瑞意殊不在一第其所游從皆天下賢

豪長者然所當心獨余兄弟與李觀察于鱗汪司馬伯玉吳參政明卿會于鱗死餘皆散處不相及久之意已已不自得而會弟敬美與觀察公同年過蘭谿謂觀察吾欲就阿戎談當勝卿遂即元瑞劇語二日夕臨別握手不忍釋曰吾於詩獨畏于鱗耳已矣今庶幾得足下。又曰幸與家中丞同世胡不一及門即卒然抱于鱗恨若何時余方禪居雲陽觀稱病謝客聞元瑞來喜不自勝與語久之出其所著少室山房詩余得而序焉所以屬元瑞甚重而用是頗有斷斷者余二人俱不顧元瑞乃高臥山中不復就公車而蘭溪令喻邦相豪於詩與元瑞意合志形爾汝嘗與偕過趙學士靈洞山房倡和連日夕元瑞之臥山中凡六載而始就公車至都下遇張觀察助甫助甫余兄弟友也奇元瑞詩擊節曰二十年亡此調矣元瑞亦奇助甫詩晤賞亡間且各自恨相遇晚誠復報罷時大司馬張公肖甫請浙難按部過元瑞里元瑞避弗見張公謂按察公公兄佳甚故知之今

者難我得非以使者惠文徽徽耶。爲我致之錢唐。請得具賓主禮。元瑞乃強爲錢唐語。而張公果以上客客之。會伯玉來湖上。大將軍獻元敬素至。伯玉數與元瑞相聞問。把臂劇驪。出元敬所贈七絕句。訖之曰。大將軍健兒也。乃能作文。語不下沈太尉。曹竟陵。生亦能賦。贈我乎。元瑞援筆千餘言立訖。奇惠滾滾。既大將軍集。相而歎賞不置。伯玉因曰。我欲東過王元美兄弟。生復能從我乎。元瑞曰。吾心也。遂偕來奔州園。伯玉道爲少室山房詩序。其重不下余。時與元瑞偕來者。伯玉與弟仲淹從弟仲嘉。而張大司馬亦以內召跡伯玉而來。尋先別去。余與伯玉。元瑞諸君子。積日游奔中澹園。甚樂也。元瑞性孤介。時時苦吟。沉思。不甚與客相當。而當其揮麈尾品時藻。不能無置雌黃屑吻。有莫生者。躁而貪。以品不登上中。恨元瑞切骨。屬伯玉。元敬游西湖。故邀坐坐客。欲以爲閑端。元瑞夷然弗屑也。及在奔仲淹。倚酒侮元瑞。元瑞拉弗受。客謂元瑞。彼莫生言者。胡以受之。元

瑞徐曰。莫生者庸渠足校也。仲淹司馬公介弟。而又換賢吾儕。當愛之以德。獨奈何成人過耶。客乃服。元瑞築室山中。復先購書四萬餘卷。分別部類。彷彿劉氏七畧。而加詳密。黎惟敬爲大書曰。二酉山房。而屬余記之。旦夕坐臥其間。意愉如也。居恒笑靈魚去人意不遠。又謂我故識古人。恨古人乃不識我。其托尚如此。好稱說前輩風節。嘗懷其郡若梁劉孝標之介。唐駱賓王之忠。而世僅僅以文士目之。當由作史者盲於心故。且史第知有狄梁公。宋廣平。賢皆類首。而從周。禔。將。以視賓王。何徑庭也。上之采風使者。蘇君禹。君禹雅敬信元瑞。至下其事。賓王得祀祠鄉賢。而孝標亦暴顯。元瑞所著詩有寓燕。還越。計偕。岩棲。臥遊。長嘯。三洞。兩都。蘭陰。時園等集二十餘卷。詩數內編。外編。雜編二十卷。胡氏筆談四十卷。他論著未行世者。有六經疑義二卷。諸子折衷四卷。史最十卷。史評十二卷。皇明詩統三十卷。皇明律範十二卷。擬古樂府二卷。古韻考一卷。二酉山堂書目六

卷文遊紀畧二卷、元主國志十卷、西陽續祖十卷、陸萬新聞四卷、陸萬稟聞六卷、駱侍御忠孝辨一卷、補劉氏山棲志十六卷、蒐輯諸書有羣祖心印十卷、方外遐音十卷、澄懷錄一卷、抱膝編十卷、真賞編十卷、會心語四卷。他書未成者又數百卷。元瑞壯未有子，適始舉二子。戊子冬，復應公車，至瓜州而病，病積久不愈，慨然曰：「吾其殆乎？謂余知應麟者，惟子幸及吾之身而傳我，使我後世有我也。」

王子曰：元瑞年三十有八耳，神清而意甚舒，即偶犯霜露，何恙不已而慮至此也？夫以元瑞之生僅三十年而著作充斥，乃爾過此以往，所就當又何如耶？元瑞於地文亡所不工，積學稱是，乃不以自多，而所沾沾獨詩，彼固有所深造也。元瑞詩才高而氣雄，鴻也朗儒，橫絕無前，稍假以年，將與日而化矣。至勒成一家之言，若所謂詩數者，則不啻遷史之上下千古，而周審無漏勝之。其刻精則董狐氏、韓非子也。吾長於元瑞二紀餘，姑爲傳。

以慰之，且謂元瑞子後當克傳我。

王世貞撰 〇泉州續稿卷六八



儒藏

明故湖廣布政司右參議石雲沈先生墓誌銘

沈氏世家汴。宋南渡時徙會稽。其後有庭芝者徙松江。又徙嘉善。庭芝生瑾。始徙秀水。遂爲秀水人。瑾生璠。璠生淵。淵生度。度生復。自稱東園處士。石雲先生父也。先生幼有氣略。嘗與里中兒戲。輒具叢列隊伍行陣。指麾設敵制變。稱雄眾兒中。識者知其奇兒。然數好馳馬。一日馬逸。躓東園翁。因問譴之。遂折節爲學。性穎異。兒時能日誦數百言。通其大指。至是益攻苦。銳志學。遂成。充邑庠生。貲爲國子生。舉順天鄉試。登己丑進士。授行人。嘗使代過渾源城。會虜犯雲中。而遣別騎圍渾源。方糧竭甚。恐先生時在圍。與其守護。曰。渾源雲中犄角。而虜雖強不能久。今能盡發帑羨。誠得十日糧。因雲中爲形援。足持虜矣。已而圍遂解。當是時。虜急。人無完心。其計畫所以全者。先生力居多。先生由渾源趨雲中。抵代。與虜騎間前後見者。驚囁指代。藩以其馳不測。致命重之。厚與金帛。一切謝不受。爲行人秩滿。當詣部選。諸赴選者前拜冢宰。更伏謁乃退。獨先生拱不伏謁。冢宰方切詆論學者。眾謹諱之。獨先生就試輒論學。遂擯不與選。然部皆目曰。是不肯伏謁。而好論學不諱者也。再選。因得刑科給事中。嘗條上四事。其一言內閣輔弼臣宜首選道德。其二言明徵士吳與弼。檢討陳憲章。尙書王守

仁皆卓然爲世儒宗。功振絕學。宜下禮官議。謚配祀。以風厲學者。其三言諸巡按御史及諸督學憲臣。所以總率綱紀。化道所先。宜博求其人。庶于治理有所幾助。其四言今賦益繁。吏緣爲奸。以罔愚民之不逮。甚非所以壹法守而示久遠也。宜令有司均賦。定式以明。畫一以制。疏入。人稱其知大體。而均賦事自先生發之。江南諸部縣多施行。稱便焉。星殞應變。極陳修省威格之道。言甚切直。劾罷自宮男子二千餘人。諸前後章五六上。往往見采納。會吏部舉外考察。而冢宰阿權輔意。專以睚眦中人。鑿平生所不快者。無故罷者甚多。而僉事章先生商臣等四人。賢行其最著者也。在罷中。故事。考察畢。給事御史得論其當黜而遺者。謂之拾遺。即不當黜而罷者。不得復論。而先生與給事中戚先生賢等。先是上言考察當世大典。宜最慎重。其當黜不當黜。請令臣等得以俱論。會四人報罷。乃奏以此四臣者。治能卓絕。徒以剛忤權貴。而部挾報復。亂白黑至此。宜亟還以正國是。事下部議。以諸給事變例違令。坐以重比。人咸危之。而上知其忠直。且業以預請。無以罪也。遂得釋。而四臣者卒不留。初。先生舍與冢宰鄰。不往候冢宰。冢宰固已銜之。及是又無所發怒。而先生已轉右給事矣。乃出之。爲山東僉事。眾益藉藉持不平。遂交論冢宰。一日至十餘上。上以其言訐。杖之。冢宰亦竟罷。而諸言者或黜或



死、先生用感然、日夜謀解印綬、會母疾、乃乞終養、先脫身馳、月餘得報許、始先生聞母疾、馳也甚憂、忽假寐、似聞蓬間語曰、無恙、無恙、歸果愈、人以爲孝感云、然母終患未疾、先生家居侍者且十年、先生初侍母疾、父東園翁方康、乃治具、日召故人所善賓客與父爲樂、怡如也、及母喪闋、先生爲父在、益謀所以樂之者、如侍母時、而東園翁責曰、爾本請侍母、且母有疾宜爾、今父無疾而欲以我爲辭耶、因數以君臣義趣去、而東園翁故嚴、每斷斷不可、先生不可逆旨、乃去、改授江西屯田僉事、轄池郡屯政廢、而池民連他諸郡豪占屯者不下累萬、積三十四年不輸軍暴骸償、有司莫能問、先生廉得其弊、建白移有司躬勘還之官、而貸其故逋、貰其罪、民既情見幸免逋與罪、益願還田、歲餘、侵田還者數千、嘗攝虔剿兵備、大庾酋李文彪賊其母兄質官以叛、郡縣皆震、或言宜急剿、先生曰、是烏合、寬之則黨散、急之則勢聚、因其瑕釁、可以立散而成擒也、乃赦其黨而計誅文彪、兵不勞而寇息、南安諸屬邑各額機兵數千、歲班赴賴、操、正德中割上猶增設崇義縣、而上猶兵不減、民苦之、先生乃議裁上猶額三之一、歸崇義、而崇義守城免賴、操、兩縣稱平焉、尋攝九江兵備、河南賊驛騷、自商成立、舒南走英山掠、將迫九江、先生躬以上旬校舟兵、以下旬校步騎兵、務水陸得其便、以制賊、賊卒不敢犯境、初、

東園翁聞其子所至功業有迹、歎曰、甚善、是如何日在我側乎、我所以教督趣之者、有以也、喜甚、然先生竟以在九江時暑淫、閱兵得之勞而強事、疾發遂篤、會上績抵家、與東園翁見、閱月而卒、卒之前二日、報轉參議云、先生少有志慨然、慕陽明先生之學、讀傳習錄曰、得吾心矣、乃欲渡江從之游、會陽明往征思田、弗果、及爲國子生、始獲見甘泉先生及陽明高弟中離薛先生者、益發其精義、其學日進、及宦游、益與四方之賢士大大切磋講明、遂以學自任、方陽明蒙謗奪爵、眾懼且有奇禍、莫敢復爲言者、獨先生抗言、請表章謚祀、在前四事中、事雖未行、竟不罪、人乃知上本無意深過之、時禁稍解、居山東建書院二于青萊間、江西修書院五于虔、而虔故有陽明祠、多圯、益行縣具飭凡十餘所、而先生所居舍傍亦有祠祀、皆所以尊陽明、進師儒諸生弟子、歌誦修習其間、務有所興起、士彬彬嚮風焉、蓋先生不及見陽明、見甘泉、中離而晚與一菴唐先生、緒山錢先生、龍溪王先生游益親、其得于三先生者尤深且久、自是篤信陽明尤益甚、先生其解悟融會浹洽、吾不知其與三先生上下也、及其沈毅深湛之思、各有獨至焉、遂遂唯謹、擇而蹈畫、尺寸不失、雖廣所建置、延進同學、然好推讓、行之本于至誠、不峻門戶、故人多喜議諸公論學者、長短、獨無以訾先生云、居官勤切、常程日簿、吏按事傳

爰書互讖。數夜分不休。性敏。吏抱按具前。頃刻判數十。按無留事。至見人若無能者。斷獄善中情隱。造訊立辯。然不喜鉤鉞。取辭具而已。嘗慮囚盡係刺當出者。俾贖。或代其贖而遣之。其仁如此。家故賤。食不重肉。衣不重彩。自米鹽出入皆有數。或言其纖細。先生曰。道無巨細。顧心之用何如耳。使密察于細而不累本體。此所以爲學也。且君子于財。與其取于人。孰若節于己乎。與其汰于家。孰若能施于人乎。故先生自奉薄。一介不受。而待以舉火若千家。然其所施有制。人請寄不遂者。稍望之。先生不加益。亦不絕也。以是其交皆可久。蓋先生信心而不移于外多此類。故人之知不知者。其稱先生皆曰。雅醇篤厚。君子云。先生病。人爲禱壇。宇者所在常數十百人。多至遮道。其死。弔者哭皆悲焉。先生諱謚。字靜夫。別號石山。又號石雲。父東園翁。以先生貴。封徵仕郎。刑科給事中。母賀氏。封孺人。配盛氏。封孺人。繼配盛氏。封孺人。子男二。啟原。繼孺人出。鄉進士。娶禮部員外郎錢君萱女。啟文。側室潘氏出。娶鄉進士王君愛女。女三。許嫁吳邦校。項國亨。盛朝綱。孫男一。先生生弘治辛酉五月十一日。卒嘉靖癸丑八月十八日。至是將葬。啟原以其友吏部進士余君狀。又述遺事。遣人走數千里來乞銘記。予始受經傳。得見先生荅書上。當是時。予方弱冠。而先生顯達也。一語意合。定交。既雅知先生有年。悲原

之意。而嘉余君狀足徵也。許之銘。葬以某月日。墓在里賢里。銘曰。公昔諫闕出驄。憲垣二十年而不調。何其進之難也。聞調二日而竟死。命何艱也。公既聞道。謂齊生死。進退淹速。又何語此。予則悲公未究厥志。俾其有待。何弗能致。乃勒此石。垂示後世。

黃份撰（董學士泌園集）卷三三

校記

①實：當作「寶」。

②用：當作「州」。

③部縣：疑當作「郡縣」。



儒藏

明儒碑傳集卷五十七

徐階

明特進光祿大夫柱國少師兼太子太師吏部尚書建極殿大學士贈太師諡文貞存齋徐公行

狀上

公姓徐氏諱階字子升淞江之華亭人也其先自河南徙為華亭風溼鄉人世世受耕不仕至高祖公德始成以仁厚喜施子聞里中呼之為佛子徐佛子徐有子公賢公賢子公禮皆不廢為長者而公禮尤斤斤守然諾急義敦讓公禮有四子其長曰思復公禮少子疏思復公以文無害縣吏部選人授宣平丞再補寧都丞所至著廉公惠慈之政其吏民謳思之滿九載課最當遷竟謝去弗顧疏亦舉鄉貢有聲公車間徐始大思復公娶於林繼娶錢皆天最後娶顧而舉公及贈太常典簿陳南京刑部右侍郎陟公賢之婦沈公禮之婦黃暨思復公顧夫人皆以公鼎貴推恩累贈三公皆為特進光祿

大夫柱國少師兼太子太師吏部尚書建極殿大學士婦皆為一品夫人天子所以褒揚隱德政術備至而宣平寧都二邑至為祠以祀思復公華亭亦祀之於鄉賢如召信臣故事時人榮之公之舉也寔於思復公宣平官舍甫一歲而女奴抱公窺簪井墮焉小吏之婦號而出之則絕矣居三日忽蘇五歲思復公以宣平績還道括蒼顧公復自輿而墮其下沈深峭石戟拒無全理顧夫人慟哭而已既而衣絰於樹從容下卒不死思復公又嘗置公於古剎讀書剎故多魑僧苦之公宿而魑不出思復公始心異公俾就外傳受小學以至四子甫閱歲悉成誦思復公補寧都挾公以從嘗歸自他邑公出迎思復公戲謂公父遠迴子遠迎父子之恩天性也公應聲曰君居上臣居下君臣之義人倫哉思復公益大異公教之屬文即工屬文十五而補博士弟子又二載以優等試應天不利歸亡何而大司馬聶貞襄公豹來為令試公而奇之曰是子國器也因進公以聖賢之學



而公亦慨然自奮。以一第不足名。公年二十而督學蕭君鳴鳳負人倫鑒。試公第一。食於庠。再試應天。學士董公玘得公文於黜而異之。取以冠諸試者。會有所齟齬。不果。然猶為第七人。梓其文。會試復在高等。既廷對。大司寇林貞肅公俊得公所射策。謂當第一。以屬內閣。時少師楊文忠公廷和居首揆。用子嫌不預讀卷。諸閣臣持故事。謂林公所取。抑居第三人。賜進士及第。當入謁。楊公獨目屬之曰。此少年名位不在我輩下。已而顧少保費文憲公宏。公奈何不以衣鉢屬此少年。費公蓋第一人也。其後公官與二公埒。又與楊公俱宣力鼎革間。而名壽終始則過之。尋授翰林院編脩。予告歸娶沈夫人。明年八月北上。當是時。言事者以不當上尊親意。逮訊成謫累累。公行而遇故諫官安磐。翰林楊慎。王元凱。皆狼籍血肉中。公出素裝遺之。或謂有尾舟而詞者。公行意自若。顧獨以時事稍異。有二親在。身未敢許。忽忽不樂。至清源。夜忽夢思復公。帕首而名呼公者再。輒心

動。返棹還抵彭城。而訃至矣。公號哭馳歸。毀瘠營葬。明年大慶。覃恩得贈思復公如公官。顧夫人為太孺人。服除。次且久之。乃入都復故官。尋奉命授中貴人書。故授書者要入早出。一切以苟簡文具而已。公曰。毋易此曹。此曹能償天下事。於是寅而入。申而出。課業必謹。約禮詳說。毋不欣欣傾聽。時上厭亡所假貸。中人為流言。以不如正德時饒者。公謂正德時何可得。若曹晚不能悉舊事。今雖嚴寬於憲孝朝多矣。且正德以饒故貴人亡不用侈坐法。若曹不覩憲孝朝諸冢塋甲第相望耶。咸拱手曰。命之矣。尋充經筵展書官。俄復充廷試受卷官。預脩大明會典。再以選脩祀儀成典。蓋上所最屬意。以一代儀禮職編纂者不能數人。而公與焉。顧首揆永嘉公緣上意。請正孔廟祀。抑絀王號。下儒臣議。相傾憐。無敢異同者。公獨條具其三不必。五不可狀甚哲。疏上。永嘉公盛氣召公於朝房。面詰之。公徐理前說。至高皇帝盡革徽清號。獨不革孔子號。而語遜。乃曰。高帝少時

作耳。何可據也。公對曰：高帝定天下而後議禮，寧少耶。且聖人之文無老少，不爾。明公議四郊何以據高帝少作也。永嘉公頰盡赤，乃復謂曰：爾謂塑像古禮否。公對曰：塑像誠非古，然既肖而師事之久，何忍毀也。永嘉公曰：程子有云，一毫髮不似吾親，何以親名之。公曰：有一毫髮而似吾親，毀之可乎。且明公能必列聖之御容無毫髮不似乎哉，而何以處之。永嘉公語塞，則益怒曰：若叛我。公曰：叛者生於附者也。某故未嘗附明公，何以得言叛。他相桂文襄公，崔文懿公，咸為公股票，勸公謝公弗應，揖而出。於是上亦緣永嘉公意為說，以辨。公當具疏請罪，獨言不稱職當罷，不言議非是。有旨外補，而會他御史有繼之者，下都察院論罪。汪榮和公鉉館院章，復緣永嘉公意，謂此邪議，寔公倡之，致搖國是，宜正法以示天下。贖具而渴之。公時沈夫人病前歿，獨遺二歲孤，今太常卿璠，家人環泣，謂必死。公探囊中，裝得金二十投之，曰：以此為棺殮費。屬其孤於鄉人李刑部日章。

沈進士愷曰：卒歸我太夫人。已而曰：太夫人有陟在足養也。君父賜我死，即死耳。蓋怡然委順云。亡何而少司寇聞莊簡公淵，中丞唐文襄公龍力為解，乃隱公名而緩其辭。獄上，上亦弗問也。公得添注延平府推官。始公自弱冠取甲第，為侍從臣，出一語而天下聽傳之，履相踵於戶。公意不自憚，益從羣負衆公游，及同年歐陽文莊公德相與講求良知遺訓，及以天地萬物為一體，反之身心而後出之，不潤疎口語而已。至於國家典訓章程比詳，間闕大小利益靡不用以為學，而他縱羽績績，移商剽微以駭悅耳目者，舍不之取。一旦伉慨持論，從容於震霹之下，而弗為動。天下益信公之足以大受，而尚意其自禁，近出為小官，縱不鄙薄之，有故事可以優游養重。公獨不然，曰：官大小非王臣耶。且盤根錯節，所以增益我者不淺。乃馳歸，泣謝太夫人，弗獲朝夕罪，而單車馳之郡。至則速攝郡事，公晝夜拮据案牘，清宿弊者三百人，更輸銀法，毋得落猾胥手。毀淫祠，解社學，取



鄉所教授鄧柝書。播之而米宋大儒之格言諧之韻俾稍習誦俗翕然變。時大盜窟尤溪險而四出剽郡邑勢張甚分巡諸僉事偁欲以屬公捕而難發言公奮請身任之。乃設方畧懸賞格以授三老窮其窟旬日而得首首併餘黨百二十人人以為神。滿三載遷湖廣黃州府同知。當發其吏民以十家醢酒道傍泣稱觴公為人人酌。遂步至舟貽書謝父老。父老相率勒之石諸生追送至建寧乃別。抵嚴陵而提督浙江學校之命下其官僉事公歸拜太夫人已娶今張夫人僅八日而奉太夫人之浙既履任歲周行郡邑必徧大較以正文體端士習為先他務鉤棘悔僻以相高者雖名士弗錄。既唱諸生第人人為語所以甲乙故即見斥者得自名而後折之不得已而施橫楚示慘然色諸生人人退自快服也。御史禮公修浙通志垂成而有以勢強之伸屈者公毅然不可乃廢第業具車遂為後志張本。三載改提督江西學校其官副使所募畫一如視浙江時而加詳密公所

稱良知學本故王文成公守仁而文成於江西最顯著自公推行之且像文成而祀焉其地遂有生像公以祀者前後兩省試皆計士所登式半公造第一人而他亦無不優等其後服官政中外踐臺省以政術名者比比吏部初擬薦公尚賢卿國子司業太常少卿俱不果最後以皇太子出閣妙選官屬公為司經局洗馬兼翰林侍讀以四品服俸居職公之初至江西也時相夏文愍公言羣從子姓有欲倖進者公面撻之曰迺公居座主而以曹屬我誨不而以曹屬我進也夏公聞之不悅故於初宮案選不及公而言官有所指到奪而屬之吏部許文簡公讚采物情得公遂以公應公去國十年矣而賜環益猶未強仕屬承華政稍簡得以其暇與故鄉文莊公守益羅文恭公洪先鄭端簡公曉趙中丞時春唐中丞順之輩相琢磨為聖學益切俄而太夫人捐館公哀毀骨立悉屏謝時俗尚以古禮行之三載不御內是時太夫人得請賜祭官為塋矣甫服除進國子祭酒未

上上再問公何以遲遲意蓋有屬也。公之為祭酒下令諸生滿而歷事他曹者必以久次毋得用貴人居間置籍以稽膳銀之數。謂典籍曰吾代汝弭謗也。復為籍籍諸生之淑慝使月朔廷誦之以告服受淑籍素服受惠籍曰忝在師長毋所逃若惠也。諸生人人相戒勉二籍笑久之。擢禮部右侍郎遂遷吏部。乃榜於壁曰咄汝階二十一而及第四十三而佐天官國恩厚矣何以稱塞所不竭忠殫勞而或植黨以擯賢或徇賄而鬻法或背公以行媚或持祿以自營神之殛之及於子孫吁可畏哉。故事吏部大僚騎車門所接見庶官不能得數語以示嚴冷。公曰若爾何以能盡人才也。乃痛折節修辭色而下之見必深坐。盡蹙詰訪吏治民瘼遐陬幽鄙因以窺見其人。顧見者亦自喜得少宰心願為之用。公益有搢紳間聲以為恒。太宰熊恭肅公決雅重公自以得共事晚公亦不復守循黜轍相與勵廉節獎恬退振淹滯抑奔競一時翕然歸稱於熊公。而會熊公以直諫忤旨

去。唐文襄及吾郡周恭肅公用相繼之。二公重公不異熊公而又老多病公數奉旨署部事。當是時有行重寶賄方士求大司馬者取上指脅公至再皆弗應。後其人為大帥竟坐敗績抵罪而公所推轂宋莊靖公景張襄惠公岳王文定公道歐陽文莊公及范大司馬總皆天下所共信以為長者。大計吏公復代周公司之尤能於毀譽外定去留。亡論留者即去者亦心服亡敢望。周公卒公推聞莊簡公淵聞公者老人以為非上所急公弗顧也。聞公入未幾公改兼翰林院學士誨庶吉士公雖名不廢課習而脫去所謂駢儷帖括之舊推所真得於身心者皆娓娓說之又間最以國典民事其後多卓然及公世而稱名臣咸歸公善誘功公滿三品考錄璫入太學踰年掌翰林院事復充會典副總裁會典雖再更定而事由諸曹草創往往相矛盾上即位後數與革大禮禮官不勝綿葛公始為創義例挈綱領井然一代程書久之廷推公入內閣不果尋擢禮部尚書學士如故疏



辭溫旨不允。禮部之為政者久，好以寬大養獎。至公而肅然更始。凡王國爵封秩謚，併文武大臣陳乞祭葬，公皆秉之以請，報可，定為絮令。其考諸舊通事、太醫諸生，皆為裁畫一，即猾吏有拱手受而已。時莊敬皇太子冠，公受命贊冠。甫成禮而暴疾薨，公當議喪禮。以上及百官皆為暮之服，百官仍詣門哭。上不懌，謂天子絕暮不制服。其百官服可無詣門哭臨禮，著詣停柩所。輔臣請至服可無而句之，曰：「以青衣角帶往可也。」公曰：「不然。絕暮者，天子也，非百官也。」曰：「可無詣門而已，非可無服也。」且未有哭臨而不衰服者。定議以齊衰服臨。上使中涓詢而是之。令宮中仍皆服衰。公遂為莊敬冊謚副使，已命題主。上察公慎勤，又有所應制文字，獨多稱旨，召入直無逸殿廬，給供饌如例。尋賜飛魚服。公遂請立皇太子，不報。自是連上疏請之，又與同直四臣請之，皆不報。蓋次當繼莊敬而立者裕王，是為穆宗，而景王與同歲差少，中外未測上指所嚮。公恐有釣奇者，故請之亟。最

後當冠，因而及婚禮。若開講，公復請以齒叙。先裕而後景，復不允。既冠，公贊景王冠，偕諸大臣謁於臨保室。上使中涓問二王行坐何若。公曰：「有上黼座在，坐則俱嚮西可也。行則遵倫序。且祖訓嚴，誰敢紊之？母何詔二王婚俱出就外邸？」公手疏言。臣過慮有二端。王邸隔僅一墻耳，名位既不別，而勢御均衆，能保無聞聲以上塵雅睦之聽。又往者九重之內，有慈慶有神寧，有鶴禁，而後人主之勢沈沈。今者僅二王耳，而悉就外邸，臣不能不為陛下寒心也。復留中。萬壽節推恩，加太子太保。北兵闖入塞，遂薄都城。時事出倉卒，中外洶洶。公念諸營皆子侯，無可將者，亟請赦諸邊將，在廷尉獄若戴綸、李珍輩，復其官，俾詣行營自効。報可。復手疏請上還大內，亟召羣臣面計兵事。上褒公忠愛而尚難還，內召羣臣。時內閣推公督視九門，公亦慷慨請行。上倚公左右自安，故特用其副王少宰邦瑞，而諭公意焉。會有中涓陷敵歸者，以敵求貢書聞，云：「不許我則進兵。」上以示公及輔

臣分宜公高等、且召對便殿。上顧謂當何處、分宜對曰、敵饑困、不足患。公曰、敵萬衆薄城、則殺人若刈、管尚何論饑、急謀所以禦之耳。上顧曰、善。復問敵求貢書、安在、分宜出諸囊中曰、禮部事也。上復顧公、公曰、敵重且深、笑、不許、怒激之、怒許、則彼逞而厚要我。上曰、苟利社稷、珠玉皮幣何愛焉。公曰、事有甚於珠玉皮幣者、陛下所不能受、則奈何。上悚然曰、卿慮之遠。雖然、當何處。公曰、請計緩之。上曰、何謂緩。公曰、遣譯者至、營而詰之以無番文、故且徵其情實、實則令暫出邊、用前歲成例貢馬、行賞、互市往返。少日、我城中之備完、而援兵日益集、敵且退、不退、我從而拒之、可十全。上稱善者再。分宜乃進曰、上幸出一視朝。上不答。公從傍史之上曰、可爾、得無遽耶。公曰、敵兵薄城下、人心惴惴、倚陛下而重、得一蹕聲、若亢旱之得雷霆、寧驟也。上始首肯。公出而會廷臣、議皆言求貢非本情、不可許。公因兼酌、所以面請者、疏聞而上果視朝、申飭中外甚厲。會勤王兵四集、敵亦飽

且去、乃下公疏、不許貢。時再貢、襄公以副使爲民、都御史何公棟久廢、公疏薦其才、即用之。上又密詰公善後策、公言營兵久廢、而得弱、今欲轉之強、宜責新帥、營京城樓櫓廢、守兵懈、衛者倖敵自退耳、宜責督臣、邦瑞及定西侯傅、前敵以邊備弛、得闖入、宜以嚴候火、治亭障、責新撫鎮、勤王兵、獨延綏卒可留、今疲矣、宜卹。諸道募兵者皆文臣、預選而不預戰、宜恭之一二廉將、得敵情毋如用謀、用謀毋如大同、宜增選。上皆虛已聽焉。時以諸廷三衛我外藩、而導敵入境、集貢使顧責之。公謂事虛實未可知、顧責之虛、則彼憤而自疑、實則彼罪不赦、將顯叛我、而我不能討、是驅使就敵也。不若責之以扞圍不虞、使彼易受而後撫之。衆咸服。公念敵外証、綱紀內潰、天下事且不支、而上待我厚、不忍負之。既以召見、柱分宜公口、至是益發舒、亡所顧。公之用雅、非分宜意、而前是太宰缺、廷推公當補、上猶怒之、謂方侍朕左右、何輒擬外遷。見以爲旦夕且大拜、南牀緣分宜指、飾他



事有所苛過上不聽益厚公分宜策亡以間之且愧懼而孝烈祔太廟之議起初孝烈皇后崩上欲祔之廟而念歷於先孝潔皇后又審考入太廟非中外公論恐千秋萬歲後所祔主或非仁宗而審考遂下公定議欲以孝烈先祔公合諸大臣議朝房大約以女后無先入廟者請祀之奉先殿時諸公相顧莫敢應獨禮科都給事中楊思忠以為然疏上上大怒謂公與思忠專之足矣何諸臣為令再議公不獲已乃小婉其辭以為太廟九室皆滿若以今上諭仁宗固在所當祔第此乃他日聖子神孫之事而仰煩皇上身自議之臣等愈有不安於心者夫夏廟五商廟七周廟九今更遞益之於太廟奉先殿各增二室而升祔孝烈皇后則仁宗不必祔而孝烈可速祔上難於增二廟謂公故設難以阻之愈怒促更議祔仁宗祔孝烈所以督責公甚峻公雖不獲終守前說然天下信其為正上後於元旦摘楊君表誤杖之百而氓之冀以警公分宜因遂謂公可據鋒距百出公

坦然而已時大帥鸞驛有寵利諸廷之弱欲掩之以為功謂其實導敵請發兵征之下公與兵部議公曰征之易耳一征而永撤我百八十年之藩籬且侯鸞所謂導諸達者即得之諸達所失安知諸達之不利其土沃而假手我也我得其地不能戍將母為敵外圍何乃弗果征食事趙時春以山東募卒入衛頗精侯鸞惡而欲併之謂趙君暴且貳流言漸狎聞公挾綏帥炳出犒所以慰諭有加歸語中貴人福俾婉曲白之上乃又弗果併侯鸞雖內銜公第時方與分宜爭權相構不暇也而會偕薊帥有獲間功上復下公及兵部議侯鸞分宜輩俱獲上賞乃僅錄公一子入胄監而上特手注加公少保分宜為忤然自失久之尋兼東閣大學士恭預機務仍掌禮部事侯代者服除而後解公上疏辭溫旨不允始侯鸞自詭以必大破敵得上要契眷寵無兩而其後言益不讐顧益縱肆邀請無已上已心厭之然中外猶畏其禍亡救及者會鸞疽發背不能將邊警者至尚嗾暗

不肯吐大將軍印。公密言其不可恃，乞蚤更置將。上數曰：「吾非不知之，欲甚其所為耳。」迺因兵部疏，馳使奪其印。驚一夕自恨死。時家卒五百人多降卒，亡所屬。公謀於提帥炳，俾厚撫之，尋令就外新帥時陳。其後驚事發，妻子徙東市。家見籍而麾下亡一譚者。公又言入衛兵超數千里，棄家室，委頓途道，而提督檄不能撫，戶部復從而削其餉，不能亡怨嗟。又兵部所議明歲入衛兵僅四分之一，夫懲侯驚之噓而遂廢食，非計也。乞罷檄，復故餉，益入衛兵。上以問分宜，有所異同，遂寢。久之，上報公檄已罷矣。卒已餉矣，獨入衛非例。夫門庭固而堂自安，何京師之虞焉。公對所謂門庭者，大同薊鎮耳。今天同殘而薊鎮弱，何以言固。幸添調西卒以付外帥陳，使有警而後入，其於堂戶相臂使亡害。公因頗及京營積弱狀，上乃嘉公忠懷，而詢京營之所以弱，今振之何繇。公謂營兵皆市人子，食不給，仍匿跡為與僮，以其羨共妻孥。日練之則勞而生計薄，勞則苦，薄則怨，怨且苦，則

生譴詆。故其帥務為姑息，以相保食寢而已。今欲大振之，必明賞罰。欲明罰必先賞，賞則財告匱矣。臣以為宜汰去老弱者萬人，或數千人，仍覈其虛冒，而取其餉以充賞費，然後罰可行，兵可漸振也。上嘉納之。自是春公日益重。一品滿三載，進階光祿大夫柱國，再進兼太子太傅、武英殿大學士。六載，兼支大學士俸，錄一子中書舍人，兩子誥命。再以築外城功，錄一子中書舍人，加少傅。滿九載，賜兼金文幣、新鈔、肥紵，上尊，改吏部尚書，宴禮部百僚陪列，視禮如元輔焉。賜勅諭，謂公通明濟世，端潔範俗，因事納忠，識微發達，蓄久積厚，施之不窮，計熟慮深，謀無不獲。蓋公自入直，即聽於西內乘馬，所賜有麒麟服，有繡蟒服，他金帛不可訾數。會兵部員外郎楊忠愍公繼盛論分宜公罪狀，而中有二王皆知其奸，語上怒，下忠愍錦衣獄。分宜謂二王深宮，何所知我奸，楊庶僚何繇知二王之知我奸，必有交關其間者。屬錦衣帥炳加根究。公戒炳，即不慎一及皇子，如宗社何。又



為危語動分宜曰、上僅二子、萬一根究得之、必不忍以二子謝公、所罪左右耳、公獨奈何、顯結宮邸怨也、分宜憮然懼、乃寢、然以公嘗議、簿御史錦宗茂罰、益疑公矣、錦宗茂故論分宜者也、公之主癸丑會試、得進士四百人、其後亦多名臣、而所錄文簡切溫厚、為後先冠、是時倭事起、上以所蹂躪多公鄉、而公又曉暢軍事、以故數屢詢問、時撫按亟告急、請兵、而職方郎謂兵發則倭已去、誰任其費、大司馬惑之、公持不可、乃以贏卒三千人往、公上疏爭之曰、江南腹心地也、捐以共賊久矣、今據撫按奉報、或云來者未已、或云意不在搶而在擾、勢不欲去而欲留、彼皆真有以驗之、而部臣於千里外、乃能喻度賊之已去、又喻度其去而不來、而阻援兵不發、置此腹心地於度外、臣所不能解也、夫用兵之道、當計發與不當發耳、不當發則毋論精弱皆不發、以省費、當發則必發精者以取勝、而奈何用虛文塗耳目、置此三千贏卒與數萬金之費而饒賊、臣又所不能解也、大司馬

乃懼、請發精卒六千人、俾偏將軍許國、李逢時將焉、國已老、逢時敢深入而蹂躪、驟擊倭勝之、前遇伏潰、當事者方以發兵為公咎、冀因而摧公、而公所請入衛西卒、其帥陳鳳力戰卻敵、敵遁、巡不能入、乃悟曰、公所請發兵留兵、策無異也、將自有堪否、公復上疏、謂法當責將校戰而亡、守令者將校一不利、輒坐死、而守令偃然自如、及城潰矣、將校復坐死、而守令復僅左降、此何以勸懲也、夫能使民者守令也、今為兵者一而民者百、奈何以戰守併責將校也、夫守令勤則糧餉必不乏、守令果則哨探必不誤、守令警則姦細必不容、守令仁則鄉兵必為用、臣以為重責守令可也、公又請罷浙江撫臣與史江南督臣、皆報許、時江南無見兵、所調兵獨永保二土帥強新有王江涇捷、其奏事郎校來謁、公以酒食慰勞之、且貽之文綺、俾各選精兵萬人待調、二土帥感激、行千金以謝、公不受、所以慰勞之有加、故一承檄而萬人立至、遂大破倭、盡捷、聞、公預賜金幣優渥、蓋上知

公之於筭倭事尤中策也。公念敵移庭牧宣大，與我雜居，士卒不得耕種，米麥每石直至中金三兩，而所給月糧僅七銀，半菽且不繼。時畿甸二麥熟，石止直四銀，可及時收買數十萬石，石費五銀，可出居庸抵宣府，費八銀，可出紫荆抵大同。大約合計之，費中金一兩，而士卒可飽一月食，其地米麥價當亦漸平。具疏上，上大悅，令密撰諭行之。尋錄遼功，推一子中書舍人，以予仲琨。敵既輕我，而牧宣大者久不肯出塞，大同右衛益困，然揀俱絕，城旦夕且下。而督臣順與御史楷比，而內賄求速還以避之。大司馬計以無所出，於是吳給事時來劾大司馬罷之，而逮楷順。上赫然起，故大司馬楊襄毅公博於部，而命別推督臣代順，又已命右侍郎江襄敏公東督行順事，而復有言江公不任者，公謂東以暫行而又疑之，恐無固志。上即命楊公出為督，而諭江公不得推阻，仍詔提帥炳推二校參軍事。公召炳授之方畧，俾授二校以佐江公，卒解右衛圍。順楷者，故皆分宜客也。吳

君素已勝，即上疏極論分宜公，而刑部主事董君傳策、張君珊繼論如吳君。分宜念公於吳君，張君俱座主，而又董君鄉人，具其故白上。若公嘆之者，即上不盡信，亦可用以自解。而上果為動，下三君獄，命提帥炳考察，必求其主名。三君瀕死，者數四，卒以正對，得遠戍乃解。而分宜猶謂人事宜必由彼，但彼好為憂時憤俗語，語盡而繼以泣，少年好名者日費焉，非以事使之，以意使之也。公亦不為辨，唯自直出，多稱病謝客，而益恭謹於應制筆札。

王世貞撰《弇州續稿》卷一三六

明儒碑傳集卷五十八

徐階二

徐文貞公行狀中

上久而察知公忠廉有所詰問。故密以示分宜公者。皆舍而之公。尋加太子太師。念公久官。令尚寶丞璫代歸祭掃。仍給驛。會上所居永壽宮災。徙居玉熙殿。阻甚。分宜念故宮工鉅不易復。欲請上遷大內。則不敢。乃請徙南城。上以南城故英皇嘗御地。不憚。乃以永壽工屬公。公計之。楚蜀南扇患。不可復屬之伐材。即伐材亦不可以歲月計。而時方營三殿。有餘材。其小而不中程者。以當水壽。則尚鉅。請以資司空雷禮。可計月而就。詔如公議。仍命公之子尚寶丞璫兼工部主事。同閱視。公乃率雷公與大司馬楊公等之工所。計度土石。程工力。搜伏緹社。侵冒僅百日而工就。不復增夫下賦。時上復自玉熙徙居主都殿。聞京師內外多盜。意恐恐。欲以大營兵入衛。公謂外兵衛官禁非便。請以錦衣緹卒衛主都。而

營兵列宮城外為儲胥。以相屏蔽。報可。上尋自主都徙新宮。更名曰萬壽宮。嘉公忠謀。進少師。兼吏尚書。錄一子中書舍人。而璫亦超拜太常少卿。時公言違事。則薦故違帥楊照與偏將馬芳。董一奎之材勇。上即為擢用。諭有司失職。則言吏部不當徇賄。上即為罷歐陽太宰。而按今少傅安陽郭公代之。論選庶吉士。請賜御題。以防泄繁。嚴詞察以防挾遞。上即為罷選。於是中外喁喁。覩聖意所右左。謂治有機矣。會公滿十二年考。奏金綺鈔緡羊酒如九載。予誥命。賜宴禮部。公固辭。乃以白金四十兩。綵幣四表。東充馬。勅諭褒公行醇而學遠。識朗而器宏。雅度虛襟。得大臣之體。竭忠謀國。無私便之圖。獎廉懲墨。而官箴用植。崇儉戒奢。而士習漸移。選將練兵。而邊防克振。緩征寬賦。而民困稍紓。蓋實錄也。古何而御史應龍論分宜公父子。上勒分宜致仕。下其子世蕃獄。戕之。命吏部擢御史五品京職。上雖以御史言去分宜。然念其供奉久。憐之。而左右入其間者。從



儒藏

容言非嚴某誰為上奉主。上忽忽不樂，手諭公及次輔袁文榮公緯，欲遷奉事主，如法侍嗣，治安天下，令擬詔行。公等謝不敢，而吏禮二部奏遷郭君通政參議，得旨矣。忽復奉諭，責公等不擬詔，而謂二部臣皆奉贊者，何一旦官此邪物。公復言：「遷而侍嗣，非獨臣等不敢聞命，天下皆不敢以為然。邪物之轉，二部奉旨而後行之，臣不敢傳，亦不敢泄，不報。」時郭君內危甚，謀於公。公曰：「弟之任，有某在，毋慮也。」已而上不欲公久直，曰：「久直無以杜兒輩奸。」公謂陸博走馬使酒，挾邪為姦，長安中者，不在外弗杜也。甘言比周，相合而為姦於朝堂，則在內猶在外也。上悟，輒分宜直廬以賜公，中外人情大安。於是公始為政，書三語懸之直廬，朝房壁曰：「以威福還主上，以政務還諸司，以用舍刑賞還公論。」於是公卿大夫咸侃侃冀行意矣。會袁公數出直，公請以時遷至直所，同擬旨，上不可。公謂事同眾則公，公則百美基，專已則私，私則百弊生。乃從之。時給事御史以抨擊鈎黨貴臣過

當，上覺而惡之，再下公欲有所行違。公委曲調劑，得輕論。會問公知人之難，公對曰：「大姦似忠，大詐似信，自古記之。知人則哲，唯帝其難。念欲有以易其難者，惟廣聽納而已。廣聽納則窮兇極惡人為我擧之，深情隱惡人為我發之，未用者不濫進矣，已用者不濫留矣。故聖帝明王有言必察，事大而言實者行之，其不實者小則置之，大則薄責而容之，以鼓來者。上稱善良久，自是於白簡所封進，即小忤弗深治，而言路恃公彊益發舒矣。公第陟既以九列久次當遷，公令勿遽北，故其為廷尉，為少司空，司寇皆在南，而太常君再請急還里休沐，以示自遠。公約勅子弟居鄉者，毋得干有司政，其諭有司亦如之。時戶部歲請御史糴粟宣大，公謂巡按權重於糴粟御史，而熟宣大事，且可以時低昂其直，遂歸之巡按。工部請開例而議及贓罰，公謂贓罰例以濟邊市穀者，今一切充筐篚，宜嚴禁。兵興餉日益增，民益困，今敵稍輕矣，宜裁省。道額不分年而徵，民何所措手，宜以緩急



微旨取詔旨行之。吏民大悅。伊王坐法。錮皇祖陵。嘗當籍故事。籍嘗者悉入內帑。公示意撫按。俾部禁物應格。而餘金錢二以充違用。一以補宗藩之祿。不給者。中涓爭欲蠲襲之。弗得也。先是。廣大盜張璉猖獗。公薦張中丞梟授之。英平之。梟病歸。倭復犯廣。公薦吳少司馬桂芳為文帥。出裨將湯克寬於獄。授之。英敗之。倭復大犯。閩公薦譚中丞綸為文帥。以戚將軍繼光為副。授之。英大敗之。上以張璉功歸公。公力辭弗就。僅拜下賞。公念以曩者自信州執政。內閣臣始預違功賞。以至分宜。重則加孤卿。錄蔭。輕亦兼金重幣。敗而不與其罰。欲自解。則先附玄威。以中上意。而將士効百死取功名於鋒鏑者。肆為稽故以要之。故於奏功。既擬旨云。軍功論賞。非實在信地戰守者不得與。其將士功次立限速勘。以聞。內閣臣自是不復預違功賞矣。乃至大朝工完。公自擬僅從賞金一錠二幣。上手筆加半。當是時。將作大匠徐果有珠寵。既已久。絳尚書銜。欲索以太子太保。公力諍

而止。人謂公苟一染指焉。能為果諍也。然上神聖。益察知公賢。久而益置肺腑。以萬壽節。進公兼建極殿大學士。俾中書舍人現為高寶少卿。久之。尋復以第三子璵為中書舍人。公當考十五年滿。逡巡未敢請。上知之。賜金幣羊鈔珠饌法酒如前。而勅吏禮二部具公政績以聞。請加公特進。錄一子尚寶司丞。賜勅褒諭。宴禮部。給三代誥命。上報曰。卿等所議。恩加都可。仍加上柱國。以示特眷。公力辭。上手批曰。卿忠誠公正。念切邦民。輔政多年。勲猷茂著。奏請加恩。典不逾。覽奏。情詞懇切。上柱國及部宴允辭。其餘宜悉承恩命。以副朕眷答忠勞至意。仍以金帛為宴資如前。前是公嘗以例乞骸。上欲公自擬留旨。不可。則謂何不令煒代我言。公謂煒之擬留。使臣知而後聞。即臣擬也。上乃批荅。卿念在邦民。誠圖寧國。輔首居正。宜贊朕不及。圖素是恩。措紳戚鼓舞。加額。以上之知。公適於公自知也。上嘗賜公玉帶。仍倩以白金一錠。曰。為帶資。又擇蟒衣賜公。手授所謂教子

升天者。令衣以入。公病痰嗽。遣御醫徐偉視疾。中涓賜猪羊甜醬瓜茄酒米如例。已復出。尚方珎劑二甌。命司禮貴臣木齋手札喻公。虛火一疾。惟須自慎。既不可用寒劑。又不宜名降火。又有謂痰隨氣降。此非治法也。但仍以涼平性品用之。便消順耳。又青州白丸子。真者亦效。非其本地合者無益。至於牽扯背肩痛。當以祛風順氣之劑間服之。亦少資云。前是上嘗為永嘉公調藥。溫喻籍甚一時。及公而二。乃所喻公尤諄切。若家人父子。公感泣。不敢言歸。上時慕玄素術。多所服餌。公往往持之。而方士熊顯與藍田王胡大順比而為妖。妄煉水銀。托乩語進曰。金書天章。是為先天水銀長生之藥。上以問公。公力言其不可輕餌。乃已。又以乩當請而不下。問公。公對謂紫姑附筆亦有之。第此曹非能究其術。大較與所遣使媾結得上旨。乃能答。今不得上旨。故不能答耳。且藍田王胡大順誘張惻喝。以挾取人貲。不可信。亡何。俱以妖露論死。北兵由墻子嶺關入。直趣通州。報至。

公立草勅。命大帥侯塞等為九營。營郭外。文武大臣英國公溶等巡視。分守九門。提帥朱希孝帥其腹心將校往來千板。以故敵雖外訐如庚戌。而京輦內整。亡敢為盜竊者。先是。上方有竹宮祠。釐楊襄毅公時守大司馬。得警急不敢奏而謀之公。以便宜檄宣府帥馬芳。宣大總帥江襄敏公各率兵入援。芳兵先至。公請於上。亟賞之。又請重江公權。俾諸道兵俱屬焉。敵阻白河水。從通遼掠香河。上令看詳楊公奏。公請亟先備順義。而以奇兵徼之於古北口。敵果起順義。不能入。乃走古北口。遇叅將郭琥伏而敗。死者以數百千計。頗得其所。國人為輜重。始上以楊公不蚤聞。急之甚。且叵測。公愈能為縣官任重。曉暢邊事者。毋如楊公。即一旦失之。緩急何倚。乃備言博雖以景命祠釐。禁不敢上疏。而二鎮兵皆其所素擬者。上意稍解。公自是為楊公畫策。往往先上所嚮事。必中便宜。乃從容為上言。亡論練事如博。即舍博。博能委心事。縣官如博者。上然之。自是注倚楊公。不復



替矣。公請收戰士骨瘞以大眾具十中牢為文祭之。九
邊卒咸加額頌天子恩德。明年敵復窺黃土嶺及一片
石上憂以問公。公謂有白文智在而胡鎮董一元兵相
肘腋三人者皆梟將亡慮也。亡何敵果為文智所拒却。
上悅超予二官。吏士人賚一金。時天下委輸皆在張家
灣敵垂涎久。公請城之。出光祿上供羨三萬金以往。城
成設裨將一。隸以通州衛兵五百人屹然重鎮矣。姦民
為白蓮教者匿燕中與惡少年趙李輩相結。卒一旦有
間探赤白丸而起。公刺得其狀屬大司馬捕誅之。三輔
齊魯汴晉間其魁株累見法餘黨無所容相率解散去。
公自表文榮公卒後獨當國意不自安數上疏請增置
輔臣而上數難之大意以公孤忠且才足專任公乃密
疏乞休謂曩時閣臣居首者以不時請骸骨人主欲留
則留之不欲留則不留故不得據此位為私物而恩威
常出於上此例也。上曰而亦徇例耶。夫而自為計美矣
非所以為君為國之義也。今惟有增置二員同汝輔政

足耳。公獨踣言臣雖庸寧不知天恩之與聖知若此而
忍負之。所以不欲久用首臣者竊為主權國政計俾恩
威常在上而紀綱法度不至為久而專者所攘耳。於是
公緣上旨復請益二輔而上復難之。令俟數月慎擇乃
可。公言臣不敢避難顧秉轉甚矣。內閣事體繁即開敏
者非假以歲月不易周悉。萬一旦夕之間溘先朝露即
有繼者何所取裁。夫人才須作養於一二十年之間而
取用於數十年之後。今以為可即可以為未可恐未可
以數月就也。上自是與公謀進太宰嚴公訥。大宗伯李
公春芳入輔而起太宰郭公於憂。扣滿代嚴公。郭公公
所薦也。蓋時有覲之者而公以其不滿朝望故詘焉。上
以少宰缺問公誰當補。公薦少司馬胡莊肅公松。少司
冠毛公愷。少宗伯高文端公儀。及新鄭公拱。上後次第
大用如公指。新鄭公之主乙丑會試也。上以進題字有
所觸不憚以問公。公為剖析本義乃解。蓋前是乙卯主
應天試者亦以文義有所觸賴公而解。人謂非公則逮

通如累歲故事矣。廷試當讀卷，公令諸受卷者參伍其數，而分授讀卷大臣，諸讀卷大臣銓其可讀者以授首。臣與衆共之，第其甲乙而進之上，宿弊盡革。尋奉命選庶吉士，公具如廷試。既開館，所頒條教至今以為式。始公之為大宗伯，以至首輔十五年，而請冊東宮，疏凡數上。上春秋高，意不欲言繼嗣事，輒報寢。朝野憂其端，以為且有所更樹，森人從而陰為竄矣。一旦詔景王之國，咸鼓舞稱慶。久之，上忽下諭公，謂郊廟弗躬，早朝久廢，如要我為不能矣。今疾病多，形體弱，目下便至卦盡之年，止宜卷身奉主，傳繼不可延者，且待人必無休矣。汝其加恩，或密同在直諸臣計，此為安美易為之事。不然，恐後艱醜耳。公惶恐對，大畧謂傳繼之事，臣不敢閉命。若同在直諸臣計之，恐不免漏泄，或生事端。自古艱醜之事，必有絕等亮惡之人及有大奸大逆在其左右，然後至今妄作。今皆無之，聖明勿過疑也。復奉諭，汝昨對何又傳退之云然，後弗美耳。昔有久等之怒，今時又非

昔日。公復言，昔日久等之怒，臣未能仰悉，是謂昔人曾有此怒，抑謂昔年曾有此怒也。若謂昔人則今賢孝非昔人比，謂昔年則恐乃是離間之語。聖明勿聽也。復奉諭，汝對不知指昔指今，夫昔成祖注意在孫，子弗之同，嗣位有說焉。百年五十矣，可不蚤思。賢孝難必，吾所言或不甚妄。公復對，昔成祖之在位久，仁宗之在位促，皆是天命。其繼承之間，史冊所載自明。上道德隆備，天命所歸，而今之賢孝又中外所共聞者，萬萬無可疑慮。公既已報而不得其自，月餘，景恭王上書，以上不豫，請躬詣玄嶽祈禱，以嘗上。詔下公所，公知為中涓泄之方，謀所以阻止者，而王亦病，復上書求醫。公請遣醫乘遽往治，而擬旨，王既有疾，宜自靜攝，玄嶽之醮，遣官代行可也。王謀乃寢。無何，王竟薨，長史以訃聞。故事，聞訃當王妃，不當長史。上問之公，公念楚中田土湖陂可數萬頃，俱為景所侵，租入而賦猶在民，即小緩諸藩有因而請佃者，急為上言，景府乏老成人，所以有此誤，恐誤復有



大者、宜遣一信臣往。公草勅、令其慎護王樞、祇奉靈筵、宮眷日用、必令給足、內外出入、必加謹嚴。庫藏存積之資、禁戢王人、毋容侵攘。田湖租賦之籍、悉歸所司、毋容欺隱。既成、而以指諭撫按、令奉詔行之。獲永為楚人業云。公之始三上疏、寢食盡廢、上意故稍稍釋、而左右遂有以為奇貨可市者。會恭王薨、乃止。公始復能寢食。然其事秘、公亦絕不以語人。而其後言官嗾嗾者、謂公不能蚤請建儲。公雖畧言之、亦不敢深辨。至公八十而輔臣白發之、人主為布之德音、所謂定國本於危疑、而公疏始稍出。天下曉然知公之有宗社功、非淺鮮也。公熟計國賦入不能衛其出事、以節儉為主。上緣祈雨故欲建雩壇、又欲更興都故宮殿、公以庫藏匱、鄭襄水力沮而止。尚衣監臣席寵奏補匠役千百人、公請減其半。若內官供應二監庫緣而請補、公直以詔旨裁之。內庫之司鑄者盜寶貨多懼露、故縱火、冀以解、公發其事抵罪。至徐沛大水、黃河溢、得大司空朱公衡治之、暨夏邠等

鎮新河百二十里、計工費以巨萬計。人或謂公不難責耶、公曰、國喉咽也、舍而不治、即歲歲計之、為巨萬者可指屈也。河工成、漕自是毋阻。天下盜額獨淮揚重、歲賦六十餘萬金、應上供司農為五十萬金、而前是分宜之客邸懋卿以都御史出經理、肆為姦盜、乃欲以利孔詭結上心、搜宿逋及積羨、得百萬金以聞、遂定為歲額、額輒不登而商漸困、至有雉經者、不則亦鳥獸匿。公熟知其弊、俾御史發之、擬旨仍舊額、額亦登、流徙悉復。公既以恭謹得上意、即貴重甚矣、而其為恭謹不衰。上或有所委使、通夕不敢假寐。應制之文、沓至促應、有諸少年所難者、未嘗踰頃刻期。人以謂公、歎曰、君天也、父也、吾敢違之。亡論信州倣而修、分宜慎而重。夫分宜者、特不善用重耳、寧可廢慎也。吾宜不知愧諸少年、計以得上意此耳。得上意而後可有為於天下。夫欲為一己名、不難、誰與上共天下者。上果日益愛公、又時時來外議、公以是益重所論建、裨益亡間。當公之前、天下無所不

中、兵水旱沴屬乘之、赤白之警歲不虛月。分閭以上、第無論貪債事、一語不上、指立就逮、緹騎操銀鎗旁干道路、大者誅夷、小者竄謫、而政地諸公復有竊上顏色為戚福者、數千里而外不能探所自、益惴惴不自保、計唯有徙索長安中論直市六尺軀而已。公既日以寬大廣上意、又不自崇高、竿尺往復、有吐必露、窮微遠戍、往往若身歷之、咸惴於不敢隱、而快於得自盡。故公在政地、大約緹騎逮省、減十九、廷尉若虛無所用深文、雖其究曲劑解之力多、亦以意發舒、少債事故也。公於他量情罪、多所縱舍、而獨取貪酷吏嚴、所坐獄必竟不少貸。其杜干請、絕苞苴、亡論公家車門、即長安公卿邸中俱肅然、亡敢以筐篚出入者。大計捧賀、察吏皆有餘貲歸、老吏白首相驚吃、以目創見無有。時海中丞瑞為戶部主事、上疏極言上過失、他所以諷譏公亦不少。上意甚遽、置詔獄、欲殺之、且諭公於南都理別殿、栖止以避瑞。公謂主聖則臣直、瑞固懇然、不過仰恃聖明在上、沽一直

諫名耳、殺之則成其名、容之則益見聖德之廣。上始抵公疏地、已徐取讀之、已又取海君疏讀之、得毋死。當是時、以海君能觸上、上能不殺海君為異、然亡能名公者。今具見世經堂集中。時上久疾、忽忽不愈、諭公欲幸與都公謂其辭緩、因據上體不耐輦路勞為對、而上意忽決、諸中消責人皆具帶幘鞬備之類、六軍且甲矣。以問公、公力上言、南幸事臣所以不敢從命者、一以為聖躬計、一以為國事計。往者興都之幸為已亥、距於今二十七年矣。皇上自度精力之壯健、孰與往時。計聖體遽豫、十有四月矣、毋論彼二十七年、即更度體氣之康豫、孰與此十四月前。夫輦行不及宮居之安、途次不及殿庭之適。計天祐聖躬、豈必遽行而後獲萬康之慶也。已亥之歲、敵警甚輕、彼時猶遣輔臣行邊、六卿出督、內而九門、外而三關、俱設大臣帥重兵以填之。今之邊境聲息、時間、內外官軍未甚整練、而六飛遽狩、都輦空虛、狡逆之謀、倘或竊發、聖駕在外、能不驚憂。抑不特此二事而



已至於有司科斂小民如聖慈所軫念。全楚兵荒頻仍如撫按所奏陳者。臣尚未之及也。上指奏內狡逆之徒。倘或竊發。獨乙之而報公曰。此八字不可作常視。其罷行。於是中外譁呼若再生。公之初屬草也。顧太卿筆而款。安危在此一紙耳。上必成行。吾請死之。久之。上病益甚。公問安。報以病狀甚苦。而戒公可少慮。輔理非輕者。當是時。閣臣併公為四人。而上有所顧問。獨公。他閣臣取充位而已。以是不能無後言。公弗復顧。時穆宗猶在裕邸。而有誤傳上晏駕者。承奉李芳得之。使使訪公。公驚詎曰。誰為若言。上故無恙。殿下分則臣也。親則子也。此宜吉事而可報者。為我謝李君。一輕動立取大法。且上累殿下。芳悟。乃杜門不納傳者。又二十餘日。而上大漸遂崩。當天漸時。公念上英斷類高帝。晚節獨齊。土木纖作不已。民力小困。而一時抗言廷諍得罪者。雖其志若已伸。而未牽復。欲自登極詔發之。不能無疑於改父。而於上克終之德未光。夜飲泣具遺詔草。恐泄之。不

敢以語同列。而至明日始奉諱。乃偕入直諸大臣詣裕邸。請入臨喪。儀出諸褒。王按而行之無害。遂具詔草上之。報可。詔下。朝野舉手相賀。至有喜極而慟者。時朝儀廢不講已二紀餘。而上享天下久。登極告山大典亡所考見。初元老臣僅公一人在。公動據章典。酌以物情。從容應之。自中條理。遠邁大服。公所上登極詔草。所以奉宣德意。敘獎補偏者。視遺詔尤詳。至天下以二詔擬嘉靖登極詔。為正始正終第一政。嘉靖登極詔。故相楊文忠公所草也。文忠蓋前言之。世以為知人。上大行皇帝諡議謚冊。是曰世宗肅皇帝。公所草也。尋以例乞休。奉旨。卿輔弼首臣。忠誠體國。勲庸茂著。中外具瞻。朕茲嗣位。眷倚方切。宜益竭謀猷。贊成化理。所辭不允。亡何而胡應嘉之事起。應嘉者。吏科都給事中也。故不悅於新鄭公。前是誤傳世宗晏駕。時諸入直者爭移其直廬。書籍器用以出。公獨不動。應嘉緣是而劾新鄭。謂其蓄二心。賴上病漬不問。新鄭以是恨應嘉刺骨。會吏部都察

院考察庶僚已得旨矣。應嘉乃復論救給事中鄭欽、御史胡維新。新鄭之鄉哀時在事，合而擬旨，謫應嘉為編氓。公惜應嘉罪不至編氓，而一時弗能救，諸給事御史合疏請留應嘉，而他給事遂有論糾新鄭者。公乃具疏謂論救考察非體，臣等所以擬斥應嘉。給事御史謂宜開言路，廣德意，所以請留應嘉。臣等欲守初說，則涉違眾而無以彰陛下恩，欲從所奏，則涉徇人而不能持陛下法。因兩擬旨以進，乃薄應嘉罪，改從外謫。當公上疏時，新鄭之鄉哀復與公力爭至失色，稍稍聞外言路之攻新鄭者，妻上，因相激為害。其傳公益堅，而移擊者亦遂顯矣。公嘗從容語新鄭人主之尊，能以謫斥威言者，不已而至杖，杖不已而至戍，且長繫，戍長繫不已而至慘，然竟不能杜其口。有如海君者出，吾曹人臣寧可以力勝。新鄭益不悅。公復引疾辭，奉旨卿輔弼元臣，德望隆重，朕方虛懷倚托，贊理化機，豈可以微疾引退。開經筵，公知經筵事。上孝潔肅皇后，孝烈皇后，謹議誡冊，亦

公草也。以登極恩，進中書舍人瑛尚寶少卿。重祿大典成，加支正一品俸。命題世宗神主，賜金幣。初議以三月發梓宮，而中貴人猶遲之，風欽天監前其期為二月。公謂去立堂日益遠，非便，且無故而促發，引之期，豈所以全聖孝也。執如初議。時上欲幸故邸，命擬旨行。公與同列上疏，謂祖宗時非郊祀幸學耕籍未有輟出者。今上即位無幾，於諸大典未一舉行，而先幸故邸，何以示天下後世。疏上，旨遂從中下。已而禮部及科道皆有疏，公復據以請止。凡三上，皆不報。然上竟以頃刻歸，不移日矣。亡何，御史齊康有所論列，上為遽謫康以慰留公。公引咎乞骸骨，凡四上，於是九卿大臣皆為公辨雪，且挽留，而齊康者，新鄭之門人也。都御史給事御史推其端，以為出新鄭，因劾康，併及新鄭，遂去國，而公始出視事。

王世貞撰《弇州續稿》卷一三七

明儒碑傳集卷五十九

徐階三

徐文貞公行狀下

南京振武營新軍者。當先帝時。殺戶部侍郎以要權。賜置不問。用是益驕。時當頒九邊賞。故事無及南京者。會得匿名榜。有所要脇。辭忤屬甚。公曰。往者已失刑。再邀賞得賞。亡所用國法矣。時操江都御史唐公繼祿當朝。辭公屬之曰。營兵即變。有郭成。李錫。劉顯。外兵足制之。城大不憂據也。憂其據孝陵。於法不宜攻耳。若往可伺之一。有變。即以江防精兵走孝陵道。而時有三都督之任者。皆違將公使。以家丁百五十人往。曰。新軍易與耳。苟生變。即疾擊殺之。以為若功。而不罪也。公度兵已嚴。乃因兵科疏擬旨。保舊軍者各令還衛。招募者隨營食糧終身。願歸農者聽。頃刻而軍散。亡敢譁。纂修實錄。公為總裁。上以天暑。停日講。公固請勿停。不報。鄭王厚烷當出。皇祖陵細。公詣御書。褒之。歲益祿百石。王故以進

諫忤先帝旨者也。於是大小言事得罪臣僚。及以寬見抑者。次第登用。或有遷造崇顯者矣。而言路氣益張。上時有所不堪。諭公等。科道官不諳事體。敢屢欺言。是何意。卿等詳處來說。公草奏言。科道官遭際昌時。思効報答。第性氣粗率。則言或過當。事出風聞。則語或失實。其不諳事體。誠有之。然天威在上。以臣等度之。非敢為冒犯也。謹錄申聖諭。令彼各省改。以仰承皇上天地寬容之德。草具而有同列尼公者。奈何不薄譴之。公曰。即上遽有譴。我曹且力爭。而乃導之譴乎。則曰。如上諭詳處何。公曰。今諭令省改。即處也。及疏上。上亦竟弗罪也。御史李君惟觀乃上疏。請毋得詰言者。以廣忠益。公擬旨報聞。上以筆乙之。而給事中馮君成能復推其意為疏。語婉而加詳。同列謂公。將無復作報聞乙乎。公擬答曰。聽諫乃朕素心。即善言未嘗不嘉納。昨諭乃為不諳事體者。若等自今宜審所言。以稱朕意。同列皆難之。公曰。夫已氏者。不難言。而我乃難納也。昨所以乙者。正謂未



儒藏

有以開上意耳。有不可，吾請自當之。及擬上，上果不異。而時有一邑丞王邦直者，條奏時務，頗剴切。公擬旨稱其多切時弊，該部為看詳，毋以官卑廢言。於是人人稱頌君明臣直。時有中旨令翰林臣撰中秋致語，公驚謂：「先帝神主猶在几筵，即小小宴樂猶不可，而況致語之盛哉？」臣等必不敢奉詔。上於是併罷宴。上欲以九月詣天壽山行祀諸陵，公與同列言：「皇上此舉，蓋重祖宗弓劍之藏，切歲時霜露之感，非他游幸比。」第天子之孝以保安社稷為大，故龍輻輳引尚不親送，山陵二祭止於遣官。今自大雨而後，未稼淹沒，坊舍摧塌，萬乘親行，六師供億，何以待之？蓋持者再而上不聽，乃盛陳北兵窺伺叵測，意以間。始報侯異曰：「其明年春警稍解，上竟行謁陵禮。」甫至齋宮，而使中貴人滕祥、李芳以意問曰：「行禮在次日，上欲輕騎一出，觀形勝可乎？」公曰：「上以祀來乎？以觀形勝來乎？以祀來則先游而後行禮，非所以展孝思也。祥等曰：『然。』乃祀畢而後出游。故事，扈駕萬人，人

給一金。公時在告，兵部誤以二萬人請，而給止萬金。流言籍籍。公至陵所，始知之，乃宛曲慰籍，令騎兵給六銀，步兵給四銀，得無他。兵部復請令薊鎮總督鎮巡而下，各以兵扈駕。疏上，公謂公等賞給具乎？夫管兵以賞薄籍籍矣，奈何復召之來，使籍籍也？且兵悉入敵，乘虛有所侵犯，雖任其咎，擬旨令總督以標兵一枝入衛，餘勿動。蓋是時諸中貴人業以枕守土臣而索之，公借以塞其竅，諸不能無忿忿，而忽奉旨以太監呂用等分監團營兵，公率同官上疏，謂今無所謂團營者，且中官坐營起於景帝而革於世宗，臣望陛下以世宗為法，以兵政廢廢為慮。上不憚，所以督責頗峻，而公等諍愈力，乃為寢前旨。俄復命修內教場，勅中貴人習騎射。公因御史言，復率同官上疏，謂陛下此舉，蓋因邊方多事，居安慮危，故示邊臣以意，使之振戎鋒武耳。如御史言，則有防微杜漸之慮。臣等竊謂邊方遠，禁地近，聖躬重，戎務輕。當先帝時，嘗欲立二內營而復止之，此必有深意在，不



可不三思也。事亦寢。一時傳誦。上聽諫。若轉圜。不爾。幾復成正德時事。而公等所以又安宗社。功非小。敵分道入邊。其犯近畿者。土蠻自牆子嶺入掠。禦河西。而犯山西者。破石州等郡邑。公以京師及諸陵尤重。今二邊閑而黃台吉者。尚匿不露形。恐其候兵東西。援而突入。以掩我之虛。急請切責總督劉燾等。督兵隨敵剿逐。仍阻守禦河。勿容西渡。其黃花等鎮。加慎隄備。以防黃台吉竊發。仍發京兵一枝駐通州。以護陵寢。保漕餉。俱取旨行之。時上御經筵畢。面詢公以戰守方畧。公條對甚詳。上首肯久之。蓋上方東漸。穆至是始一奉玉音。敵退當第失守狀。時薊鎮頗能尾敵。因斬至千數。然不蔽罪。俱有旨逮撫鎮以下。置詔獄問。公謂薊鎮吏士自託以獲功。常遷賞。而驟問逮其帥。不無駭怒。當縱騎行。戒之曰。吏士遮而曹訴。第云山西失事重。而薊鎮輕。法不得不逮。以示警耳。必不以山西例例而帥。必不以而帥罪掩若等功。兵部已為若等上功籍矣。縱騎業至鎮。吏士萬

人環擁馬首。哭且絮。幾不得發。以公指諭之。立解散。聖誕加恩。錄公一子尚寶司丞。賜衣一襲。蓋猶用世廟故事也。疏辭。溫旨不允。公一品考九載。復滿九載。上疏自劾求去。有旨。卿輔佐先帝。久著忠誠。翊戴朕躬。勲猷茂。茲九年再滿。朕心嘉悅。著照舊贊理。不允辭。應得恩典。吏部議擬來看。公遂力求去。且請吏部毋議恩典。復奉旨。卿先朝耆碩。才德兼隆。經國籌邊。功在社稷。朕已命所司議擬。重加恩賚。用示眷醇。何又求去。宜遵前旨。即出贊理。以副朕懷。不允所辭。吏部議疏上。奉旨。加公支伯爵俸。錄一子錦衣衛千戶。賜勅褒諭。宴禮部。而少卿璫超為太常寺卿。公疏辭。仍求去。復奉旨。卿才無文武。久著勲勞。特加異典。以示酬眷。宜承命。即出輔理。不允辭。會耕藉田。公與九推禮。乃不敢言去。而辭恩命。上乃曰。卿忠貞茂績。加恩非過。覽奏。具見謙慎。伯爵俸併部宴准解。其餘宜承朕命。詔冊今上為皇太子。時甫五齡。遇公等於御道西。召公謂曰。先生每辛苦。公等頓首。

謝因謂殿下茂齡宜讀書進學。皇太子顧公而曰我已讀三字經矣。又曰先生每請回如是者再。睿音琅然不攝不縣。公出而以手加額曰宗社萬世慶也。老臣即歸死瞑矣。工部奉旨建壽宮。公謂先帝作永陵在十五年後。今上登極未幾而遽有所建立。小民無知或妄生口語。詔已之。俄復奉旨內官監太監李佑往蘇杭監織作。時以詔令就停久矣。公疏阻之不可得。念佑素貴而其人頗長者。乃盡以宿弊告曰公往毋言利。今夫利歸公者一而歸下者二。奈何代之受譴也。吾欲使臺臣揅去之。是又代公受譽也。公何不與臺臣共其譽。且教其以所織作徑進御前。毋落局中少年手。李君曰善。一如公言。時有小璫以事干巡城御史不應則詈御史。御史怒執而笞之。羣璫起之司禮所欲論紀御史。公業為解得免。而御史乃論紀璫。其黨百餘徼御史於午門外殿辱之。御史大夫王公廷欲上疏紀羣璫以問公。既已許。尋念疏即行。彼璫輩自匿欲得其主名則且展轉不可究

詰。萬一彼先之以誣我禍且叵測。先朝事可監也。乃使人致司禮之上佐曰尚文者語之曰諸貴人羣毆御史。索何處。文偈謂內外各有體。相公母但為御史惜。公曰吾非為御史惜。為國家大體惜。且為司禮諸公惜耳。文怪問何謂。公曰毋論御史王臣即天子臨御之所而羣毆人能保上之不怒乎。諸公何不以時詞得其人而速奏之。即外廷有繼者其輕重在諸公手而上必不怒。諸公體故在也。文悅以告其長滕祥。悉得其主名參之王。公疏繼上。羣璫窘不能自匿。又無可以宛轉道地者。悉就逮杖其首惡三人百發達戍。餘九人各六十。為南京淨軍。公既以詔旨省諸鎮進鮮。奪太和事權與諸監局工役。而所持諍又多宮禁事。仲者十且八九。往往假宛曲而行。久之其人益側目。所謂承奉芳者既貴與滕埒。雅好名自負。以昌強鄰眾之流。時時言外廷事。所司以格裁之。不能快。而歸咎公。謂公主之。公亦覺其意。會諫。幸南海子不聽。遂上疏。稱衰病乞休。奉旨卿德望優隆。



練達政體、安懷大計、方頓餐、豈可引疾求退。再疏辭、再奉旨、卿才德優裕、精力未衰、朕眷倚方隆、豈可屢疏求退、宜即輔理、不允辭。尋遣中貴人至公邸諭指、公惶恐出視事。時同列來視公疾、問何以不擬旨見俞。諸公相謂、毋論不忍舍公、我曹烏敢擬俞旨。公曰、不然、公等今不擬而令異日諸閣擬之乎。先帝四十五年收此曹、權歸之公等、萬一復失之、可惜也。時積為大為民間累、而官不得其利、公令減其價倍而入之官、太僕歲歲金數十萬、以備邊用、而民困蘇。時戶科左給事中張齊初使還、訥達商賈、有所挽、大司農格而不遂、事且泄、乃故為大言、聲公欲發兵十萬、襲達民之入敵、曰、拜姓者為奇功以解。公哂而斥之、迫則上疏請考察庶僚、及聽大

年、勲勞茂著、朕念其年高、屢疏乞休、用允所請。着寫勅諭、差官護送還鄉、仍月給米六石、歲撥夫八名、以示優眷至意。於是九卿大臣給事御史各上疏留公、且為公辨雪、而都御史王公廷獨探得辭納賄事、下詔獄、嚴而戕之。公得請、以次日謝恩、其又次日朝辭、賜白金五十兩、新鈔三千貫、綵幣四表裏、大紅織金雲鶴綵衣、衣有副。公既辭、公卿大夫送者至傾都邑、而父老耄稚次且涕泣、後先攀轡、不得行。亡何、南京之給事御史及外臺臣相繼而請留公者接踵俱報聞。公甫抵家而勅諭至、其稱公謂、遭濟時艱、善藏其用、專司撥席、獨運鈞衡、默伏庸回、屏除貪墨、宣揚遺命、與四海以更新。相衛朕躬、聽百官之總已、俾予一人垂拱之休、皆十八載輔相之力。方切毗倚、共致昇平、而屢托微猗、力求避位。舉朝有勉留之疏、在卿堅肥遯之情。朕非不欲屢任老成、而又不忍煩以機務、特賜俞允、數錫璽書。公拜誦之、感激涕下、因謁諸祖塋、勒所錫告辭於石。公故居近城西隅

湖水曰少湖。嘗讀書其傍。自號曰少湖。學者尊之。不敢以官與字稱。而曰少湖先生。其後讀孟子存心養性篇。而有深契。更其齋曰存學。者遂復尊之曰存齋先生。當公拜首。撥日。少湖水忽踊起。高八尺餘。踰兩時始息。人謂蒸雲從龍。膏澤四海。其兆殆不虛也。公自杜門。展一編。問此筆有所著述。或勸之於湖濱築廬舍。蒔花木。以自愉適者。公笑不答。生平無姬媵。夫室蕭然。布衣緇袍。往往至敝。恒食唯二簋。菜羹糲飯。間佐之脯醢而已。三子間以甘旨薦。則却之曰。故非吾所嗜也。公雖已得老。然望益重。刺史干旄時造戶請質。門生故吏踰越山海。執贄問益。公不忍距其意。人人為叩兩端。則皆大喜。以虛往實歸。而間及天下事。老臣惓惓憂國。警蹙不休。見若以為志千里者。新鄭公復暴從田間起。兼握銓柄。內衡公而更黜之。懼危之徒。遂以公為贊。詆媒翕訕。頃刻萬狀。於是召齊康。復張釋。而爪牙吏橫出為郡邑守令。至號召奸慝。創獄以擬。太常君兄弟幾不免。公第曰。兒

子坐得富貴固當。且夫禍福者猶循環然。而可預擇也。事稍白。亡何新鄭敗。益大白。公具衣冠望闕拜曰。天子聖明。念老臣無罪。何以報塞大恩。自是益寬然。亡所競。人或問以前事者。公笑曰。老而好忘。忘之久矣。性友弟。尤喜施予。既讓新第於前母兄。歸自延平。念其產性。割田二百畝贍之。歸自江西。贍故鄉先生何君之第。以還其子。東屋三間。俾為先生享室。西屋三間。使其子居。餘屋收佃租為衣食費。以太夫人之愛施氏妹也。迎其夫婦歸侍太夫人。推家共之。亡間。痛仲弟陳早殤。而季君陟有餘子琳。俾為後。而授以所得膏子叙。琳仕為太常典簿。以其官推贈陳公所用意厚。非直欲無死陳。且欲使季君之子仕也。晚節與季君及從弟陸隣。日惟會無間。恒曰。吾昆弟在者僅三人。季昔稚。齒亦漸脫。而何忍露蹊徑為。及季君卒。公慟哭。為哀辭以祭。有曰。聞重門而畫掩。鬱高堂以夕空。暢徘徊而四顧。曷由一接君之音容。聞者悲之。公於天下事無所不通曉。而家江南。少



而察小人依至、頗悉賦役利害、屈指借著、縷縷言之、即三老主計所不能及其居政府日、稍無歲、江南之人倚公若家長、公亦自任乳哺社席之事、既歸屬大水、言之巡按御史邵君陸、具疏改折漕糧、所貸得十一、明年又大水、田卒汙萊、民相推剝不已、力言之中丞胡公執禮、為具疏、尋用危語抵政府、獲改漕糧、蠲存留之半、停徵鳳陽馬價十三、而顏科馬草等銀一切悉罷不徵、又明年大水、復移書政府、折荒田漕糧十二、獨其為洗馬還里、而松江守銳欲量田、公持不可行、守謂公所莊事鄒先生、鄒先生不量安福田乎、此百世利也、公曰、安福之賦無異則、賦之多寡按田數可知、故人往往減畝而鬻田、松之賦其則至三十餘、賦之多寡必計則以為算、故人往往減則而鬻田、獎在賦畝、量之獎可算也、獎在減則、不在量也、故安福之利在量田、松之賦在稽則、用各異也、守信公遂罷不復量、蓋四十年而量田之說行、乍以為名美、而民不勝擾、怨聲聞道路、人益思公言、孫元

春舉進士、公貽書發明敬肆之義、誨以堅志力行、勿怠勿恐、交游中有慕悅勢利者、談說恩怨者、厭情職業者、鮮腴服食者、沈色酒酒者、一切謝遠之、必卓然不惑、乃成大丈夫、毋負我、既授刑部郎、公復貽之書、謂得此官有為汝不平者、悞也、吾殊為汝喜、夫無競之地可以遠思、無思之身可以遠謬、勉之、勿生厭薄而志遽轉、則汝福耳、進德修業、汝衣食也、衣食之苟具而可驕人乎哉、如互相標榜、高立門戶、非獨乖遠害全身之道、為己之學、故不如是、前是公與二三鉅公明王文成公良知之學、又推仁體以示人、而居宰輔日、計吏與朝士之為是學者、相率詣道廬、陳會、以要公主盟、公雖在直不能出、而間有所酬答、遂相率裨公書以為存齋先生教言、間一二假公名重者、以為公私我、而忌者真以公為私、彼而苛撻其短、公不與知也、至公與元春劄、其所要歸曰、為己所戒、曰標榜立門戶、讀之而瞭然發矇矣、江陵公之奔喪、示若薦公以代者、而公已老、貽書辭之、又為元

春辭改官。語具集中。公年八十。江陵乃率同列上疏。謂公當世廟時。承嚴氏亂政後。能矯枉以正。澄濁為清。懲貪墨以安民生。定經制以核違費。扶植公論。獎引賢才。一時朝政脩明。官常振肅。海內治平。皆其力也。又引先帝居藩邸時。世廟忽有所疑。從容譬解。其疑乃釋。此一事獨臣居正知之耳。所有存問之典。宜從優厚。報旨謂公輔佐皇祖。翼戴先帝。忠勤端亮。茂著勲勞。今年及八旬。足稱榮壽。特勅遣使存問。賜白金五十兩。大紅紵絲蟒衣一襲。綵幣四表裏。以示朕優禮耆碩之意。旋奉勅諭。古者公孤在朝。則坐而論道。更老在學。則憲而乞言。惟尊賢尚齒之儀。寔養德勸功之典。曠言耆碩。著有勳庸。世咸仰為達尊。朕宜新於殊數。卿才優王佐。學擅儒宗。早馳譽於清華。歷試功於盤錯。簡知皇祖。晉陟台司。履忠順以事一人。持廉靖而先百辟。當食土之既厭。更治化以維新。懲貪污而仕路肅清。獎忠直而真材彙進。申明典制。多安邊圉之壽。然運樞機。有尊主庇民之

畧。定邦本於危疑之際。宣上德於獨留之中。翼我先皇。嗣基圖而撫方夏。保予冲子。升儲貳以奉宗祧。方倚重於黃扉。遽乞閒於綠野。後先多績。朝廷實其典刑。終始完名。寰寓想其風采。自天純佑。俾爾壽康。屆茲八旬。敘時五福。匪直先民之楷式。寔惟盛世之禎祥。朕祇遵先猷。追惟舊德。粵稽功載。申錫寵章。於戲。衛武雖在耄年。箴儆不忘於國。晉公已解機務。安危猶係其身。惟我宗工。不殊前哲。其茂綏蕃祉。慎保脩齡。尚謀黃髮之詢。用慰蒼生之望。時行人及公里。而太常君故在侍。尚寶卿少卿與孫光祿少卿皆以使事歸沐。諸孫之為太學為諸生與當為尚寶錦衣者垂二十人。公率以迎於河之浒。至第開讀。陳所賜於堂。感極歡欬。垂白之叟與諸文學掌故噴噴稱羨。以為輔臣八十有賜者。僅毛文簡賈文靖。然無身使璽書。守正被誣者劉文靖謝文正諸公。有身使璽書而無特賜。象龍之家則林下大臣絕不復沾被。而公璽書所褒辭。隱然阿衡師尚父。又他所不敢

望也。於是公卿大臣若江陵公而下數百人推本上意，為壽解若千萬言，公合而裨之，以玉音所稱名之曰榮壽。行人返命，公使其孫元普上疏謝，而末復勸上清心省事，講學勤政，崇廉直，屏貪邪，緩徵科，寬役賦，識者以為言簡意盡，不勝老臣惓惓忠焉。詔官元普為中書舍人，尋得請改錄其子如元普。前是公謝政歸，過世廟諱日，晨起望闕拜哭，蔬食竟暮，穆廟崩亦如之，以為常。歲有詩識痛，歸十五載而天子加異恩，非一，即母論祿位名壽於君臣之際，相為慙至，亦近代所未有矣。公生而白皙，秀眉目，美鬚髯，端坐竟日，無跛倚，湛然冰玉，及接之而藹然春溫，色笑襲人，有所談論，霏霏皆芬屑，或盛氣欲臨公者，見而自融釋。博辨之士將欲公以所不能而不忍也。公既貴，極人爵，且老壽，推以為達尊，而所答謝士大夫，母論卑少，即蚤暮風雨不避，赤牘必精謹，母令失意，或風公胡自苦，乃爾，公正色曰：「母家寡，母小大，母敢慢，非我先師訓乎？即不殺不敢當，君子寧忘服。」

臂焉。然公竟以過勞得微疴，尋愈。元旦朔，公具衣冠望闕拜成禮，諸子姓羅列陳椒酒為壽，而地震者再，有疑之者曰：「是何祥也？得無虞於哲人耶？」亡何，郡邑守長復以詔倒致綵幣羔醢，公為觴觴之，甚洽也。居月餘，屬寒疾小損，猶能作細楷牘以貽親知，已寢劇，然猶自飾屬道，適於室。一日忽呼太常君集子弟而命之曰：「吾受國恩厚，無以報，是在若等。吾旦暮且去矣，案頭械一冊，指曰：『待吾去而後可啟械也。』太常君憂皇甚，於名醫無所不致，咸請進藥，公拱手謝曰：『勞苦諸君，胃弱甚，藥何能補？且吾數盡此矣。』更一日，語左右：『若欲起坐者，俄脫然而逝。』太常君哭啟械，則所以經紀身後威備，而其大者母乞恩，母修祭，母作齋醮，母遠送，墓殮止單練，幅巾深衣，不得用金玉繒綺，蓋公前二歲手筆也。太常君奉行之唯謹，而中丞郭公思極已具疏聞，上震悼，輟朝，加祭者三，為十二壇，工部郎余君寅治塋，追贈太師，謚文貞，錄一孫尚寶司丞。嗚呼！諸所以哀榮終始之典極矣。公



生以弘治癸亥九月二十日卒。以萬曆癸未閏二月二十六日。距其成進士及第週一甲子。有丈夫子三人。即所謂太常卿璠、尚寶卿琨、少卿瑛者也。璠沈夫人出。娶贈汀州守李公錦女。封孺人。贈淑人。琨、瑛皆繼張夫人出。娶南京太僕卿范公惟一女。封宜人。瑛娶前太保左都督陸武惠公炳女。封宜人。李、陸皆前卒。女一。適太學生顧九錫。孫男十九人。長即光祿少卿元春。娶瑞安丞朱雲炯女。封宜人。次即太學生元普。娶四川右布政使潘允端女。聲蔭官生。元賜。聘教授臧文弘女。元昭。聘太學生王翼恩女。元暉。聘詹事府主簿吳馭女。元驥。聘太學生施順禎女。元暉。聘太學生潘玄授女。元收。優給錦衣千戶。元暉。元曜。元昉。皆璠出。元材。元霖。聘貢生李鴻女。元植。元朴。元樞。皆琨出。元忠。聘太學生陸光任女。元性。聘御史許樂善女。璠出。孫女。人嫁大理寺評事包漸。諸生陸瑒。及受陳學憲。惠生林有麟。太學生張世良。聘皆璠出。嫁禮部儀制員外董嗣成。及未字者。皆

琨出。一未字者。瑛出。曾孫三。有慶。娶尚寶卿沈玄華女。元春出。迎慶中書舍人。迪慶。元普出。曾孫女二。受劉承禧聘。元春出。一未聘。元普出。公所著有世經堂集若干卷。續集若干卷。諸詔誥典冊。漢汗之號。密勿之對。皆在焉。學則若干卷。家訓若干卷。年譜五卷。愛程純公先生言。謂其能得聖人蘊。手錄之若干卷。愛白香山詩。又愛蘇長公詩。若文。謂其能暢情事。節之若干卷。太常君兄弟。將以某月某日。葬公於湖州某山之賜塋。而以治命紀公之行履。屬世貞狀。世貞伏自念。在郎署旅謁公於燕中邸。公以先御史大夫有朝行舊。又辱與李君司寇同年。進而與之語。是時世貞數以公事失機。帥意。公從容解之。世貞不悟。語侵公。公弗色忤。自是坐先大夫難。退伏田里者十年。無一字以干公。亦不知公尚能記否。隆慶之元。錫叩關上疏。為先大夫辨雪。亦不敢以私情。公是時方有新鄭梗。不獲盡如志。而先大夫得免於母。害之籍。而以故官就土。自是有一命起世貞於田間。而



公亦得謝政歸矣。官滿或公除待次。以至避言里居。厥必造公。公必留款語。及三才之恒變。朝典之新故。人才之是非。國家兵事之得失。未嘗不三復焉。公固未嘗不躍然世貞之管窺。而憂其跡弛。然既憂之。而又復護之。尚以為可用者。而世貞竟自廢員公矣。獨於文章最為晚合。然世貞頗能悉公之有根柢。而公能悉世貞之達而不為吊詭。故世經堂集成。首見命為序。公之壽世貞。凡再。劬一言之頌。其頌不稱公之盛。而獨稱公之難。蓋自古宰相之佐理天下。其難未有如公者。其能善用難。亦未有如公者。公讀而首肯之。當是時。猶未能盡公。以為分宜時公。但默而善藏其用而已。不知其密勿之陳奏。未嘗不侃侃娓娓。中情實破要害也。竊嘗謂世皇如白日之麗天。而忽為震雷迅霆。公徐劑其震迅之勢。而為霖雨。是故似難而實易。穆朋如白日之麗天。而浮陰時時翳之。公直欲解散其陰翳。而復為白日。是故似易而實難。然公去國十五年矣。天下所以晏寧而化被蠻

貊者。安能遂廢公德也。嗟乎。世之善稱大人。進而伊周。退而史其說云。勢故不得不爾。第有如稱公之可以亡異辭乎。雖然。藉令有善稱公者。孰有如人主之善稱公者乎。人主之善稱公。後先無慮千萬言。又孰有如易名之二言所謂文貞者乎。今夫館閣之為文也。人例而狎得之。文而所謂敦學好問也。亦人例而狎就之。至公乃以道德傳聞舉也。則駸駸乎未聞遺哉。清白守節之謂貞。我知之矣。其舉曰大憲克就。非公其時當焉。嗚呼。真宗社席黎黎。公之大慮也。君子於嘉隆之際。可想見矣。是謚也。前公為名相者僅一人。曰楊廣陵。所謂清白守節者也。祿位名壽庶幾其埒矣。豈儒馬敢弟熟業。即駸駸振振。畫繡展珂。奕然於華亭里者。不亦徑庭哉。世貞竊謂公寬厚如兩弱翁。敏練如姚元之。強記如楊遵彥。宏遠如王子明。鎮定如韓推主。忠順勤勞則庶幾諸葛孔明。柔物采望。又有吾家始興所不能及者。即亡敢竊附華衮之後。吁。不至阿而為伊周史也。讀太常君狀。竊

而肯似無容世貞口。顧於一二察案之際。若有懲而救於隳者。則非公所著年譜與世貞所以報公意也。昔永叔稱范呂之平視。充夫削而不書。子瞻狀金陵之流徙。司馬以為實錄。何則。不敢錄生者以掩死者也。世貞從公宇下久。且年而當無諱之朝。其容與恣於筆以取譏。而史氏惟賜裁削。付之記室。稱榮華焉。幸甚。

王世貞撰 《弇州續稿》卷一三八

明儒碑傳集卷六十

徐階四

特進光祿大夫柱國少師兼太子太師吏部尚書

建極殿大學士贈太師諡文貞存齋徐公神道

碑

當嘉靖末載世風之澆濁甚矣民不見德惟賄是聞四夷交侵萬民失業天下勢蓋岌岌乎其殆矣一旦肅皇帝赫然斥逐盜臣而以政柄歸之徐文貞公若雷霆震而妖怪伏陰翳披豁而旭日升也今出朝堂不崇朝而歡聲暢于四海若蘊隆焚熾之極而時雨沛也由是中外洒然易慮士大夫得以守身修職自見于世爭自淬礪以名節和尚苞苴屏絕清議凜凜而視前日寵賂狼籍狎習而不怪者若異世事矣未幾廢墜興瘡痍起流徙者復怨昨者靖文武小吏咸免勉理其官守內撫外攘國勢儼然增重迄于今賴之夫是時道敝風淪二紀餘矣久難變而極重不可返也識者憂焉乃清濁分規安危異度成功化于俄頃間而貽諸永世如此豈非忘身殉國之忠正已格物之效夫固有不言而信不行而至者哉嗚呼肅皇帝臨御凡四十六年其知人善任

之弘猷蓋普克終于是為不可及已公諱階字子升別號存齋松江之華亭人父贈特進光祿大夫柱國少師兼太子太師吏部尚書建極殿大學士思復公諱母贈一品夫人顧氏思復公嘗丞宣平以弘治癸亥九月二十日生公于官舍有異徵焉公警敏性成弱不好弄知學即隱然有巨人志嘉靖壬午舉于鄉癸未登甲戌授翰林院編修予告歸娶尋丁思復公憂服闋復職茲茲致務實學德日進俄以議孔廟祀典忤旨謫福建延平府推官滿三載遷浙江按察司僉事提督學校陞副使移任江西江浙士至今頌公德教不衰已亥冊立東宮召公為司經局洗馬兼翰林院侍讀公去國且十年矣歸而望望重丁顧夫人憂終禫以國子祭酒徵上還其至屢語侍臣趣之由是人始知宸注于公者隆也再逾年陞禮部侍郎改吏部公則榜卧內曰嗟汝階二十一年及第四十三而佐天官國恩厚矣有不竭忠殫勞而或植黨罔法背公自營以干神譴將殃及子孫可不畏哉蓋其事心之嚴如此尋兼翰林院學士教習庶吉士擢禮部尚書時部務久不治亟為整頓備胥貪緣為姦利紛不可詰公乃詳徵故牘參稽述事諸所沿習若宗藩封爵文武大臣恩卹等例悉折衷情法裁定畫一奏



藏

之。又澄汰太常寺、太監院官生、四夷館通事、光祿寺廚役、凡遊惰失職并寄空名不事事者若干人、繫為考選稽覈、登照之令、額定其數、于是政紀清肅、人因偉心。莊敬皇太子薨、上欲令百官母制服、公以禮爭之、遂服衰。既而以冊立皇太子、請不報、連請之、上蒙公忠勸、召保直西內、加太子太保、會虜十餘萬騎入薄都城、中外大驚、不知所為。公疏請出邊將以罪繫獄者、令輸死自效。又請無禁關廟民之入城避寇者、宜籍其壯勇充行陣。京軍脫怯、見虜恐奔潰不支、宜配以大同健卒屯城隅、為關廟捍護。又請上出視朝、召群臣問計。由是都人恃公心稍安。內閣因請令公督調九門、公亦自請視師。上不欲公遠左右、不許。俄虜縱所掠馬房內使還、以番書求貢、上召內閣及公誨所以應之。分宜謂餒虜掠食耳、不足慮。公曰、今環城皆虜、所焚屠至慘矣、豈止掠食、宜亟圖勦禦。上目公曰、然。公因進言、今我戰守具未備、虜求貢雖誠偽未卜、宜從權以款之。遣使往詰來文、責虜即虜誠也、責令飲兵出塞、介邊臣為請、即不誠、則使往返間、我四方兵至矣。上稱善者再。時有謂朵顏三衛導虜入者、議集其入貢使詰責之。公曰、事無左驗而遽顯詰之、虛且失夷心、實則罪在不赦、而我力未能討、是驅

就虜也。不若但以捍圍不虞責之。諸夷使果懼伏。上由是益知公可大用。及叙薊鎮護謀功、上特筆加公少保、麻拜旦夕矣。會奉旨欲樹孝烈皇后太廟、桃仁宗主、令廷臣集議。衆知其非、莫敢言。公執以為不可、上怒、謂其專禮、令再議。公請增太廟為十一室、樹孝烈而亦不桃仁宗。上不從。竟桃仁宗。再逾年壬子、上意解、始命公兼東閣大學士、參機務云。是時分宜方縱其兒子以漁貨于四方、濁亂國經、漫無紀極、且猜忤隱恨、鋒距百出。既與公枘鑿不相入、而外論復推公籍甚、公蒿目時艱、欲拯之不啻援溺救焚、而形格勢禁、握手觸忌、又不忍默然坐視。負上特知、乃外晦內貞、隨事自效、冀有所維持匡正、而不著其迹。于時有世道慮者、咸為公危懼、謂不異藉虎枕蛟云。賴上明聖、察公忠謹、專一眷信、久益篤。一品三載、詔進光祿大夫、柱國、兼太子太傅、武英殿大學士。六載、加少傅。滿九載、改吏部尚書、尋加太子太師。西內永壽宮火、上雅不欲還大內、徙居玉熙殿。公朝夕傍徨、曰、此非至尊安居所也、乃請檢三殿餘材營之、躬為督視、數旬而工成。上大悅、更名萬壽宮。進公少師。上雖深居法宮、然放憂天下、四顧臣工無與分猷念者、習見公肫肫保民愛國之誠、內善之。自是密札諮問、交午



公所其及分宜者希矣。會御史邵應龍盡劾分宜于世蕃奸狀上震怒。勅分宜致仕。下世蕃獄。戍之。于是公始為政。乃揭三語座隅曰。以威福還主上。以政務還諸司。以是非賢否還公論。蓋是三者。分宜皆擅而私之。為中外痛心疾首者也。分宜既去。諸比周附麗。干紀作奸。布在列位者。先後為言。官糾繩。多得罪去。乃言者搭別大苛。益抨擊不已。上厭之。以語公。公婉詞為辭。上不樂。會問知人之難。公因對言。大奸似忠。大詐似信。故知人之替。帝尤猶難之。欲易其難。無過廣聽納者。聽納廣則窮兇極惡人為我揆之。深情隱惡人為我發之。未用者不濫進。已用者不倖留矣。故聖帝明王。必廣求言之路。用其言之善者。而容其未善者。則嘉言競進矣。上亟稱善。意乃解。是時朋黨既熾。公旁引正人。或拔自散寮。或起諸巖穴。于是中外彬彬。仁賢在列。義時竊圖殃民之政。次第更置。且盡。天下莫不想望風采。乃公自惟承積蠱後。以多故為憂。內之則日延賢士大夫。廣訪民瘼。求康阜長計。外之凡竿牘往還。必究極利弊。數賢賜相示。俾人獲自盡。期于成功。上剛明任決。屢慮萬幾。凡四方所上章奏。每事與公嚅度。手勅秘札。晝夜絡繹下。公故以恭謹得上心。既承專任。益僇僇懼。墮越。皆至促應。未嘗逾

頃刻期。夜則具檮墨燈火以候。不敢安寢也。時上方崇黷祀。益以應制文勞甚矣。或謂公。公曰。君猶天也。臣子義靡所憚勞。吾豈不知媿諸少年。顧取一己名。不難念誰與上共天下者。蓋其心良苦矣。久之。上益信嚮公。進建極殿大學士。又特旨加上柱國。公力辭。又賜以上方玉帶。嘗因公乞骸。手批答之云。卿念在邦民。誠固寧固。宜贊朕不及。固棄是恩。昔下。朕朝異之。公嘗有小病。上出內苑珍劑二器以賜。手札溫諭。宛若家人父子。間云。是時上春秋高。亟求祈年術。諸迂怪士競獻異藥。公多方譬止。勸上勿餌。黃岡大猾胡大順者。往黃緣陶仲文用事。尋以罪斥還籍。至是復詭稱以此事為始。獲萬壽金書及鍊水銀為神丹術。服之不老。賂上所幸道士藍田王等。令其子上書言狀。上意動。田王等輒陰召大順入京。上欲復用之。以問公。公極言其誣罔狀。且曰。詐傳者在律必誅。今不治。異日夜半出寸紙有所指揮。誰能辨者。上大悟。乃下諸人者于獄。悉論死。自後遂無敢復以不經語試上者。乙丑。上有疾弗懌。屢以禪繼為言。公皆踖蹠婉曲以對。因請舉冊立典。不報。俄上欲南幸承天。內中嚴辦趣發矣。人心皇皇。諸司皆失措。公諫止不從。則再三危言之。上竟用公言罷行。丙寅冬。上疾大漸。

覺前後為方士所誤、有悔心。俄而棄群臣、公哭之慟、乃緣上意草遺詔、諸社政宵人一舉而芟蕩之。詔下、士民多感泣者。人擬之嘉靖登極之詔、謂為世廟善始令終之懿典焉。穆宗臨御、以公先朝耆碩、傾心委任、每事虛己受成。然更代之際、庶政填委、兼以朝儀久廢、百務創始、公殫精徇國、兼總巨細、頓減常食、遂決意求去。上勉留至懇、公意竟不變。一歲中疏凡十餘上、始得請。乃賜勅給傳、遣官護送以歸。仍令有司月給廩六石、歲撥夫十名、示優眷焉。時隆慶戊辰秋也。迨萬曆壬午、輔臣等以公壽八袞、聞天子為之動容、乃降勅遣行人存問、賜白金五十兩、大紅蟒紵一襲、彩幣四表裏。公遣孫請闕謝、頻求勸上清心省事、講學動政。登庶斥貪、緩征寬役。語盡出衷懷。上覽而善之、詔官其孫為試中書舍人。越明年癸未閏二月二十六日、公遽薨。上聞訃、輟視朝一日、賜祭十三壇、遣官治葬、贈太師、謚文貞。錄一子尚寶司丞、蓋恩禮之始終備矣。至矣。非公之元忠懋德、功在社稷、其孰能當之。公德本天授而培之以學、雖由良知為入門、然篤志力行、不事口耳、務求真於心、而實見之事、與世之借頓悟以文禪覺者不同。公冢孫元春登進士、公貽書訓之、謂進德修業乃日用本分、猶衣食

然。若立門戶、相標榜、即非為己。蓋公之為學如此、故其暢于四體、發于事業、旋乾轉坤、磊磊然卓異而迅速者、誠有本也。當公之初得政也、余告公以所聞四方人情。公曰：此風耳、爵渥之久、人心思治甚、故若此。久且特責實焉、未易副也。余曰：所謂風者、若乘人心所嚮、誠而引之、乃恐實不繼耳。公不動聲色而天下歸德、是以誠心至仁為風之自也。久且入人益深、何患無實。居有間、庶務駁駁舉矣。公色憂滋甚。余問之、公曰：屏貪濫取、改前政、更革耳。今圖計所最可慮而難措手者在財用。總歲所入不敷所出十三、凡括之民者至纖悉無遺利矣。而經費日以殫衍。今所取盈帑、積光年羨耳。後將若何。所謂叅政他日憂也。嗚呼、悠哉思深乎。老臣之謀國也。今去公世有年矣、賴天子明聖、百度修舉、內鮮逋徵而外無兵興費也。乃歲計僅僅支目前、度支問告詘焉。而胡以待意外虞耶。嗚呼、公之賜民賴之至今、乃公之愛其究未之釋已。公子太常卿璠、尚寶卿琬、少卿瑛、諸孫南京鴻臚卿元春等、徵余為文、碑于公之神道。維公門下士也、不敢以固陋辭。乃據所見聞、用徵信史如右。若夫世系之綿、支行之盛、以及孝友惇睦之行、經綸布濩之詳、則備見于狀志云。銘曰：於鑠肅廟、握符四紀。顯俊亮



工登閣上理。粵有匪人。惟國之憂。竊寵拂經。戮我皇度。天啓聖聰。逆棄四庸。幸求良弼。授政元忠。惟此元忠。夙抱純一。叶望雲霓。更調琴瑟。滌腥以馨。極炎以濯。河流驟澄。烈焰隨掃。墨風既殄。百工共事。大法小廉。不懈于位。解彼倒懸。措之大厦。旅悅于途。農歌在野。亂絲繁如。伏莽咸厥。坐致牧宰。靡伐莽月。幽通靜屋。迭被海濱。不假置郵。德流片神。在昔楊令。素絲章軌。白麻始宣。風績貴修。亦有司馬。名聞遼海。朝駕鋒車。煩苛久改。倬彼往蹟。二代民瞻。我儀自今。實公是燕。唐風暫肅。咄咄而談。元佑不救。紹聖抗之。詎若公猷。力振頽綱。訂謀垂裕。歷世允臧。波靡逢迎。公挺其節。在遠不忘。天子之哲。俗工自營。公志勤民。選衆特舉。天子之仁。公生有為。惟天純祐。莫圖彌鞏。納世仁厚。公歸有時。眉壽惟期。典刑不作。永代遐思。南有靈原。崇封翼翼。豈碑勒銘。行道是式。

張四維撰 《條麓堂集》卷二五

特進光祿大夫柱國少師兼太子太師吏部尚書建極殿大學士贈太師謚文貞徐公墓誌銘

萬曆癸未。致仕少師。兼太子太師。吏部尚書。建極殿大學士。華亭徐公。以閏二月二十六日卒于家。計聞。上震悼。輟視朝一日。賜祭加等。爲十三壇。飭所司治葬事。贈太師。廕一子尚寶丞謚文貞。國朝輔弼臣。以文貞易名者。惟廬陵少師及公。而兩廬陵事。四朝殫忠竭節。功施甚偉。而公危身極慮于嘉隆之際。其所解紓調劑。難寔百之卒。以澄濁定傾。厚終正始。于法得稱。曰道德博聞。大憲克就。爛焉軼于廬陵。嗚呼休哉。公諱階。字子升。學者稱少湖先生。晚更號曰存齋。松江華亭人也。其先自河南來徙所居曰楓涇鄉。高祖德成。以行誼高里閭。曾祖賢配沈祖禮。配黃父黼。號思復公。爲宣平寧都兩丞。配顧生公。自曾祖以下。皆用公貴。贈如公官。配皆一品夫人。公生宣平官舍。少有貴徵。聰穎絕

異。稍長爲博士弟子。有聲。弱冠舉嘉靖壬午應天鄉試。癸未登進士第三人。及第。新都楊文忠公爲首揆。目公謂同列是少年者我輩人也。亡何乞假歸娶。明年北上。道奔思復公喪。服除。補職教內侍書。纂修大明會典。及祀儀成典。會永嘉張公議撤孔子像。下儒臣議。公疏言三不必五不可。詳在國史。及面折永嘉。以高皇不革孔子號爲證。忼慨辯難。永嘉不能屈。竟以忤旨出爲延平府推官。久之。遷黃州府同知。未至。擢浙江僉事。提調學校。又陞江西副使。仍提學。所至蒞官造士。治辦皆有名迹。己亥選東宮官屬。以公爲司經局洗馬。兼翰林侍讀。仍四品服俸。己丁太夫人憂。服除。召爲國子祭酒。陞禮部右侍郎。改吏部。榜壁自警曰。所不竭忠稱塞。而或植黨徇賄。背公持祿者。明神殛之。更折節交賓客。博諮吏治民隱。因以知其人。丁未。改兼翰林學士。教庶吉士。逾年。掌翰林院事。充會典副總裁。廷推公入內閣。不果。進禮部尚書。久

之加太子太保。上方注思典禮。多所釐正。禮官艱于仰察。公敏慎周洽。獨稱意指。莊敬太子冠暴薨。公議上及百官皆期服。上不懌。謂天子絕期不制服。而公竟以百官衰經臨。上覘知是之。命官中皆服衰。已召入直殿廡。公請立皇太子。先後五疏皆不報。二王冠。公偕諸大臣謁于臨保室。上使問公行坐禮。公曰。有上黼座在。坐俱面西。行則遵倫序。祖訓嚴。誰敢紊之。亡何。孝烈皇后崩。上慮千秋萬歲後。廷議所出。祔必先。孝潔后祔必。睿考欲身親臨定其儀。乃詔廷臣議升祔。公言女后無先入廟禮。宜祀之。奉先殿別室。上盛怒。趣公再議。公不得已。乃小婉其辭。以爲祔祔乃。聖子神孫事。臣子之心不敢煩。上親議耳。無已。則倣古廟數。遍加之意。益太廟奉先殿各一室。令仁宗緩祔。而。后先祔。宜可。上不許。竟祔。仁宗祔。孝烈公雖不獲堅守前說。然天下以公之議爲正。庚戌秋。虜大



入塞薄都城。畿輔振恐。公疏請。上還大內。面延見群臣。口畫便事。上難之。會有中涓陷虜。持虜求貢書聞。語甚驚。上宣問輔臣及公。公曰。虜勢張且深矣。不許將激之怒。許且逞而重要我。上曰。策安出。公曰。請遣譯至虜營。詰以無番文。故遷延少日。我備完而援兵日集。拒之可百全。且以視朝。請曰。中外心惴惴。一聞蹕聲。衆志定矣。上始首肯。公出而集廷議。謂求貢非虜款誠。宜勿許。旦日。上視朝。申飭諸警備。而復下公議。絕虜貢。督諸道軍并力逐虜。遁去。由是。上倚公安危。嚮意益親。會廷推吏部尚書。上不許。曰。階方直左右。何外遷也。而本兵錄薊帥獲謀功。上特手注公加少保。明年。命兼東閣大學士。參預機密。仍給禮部篆。候代者至而解。癸丑。主會試。得進士四百人。是時海內多故。北中虜東南結倭。山海之盜。蜩起。悍帥柄臣相表裏爲奸。公自以身受。上知益發紆任事。數言用兵方略。疏薦文武材堪督撫大帥

者十餘人。上輒用公策。其後以郤虜殲寇。樹功名者。皆出公薦。京營兵弱。上問公所以振之者。公請汰老稚。以美餉。厚給勇敢。而嚴不練之罰。賞罰明。兵乃可振。上從之。侯鸞怙寵。張甚。好大言罔。上多不讐。公乘間爲。上言。奪大將軍印。鸞自恨死。尋以計散其麾下兵。都城大安。楊忠愍繼盛論分宜奸狀。謂二王皆知之。分宜大恚。疑有交關者。將請竟之。公以危言譬止曰。事有如得。上所罪左右耳。獨奈何顯結宮邸怨。事遂寢。戊午。虜困大同。右衛督臣順與御史楷比。而內賄取自脫。吳給事時來劾司馬罷之。而逮順。楷順楷者。故分宜所卵翼。給事即論分宜素饜邊臣。賂爲旣本。而主事董君傳策。張君紳繼之。吳張皆公所取士。而董鄉人也。于是分宜意公密白。上窮治主使者。三君皆下詔獄。榜掠瀕死。卒以正對。幸解。分宜嘆公益甚。然力未有以傷之。上久而察公忠。故有所咨問于分宜者。皆舍而之。公由是中外窺上

意所注矣。後四年而鄒御史應龍論分宜父子、上怒、勒分宜致仕、下其子世蕃獄、論戍邊、命吏部擢御史五品京職、分宜在事久、善候伺、調巧左右多從中爲道地、上亦終憐之、意忽忽不樂、欲傳嗣治天下、諭公擬詔、公謝不敢、而部臣奏遷御史通政叅議、上不悅、御史危甚、謀于公、公曰、某在君無恐、上一日諭公、久直無以杜兒輩奸、蓋入間者言云、公對言、六博蹋鞠、飲酒狹邪、爲奸長安市中、不在外、弗杜、甘言啗、嚙相播弄、爲奸朝堂、以謂主上內猶外也。

上大悟、遂輟分宜直廬、賜公、公始爲政、書三語示警曰、以威福還主上、以政務還諸司、以用舍刑賞還公論、朝野翕然、延頸太平、而是時少湖水忽踊起、高八尺、輝然五色、人以爲公首揆之祥、始公以一品滿三載、進光祿大夫、柱國、兼太子太傅、武英殿大學士、滿六載、兼吏部尚書、以築外城工竣、加少傅、滿九載、進兼吏部尚書、賜宴禮部、尋以直贊勞、加兼太子太師、萬

壽宮成、加少傅、兼吏部尚書、俸滿十二載、辭部宴、賜勅褒諭、以萬壽節頒恩、進兼建極殿大學士、滿十五載、辭部宴、及上柱國、加特進、公嘗乞骸骨、上付同事輔臣擬留、公懇請、上裁乃親批答、有念在邦、民誠圖寧固之稱、薦紳交賀、以爲人主知公逾于公自知也、時閣臣惟公一人、上以公孤忠、足以辦不更命、公屢請而後允、公病、特出珍劑、賜手札勞苦、公感泣、不忍復言去、癸亥、虜穿墻于嶺塞、趨通州、公授策大司馬、備虜所欲掠、微其罷劇逐之、輦下晏如、明年、虜窺一片石、公請城張家灣、以一裨將駐守、自是虜不敢深入矣、上春秋高、雅不樂言繼嗣事、及景王之國、天序默定、而左右中構者輒以蜚語聞、上疑之、忽手詔公、欲屏居奉玄、議傳繼母、令久待、公大驚、倉卒對言不可、且盛稱皇子賢孝、萬無可疑、離間語不可聽、凡三問、三以其意對、幸卒調護、以開釋、上意安定、國本者、公力也、丙寅、河決徐沛、公薦大



司空治之、鑿新渠百餘里、河不能至、漕復通。公計國賦入、不能衡其出、乃會諸邊歲例、汰冗剔浮、定爲經制、邊臣不敢闕請。上欲有所興建、公常奏罷之。先是、分宜操權利自恣、大小選授、視賕入爲等、債帥墨吏、攘攷成風、選舉陵夷、從犴充斥、官職多耗廢不治。自公秉政、始倡廉節、懲貪冒、獎恬退、抑躁競、一洗苞苴干謁之習。而尤銳身扶植、公論、援引才望、公卿百執事各任其職、廩廩嚮至治焉。其以文字筆札贊上玄修甚謹。或諷公、公曰、君天也、安所逃之。且必得上意而後可、樹尺寸、即不難一去、誰與共天下者。會海主事瑞者、端言。上過失、亦頗刺譏。公、上震怒。公承間言、瑞不過沽一取諫名耳、殺之、遂成其名、容之適以昭聖度。上始取公疏、擊地徐而解、海君得無死。上久不豫、忽欲幸興都、中人大治裝、六軍且甲。公誓歿爭、具言。聖躬不耐遠涉、且京邑空虛、狡逆或竊發、事不可測。上讀至狡逆語而悟、竟不成行、逾

月、上晏駕、公率諸大臣詣裕邸奉迎嗣位。公默念、世皇神功聖德甚盛、顧獨晚節齟齬、土木不休、民蕭然煩費、而一時抗言諸臣坐廢、錮公論亦少湮鬱、欲于新詔中有所縱舍、不能無疑于改父乃悉以遺詔行之、而登極一詔、諸蠲濯宿蠹、翼贊新政尤偉。時朝講久廢、禮典叢沓、元臣舊德僅公在、動援章程應之、由然暇也。上新御講筵、以公知經筵事、重錄大典成、加支正一品俸、纂修世皇實錄、公爲總裁。時新鄭高公頗以舊學喜、自負嘗憾給事中胡應嘉劾已、欲因事中之、公不可、則并憾公而御史齊康者、阿新鄭不已、公亦乞罷。上固留公而聽新鄭去、乃解。南都振武營軍素驕悍、故事頒賞九邊、無及南都者、會得匿名牘有所要脇、公曰、往失刑、今更濫賞、如紀法何。遂勅所司陰部署爲備、而後下令解散、其黨帖帖無敢譁者。時言路驟開、人人爭爲骨鯁、多觸忌諱、上久而益厭、思懲艾之。公從容爲開說、乃已。

上欲修內教場，勅中人習騎射。公疏言：「上本深念邊防，欲示意衛，然邊方遠禁地近，聖躬重戎務輕。先帝欲舉而不果，良有深意，不可不三思也。」乃止。虜分道大入，東掠灤河，西殘汾石。上御講曰：「召公問戰守籌策。」公條對甚具。穆皇尚恭默，惟公嘗一奉玉音，其重公如此。一品再滿九載，加伯爵俸，賜宴禮部，公皆力辭。疏請冊建東宮，報許。公率群臣見。今上叩首以讀書進學請。睿答琅然中節。公出而舉手加額曰：「宗社萬年慶也，老臣歸死瞑矣。」公初擬詔旨，裁省進鮮，織作諸監局工作，阻止內監督團營，奪太和守備事權，與貂璫爭氣力，相聲牙。又諫幸南海子，不聽，遂稱病臥。上道中貴人持手詔趣公，公惶恐起視事，而給事中張齊以陰事覺，懼不免，則上書糾摘公以爲名。上爲謫齊外任，公遂力請骸骨，特允致仕，馳驛還。仍賜勅諭，遣行人護送，給月廩歲夫，以示優眷云。公歸，望顯顯益甚，部使者往往踏門請

質，而公亦自許以老臣憂國，語時事嘗不休息，謂不能遺世者。會新鄭再起，兼握銓柄，將斷齷公，小人希指爭進，于是召齊康復，張齊引繩批根，生平睚眦者，侵公日益急。公怡然無蹙容。新鄭去，事亦益白。人或問公前事，公笑曰：「老而善忘，忘之久矣。」壬午年八十，詔特遣使存問，賜蟒服金幣甚厚。使者入里門，公率諸子若孫盛衣冠迎道周，父老嗟嘆以爲曠見。公疏謝，上爲褒答。廕一子中書舍人。癸未元日地震，公晨起望闕拜，聞而訝之。月餘病，強起呼諸子授之一冊曰：「待吾逝而啟。」翌日遂卒。啟冊則經紀身後事咸備，而大者毋乞恩澤，毋作齋醮，歛毋以金玉繒綺，蓋前二歲手筆也。公神襟迥秀，清輝襲人，而內持養深堅，執義甚果。自爲諸生而聶貞襄公，豹令其邑，遂切磋理學。及登朝，與歐陽文莊公德、鄒文莊公守益、羅文恭公洪先、鄭端簡公曉及趙中丞時春、唐中丞順之輩推明王文成良知之學，相磨淬，益力于羣書，無不綜

貫而惟以資經濟。自本朝典章條格邊防阨塞度支盈縮刑名比詳遠方謹俗利盡耳濡手注強記精識長于論議與人言刃迎綏解愈叩而愈響應無窮者喜誘引後進當世知名士多出其門生平寡嗜欲無姬媵之侍文室蕭然布衾緼袍菜羹糲飯泊如也。性友悌惇讓田宅錄廬推分及其弟姪爲詩文不尚雕績誦詠一本之六經嘗手錄程純公語愛其得聖人精粹喜誦白香山詩蘇長公文以爲能寫性靈當事實所著有世徑堂集二十六卷及學則蒙訓諸書藏于家。公生弘治癸亥九月二十日卒年八十有一。距始及第週一甲子矣。母弟二季陟爲南京刑部侍郎。元配沈封孺人贈一品夫人。繼張封一品夫人。子三。長璠太常卿娶季氏沈夫人出次琨尚寶卿娶范氏次瑛尚寶少卿娶陸氏皆張夫人出。女一適太學生顧九錫孫男十八人。元春甲戌進士今爲南鴻臚卿。元普太學生。元暘恩生。元昭元暉元暉元曦元啟元暉元曜

肇耶皆璠出。元材元采元植元朴元樞皆琨出。元忠太學生元性皆瑛出。孫女九人已嫁者三。壻曰評事包漸林諸生陸堦禮部郎董嗣成曾孫男四曾孫女二。公墓在湖州長興縣嘉會區東山蓋公所自營壤詔即賜葬葬以萬曆甲申三月十九日。先是太常君兄弟以少司寇王先生狀來徵銘狀覈而備是足以傳于世矣。惡用銘然時行以鄉小子受知公從閣臣之後時時誦公所書三語雖不能至然心慕好之。爰最其大者銘而納諸墓銘曰。憲憲徐公命世偉人應運而興蔚爲鼎臣輔翼世皇契合魚水密幹天心力扶國紀厝危于安澄濁爲清百職咸序周道砥平爰佐穆考治象載闢化瑟更張煩苛盡滌德崇勳茂名立道尊何以臻茲學有本原淵邃能容虛明善應渙若風行屹如山定神明在御回轂在旁卻曲委蛇其施彌光外禦搶攘內紓勞結文條武營其聲烈烈弱冠登朝大耋攸躋履顯思冲受福提提天不憖遺帝



曰予憫節惠之稱。貪言惟允。難波少湖。精靈所鍾。公孕其英。傑然人龍。乘軸之旦。湖騰五色。龍見文明。其徵靡忒。潛輝戢潤。蜿蜒而休。世皇在天。公從之游。嘉惠之丘。公神安此。我銘幽宮。爲示無止。

申時行撰 《賜聞堂集》卷二三

明儒碑傳集卷六十一

尤時熙 羅洪先

河南西川尤先生誌銘

嗚呼。此河南西川尤先生之墓。先生嘗仕於朝。為戶部主事矣。而其鄉之人被服於先生之教最久。故其稱為西川先生。而不以其官。於其歿也。亦以此題其墓。此鄉人意也。予不識先生。而識其門人孟進士叔龍。聞先生之教最詳。先生歿而屬予銘其墓。此孟君意也。嗚呼。予銘先生。有不勝其悲者。自予居京師。得與四方之賢士為友。於山東得孟子成。而又得聞其師。所謂宏山張先生焉。於河南得孟叔龍。而又得聞先生。是予幸而得兩友。又得兩師也。前年宏山歿。予為表其墓。乃今先生又歿。而兩孟君一以憎去。一以憂歸。予悼夫老成之日以凋落也。良朋之日散而之四方也。嗚呼。予銘先生。能無悲哉。先生諱時熙。字季美。其先本吳人。高祖某始從軍隸河南衛。父錦贈戶部主事。母姜氏封太安人。其生母蓋王氏云。先生生而警敏不羣。稍長為諸生。輒有聲。弱冠舉于鄉。是為

嘉靖壬午。時王文成公傳習錄始出。士大夫泥於舊聞。競駭而排之。先生計偕入京師。一見輒有省。晝夜讀之不休。則嘆曰。道不在是邪。嚮吾役志於詞章。抑末矣。已而以疾稍從事養生家。則又嘆曰。文成公致良知之旨。所謂養生主者非歟。何以他為。自是深信而潛體之。毅然以聖學為己任。壬辰。授元氏學諭。甲午。丁外艱。服除。再諭章丘。其教兩邑士。一以文成宗旨委曲開導之。兩邑士始知有聖人之學。庚子。遷國子學正。時祭酒為華亭少師徐公。最重先生。每令他館師弟子咸取法焉。辛丑年四十。因念古人通明德立語。忽淚下。居常以不及師事文成為恨。且曰。學無師終不能有成。於是弟子禮見文成之門人晴川劉先生。師事之甚謹。劉先生以言事下詔獄。則書所疑。契時時送犴狴中。質辨不少輟。甲辰。遷戶部主事。權濬野稅。先是司權者務以苛歛溢歲額為能。甚且牟其羨以自肥。先生至。則一意便民。僅僅足常稅而止。纖介不以自污。所居滿然。亡異於學宮也。長洲令某負氣。與部使者抗。先生庶其人實賢者。初不與較。



儒藏

他日代權者至、問吳中令孰賢、先生首稱長洲。代者曰、此非抗君者耶。先生曰、吾儕論人惟其賢、豈當以細故雌黃其間耶。丁未年四十有六、以母老乞終養歸。歸三十餘年、日以脩德明道為事、足未嘗一涉公庭。所居環堵、諷詠自若。郡守或以官地遺之、謝不受。不妄與人交、然於後進有向學而來者、輒喜動眉宇、與之言終日不倦。其所問答、隨人深淺、而要歸於提撕其本心、令聞者各有所省。其大旨率祖文成而得於體驗者為多。蓋自一見傳習錄、寢讀寢入、寢入寢透。齋中設文成位、晨起必焚拜、來學者必令展讀、其尊信若此。迨其晚年、病世之學者崇虛見而忽躬行、甚且誤認不良之知、而越繩墨以自恣。先生嘆曰、孔門教人、必以孝弟為先、忠信為本、其慮深矣。故其論議必依乎中庸、切於日用、而不為玄虛隱怪之談。其善學文成而抹其末流之弊又若此。陝洛間士聞其風、擔簦笈而至者百數十人。士大夫道洛者、咸以一親顏色為快。嗚呼、河南自兩程子歿、寥寥數百年、其間策名砥行之士豈少乎、而知學者鮮矣。予輩聞河

水有曹先生、間嘗閱其書、論其世、蓋篤行君子也。視先生見大而識融、有往庭焉。叔龍謂先生二程之後一人、豈溢美乎哉。先生卒以萬曆庚辰九月二十七日、享年七十有八。卒之日、門人十數輩在側、相向哭、皆失聲、為之經紀其後事。塋以是年仲冬十有八日、墓在洛西澗之陽。配解氏、與子郡庠生洙皆先先生卒。孫三、居厚、居默、居朴。厚與默皆郡庠生、能世其學。先生所著有擬學小記、聖諭衍、諸門人方謀梓而行之。予又聞先生臨歿時、手自為誌、僅紀里氏歲月、不款為身後名。然則叔龍又何以銘為請哉。雖然、凡古之聖賢皆非有意於名、然而門弟子不可使其師泯沒而不傳、則叔龍之請為宜。予於是撫次其狀而為之銘。銘曰、瞻彼伊洛、其源洵清。真儒迭異、如流有源。孰開其源、卓彼二程。孰源其流、庶幾先生。先生之傳、文成是啓。仰讀俯思、無言不唯。匪唯以言、允蹈以身。出以範士、處以淑人。道尊而壽、有孫繩繩。吁嗟先生、生順歿寧。西川之濱、西澗之陽。以栖以藏、源遠流長。



明故左春坊左贊善兼翰林院修撰贈奉議大夫
光祿寺少卿謚文恭公蔣羅公洪先墓誌

銘

徐階

自陽明先生倡致良知之說學者始知舍聞見而求知於心然其傳之訛也語心體而遺工夫則日入於高虛而無益其又訛也舉舉夫不待學習者以爲良知而不復究愛親敬長之本指則以欲爲理以任情爲率性以戒慎恐懼爲戾於自然而去道日益以遠左春坊左贊善兼翰林院修撰念菴羅公有憂之數正色言曰近時傳良知之學語知矣而不必良語良知矣而不必能致往往聞用功語輒生訛訛其弊將多於晚宋支離之失又曰陽明先生良知之教本之孟子故嘗以入井怵惕孩提愛敬平旦好惡爲證然以三者皆其一端之發見而未卽復乎全體故言怵惕必以擴克繼之言好惡必以長養繼之言愛敬必以達之天下繼之孟子之意可見矣先生得孟子之意者也故亦不以良知爲足而以致知爲功公家居弟子四遠而至其爲教恒主易所謂寂然不動周子所謂無欲故靜者而申告之曰能靜寂然後見知體之良能收攝保聚然後能主靜而歸寂又曰儒者之

學在經世而以無欲爲本夫惟無欲然後用之經世知精而力鉅階昔未冠卽幸受業雙江胡公之門及舉進士與南野歐陽公爲同年益得相切磋於同學二公先生高第弟子也又後六年始獲識公公於時所交游盡一世名士而與予言獨相入未幾公請告予亦以論孔子祀典謫不相見者十年已乃同召爲官僚明年夏予迎先夫人憂歸其冬公及荆川唐公浚谷趙公論東宮朝儀罷爲民自是不復見以辛母憶與公討樹劇談宛然前日事未嘗不泫然而泣也公爲學尤務力行居父母喪終三年不入室先世所遺田宅盡以讓二弟其季辛哭之累月寢食爲失常與人處言語恂恂乃其中毅然不可動以利所居沒於水遠撫中丞馬公嚴公前後所却坊值謀改築辱竟不受少師分宜公既推轂荆川起家爲兵部主事遂以書致意於公公對以願畢志林壑荆川邀公會齊雲巖將強與偕出公辭曰天下事爲之非甲則乙某所欲爲而未能者得兄爲之卽比自效可也罷贊善歸足未嘗入城市繼開蓮花洞作正學堂讀書其間益與世削跡然同民所疾苦輒感顧思去之邑故多虛糧言於有司盡丈邑中田計畝而稅并頓絕

建同江水大倉去邑之虛丁二萬民以不困於時役。歲饑移書郡縣得粟數千石率士友賑給之。闕廢寇流入吉安提兵者不能制公爲請募守嚴而戮力寇遁去。嘗遊衡嶽解楚石欲投公外丹公謝曰吾道自足寧須此。友人有以保學招者作長書拒之。故公之初士大夫或疑其學近禪久乃知公真能主靜歸寂本無欲以措之經世卓然得致知之真傳也。公當世宗皇帝朝既屢爲時宰所擠沮今皇帝登極公論明矣乃公則已先卒。僅贈奉議大夫光祿寺少卿諡文恭而不及見諸用豈非斯世斯文之厄歟。公諱洪先字達夫金華其瓊服初豫章人三徙而居吉水曾祖良廣海衛經歷祖玉以子貴贈奉直大夫兵部員外郎考德舉進士仕至山東按察副使嘗抗逆理侃侃著風節娶李氏以弘治甲子十月十四日生公。公年十五卽下視舉子業得傳習錄手抄而讀之晝夜不置嘉靖己丑舉進士第一。

世宗批其文曰學正有見言謹而意必忠宜報之首者授翰林院修撰壬辰以病痊起充經筵展官。己亥召拜詹善充經筵講官。凡三立朝皆不踰歲而歸。甲子八月十五日卒於松原之新第年六十一。配

會氏生子世光吉水邑庠生能世其學。孫鳳舒良靜公卒之明年三月創室別氏生子曰爽光某年某月某日世光葬公赤石潭山之原介其姻文選曾君同亨暨公門人曾乾亨王選劉敬以公門人提學憲副胡君狀來徵銘予與公友三十年既不能及公之存焉起之則今誌其美傳諸無窮固予所不得辭也。公有文集若干卷吉水令王子壽子已銓梓邑齊而公嘗手書一冊與今提學侍御麻城周君大要以言說爲不濟事以落思想落存守爲不能隨用具足而以不存而存爲學之至公絕筆也。子且告周君刻而存之銘曰昔在洙泗以聖爲師於道之傳猶或失之別世之下學以口耳達道日遐理固宜爾。荷公奮起獨悟道真非矯以言實率以身傳佛詞章一時盡誦斯道復明厥惟公力公身雖隱公言則彰我銘揚之彌久弗亡。

念菴羅先生傳

先生姓羅氏諱洪先字達夫嘗讀書至克念作聖遂自號念菴居士其先豫章人曰志大者始徙居吉水之橙溪世爲吉水人志大嗣孫曰慶同同生良良生循附籍陝之白河登進士仕至山東按察司副使配李氏以弘治甲子十月十四日先生生誕日適副使公起復寓京復除工曹呂梁洪故名洪先云先生生而神穎殊絕身不踰中人方面秀眉脩髯皙膚吐音鏗然目無游睥自童端重不爲嬉弄八歲屬對語奇外祖李公驚曰此兒後當爲大丈夫九歲始就塾師三年授尚書竊讀古文遂喜爲古文辭慨然慕羅文毅倫之爲人方十五聞陽明王公講學虔臺心即嚮往遂卑視舉子業常歛目端坐同舍生或嘲譙之不爲動比傳習錄出先生奔假手必玩讀心經往往脫穎見篇章間同舍生益驚避之年十九始就試補邑庠弟子員嘉靖乙酉年二十二舉于鄉以憲副公偶疾遂輟會試師

事里中谷平李公學李公端嚴有守學以閑邪爲訓者戊子冬與計偕聞同郡黃洛村何善山二舉人曾受文成學者附其舟嚴事之時先生兢然動止不踰矩而二公言動如常衷疑之一日論學何君慨曰近世號名講學者究其衷微顛先人心耳先生憮然內省自是學求近裡日究文成致知旨已丑年二十五舉南宮廷試肅皇帝親閱奉御批學正有見言謹而意必忠宜擢之首者賜進士及第第一人時外舅曾公官大僕卿執初下喜趣告先生曰喜吾婿幹此大事也先生聆之面頰發赤徐對曰丈夫事業更有許大在此等三年過一人奚足爲大事也是日猶袖米偕何黃二公聯榻蕭寺中商學焉既授官翰林院脩撰常心忤二念憲副公不置踰年遂請告歸至儀真病幾殆留數月愈乃謁谷平公于浙邸訂舊學方病時有瓜州富人王紀者坐事爲同年項曉東按治乃飾名姝介萬金謁求解已之矣項聞之微以意嘗



先生先生辭益厲。項嘆服。遂定交爲深分。既歸。悔曰。紀所遺當扣而罪不當死。久之有同年饒比部錄刑江北。致書生之。已弗逮。爲之懷然。是後二年。先生侍憲副公于家。公訓飭不殊童穉。言動少錯。辭色必厲。客至今衣冠行酒拂席。授几。忻忻從事焉。明年壬辰。詔覈在告過期者。憲副公趣之入京。補原職。時南野歐陽公德文貞徐公階共事館中。先生每過從論學。歸輒綴記。久之遂載快矣。嗣充下經筵官。躬展御書。尋陪祀孔廟。聽講彝倫堂。俱錫宴。一夕忽夢別憲副公。伏地哭大慟。悲極而醒。淚零枕席。心掉不能出戶。日未晡而公訃音至。先生痛欲絕。奔歸至楊子江。舟人難之。先生曰。吾不得見父奚用身爲。疾驅抵家。即喪次。三年。啣哀不入室。蔬食水飲。葬祭以禮。携二弟常寓近里。玉虛觀。四方士友因而依歸者衆。或諷之謂居喪講學非且先生報書謂處此益竊倚廬意。且以病便靜攝。求免於辱。幾間側聆諸長者緒論。志在求益非

敢主會開講也。服既闋之二年。母李宜人病痺。先生廢寢食。烹藥供體。衣不解帶者數月。諸婦請代。宜人不可。許曰。出吾見躬親者。吾安之。居喪痛慕執禮。弔殷。一日玩內典。得返聞旨。覺此身在大虛。視聽若寄。世外友人覩其顏貌。驚服。先生忽自省曰。噫。是將入禪那矣。乃悔置前功。篤志聖學。正脉必繇濂溪。無欲旨。居常與同郡東郭鄒公及諸同志切劘無虛日。次年改葬憲副公李宜人于廬陵之盤龍山。已亥。推補宮寮。改左春坊贊善。赴召道南都。兩入城。晤同志。與王龍溪幾諸公質辨累日。大都主無欲旨。至維楊。趨泰州安豐場。訪心齋王公良。心齋時病不出。先生就榻傍語。述近悔恨。處求益。心齋不答。但論立大本。以爲能立此身。便能位天地。育萬物。諸病當自消云。且曰。此學是愚夫愚婦能知能行者。聖人不過欲人皆知。此旨行即是位育。把柄不知此。縱說真不過一節善耳。諭日再見。因論正己物正。此吾人歸宿處。凡見人惡。只是已



未盡善。已若盡善。自當轉易。以此見一身不小。一正百正。此之謂天下善。此之謂通天下之故。聖人脩已安百姓。而天下平。得此道者。孔子而已。先生聆此浚省。謂林東城。春日。日聞心齋言。未能盡。願論至此。却灑然有鼓舞處。語具冬遊記。時心齋作大成學歌以贈。先生感切。記末歌曰。父母生我身。師友成我仁。我身如不仁。形神皆非真。聞過乃易箴。愛言未書紳。誰知百年內。二義無疎親。詳記中。先生于時殷求友意。殆若無若虛矣。踰歲抵京。入春坊進講。與其友唐荆川。順趙浚谷時居相比。荆川每語先生之學。輒傾服。而浚谷生西北。未悉也。一日邀先生出遊。屬其內子謁魯夫人。關室中一無有。乃曰。羅君內外矚然。若此。錄是三公交好漫密。日相期許。以天下自任。中外咸稱異之。曰三翰林云。時儲位未定。漫聞有它異。先生乃與二公各上疏。以預定東宮朝儀為言。忤旨。謫為民。先生出京。與荆川各買小艇。聯袂角巾布袍。蕭然世外。

每暇共編圖史。學書。寓滬甌。既歸二年。庶弟請析居。先生盡推先世田宅。咸令主焉。乃于舍外別建一宅居。題云芸館。僅足避風雨者。仲弟病卒。哀楚累月。寢食失常。其友愛篤至如此。先生自歸田。削跡城市。辭受取與。咸裁以義。世局時格。秋毫靡徇。嘗曰。此吾當然。非祈免毀譽也。時郡中東廓南野。及雙江諸公咸家居。為會講學。衆常至數百千人。先生每與抑抑求麗澤。未嘗以言詞先人。然瞻其容止者。非僻為之潛消。一時薦紳逢掖。快觀景行。有不假言辭之末者。久之遊衡岳。為文盟告岳神。及白沙先生祠。語載集中。登山絕嶺。至會仙橋。過觀音岩。岩有僧楚石者。出迎。私曰。吾嘗受異僧外丹。誓非人無傳。今以授公。先生拒不受。丙午。送季弟如南雍。過毘陵。訪荆川。夜語契心。相對躍曰。庶幾千載一遇乎。遂達旦不寐。時先生與荆川皆以重名。為海內宗侯。所至聚望若仙。然荆川自以博達。不如先生雅。曰。念菴之學。平正云。今聞石蓮洞。

洞故虎穴。荆莽翳鬱，不知年矣。先生異之，遂加
撰剔，閱其中，容可百餘人，遠望類蓮花，故名。先
生自是多洞居。錢緒山洪德偕龍溪邀會如青原，
士友同聲至者百數十人。先生多告以去欲除
根云。訂約擇龍虎山中爲江浙會所。已酉秋，先
生遂預赴龍虎之僊岩，過冲玄觀，登愛山樓，意
甚悅之。遲諸君子未至，爲書壁歸。一日坐洞中，
有悟恍惚，大汗洒然自得。問者曰：「到此能無積
斷乎？」先生哂曰：「今固去了，又在也。」邑令王西石
請以先生聚講，無所葺，玄潭之雪浪閣，集士友
大會。西石自是亦津津嚮學云。庚戌，聞虜逼都
城，先生目不交睫者月餘，已而病作，幾不起。尋
愈，聞龍溪論良知當下具足，意遽入悟。先生
曰：「吾人注念天觀，孰無少覺，因言發慮，理亦昭
然，顧以利欲之盤固，血氣之浮揚，而欲從其心
之所發，任其意之所行，裁裂恣肆，至以存心爲
拘迫，以改過爲粘綴，以取善爲比擬，以盡倫爲
情緣，將使天下之人蕩然無歸，悍然不顧，斯爲

道病不淺。故平時提誨學者，多主周子無欲故
靜，易繁寂然不動語，以爲能靜寂，乃爲知體之
良能，收攝保聚，一切無染，乃爲主靜而歸寂云。
又答友書，畧曰：「陽明良知之教，本之孟子，故嘗
証以入井怵惕，蓋指乍見之時，未動納交要譽
惡聲而言。証以狹提愛敬，蓋指不學不慮，自知
自能而言。証以平旦好惡，蓋指日夜所息未及
反覆而言。然言怵惕矣，必以擴充繼之；言好惡
矣，必以長養繼之；言愛敬矣，必以達之天下繼
之。孟子之意，可見陽明公得孟子之意者也。故
亦不以良知爲足，而以致知爲功云。甲寅，邂逅
王龍溪于海天，遂同舟西歸。謂龍溪云：「往年見
談學者，皆謂知善知惡，即良知，依此行之，即致
知。予嘗從此用力，久而疑之。吾心之善，吾知之
；吾心之惡，吾知之，不可謂非知也。善惡交雜，豈
有爲主於中者乎？無所主而謂知本常明，恐未
可也。知有善，陽依此行之，而謂無乖戾於既發
之後，能順應於事物之來，恐未可也。」龍溪曰：「近

覺何如。先生曰：年來與前自別。蓋當時之爲收攝保聚偏矣。夫謂感由寂發可也。然不免求寂有處。謂寂在感先可也。然不免待感有時。蓋人心一而已。自其不出位而言謂之寂。位有常尊。非守內之謂也。自其常通微而言謂之感發。微而通非逐外之謂也。寂非守內故未可言處。感非逐外故未可言時。此近收攝保聚之功。君子知幾之學也。龍溪曰：今於感中寂得否？先生喜曰：切問也。豈曰能之？收攝保聚焉耳。雖然，其或免於適越而比轅乎？返舟會玄潭。龍溪再問。先生以工夫不撓心爲言。已而龍溪曰：何以贈我？先生曰：陽明先生之爲聖學無疑惜也。逮云未至究竟。是門下之責也。公等受煅煉最久。其得證問最明。今等已過矣。猶不能究竟此學。以求先生所未至。是非先生負諸人。乃是公等負先生也。前語具集中。夏遊記篇。曾以示荆川。唐公報書云：兄爲世說法。固不得不爾。若爲已性命。湏死心塌地靜求一番始得也。彼二氏以出

世住世爲証果。自難混帳。吾儒學在經世。亦湏無欲之極。乃能用之。智精而力鉅。世儒混帳此旨。旁落于釋老之徒矣。先生領之。故于二氏從侶未嘗盡絕。乙卯春。先生因偕龍溪遊楚。寓龔陂。溪山中。龍溪先返。先生獨留栖一樓。日夜跏坐半榻中。三月餘。自覺有省。咏夜坐詩十首。貽蔣道林書畧云：此心中虛無物。旁通無窮。無內外可指。動靜可分。上下四方。往古今來。渾然一片。而吾身乃其發竅。非形質所能限也。又曰：知吾心體之大。則回邪非僻。自無所容。得吾心體之存。則營欲卜度之私。自無所措。然此特自知。難以語諸人。先生到此。蓋雪然見大矣。尋病作。至九月返舍。而曾夫人卒先一句矣。踰年。水漂沒其居。假寓田家。泊然不以干意。先生自登第后。臺省爲建坊。咸力辭。則又餽坊值。先生悉却之。然有司仍帑藏積累數千金。撫臺鍾陽馬公知先生家故。屢又罹水災。檄理前金。賜之。業已入墨吏私囊久矣。先生思爲官屬累。致書馬



公以悉領爲辭事遂得廢。同志因醵金相助先生用排正學堂於洞南。戊午荆川邀會齊雲岩共訂出山。先生曰天下事得兄任之即某自效。奚必我出。荆川意乃寢。時分宜既推轂荆川公因致惠問以出處。嘗先生先生報書辭謝甚懇乃已。冬以病謝客屏居。先生自是語學者多言知止。因扁其室曰止止所。時嘿坐其中。荆川計至哭始下榻。先生初雖在榻間然四方書問未嘗不應。族戚交游之休戚與國事之然否聞知未嘗不致意。蓋豁然玄嘿而物無不綜。澹然無爲而自無不爲。由是益明儒佛幾微之辨。谷雙江公書駁其專主寂靜。又以佛氏之異吾儒其棄倫遺物之大者人未必入其誤。人易入者惟在幾微似是之間。乃著異端論三篇。明似是之非。龍溪復來訪信宿語別作松原志。嘗移書致親切至是復發其槩云。次年癸亥錢緒山以陽明年譜請校裁。既竣序之末曰善學者竭才爲上解悟次之聽言爲下。蓋有密證殊資嘿

特妙契而不知反躬自求實際以至不副夙期者多矣。學先生之學者視此何如是。歲先生年六十四方及門士相繼叩請日繁先生弗以病倦乃又於止止所後闢有斐亭。于時杜偉自吳江周采自安成劉孟雷自廬陵曾乾亨羅徵竹先生隣戚也咸先後稟學向往篤切及舊游諸君日聚襟亭中先生教先嘿識重躬行日以精神相益初至者誨令靜坐反觀俟稍有疑然後隨機引入。每日環坐先生相對嘿然時起立循關吟哦上下從容指撥一二語聞者莫不興起。甲子春夏集有斐亭者先后不絕。先生日三至終日忘言而精神流溢真意融溢歎其和者自不覺其入之深也。嘗曰凡與人解釋文義發揮道理此心甚是明白言說既畢此理無存如此只是說話與道無當。蓋落思想者不思即無落存守者不守即無。欲得此理炯然隨用具足不由思得不由存此中必有一寂生生更然不顯。又曰言此學常存亦得言此學無存亦得。嘗



存者非執着無存者非放縱不存而存此非可以倖至却從尋求中得來由人識取八月初子世光省試手書白沙一絕句走示之一日忽病脾至十三日曰明日行矣家長老入室問疾觀無長物曰甚矣貧也答曰窮固自好吾兒歸以是語之姪國光再請遺言曰已矣復何說中秋日門人託箠扶翼危坐正中歛手而逝年六十一于時雖山谷細民間之灑泣計開四方大夫士無不嗟悼曰天喪斯文合邑諸生請於臺司祠列學官之右其門人設主奉入玄潭閣下邑今因扁曰江陽書院在邑某山隆慶改元詔贈光祿少卿謚文恭于世光次奕光所著詩文分內外別三集統凡若干卷方先生之歸田也攻苦淡鍊寒暑躡馬轡考圖觀史其大者天文地理志儀禮典章漕餉邊防戰陣軍介之事下逮陰陽卜筮靡不精數至人才吏事國是民隱辨加詠詢曰苟當其職皆吾事也年至五十前後視時事日非始絕意仕宦然饑溺由已撻

市引舉之衷未嘗一日不繫也先是邑苦虛糧貽書上官力請方田里大滑飛言撼阻不爲動促郡邑竟成之邑人又爲父米輸將苦言之邑令建倉同江水次又邑籍營虛丁力言諸當路覈之減去一萬邑人咸稱便后同水鄉飢移書郡縣請賑爲之立法周密推之一邑民賴以不殍閩廣寇起流突吉地移書當路提兵臨擇而密書贊之一境以全時當擴戶籍戒其鄉分置區域按畝出稅擇士友公正者戶之俾人得自盡一時稱平當事者例薦特薦章罔虛歲天下士想望其出以上治平雖先皇重于起廢臺臣有耳被廷杖而言不已者今天子即位多召用耆碩天下士咸咨嗟嘆曰悲夫念菴先生胡不逮也門人胡正甫曰直更重悲焉蓋先生嘗言孟子后學者本末倒易宋儒繼出啓明濂溪明道倬乎尚矣晚宋儒者輟于理氣動靜之分漫衍贅復無以見聖人用意之微此孔氏之厄也陽明崛起揭格物致知旨此於明

物察倫數千載若出一語豈非孔孟正脉哉。顧今玩弄于知識馳騁于言說浮沉于老釋真能實致其良知氣質之不美者益恣益遠其極至于妨人病物疑阻天下嚮往之心斯又陽明一厄也。天啓我先生孝友通神明忠誠堅金石潔白寒分霜凝重峻山岳蓋自少然也。比長聞學邁往仔肩退乎恭默遜以入也。確乎躬行日以履也。湛乎應感之常寂而非虛也。炯乎先幾之常復而非念也。兢乎嚴細行之矜而非小也。屬乎盡人物天地之性而非大也。浩乎環蹠于四方而非動也。寥乎兀坐于木榻而非靜也。至于一切知見言說以達老釋似是之非威不得參蓋自其生平用志不分竭力凝道疑乎達天德入聖域矣。方今天下尊慕師表奉其片言爲耿衷蓋致知之訓先生與人同至其不言而人莫不悟不動而人莫不從俾天下皎然知末學之非而堯舜孔孟之緒必在于是則自先生而定易繫曰苟非其人道不虛行又曰默而

成之不言而信存乎德行先生以之顧年才六十一耳一旦已矣未見其止直所爲重悲也。楚黃耿生曰近世逢掖士疇不艷慕大魁爲世千萬人一人哉惟我 昭代粵自洪武辛亥高皇策士伊昉通三歲得一人焉綜之掄此選者到今計百有奇彼銷滅無聞者何衆也此亡論即由此荐躋崇極秉鈞樹庸者亦可十數指數先生立朝秩未及滿靡所表建窮約終其身矣然賢士大夫心嚮往之未敢軒彼而輕此者蓋齊景千駟不齒餓夫夷吾一匡取羞童子自昔校品然矣斯猶易明也惟先生之學其見諸所至世多能及之容有尚焉者乃衛道翊教者卒歟傾心于彼而推宗先生者居多此何以哉嘻其幾微矣斯未可與庸識聞見者道也。

明儒碑傳集卷六十二

余胤緒 周怡 尹臺

歸有光 周士淹

大理寺卿余公胤緒傳

胡直

余胤緒，廬城人。登嘉靖丙戌進士，授南京戶部主事。監戶策浦口諸倉，會計允當。大司徒雅重焉。戊子秋，同考應天鄉試，秉公得名士，銓部嘉其錄文，即請吏部稽勲主事。歷陞考功郎中。承行六年考察之典，且留意人才，考註臧否，黜陟甚明，不奉要重，以不題互糾劾，例補管九年。開建書舍，聚徒訓講，甘處清泊，絕跡公門。屢經輔臣、臺諫交薦。庚子夏，吏部題補，不應。互糾新例，正是將遵成憲，起補南考功郎中。考察執法，甲辰春，陞南通政司參議。因母病，足三疏告歸，以養。親俱未得允。乙巳母痊，始赴任。七月入覲，事竣，領給命封親。迨母捐養，執喪中禮，朝夕奠饌，解冠裳以盡父。雖暑從吉而哀未少忘也。後兩臺交薦，庚戌春，補南通政原職。是夏，陞南太僕少卿。至冬，轉北。時北虜入寇，既退，上將大興六師，捷伐之，所急在馬。留心牧養，得廐馬數萬以濟。辛亥春，陞南太僕卿。冬，陞南大理卿。明啟刑書，夙夜詳審，務使適中。凡廷

獄有疑，與條來相議，必執法求生。雖狄部都臺或不欲，而其辨益明。民自以爲不冤。壬子秋，又輸入賀，事竣，轉大理寺卿。會足病偶發，謝恩之辰，進御道趨馳不及，因乞間住得歸，感恩泣下。家居惟樂清虛，訓導與子而已。自壬子至乙丑，十有四年。年高德邁，聞人望隆，屢經公卿臺諫交薦二十餘疏。迨上用人圖治之典，將行，而遽以疾卒。是爲嘉靖乙丑九月十六日也。

（國朝獻徵錄）卷六八



提督四夷館太常寺少卿訥谿周公墓表

明興士大夫之學謹規矩守格套以爲道在是矣而或滯於事爲形器之末有陽明先生者出一剖其藩籬倡良知以覺天下世之從事其說者欣欣然足矣而或墮於空虛無着之歸自是兩家角立同異紛然彼曰汝拘此曰汝放如方圓之齟齬也然陽明之學特謂知行之無二耳專事空談而無復踐履則末流失之矣有能不滯於事爲形器不墮於空虛無着祛一偏之弊以坐臻乎道德之實則豪傑其人哉若余所見訥谿周公是已公之學以大同爲旨以誠一爲功以爲乾坤與人號曰三才同也由我而之人人我同也由人而之物洪纖靈蠢一切天地間無弗同者其有弗同者不誠故也誠則一惡得不同不誠則二惡得同苟能致其誠一以歸于同則天地萬物各得其所而位育之功成矣公蓋嘗以是語余而余竊之以自潤者也公名怡字順之號都峯改訥谿寧國之太平人少果敢有氣節常以溝壑不忘自勵在邑庠大爲督學章介菴公鑒賞文譽鬱然一日見傳習錄曰此聖學也慨然有求道之志聞鄉東廓先生倡道南都徒步往從之聽其言論喜曰不然枉此生矣甲

午中鄉選遊南雍時山陰王龍溪在職方公復師事之一時交友皆海內名士非其人則不妄交大司成倫公深加器重戊戌登第授順德府推官大書皋陶祥刑以自矢以明恕爲本而以公正折之高明不畏笑獨必伸民大悅服鄰郡爭求質成監司交薦

天子聞其治狀徵拜吏科給事中屢劾群臣不職最後將論柄臣告其母劉太恭人太恭人慰勉之因南還癸卯夏公遂抗論大臣不和狀幾數千言其所指不和者相鑒嵩冢宰譴總督翟鵬趙廷瑞總兵張鳳周尚文也而其意則專責相嵩且曰嵩威靈氣焰凌逼百司中外之臣不畏

陛下而惟知畏嵩言甚剴切嵩多結中黨爲援肅皇帝震怒摘其疏中日事禱祀語謂爲訕謗廷捷之送鎮撫司監公創甚先是楊御史劾劉貞外郎魁亦以言事繫獄二人者曲爲調治得不死公因禁踰二年艱苦備至卒莫敢有救解者己巳秋上信箕仙言釋三公

上欲爲箕仙築壇熊太宰上言箕仙妖妄上怒熊太宰罷爲民因復逮繫三公公再就繫又三年丁未冬

上修醮事、三殿灾、

上大悟、手勅釋爵等。時漏下三鼓矣。公旦日謝恩就道。嗚呼、箕仙非正也。其釋三公、人方幸其天啓。然太宰之言正也。而竟不虞三公之復逮。然使三公之釋不出於箕仙、而出於

聖衷、尤可尚已。公歸、值劉太恭人病篤、家人驚喜。太恭人曰、此朝廷再生洪恩也。汝不可以忘報。公復得侍湯藥十三日、視舍視殮、以終大事。吁、嗟其孝心所感哉。公為人守直不阿、方在枕塊時、有巡按御史投刺欲見、公曰、某公之來不弔我、我不可以喪禮見客。候之良久、卒不出。公家居久之、

穆宗登極、召用。未幾、陞太常寺少卿。上疏言五事、觸中貴人忤旨。調山東僉事、陞南監司業。二任雖不久、然盡心職業、講學益勤、聲望逾重。已巳夏、復太常少卿、提督四夷館。既上道、疾作、不克赴任。以十月十七日卒于家。卒之前一日、猶置酒饌、命子弟歌詩和之。遺命戒其子身後勿求入鄉賢祠、又貽其弟遂安令恪書、勉以供職、精神意氣如常。不少亂。公平時萬物一體之學、最爲得力。於事無所厭、於人無所不容。其待公卿大夫與樵夫牧豎、只此一心。一言既出、則

終不改易。人之接之者、就之如春風、信之如元龜、不覺其心醉而神融也。嘗念楊劉二公同在患難、而二公出獄已先朝露。乃往泰和弔劉公、往富平弔楊公。因遍歷名山川、及諸名公、懇求印證、充然其有得也。其於賢人善士、中心好之、效法之如不及。若唐荆川、羅念菴二先生、則尤其所嘆服者。邇公之始終、未嘗不講學、而不脫畧於片言細行之微、未嘗不力行、而直通徹於高明光大之表。其以忠諫顯名於世、偶任一職、不得不然、非公之心也。乃公之心、則欲君臣一德、天下同風。世有良臣、而無忠臣。太和元氣、盡然在宇宙間而已。噫嘻、此爲得公之心否也。公弟恪子可貴、以余素交厚于公、乞表其墓。余爲著其大畧、以示世之學者、使知有正學不偏如公者、則紛紛爭辯、庶幾其有瘳乎。於是乎表。

萬士和撰（履菴文集）卷九

提督四夷館太常寺少卿前南京國子司業訥谿

周公怡墓志銘

姜寶

公諱怡、字順之、號都峯、後改號訥谿。世爲宣州太平人。高祖端慶、祖德夫、祖全、皆不仕。父本秀、號西隱。西隱公初以公考推官滿、贈如公官。繼因穆皇帝登



儒藏

明儒碑傳集

卷六二

極覃恩以公南太常少卿貴加贈中憲大夫母劉封太孺人又加贈太恭人公少遊邑庠中嘉靖甲午鄉試登戊戌進士初授推官司理順德以治行第一人徵選吏科給事中言事忤旨杖闕下仍建繫錦衣衛詔獄時嘉靖癸卯六月二十七日也歷甲辰乙巳凡三年上用箕降神之言乃與前此言事同建繫侍御富平楊公訥員外郎泰和劉公魁並得釋未幾月而上爲箕神造臺太宰熊公浹極言不可然忘其請釋三公也上於是怒罷熊公爲民而復建三公焉歷丙午丁未凡兩年而內殿火上親於火光中聞半空有神語令釋三公於是三公者竟釋云公雖猶得送母劉太孺人終自是家居凡十九年歲丁卯肅皇帝賓天遺詔還公吏科尋轉太常少卿未及任改而北既任太常也又以言事忤旨外補山東按察僉事戊辰轉南京國子監司業已巳復轉太常少卿提督四夷館事未及行而疾作度不可行也托友人操江都御史吳公時來上疏以請疏爲少師石鹿李公所力阻不果上竟卒於家時隆慶二年十月十七日也公自諸生時即能有異獲不避溝壑不忘之志郡倅古冲李公督學介菴章公大司成白山倫

公方舉業相知已奇公器識非尋常矣及爲順德司理書臬陶祥刑之戒時自親省旁郡邑皆以神明稱其署府篆也適章聖太后國喪肅皇帝南巡省視陵寢之日駕往來境上諸供應取諸倉卒公一以身應之無不立辦也既而梓官從舟南行嘗有協辦於他郡時則守既至視事矣卒未能辦公代爲辦其事亦無不井井於是撫按其地者皆存公卓異本天曹授公吏科猶以資望當擢銓司適南畿員數克溢不獲留爲恨居掖垣朞月而封事凡八九上如請巡撫論不肖不及方面文臣論郡守不及見任舉令丞自矛盾舉境內人才濫及貪邪爲失體謂計部本兵及司空三大臣皆不職宜亟罷謂文選考功二司宜得人而久其任謂贈謚子奪失當出相皆謂旨爲專恣而欺罔元旦日食昧爽前不及三分免收諫也謂少虧不如無虧收護可免修省不可無種種皆確論最後大臣不和使人黨比言官罷謫太敵在前而文武構害皆非國之福爲三可懼輔臣竊威福吏部輕黜陟督撫辱將官而將官懷小忿誤大事爲四當戒蓋指相鑒當家宰贊總督瞞鵬趙廷瑞總兵張鳳周尚文而意專在嵩謂嵩氣靈氣焰陵轢百司中



外不畏 陛下而惟畏嵩、尤人所不敢言。嵩故多中黨激。上怒，摘疏中日事，禱祀語爲誦，謗於是被廷杖。前後繫詔獄四五年，志愈壯。既起廢官，奉常猶覬陳五事以仰答。新天子之知遇，一曰定君志，二曰畏天命，三曰敬大臣，四曰擇左右，五曰勤朝政。時近習用事之人以方導。上宴進公所，言妨已也，引亦遂忤旨，謫外矣。公既名高海內，且自中朝清貴出，宜薄外僚，不屑事事也。然在山東最肯留心職業，暇則與僚友義河李公幼滋、嶺東鄒公善時講授，湖南聞者興起。蓋東郡因公在此，庶幾還鄉魯之風焉。其司業南雍也，真能以身爲師。而寶適承之祭酒，深愧標稅在前，故自予以及大館師生，無不著祭事公者。後轉奉常，當去，爭欲請留，而不能，人以比唐陽公。然又謂陽公稍似激，而公德器渾全，實過之。蓋公學聖賢之學，非但節槩過人，如陽公而已也。嘗過公，公爲淵源所自，其蚤歲師事東廓鄒公、龍谿王公，以二公皆陽明先生高弟，弟子欲因以窺先生之蘊奧，而得其傳。既於傳習等錄皆口誦而身體之，然而公之心未已也。於是又旁求曲取，上自宰執，下至山林布衣，遠而數千里外，近在鄉井間，凡有道望可印證學術

者，每往來辨難，要歸於一是，而不喜爲高而無實之談。故惟公之學，能會知行於一條，非窳言者比也。性其孝，居西嚮，公之喪，及葬而廬於墓，能盡哀以復古禮。奉母劉太孺人尤善，夙願始論事必跪，而得請乃可。獄中以書寄慰，皆曲盡人子之情。與二弟忤，俗居垂老，猶不忍分爨。念族疏恐離散，置祭田以展墓而合食。斛山、晴川二公卒，數千里吊哭於其家。時輩但已者，顧其人才可用，猶薦之當道，無幾徵芥蒂於胸中。比垂歿，口授子弟遺囑，猶謂生平以計爲真，忤忤甚多，戒子弟勿干有司，祠鄉賢，真所謂得正而焉者歟。公生弘治乙丑十二月，年六十有四，所奏疏若干卷，集若干卷，並梓行。

（國朝獻徵錄卷七）

宗伯尹洞山先生墓傳

胡直

洞山先生尹氏，諱壘，字崇基，吉永新人也。其取號以居左有石山空洞，故咸稱洞山先生云。母劉太淑人，夢神人饌美味白粲，始有妊。大父夢神登中堂而生，五歲受小學，誦至立身行道，揚名于後世，語作而指曰：至言也。聞者異之。甫就侍父少宰公，某司訓吳縣，業已慕故相王文恪，尚書劉鐵柯二公，心自負。東髮

又隨往潛。嘉靖元年公卒于潛。哭幾不生。居喪如禮。以孝聞。戊子舉鄉書。明年入南雍。名震白門。乙未登第。肅皇帝御覽子大夫列十二卷者。命與一甲並梓行世。改庶吉士。讀中秘書。故相顧文康。張文忠二公。屢簡先生文。與內江趙公更相雄稱。二雋云。費文憲公再秉國。高先生名欲致見。竟不可。武定侯郭勛怙寵驕恣。先生屢弗下之。勛忿。欲中以它事。文康爲力解。諷令造謝。亦竟不可。丁酉授編脩。乙亥奉命往諭楚諸侯王。未入境。先檄長史司罷一切饋餉。及覲先生儀節。迄不敢言饋事。使竣登衡嶽。窺金簡。上疏融慨然思禹功而詠歌之。追尋朱張軼步。割俸建二賢祠。辛丑充會試同考試官。癸卯請乞終養。三年劉太淑人卽世。又哭幾不生。旣喪事。猶粥食。大宰鄒大司成兩文莊。宮贊羅文恭。數勸勿減性。始肉。戊申除舊官。乙酉同修大明會典。庚戌復充會試同考試官。策問及重臣權臣。上覽。亟取臣鑒錄。賢姦傳省覽。爲之感動。繇是稔先生名。一時上下有延頸相天下之望。而不相能者。進讒輔臣嚴嵩曰。權臣蓋指公也。嵩陽答以好言。而中心怨次骨矣。國子缺司業。序得遷。會趙公新起復。彙裝轡。先生旣分俸助。又訟於

嵩曰。趙寔甚。司業有衙舍馬皂。願先趙。嵩笑曰。是當成君之美。未幾趙坐封事謫。先生以春坊中允管國子司業。督六館生。首在端習。所獎拔多爲名士。辛亥以舊官兼翰林修撰。回坊專理誥勅。先生曰。是所謂代天言也。故其言務古雅。不爲偶麗。咸寧侯仇鸞執柄兵。請互市。陰實俾虜欲以款之。鸞知先生言。遣執政所入朝。裂眦而視。弗顧也。明年承命主南京鄉試。策陳祖宗馭將制兵甚備。先生謂同事郭公鑒曰。有如上怒逮君。奈何。郭曰。卽有是。固所願也。先生壯之。進卮酒。會鸞先伏逆誅。錄入。上覽。摘策中數事密問嵩。嵩方欲求婚好。因善爲對。乃令庶臣世蕃介劉某置酒。躡席致求婚語。先生竟確辭之。以是怨日深。癸丑冬。陞右春坊右諭德。兼翰林院侍講。管坊事。明年陞南祭酒。嵩舉卮酒曰。何以別不殺。先生從容請曰。楊繼盛狂言自取死。第願相公勿貽。主上有殺諫臣名。嵩避席謝。先生退。爲司業王公材述其事。因屬之。王曰。頃有王生世貞者亦云。王果謂嵩以請。嵩諾而曰。昨尹司成嘗及此。而私心猶豫。未肯決謀。諸駟憐卿。郵持不可。楊竟論死。乃海內稍知王抹楊。竟莫知出先生也。甲寅。過家。見邑士五科弗舉。會文廟



火乃相邑西廢署徙之。捐百金費厥成。自是登名天府者橋起。是年。殲舟玄澤。期鄉文莊羅文恭三公及郡搢紳士。無遠近咸集。盡聽所學。諸士喜曰。得先生斯學。其益昌乎。流任首華典簿。屬宿憲太學。諸生欣欣向往。連改北道三宰。時鄉士胡生直為句容學諭。挈而登焉。決日慨然語曰。吾嘗以新學墮言說。鮮躬行。邇歸。頗有觸於鄉里。二公且見諸士中操節履歷不欺。則又喜曰。學在吾郡。因重相勗。過京口。又期武進歸安兩唐公。再訂學。抵京。獨與宗伯歐陽文莊公講磨無虛日。已卯。上諭嵩遠忠謹文臣二人供奉內直。意在先生。嵩乃以少宰子公某及先生名進。改少詹事。兼侍讀學士。掌院事。召見。上於簾內指曰。前行者狀元。後者學士也。二月。特傳御劄。令侍郎尹某代拜祭孔子。脩臣以金花纓帶一與一賀曰。上念公深。故特晉侍郎秩。吏禮二部惟執擇。先生曰。上不以其無狀。得與陪末議。當出廷推。若傳奉非敢承命。嵩謂沽名。揭覆仍以少詹事銜行祭。初。莊皇在東宮時。康妃服未畢。生元子。上弗懌。乃諭嵩曰。禮官得無言乎。嵩陽為盡無所之。而訊諸朝士。朝士皆莫敢對。先生一人獨曰。曷不舉孝慈錄序中。不禁民

間服內生子語乎。嵩用其言以對。上釋。及莊皇即位。首問先生。左右莫言。或諷先生自陳。白先生曰。吾為國大體慮也。豈計此哉。丙辰。上命同閣臣餘姚李公主會試。事錄復序有士平居自養。始進自擇之語。時上方修玄。每疑羣臣心謀。以為不經。乃諭嵩曰。尹臺言自養自擇。豈以朕為此不經之務乎。又諸臣撰青詞。多習為玄教語。而先生止言玄德。或逮青宮字。皆拂上意。而嵩得以行間。會禮部右侍郎缺。同寮有欲擠先生以進者。用趙文華謀賂歷臣。構蜚語誣先生。忽旨從中出。指謫先生曰。某受朕簡任。問安于曹光。着罷直供本職。曹光者。乃上所怒侍御史名也。詹事府缺。先生應推補。又有鄧懋卿戚者賄得之。鄧故傳嵩慰語。先生戲之曰。君為都御史。乃為相門傳語客耶。亡何。陞南吏部右侍郎。明年丁巳。京察。與太宰王公黜陟。惟允大司馬譚公。少宗伯殷公。方面朱君。薛君為郎。時以與嵩有卻。部欲罷之。有附嵩者。部欲庇之。先生皆持不可。善類獲賴以全。會次當祝萬壽節。既至。上降溫旨。賜銀綺。復念舊直之勞。出內帑緋羅衣一襲。銀十五兩賜焉。嵩迎上意。故欲留北。乃竟復南。乙未。三年滿。詣闕。進階通議大

夫贈父祖如其官。詔舉選才。先生首以王公邦瑞、曹公邦輔、胡公松應薦。後皆起爲名臣。癸亥。陞南禮部尚書。故事。教坊司供應公曹長及臺省諸司。先生以非典裁之。是時新政府與先生及趙公皆吟昔同志相翼已而以事與二公異議。點者搆蜚語間之。丙寅秋。先生將以南尚書三年赴考。御史王某乘風遂誣奏沮其行。奉旨爲民。然有識者知爲讒中。相與悔曰。清朝乃有是耶。而言者亦竟以是取誦。今上元年。詔起原任。不允所辭。介行與親族決曰。吾感主上知遇。出卽還耳。未暮再疏乞骸骨。遂歸。先是嘗割腴田三百畝入社備賑。復歸乃別建鳳西書院。又割田四百畝給來學。蓋先生早極崇信紫陽。建泰和羅文莊公。獨至中年。因有瘡於大學知本之旨。浸與鄉羅二公譖合。晚年益以明學術爲首務。讀書至老不倦。爲文槩主六經。而體裁一半西京。蓋自廷對已然。詩歌儕建安天寶間無辨。四方誦文者充戶。所著詩文及永新志凡若干卷。暇則偕田畯野老談笑。或乘笋輿。棹小艇。夷猶江畔。觀者不知故上卿也。已卯秋。感疾。既革。無情容。晨興。拂髮。瞑目而薨。年七十有四。胡直曰。吉郡昔紫甲第。盛勛節。乃若儒學。則與自正

嘉問。蓋陣偉無前矣。于時有予邑羅歐兩文莊。安成鄒文莊。吉水羅文恭。永豐華貞襄。永新則有大宗伯淵山先生。相與上下。羽翼洙泗。人謂吉郡後伊洛而盛。豈不信哉。直最晚出。恒終以文字謁先生。教例屢焉。及丙辰乃出門下。方文場啓彌封。時先生目雖瞶。佇說有直名。則爲忻躍。揖謝房考者曰。得士得士。蓋先生爲國悻才。推轂海內士。爲世名卿者不鮮。苦尹秉衡劉顯。武士中錚錚者耳。先生亟爲引重。不遺餘力。曰。世所需也。先生豈私樹人哉。伯子參軍某。又與直子締構。因屬狀先生行事。不敢狀之。又懼文恭不足傳。乃著其大者爲傳。視狀不能十之二三。猶擬之耳。

歸震川先生墓表

歸熙甫卒八年矣。余序其文。同年王子敬熙甫門人報書曰。先生墓有宿草。銘屬許相國。表屬吾子。及讀行狀。斯亦桓君山之于楊子雲哉。按歸爲吳著姓。明興。大父始令城武。祖天峰公。好養生。家言。父岫雲公。竟老諸生。以先生貴。贈文林郎。周孺人生先生。虹光滿家。故名有光云。先生穎悟絕人。八九歲時。爲文有聲。倚馬立就。研究經史。尤好司馬子長。得其神氣。不爲摹畫。嘉靖乙酉。督學廬公試第一。南充都御史王公廷守蘇。奇之。丙申。貢入太學。庚子。茶陵張文毅公典試。奇先生文。國士遇焉。先生嘗夢出處同吳原博。人以文定公高第望先生。屢試不第。張公入相。先生耻私謁。庚戌。張公典試。語先君子曰。子幸第。吾以首卷爲歸子。柰何不第耶。乙丑。先生年六十九。上春官。余文敏公奇先生文。大學士高公嘆曰。張公數十年難得者。得于一旦。徐文貞公薦館職。先生以限年不與試。選長興知

縣。長興湖州巨邑。先生寬和爲治。曹卓子康傳于座右。每聽斷。呼兒童婦人與之。吳語務得其情。片言解去。有盜依湖山者。先生計擒之。奔逸者不追。空王寺捕盜者拷掠。使誣人爲盜。先生釋七人。有重囚母死求塋者。先生許之。感泣如期至。時令清軍清寺田。先生曰。勾一軍而擾百姓。僧道力田服役與民等耳。悉停止之。又議革糧長用里甲。先生調停。大豪規避與攝令者。媒孽其短。先生幾危。轉順德府通判。乞休。不報。高公移書曰。長興漢代之良也。主爵者何處以此耶。順德職掌馬政。移文諸縣。先生掃蓬戶讀書。蕭然忘老。太僕寺檄脩志。高公與趙文肅公擢南京太僕寺寺丞。薦掌制勅脩。世宗實錄。先生言。閣中有人。間未見書。欲盡讀而長往矣。先生嗜書如饑渴之飲食也。寒暑之裘葛也。家四壁立。不問生產。爲文根本六經。鼓鑄百家。絕翰墨畦徑。必傳無疑。經術之外。如御倭馬政水利。三途竝用。諸議鑿鑿可行。天性孝友。聞少失母。



者感泣。每悲岫雲公不見登第。嫁弟妹子孤貧者二人。脩世譜。合族內外親黨。施從其厚。古稱經明行脩之士。與所著六經。莊子。史記。標註。先秦文錄。兩漢詔令。諸書。藏于家。生卒世系。詳志中。子祐。子寧。博雅善讀。父書。先生與余莫逾江閣山房諸篇。及邢州詩覽之。汝然。陳子曰。余讀歸太僕草。張公易詮制詞。謂其文而毅。乃太僕處不干時仕。不徇俗。毅然哉。文章與張公如大河同出崑崙。播九河而入海。衣鉢傳焉。先君子謂張公雖在相位。未究其用。况太僕乎。論士不以成敗論其大耳。過太僕墓者式焉。

陳文燭撰 二西園續集卷一九

周孺亭墓誌銘 解有光

昔孔子修明六經。及與門人問答論語之說。無非教人全其性命之理。以治其君臣父子兄弟夫婦朋友之際。是其所以為道也。孔子既沒。天下為道術者。雜出。學者馳騁以趨世主之所好。孟子修其說以明於世。顧其流益浸淫而不可止。自人生服食器用。以至於經綸天下之業。無一出於道。蓋歷千有餘年。世與道離而為二。宋之君子始以明道為已任。以至於今。其後出者相望。然非有名位不足以為倡。既有名位倡。非獨其志義為信之士從而和之。雖所謂榮祿之士。慕高名者。亦紛紛焉求入而附之矣。至要之於其久倡者。既沒。和者隨息。所謂慕高名者。漸然盡矣。唯獨其志義為信之士。久而不變也。若余友孺亭。豈非其人哉。莊渠魏先生於正德嘉靖之間。以明道為已任。是時海內慕從不少。後二十餘年。能自名其師者。幾於無人。孺亭篤信之如一日。不幸不用於世。世亦不知其人。其所以飭躬勵行。修其孝友。



忠信於家至於沒身而已者此所以為先生之徒者也。孺亨姓周氏諱士淹字孺亨世為太倉人父諱廣南京刑部右侍郎其上祖考皆隱不仕以刑部追封如其官。孺亨嘉靖十六年舉於鄉試禮部輒不第初刑部公為御史上書武宗忤倭倖再貶竹寨驛丞孺亨年十三隨居沅湘間已奮志於學三年還適先生退居星溪之上遂從之游日端拱不妄發一語或謂刑部公宜飭其子勿為道學公曰天下大重任令兒自負荷君何以云云先生之學始得之餘于胡敬齋大要以主靜為功務合冲和蓄極而發嘗謂上天之載無聲無臭惟潛龍為近之而與同時講道者論終不相合是時天下尤尊陽明雖荆溪唐應德始事先生後復向王氏學惟孺亨稱其師道終不變余少為先生家婿獲聞緒言顧迷謬無所付而先生晚年屬望之意特惓惓焉先生之沒余獨於孺亨心師之嘗實以所見其不合者十二三後暨定先生遺書孺亨之指發為多嘉靖四十一年與孺亨復同

計偕北上行過徐沛至胡陵孺亨為墓祭愴然有顧形無儔之歎孺亨竟不及家而卒是歲三月三日也年五十有九其弟士洵以其明年九月九日墓尉遲村刑部公之墓夫人毛氏先卒孺亨請余為銘未及墓及是以毛夫人附夫人無子以弟士洵之子邦模為嗣銘曰道之窮也世莫以庸匪窮於其躬其又奚惆

《明文海》卷四四二

明儒碑傳集卷六十三

周子恭 彭湘 唐順之 陸樹聲

陳言 張之象

明故湖廣鄆陽府同知七泉周君墓志銘

聖人之道雖至近學者苟非忘已而無累於外不可以造其微而質弗美志弗切不能學也。蓋切矣其時力不足亦無以幾動忍增益之功故學可精而不可期道可求而不可能此朝聞所以難而聖人之不數見也。始余與七泉周君師谷平李先生先生之言統括包并涉蹊徑以俟人之契悟。君處二三子中獨以為名節不立不可以範俗也於是取所聞以自重其身。又數年出而友四方之士增其所未高則又以為議論不一不可以決趨也於是持所見以自居其學已而為郡政譽大起則又以為內外不達不可以適時也於是據所行以自信其心其於為郡也亦何異於天下視天下事若無不可為者閩閩乎將出而小試而身病矣數月謂余曰吾今乃欲根未能除靜機未

嘗入也吾幾不免罔生。嗚呼今之才能如君者幾何人即有之固不能自致於道即嚮道稍信所行必不能一旦自見其短以為悔恨使不即死得踐言必且屢變以求其是不止於此也明矣然竟死也豈非大可悲哉。或人因君卒咸疑聖道至大會弗若一行易完也解之曰僅僅食力者細民也如為朱顧必收效速而失算多固孔門取狂遺意也此正可以觀君。君姓周名子恭字欽之幼有異質觸目而心解聞言而機生能超忽於衆之所難而脫落於人之所執喜於用奇而恥於持下為文酷似其人有司駭之竟不第然名駸駸滿江右以增廣生舉嘉靖辛卯歲貢第一歲貢故不以增廣生實自君始。明年卒業太學後連試有司又不第。辛丑授湖廣永州府通判至官廉儉逾儒生嘗奉父戒巷公母黃氏孺人行肉食或不繼即行縣蔬食莅事。事已嘿坐或走學宮說諸生經義其他行罷建措一就已意大率在慈惠省約人稱為周佛子。署居江華主治盜賊多瘳君數

數往久之得羣盜出沒道路與攻守之宜躬躡屨入猛洞撫諭康道堅等康感泣聽命嘗以策干當道當道信之卒殲九嶷郡盜魁鄭大義等數百人道州蔣居鄉哨守疎速增靖邊營戍將屯兵調發有紀楚大饑臺省遣糴萬金君執不可比再至移通郡在官之食以應分授其直纔六十金上不逆令下不病農人服其敏檢柳州庫藏上議易陳化滯可省歲費又治僧訟當沒貲請市田增祀濂溪食其裔孫之貧者君之行於郡多此類也居五年當道上治狀越次擢德安府同知治如永州歲餘以戒菴喪歸當道廉之給喪費免喪至京師公卿以下聞其來爭相引重欲留內例不可補鄆陽府同知未上丁黃孺人憂禪而病明年癸丑二月八日卒于家距生正德丙寅十月二十五日年纔四十有八君既廉儉賻而後能喪以是年十二月二十一日祔六十二都鵠鵠龍圖山黃孺人墓右娶上官氏達相女有婦德二子東鈞東忠皆縣諸生一女適谷平先生次孫還一孫豫

當師先生時余多病自分且天視君目瑩而骨竦謂且必壽嘗戲屬君銘安知君竟先於余君銘友人墓曰我今銘君我自悲後之銘我其誰與又安知後之銘予者以何言也嗚呼銘曰
二人于旅為期千里一人載塗車敗馬瘠困不復起
一人超超行且莫止於于歎歎匪命也歟寄斯道者終何如

明倫彙編 家範典 卷一五

明雷達彭先生墓誌銘

聖人之道溥博淵涵大者明其傳開來學次者遵其行深已教履其流風餘韻亦使頑懦者有所興發云安成自諸君子以理學倡人材輩出其形神灑灑獨得其趣則共推雪蓬彭公余初知公以余友其子開語余曰公昔為邑諸生有聲已從鄒文莊公學遂謝青衫然碑實搜奇書秘籍不惜重價售之家藏自密軒以下幾充棟所著有華秀族譜郡志考本朝人物表庶幾博雅君子

哉。而大理慎所傳公語余曰：君自幼即能卻父私索，四十妻喪不更娶，姪國子生柏溪卒，以地塋之，護其孤不遺餘力，其孝友類若此者。通余讀中丞三泉周公所為公記甚悉，則謂公行不隨俗，還不近名，似知公最深，非人所易窺也。余於公不能無疑焉。坐小蓬對名山，似忘世矣，而好閑除日，自謂汲汲否泰之際，又非荷蓍傳也。禮仁賢慕高躅，似親賢矣，而避匿異若蛇蝎，又與泛愛者殊科也。臨終操牘別故人，謄謄講院，似乎達矣，然生平所獨造者不一語以傳，又何秘也。公之行吾不得而名，公常自稱曰小徐，諸之，應曰大徐，孺子小徐彭子，識者謂公善於自況。夷考其行，亦頗相類，余終不得而定公焉。因諸君子委余銘公，余取公姪孫九亮狀而銘之。公諱湘，字元宗，行十二，系出華秀彭氏，為邑著姓。生正德丁卯六月初二，沒丁亥二月念六，享年八十二。子二：長采，娶三舍劉氏，繼上城劉氏，次榮，娶朱二尹東樵女，繼太守王公方南孫女。女一，適學博劉君全峯男習誠。孫男二：徵曾。

娶儒官劉峰山女。角昂，聘二尹張肖柏女。孫女一，適太學生王材齡。曾孫女二，將以吉期，附塋石坪墓形。邑先輩三吾劉先生性中和而行潔，與公相類，後其遺公沒後，余赴復真會，王先生塘南朱先生一卷，王北都徵所，鄒太史四山咸咨嗟悼公之亡，此可以概公之素矣。銘曰：聖門修身尚高潔，降及後世滕口說。偉哉彭公誠跡絕，如彼冥鴻難屬絕。山麓紫兮水澄徹，千秋藏之此人節。勒余文兮名難滅，可遠望兮不可泯。

羅元標撰（顧學集）卷六上

荆川唐都御史傳

李開先

武進之有唐氏，遷徙爰自淮南，振起始於伯誠。伯誠以子貴封評事。評事子復由進士歷陞知府，有政蹟載在一統志。知府子衍，又以子貴封給事中。衍子名貴，號會可，第進士會試第三名，仕爲戶科給事中，以清謹長厚歿，而祀於鄉。貴子瑄，字國秀，因父母俱亡，晚號有懷，以鄉舉授知州，遷員外郎，郎中，官止永州府知府。要宜興任嚴女，生子順之，字應德，號荆川。幼而父母教之，弱冠師長成之，而友朋助之。讀書不成，書字不端，而父即捷之。或外嬉晚歸，或內言使氣，母必厲色曰：汝尚有童心乎？將爲宕子乎？唐子由是勵勵書寫得其父心，出入得其母心矣。業師乃包廬業林，而憲友則方山薛應旂也。經義本其祖傳，而舉業可繼王文恪。戊子鄉試第六名，己丑會試第一名，廷試二甲第一名，御批其策條論精詳，海內傳以爲榮。會試卷見者以爲前後無比，氣平理明而氣附乎理，意深辭雅而意包乎辭。學者無長幼遠近，悉宗其體，如圓不能加於規，方不能加於矩矣。選庶吉士，一二大臣不相能，遂卽罷之。主者猶以二甲前三名制策

曾經御覽，欲各授以檢討。唐子力請同罷，一事而有雲開非體，始進卽能恬退如此。試政吏部，遷除兵部主事。未久，因病告歸。繼丁母憂，母隨父之任信陽，路出天津，卒於舟中。後唐子每對人痛哭曰：吾母相夫三十年，不及享其封，教子二十年，不得食其報，其病也，方藥委諸塗人而不暇擇其良，其卒也，棺斂辦諸水次而不克盡其心。人生有涯，此恨無涯。呂涇野聞而解之曰：吳自季札言游之後，雖世有聞人，然皆未有能並其盛者。君篤學好古，卽能升札游之堂，以光顯其母，不爲優乎？後王遵嚴序其集，亦以此爲說。或謂曹之聊，抑偶合之聊，其請銘於涇野也，值雨雪連綿，泥途凍淖，自僦與僕，力或稍却，則徒步行來，不惟見其孝心，且知不藉官勢矣。服闋，改補吏部考功司主事。不隨衆作傲態，而接人得大體。掌管二考科查，考給由，吏人簿籍，各編字號，豈但易爲力，而且難作弊也。往時翰林皆由進士上，甲與庶吉士兩途，聖上以爲此不足以盡人，遂更其制，選取十一人，成自科道部屬入焉，而唐子則由吏部。十一人者，陳東尤醇厚，入則陪侍講筵，出則校讐東觀，暇則酒歡宴，或窮日夜不休。素愛崆峒詩文，篇篇成誦，且一一



儒藏

效之。及遇王遵嚴告以自有正法妙意，何必雄豪亢
硬也。唐子已有特變之機，聞此如決江河，沛然莫之
能禦矣。故來已以後之作，別是一機軸，有高出今人
者，有可比古人者，未嘗不多遵嚴之功也。居官高節
榮，厲廉隅，兼且議論英發，人雖有忌之者，然而頗服
其才，稱其公，不至不能容。其羅峯張國老，雖會試舉
主，惡其不相親近，有慶賀事，遠投拜簡，躍馬徑過其
門。因其上疏養病，則票一旨意云：唐順之方改史職，
又見技對訓錄，乃輒告病，着以原職致仕去，不許起
用。報出，士夫駭之，而唐子曾無愠色。父在浙，延閣有
事，不知其何事，及得致仕消息，喜謂所知曰：此有甚
事，原以秀才得官，今還其官矣，固無損於秀才也。議
者以羅峯險毒，而唐子高亢，後羅峯有悔心，家居日
嘗言，倘蒙宜召，務薦用之，了此一事，仍復還山。嗣是
為相者，寧復有此意哉。唐子既抵墟里，羅大柴門，依
依桑梓，謝卻業緣，便有終焉之計矣。詩文更進一格，
以其侍從慶成朝堂雍容之作，而為村樵漁父歌詠，
太平之詞。又以其暇日精究天文，而問數學於顧若
溪，久之，乃有獨得處。以古曆惟大衍為精，被附一行
藏御金針，世徒傳其驚為諸耳。郭守敬別有一法，曰

孫天國弄。孤矢有橫立赤黃白道變轉，最為活法，三
道之晦零可齊，而氣朔之差可定。知曆理又知曆數，
此其異於衛生。知生數又知活數，此又其異於曆官
者也。所著孤矢論，勾股測望論，乃千古不傳之秘，而
曆家作曆之本也。嘗至廬州，時蔡克廉以府同署印，
將約之同遊境內山川，蔡辭以有筭糧事相妨。唐子
乃討善筭者十餘人，人各與一數，筭訖，記其槩，只數
字，凡三四易，自撥盤珠，每一數亦只記數字，不移時，
而一府錢糧數目清矣。老書筭咸驚嘆，天下未有若
是其神速者也。往費一月之力，工食紙筆催辦騷擾，
臨時猶有不得真數者。至於擊劍騎射之法，無不各
臻其妙。從之遊者甚多，雖談說應舉藝文，未嘗不本
之身心道德。經學雖主宋儒，然猶參之漢注。如十二
經疏者，無不究覽，而三禮春秋尤所留心。著有春秋
論，禮則以王鄭之說不可偏棄，會起廢業，補東宮員
缺十餘人，而唐子不與焉。東井左鑑言之內閣，失唐
殊不愜衆望。已而內旨不允，再推，因而及之，得為右
春坊右司諫。其實乃予言之東井，而東井言之內閣
也。至京則向所交遊者多半凋散，世所指八才子者，
獨少二人，仍相與繹舊業，正新知，與諸友俱有益。而



其戒子不當著恭止子不出黜銀及稱子履疏的確
迄今何可忘也。俸薄而用不足官閑而樂有餘不但
辭受不輕雖一拜往返之細亦斟酌可否而後行之
名既高而心愈下年漸長而操更嚴同羅念庵趙汝
谷上封章請朝東宮因以激上之怒以爲意在刺
朕閣臣又有身首異處不足償責揭帖事勢似不可
測矣子爲之多方求教如崔京山等不遺餘力因召
見言及之。聖心本無他章留二十餘日始批下俱
奪職爲民再還鄉而窮愈甚父子兩宦多年止增田
百畝人窮返本所謂霜降水涸天根乃見也用是參
透世情節忍嗜欲以培養性源久之此心凝靜百物
皆通今人未免苦窮未免粘帶未免牽引苦窮則靡
所不爲粘帶之根固於中牽引之勢播於外處則躁
熱仕則貪婪無一可者矣嘗欲得一民一社自效其
能而竟未之遂閑居每以民隱爲憂其論均徭不欲
舉行新法十年一役雖極重百姓無不甘心一年一
役雖極輕百姓無不怨自蓋零碎苦楚難受也以至
大戶之詭寄官戶之濫免其說甚悉而尤長於計算
糧數厘處災傷主計者之蠲災率十裁而爲七牧民
者之上災率七溢而爲十水旱不可不存恤而免運

又不可減免於是有輕齊之法以米折銀民止須一
石之輸而國不失一石之入蓋此法於不可減免之
中而寓可以通融之意不必制其正賦之盈縮而但
制其腳價之有無不必裁之以豐凶之歛散而但裁
之以本折之低昂一無損於國而有利於民武進一
邑歲該備運五萬四千有奇此入於國之正額本色
正耗水腳平米七萬九千有奇折色銀九千有奇此
費於民之羨數漕運百萬石有輕齊四十萬以待四
方之水旱來告者江南米賤而京貴若取銀江南而
散拾北軍則南無遠輸之費而北無賤糶之困矣此
甚有益地方因詳書之性好遊好靜常避人居宜興
陽羨山中有得於心靜居亦遊也遊亦靜居也過岳
亭遇盜竄身於江生平不善浮水然得不死亦奇怪
甚矣通歷諸名山其在武夷則爲與遊巖撰乃翁行
狀非浪遊也嘗言人用之不敢以隱不用不敢以求
其爲兵部主事也子以書讓之曰此一起官頗紛物
議固非其時托非其人若能了得一兩事急急歸山
心跡庶可少白於天下不然將舉平日所守而盡喪
之矣唐子得書不以爲忤第言行止非人所能聽其
自至而已兩次復書終是婉讓其意必以爲年且長

矣。不際此一出，後恐無時。又佛肸欲往之意也。豈知其終是不可哉。已而山主事歷陞職方司郎中。朝議以爲鎮邊垣，東自石門塞，西至鎮邊城，延袤二千餘里。又京都陵寢關係非輕，鎮兵缺少，欲行招募，選補分區設將，操練禦防，題奏允行久矣。每遇防秋，輒稱兵寡且弱，多調邊軍康貴、司農告急，議將降勅，遣一都尉前去經理。行令總督王忬督同鎮巡等官歐陽安、馬珮、責成總副恭遊守備提調把總等官，揀選精銳，分別奇正，一切方略，詳細具奏定奪。衆以唐子圖心邊務，堪以差委，遂領勅書關防，星馳至地方，會同山海關巡關御史王漸從、石塘嶺起、東至古北口、塔子嶺、馬關谷，又東過滦河，至於太平寨、燕河營而止。凡爲區者七。又會同居唐關巡關御史蕭九峯，從黃化鎮起，西至居庸關鎮邊城，而凡爲區者三。總兩關十區之兵，原額九萬三千八百九十五名，見在五萬九千六十二名，逃亡三萬四千七百六十二名。此外更有天津河間等衛春秋兩班官軍二萬二千二百八十二員名。又有大水谷、白羊口、曹家寨遊兵九千名。夫兵之缺額，其故易見，兵之不練，其實難尋。救弊之策，補兵獨易，而練兵則難。專倚邊兵，不練土兵，城

有如聖諭者。十年來，請在練兵不在增兵者，惟有總督楊博一疏而已。漢光武以滎陽失騎定天下，唐之藩鎮專兵而盧龍一道常虎視河北，古所謂其人慷慨勇悍而沉鷁者也。今乃瑣懷縹緲，靡靡然有暮氣之頽情，而無朝氣之精神。就而問之，設卒行戈，十常七八。力士徒馬，十纔二三。其於五陣分合之變，五兵長短之殊，不復講習久矣。老弱未汰，紀律又疎，守猶不足，戰何以堪。其間仇壯可用者，淮洛關塞，夜不收千餘人，及三屯、建昌兩營、古北、燕河兩區，巡撫標下民兵，射手數百人，前在畿服之內，百餘年來，止有熟夷小警。至庚戌以後，北虜諸酋合謀入寇，其禍始烈矣。於是條爲九事上之。定區陣以分練，明賞罰以勵士，雜邊兵以同技，而選鋒夫練火器，則九事中之尤緊要者也。而通水運，便轉輸，亦因時言及之。奏入，多見施行。浙江舟山地方久被倭奴殘孽，負險盤據，咎在人玩兵疲，不曾大振兵威，協力督勦。雖節彼當事諸臣殫蕩，但方屏息於此，旋復弛焉於彼，禍本已深，急難撲滅。况又水陸兵將不肯同心，文武廉察亦無決志，海防地利設險未周，歲久日多，人情滋玩。兼以民窮財匱，供億維艱，本兵題請，宜特差部官一員



連去經畧、以爲安攘之圖。查有本部郎中唐某、生長江南、久知夷性、且又素曉兵機。近查閱前州兵馬、兩關振餉、卽收堵截大虜之功。相應復遣、仍給勅前去浙直等處、會同督撫等官、督責大小將領、并兵備有司、遵奉嚴旨、先將舟山見屯餘孽、設策削平。中間有兵將司府、仍前怠慢、不共濟時艱者、卽行參奏、以憑處治。及將緊關海防處所、或選士檢才、或增兵易將、羣策羣力、並集兼收。凡百戰守機宜、周詳具奏、以備上裁。未久、卽陞右通政、同尚書胡宗憲經畫兵務。已又陞僉都御史、巡撫、仍管前事。未及來歲、春汛之防、預爲經久可行之計。其所條諸事、似尤精切。禦海、洋而固海、听、圖海外而別人才、定軍制而足軍需、復舊規而鼓軍氣。至於早定廟謨、則其說愈是、而其見獨長。二十年前並無倭患、今忽有之、須求其故。古云、兵久則變生、近日吳淞、定海之間、水卒呼糧、扶官、縛吏、則民變之漸矣。蘇人素怯、今亦燒官寺、劫獄囚、闕然一逞、則兵變之漸矣。況恐倭孽、自爲倭者、可勝計耶。惟願六小臣工、早上其議、仰求祖宗以來招懷撫諭之由、背叛殺絕之路、如何可以永斷其路、如何可以潛消其萌、苟可以利國、不必爲序家顧慮。

苟可以便今、不必以成說拘牽。是在聖明從中獨斷、毅然行之。不然、則雖百戰百勝、猶不勝也。況未必勝耶。至其分別來船、去船功次、則更爲確論。水中首級、一槩以十五兩行賞、不知打來船之難、十倍於打去船也。去船殺人劫財、已滿其欲、殺一賊止是一賊。若殺來賊一人、却全活數命。若題破得來船、其倭首級者、雖不同之陸地、首級三十兩、重增銀五七兩、則爭打來船者衆、而賊之登岸者少矣。其奉使集中所言多奇謀偉畫、未得盡展、而天遽奪之速矣。嘉靖庚申四月一日、以盛脹舊疾卒於揚州。距生正德丁卯十月五日、至是年五十四。拒山田項嘗恐其不過四十、相士有謂其四十六且歿者、以其數則過矣、以其德而宜壽則未也。本以天性剛方、而又同學克養、使壽至耄耋、事業寧止於此。有問其爲文者、則應以始草泰漢、繼好宋唐、必須完養神、所以深其本源、浸涵經傳、以博其旨趣。獨存本質、盡洗鉛華、透徹光明、委曲詳盡。雖從筆紙寫成、卻自胸中流出、如說家常話、而作家庭書、所謂見理明而用功深者、乃始得之也。有問其爲學者、則應以必先不爲習氣纏繞、不使欲障起滅、好是懿德、好仁無尚、真消息也。終日如愚、終

日忘食、實功用也已。將舊時伎倆見解一切抹殺、清
明中稍見標影、原是靈明混成者、以爲有物則何思
何慮、不觀不聞、以爲無物則參前倚衡、瞻前忽後、三
代人才皆從心性上磨煉、故其參贊經綸之業、不出
戶庭而得之。後世反躬自得之學不傳、而攻辭雜禪
之徒紛出矣。唐子以此爲文爲學、宜乎有用於世而
亦有名於世云。嗚乎、人徒知唐子之進道匪懈、不知
由其父教之而後有以成其學也。知唐子之遁世無
聞、不知由其父安之而後有以樂其天也。知唐子之
應用無窮、不知由其父作之而後有以善其政也。非
是父不能生是子、非是子不能承是父。唐氏世貴、其
永昌矣。子一鶴、歟、庠生、能讀書肖其父。所著荆川集
十二卷、所輯名賢策論及左編等數百卷、俱行於世。
同時數子惟唐子爲大中丞、稍得行其志、殲有論祭
葬。子自見朋之喪、文行進寸退尺、而唐子今爲枉尺
直尋矣。鶴以行狀求洪芳洲、以墓志求趙大洲、傳則
羅念庵、而表則子。子以少洲之意、亦惟作傳其三、文
俱未之見、而念庵近亦作古人矣。子當又爲之一傳
也。

【國朝獻徵錄】卷六三

資政大夫太子少保禮部尚書兼翰林院學士
贈太子太保謚文定平泉先生陸公樹聲墓

誌銘

于慎行

蓋觀乎鉅公名鄉、其功信烈、章謨猷畢效於國者、間
或不能不自挫其身名、而急流勇退、抗志塵寰、往往
乏鴻漸之儀、懷石隱之介、國家不得藉其楷模、士類
不得想其風采、雖身名俱永、而體用亦未全也。乃若
保合太和、含貞履方、迴淵倚爲砥柱、平世師爲儀刑、
元老完人、聲實並泰、則肅皇以來、惟陸公一人而已。
陸公諱樹聲、字與吉、學者稱平泉先生、松江華亭人
也。自三國爲吳大姓、世有聞人、而系不可詳。高曾以
下、乃皆以隱德稱。祖贈尚書梅莊公蘭、配贈夫人林
氏。考贈尚書志梅公鶴、配贈夫人沈氏。皆以公貴。而
志梅公鞠於母家、嘗蒙其姓爲林、公仕而復爲陸也。
志梅公三子、其仲爲公、季卽中丞公樹德。公之生也、
沈夫人夢初日投懷、紅光炯炯、固心知其非凡。而家
世業農、又貧無所佐讀、則強之服田、與傭雜作。私常
帶經而鋤、及覓楮爲文。一日泣請志梅公、願從里師
受經。師試以義、避席驚賞。時方簡肅公爲令、見而奇
之、補邑諸生。自是輒試第一。居則授徒里中、間取挺



脯以佐甘。邑令周以鏤金則謝不受。嘉靖庚子。張文毅公典爾畿試。拔公第五。明年辛丑。舉會試第一。廷對二甲第四。選庶吉士。壬寅歸省。三載始北上。故事。南宮第一人被選。必授館職。而分宜與其胄子銜公落落。見無加禮。欲以它官抑之。先進有欲得公一言以爲地者。公爲不省。分宜詎於講論。竟授編修。一日同館謁壽分宜。皆更緋衣而入。公獨青袍鶴立。其間分宜則目攝之。然不深訝也。肅皇帝祠竹宮。儒臣統進青詞。公獨無所預。執政間以嘗公。遂謝不應。而日與同舍高文端公。昆陵荆川唐公。同郡中江莫公。諸人以同學志行相切劘。大爲清議所歸。吳門袁安節公時爲給事。特疏品第詞林。首以守正推公。即分宜亦亟稱安得門戶。寡交如林與吉者。庚戌廷試。充掌卷官。知鼎魁陰有所屬。故混其卷。分宜亟司不能得。聲色俱厲。公不爲動。壬子。請急還里。中途奔太公喪。服闋久之不出。丁巳。卽家拜南京國子監司業。同志諸公馳書勸駕。勉一就職。未幾。卽請告歸。關通園宴處。若將老焉。辛酉。起左春坊左諭德。掌兩院篆。旋召回坊。不赴。乙丑。進太常卿。管南京國子監祭酒事。立教務持大體。畧去煩苛。先本質而後藝文。著汲

古叢語及條訓十二以示諸生。南雍斷斷至今。罕爲功令。其年秋。進吏部右侍郎。引疾不就。穆廟卽位。特旨起原官。又妻疏辭。已已。再起原官。兼翰林院學士。掌詹事府。教習庶吉士。赴召抵淮。復請告返。時同年高新鄭公在政府。公弟中丞居省中。新鄭遇事不如意。輒語中丞曰。吾甚愧平泉。趙文肅公至。謂中丞舉朝僕公。正欲主上新政。一見風采。知先朝培養有此偉人耳。其爲名流推重如此。王中陪推內閣。卽家拜禮部尚書。兼學士。疏辭不允。時今上初嗣服。公以碩德清節。首膺簡召。中外動色相賀。公亦感激。上恩不忍終辭。乃以是冬請闕。時江陵當國。喜得引公爲重。及見公。相對湛然。意無所長。則大失望。公之莅部。率正條屬。引經誼以裁典禮。操持凜凜。無敢干以私。虜酋邀增歲幣。樞臣將許之。公以職力爭。不可。樞臣竟不能奪。嘗以公事謁江陵。適冢宰先謁出。入見客坐甚偏。江陵亟引正之。公乃就坐。同列或諷公以相君尊重。宜少委蛇。公默不應。蓋已浩然有歸志矣。而會明年甲戌當會試。江陵營諸子入。設欲援公正人以塞物議。公微知之。請去益決。疏上空。溫旨勉留。遣中使問資及門。江陵復托中丞挽公。微示將有別命。

公咲曰：一史官去國二十年始一出山，豈爲樹桃李希揆席耶？疏凡五上，乃得賜告乘傳歸。瀕行，疏陳十事，皆關大計，而辨官府抑戚倖，斥貂璫尤觸時忌。江陵益大噉，頃之就公邸訣，公踰床見之，抗手謝曰：病甚，負公推轂，奈何？翌日出都，傾城祖送，皆謝不見，相與望塵嘆美，以爲長安道上數十年所未有也。先是，江陵謝公，公卽去，誰爲代者？公舉宜興萬文恭及閩林文恪，萬爲公友，文恪則公丁未禮闈所舉士也。兩公皆世所稱端人，然皆與江陵有忤，而江陵徒心重公，竟用文恭以代。公歸而江陵貽書，猶以不究用公，恐後世不能無咎於執政以爲恨。江陵既敗，臺諫奏詔舉海內耆德三十七人，以公爲首，自是薦剡無虛歲，而公高臥彌堅，終無世念。會中丞亦解節歸，白首怡怡易子而教，時相鵠出郭，遂勝命觴，僊僊如也。中丞歿而公摧泣輟食，曰：吾乃失一良友。戊子，公年八十，詔撫按官奉彩幣羊酒及門存問，已復加太子少保，歲給廩米與夫。公丑，公子大行，考成進士，嘗館試，手書勅其母趨捷徑，毋驅權門，澹泊寧靜，守吾家四字箴，乃吾子也。是秋大行，以使歸省，遂請終養。戊戌，公年九十，詔遣中書祭君大履存問，公跨馬郊迎。詔

鄉紳請議捐賑，事關學政士風，必正色昌言，多所匡扶。獎借寒賤後生，不啻口出。邵守李公以廉平得民，而坐爲郎被察去，郡民閭門乞留，監司目爲倡亂，輒捕以兵。公以大義折之，監司愧其言，乃解兵去。郡以輯寧部使長吏干施過謁，時以幅巾出，見出亦無所報謝。曰：老臣以不任朝謁罷，安能僕僕趨公府乎？對賓客子弟談說忠孝名理，朝家典故及微時耕耘事，娓娓不休。踰九十後，漸寡酬答，惟敘客調息，神觀澄穆，殆天游也。所遺山田數頃，居廬僅庇子孫。其書傳世者有陸學士雜著，善俗毗議，鄉會公約，陸氏家訓及詩文若干卷。公生正德己巳二月初七日，卒萬曆乙巳七月九日，得壽九十有七。元配封孺人，贈夫人李氏，某人女也。公爲諸生，養於其家，與公食貧幾四十年，又能推慈逮下，蕃公之胤。丁卯先卒，子男三長，未名殤，次彥章，卽大行君，俱顧孺人出。顧孺人者，太公以公艱嗣，告諸廟而納者也。庚子先卒。次彥卿，殤陳出。又嘗繼族子彥興，國子生。銘曰：天篤皇祐，保艾名世。夢日公生，墜星公逝。道總羣流，學本六經。文明以止，敵藻帝庭。守虛抱冲，裊躬如砥。如淵斯凝，然斯峙。粵有負嶠，其視耽耽。獨立不懼，莫公敢餒。考潤



壬寅、皇太子立、詔遣儀部郎劉君憲寵存問、跨馬郊迎如昔。觀者夾道相指目、以爲真天人也。大臣三奉恩詔、亦故事所未覩。及遣孫景元請闕疏謝、優詔褒答、錄景元人成均、而加大行月俸、蓋皆異數云。公嘗著耄餘雜識有云、六陽終已已者已也。而公年踰大耋、善述飲啖、行步若飛、髯鬚間復見黑毫。至歲建巳、竟以無疾逝矣。先一日、手書遺言、置之屏几、自以冒濫國恩、無請卹、易子孫致身以報。臨終、日光燦燦射人、睨大行作咲容、乃歿。逾時、頃熱如熾、四體柔如、作黃金色、比舍觀一大星曳白光射公廬而墮也。大行奉公遺戒、卜以某月某日葬於某地。兩臺業已計開、上爲震悼、立詔所司治葬、賜祭幾壇、贈太子太保、賜謚文定、備物而有加焉。初、公試南宮時、郡守王公華夢謁帝庭、庭下數百人羅拜、口舉善人、則公名也。守覺而異之、比得第一人報、守語人曰、此君冥行通神明、他時祿位名壽必皆第一。至是果驗。而公自少至老、數遇奇險、如顛垣墜木、皆不能傷。每換辰出游、天日必熙明、如天雨淒瑟、無不頓釋、意必有神物呵護者、斯亦異矣。公登第六十五歲、妻趙氏歸、中閭居官兩都、不及一紀、而閉門掃軌、優游相羊於雲

水湖山者餘五十年。先後二三權相、力皆奔走海內、而寵辱之柄卒不得少加於公。鄉家富國、所網羅推挽、徧天下知名士、而獨不得引公自近。天下儀公、以爲含譽卿雲、神龍威鳳、異代異人不啻松栢之鬱然後凋也。士甲一出、慨然有開濟之懷、竟以時事不合、奉身而退。然至聞朝廷行一善政、進一正人、輒喜動眉端、不則神情不懌者彌日。惓惓忠愛、至老不衰。乃知第以退而益重、稱公使主上知當世有不愛爵祿之臣者、其亦未窺公大臣之用心矣。公爲人修長峭岸、氣骨稜稜、神襟道朗、舉止端凝。終日燕居、衣冠危坐、不見跋倚之容。持正深堅、論議皆有根柢、無少唯阿。而寬容樂善、常依長者、不忍有所刻核。居常無他嗜玩、惟手一編。生平撰述甚富、然皆元本六經、而尤邃於易、旁引曲證、多儒先所未發。間涉內典、玄宗用以參互儒術、不爲溺也。至於運蒸服食諸術、雖知其指、不甚稱說。惟飲食臥起皆有常度、屏去一切伐性勞形之事。恒言士大夫於世法中、惟廉取薄享可延續壽命之原、何從更慕長生。施德戚里、情意周至。御子姪族屬、和而能訓、卽有過失、莊顏對之、能改卽贖。家居於當事諸司不通書問、惟遇歲稔民饑、卽首倡

樓衡託尚千古。國之藩衛。士之模範。厥迹彌隱。而望
胥崇。蒲輪三御。適正南宮。典禮寅清。式我王度。大政
將聞。歸田載賦。煌煌明哲。寒寒匪躬。十事矢謨。帝鑒
貞忠。卷舒以時。潛見不測。譬彼鴻冥。亦猶龍德。及耆
而子。既庶孫曾。踰壯而第。卦數復成。稽公名壽。史無
其伍。維衛武公。維師尚友。爰乘大化。神與天行。勒銘
樂石。永護玄扃。

資政大夫太子少保禮部尚書兼翰林院學士

贈太子太保謚文定陸公神道碑

孫 鑣

今天下望以爲相。雖不相而隱然爲世師表者。我師
陸公是也。公號平泉。諱樹聲。字與吉。華亭人。曾祖庭
訓。祖蘭。父鶴。皆不仕。而父封公少卿於母家。家林姓。
公童時猶在田間。每息耕則取書讀之。已而藝成。大
爲邑令。方簡肅所重。嘉靖庚子。舉應天春秋魁。明年
辛丑。試禮部第一。猶林姓也。公居常多靜坐。其赴會
試也。不攜一帙。獨兀坐寓舍中。時江南有名士數人。
皆忌公。觀公不攜書。則訾之。某公曰。今歲奪魁者必
此人也。榜出果然。延試不得入。聞甲。以二甲第四人
送庶吉士。明年省親歸。乙巳。入京授編修。公在詞林

七年。貴溪分宜方爭權。公閑居落落。無所附。兩公皆
不忤。人或謂分宜銜公。不然也。於時世道猶近古。趨
時者速化。不者濡次而已。張文毅公鄉試座主也。雅
知公。比爲相。公亦落落也。徐文貞爲宗伯。公以編修
與均禮。人或疑之。徐公雖先登六科。寔止長公六歲。
鄉黨禮固然耳。壬子。請假歸。遂遣封公親。服闋。不謁
補。丁巳。起南司業。分宜雖多私。然待詞林厚。謂公資
既深。且清名素著。不可以常調待之。是舉亦特起。但
不北耳。是歲。鑣受先公廕入南監。每進監。公必訓以
莊語。待之一與諸生等。辭色間不少假借。鑣因是知
師道尊嚴。迄今每憶公誨語。不忘也。先公時任南禮
部尚書。以詞林舊誼。與公數相過從。公來。語未嘗不
移日。長夏則往往聚談於郊外禪寺。於時世方濁。先
公謂公嶢然絕滋垢。每以康濟推公。公曰。僕性耽恬
寂。殆如野僧。每無事坐室內。則快。稍涉事。卽如執熱
今南署猶可棲遲。若畀以繁劇。是困苦之。立見其短
耳。先公曰。不然。惟不染之。故能綜核無所累。今世事
舍公孰任。居二年。竟稱疾引去。辛酉。起左諭德。掌書
院。公至。留都。旋召兼侍讀。引疾不赴。乙丑。起太常。掌
南祭酒事。公至。留都。是時文貞已當國矣。明年冬。進



吏右侍復引疾。蓋公性恬澹。前告先公謂南署可安者。固本志也。然任職則屬精。不徒優游。寧南雍時。作訓諸生十二條。大約以立志治心爲要。太學生至今誦之。隆慶戊辰。起原官。疏辭者再。竟不出。明年。奏復陸姓。尋復起原官。兼學士。掌詹事府。教庶吉士。抵淮。復告歸。王申。陪推內閣。隨即起禮部尚書。兼學士。公屢召不起。天下皆高公之節。若謂堅不出者。然公於經給事業。是未嘗忘。其行藏亦無意必。但於世味稍淡耳。前少宰不起。雅以鄉來嫌故。後赴教習時。則文貞既歸矣。行之日。伯兄處士出餞之。謂曰。出處有義。汝宜自斷於心。若此兩稚者。惟欲汝躋顯貴。渠居家有資藉。勿之聽也。兩稚者。伯公二子也。蓋兄弟間切磋。皆敦道義。遺榮利如此。行數程。應接日苦。公自謂精力不堪。執掌。遂仍歸。然自此名益重。天下企望謀斷。若謂太平必待公出而後可致。遇有要職及美缺。必以擬公。惟恐不就。及茲聞宗伯之命。無論知不知。無不色喜。人謂江陵初欲引公同升。且冀主會試。爲其子入彀地。後見公。驚然不屈。遂已。其實不爾。江陵與公同館三十餘年。初四五年。尤相暱。豈不知公爲人。豈肯爲後輩屈。且渠方構新鄭去。欲專行政。豈容

持正者在傍掣其肘哉。特以已初當國。將驅走天下士。茲得海內第一流前人所不能致者。自己致之。則借色爲多。且度公質直不外飾。必與世忤。必與中貴忤。一拂意必飄然不留。彼時浮譽已收。郭隗臺可毀矣。而公則以立。朝三十餘年。食祿雖少。然收名已多。無非主恩。且司成家居。三起少宰。未之赴。茲一旦驟以八座召。雖時相左右之寔。天子命。夫豈敢桀然抗違。仍厚取名。疏辭不允。遂北上就職。比至江陵。喜甚。不俟公謁。即躬候公。蓋猶以前輩禮事公也。在禮部可一年。守典禮。不受私囑。部事井井。公退。危坐私闕內。簡接客。禁城西有演象所者。金吾別署也。虛殿四圍。空地數十丈。茂樹林立。公常燕息其中。是時鎮爲舉子。亦習業側舍。隔一牆。公午至暮去。竟日不聞人聲。諸中貴銜公不曲徇。詭傳召公接旨。仍令長隨屢次促公。僕僕扶掖至。會極門。則部行常事耳。公知其意不與校。自是稱病不出。踰月。遂乞歸。江陵知公去志決。是時公季弟中丞方以給事中避公。遷符卿。乃給謂曰。宗伯公旦暮大拜矣。何不少需。恐中丞以告公曰。相貴行其志。虛銜何羨。義公吉士。假歸時。嘗遇唐應德中丞於京口。因連舟至丹陽。謁陳

少陽祠、視祠額稱宋贈秘閣修撰、公曰、此何加於少陽、但題宋太學生固快、益素志然矣。疏五上、乃許歸、仍候起用。頻行疏陳十事、以副封投江陵。江陵晒之、既而報聞、公前自南雍歸時、嘗構適園、不二畝、最小而潔、距所居里許。至是稍復葺之、而東則朱司成園、又東則范太僕園、朱園宏傑、范園蒨蔚幽麗、木石皆大有奇。然登公樓者、是二園之勝可獵有焉。公自著有記九首、傳於世。宋人謂司馬公獨樂園最卑小、而世欣慕之、過於他園、公此園蓋與埒也。公昆弟三人、伯處士諱樹芳、季食都御史諱樹德、其後起也、乃克以尚書學士贈大父及父、封公云。戊寅、鑄以禮部郎齊 詔至華亭、謁見公。當是時、天下紛紛議江陵不奔喪、公謂鑄曰、往在京師、與太欸論 國事、渠謂人多避怨、每誤事。彼獨甘任怨、此自不易及。第心不慮。又謂鑄曰、少年無喜事。余初登春閣榜時、先輩謂余曰、凡廷對自有體、古今稱第一、直言者賈誼、次則劉蕡。此二人有何建立。自後不奉公教、思之惘然。公家居、凡報命者無不薦。壬午、江陵敗、明年、臺諫奉詔舉者、碩數十人、公爲首。於時、三相已滿、又皆公後輩、人俱謂無以處公。鑄承乏選司、私謂同署郎、擬用

溫公起路公故事、進公首揆、平章內閣重務、實一代盛典。張司封擊節賞之。會時賢意見不同、鑄亦莫敢訟言。公自失伯氏、意常悽惻。是歲、季公自山東解節鉞歸、持手道風、昔、歎甚。丁亥、中丞復歿、公傷矣。戊子、八旬、戊戌、九旬、壬寅、剛立東宮、賜問者三。自八旬、卽給廩米與人、又加太子少保、最後又脩孫男景元、國子生、又給子行人彥章月俸、皆異數也。大行蓋已丑進士、是歲館選、公遺書戒以無與試。諸公卿猶疑之、太倉王公在政府、獨曰、授之行人、俾便省覲足矣。公聞之曰、荆石真愛我者也。彥章秋以使事使道歸、家、遂乞終養云。公生平簡酬接、登科六十餘年、而家居者十之七。日燕坐齋中、半靜息、半繕書。間有著述、然不甚刻意。其所深致思者、大約主理、意至或漫書數條。及他爲應酬詩文、皆往往有神解、使人讀之、冰釋。所著有茶寮記、條列七類、謂味入清靜三昧。又欲著藏譜、未就。嘗手書雜語數條、示先公、內兩條論蔬理甚精。鑄每欲揭之爲飲食銘云。相畧莫窺涯涘、間談及世故、出一二語、輒中隱微、得綱領。至持心虛平、無偏黨、則天下所共信服。其相望根本在此。晚歲年高、衆皆知不可以相業累公、然益仰之爲表儀。廟堂

用一人行一事皆默視公許可爲輕重。乙巳七月、年九十七、乃卒。先繼族子彥璵、國子生。後生彥章、彥璵子三、彥章子六、孫一。公生彥章時近六旬矣、猶及見其成名、且見曾孫焉。異哉、葬邑之集賢、銘曰、吳舊四族、厥右惟陸。遜將贊相、代有令望。延及我明、係不可徵。三世含光、鉅賢乃生。位高匪崇、勞弗假。餽臥於家、名震八紘。爲商霖雨、作周心膂。大麓未登、抱琴而處。齒途耄耋、帝命有述。記之惇史、訓於羣哲。三泐兆靈、滙秀於涇。表茲石城、維國儀刑。

《國朝獻徵錄》卷三四

南京刑部廣西司郎中陳公言墓志銘

王家屏

嘉靖乙丑、余分校禮闈、士得令官、論陳君公望爲舉首、則蕭秋官大夫石溪先生子也。先生諱言、字宜昌、別號石溪。其徙居蕭自唐清遠、今公祖始。宋有尚書公仁璧、僕射公靖、並爲名臣。明興、則參政公觀、以文學受知。高皇帝、嘗召備顧問、未及大用卒。觀生鄉進士熊、熊三傳爲森、森生槐、槐公宣、則先生父也。母爲黃孺人。先生少頗精力學、文與籍甚。初試有司、不利、氣鬱鬱不少挫、嚮往益堅。家故貧、嘗校徒連州、州

帥與先生善、有持重賄亮先生白事者、先生叱止之曰、貧吾分也、吾不能以此自蟻、敢用蟻人。其志操如此。嘉靖丙午、魁省試。明年丁未、再魁南宮、遂成進士。大宗伯秦和、歐文莊公雅重之、請於銓曹、以先生爲邑令。先生治泰和、務伉直行、一意有所興除、不爲豪右訛法。尤耻伺上官指巧爲迎合、撫臺某獵賄所邵、陰屬公爲購書。先生陽若弗愉也者、而束書露餽之。某大恚、謀螫先生。先生因引疾謝不任、請就教職、得浙之湖州。湖胡安定公故授徒處也。先生至、則申約來、日切劘諸弟子、諸弟子執筴請業、前席爲滿。間有斯弛不檢者、輒蹙之堂下、譙讓之、衆肅然敬憚焉。已稍遷國子博士、積歲不調。會肅皇帝欲爲李都尉立傳、政府欲私某子甲、太宰建安李公不從、竟疏先生名以上。於是先生得擢禮部儀制司主事。傳李君異時、都尉率貴、驕其師、先生獨抗顏自尊重、務示都尉以禮。時論以此高之。越明年、太宰李公以譏被譴、政府修宿憾、抵恨及先生、謫降郴州。郴故僻、公處之怡然、無幾微見顏色、而職事一切辦治。暇則進諸士講藝、一如在湖州時。會其年與事皆闋、得令武陵陳中允等六人、皆知名士、而郴士曾君選輩亦斌斌



儒藏

明儒碑傳集

卷六三

相繼起人多先生之鑒拔焉。已擢知泰州。值島夷江
江淮間。羣府請餉甚急。先生周爰調劑。下不殫民力。
而軍興亦給。州有疑獄。所淹繫甚衆。先生訊立出之。
衆驩感若更生。尋轉南刑部員外郎。晉郎中。蓋發達
矣。竟爲憾者所中。用守泰州。事坐謫免歸。歸三年而
公望登第。先生喜曰。吾志有托矣。因營別墅一區。名
其室曰怡老堂。時臥起吟咏其中。泊如也。蓋優游十
五年而卒。其卒也。正衣冠。應對賓客如常。一言不及
於亂人。以爲先生素養之微。先生性坦率。於人無所
德怨。亦不以德怨望人。而內行尤篤。母黃孺人卒。諸
同產累疊。先生窮年講業。盡以所得資諸孤。費無所
私。仕則又割奉于之者數矣。晚而林居。稍稍肯先塋。
拓祀田。叙次家乘若干卷。曰。以此示子孫。令無忘吾
孝弟敦睦之行也。嗟乎。先生本用經術顯。不習爲吏。
以故仕於世多齟齬。然其用乃在人倫風教之間。視
卑卑施於名實末矣。要以公望日執經侍人主。紹明
先生之家學。則先生未可謂不遇也。子男二。長經邦。
卽公望。左春坊左諭德。

（國朝獻徵錄）卷四九

浙江按察司知事張公之象墓志銘 莫如忠

吾郡有張玄超先生者。膺榮林紳裾誦義之日久
矣。其歿也。無識不識。莫不相與歎歔悼痛。有典刑之
思焉。而公之孫孝廉君懼世德浸湮。奉狀來請銘。按
狀。公諱之象。字月鹿。一字玄超。別號王屋。先世有鐵
一者。自嚴陵徙上海之龍華里家焉。由鐵一而下。七
世爲餘姚令杰。八世爲萊州府同知及公大父湖廣
布政司參議。皆九世爲公考。順天府通判文洲公。鳴
謙及從父博野令鳴岐。淵源名閥。簪冕蟬聯。鬱然盛
矣。而公少負穎異。父文洲公及母李宜人。絕憐之。謂
元張氏者必公也。而公固曠覽不羣。於一切世榮意
殊易之。而竟諸生及卒業國子。屢試弗第。乃慨然嘆
曰。命也夫。天遂不與張子。能終窮張子不朽業。不以
勢而彰者乎。自是下帷發憤。專力治古。務博經籍。
囊括百氏。勒成一家言。與海內士別建旗鼓而馳。斯
誠偉矣。迨其潛神積思。久而神詣。時發之詩。若文。其
詩爾雅冲澹。與齊寧遠。有魏晉風。其文闡深奧。衍出
入東西京。不作晚近語。及若緩頰肝衡。攷據前聞。剖
析疑議。雖當世宿學。皆自以爲不如。單辭片牘。傳之
好事。無不視若拱璧。爭購爲奇。此公平生建豎之較
著者。而以跡地困遊。稍從祿仕。爲湘之藩幕。非其好



也。當是時，諸監司大吏率視偉公，折節相下，不欲煩以簿書，而公亦因得時乘休暇，幅巾竹杖，駕一犍，嘯歌武林山水諸名勝區，以吏隱自命。無何，會御史某者仕苛政為聲，使公公不可，遂以歲丁卯，飄然投劾歸。歸而閉門却掃，室常空懸，殊安之。而期必竭其平生以竟所撰著。或縱羣籍几案間，分日研討，至不能布席對客，嗒然功刑，跣坐而已。晚歲卜築秀林山麓，其地多怪石危泉，烟扉月檝，叢竹茂林，因公而勝者。公自是益屏跡城市，有司以賓飲強之，縱一往即謝，卻不再。所著書有剪綵翔鴻、聽鶯避暑、題橋倚蘭、擊轅佩劍、林棲隱仙、秀林新草諸集。所輯有詩學指南、韻苑連珠、韻學統宗、楚語楚範、楚林楚翼、賦林七萃、太史史例、史記發微、新舊註監鐵論、唐雅、回文類聚、詩紀類林等編，夥不勝紀。其所交與，盡當內賢豪若先輩，金陵顧中丞華玉、吳中蔡翰林九達、文翰林徵仲、王太學履吉，皆公所嚴事。而金陵許太常仲貽、吾鄉徐奉化伯臣、何翰林元朗、何祠部叔毗、董太學子元、朱太學邦憲、吳興茅憲副順甫、濟南馮憲副汝言、東興歐工部積伯、黎秘書惟敬輩，以雄文高詞，填虎一時，無不推轂公為大譽者。四明豐翰林存禮、天

才豪宕，意少許可，誦公詩，擊節稱善久之。武林方憲副思道邂逅公太學廬舍，未明聞語異之，及晨溫謙面，以然定交。古欲許相公，維慎聞公名，時其入都造焉。公未起，直叩其榻前，一見語合，握手如平生。其為諸名流所雅慕如此。公素貌優，僂僂若不能衣，而提身處家，動遵古訓，嘗憤流俗諂附，反傳咸意，著叩頭蟲賦以見志。又憤後萬稱詩者多謬古而師今，為談藝篇以規之。居常評騭臧否，耿耿不阿，曾不少假借。叻於豪豪之徒，而遇士臭味偶同，即虛懷延譽，不置。里中有不平事，慷慨扶義直之，不得則或終夜咄咄忘寐。族人以貧故有需其女家者，傾囊訟于官，必歸之乃已。何翰林遺孤反噬於黠奴，出身援之，卒置奴於理。所知董子元以才不祿，旬旬臨之，哭失聲，聞者感悼。此又公篤於交誼之大端也。先是巡撫陳公我法廉公行誼，為白其無妄，而傲有司以學行俱優，扁其門。巡按邢公行部至松，高其義，收存之里巷，為置買山錢若干。比卒之前一年，上洋頗令君議修邑誌，而難其人，禮聘公。公時已寢疾，而今君意益虔，公乃力疾往，再閱月而書成，其紀載博雅，義例精詳，一時目之實錄，而公自是亦不起。若有待以畢志云。公

卒之歲為萬曆丁亥正月朔距生正德丁卯十二月年八十有一。嗟夫公以宏才博雅望重一時其於稍自抑貶以諧世好豈必後人而曾不能微再命築建石室於當世及弱冠操觚要之白首而又不能一奏公車之疏來掌故之求志誠悼矣然當舉世方務夸矜勢能之榮而獨以鴻文鉅藻大放厥辭為藝林望今與硯然僕尺組屐塵冠而遊者一得相當即公考妣所稱能亢其宗以錫美來裔者於取數為孰多當有能辨之者。

《國朝獻徵錄》卷八四

校記

①城：據文意當作「誠」。

②左編：《明史》卷二〇五《唐順之傳》著錄唐氏有

「左右文、武儒裨六編」。

③「空」字疑誤。

明儒碑傳集卷六十四

陳源 錢鎮 沈寵 饒思明

陳一泉先生墓誌銘 鄭九編

萬曆丁亥夏四月望日、一泉陳先生考終於家之正寢。明年、其祖壠陳家山、子以果奉學諭吳君所為狀來請誌曰、先子之所屬也。元錫謝讓曰、有萬學憲君在、學憲君戚而賢、戚也知深、賢也言傳、則為書懇焉。學憲君報曰、泉兄之所屬也、君其誌吾為之傳、乃敬為之誌。蓋先生成章時、受學於里人吳子金先生、業已聞越東王先生之學、請事之矣。既冠、與司空曾公少司寇萬公相觀摩、司寇公自誌之、比壯、從吉永新顏鈞先生游。顏鈞先生者、泰州王先生弟子也。其學以人心妙萬物不測也、為即性即命、欲以心運世、而頗訾古儒先為見聞理道、格式、實障道、以自詡為恣睢。先生游學揚泰間、悅之、從渡淮、渡江、從入衢、信建越歲矣、盡領解其說。顏鈞先生

喟然謂門徒曰、吾與若輩言從情耳、與惟德言從性、與本潔言從心。本潔先生字、惟德、則大參羅先生字也。蓋其學以從心所欲為極致、故高標許如此。當是時、先生尊信顏先生甚、久之、中自疑若已盡其學、然學何容易也。會從西游、見安成師泉劉先生、劉先生、王文成公高第弟子也、篤而深、顏鈞先生嘗師焉。就訊之、劉先生愀然嘆、以為獨苦夫功利之入人深也。先生心易之中、自語何卑卑、及是則請曰、聞之學以通性命、原本為大宗、功利乎何有。劉先生曰、為功利從有性命來入之耳。時先生悟固高、而人本忠實不自欺、內自省、知自名性命、而心所潛藏、隱伏者、則盡功利也。乃大懼、蹶然起曰、唯、然將學何自成。劉先生曰、唯、然何成、是炊沙而飯之也。於是退改悔、卧不帖席者三日、更往謁劉先生、請曰、是猶亡人哉、功利種種、欲祿祿而無從、則奈何。劉先生嗒然不荅者久之、已而曰、弟能於當下蕩掃廓清、見無欲真體底矣。於是先生恍然有省、而夙心信學倒囊盡



儒藏

素如蕩長風而濯大波也。明年入辭顏先生，請從劉先生居。顏鈞先生以為背已，怒，慢罵之。諸同門爭挽留，則對曰：「曩源所為事先生者，學也。今學殊指，貌為容而留，事先生以迹不以心，吾不忍為也。」竟去。從劉先生。鄒文莊公於冲玄廣衆中，嘆之曰：「若陳子可謂大勇矣。」於去就較然不敗，其志意豈不毅然大丈夫哉？於是劉先生盡以師門致知之旨授焉。小蘧曰：「知蘧是知不蘧，小昏曰知昏，是知不昏。」少解曰：「知無力，知常明常健，小有過曰知無過。夫知常止，過常化，知常一，過常精也。而以見過內訟為自致要機。」問悟曰：「悟乎？悟吾未見，不即悟即病者也。必也其學乎？學者覺也。時著時察，不住悟，故知惟學為無病也。於是先生惘然於學有入矣。比貢之京師，則學憲君官祠部，魏司空官都諫，皆懿戚相切磋，因得並海內論學諸君子游，而學造愈淵。嘗夜半攝衣起坐，妄想心銷落，澄然內明。若有與天通者，喟然嘆：「以為內潛之力也，而下學於潛。」語具萬學憲贈別序中。於是

時得諸學憲者最深。已入銓，得池石埭縣訓導。石埭人興於學，督學使者耿公禮重之，徵為書院七學師。遭諸暨教諭，諸暨人興於學如石埭。已稍違崇王府教授。蓋先生為學官者九年矣。暑邑篆者再，而家猶壁立，則又之汝寧。內艱歸，復起補阜平王教授。又來盱，盱故先生舊游也。時大參羅先生官益尊，悟益起憂，說益宏潤，勝大而譴學作益急。先生以故交往往抵捍之，面疵之曰：「君奈何尊其道而紆其身？」羅先生無視久之，曰：「鞅公事學久，稟白矣，而終不回頭不悟，當如公何？」先生微哂曰：「曩吾方悔所悟，公更令悟所悔乎？」理程門語曰：「祇恐回頭復錯也。」而歲時過新城，留必閱月，或旬或兼旬，反復於知天知人之旨，本心本天之辨甚晰，而吾盱人士稍近裏就實者，顧徃徃依先生以為歸。先生恒言曰：「人生於世，染於俗，聲華勢利乃其命根，即痛摧折之不滅也。况從栽培之乎？此根在，即高見玄悟多，諸伎倆亦培養此根之具耳。」又曰：「吾自省日用應酬，大概於人心中出。」

沒幾微之際、欲從末由、正如老年看花、不惟眼力模糊、抑且心神蕭散。又曰、近驗此身於此學、日有查考、日有磨鍊、益信有切實研精之學、不可須臾離。又曰、近驗此身、稍覺有終食不遑意。又得二三篤實老友、與朝夕事馬、庶枯楊之秘、盡當遇事宣發、以自訟曰、吾過也。吾新其化、又不欲其速化。懼創德不深、蓋學平質深力、至於此。丙戌冬得微疾、遽請假還、而卒令少濡忍者旅死矣。距其生正德己巳秋九月日、享年七十有九。按狀、其先世出江州義門、宋康定間徙南昌贛溪、世為南昌人。國初、濟寧公以經明行修薦知安陸州、子廷堅復以薦授南兵武選司主事。而文學石溪公璉、先生父也。母親孺人。先生早失父、能事母親忠養、蓋母沒而七十猶毀也。撫弟濂、幼授書、長授室、卒立之、亦以貢為學官。介弟頤、跡弛、時時刻囊中裝為償責、終已無怨悔。少貧甚、而多長者游、同學與之約曰、必絕游從專於業。先生許諾、杜一室攻苦、間偕同舍生出、過饒廣生旅見旅勞問、日之

夕、饒廣生投刺來請交、則惟先生也。於是同舍生愧歎、以為君非博交、實人樂與交、其溫與善、入人易親、得之性也。官石埭、余及見石埭生、石埭生慕誦於既去如一日。署邑篆、恬而不煩、民謹然奉公。官王邸、請王日講、請王諸子曰、聽講而日親鄉後進生、從游學甚眾、多顯人。至郡守邸、從官、娶羅孺人、賢、早卒。繼室王氏、子二、長以栗、府庠生、娶鄒氏、次以果、娶龍氏、女二、適羅祥、羅垣、皆羅孺人出。孫男三、舜賓、娶雷、舜臣、娶朱、舜卿、未聘。元錫、未冠、辱知於先生、追白首彌篤。於先生之為學、本標具見之、且誌之如此、即不文庶其錄哉。銘曰、聖學本天、以道物身、而不過物。近學本心、真心即道、過物與則、自有生民以來、有心成危、即上聖大賢、微志以道、寧欲無危而不可得也。君謹師傳、潛悟深省、自知自克、矩矱繩尺、非所謂出入不悖所聞、而有造有德者耶。噫。

《明文海》卷四四五



儒藏

奉政大夫兵部武選郎中淡菴錢先生墓誌

并序

遠

淡菴先生既歿之二年其季子光祿君

以手撰

行畧及沈水部叔數狀屬銘於不肖乎遠嗟乎余何忍銘先生而又何能不銘先生耶余受教先生垂四十年於此詩所謂匪手携之言示之事匪面命之言提其耳者深矣至矣銘先生者非余不肖而誰耶先生諱鎮字守中別號南離還山之後改號淡菴高祖份曾祖讓家烏程之陽泰里父贈職方員外郎母吳贈安人吳生三子先生其仲也贈君嘗僦居城市先生自孩孺孝謹異常兒甫九歲贈君以它累繫獄吳安人且沉疴先生日夜拊摩安人不交睫又奔走禱禳病乃起十歲出就塾不數畧畢所授課白師歸既而操作以供朝夕蓋三年而贈君獄始解一日先生對塾師問偶欠確贈君怒可曰何挺長者批頰眩仆父乃甦其嚴如是先生則方質直所自來矣年十七借棲殷氏初習舉子業躬執釜爨

旦暮一粥弱冠就試補弟子員棲誦囊舍徧讀諸經子史文章日有名郡中諸英又爭願結履聆警咳者亡何贈君卒乳乳在疚聞一菴唐先生講學鮑山之陽偕潯陽董公往師之即遷居唐先生舍旁寤寐古之聖賢有滿頭白髮悲顏子幾度春風憶仲尼之句年二十二娶茅宜人而母吳安人卒卜壤昇山還贈君柩合葬焉由郡城步至墓所日往返再三拮据裏事幾至顛踣無違禮伯兄欽旋病延醫治之臥起與俱酷暑不避臭穢兄肉削不能帖席先生以身藉之手持扇左右揮凡十四晝夜無倦色而兄竟歿云是時嫂氏孀居弟孝廉君錫與一女弟尚幼先生稍從諸生授經得藉以自給既嘆曰丈夫豈能坐青氍終歲俯仰人為也計得閒曠地躬耕其間以足衣食爰徧閱郡東南至思溪周視之地惡而廣可蕃子孫且萃族遂斬荆艾蓬蘽徙居之自昧興起躬督家僮樹藝而手携一編咏讀不輟夜則篝燈獨坐殫精凝神自經史外旁及陰陽五行之變化草木鳥



獸之名理博考精究充然儒者也。年三十二登庚子鄉書。明年下禮闈益闔戶沉思深研易言其於觀象玩詞必從靈扁獨悟不徹不已心力大耗至於吐血然先生學益進而遠近士及門者日益衆矣。當嘉靖己未乎遠偕計上公車初識先生於京邸稠衆中數語契合遂執手而勉之曰吾子可與共學其歸同事唐師未幾先生登春榜名在第十一而乎遠下第始及唐師之門聞聖學焉。庚申秋先生授武庫主事時董宗伯已處津要猶兄事先生如曩昔時。先生於同朝縉紳多落落寡合其數相遇從以道德相劇切者惟盱江羅德甫麻城耿在倫四明顏應雷吉州胡正甫曾于野洪都朱孔安魏舜卿東明石拱辰永年蔡夢義及同郡沈以安數君子而已。迨壬戌乎遠再上公車先生方大集四方同志講求此學而余與同年李孟誠萬曰忠勝汝載與焉。孜孜接引惟恐不及先生旋奉使南行戒乎遠曰子入仕以學為急學在覺悟性靈消融氣質與同年寧處厚毋處薄。

一言一動必足為人所儀刑而可乎遠謹書紳不敢忘。癸亥使竣還職方員外郎滿考得贈父母與封其內弟如例再遷武選郎中先生洞悉天下邊關險害機宜遇事輒慷慨論列可可否否不少依阿避避。胡莊肅公時為少司馬極稱服而同僚或以此忌之有參選事者病苛刻每以微文抵牾齟齬諸應襲子先生廉知狀嘆曰吾何忍輕沒人祖父汗馬勳而令其裔遠荒京塵以自為察耶。檢其文無害者婉轉於堂翁使得襲是僚造蜚語相構先生遽移疾歸會有同鄉張給諫疏紀大司馬諸不法狀其僚駕罪先生交相憾值隆慶改元大計京朝吏坐免先生官郎署甫七載其半在休沐而任事者僅替月以直道見擯天下士大夫莫不惜之先生意豁如也是歲乎遠繇銓郎予告歸見先生先生方督畚鍤濬河思溪握手笑曰吾平生自有經濟在此凡士君子非沉出處確有定數於人乎何尤談笑終日無幾微見於顏面余益知先生之不可及於是乎遠携兩舍弟執

賢先生而先生亦率其仲叔二子就學不肖時季子尚幼先生曰僕兒試完徽一第使就子門墻冀玉之成耳迺數年丙子惟凝甫歌鹿鳴罷先生徑從武林駕野航來寒舍畢前約而歸余在告及謫居艱居前後十四五載惟先生是依是仗過思溪精舍動經旬月或偕赴會約訪問知舊相從於湖山煙水之間白晝閒行清宵靜對其於兩間象數經史微言靡不究析先生蘊藉深遠不叩則不鳴一有詰難發揮每令神動而其高邁強忍超脫俗情尤能作余志氣而使之立有善必以勸有過必以規乎遠之受益於先生不啻如江河之浸而膏澤之潤也當乎遠官銓曹之日先生遺書有云天下事非必智勇才識之所能辦要在神氣有餘語稱不動聲色而措安社稷其神定而氣完也神欲藏不欲露日用間百凡可以計算料度而致獨神氣不能要在有識而能養而不能者為智勇力識所驅而騁於計算料度以自快於一時也況乎以聲色財貨而自恣者哉乎遠誦之

終身恒恐有媿於斯語郡自劉清惠公結社以來高風邈不可繼先生偕陳繡山方伯孫屏憲憲副吳拒李郡守始復岷山社約其後沈時秀中丞李彥和參議沈以安司空及余不肖並從諸老之後春秋燕集稱勝事云歲在庚辰惟凝甫已成進士而余以罪謫量移兵曹先生遺季子書曰初第倥偬今稍清暇而許先生尚留曹署不聞朝夕往復參究此學豈胸中別有馳驅視此為立身第二義耶嗟乎余與季君俱媿死矣先生年適七旬乃析產傳家政謝絕世囂專意著述謂古之君子得志則大行不得志則退而自治其身窮理盡性以正其本稽古正學整齊百家之異同槩之於道使後世復見二帝三王之遺意嗚呼此孔氏家法余曷敢怠哉於是起自周平王下迄五代上下數千年考據諸史刊去蕪雜存其彝倫大節及關國家治亂興衰之大者題曰通史經正錄凡十年始克成編嘗遺書屬序於乎遠乎遠受而讀之見其詞約事該足垂鑒戒而其間尚有一二



疑義於鄙見未融正思歸而請質而先生不待矣。繼先生之志、為之潤色補續以垂不朽者、非他人任、季子任也。若學術書二篇、其內篇明人性與氣稟相為進退、性體著見一分即氣稟消融一分、到得所性渾然全盡而氣稟纖毫不得以雜之之謂精、纖毫不得以貳之之謂一。要令此心常覺從靈扁中刮磨盪滌、不使纖毫昏蔽。駁蝕即是精一執中。又謂虞廷精一、俱從性體上見。陽明先生冲漠無朕者、一之於萬、象森然者、精之母。冲漠無朕時、亦萬象森然。萬象森然時、亦冲漠無朕。一中有精、精中有一是也。其外篇論子貢多學而識、與顏子心齊坐忘學術殊科。學從性體上覺悟、如原泉混混、不舍晝夜。盈科後進、終必放乎四海。若止在聞見上蹈襲、如七八月之間雨集溝澮皆盈、其涸可立待也。子貢聰明才辨、求道於聖人造詣力量之高深、而不求道於吾性虛明之本體。孔子屢提之而不悟、故與顏子終隔一階。子貢之學流傳千載、儒者多以義襲為事、有志聖人之

道者、必學顏子之學而可。由斯以譚先生學問根宗、可得而識矣。蓋先生雖步趨討真良知之說、而遠宗儒先、近襲方寸、不祈同、不苟異、要使粹然一軌於正而後已。若近世談空說玄、猶落氣稟用事者、皆先生之所不與。微乎微乎、學豈易言哉。又嘗著國制、國計等書、痛禮制之廢壞而天下以權勢相資淫侈無已、要在天子守禮定制、以為久安長治之圖。謂國家財用之靈莫甚於養善為國者、不使天下有未興之利、不耕之土、而又天下不可有一優游焉無事而仰食之民、欲驅游惰之民為食力之計、興水泉之利、墾荒棄之土、以足國足民。此皆關於經世要務。其風俗書謂古人相與以誠、而責人至寬、故其俗多寬大博厚質直踈鹵之氣。後世責人至備、而相與以偽、故其俗多網繆委曲虛浮不根之習。古之俗尚質、故其人多廓落不羈、平居常事不遜、面相質責、有事則亦不擇利害委身不顧。後世之俗尚文、故其人多文雅修飭、平居卑異檢束不敢踰、即有事則亦畏避

退縮坐觀成敗。古今風俗人才不同，而國之治亂短長之效，卒由於此。有味乎其言之也。先生方面廣頰，色蒼而神完，音響如洪鐘。見者自生敬畏。為諸生時，督學林公試高等，應補同試。劣等卻缺，廉缺遽從班行中抗言。卻生文劣而行優，宜廉如故。林公動色，卒允之。有友人毀君客死京邸，為殯殮，護其喪歸。故人子錢存發多漁官緡，論戍倡親厚代輸得免。庠生吳士誠以誣構滯縲，綫陰為白於有司而出之。其兄若弟且不知也。棟塘陳先生甫坊州大夫役之城，特為言於上官，捐其役，可謂曰義。執掌終歲，人不堪其勞，而抱膝長吟，儵然物外。當其貧時，煙突屢寒，誦讀自若也。自少至老，所入奉祿錢，殺隨輒散去，竟不知勾較盈縮。或有貸子，不問契券，居恒胸次廓然，可謂曰達。每日寅起，攝衣冠，雖村孺不以表見。暑月燕處，儼對賓客，可謂曰莊。與人不設城府，對里中父老，故人子弟，笑語歡然，乃未嘗一濡足於權富。往來交際，屏絕繁縟之儀，義所不居，雖強以一物納之，

不可。雖在素知，欲援而止之，不屑。可謂曰介。冬夏一葛一裘，寒不圍爐，暑不揮扇。食朝夕二簋，奉客不過數肴。出入挾蒼頭一兩人，棹扁舟往，相與登臨，雖高遠，惟徒步。遇盛饌，羅列珍羞，取一肉一飯飽而止。他物不以入於唇。有俳優在前，絕不入於目。可謂簡而定。姻婭故知遇窮厄，無不藉之舉火。即及子姓，數十年弗替。鵠然歲寒金石，可謂厚而敦。里子有面詢先生，不為應，隨而肆言，若弗聞。其人即夕不良死。或曰：君豈前知乎？笑答曰：吾知其良心不校，不知其他。有丘姓者嘗構先生，幾入羅網，既第歸，匍匐自責，先生慰遣之。已廼以麗訟獲重譴，更庇之，免於溝壑，可謂犯而不校。士衡等以萬歷己亥某月某日，奉先生與茅宜人柩合葬於思溪之西阡。家於斯，藏於斯，令子子孫孫毋遠丘墓，蓋先生之志也。

銘曰

吳興山水清且遠，淑氣千秋往復聞。碩人高踪長袞袞，先生赤腳立乾坤。一飛折羽終丘月，五柳伊川風味著。

書祖述麟經意權衡萬古刊明書成一枕羲皇睡少

微天上忽沉淪。後死許子華公神。庶幾不朽存貞珉。

《明文海》卷四四五

廣西布政司左參議古林沈君墓表萬士和

沈君諱寵字思畏號古林宣城人也。君為人外貌樂易而性實剛方。志存一體。然不務阿世。見一善事。鼓勇直前。不為不止。聞一善人。負笈千里。不見不已。所交皆當世名士。故海內嚮道者莫不知有古林君。其鄉有貢受軒先生者。受學於歐陽南野氏。君師受軒。因同至南都。叅南野。有得於致知之說。已而得見王龍溪。錢緒山二公。悟證益明。然君每崇實踐。不落言詮。此君學問之終始也。君年幾弱冠。具考桑園公督之業。農君白其母。固請就學。旋入郡庠。中丁酉鄉試。甲辰落第。就選授行唐令。以才調獲鹿。戊申。擢監察御史。清戎福建。癸丑。陞湖廣江防僉事。丁巳。陞廣西左叅議。致仕。隆慶辛未年即世。此君歷履之終始也。視民如子。視官事如家事。賑饑

荒。復流徙。教紡績。節厨傳。一切保甲倉儲團練之法。無不舉行。此君之治邑於行唐。獲鹿者也。獨持法紀。風采凜然。均編役。黜貪墨。興正學。別賢否。至於搜獲積盜。摧蕩九龍灣巢窟。此君之才著於御史監司者也。君當為令時。保全撫字。惟恐失所。治尚寬仁。其為御史監司。劬姦遏惡。惟恐不盡。治尚威嚴。蓋牧民之體。執法之職。既不相同。而北土瘠薄。易於離散。利用招徠。江防巢穴。易於哨聚。利用蒐獵。因時制宜。同歸於治而已。豈有心於其間哉。君自歸田後。講學一念。老而彌篤。時郡守羅公立開元之會。諸生環座者數十百人。取楚侗督學臨校。深為嘆賞。徵聘君與梅宛溪叅議主其席。諸生因而善良者甚衆。宣城風俗至今知學者。君為之倡也。君性孝悌。事父母及喪。盡竭其力。復喜施予。自未遇時。常衣毳易粟以賑貧乏。及致仕歸。悉以俸餘為伯仲買田宅。創建祠堂。聚族子弟教於其中。此雖非君難事。亦足以稱於宗族鄉黨矣。疾革時。人來問疾者。輒與論學。臺臺



儒藏

不倦。或問君胸次云何。君答曰：已無物矣。時次子懋學方上春官，乃顧長子懋敬及諸孫，囑以善自勉，不及他語。遂瞑。君之卒也，貢受軒作狀，即其師也。梅宛溪作傳，即其友也。二君平生知己，故其事核其辭達。余樸直無大惡，足以發而懋學來留都，乞余作表。余忝年家，素尋交契，聊綴數語，特其大者焉耳。若其行事，則誌傳悉之，不敢增一詞，懼失實也。

《明文海》卷四四四

明故饒良士孫烈婦合墓志銘

饒良士名思明，字子見，新淦湖田人也。父貫之，早卒。母徐安人，生子思聰、思明。思明遺腹子，幼有至性。三歲見里師答兄，即俛身求代。師屢試答之，不為動。六歲通聲律，知名郡縣中。嘗送兄渡水，見風起，必求與俱渡。執兄衣曰：第無動。由是一舟得不恐。既長，娶安國鄉孫怡女。女初生，怡名曰節，已而性果懿靜。事徐安人以孝聞。於是思明得恣意問學。為縣學生，懷懷不逐時態。又日夜

勤誦說。然體素羸薄，不耐苦，遂成瘵疾。疾困，忽自省曰：科舉之學，竟終身耶？已而得陽明先生傳習錄，乃復矍然曰：吾幾枉生。夫道至通至易矣，舍是他營，是謂大惑。吾寧汨汨泯沒，甘自悔哉？於是大書勇字座右，決計改步，期必聞道死乃已。言嘿動止，僅僅欲自信。深衣大帶，屏居沉思，即同輩指摘譏慢，無所撓。有以理道告者，意氣舒發，忘其疾也。於是居新興寺中，五年不入私室。孫躬給湯藥，亦五年不衰。囊篋盡，即脫簪珥。簪珥盡，日夜繅織足之。是時兄舉己丑進士，為刑部主事。思明恐即死，母老無所仰，為書貽兄曰：人多榮仕宦，古今仕宦多矣，非忠孝知名者有幾。兄宜為養母計，無他汲汲也。未幾疾亟，歸正寢。孫就視之，已不識面目。乃大慟曰：君何為至是？思明色不沮，從容謂曰：吾已矣，無過悲。汝年少，又無子，從汝志不禁也。孫驚號曰：君疑我，豈忘平日言邪？萬一不諱，終不令君妻事他人。乃復大慟絕息。已乃入室，豫治餼具，擗衣被精粗為二具。家人莫之測也。餼



具具私取慈蜜和飲之、不得死。復計買砒霜食之、為守者所禁、又不得死。已而守者倦、乃就縊室中。當縊時、有聲裂裂出戶外、屋瓦震撼、守者驚覺、起視、死矣。思明聞之、氣息奄奄、歔歔悲曰、吾妻死成妻矣。吾學陽明、今既死、乃不能有成、吾則媿吾妻。傳習錄納吾棺中、以識吾志。鄉里遠近奔視、即欲聞有司、思明指心曰、彼不媿此耳。母多事、乃復貽書別兄、詞旨悽婉、左右悲痛。又七日、乃卒。卒後有司聞其事於朝、曰、風化者、朝廷大紀。貞烈者、天地之正氣也。伏見新淦饒思明者、幼孤家貧、嗜舉稽古、齋志以沒識者傷心。其妻孫氏、曲盡婦常、先夫自決、寓從容就義之節於慷慨殺身之時、自非成仁、孰能不奪。良士烈婦、古今為難。矧茲同室、尤為希遇。願霽殊澤、以昭淳風、且示民有紀極也。於是天子聞而悲之、詔旌其門曰貞烈云。思明生正德己巳九月十七日、卒嘉靖壬辰五月十六日。孫氏生少思、明幾歲卒、先七日。葬在某鄉之原、詔旌在卒後幾年。始思明與同邑朱洛友

善、將卒、與洛訣曰、而知吾心、吾死必得念菴羅子銘墓。吾目瞋矣。後五年、洛見羅子理前語、羅子慨焉。士有味一面而知心、越千里而慕軌者、誠以道懼難求、音貴合律、誠有所不違、言有所不宣、於是希心遐邇、振步踈越、雖匪嘿識、情亦懇至矣。洛學不傳、魯經分裂、號為士者、佔畢騰說、躐華取次、役其精銳、以甘腐餘、追究隱念、祇足覘顏。故朝匪黃科、秩無授紫、野雖白貴、名靡升玄、迂正道而莫由、棄常經而弗述、已成痼癖、誰則浣除。有能問津、庶幾乎絕響矣。顧使業不永就、行遂中廢、秀而不實、豈非志士深憤哉。勇士不見戈矛之害者、重賞招之也。中士不避隕越之禍者、令名束之也。烈婦處閨閣之中、鮮見聞之益、議不過酒食、功不踰締織、乃能蹈死如履、周行此何冀望哉。矧其睽居五年、慮非不審也。弱年罔後身、非有係也。三死而畢、遂意非偶激也。借曰未知、則好德之詩荒矣。故曰、所欲有甚於生、所惡有甚於死、利貞之聲、或出於柔質、中庸之義、多缺於大儒。此非降

才之殊用智者之過也。德不孤必有隣。思明雖未遠究。然得烈婦作配不朽。使為士者率則興行。則思明之死重矣。或曰。孫之烈。思明死成之。銘曰。

彼箕者何。其心匪他。彼士也人。其儀孔嘉。乃爾降瘞。胡不自計。胡遽云逝。曰昊天不二。滔滔者流。自承以羞。如淖塗弗由。何莫視茲丘。亦有黃穢。積穢而罔修。如露斯墜。胡千祀之作對。鈞非類耶。生同食。死同室。永為極地。維不裂。茲丘其節節。

羅洪先撰 《念菴文集》卷一六

校記

①輒：當作「輟」，蓋形近而誤。

②此句「味」字不叶韻，疑有脫誤。

明儒碑傳集卷六十五

羅文祥 趙弼 尹轍 陳慶

梅守德 楊希淳

明故羅生汝奎墓志銘

羅生名文祥字汝奎吉水富田里人父居禮以豪興聞母胡氏娠十二月夢神語曰先冬日當生兒已而果得文祥文祥為人長身面青黑秀目疎眉性好竒幼從里師學文詞即厭陳俗語欲自出機括師惡其不馴然心竅竅自以為未有喻意者復聞明興文士宗李何孫鄭四子為大家得其文思與馳騁上下於是多集古牒竒字間出語即有矩尺已而得陽明先生格物論撫卷嘆曰茲非程陸門戶耶夫人在天地瞬息耳居不堂奧而塗淖食不粳稻而糠粃祇自苦且無與償也吾豈能泯泯效蠅蚋羨殘膏餘腐羈其耳目哉自是俯視澗步檢操凝鑒同舍生往往目逆羣咻之不為動後為贅書與弟文命同謁羅子玉虛山中問語及佛艷然曰願師莫

作是語見禪經輒欲密屏去後四年羅子與論息機之要存性之門忽起對曰聞命矣故神却念忽嗜遺華飄然視古所謂狂狷意不多讓也自是與羅子莫逆進盡規益指確瑕瑩朝可暮否不務區區形迹矣羅子嘗令叔汚惠言弟壽先居先師事之嚴和間施保誨交至羅子自視叔弟不是過也於是假館羅子歲晏忘歸嘗與推極神聖根柢否臧古昔計探五嶽乃志四方踴躍酬應誓不二適即刻期共入衡山尋舜禹故跡求盡脫滓穢將行母尼之對曰茲非漫遊欲了此生耳母聞之喜期明旦發舟然業已中暑毒是夜方入寢大喘呼面發赤唇舌裂燥母問之第云衡山衡山里醫不察誤投陽劑然艾火即痰壅閉目不復語連旦卒矣正德庚午十月十四日生嘉靖己丑娶彭氏癸巳謁羅子丁酉始為縣學生嘗試學生不中不見愠色戊戌四月八日卒三兄福先卒昭弼善治生弟文命縣學生文祥所得財輒歸母任諸兄弟取去無問及卒囊無寸儲彭氏生子



祖懋、女淑慈，又皆夭。閭里傷焉。兄弟思與立後，以諸子尚幼，未有擇。所遺詩類初唐。文祖經子，間出魏晉。墓在皇屋山後魏仙嶺右。銘曰：

嗟羅生，謂年為壽，百齡何究？謂身為存，盜性者六門。嗟羅生，汝知否？為榮知傾，為成故寧。適塗弗至，而弗蹈榛荆。嗟羅生，嘉種弗食，其行亟亟，望源而莫即。命嗇耶？時棘耶？其亡矣！亡矣！得大當矣，玄之光矣。嗟羅生，繫何傷。

羅洪先撰 《念菴文集》卷一六

文江兩生墓志銘

文江兩生者，趙生子良弼、尹生道與轍也。子良居文江北門，道與在新市，距余松原半舍許。俱稱文江，何居過文江者莫不識兩生，兩生能重文江。今忽見奪，故為文江悲之也。始余早歲談學，方藉啟助，然多勦其談而忌所學。自乙未得趙丙申得尹，於是文江有師友之義。子良為諸生，廩于官，居市中，惟雅靜寡營。因誦傳習錄有

感毅然思自樹，不甘逐庸流。而道與舉丁酉鄉試，嘗師雋都黃子正。其穎悟不及子良，其質直朴厚寬慈而善忍，似遠過之。兩生往來，無間寒暑，徜徉石蓮雪浪之間，近而青原玉筍、鳳林白水，遠則衡岳巨廬，靡不得偕。或踰旬朔不歸，蹈險不怨，求證所得，互指瑕疵。其形貌俱聳瘠，古逸嗜清寡，家極貧，然善奉親。兩親質故近道，不逆所為，得嚴交際。即人以一箴相投，稍不當，堅不可強。視物無厚薄，皆一筵也。子良從靜中悟入，見心體常虛湛，一切無能相入，自謂得此可旁應不疑。有問詰者，搖首微哂不答。終日垂目宴坐自適，即付余猶若隔數塵者。然稍稍不足於氣，聞人過面輒赤，心不自禁，亦竟莫能作一語。喜飲酒，暢志意，後偶病不食，少茹酒，月餘健如常。如是者越半載，忽憊而卒。道與尤重恥心，矜細行而尚大節，未嘗失辭色於人。聞談論稍涉高遠，目瞿瞿若驚，謹密內守，即事驗心，以至自慊。至契悟處，挺身捫胸，又若啖異味，意津津，莫能自述也。初授崇明知縣，



崇明在東海中、數鹽徒為亂、往者出沒風濤、多不測、選人類規避、道與名列浦城、為有力所易、聞之不一動念、忻然戒行、省費實賦、奸宄革面、是時城留于海、積餘帑、將徙之以內艱、去不果、月餘、倭難作、代者不免起、復至京師、京師貴人愛其賢、競以鄉邑請銓部、會逆銓部意、莫逞、因以雲南太和、在太和治行猶崇明、獨身萬里、絕不以險途懷怨、地故儉瘠、供需如中土、民困甚、則搜括利害、務令簡薄、毫積絲累、歲贏若干、田里稱均、咸願立石垂遠、著在令甲、訟簡事給、時時集士人談學、身刑意、感信者日眾、嘗以疾請攝攝者恣筆楚聲達署、即復視事、或勸之、答曰、使病吾民、是增吾病也、居四年、竟以勞瘁卒于官、既卒、而部檄以賢能召、太和士人悲如失怙、憐其貧、競助之、復請兩臺、賻歸櫬、而思不置、復請祀之名宦祠、且檄鄉邑以鄉賢祀學中、皆如言、當道與將如太和時、余偶言此心之大、渾然與物同體、一無所繫、惟同體故、感無不通、惟不繫故、窮達不得加損之、忽躍然

起、計祿可脩養、斷棄去、相守畢業、言不自効、計至、與子艮、吊其家、哭盡哀、子艮灑泣別去、無何、遂病、而余衰獨留、嗚呼、此獨文江不幸哉、前後從余遊者、有羅生汝奎、文詳、周生天臣、忠、謝生于貞、中孚三人、與致高、速、善、啟、發、莫如羅、謝、擅才力、能羣眾、而周愿介、不染非義、二十年來、相繼夭、兩生言及輒痛、恍欲涕、嗚呼、安知今之痛、惋、復有甚於兩生者乎、一邑之間、信學者幾何、而傾摧若此、即後死何益矣、嗚呼、嗚呼、趙本宋、濮安懿王之後、自中奉大夫、不佞始寓吉水、墓在二十一都善果山、子孫因家城中、高祖某、曾祖、祖邦貴、父克潤、邑鄉賓、母藍氏、正德庚午三月四日、嘉靖庚申七月三日、其生卒也、年五十有一、寡兄弟而無子、以再從兄子嗣宗為後、娶徐氏、繼高氏、二女、長適道興、次子、次尚幼、道興生後一歲八月十三日、卒前一歲為六月二十七日、年五十、尹出河南、至吉州、兵馬鈐轄、崇珂孫守誠、留吉城、舊市街、後徙吉水新市、十三世為高祖宗、連即鄉賓、有

行誼士人稱之。曾祖建陽知縣載魯。祖體震。父錫。母蕭氏。三子。長即轍。次軫。軫縣諸生。錫與克溫皆以儒終其身。道與娶峽江劉氏。三子。崇。采。樂。一女。適舉人羅徵竹。子良卒之五日。附善果山祖墓左首乾亥趾巽巳而道與墓里中賴坑甲山庚向。其期為辛酉十月庚辰。值余病。皆未臨穴。茲為銘且吊之。別書其一納善果之墓。同遊地下。其尚知余之悲否乎。銘曰。

古道荒昧。今將余振之。援枹奮鼓。分聽者其誰。乞乞兩生。今前驅乘塵。靡遠弗致。今彌堅可推。天胡弗弔。分莫或相而一割中折。分寧究厥施。處者嘿嘿。分溘其泯。漸嗟余孰輔。分悵悵安之。有來景附。分遭迴後。時匪直文江。分千古所悲。

羅洪先撰 《念菴文集》卷一五

明通議大夫太常寺卿視軒陳公墓誌銘

往余甲戌晤視軒陳公青原山。公修挺沉靜。稠衆中不聞一語。間語即洞中宵寂。嗣子過公里。遺公田間。及馬青衫。遂睨不知為太常。公為子。語竟日夜。悉公神情內語。予飄泊南北。心常儀之。近予獲歸里。擬起居公而公病。病未幾公沒。嗟嗟。聞揚先覺。流韻未茲。予何敢辭。公諱慶字履旋。名御史螺田公五世孫。侍御傳彬。彬生表。是為公祖父。俱以公宦粵西。東宮覃恩。再晉封左布政使。大母羅氏。母劉氏。並贈夫人。公幼故貧。然攻苦績學。為邑諸生時。華亭徐相國督學江西。拔公首諸生。延為弟子師。丁酉舉鄉試。庚戌成進士。拜大行人。陞南京戶科給事中。時言官卑者蟻附。高者毛鷲。公性無倚毗。卒不以搏擊先仁厚。疏安重地。處餉道。皆為國家計。久遠。獨操江大臣故以邊材推。玩寇不檢。公始一糾之。卒中公陞公守衛輝。人曰是郡衝。公不耐劬。而公優游豈弟。為守守事。會歲歉且蝗。公賑濟有累。郡獨不飢。他郡見衛



輝不飢且飲其法行之。新汲庠文廟及諸惠政具載紀德尸祝貳碑。是時倭憑陵吳越間。既括為甚。浙鎮臣檄選人需全才可備緩急者。陞公浙江副使備兵溫處。人曰儒不習兵。而公治兵兵愈寧。倭寇閩界。過龍慶貳邑。時歲且除。公親冒矢石。累倭貳拾餘。衆喜曰。寇去諸公。曰。獸搜鹿逐。會有寧時乎。密與諸材官計水陸險易。芻粟豐約。校卒勇怯。恭置星布。夏倭果狎至。撫臣觀兵亦至。賴公調度。各軍殊死戰。兵氣震震。所獲首功戰艦。奪回被虜者無算。是舉也。僉謂乙卯以來。差為東南生靈吐氣。先是有蜚語。戲下得倭金若干。公下令曰。敢持寸金。軍法從事。會有自售者。公哂曰。爾不愛死。我敢愛金。軍中聞之。感泣。撫臣上功狀。上嘉公不績。賜白金文綺。起遷山東觀察使。歷陞粵西左布政。公所至提綱挈紀。穆如清風。尋晉太常寺卿。卿初固重臣。後有官以他途儀部若屬視之。公申明職掌。爭之力。又修寺誌。著為絮令。侍穆皇帝郊天。賚予甚厚。柄鈞衡在听夕間。公遽乞

休歸。公之歸也。蓋給事時所紀者。親為柄臣。用前却修怨。嗾公歸。公歸。惟杜門靜誼。僅一往青原。與郡諸先輩訂學。即予晤公之年。公嘗語予曰。初久困計偕。聶貞襄先生固尼之。不得乞祿。再躡而謁先生曰。我以先生言。故因敗至此。先生亦大愴。送公郊坂。遲公登騎。公辭不獲。遂登騎。先生連聲曰。履旋履旋。行且為國家大臣。豈惟第。又庚戌禮闈典試。為南望歐公。洞山尹公。見吾郡閭有錄者。歐公錯愕。尹公曰。此必一已。開卷得公。衆後詢尹公曰。何知曰。閱其藝。必泳游驚渚有得者。衆以服尹胡鑑。而卜公正學。亦奇矣。公初號西塘。晚號視軒。蓋嘗反覆公初居約而卒。嶠然不淫也。有素履往之象。靖冠紕。愚有履虎尾。愬愬之象。晚返初服。幽人貞吉。中不自亂矣。視履考祥。其旋元吉。公得於視履者深哉。近從故麓中得公與塘南王公論學一通。曰。透得性根。方有下落。曰。若是良知作主。與天地合德。日月合明。論夜氣也。曰。謂聖人通晝夜清明則可。謂衆人氣有斷絕則不

可。公學甚淵，獨公不喜多譚，以故人罔窺公際。公生正德庚午五月，年七十九。娶峽江鎮谿彭氏，再贈夫人。子一銓，國子生。先公五年卒。娶儀部郎泉崖聶公女。孫應嶽，國子生。即請子言襄公大事者。娶廬陵廣濟令劉公則塘女。塋雲龍鄉五都澤泉人形，丁山發向。銘曰：桓桓太常，侍御之裔。有烈有行，鬱然名世。揚馳栢臺，端笏蜀京。五世臺省，後先芳名。出汲淮陽，我志何傷。士頌菁莪，民懋甘棠。特命持憲，茂著殊勛。精鏐文綺，惟天子賜。東魯象郡，公旋公牙。風霜隨馬，甘雨隨車。晉陟上卿，望隆中朝。倦翮投林，於焉逍遙。典型既陞，悠悠彼蒼。勒言片石，用永來芳。瞻彼新阡，雲樹蒼蒼。縣縣若存，澤寧有窮。

鄒元標撰 《願學集》卷六上

進階太中大夫雲南布政使司左叅政先府君宛溪先生行狀

萬曆丁丑仲冬，先府君宛溪先生終于賊第，不肖鼎蹕踊崩隕，臨死者數矣。董勉力而始克襄事。明年，圖敘次府君之宦績鄉行以爲狀，廼府君家居，自不言官中事。鼎祚長而與燕趙齊魯東西浙之士游，則多有言府君官中事者。山東紹興各崇祀名宦，移文來郡，始得覈其實。不誣，敢綴其鉅者如左，以備立言者之采擇。府君諱守德，字純甫，寧國之宣城人。梅氏，惟宣城繁而皆非一族。唐末有倫叙公授新安郡學教，生之慨之慨生遠，五代時爲宣城掾，家焉。世居郡城州學之西。自之慨公傳四世爲誠公，尚書公詢從弟也。家世鼎盛，公獨不仕，遊柏枧，樂其山水。因賦柏枧以見志。淳熙間，文明公始遷居柏枧南莊。文明公之子太七公，嘉泰間始有墓在柏枧。又七傳爲榮宗，則府君之高祖云。榮宗公生五子，而長爲府君之曾祖珍。珍生六子，第三子



友竹公楷爲府君大父。友竹公四子，而府君先考爲仲子，贈中憲大夫古菴公繼先。有四子，府君居長。府君生十一歲，郡太守胡公東臯聞以神童召，至郡面試，二文立就，且善也。挾入衙，見其夫人諸子，而親陪飯焉。且論古菴公以積陰騭培福源之說，逾年而古菴公見背。母劉太恭人年三十一，諸孤幼者尚呱呱號也。有家難友，竹公及繼胡孺人猶在堂。太恭人以孑身上而奉親，下而撫孤，內而理家，外而禦侮，拮据萬狀矣。府君年十八，補邑庠生，母恭人郭氏來歸。嘉靖甲午丁酉，並試首邑庠生，督學使姚江聞人公詮，斬陽馮公天馭所特賞。是時陝寧李太宰公默由驗封郎謫倅宣，合試六邑士，獨拔府君及太平太常卿周公怡曰：「此兩人國器也。」令交拜郡庭，而李公泣盟焉。因供之庾舍中，朝課夕誦。李公博古明當世之故，自博士家外靡所不譚，以庶幾異日備實用。周公卽以甲午舉丁酉府君相繼領應天鄉薦會。

肅皇帝方銳意征安南，下禮官議郊社分合之典，主司策士有國之大事在，與戎以微諷。上震怒，遣緹騎逮至京，下于理。所舉士百三十五人者，不許應制。南少司寇吳公悌時爲御史疏，求之，賜杖坐遣戍。越三年歲辛丑，上以宗伯諸大臣言許復試南官，府君登嘉靖辛丑進士。壬寅授台州府推官。府君材敏練，事至立剖，朝發夕報。旁大府來聽質者，或不下數十人，不待再食歸。於是有益米梅之謠。郡政或溷也，又有清香唯有一枝梅之謠。台及寧紹並臨海，疆族奴客闌出中國貨海外互市易，乘汎揚颶，官不可誰何，而三郡姦徒先有投諸島爲之主與者，利且不貲，倭疊萌矣。越東士大夫多兼併小民，雖中戶無所容。閩人舒公汀嚴峻人也，來爲巡按御史，中憤之，因極力裁抑豪貴，以申閭閻，條明海禁，于振甚密，而于諸司理中獨倚信府君。事下府君，輒以意寬簡行之，多所縱舍。久之，舒公以府君非獨材，且仁心爲質焉，而公之

威稜亦漸以平。部使者先後薦府君于朝。擢戶部四川清吏司主事。然未滿考也。北而奉太恭人養官邸。則太平周公怡以吏科給事中疏論相嵩下錦衣獄三年矣。時陸炳掌金吾。嚴之戚也。獄甚祕。府君時時爲之具橐餗。嘗和周公和蘇子瞻寄子由二首寄其弟有之。又私爲三君詠。三君者富平楊御史爵。豫章劉員外魁。與周公同在繫者也。未幾府君出司徐州倉。特循永樂之故事而修之。務與時宜。爲軍民便。構駐劬亭于署後。引水疊石。賦詩自適也。蓋府君爲理時守通州。陳公堯名作者。從之問詩。陳公以府君秀發。盡授之。而徐州兵使王公挺。鄞之聞人。與府君倡和益相得。請府君修徐州志。旣成。歎曰。典而則約。而瞻真良史才也。至今七十年猶行之。乙巳覃。

九廟恩。贈父繼先爲戶部四川清吏司主事。階承德郎。封母劉太安人。封吾母郭氏安人。又三年戊申。改吏科給事中。府君初不自意也。分宜

秉政久。于世蕃擅其權。世蕃狡而善牢籠臺省諸人。好以酒戲虐人。以爲親昵。府君故不飲酒。至直視覆杯謝。亦不之忤也。其私人荐位京兆尹胡奎者。謀貳冬卿。府君有釐弊政黜庸汚以安遠邇之疏。臚列其貪鄙狀顯斥之。銓部初欲通選法。選人偶不樂遠方。故設願告遠方以爲權宜。告者每選數百人。有援例不數年至州守郡倖者。選法愈壞。而官常以隳。疏報遠方例永停止。著爲令。載吏部職掌中。京兆亦慙沮。自引去。嚴氏每懸美缺以待賄。賄有等。府君有卿貳缺。員乞錄佚才以克任使之疏。上玄修。勤黜祝太常官皆道士。世蕃父子相與爲朋比。卿徐可成者。前得蔭。復求改官。府君抄出駁不行。世蕃先積不平于府君。又見建白漸廣。圖欲出之者亟矣。已酉。進戶科右給事中。奉命副安遠侯柳公冊封遼府光宅王。遼王亦狡而尚道。自號清微真人。以媚上者也。府君與安遠唯正色端詞以對。科長東平劉者。以府君叅駁事。



有嫌刺刺語世蕃若草一疏再入國門卽上矣。世蕃重益疑會紹興缺守世蕃宣言于衆曰兩浙之倭勢熾矣惟紹興尚完今須得幹濟彊毅之守吾觀未有踰梅掌科者也。今在使願且爲朝廷借之衆唯唯翌日吏部推上矣。府君封還道聞行還里卽身馳渡錢塘而赴之。府君至首講備倭之策郡兵頓無所用客兵驕烏合未練於是蒐軍實葺征餼頓者汰而存之驕者厚其月糧而嚴其法比以至繕城垣飭舟械煥然一新而海上諸要害處猶宿重兵焉。頃之倭稍緩府君廼召父老而問疾苦以苦莫大于湖稅召諸生而問風俗以季末之奢靡而違禮傷教也先是越民業歸富籍而稅懸貧戶逃亡積額官必取盈有司創議均賦漸滌弊源窮年靡定府君晉多士曰茲非治事科耶。廼分遣經野出乾沒者若干畝事獲就緒。王文成以道鳴東南府君嘗從王龍溪先生畿講學金陵者有年。府君于是議文成之祀敦請龍溪先生于文成講堂

以多方訓士士率風動而文成之學復以闡明。燕饗有禁游觀有禁頒刻三禮圖註于士民俾士先習相見禮鄉射投壺一一舉行之而尊高年禮隱逸有秘圖山人楊珂者府君三造其廬不見也。碑高士里于其居蓋府君以學爲政以教爲治非矻矻簿書期會間而已。衆每稱府君穎識通達當機應衡爲不世之材始猶觀其表而減湖田之稅今家戶能誦述之則以民饗其利爾。壬子分校浙闈得諸公大主馮方伯叔吉嚴太常用和數人皆致顯名諸公者督學方山薛公許以爲必解首然實分校者失之先府君搜得之者也。薛公詣府君謝明年癸丑春倭有利謝氏也以一旅掠餘姚臨山泗門受其禍賴府君所宿兵摧破之時府君方覲留京也。甲寅春滿考承德公贈中憲大夫紹興府知府母太安人進封太恭人吾母郭安人進封恭人是年陞山東曹濮道兵備副使東省唯充西最患盜盜各有大猾爲之保任流徙無常莫之究詰

府君爲之鉤校其主名而求大猾之尤者立撲殺之盜無所附麗而縣重購賊曹掾史多所獲一年之內漸以衰止越乙卯改本省督學副使府君教士以身疏條濶目評隲試義錙銖不爽一見而可決其平生乙卯得人東省稱盛萬曆甲辰間甥麻一鳳友吳伯敬會試同寓有登萊人宋知州者攜其子來詢及府君曰此神人也後胡可復見耶而府君持法嚴絕無所徇御史新城耿公鳴世來南巡弔府君于家語鼎祚新城有陳生者富而父兄橫陶真人爲上祈年泰山也託賂焉真人以檄送陳生于學府君褫貴之禁錮終其身與真人申明執掌真人惡無以應也海內稱數良督學必爲府君屈一指逾年陞雲南分守左叅政而府君倦宦久且念母恭人春秋高也任四月以捧賀行事畢遂上疏乞休次于真州必得請而後渡楊子部覆爲照本官風負才名久歷中外今告休致必其自計已審相應俯從但才足有爲終棄可惜合無

准令就彼回籍致仕待後病痊之日聽有司具奏起用外官無起用例蓋異數也府君之得請歸也唯是肆力于學參攷互證獨得之心嘉靖甲子耿恭簡天臺先生定向爲南畿督學御史羅旴江先生汝芳守寧國相與創志學書院于陵陽三峰之上再拜請府君及貢東平受軒先生安國沈少叅古林先生寵爲之主遠邇響應比屋弦歌咸以爲鄒魯之鄉矣今海內所傳志學三先生者是也府君之學以隨處體認爲真修以處事當理爲應用以倫常物則爲本宗以反躬篤踐爲實地都峰周公每入郡輒留月餘猶加密訂亦以府君之學爲得其大而且不致虛無所歸以教必先於家也羣族之長老子弟而爲會會有講禮讓有敘彬彬可觀卽庭內少有違言聽之祠不以煩有司有司者府君多田居不時見然地方利病必進告緣起流止條分縷析郡邑大夫皆聳然敬聽焉若西門胡子甲之人命楊伯昊余庚三之盜攀悉誣枉牒已行



而騎反之中道者也。郡中有大興革，未嘗不就質府君。郡太守王公嘉賓之，建東溪橋也，悉府君主畫焉。太守陳公俊以修寧國郡志，請有成書爲遠近所傳。迄今或一政之紀一事之屈，通邑必譁然曰：「安得梅大恭者其人乎？」府君性端方，割直顧率有標尚。治一圃，環以柏垣而雜植花卉，其中引客小酌，以詩詞相應。四方之山人畫史，縑衣羽流，以戲劇謳歌來者，亦不拒也。漢陽李符卿先芳謫丞郡，數過從，與論風雅之道。間出而游九華、白嶽及吳之虎丘、天平、石湖諸勝處，好讀書，手無一日釋卷，至夜分猶引燈就讀，或令鼎祚旁讀而聽之。故多所著述，若此者二十年如一日也。而親奉太恭人甘旨之養者十年。丙寅秋，太恭人以年八十一終。府君耆矣，孺慕備至。丁卯隆慶改元，

莊皇帝莅政更始，詔錄忠諫，舉遺佚，臺省諸臣上疏陳言。而南科道岑公應賓尹公校所舉二十餘人，藩臬以府君居首。下吏部議，部覆以

府君志行才識均有可取，查有相應員缺酌量推用。尋詔有邊督清理屯鹽之選，令九卿科道各舉所知。而工部尚書雷公禮、戶部侍郎譚公大初、刑科給事中查公鐸、工科給事中許公天琦、陳公吾德並以府君薦。撫臣則張公佳胤、宋公儀望按臣向公程以地方人材薦。初，撫臺林公潤行部訪府君于廬居，固辭。林公必欲一見也，遂相欽服，卽以揭薦于吏部，而趣其補用。迺府君第移書謝薦者，而實無一字入都門，益忘世久矣。遵恩例進階一級，爲太中大夫。府君膚腴神王，夙少恙。丁丑夏秋之交，微示脾疾。四明馮公者爲兵使，奉府君就醫于湖，無効而歸。兩月頓不起矣。嗚呼痛哉！嗚呼痛哉！初，府君之臨訣也，嚴誠以無入鄉賢。卽世之數月，而兩庠業已舉之鼎祚以治命辭。至萬曆之戊申，太守大梁金公勵刻期以舉于督學楊公廷筠崇祀焉。實非先志也。府君以正德庚午六月初五日巳時生，以萬曆丁丑十一月初九日午時卽

世得年六十有八。娶吾母郭氏。京兆公說孫女。庶母阮氏。生子四。元祚。郡庠生。娶劉氏。漳平知縣劉公鑄女。光祚。邑庠生。前府君十九年戊午卒。劉以節被旌典。鼎祚歲貢士。娶唐氏。廣西按察使唐公汝迪女。庶潘氏。王氏。鄒氏。並吾母郭恭人出。耆祚。府君六十五而生。後公五年殤。阮氏出女一。恭人出最長。適鴻臚寺序班麻涵。舉人麻公值子。孫二。士都。太學生。潘出。娶麻氏。河南右布政使麻公溶女。士好。邑庠生。王出。娶韓氏。高淳邑學生。韓公仲孝女。是爲衢州公邦憲孫。父憲副公叔陽。府君丁酉同籍舉者也。並鼎祚出。士好嗣兄元祚。曾孫六。鴻中。娶徐氏。庠生徐君胥慶女。象中。殤。並士都出。湛中。聘吳氏。郡庠生吳君士京女。朗中。聘太學生劉君文昭女。漳平公之孫也。弼中。幼未聘。並士好出。曾孫女四。士都出者三。長適通政使徐公元氣。曾孫造。一爲士好出。俱幼。未許字。所著有滄洲摘藁。滄州續藁。無文漫草。徐州志。寧國府志。宣

風集。古今家誠。家塾故事。而宛陵人物傳。資省名言。理學詮粹。景行錄。尚未成。今將以某年月日卜塋于某山之陽。謹瀝血濡毫。唯大人君子名世者。覩之一言。責諸幽表。諸墓道。則府君死且不朽。鼎祚諸孤之百世與有榮。施亦不朽。唯下執事哀而許之。不肖鼎曷任皇懷祈懇之至。謹狀。

梅鼎祚撰 《鹿裘石室集》卷二〇

楊道南希淳傳

楊希淳字道南。母未誕之夕，夢笙竽滿耳，闔里走豚，須臾有羽蓋霓幢，擁一仙官入室，遂生焉。幼岐嶷，勵志讀書，日誦千百言。爲古文辭，下筆立就。弱冠，補諸生，試輒高等，聲名籍甚。聞荆川先生名，往從之游。先生大奇異之，由是名益起。三吳豪雋皆倒屣願交焉。歸而弟子從之者衆。與同郡李維明輩相切劘，勸以聖賢自期待，不肯苟同於俗。累試於有司，不第。天臺耿先生督學南來，聞其名，首試以學，莫先於立志論。大加稱賞，因相與講明聖學。由陽明先生上溯孔氏，一日忽大悟，曰：道在是矣。由是與人論學，圓明透徹，直指心要，人無不得其解者。故以方屨稱。至是益和粹，人以方程伯淳云。居久之，以補貢至京師。時方題覆貢不得補，少宗伯萬履泰雅重之，嘆曰：余忝貳春卿，當爲國求賢。今賢者已至吾前而不能用，負愧多矣。於是禮部移文，定爲明年貢焉。歸闕年，忽病，自知逝期，爲書別知交，談笑而卒，年僅四十二。嘗自爲墓志，謂人死當從人乞銘，我固無求者，死後乃有求邪？其曠達如此。平生涉世無迹，處事如庖丁解牛，批郤道窾而不經肯綮。與人交從容款洽，玄言眇論，終日

不盡。時出謔語，雋永有味，令人心醉意消而返。爲文輒出人意表。晚年發揮理道，精深透露，皆儒先所未嘗及。臨終盡焚其稿。少司寇吳自新搜其遺者，僅若干首，刻而傳之。

《國朝獻徵錄》卷二一四



藏

校記

①瞻：當爲「瞻」之誤字。按，「瞻」與「約」爲對文。

明儒碑傳集卷六十六

高拱

大學士高拱傳

王世貞

高拱字肅卿，河南之新鄭人。生而狀貌奇，刻苦學門，通經義，務識大指，爲文不好稱詞藻，而深重有氣力。十七舉鄉試，魁其經。又十三年，始成進士，改翰林院庶吉士，授編修。滿九載，遷侍讀。時穆宗爲裕王，開邸受經，而拱首與焉。拱至進講，輒反覆辨，王頗目屬之。而又以其邸近幸中貴人昵好，間時輔臣嚴嵩、徐階內相，倚若水火，拱往返其間，必所見厚薄，而嵩、階亦以其在王邸，異日當得重，相與推轂之。以是亟推遷爲翰林院侍讀學士。時秦鳴雷已先爲學士矣，頗僅遷南國子監祭酒，而拱遂以太常寺卿兼國子祭酒。亡何，拜禮部左侍郎，尋轉吏部左侍郎，掌詹事府，仍兼學士。拱凡一副主鄉試，復主會試，所構程式文頗見稱。其主會試也，所進題以字嫌忤，上意幾欲有所行遣，階從容解之乃已。尋拜禮部尚書，召入直撰齋詞，賜飛魚服。亡何，與郭朴同入內閣，朴得武英殿大學士，而拱爲文淵閣大學士。春芳以朴銜吏部，遂亦改吏部，居朴前，然事皆決於階。春芳等具

員而已。上所顧問亦唯及階。階之始爲禮部以至首輔十五年，而請立太子者數四。上春秋尚幼，意不欲言繼嗣，輒報寢。時裕、景二王方并重，朝野憂其端以爲且有所更樹，姦人從而陰爲譖矣。一旦景王之國，咸鼓舞稱慶，而奸人者亦得罪去。一日，上忽下諭，自謂郊廟弗躬，早朝久廢，且病弱弗任，卦數向問，宜卷身奉玄，傳繼不可緩，不然恐或後醜耳。且令與在直諸臣密計以對。階皇恐對，謂此豈可與諸臣計。夫所謂後醜者，必有非常悖逆之人，而又有大姦惡左右之，以有此巨測，今何足疑也。上又謂得無以久待爲恨乎。階又力辨，而上猶以成祖之注意在孫而弗及子爲問，且云賢孝難必，吾言不甚妄。階又言，成祖之在位久，仁宗之在位促，皆天命也。繼承之際，史冊甚明。上道德隆備，天命所歸，而今之賢孝又中外所共聞，萬萬無可疑者。居月餘，景王自德安奏書，以上不豫，請恭詣玄嶽祈禳，以嘗。上下階擬。階知爲中涓泄之方，謀所以沮止，而王亦病復奏書請詣。階因擬遣醫調治，而今王且靜攝，毋輕動。俄而王薨，於是裕王乃復安。景王所請全禁，土田湖陂可數萬頃，皆侵之民，階擬悉以還之。



儒藏

諸王無得乘而矯攘者。楚人大悅。上以祈雨故欲建雩壇。又欲重建興都故宮殿。階以府庫財竭。而郎襄困水。力阻而止。天下鹽額獨淮揚重。歲賦六十萬金。而前是鄧懋卿欲取。上悅。增之至百萬金。商不能供。至有雉經者。則皆竄徙。階乃風御史奏復故額。額乃登。竄徙悉歸。上故好玄素術。多所服餌。晚節益甚。階時時推之。而方士熊顯與藍田王胡大順比而爲妖。妄鍊水銀。托乩語進曰。金書天章。是爲先天水銀長生之藥。上以問階。階力言其不可輕餌。乃已。又以乩當請而不下。問階。階對謂紫姑附筆亦有之。第此曹非能究其術。大較與所使媾結。得上旨乃能答。今不得。上旨故不能答耳。因極言藍田王胡大順譎張洞喝。以挾取人資。不可信。亡何。俱以妖露論死。上旣以服餌故病躁。而戶部主事海瑞極論。上過失。及因而風譏階。上患其速置。詔獄。欲殺之。且諭階於南都治。別殿棲止。以避瑞。階謂主聖則臣直。瑞固慝。然不過仰恃聖明在上。沽血諫名耳。殺之則成其名。容之則益見聖德之廣。上抵階疏地。已而取讀之。又取瑞疏讀之。遂得長繫。上雖不殺瑞。然意忽忽不樂。病亦小瘳。階欲幸

興都。階謂且試之也。因驟上體罷不耐。輦路旁爲對。而上意遂決。諸中涓貴人具幣幕輿餽之類。六軍且甲矣。以問階。階乃力言。南幸事臣所以不敢從命者。一以爲聖躬計。一以爲國事計。往者興都之幸。爲已亥。距於今二十有七年。皇上自度精力之壯盛。孰與往時。計聖體遑豫。十有四月矣。毋論彼二十七年。卽今日體氣之康豫。孰與此十四月前。大輦行不及宮居之安。途次不及殿庭之遑。計天祐聖躬。豈必遠行而後獲萬康之慶也。已亥之歲。虜警甚輕。彼時猶遣輔臣行邊。六卿出督。內而九門。外而三關。俱設大臣帥重兵以填之。今之邊境。聲息時聞。內外官軍未甚整練。而六飛遠狩。都輦空虛。狡逆之謀。儻或竊發。聖駕在外。能不驚憂。抑不特此二事而已。至於有司科斂小民如聖慈所軫念。全楚兵荒。頻仍如撫按所奏陳者。臣尚未之及也。上指奏內狡逆之徒。倘或竊發。獨乙之而報階曰。此八字不可作常視。其罷行。於是中外心遂安。始春芳。訥之共政也。事階謹。側行僂僂若屬吏。而朴拱皆階所薦也。顧於禮稍倨。兩人皆河南爲鄉曲。而拱以朴蚤貴。事推之。朴念拱侍經俗邸。莫得其力。兩人相與懽甚。階



微聞之不擇、而拱以驟貴而驕、每謂階太假言路爲非大臣體。言路亦聞之、而吏科都給事中胡汝嘉者才而好挾重、故嘗與拱貌相善也。偶劾罷拱之姻親工部侍郎李登雲、拱與客言之而怒。汝嘉內自危、而又探知階意。時拱未有子、乃移家近西華門、日同上書寢、則竊出與女媵私、迫暮而後進。又一日上病甚、誤傳有非常、拱盡斂其直舍器服書籍出之。應嘉以是爲拱罪、露章劾之、且發其它事。賴上瞋不省。階擬旨報聞、而拱辭辨、疏且上、亦兩解而已。亦無所爽美。拱意階右之、謂應嘉欲深文殺我、以是恨二人切骨。亡何、上大漸、遂崩。當大漸時、階念上英斷類、高帝、獨齊、燕、土木、珠寶、織作不已、民力小困、而一時抗言廷諍得罪者、雖其志若已伸而未牽復、欲自登極詔發之、不能無疑於改父、而。上克終之德未光。時門人張居正爲學士、方授經。裕邸夜召與謀、具遺詔草、不以語同列。質明謁王、請入臨畢、遂以詔草上報可。詔下、朝野舉手相賀、至有喜極而慟者、同列皆惘惘若失。而朴尤推。時語人徐公謗先帝可斬也。拱亦與相應和。而是時朝儀廢不講者二紀餘、初元故老獨階一人在、諸所草創皆中節、而

登極詔赦尤詳切、人舉以配。先帝登極詔云、登極詔、故相楊廷和草也。廷和言至是始驗。都給事中胡汝嘉以數言事得用轉、而會吏部、都察院考察庶僚、應嘉亦參與焉。既得旨而復論、救給事中鄭欽、胡維新非故事、於法當罰、而階時已示公同列、使輪直筆而已。酌之時、郭朴當執筆、曰、汝嘉小臣也。上甫卽位而敢越法、無人臣禮、宜削籍。階度朴爲拱報讐、而傍睨拱、則已怒目攘臂、乃不復言、而削汝嘉籍爲編氓。命既下、諸給事、御史合疏請留應嘉、其語有所侵撓。階乃與春芳等具疏、謂應嘉論救考察非法、所以擬斥、給事、御史謂。上初卽位、宜開言路、廣德意、所以請留。臣等欲守前說、則涉違衆、而無以彰陛下恩。欲從後奏、則涉徇人、而不能持。陛下法、因兩擬去留、以請中旨。薄應嘉罪、調外。而當階具疏時、拱故不言、而目屬郭朴、復力持之、幾失色。於是言路意應嘉、謫出拱指、羣上疏攻之。上以拱轉臣、且故嘗受經、不聽。歸而言路益攻之不已。拱恚甚、欲階擬旨杖責。階從容言、當先帝時、以謫斥威言者不已、而至杖、杖不已而至戍、且長繫、戍長繫不已而至僇、然竟不能杜其口。有如海瑞者、出吾曹人臣耳、寧可

以力勝拱益不悅而恃上左右多裕邸中知舊秉公抗疏至與言者辨而交相詈當是時內閣凡六人階以春芳朴拱而益以陳以勤張居正以勤居正亦皆上所受經而拱友也一日方會食拱忽謂階曰拱嘗中夜不寐按劍而起者數四矣公在先帝時導之爲齋詞以求媚宮車甫晏駕而一旦卽倍之今又結言路而必遂其藩國腹心之臣何也階良久曰公誤矣夫言路口故多我安能一一而結之又安能使之攻公且我能結之公獨不能結之耶我非倍先帝欲爲先帝收人心使恩自先帝出耳公言我導先帝爲齋詞因我罪獨不記在禮部時先帝以密札問我拱有疏願得效力於齋事可許否此札今尚在拱乃頰赤語塞春芳等邀而與至階室謝罪階出卽堅卧引疾拱亦引疾上俱慰留之而拱以登極恩遷武英殿大學士與朴春芳俱加少傅太子太傅驟貴甚於是給事御史合而就階第教勸視事而其醜詆拱無所不極口乃至白簡無虛日而南都亦響應矣當先帝日所以響信階甚階又多在直其二子在外不能無干請令人子橫行鄉里關頗有指拱故鉤得之緣飾爲疏將以訐指階而至是迫則授其

門生御史齊康伴上之階乃疏辨乞休而左都御史王廷等合九卿及給事御史交章請留階而極論拱與齊康罪狀上爲誦齊康遠外而許拱養疾然尚賜金幣馳驛遣行人導行而使鴻臚卿宣諭階始出視事乃露郭朴所以私拱而阻胡應嘉狀於言路移攻朴朴亦不能安久之引疾去其恩禮薄不能如拱而頗有以階爲甚者時上開經筵階爲知經筵事春芳以勤居正同知經筵事修世廟實錄階與春芳俱充總裁亡何上欲幸舊邸階等三疏止之不聽先帝朝言事諸臣得罪者多自田間起暴貴而旣以階勝拱則恃而益強事毋論大小輒爭上久而不能堪諭階等責其欺肆令詳處階言言官遭際昌時思欲報答非敢爲欺第性氣粗率則言或過當事出風聞則語有失實不請事體誠有之謹錄聖諭轉示使各省改而同列尼之者云奈何不擬薄誹階曰卽上遽有譴我情且力諍而乃導之誣乎則曰如上諭詳處何曰今省改卽處也及疏上上亦竟弗罪也而御史李惟觀上疏請毋得詰言者以廣忠益階擬旨報聞上以筆乙之而給事中馮成能人雖其意爲疏婉而加詳同列謂得無咎



旨謂聽諫乃朕素心、卽善言未嘗不嘉納、昨論爲不請事體者發耳。自今空審所言、以稱塞朕意。同列皆難之、階曰、彼獨不難言、而我乃難擬也。且上所以乙御史疏者、正謂未有以開明之耳。擬上果不異、俄而有中旨、令翰林臣撰中秋宴致語。階疏謂先帝神主猶在几筵、卽小小宴樂猶不可、而況致語哉。上於是併罷宴。上欲以九月請天壽山行祀諸陵、階與同列言、皇上此舉蓋重祖宗弓劍之藏、切歲時霜露之感、非他遊幸比。第天子之孝以保安社稷爲大、故龍輅發引尚不親送、山陵二祭止於遣官。今日暑雨而後禾稼淹沒、坊舍摧塌、萬乘親行、六師供億、何以待之。蓋持者再而上不聽、乃盛陳比勝、窺伺叵測、意以間、始報俟異日。其明年春、警稍解、上竟行謁陵禮。甫至齊宮而使中貴人滕祥、李芳以意問曰、行禮在次日、上欲輕騎一出觀形勝、可乎。階曰、上以祀來乎、以觀形勝來乎。以祀來則先遊而後行禮、非所以展孝思也。祥等曰、然。乃祀畢而後出遊。俄奉旨以太監呂用等分監圍營兵、階與同列上疏、謂今無所謂圍營者、且中官坐營、起于景皇帝而革于世宗、臣望陛下以世宗爲法、以

兵政廢爲慮。上不擇、所以督責頗峻、而階等平之益力、乃爲寢前旨。俄復命修內教場、勅中貴人習騎射。階因御史言、復率同官上疏、謂陛下此舉蓋因邊方多事、居安慮危、故示邊臣以意使之振戎飭武耳。如御史言則有防微杜漸之慮。臣等竊謂邊方遠、禁地近、聖躬重、戎務輕、當先帝時、嘗欲立二內營而復止之、此必有深意在、不可不三思也。亦報寢。聖誕日修先帝故事、加恩階、錄一子尚寶司丞、春芳加兼太子太師、建極殿大學士。階尋考十八年滿、自劾求去、溫旨慰留、不聽、而命吏部議、擬加支伯爵俸錄、一子錦衣千戶、仍進少卿瑞爲太常卿、賜勅褒諭、宴禮部、階辭、仍聽免伯爵俸。時有小璫以事干巡城御史、不應、則踵門而謁御史。御史怒、執而笞之。羣璫趣之司禮中貴所、欲奏訐御史。階業爲解、得免。而御史乃前論璫、璫恨甚、結黨百餘人、要御史于午門毆辱之。都御史王廷樞疏糾羣璫、以問階、階念疏卽行、彼璫爭自匿、欲得其主名、則且展轉不可究詰。萬一彼先之以誣我、禍且叵測、先朝事可監也。乃使人致司禮之上佐曰、尚文者語之曰、諸貴人羣毆御史、業何處文倨、謂內外各有體、相公毋但爲御史

惜。階曰：吾非爲御史惜，爲國家大體惜，且爲司禮諸公惜耳。文怪問何謂。階曰：母訥御史王臣，卽天子臨御之所而羣毆人，能保上之不怒乎？諸公何不以時調得其人而速奏之？卽外廷有繼者，其輕重在諸公手，而上必不怒諸公，體故在也。文悅，以告其長勝祥，悉得其主名奏之。王廷疏繼上，羣瑣窘不能自匿，又無可以宛轉道地者，悉就逮。杖其首惡三百，發邊戍，餘九人各六十。各南京淨軍。階旣以詔旨省諸鎮進解，奉太和事推與諸監局工役，而所持評又多。官禁事，伸者十且八九，往往假曲而行，久之其人益側目。而李芳故與梁佃俱侍裕邸，爲承奉。其在世廟時，芳已備散局，其人頗好讀書自負，以呂強、鄭衆之流甚惡嚴嵩奸，而薄階以不能救正。旣與梁佃俱驟貴，而佃輩老，勝祥已卒，芳益發舒，數抗章言外廷事，而諸多以故事持之，不盡善芳，頗以望階。階亦覺其意，會諫。上幸南海子，不聽，上疏乞休至三上皆優詔不許。而亡何，張齊之事起。張齊者，戶科左給事中，也。使宣大納商賄三千金而爲之請，欲破壞鹽制，以利予商。大司農格不行。商聚而咻之事，且泄，故爲大言得階，欲發兵十萬襲邊民之入

虜曰板升者，爲奇功以解。階哂而已。已謁吏部尚書楊博，博偶問君近從二邊來，墮商得無困否。齊謂博已知之，復上疏請考察庶僚，及聽大臣自陳，冀以伺喝止博，而階復謂非時不許。齊迫，則走謁階子瑞，欲求爲居間。瑞病不出。齊恨甚，遂露劾階六事，多御史康陳語，詔調齊外任。階再上疏乞歸，而張居正意不欲階久居上，且與高拱有宿約，以密旨報李芳，階欲不任矣。遂許之。尋賜馳驛，再以春芳等請加恩，給夫廩，璽書褒美，行人導行如故事。階辭，賜白金、寶鈔、彩幣、襲衣。于是九卿大臣給事御史上疏慰留，而都御史廷獨探得齊納賄事，劾之下獄，論戍邊。而春芳始爲政，春芳爲人性寬平，事期安靜，不好爲噪刻，時人比之李時，其氣力不如也。而紫廩過之。時陳以勤、張居正居其下，居正視春芳蔑如也。始春芳見階乞歸而歎曰：徐公尚不任調停，我何以勝之？旦夕惟有歸耳。居正從傍曰：如此庶幾成一名。春芳嘿不應。而亡何，趙貞吉自詹事府入，貞吉故有仇直聲，旣爲嚴嵩所罷，終不能堅久。而晚節中貴人陳洪善而薦之，旣人多所紛更，欲創革兵制，與兵部尚書霍冀異，使言官噪而逐之。又緣冀孽吏部尚書楊博于陳洪，復逐



之中外皆側目。春芳模稜而已，不能有所持衡，而居正與上左右合起拱於家，使掌吏部故事，居內閣者，不當出理部事，理部事不當復與閣務。拱稱掌不言，兼當爲部臣矣，故不遣行人齎璽書諭而僅部容拱日夜馳至京，而趙貞吉亦謀之春芳，欲掌都察院。春芳不能違，拱既陞見，與貞吉俱免奏事，承旨遂參預閣務，而王廷與刑部尚書毛鵬即日歸矣。胡汝嘉以參議方憂居，一夕自恨久，而最右階而攻拱者，歐陽一敬、陳質皆以給事中爲太僕太常少卿，皆移疾歸，一敬至在道憂歿。物情洶洶，拱乃使其所知徧布腹心于言路，曰：拱當洗心滌慮，以與諸君共此治朝。所修怨而快意者，有如此日。言路諸臣乃稍稍自安，拱亦間進一二以明無他，而拱既以安，則漸橫出而坐吏部，斥陟四品以下，風言路之爲其門人若韓楫、程文、宋之韓華，使齟齬三品以下，入而扼春芳腕，使必行。是時趙貞吉亦恨階之不留爲禮部而遷之南京也，相與日吹摘舊事以見階短。時撫按諸臣猶舉近詔請褒進刑部主事唐樞官，而廢杖或者都給事王汝梅子拱特爲之寢格，而上疏極論，謂先帝以神聖御極，峻烈鴻猷，昭揭宇宙。皇上嗣登寶位，志

隆繼述，所謂不改父之臣與父之政，而當時不以忠孝事君，假托詔旨於凡先帝所去如大體大獄及建言得罪諸臣，悉起用之，不次超擢，立至公卿，其已歿者悉爲贈官廕子。夫大體先帝所親定，所以立君臣父子之極也。獻帝尊號已正，明倫大典頒示已久，而今於議禮得罪，悉從褒顯，將使獻皇在廟之靈何以爲享？先帝在天之靈何以爲心？皇上歲時祭獻，何以對成二聖？至于大獄及建言得罪諸臣，豈無一臣當其罪者，而乃不論有罪無罪，賢與不肖，悉加褒顯，無乃以反商政待皇上歟？卽武王克商反其政，不過釋箕子囚，封比干墓，加意賢者而已，未聞其於商家所不用之人盡用之也。而况皇上乎？皇上先帝之親子也，議事者先帝之臣遺諸皇上者也，而乃敢于如此，自悖君臣之義，而傷先帝父子之恩，非所爲訓天下也。夫人臣歸過先帝，反其所爲以行己之私臆，非一日矣，室亦有明之者矣，而今當時之臣尚公然爲之，不覺其悖，傍觀之人尚漫然視之，不以爲非，豈天理果滅，人心果死歟？若終始嚙嚙，不一破其說，恐天下之人直以悖逆爲當然，天經地義，淪教日深，無父無君之事將由此

起則何以爲國也。得旨是其言。罷極及汝悔不旋。復以遺詔王金、陶世恩等安進藥物損朕躬。而法司當之子殺父律。當削。當朝審。拱復上言。臣聞此獄。願不勝隱痛流涕曰。先帝之受誣。一至此哉。古之人君有殞于非命。不得正而終者。其名至爲不美。先帝聰明睿智。事無大小。洞燭隱微。至于保愛聖體。尤極詳慎。卽用大醫進劑。亦必有御札與輔臣商確。安肯不問可否。輕服方士之藥。又安有既服而受傷。不以爲言。又復服之理。先帝臨御四十五年。享年六十。壽考令終。益自古所罕有者。末年抱病經歲。從容上賓。曾無暴遽。天下所共聞。而今乃擬王金等前律。謂先帝爲王金所害。然耶否耶。議事者不知何意。誣以不得正終。天下後世以先帝爲何如主。因乞下法司更議其罪。仍宣示遠近。付史館。有旨復是其言。前是時。有司所論金等殺父律果未當。拱得以藉口。其議亦有可采者。而拱意實欲實階。所謂欺謗。先帝假托詔旨。皆失法也。且因以傾奉芳。賴上不甚解。不及階。法司改減王金等至戍。刑科給事中駁。謂金等坐前律因不當。而焚感。先帝事有指。安坐斬勿赦。拱怒。遂遷給事中于外。拱爲人有才。

氣英銳勃發。議論蜂起。而性迫急。不能容物。又不能藏蓄。需忍。有所忤觸。之立碎。每張目怒視。惡聲繼之。卽左右皆爲之辟易。既漸得志。則嬰視百辟。朝登暮削。唯意之師。毋敢有抗者。間遇親知。引滿訾浪。一坐爲懼。在詹事日。與學士瞿景淳同修大志。嘗引鏡自照曰。吾殆神龍乎。景淳老儒。然亦好戲。曰。公以爲龍耶。吾直謂蚯蚓耳。拱大怒。擲鏡碎之。詔而出。景淳春芳坐上也。以侍郎歸。病卒。而是時陳以勤與拱俱爲俗僚。而名位亦相等。拱意忌之。會以勦秦時政六條中。於吏部微有忤。偶與其屬言及曰。高公故不諳此。其屬泄之。拱怒。卽故屈其奏多不行。而以勤微知其端。上疏懇乞休。優詔加兼太子太師。吏部尚書。望書褒獎。賜金帛。夫廩。馳驛。使行人護行。以勤歸而拱益橫。既覘知上意有所不悅於言路。遂因左右媒而傳。旨下吏部考察拱請與都察院共事。負吉雖故與拱合。而欲甘心階。然惡拱之借考察以盡快宿憾。上疏止之。不聽。而拱以是恨負吉。拱乃悉錄其嘗論摘者。幾時亮等黜之。陳珪等滿之。而間及負吉所厚。負吉亦持拱所厚。以兩解。拱以是益恨負吉。而韓相爲吏科都給事中。遂上疏論負吉庸橫當罷。負



吉志力辨。謂人臣庸則不能橫。橫非庸臣之所能也。往奉特旨。命臣兼掌都察院事。臣所以不敢致辭者。竊思皇上任高拱以內閣近臣。而兼掌吏部。入參密勿。外主銓選。惟任太重。雖無丞相之名。而有兼總之實。即古丞相亦不足過此。聖祖之所深戒。而臣之訓典者。皇上委臣以糾紀彈壓之司。與之並立。豈非欲以分其勢而節其權耶。今且十月矣。僅以此考察一事與之相左耳。其他壞亂選法。縱肆大惡。昭然在人耳目者。尚禁口不能一言。有負任使如此。臣真庸臣也。若拱者。然後可謂橫也已。夫拱乃背公殲黨之人。而拱之門生。其腹心羽翼也。他日助成橫臣之勢。以至於摩天決海而不可制。然後快其心。於此已見其端矣。古之史魚。一小國之臣爾。雖死不忌其主。尚欲以尸諫。臣受皇上知遇。若此。今雖去。敢不以國家大禁。聖祖之所深戒者。一陳于君父之前乎。因請還拱內閣。勿再預吏部事。中貴人洪雖欲兩庇之。知必不可並立。為言于上。使負吉歸。而拱亦上疏辨。其辭頗道。上優詔慰諭之。然竟會吏部。惟不能辭也。階之在先帝朝。而燕中有習白逆教者。相聚為奸淫不已。且有異謀。其伍有告之

階家僮徐賓者。階以屬兵部。時楊博為尚書。悉捕而誅之。實論功。得為錦衣衛百戶。頗橫燕中。至是拱使人告言實罪。下獄煅煉之。俾引階為誣人反。安殺以為功。而不能就。止坐實他事。拱益怏怏。于是召齊康起。張齊而會階之鄉人陳懿德者。素不悅於階。自翰林謫。而拱其坐主。權之尚寶司丞。懿德乃與同門韓偉。程文。宋之韓及兵部郎中周美等。日為拱伺喝。言階以數萬金謀於中貴人。且起用矣。至曰。階使刺客刺公矣。時時推弄階。星命以媚拱。曰。階於法當殛。其數亦盡。今成。而階之子前太常卿璠與少卿琨性貪鄙。嘗使其家人置私邸於燕市。貨可三萬金。階不知也。客乃為拱謀。階所藉以復起者。貨竭其貨。可無復起。乃因階之鄉人漢陽守孫克弘。行候問。而指其為階所使。捕其人。下司隸御史。使引邸中僮奴。悉逮而籍之。復使給事中張博等論階三子行巡按御史逮。而起其門人前蘇州府知府蔡國熙於家。復其官。旋擢為蘇松兵備副使。委以階父子。而階之讐復上書誣階父子事。併下撫按。悉以委國熙。國熙故任蘇時。潔廉有忠愛。時階方在政。而奴之賈于蘇者。橫國熙以法外窮治之。御史聞而數難。國熙不自得。乞

休。家居久不能持貧而謁齊康扶之千拱。拱悉其事故。擢之。國器乃窮治其事。且舉能言階三子及家人事者有賞。於是階之故人子前府同知袁福徵諸生。莫是龍皆以徵憾爲謗書。稱陳懿德以授拱。福徵遂卽家補鳳翔。且之任。首賜階五百金。於是凡生平賂階之三子者。有所負進而多責償者。皆前賜金不已。而奸駟小人至無故而賜之。亦得所欲去。三子皆就繫。伴階留而不堪其咄。增其室矣。松俗故澆。至是遂益潰壞。浸淫及他郡。拱於是多改其門生爲部屬。大理者悉以爲給事御史。而部之員外郎至知州入而實授五品者。亦得爲給事。自劉瑾亂政時一行之數十年所未有也。前是虜大酋俺答走其孫于塞。請歸之。當入貢。因與互市。邊臣王崇古方達時爲言於朝。朝議嘆惜不能一。拱奮身主其事。張居正亦和之所。以區畫頗當。亡何而貢成。春芳亦緣以進。少師中極殿大學士。兼支尚書。而拱加兼太子太師。居正加少傅。俱進建極殿大學士。錄一子尚寶司丞。春芳雖以拱之故不得舒。然猶時取裁酌。不至過甚。間爲階寬解。而拱漸不樂。南京吏科給事中王慎緣而論春芳。乃力請骸骨。凡上三疏。許之。恩數一視階。而拱當

居首。陽上疏請解部事三辭。上不許。而賜之白金文幣綉蟒服。所以褒諭甚至。亦陳洪力也。時廣寇方熾。張督撫臣請以兵討除之。與拱意合。乃爲獎借。得盡力。而遼東數與虜角。拱善其撫臣張學顏以及總帥李成梁。撫而用之。遂屢勝成功名。拱初起。強自勵。人亦畏之。不敢輕昧納。而其弟爲督府部事者。依拱後第而居。於是韓揖等乃數携壺榼往爲小宴。拱自閤或吏部歸。卽過其弟。見而悅曰。若等乃爾歡。吾不如也。因留酌。自是以爲恒。而益以珍餽果飲食愈暢。乃各進其所私人。欲遷某官。得某地。拱時已且醉。曰。果欲之耶。以一琴板書而識之。次日除目上矣。以是其所狎門生及客皆驟富。門如市。而揖文之韓輩有所恨於他給事御史。至中夜警門而入。拱出見之。則陽怒若氣不屬者。曰。某某乃欲論吾師。吾知而力止之。暫止耳。故不可保也。拱恚且烈。質明卽召文選郎移缺而出。其人於外亦不更詳所繇。以是中外益畏惡拱。以爲叵測。而拱最後時語客曰。日用不給。奈何。其語聞諸撫鎮以下。賂納且腐集矣。初。司禮之首璫閹。時馮保以次當進。而偶有所不得意于上。拱亦素畏之。乃緣上意薦陳洪。洪故長御用者也。何



不當司禮而得之、保恨洪、因併恨拱。洪因而力爲拱內主、然其人不甚識書、久之以忤。旨罷出外。而孟冲長尚勝者也、與司禮遠、而以割烹當。上意拱復薦之、而保居次如故、其恨拱刺骨、拱亦覺之。拱爲祭酒而張居正以中允兼司業、拱自負以必且相、相則當雄重、不爲經常貴人而已。而器居正材、謂且勝我。居正亦委心依拱、兩人歡相得、不啻兄弟、每夜語共達丙、而其後拱不容於階、居正爲之謀、得善歸。其復出、居正亦與有力、復合而傾其同類、且盡。僅一股士僚、亦裕邸故臣、自禮部入、累遷至少保、武英殿大學士矣。士僚之入、亦中人援、以不由拱、故拱不能無忌、而居正亦厭之。士僚樵、不能曲事拱、而拱素賢張四維、自諭德躡爲學士、又躡爲吏部左侍郎、幾欲前薦之入閣、而士僚得之、故亦心怨拱與四維。會四維以鹽事見紕、御史部永春雖解、而它御史復反之、疑出士僚指、于是拱之客亦有爲四維而論士僚者。士僚亦疑出拱指、而韓楫復揚語脅士僚欲其自免歸。故事、給事中朔望入閣、揖、士僚對衆而詰楫曰、閣科長欲有憾于我、憾則可爾、毋爲人使。既別、拱語之曰、非故事也。士僚忽勃然起曰、若爲張吏部道地而抑

我、我不敢怨、而今者又逐我、而使張吏部據我坐、逐陳公、再逐趙公、又再逐李公、次逐我、若能長有此坐耶。揮拳擊之不中、中几有聲、拱不能卒答。居正從傍解之、亦許而對。明日、韓楫之疏上、士僚得請致仕。而階從困中上書拱、其辭哀、拱雖暴戾、頗心動。居正亦婉曲以解、而蔡國熙所具獄、戍其長子璠、次子琨、氓其少子瑛、家人之坐戍者復十餘人、沒其田六萬畝於官。御史聞之、朝拱乃爲。旨謂太重、令改獄。而國熙聞而變色曰、公賣我、使我任怨、而自爲恩。尋以遼東大捷聞、拱進柱國、中極殿大學士、而居正以六年滿加兼太子太師、至是再加少師。是時內閣獨拱與居正拱等因疏請益輔臣、報謂吾用卿二輔以理天下足矣、何必益。拱乃薦起故少傅吏部尚書楊博、禮部尚書高儀於家、然尚不肯還博於吏部、而使之長兵部、儀亦以原官領詹事府而已。久之、儀始以文淵閣大學士入閣、與拱同事、而御史汪惟元上疏譏刺時事、謂執政之臣不當爲操切報恩。拱召而詈之、亟補按察僉事以出。而尚寶卿劉奮庸所上疏、其譏刺益切、給事曹大埜遂抗章糾拱罪狀、遂并奮庸謫外。而逐居正與知之、又以其常與中貴人通而墮

其事而叱數甚口。居正頰赤，強笑謝罪。拱淺人也不復記，而居正銜拱深，然絕不露拱以大望言稍戕傲，而司禮孟冲復怙旨出外，保遂代之，與拱意相忌。而穆宗不豫，尋大漸召拱，居正見而憑几執拱手，頤皇后言，以天下累先生，且復爲諭屬拱等後事。事與馮保等商而可行。俄而上晏駕。時今上在東宮，拱乃條列卽位數事上之，頗周悉。然大指使政歸內閣而不倚落。尋要其門下給事御史爲諸疏以劾馮保，時居正當遣視陵地不出，拱使所厚語居正曰：「當語公共立此不世功。」因語云云。居正陽笑曰：「小事耳，何足言不世功。」而密遣人報保，保得爲備。乃言於皇后貴妃曰：「拱欺太子幼冲，欲迎立其鄉周王以爲功，而已得國公爵矣。又多布金於兩宮之近侍，俾言之。」皇后與貴妃皆錯愕。保乃抑給事御史疏不進達而縱旨逐拱，責其專擅無君，令卽日歸田里。以次日召羣臣入聽宣詔。拱猶謂此必逐馮保也，使使約居正入朝。居正前已知之，而憚服疾，故徐徐進至奉天門，中官出三宮詔，皆啓而授鴻臚。使宣則逐拱，拱面色如灰，汗陡下如雨，伏不能起。居正倚掖之起，使兩吏扶携出，以明晨就輿車出宣

武門。道傍人皆擲榆之，有言者。居正乃與高儀疏請留拱，不許。請給驛許之。至良鄉而始具威儀以歸。於是階事盡解，三子皆復其官，家人不麗一笥杖。至年八十，天子遣行人卽家賜璽書褒諭，賜金幣及繡蟒服。階遣其孫疏謝，詔予官中書舍人。明年卒，賜祭者九，復加四祭以示重，官爲治葬，贈太師，諡文貞。再予一子官尚寶司丞。又明年春，方亦卒，賜祭九，加二祭，其他俱視階，亦贈太師，諡文靖。而拱之歸也，意忽忽不自得，間從故人飲，或盛服拂輿從，或乘一騶，楚服馮策，或從十餘騎遊獵，而亡何有奇衣人輒入至乾清宮門，遂上出爲誰何者所獲，而馮保得之，置刃其袖，挾使稱拱與陳洪謀以千金餌而使行刺。時保兼領東廠，與朱希孝同謀，獄且成矣。保先使四緹騎馳詣新鄭，頤指縣官備拱之逸。縣官卽發卒圍拱第，家人悉竊其金寶烏獸竄。拱欲自殺不得，乃出見緹騎，問將何爲。緹騎曰：「非有逮也，恐驚公而使慰之耳。」拱乃稍稍自安，而會居正初亦欲重拱罪，旣念以非事體，乃微風保，保尚持不肯從，乃復風希孝，希孝行數萬金以賂保用事者，且賂三宮左右，當再獄。忽大雷電，保懼，乃盡反其辭，而坐其人以閑入宮。

門、趣粟之市。拱以驚憂成疾，後少愈，不復振。卒。其家以卹典請，馮保傳旨爲拱事。先帝欺肆不忠，罷弗予。居正等請之，始許復其官，祭葬如例。已復傳旨止予半俸，而列其過於祭詞。春芳之歸也，父母故無恙，日縱管樂爲懼飲。其父母以壽終，而春芳病盲，卒時年七十五。

光祿大夫柱國少師兼太子太師吏部尚書中

極殿大學士贈太師高文襄公拱墓誌銘

郭正域

嘉隆之際，相臣身任天下之重，行誼剛方，事業光顯者，無如新鄭高公。而先後處兩才相之間，先爲雲間，後爲江陵。雲間善藏其用，龍天下豪傑爲之羽翼，善因時耳。江陵負豪傑之才，其整齊操縱，大略用高公之學，而莫利居先。彼方割刃，此猶坦腹，蓋公之漸成者累矣。志不盡舒，才不盡酬，悲夫。公沒且二十四年，而嗣子務觀乃得請易名之典，上予諡文襄。諡法因事有功曰襄。上念公功在社稷也，既得請而務觀乃敢乞誌文。按狀，公名拱，字肅卿，其先爲洪洞人。六世祖曰成者，避元兵，徙新鄭居焉。成生二子，生亮、亮生旺、旺生魁，緒部郎中。魁生尚賢，光祿少卿。娶於

沈舉六子。兄捷，南京僉都御史，擢金吾衛千戶。弟操，才，右軍都督府經歷，棟鳳陽通府。公生而狀貌瑰奇，苦學問，攻經義，爲文不好瑣屑，而沈雄開爽，出人意表。年十七魁其鄉，辛丑成進士，改翰林院庶吉士，授編修。時分宜華亭各以計相傾，公無所見厚薄。穆宗爲裕王，出閣講學，居外府，公爲講官，先在開道。

王日屬而心儀之。時人心洶洶，王日懷叵測，兩府雜居，讒言肆出。公周旋邸中，竭力盡心。王深倚重之。考滿，陞侍讀。戊午，典順天試，尋陞侍講學士。在府凡九年，陞太常寺卿，管國子監祭酒事。王賜金緡甚厚，哽咽不能別。公雖去講幄，府中事無大小，必令中使往問。一日思先生甚，親書懷賢二字，遣中使賜至第。無何，又書忠貞二字賜之，又書啓發弘多四字賜之。壬戌，陞禮部左侍郎，兼學士。知貢舉，科場諸弊百五十年所不能正者，革之殆盡。癸亥，改吏部左侍郎，兼學士，掌詹事府事。時少宰缺，公當往，公曰：「吏曹事不令兩侍郎知，吾無以報。」上而徒以虛名鎮百僚，無以爲也。竟辭不就。乙丑，主考會試，所爲程士文奇傑縱橫，傳誦海內。六月，陞禮部尚書，兼學士。禮曹故自詞臣往，不習吏事，弊孔叢雜。公吏事精核，每出



一語、奸吏股慄、俗弊以清。丙寅、進兼文淵閣大學士、參預機務。未幾、召入直、賜直房、食用乘馬。時分御膳畀之。閣臣入直、西苑自。世皇中年始、有事在直、無事在閣。世皇諭閣臣曰、閣中政本可輪一人往。徐文貞竟不往、曰不能離。陛下也。袁文榮亦不往、曰不能離陛下也。公正色問文貞曰、公元老常直可矣。不才與李郭兩公、願日輪一人詣閣中習故事。文貞拂然不樂。會世皇不豫、入直諸公各移具出。時江陵公尚爲學士、以公事至、語公曰、君父病篤、臣子移具可乎。公愕然曰、吾意乃如此、竟不出。而吏科都給事中胡應嘉有所授旨、遂以是劾公曰、皇上違和、正臣子額天請代之時、而拱乃爲歸計、此何心也。蓋以此激怒。世皇爲傾公計。會世皇疾革、不省覽。龍馭上賓、華亭公於袖中出草詔、欲以遺命盡反先政。公謂語太峻、與安陽公對案相向曰、先帝英主、四十五年所行非盡不善也。上親子、非他人也。三十登庸、非幼小也。乃明於上前、揚先帝之罪、以示天下。如先帝何。且醮事先帝幾欲止矣。紫皇殿事誰爲之、而皆爲先帝罪乎。土木之事、一丈一尺皆彼父子視方略、而盡爲先帝罪乎。詭隨於生

前而詆訾於身後、吾不忍也。相視淚下。語稍聞外廷、而忌者側目矣。會上改元、問閣臣於是四臣各擬二字上。上竟號隆慶、則公擬也。人謂上意在公。又議登極賞軍事、公曰、祖宗無此、自正統元年始也。先帝以親藩入繼、時尚殷富、遂倍之。今第如正統事行、則四百萬之中可省二百萬矣。當事者竟如嘉靖事行、而司農苦不支。會有言大臣某者、其人實有望不當擬去、而首換重違言者意、乃以揭請上裁。公曰此端不可開。先帝歷年多、通達國體、故請上裁。今上卽位甫數日、安得遍知羣下賢否、而使上自裁。上或難於裁、有所旁寄、天下事去矣。乃竟請上裁。兩人嫌益開、言者爭謂公擅矣。而胡應嘉故以危機中公。會大計、給事中欽被黜、應嘉上疏論救、諸公以應嘉亂政、黜爲民。公以嫌故不敢出一語、而外廷爭謂公去應嘉矣。於是歐陽一敬輩論劾公不少休。時公初在政府、無大異、而三月之間、言者三十餘疏、公亦力請去。疏十二。故事、拾遺不及閣臣、而南給事岑用賓、御史尹校遂以公拾遺。公自念非請病無以謝人言、遂力求去。穆皇驚問左右曰、高先生病邪。左右對曰、病甚。穆皇猶弗忍、良久得請、賜馳驛、

遣行人護送。又賜銀幣以歸。既抵家。猶有白金。蟒衣之賜。越一載。上思公不置。詔還內閣兼理吏部事。公至。慨然以天下爲己任。凡展理閣事。午視部事。人謂公門無片楮。公曰。是奚足哉。大臣以體國爲忠。以匡國事爲美。區區小廉細節耳。寧足多乎。往黠陟取辦倉卒。不無紕繆。公集諸司官。各授之策。曰。史部職在知人。人不易知也。幸諸公早計之。某也德。德何如。某也才。才何如。書諸冊。某也不德。不德何如。某也不才。不才何如。書諸冊。某也所自見。某也得之何人。書諸冊。皆親封記之。月終以復於予。慎之哉。予且以此見諸君賢。每歲所得凡百八十餘冊。以爲參驗。以故賢否不淆。黠陟允當。北虜頻年入犯。中外以兵事爲憂。公曰。大司馬安危所係。至重也。不得其人。山儲之不豫。少司馬止二員。此無事時耳。閱邊事。未免假於他官。或遇總督乏人。未免移於他處。假他官則非本職。不便行事。移他處則補於東。缺於西。彼此候代。勤經歲時。不得假任。門庭誰繫。請於兵部增侍郎二員。一過巡閱。卽以一人往。邊方員缺。卽以一人往。凡邊方險隘。虜情緩急。將領賢否。士馬強弱。皆已曉暢。方略素定。遇大司馬員缺。卽以補之。如此而稱乏用。

必不然也。兵乃專門之學。儲養本兵大臣。當自司屬始。兵部司屬。職在軍旅。而不擇其人。泛然以用。又往往遷爲他官。今宜特高其選。而以有智謀才力者充之。使其專官於此。不復他遷。如邊方兵備。卽以司屬往。邊方撫臣。卽以兵備往。邊方總督。卽以撫臣往。而總督與在部侍郎。時出時入。以候尚書之缺。如此而稱乏用。必不然也。邊方之臣。又宜特示優厚。使其功名常在人先。他官不得與之論年月。脫或不稱則律以法。使其功名常在人後。如是而猶不盡力。必不然也。邊關總督之臣。在邊日久。著有成績。當令回署。以休服之。後不妨再出。使其精神不疲。而知慧不竭。以勤王事。爲濟必多得。旨報可。已。又上疏曰。方今邊徼用兵。惟是薊遼宣大延綏寧夏甘肅。而南則閩廣。是數處者。一有警。有所處分。祇隨奏報。多不中窾。請於是數處。擇知兵事者。一二人。使爲兵馬。彼有身家之處。凡山川險易。將領賢否。奏報虛實。功罪真偽。可一問而得。請以是爲參伍之資。得旨報可。著爲令。甲巳。又上疏曰。臣惟邊方有司。有疆場之責。才者猶懼不堪。卽優禮而鼓舞之。猶恐不振。乃官其地者。非維流則遷謫。待之既薄。志意黯沮。又何望於展布。蓋

徒以地苦其人而曾不顧人之苦其地也。徒以邊方爲遠而不知遠安然後遷安也。請擇年力精強才氣超邁兼通武事者調用。有能保惠困窮俾皆樂業者以三年爲率。比內地超等陞遷。有能捍禦禦敵者以軍功論不次擢用。卽由此爲兵備爲巡撫爲總督無不可。惟以治效不以資格功名之路既開則又有借口邊方以圖倖進者不可不爲一定之說。前邊則昌平順義密雲懷柔薊州玉田豐潤遵化平谷遷安撫寧昌黎樂亭延慶永寧保安安樂山西則河曲臨縣忻州崞縣代州五臺繁峙定襄寧遠鄉寧蔚縣廣靈縣靜樂保德大同懷仁渾源應州山陰朔州馬邑蔚州廣靈廣昌靈丘陝西則固原靜寧隆德安定會寧蘭州環縣安塞安定保安清澗綏德米脂葭州吳堡神木府谷其他不得槩以邊稱得。旨報可。時虜甚警朝臣無經戰者人心震恐。公乃以尚書陳希學曹邦輔侍郎王遵各率師背城列陣以待。以京尹梁永祿南都御史護守山陵。又起都御史劉憲於天津守通糧而以總督王崇古譚綸專征勦無內顧。以侍郎戴才理餉。是歲也虜竟不入。霜降獄故事府部皆在冢宰當執筆。至是大司寇意公關臣不屑往。公曰

上命我視吏部部事皆吾事也。第須得情耳。不至如往年問法司故牘唯唯耳。於是秉燭視獄詞。滯盡不休。查則集諸司議於朝房。凡二十日。往成於議不越三四十人。至是出冤獄一百三十有九人。內王金輩六人謂以硝黃損。先帝聖躬以子殺父律置極典。公驚曰豈有子爲。天子而殺父之等五年尚然在錄者乎。先帝臨御四十五年享年六十以正終天下所共知。今蒙以非命天下後世將謂之何。遂上疏明其說。有旨皆釋之。往大計時銓曹抵問潘泉爲黜陟。公多所參伍或衆否獨留衆可獨黜其黜者必告以故無不惻服。稱神明謂前此未有也。已又策天下有司曰各地方有何賢才尚隱淪有何兇頑尚便正有何利當與何所沮而弗與何害當革何所畏而弗革皆得言之。令封議以告天下事皆在目中矣。時天下重制科輕科貢。公曰天下制科處其三科貢處其七。是崇其三而棄其七也。乃疏請惟賢是視不計科貢除吏時其善地多留而不除名曰養缺。公曰民方無主吾何以留爲。祇留以供用且以供人之用耳。吾無所用又不供人用則何留焉。於是命選司凡所有缺悉揭諸門外使衆見之。故事推陞時皆主事



揭授郎中、呈於冢宰。公曰：堂有侍郎、司有員外、疏皆列名而事不與聞，何居？此不過欲行其私耳。吾其改是。令吏抱牘至後堂，二侍郎同所屬揭之，即冢宰欲有所上下，不能也。鹽馬之官暨遠方府守，人皆薄視之，以故善政無聞。請以賢者往，不得復有低昂。積谷遇貧薄之區，則何以取盈？完糧當苦寒之地，則何以足數？於是特寬其額，而官不苦難。教官暨野廨闕等官，本無民社，而竟處以他省遠方，使有官者不能赴而去官者不得歸。乃請得選本省人，皆稱便。它如開王親內轉之例，覆一甲讀書之規，正撫按舉劾之差，數京官考滿之實，分進士講律之會，定王官陞授之條，議有司捕盜之格，遂使朝無偏黨，官無煩苛。九州四海雷動風行矣。廣東昔稱樂土，後爲盜區，上官計無可施，每以撫爲得策。公請以殷正茂爲總督，促其勦除，勿致養寇。而廣東郡邑多除制科，寬其薦額，勿拘成數，遂使廣東亂民樂業而向化矣。先是，貴州撫臣白土官安國亨叛逆，當勦久而不克，公復偵知國亨非叛，而巡撫者輕聽譏而倖功也，乃以少卿阮文中往受計行。阮至，貴得實如公言，然扭于浮議，語多依違。公復之書曰：民夫異類，順逆殊途，稍有釁隙，

當自處分，不可過言於君父之前。君父威在必伸，一有叛逆，便當撲滅，可但已乎？事非其真，過以言之，則將何以處也？安國亨，安智夷族，自相讎殺，何謂叛逆？而撫臣以告國亨禍不測，且圖苟全。有司不原其情，激而成變，卽以爲叛逆之證，可恨也。國亨上疏乞哀，叛逆者若是耶？有司仍以叛逆論之，遂使朝廷欲開釋而無由，國亨欲投順而無路。且智國亨轉也，智在省則國亨疑畏日深，是挑之使固而增吾多事也。愚謂國亨有罪而不可輕言叛逆，安智當有安置而不可省居。時彼中號令未明，國亨疑畏，不肖赴理，聲言撫臣以勦誘我殺我，乃擁兵自衛。於是撫臣上疏請兵糧爲征勦計。公曰：嘻，誤矣。國亨不出者，疑畏深也。處以叛逆，彼將叛逆自爲也。彼夷酋耳，族滅何爲？時在開恩之旋牀而走。同官者曰：公何旋牀走？公曰：思貴州事耳。從之則非計，無從則失威。今撫臣疏請征勦而國亨亦奏辯，吾意兩行之，而以一科臣往勦。彼聞勦官且至，以身旣在勦當，不敢殺我，我出聽理，乃可以自明，而乃治其本罪，亂或可戢也。胥曰：善。公召職方郎中至授意，遂得請而以科臣賈三近往。公復而授方略。乃國亨聞科臣且來，果喜曰：吾生

矣。吾豈叛逆者哉。語達京師。先是阮約以五事而國
亨母子狐疑不出。至是乃將漢夷犯人王寬、吳瓊、阿
第輩獻出。而母子出就理。輸銀四萬一千有奇抵罪。
益科臣未至而事已定矣。故黔國公沐朝弼既謝事
請入南京赴葬。撫按奏曰。沐昌祚政事清明。以致成
豐。朝弼遁走昌祚。不知所往。請將朝弼銅南京。毋令
回鎮。兵部來問計。公曰。誤矣。雲南守巡故以挫沐爲
丰采。今又其故智耳。領鎮之人衆所寓目。而謂不知
所往。昌祚孺子耳。安能感動天地。朝弼安能爲惡。如
有罪。朝廷以檻車逮之。如之何其賺之令歸耳。後
數日。昌祚奏至。請還其父。且言撫按所奏誣也。廷臣
益信公神明。有如撫按言。則今何以處。北虜俺答孫
把漢那吉來降。邊報至。中朝人心洶洶。罔知所措。公
曰。是奚足懼。顧老酋愛其孫耳。繼報者至曰。酋婦甚
愛其孫。而老酋甚懼其婦。泣欲得孫耳。公曰。虜敢擁
兵來索。吾必殺之。令退去。虜果退去。公請加那吉指
揮使。賚以章服。又語邊臣。令盛其驕從。騎馬街行。使
衆見之。老酋初意中國殺之也。乃聞不殺。又加以官
又美衣食。騎馬街行。大過望。而又知不可得。於是公
請下令。獻我叛人趙全等。以贖其孫。奄酋果以計招

全等。全等皆中國人而爲虜用。居板升。領衆數萬。所
居左曰鳳閣。右曰蟾宮。門曰宣化。牆屋皆繪龍鳳。往
歲破城殺吏。皆其爲也。世皇懸重賞購之。得其一
爵。通侯。然竟不可得。公乃請許那吉歸。又令邊臣以
緋袍、金帶、鶴蓋、鼓吹送之。又宣諭俺答曰。那吉是我
中國臣。若善視之。老酋夫婦既喜得孫。而又見其榮
寵。南向取胡帽叩首呼萬歲。而封貢事之議起矣。先
生親詣射所。面質全等。全果驍鸞異常。次李自馨者。
諸生也。凡數十言不能了者。全一言而畢。先生因問
虜今歲不入故。全曰。虜豈能不畏死哉。偵是處有兵。
是處有糧。人有鬪志。不敢入耳。遂收獄盡磔於市。全
等顧其屬九人曰。吾屬被擒。遯事寧矣。至封貢事。虜
哀求日懇。而中朝疑畏日深。盈庭之議。有如鼎沸。勸
以宋人講和爲辭。公曰。天下之事。以已求人機在人。
以人求已機在己。宋人求和於虜。機在虜。故曰講。今
虜求貢於我。機在我。直許之而已。彼曉曉者。豈爲國
籌利害哉。徒念重大。恐有不效。留爲後言耳。乃請封
俺答爲順義王。其餘都督、指揮、千百戶有差。而套虜
吉能等亦請願如例。而三邊總督難之。公擬旨切
責。復貽之書。三邊宣大似難異同。異同則宣大之市



方開而三邊之擾如故。豈無俺答之人稱吉能而擾三邊者乎。亦豈無吉能之人稱俺答而市宜大者乎。是宜大有市而又擾也。三邊苦擾而實市也。同則兩利。異則兩壞。總督者議始協。於是俺答進馬謝恩。吉能亦附馬。而西北沿邊一帶民狎其野。積人成功。雖深夜獨行無誰何者矣。于是公上疏曰。嘉靖十九年。北虜遣使求貢。不過貪賞賚與互市之利耳。邊吏倉卒不知所策。當事之臣憚於主計。直却其請。斬使絕之。以致黠虜怨憤。擁衆大舉。此往歲失計之明驗也。今天祐國家。請貢稱藩。可以息境土之蹂踐。可以免生靈之荼毒。可以省內帑之供億。可以停士馬之調遣。乘此閒暇。修我邊備。若見寧息。遂爾偷安。則從此邊備寔弛。卒然有變。將何以應。是臣等謀國之忠。反成誤國之罪矣。請每歲特遣才望大臣四出閱視。以今視昔。錢穀贏幾何。兵馬增幾何。器械整幾何。其他屯田鹽法以及諸事拓廣幾何。果有成績。論武功爵。若集故常。罪如失機。上嘉納之。蓋今三十餘年。而疆圉晏如也。虜既貪我財物。虜中婦女亦貪我緡帛。惟恐罷市。我得伸縮而制之。諸所爲貢市費者。卽取諸曩日募府出征之費。不及半耳。虜得我金錢。非

盡獲以歸也。我之羣商又因而爲利。而我數十年所全百萬之命。所省百萬之費。可按籍而求。屈指而論也。蓋漢人五餌之策。公實用之矣。穆皇久不出。欽天監卜吉且視朝。鐘鼓嚴傳。宣閣下急。公疾趨而至。則穆皇已立於堦矣。執公手北行至乾清宮。公不敢入。穆皇顧曰。送我。公承旨。直至乾清宮。上御榻坐。手猶未釋也。有旨。高閣老夜宿乾清宮門外。公謂張公。吾二人一去一留。是示人重輕也。吾爲公奏。得旨。二閣臣皆在乾清宮門外。薄暮。又奏曰。禁地非人臣所宜宿。願宿闕門。陛下有召。可頃刻而至。上可之。百官出。十八日。御體漸復。公具疏請。上愆忿寡慾。覽奏甚喜。越二日。聖恙復劇。公流涕無已。四月二十四日申刻。宣內閣受顧命。司禮監以二札一授。皇太子。一授公。蓋遺詔也。公泣奏曰。受陛下厚恩。誓以死報。奏畢大哭。兩官亦大哭。二內臣挾公長號以出。今上登極。公上言五事。一謂。御門聽政。玉音親答。以見政令出自主上。二謂。題奏繁文。難以遍閱。自有節要。請先籤出。以便省覽。三謂。事必面奏。乃得盡情。四謂。大小章奏。俱發內閣看詳。若或未經發擬。徑自內批者。容臣等執

奏五謂官民章疏當行當止未有留中之理得旨報可而同事者遂以此用間翌日有旨遂公公即乘驛車去道傍之人有流涕者公歸杜門謝客口不言時事未幾而有王大臣之獄柄人將借以殺公已差五校往新鄭有所逮會廷鞠之日白日晝暝迺大臣膝目仰面備極拷略竟不識所謂高公次日殺王大臣而公獲免不敢復見一人矣公素好讀書作問辨錄十卷春秋正旨一卷本語六卷邊略五卷編屏外語四卷掌銓題稿三十四卷南宮奏牘四卷政府書答四卷論屏集一卷程士集四卷外制卷二卷日進直講十卷獻悅集四卷萬曆六年卒于家祭葬止半給又二十餘年值建儲大典嗣子務觀具疏上有旨高某撫當受降北虜稱臣功不可泯贈太師謚文襄廕一子尚寶司丞三十年不白之冤至今雪矣公生於正德七年壬申卒於萬曆六年凡得年六十七歲受室中牟張氏累封一品夫人無出嗣子務觀尚寶司司丞諸子務本務滋俱錦衣衛官生務實武英殿中書務觀六子杜楨楠杜楹杜楫杜楫

以上三文并見國朝獻徵錄卷一七

明儒碑傳集卷六十七

黃天祥 張後覺 李渭 王璧
王敬臣

先師司訓在川黃先生墓表

郭九錫

萬曆初元夏五三日、先師子黃子疾卒於京邸、鄉人羣聚相弔哭、里人涂從事伯躍為買棺視含歛訖、承師志盡却郡若旁郡官京師者諸所賻遺金已、人歸其喪、比自京師還、手出師遺墨授師門人鄧元錫曰、憲職致先生疾革、時起端坐手所書也、方書時、若平居偶漫書無謂者、已覆覆若有屬也、敬藏以俟、元錫起再拜謝、神休心怛、不自知涕之淫淫下也、已受書亟讀之、書在一故帙、帙端其書曰、偶爾一疾、詎意遂成長往、天降之殃、敢不自知、永念平生上負父母之恩、下負師友之誼、今一旦已矣、言之拊心、愧其負在虛行、徒修實踐、未至影見亦妙、終非真誠、來者尚以我為戒云、末著虛游子遺言五字識焉、元錫奉之泣曰、嗟夫、是師末命也、命至矣、翼

來學為至深、則徧以視諸門弟子、門弟子讀之泣曰、嗟夫、師末命至矣、身沒萬里外、拜徵官甫月耳、家懸磬子幼而妻妾處室不顧念、而來學為遺愛、當是時、門人奉師柩塋考府君濕坑之墓下、同兆有宿草矣、於是元錫列師訓、具表諸墓上曰、師末命其可不深長思哉、恍深長思、於成學不有的哉、人有恒言、皆曰學無庸多言為也、顧踐行何如耳、言華也、行實也、今觀之、猶之行也、乃虛實顧辨於其間耶、師事親終老孺慕、處鄉閭恂恂翼翼、無責賤少長賢不肖、由由無間也、與朋友切懇忠告、懇懇結其心、臨財廉、然諾信、言徐動矩、即違次事變雍如也、有守氣而無亟心、疾威不懾、見侮不怒、所不為不欲、確乎其不與易也、師在膠庠中最久、督學使者下校官察士行、校官集多至具楮墨、則人予片函、令各舉所知、發視皆師也、最後一生至、問之曰、若何舉、對曰、廉生某也、曰、某何狀、對曰、立心正大、行已端方、學諭君為欣數者久之、於是督學使者數更蒞、而師以德行旌不易也、



儒藏

中丞吉陽何公。敬所王公有特旌。嗟夫。師於實踐。不致
致著信哉。乃猶以虛行自詡。嗟也。無亦以知之所至
行必至焉之難耶。無亦以修之昭昭者人知之。伏之冥
冥者心知之心嚴之耶。中一不自慊。即飭躬厲行。亦屢
免顧然尤悔爾矣。於不疚無惡者終遠耶。嗟夫。危乎微
乎。固學之大辨也。自南粵東越之學。與人有恒言。皆曰
學不見性。即修行義襲耳。汲汲然一見之為快。乃見有
影見耶。乃影見亦妙耶。即見妙於真誠。終有辨耶。自師
始志學。與三五同志。密切磋於真靜無欲之體。屏見聞
默思慮。凝立危坐以求入。不即終夕。遠揭行以為常。日
收攝純固也。於造體益親。始見師泉劉先生於洪都。一
見語合意。時宅名公有招劉先生宿者。謝不往。曰黃君
學有靜根。吾所願與切磋者也。就師館。教琢者累晝夜。
始見東廓鄒先生於閩。首質格物逐物之辨。時夜坐
門廡間。百十人不辨色矣。鄒公喜曰。誰與問者。對曰某
也。公曰善哉。問與往後者久之已。元錫西遊。吉二先生

次。語未嘗不於師乎拳拳也。師於學。辨念於意。辨意於
覺。而約之貞靜以立本。於見也卓矣。乃猶以影見自詡
嗟也。無亦以有見皆妄。即玄見猶之見耶。見之為陽
焰。見之為空花。見之為泡影。廓然無物也。於物也現矣。
斯影見乎否耶。故鵬游蝶化。見妙矣。然志雖轉徙於無
何有之鄉。冥莫能自反。而為魚飛躍。造夫婦察上下。一
實萬分者。固誠之不可掩也。嗟夫。此學之大辨也。彼以
虛行自蔽者。務外者也。語命之小人之儒。以影見自詡
者。眩內者也。記目之無方之民。蓋終身閤閤。終身勿勿。
終身慥慥。而後能以其身誠也。故曰師末命至矣。異來
學為至深。元錫以巾角事師。師覆字待恩。已誘掖備至。
後更推挽之已甚也。乃知同行殆無足為師門重。心愧
之。顧推其規心之言為之表。用自勗。勗來者。踐修誠一。
庶其繼師志無負哉。即不然。於末命謂何矣。師諱天祥。
字文明。建昌新城人。以貢為鄧武府學訓導。未至官卒。
宅世系生卒始末具墳記中。茲不復悉云。

往平弘山張先生墓表

有明正嘉之際，王文成公倡道於姚江。維時及門之士，自大江以南，無慮千百人，而淮以北，顧寥寥焉。誠阻于地也。既一再傳，諸高第門人各以其學流布于四方，然後一二傑者始興起於齊魯燕趙之間，而其毅然自樹，超然獨得，頗有出於及門諸賢之上，何哉？今夫世胄之家，其子弟有父兄之教，或不能率，有父兄之書，或不能讀，其得之者易，故其守之也不堅，如是而有成者，十之二三焉。甕牖繩樞之子，崛起於素非有所承藉也，得一師則敬信而從之，得一書不成誦不置，得之彌艱，守之彌固，蓋鮮有不成者。嗟乎，學者徒傍門牆，務口耳，其信不若自脩自悟者之為堅哉！予頃居京師，得一友曰孟子成氏，子成，山東往平人也。其守介，其學特立而深詣。予每叩其所由，則稱曰：吾師云，吾師云。已而叩其師，則曰：吾邑弘山張先生也。已又叩先生之所由，則曰：先生故嘗私淑於文成之門人江右中溪顏公、波石徐公，而得之者也。一日出弘山教言數十條示予，予受而讀之，既終業

嘆曰：有是哉！文成之的傳，其將在茲歟？江以南諸君子著書以明良知之說者多矣，大都高者或過于玄遠而無當，其次或湊泊牽附而未融，予甚愚下，誠不能無迷于心。今觀先生書，簡直融貫，無一言不本於心得，無一言不契於宗旨。其最著明者，有曰：耳本天聰，目本天明，順帝之則，何慮何慾？有曰：良知即是知，知即是良，良外無知，知外無良。有曰：人心不死，無不動時，動而無動，是名主靜。有曰：良知是念，念自慾，

是慾，慾自窒，慾念如沸釜抽薪，窒慾如紅爐點雪，摧山填壑，愈難愈速。凡此類，直揭本體，非高遠非湊泊，即令文成復起，且首肯之矣。斯道將不在先生歟？先生名後覺，字志仁，自蚤歲為諸生，獲聞良知之說於兩公，輒自信此心與仲尼無二。久之，益深思力踐，洞朗無礙。已又以取友未廣為規，於是南結會於香山，西結會於丁壘，北結會於大雲，東結會於王遇，齊魯間學者舉知有弘山先生，海內大賢道往平者，必造先生之廬。近溪羅公守東郡，穎泉鄒公視學東藩，為先生兩建書院，曰願學，曰見太。先生又北走燕南，



走金陵、入水西、日與四方諸同志證其所學、歸而與其門人孟子成秋、趙暹、趙維新輩、日夕相琢磨、蓋不知其身之不遇與老之將至也。先生狀貌魁梧、美鬚髯、軒眉廣額、見者傾欽。其事親孝、遇宗黨有恩、與人交、恂恂恭讓、里中稱長者。其仕終華陰論、當在華陰時、會大震、殞者亡筭、先生獨亡恙。奉檄視邑、篆未匝月、起仆弭亂、境賴以安。家居踰二十年、以萬曆戊寅七月二十日卒、享年七十有六。其明年某月日、塋于城北十里原之先塋。其世次具其父東社公誌中。其子一本介於子成、請予表其墓。嗚呼、先生仕不顯于時、其學之可用、僅一試於華陰、而平生又不喜著書、向微門人錄其教言以傳、則遂沒沒而已乎。雖然、以先生卓爾之見、上接乎文成、則其人雖死、其神固不死也。又豈以書之傳不傳為顯晦哉。世有知先生者、當不以予言為過。

張元竹撰 《不二齋文選》卷五

參知李公涓傳

澹園集

歲癸亥、余師天臺耿先生董南畿學、同野李公從之遊、余乃獲交公。及公歿、屢中外、相去萬里、不忘以學相商證、而今已矣。是不可使無傳、乃為作傳。公諱涓、字湜之、學者稱同野先生。上世自吉水遷思南。父諱富、累贈中憲大夫。母張、累贈恭人。公生而朗然、玉立眉目、如刻畫。十三補郡學弟子員、十五病居小樓、當盛夏、箕踞而處。中憲公以無不敬、飭之、公厲然書諸牖。尋曰：如妄念何。中憲公又以思無邪、飭之、復書諸牖。久之、靜默中恍若有得者、及與客笑談、前境隨失。因自疑曰：有得有失、非本心也。自是公之求心者、日切。嘗謂伊尹堯舜君民、自一介不取始、故弱冠登賢書、於交際甚嚴。舉似道林蔣公、蔣曰：靜假動真。同一介不取、蔣曰：硜硜然小人哉。公聞之愧甚、不覺汗之。決於背矣。入畱都、耿先生以宦業相知、已進而語學有深省、遂就弟子列。及耿先生居、公往謁、夜與先生弟子庸共論、亟稱明道識仁語。呼同野在否、公應曰在。子庸曰：同野在、乃從明道識仁。公為之灑然。最後與近溪羅公為寮、互相齟齬、其學益遠。嘗曰：孔子毋意、孟子不學不慮、程子不着纖



毫人力皆非從安排得來。知母意即千思萬慮皆母慈也。知無纖毫人力即已百已千實無纖毫人力也。學是學此不學。應是應此不應而已。又語門人曰。浮雲人間作雨天上常清常明。狂風江中作浪流水不增不減。知得常清常明不增不減者可與言學矣。一日讀學道愛人語。謂人曰。道不明則仁體裂。天地閉。惟是念念在民。令同歸藹然一體中。吾之願也。故廻翔郡邑二十載。所至精心爲縣官牧小民。大指率歸於此。初令華陽。爲鋤奸弊。拊流移。不得甘食息。知和州興學校。仰吏胥。歲省浮費數千金。鄰縣滯獄待公而決。還高州府同知。至則謁甘泉湛先生。修復書院。教授諸生。聲靈不倦。而以其間飭武事。爲不虞備。西賊來攻。公率所部授甲置陣。爲三覆以待。賊竟引去。時方變里甲爲均輸。公劑其多寡。官爲主辦。放民歸農。至今著爲繫令。嘗夜夢巨蛇。而身者三。揮杖擊之。詰朝合浦吏以美珠進。化州吳川吏各以兼金進。公斥去不顧。笑曰。金珠非寶。固吾人蛇蝎哉。晉應天府治中。南戶部員外郎。再轉工部郎中。出知韶州府。先是韶有二源之役。百姓苦之甚。多去爲盜。公集寮屬諭曰。夫子告康子以不欲弭盜之本也。倘身爲溝壑。

是我爲盜竿。而何以責之民乎。弭山中盜易。弭心中盜難。諸君勉之。聞者悚息。居韶治最富。還而韶民以借寇請。詔進服俸。知郡事如故。再入覲。時穆廟宴天下守令卓異者七人。旌之幣鈔。公與焉。還。詔晉其省副使。平惠潮。討朱良寶。克威厥功。恩賚加等。經略惠潮水寨。更置守巡。建清遠邑。泊開驛。從峽中東山達英德。以通東粵。皆公本謀也。晉雲南左參政。濬松溪水。灌田萬餘頃。城晉寧。安寧二州。以翼金碧。時滇兵久疫癘大作。則爲藥與糜食貧民。所活無算。死無柁者官給之。至八百有奇。往土官襲替。當事者目爲奇貨。留數歲不遣。公建議輸粟。藩省代奏。授官部使者上其議。土司萬口頌之矣。在滇四載。謝事歸。隕中國書數卷。無長物也。四方負笈從遊者衆。搆朋來棲居之。日惟明道作人爲務。居恒事父中憲公。蒸羔敦謹。卒。柴毀支骨。母張恭人病。暴已罪狀。顧於天乞減算以代。建宗祠。聯族屬。念俗日敝。力持古禮。以先之。常言居官不廉。從廉。費始於儉德。三致意焉。時多有興起者。戊子疾作。猶日與門人論學。至革進諸弟子訣。惟以學爲規。言不及私。既卒。士民奔哭者累月。四方同志或爲位。或爲文哭之。不可勝紀。公自言。

於學入白下見耿師與居和高時不同。過楚登天臺又覺與白下不同。與近溪游月巖復覺有不同者。如登九級浮屠隨步而異。所謂未見其止者非歟。所著先行錄答問三卷。毋意篇合大學中庸易問爲一卷。簡寄二卷。雜著一卷。詩一卷。文二卷。統十卷。又著家乘十二卷。藏於家。大儒治規二卷。行於世。先後按部使者採鄉評。祀省會及郡學鄉賢祠。又從諸生請郡建特祠祀之。生正德癸酉十二月卒。萬曆戊子四月享年七十有六。諸子姓彬彬秀文而廷謙世其學。尤有載耿少司馬志中不具論。

論曰。夫範金爲鼎。貴重矣。一旦入用。以烹飪炮炙。曾不若釜鬲之爲便。何者。其文勝也。而適用非也。晚來儒者。握拂矩步。自以無前。而不能當於用。往往爲矜笑者之口實。參知公在所有循良聲。蓋學以本政。政以徵學。卽謂淵濤冉季兼數器而有之。奚不可者。善乎參知之推言之也。曰吾之知學自耿先生始。詩曰。豈弟君子。遐不作人。耿先生之謂也。

（國朝獻徵錄）卷一〇二

王東崖先生壁墓志銘

清園集

陽明公以理學主盟區宇而泰州王心齋嗣起其徒

幾中分魯國。故海內言學者皆本兩王公。心齋子東崖先生推衍其說。學士雲附景從。至今不絕。蓋以學世其家有以開天下而風異世。可謂盛已。先生功萬曆丁亥十月十有一日。迄今十九年。墓未有銘。先生兩子以屬余。則曷敢辭。先生諱璧。字宗順。學者稱東崖先生。上世家姑蘇。諱伯壽者。徙泰州安豐場家焉。五傳曰國祥。曰仲仁。曰文貴。曰公美。曰紀芳。紀芳生良。字汝止。號心齋。先生父也。母吳氏。生九齡。隨父之陽明公所。士大夫會者千人。公命童子歌多囁嚅不能應。先生意氣恬如。歌聲若金石。公召視之。知爲心齋子。詔曰。吾固知越中無此兒也。輒奇而授之學。是時龍溪緒山王芝皆在公左右。先生以公命悉師事之。踰十年歸娶。已之越。復留者八年。師友相陶汰。氣疎神涌。耳新目明。標樹山嶽之上。越軼風霆之外。蘇枝葉而達其根。派流而還其源。沛如也。久之。陽明卒於師。心齋始授徒淮南。先生相之。覃思悠然。講論鏘然。不啻陽明之存也。心齋既歿。先生望日隆。四方聘以主教者。皆至。羅近溪守宛則迎之。蔡春臺守蘇則迎之。李文定迎之興化。宋中丞迎之吉安。李計部迎之吳州。董郡丞迎之建寧。餘殆難悉數。歸則隨村落



小大扁舟往來。歌聲與林樾相激發。聞者以爲舞雩詠歸之風復出。至是風教彬彬盈宇內矣。天臺耿師嘗晤先生。迎謂曰。衆多君解了。於道有得。君自謂若何。先生曰。道者六通四闢之塗也。藉謂我有之。將探取焉。而又曰。我能得之。則已離矣。余師大賞其言。定爲石交云。至金陵。與多士講習。連櫛累旬。博問精討。靡不愜其欲以去。余友楊道南紀之云。東崖子至而論學也。問學何以曰樂。又問曰。樂者心體也。有不樂非其體也。吾求以復之而已。然則如之何而後樂。曰。吾體自樂。曰。如之何而後樂。是加於體之外也。然則學可廢乎。曰。否。莫非學也。而皆以求此樂也。樂者樂此學。學者學此樂。吾先子蓋言之矣。樂有辨乎。曰。有所倚而樂者。樂以人也。喪其所倚。則不樂。無所倚而樂者。樂以天也。舒慘失得。欣戚榮悴。無之而不可。曰。無倚而樂。非樂道邪。曰。樂卽道也。而曰樂道。是牀上之牀也。學領止此乎。曰。孔顏曰不改其樂。曰樂在其。中。於此蓋終身焉。而何以加諸。然則何以曰憂道。曰。君子非以外物爲戚戚也。所憂者道也。憂道者。憂其不得乎樂也云爾。先生孔孟之言。未嘗一日去於口。其推而與世共也。未嘗一日忘於心。而大意具此矣。

居恒而煩。繩削而動。應矩矱。非其義。千金至前。不一盼也。喪祭必遵古禮。建先祠。置祭田。月朔率子弟。屬衣冠致奠。隨考一月中所爲。竟日乃罷。蓋心齋以脩身格物爲鵠。先生嚴取子。敦孝弟。聯宗族。關於行誼者。毛髮必謹。宛然先人之法度。中丞浚海樓疏薦於朝。部擬召用。先生堅卧自如。臨終。屏婦女母使近。諭門人子弟親賢講學。語不及私。距生正德辛巳十一月二十六日。年七十有七。葬塋東之新塋。配吳氏。繼方氏。倪氏。子之翰。之遇。之麒。之麟。之美。之文。夫先生之材。藉有所會。其度其功業。豈有既哉。乃終其身。一不屑意。蓋自心齋絕去利祿。壹以明道覺人爲任。此儀封人得於孔子者。當時不盡知也。而先生父子守所聞於古。至再世不稍變。嗚呼。此豈可與淺見寡聞者道哉。先生所與遊。皆當世賢豪長者。余無似。顧受益爲深。輒不揆而爲銘。銘曰。

其密也。蟻屈。其動也。龍變。身不離潛。其用則見。如川之至。如木之升。淮南之緒。以莫不興。以開厥後人。

博士仁孝先生少湖王公墓誌銘

先生曰孔子誌延陵數字而已吾墓慎勿諛誣故隴上之文闕如也余既貌祀之壯繆廟右精忠至孝炳炳焉于是周中丞綿貞式而禮之史太守念冲爲題扁與司李周公五溪操文祭之請祭請謚公議僉同而蓋棺時即有請從祀孔廟者余安能銘公哉誌延陵數字不爲多誌先生千百言不爲少雖然躬行君子亦從其少爲貴者矣先生世籍金華南渡家蘇之陽城號愛山八世祖也歲稔獻粟

高皇帝義之錄子孫襲稅戶人才官以世愛山不仕授其兄子再傳爲樂閒公好施生心古公三十始知書尋以貢能于其官如挺加中貴衣履道殣義償同舟其爲溪山大澤矣賢哉學博大司命曰科第未云報也大發祥于孝子然孝子之父陽湖公亦非科第中人早賦歸來與衡山西室五湖隆池雅宜五六人交曠達之趣勝于仕宦之樂此味少人知仁孝先生勿失怙育

于祖母命引經史訓忽問曰讀聖人書何故不做聖人俞曰兒有志自爲之入家廟習登降之儀如成人初授蒙課手摩書角父戒之終其身所熟讀書不復觸手授詩辨野有死麕之訛曰世豈有誘女吉士哉俟後編之說五經也遽于易嚴于禮慎于喪祭謹于女教詩書有特解論堯也衆謂丹朱啓明矣堯獨知其歸訟衆謂共工可用矣堯獨知其庸違衆恭衆謂鯀能治水矣堯獨知其方命圯族論洛書也曰洛書孔子未嘗明言所以測之者而後人亦不可以妄論矣又云孔子有詩三百之語故取刪去者以足其數且正考父嘗叙正商頌得十二篇今纔四篇詩莫古于商頌豈刪去哉秦項焚之耳孔子所存古詩亡失者多矣乃漫取淫亂之辭足之何居春秋有直書其事是非自見如壬申御廩災繼書乙亥嘗隔三日耳乃用災餘之禾以嘗饗甚矣何必更加一辭哉三傳束閣獨守遺經其見及此歟胡氏以經筵進講勸其君報仇伐

戎意雖正而多牽聖經以就已意與三傳或詎或短或俗敝均焉。首止河陽桓文大事然惠主愛易世子。桓不能諫私結諸侯與世子會。世子不埃王命而私出。雖能定襄王之位而君臣父子間胥失其道矣。春秋最後作間歲而夢奠陳恒弑君所嘗請討者亦不及書故僅止于獲麟。奈何以祥誣之。公讀書洞大義若此。本陽湖公誨鳳翔千仞及課南雍試勿字旗脚而悟也。留都歸悉謝饋遺。書于旅次曰。不食差來食寧爲溝壑夫。泊平康里。歌呼徹夜。正襟危坐。旦亟命徙其嚴重若此事。俞口嚼而進之。則王母安。少叅公晨出而不歸。廢食。暮出而不歸。廢寢。正衣冠迎送。候入出于門之下。夜半不息。公好佳客。則開別墅。老而連榻。公不寐亦不寐。夜起亦夜起。通宵傾耳以伺聲息。歿而先生哭盡哀。然不以是稱孝。稱孝乃自繼母郁。郁性嚴核。督過必踞而請。得解乃起。或至夜分。出就寢室。發書讀之。其聲朗然。少叅詢故。曰。夜來阿母偶責婢子

耳。先生痛自引慝。或微言疑子之徇內言也。先生聞之。如旱得雨。如盲得杖。如入深山雲霧中天爲開霽。曰。吾知勉矣。乃遂絕內。配盧碩人。與郁間門對峙。朝以入。趨而出。暮以入。趨而出。勤侍郁母。不反顧。歷十三年如一日。而郁大感悟。一日手持茶甌驚擲于地曰。汝乃真孝子。嗚呼。盧不愧仁孝夫人也。十三年而無間然。我入自外。不顧行。遯室人不謫。亦不幾微忤。而起疑猜于閤戶塞屏之間。先生白。成我者郁安人也。繇今思之。郁亦不黍仁孝母也。天下無不是之父母。亦無不是之繼母。郁卒。哀號猶慕如喪考。先生以是致愛致慤。于祭禮尤兢兢焉。語人曰。謝安期功不廢絲竹。人共非之。可見晉代風流。而一時清議猶知喪禮之爲重。今父母之喪。恬不爲怪。古人始死用魂帛。棲神旣葬用桑主。練祥後乃用栗主。始死甫脫形骸。如小兒初生。其所棲必柔煖之物。而桑而栗。序當然。此爲鬼神情狀矣。又云。凡祭畢。辭神之拜。必遲緩。若不忍



辭。既奉安神主而還廳事，不敢遽正坐也。焚香之灰，浮之河中，敬祖考之餘也。又爲便俗禮節，以及庶人。陽湖公性慈愛，然先生居恒侍立，不坐。公亦不命坐。飲食候公畢而後退食。惟逢佳節，一同舉卮。聞呼召，雖盛暑昏夜，必整衣往。先生以身教孝，又以言教。常曰：「廣人父客死，隨路賃作，取其錢更雇一人同携父柩抵家，肩已磨穿。」魏莊渠爲補弟子員廩，而意惑，任三秦教管。會數月不雨，占者請以有德之人祈之，勿拘爵秩。于是衆爲跪請，固辭不獲，乃從之。甫登壇，大雨決旬，赤地數千里，禾偃而復起。蘭臺佛經四十二章，宋謂事父母即是事佛。是以不孝者雷震下擊，置其身大樹穴中，以示衆。真天道至教也哉。嗟嗟，吾吳水旱之不時，恃先生以不恐。先生門弟子千人，訓之曰：「三年一試士，海內中式舉人千餘，進士三百。若積之三十年，舉人萬餘，進士三千矣。」宋朝試錄止有二本，以朱文公文文山在其上也。其餘千百本安在哉。又曰：生員

無送官府之禮，至門外已過矣。聞有送幾百里外猶未還者。又聞糧塘里老共製錦軸往送，僞爲涕泣之態，何無耻甚也。又曰：此時若出居首，相之任，須幹得旋輒轉坤之功，方爲稱職。苟力不足以辦此，不如勿出矣。然先生答耿書，小事自宜姑置，其關係大計及事有將來勢所必至，當熟議早圖。天下無分彼此，諸君子精神互相灌注，但恐至誠懇惻之意，澹薄不必嫌疑推諉。嗚呼，至言也。又曰：嘉靖享國四十餘年，而中國不憂夷狄之禍，惟其寧與戰不與和，故四夷恟服而不犯。又曰：俺答之子逃入中國，姑議款馬匹有定數，費止四五十萬兩。此隙一開，每歲漸增，歲入四百萬，以其三餉虜，而以一、二百餘萬爲供，諸臣乏先見之智，爲奈何。

世廟嘗言開馬市者，斬。歲與之戰，亦不過百萬耳。國家之患，莫大乎名分之未明，邊防之不飭，用人事好惡之差誤，其所以處之者在豫，在早在速而已矣。在目前致禍自我，在日後貽禍



後人豈非忠義性薄、世俗情深耶。又曰：君子之于小人，必不可以其小者而遂信其大者，終受其禍，悔之無及也。又曰：纔見其幾，必當立斷，故不徒曰見幾，而曰見幾而作，不俟終日。先生善用易如此。自序有云：晚世學者，每略躬行之實，余寔傷之。于易尤深惜焉。又曰：人心風俗之壞，悉繇監司守令莫知留意于教化，而僅恃國課刑獄簿書爲盡職之具，亦繇銓曹執此以爲遷轉，則監司守令不得本以此爲重，而自無暇于教化之急矣。是其勢固然也。若其他又有可歎者，鄉之士未不惟莫用爲憂，不自飭勵以爲之表率，而或反揚其波以導之，人心風俗亦何自而善乎。歲大稔，躬噉麥粥，平糶爲富室倡。飢民載道，搏飯裹薑沿途施之。歲蓄精粟以待軍士之需，曰：荷戈可念，姑孀居有甥貧而替，邀與同居。每飯一蔬一肉，必置肉其前而擊其缶，替甥下筋淋漓滿案，爾且盡矣。如是十餘年，朱嘗憎慢郁舅氏以田售，乘間一言立返田券。隣富人

侵其居地，家童欲止之，曰：否，不察者或乃以我爲侵。親朋朝暮見來必迎，去必送，坐必拱入，而對盧碩人，碩人肅然起立。先生于爐香枕茗，種竹栽花，非其好也。習舉子業，矢爲詩歌，根極理要，稱王曾子。蔡春臺郡侯建四塾以造士，廼先生居興仁塾，表其里曰仁孝。仁孝自茲始也，非歿之日乃私謚也。侯後編登八秩而門人刻以壽。焦太史弱侯與金陵人士奉先生配祀天臺耿公，余卜地買屋祠公，費二百有奇，仍捐田十畝，歲以所入作香燭供。噫，告終之朔，尚謁其先屬續之時，必端其首，表薦充貢，辭召不行，就家拜官，侈爲盛事。然先生經世才，可將可相，博士奚足云。袁安節疏，讀書體之身心，躬行先乎孝弟，親嚼飯以養其祖母，盤妻裝以嫁其女弟。族人貧乏者，分空室以居之，計喪殮以給之。紹伊洛之正派，實聖世之真儒。或特行召見之禮，或專授翰林之職，然先生詆譏時相，力排宵政，孰容之哉。不容

然後見先生。先生諱敬臣，字以道，號少湖。生于正德癸酉十一月三十日，卒於萬曆乙未八月十日，享年八十有三。葬于吳縣吳山之陽，合盧碩人兆。碩人王府典儀芸齋公女，子姓多且賢。余因公之孫庠生懋道撰狀請，因爲之銘。銘曰：有德者必有言，乃輯四種曰冠曰婚曰喪曰祭，又總曰禮文疏節，別以便俗禮節，俾禮行于庶人，而後教嚴于天帝，三加彌尊，祝必成德，戒之戒之，無使旣壯且老，猶有童心，而茫然于孝弟，故以賓禮禮其子，出見先生執友，求一言俾可述而可繼。期以四孟，賓擇有德，慎爾威儀，勿替親迎而無款宴，士大夫宜稟之體制，然後至三日而相率以拜于舅姑尊長祖先，斯無戾。婿導引，姆扶擁，左右之以老成家，人婦而盡華陋俗之弊。喪服惟遵，朝制水埋火葬，與殺親同。自蘇郡外，卽小民未聞有蹈之者，其言可痛哭而流涕。紙人紙馬，色亭觀美之具，而歌卽近古，唱蒿里以助悲涕，不赴飲，不延賓，不嫁不婚，孜孜

讀禮弗敢旣日而惕歲。喪禮起幃答拜，喪主面相慰勞，而後情文溢于楮幣。時祭歲除祭先三日，而預告祖孫父子，脉脉相屬，係肥潔芬芳，情好嘉美，罔小大主僕咸具服肅敬，而補所不既。主人捧高祖龕，子弟次捧曾祖以下龕，皆南向。而舅妯男女，附女刻于東西，樂魂魄之共諧。每跪一龕而滴酒，子弟交接而無然泄泄。讀禮厭飯而捧龕，辭神遲緩，而幸祖考之無遺棄。婚葬躬親，凡薦時物，俟其體質完備，而微敬其明神之上。設母闕以藏遷主，雨露濡矣，霜旣降矣，新墓舉二世墓舉一，而墓上之木勤諦。若夫婚擇廉耻勤儉者，事父母虚心請問，而反覆熟計。別內外，慎送終，預備壽木，墳地太高露風，太低防水，務使死者安而生者濟。守正畏法，與正人往還，而勿雄其才銳。嗚呼！士大夫肅聽之哉。我瞻遺像，如在天際。

明儒碑傳集卷六十八

姜寶 呂潛 郭郭 顏鯨

姜尚書寶小傳

姜寶字廷善丹陽人同兄案力學及遊荆川唐先生之門所聞益進荆川深期許之會試第三人選入翰林爲庶吉士丁母憂歸服闋除編修時嚴相當國趨附之人昕夕如市廷善獨與同志數人約不時會聚相見各以身心世務相與請求切磋期于不負此日推門惡之出爲四川提學會事轉河南參議陞福建提學副使其兩任提學敦尚行誼崇雅黜浮士風文體皆爲之一變在河南處伊庶人事潛消不逞洛人賴之陞南太常少卿改右通政尋轉國子祭酒申飭監規建復積分之法欲不失國初養士之意期有實用會高相素嫌廷善至是因其駁查魏國公家一事遂中以危法聽勘家居十餘年始得白薦起南太常卿刑部右侍郎改吏部陞刑部尚書改禮部皆在南宗以三品考滿贈贈陰子皆如制尋引年乞骸骨詔加太子少保致仕家居置義田立義學申宗法以統理族人年八十以壽終

（國朝獻徵錄）卷三六

愧軒呂先生 石谷張氏 正立李氏同

先生名潛字時見涇陽人號愧軒嘗謂爲學必不愧屋漏方可爲人因取號以自警云父應祥嘉靖壬辰進士爲禮科都給事中以論官察事奪官爲時名臣先生幼穎敏讀書即解大義嘗秘書克己銘懷袖中時爲展玩稍長從都諫公任師事蜀進士趙木溪氏聞木溪氏講義理之學而悅于是學甚力歸又師事涇野呂先生深幸其得所依皈凡一言一動率以涇野爲法于是學益力而舉子業亦益入理爲邑諸生試每傾曹偶學使者重其文行拔入正學書院以風多士嘉靖丙午以詩薦鄉書卒業成均友天下士而名日起時朝紳中有講學會每聞先生偕計至亟延之講先生刻意躬行遠聲已慎取子一毫不苟而尤嚴于禮諸冠婚喪祭咸遵文公惟謹即置冠與祭器式必如古人或以爲迂弗恤也先



是母栢孺人病于京。先生扶母病西歸。刺醫百至。孺人病革。以先生且弱冠。命之娶。先生娶而不婚。日夜苦處喪次。既襄事。廬居墓所。服除。乃始婚事。至孝之名動閭中。事都諫公與繼母張曲盡孝養。都諫公病。至嘗糞以驗。殤則哀毀幾絕。都諫公封事故未留稿。先生走關下錄原疏。請銘馬文莊公。文莊公亟稱之。事叔父待諸弟。情愛備至。每歲時祭畢。燕諸族人。講明家訓。又率鄉人行鄉約。人多化之。親黨有窘乏。輒憐而周焉。與人交平易欵洽。或有過。即面規之。而未嘗背言其短。嘗與友人蒙泉郭公郭讀書講學谷口洞中。四方從學者甚衆。聽者津津有得。咸曰得涇野之傳者愧軒也。當道旌異。無慮數十。初。南祭酒姜公寶建言。天下人才多壞于舉人之時。以其身階仕進。而上無繩束甄別。故易壞也。請詔有司。推擇舉人中行誼修者。特掄擢風士習。于是撫按張公社等。交章以先生名上聞。遂辟入京。特授國子監學正。時馬文莊公為祭酒。蒙泉郭公亦為助教。乃與郭

公議。以涇野先生為祭酒時所布學約。請馬公力舉行之。由是講讀之聲徹于橋門。萬歷癸酉。調工部司務。會淮海孫公楚侗耿公俱入京。先生數就兩公質所學。同志方依先生為主盟。乃戊寅六月。一病遽逝。年僅六十。又二。水部郎葉君逢春狀其行。大司馬確菴魏公銘其墓。宮保李敏肅公為之傳。皆實錄。非溢美。時從涇野先生學者。又有張公節。李公挺。節字介夫。號石谷。亦涇陽人。父懋以文無官。官通州同知。公隨之任。會甘泉湛先生講學京師。通州距京師甚通。公從之游。湛先生教以隨處體認天理。公大有省。無何。通州公致仕。公歸而補邑諸生。復受學涇野先生。為諸生四十餘年。竟死于場屋。以積廉行將膺貢。嘆曰。吾老矣。安用貢為。乃上書督學劉公辭廉。劉公雅知公學行。特加禮遇。仍扁其門曰。清風高節。尋奉例選授訓導。職銜云。公為人方正介直。涇野先生深器重之。嘗贈以詩。有守道不回。比舊堅之句。生平不妄交遊。獨與愧軒蒙泉諸君子相講切。日生

南園草屋中。讀書窮理。涵養本原。至老不倦。即惡衣糲食。澹如也。嘗語學者曰。先儒有云。默坐澄心。體認天理。又云。靜中養出端倪。吾輩須理會得此。方知一貫真境。不爾。縱事事求合于道。終難湊泊。不成片段矣。人皆以爲名言。卒于萬曆壬午。壽八十。貧不能葬。李敏肅公捐金助之。始克襄事云。擬字正立。咸寧人。正嘉間。西安郡學生。性孤直。有義氣。不隨時。頗仰會。有詔藩郡如故事。出諸生分論諸屬。公以次出某邑。贈遺一無所受。嘗自誦曰。生須肩大事。選用讀春秋。沒野先生功。又講學賒田馬先生所。往來三原路中。以盜死人皆惜之。

馮從吾撰 《馮少墟集》卷二〇

蒙泉郭先生

先生名郭。字惟藩。號蒙泉。涇陽人。器宇凝重。童時屹若成人。甫八齡。即知誦讀。諧聲律。時從都諫龍山呂公學。偶試以對句云。曉風拂水面。先生輒應聲曰。朝日射巖頭。龍山公計偕。屬受學東橋李公。與龍山公子愧軒先

生同筆研。兩人同肆力于學。即以聖賢相期許。曰。必不爲世俗碌碌者。補邑庠生。聲名蔚起。父母相繼逝。先生侍疾居喪。竭力盡瘁。家計窘甚。而處之裕如。朝夕攻苦。益潛心性命。不頗頗競雕蟲之技。時蓋未離庠校。而名已蜚三輔矣。邑侯樊高其行。延居講席。或有以千金求居間者。先生峻拒不納。樊侯退而省其私。益用高之。嘉靖戊午。年已四十有一矣。始舉于鄉。辛酉冬。以呂師會葬。遂不上公車。一時郡邑爭表其廬。謂得古師弟之誼焉。先生舉孝廉後。猶與愧軒先生讀書龍巖洞中。學益有得。自及從遊者甚衆。累試春官。不第。乙丑。謁選河南。獲嘉學諭。日與諸生講學課藝。多所造就。隆慶庚午。推國子助教。值馬文莊公爲祭酒。教規肅然。先生贊襄之力居多。時年已五十有六。例不得入臺省。同列欲先生少隱庚甲應選。先生笑曰。臺省寧可不得。年其可隱邪。僅得戶部主事。朝論偉之。權稅九江。先生處脂潤。嶙然不滓。弊剝奸鋤。商旅胥悅。時有監關郡倖某者。墨吏也。



儒藏

求于新令，不得肆，乃妄加污蟻事，聞諸朝，朝大夫共知先生賢，竟為白其誣。萬曆庚辰，出守馬湖。馬湖西南夷故地，俗陋易囂，先生恩威並濟，禮讓躬先，探夷數十輩，從其譯酋，願望見先生顏色，歸而愛戴彌切。居未三載，聞有猶子之戚，念伯兄且老，獨居，遂投牒歸。歸田二十餘年，自讀書講學外，他無所事。督學敬菴許先生雅重先生，徵縣延為鄉飲大賓。先生雖堅遜，恒虛席以待。乙

巳六月三日，無疾而卒。距生正德戊寅三月十二日，享年八十有八。士大夫及門下士追思無已，以其德履私謚曰貞懿先生。先生學重根本，篤于倫理，而兢兢持敬，自少至老，一步不肯屑越。暇中喜吟詩，卓有堯夫擊壤遺意。有云：學道全憑敬作箴，須臾離敬道難尋。常從獨木橋邊過，惟願無忘此際心。又云：近名終喪已無欲，自通神識遠乾坤。洞心空意見新，閉門只靜坐，自是出風塵。又云：莫道老來積德難，古人雖老志不朽。富公八十尚書屏，武公九十猶求友。老來聞道未為遲，錯過一生

寧不悞。從此努力惜分陰，毋徒碌碌空白首。觀此，則知先生享上壽而完名全節，非偶然矣。先生與人言，每依大節而出之，藹然可聽，令人不忍別去。雖新進少年，延見必恪。生平手不釋卷，冠履几榻悉列箴銘，而晚年尤喜讀易。所著有自警偈語、山居雜詠、語畧、族譜、仰齋集。仲子九有，付梓以傳。九有乙未進士，以猗氏令擢禮部主事，未究其用而卒，人皆惜之。

馮從吾撰（馮少墟集）卷二〇

中憲大夫湖廣提學副使沖宇顏先生墓誌銘
余兒時聞慈谿顏先生處伊庶人事，不動聲色，坐銷逆謀，私計曰：是所謂撓節澄清者非耶。已赴戍，道展沅柳，桂間，楚人稱後先督學必首先生。余曰：三楚其蘇湖耶。過清平，少宗伯孫公淮海，諱聞必曰：予友顏公言若何。余曰：慈湖絕學，其復興耶。而最後有掖垣小吏四明人，也耳。語先生里居為細民造福，利為後學樹赤幟，事甚備至。余曰：古所謂德教洽比，表正鄉閭者，非耶。乃疏先



生沉抑狀。時先生投閒久。與當路不通。屢復原職。致仕。庚寅。余再疏先生。而南調命下矣。嗟嗟。有賢不舉。言臣之責。言而不用。有司其責者。方擬買舟武林。訪先生。函文。而先生塲。家嗣子望。以余為先生神交知己。持子友。妻給諫瑞宇公狀。委余銘。余以先生名儒。未敢執筆。而司理吉郡劉公抑之。則先生入室弟子。每向余述先生真修苦節。精神直逼古先哲。且促余再四。予不得辭。先生諱鯨。字應雷。別號冲宇。先世本曲阜人。初徙勾東。再徙文溪。自慶義公始。慶義七傳而生。封侍御。養真公。母唐氏。數應瑞夢。而得先生。先生自幼負文名。試輒首諸生。已酉舉於鄉。丙辰。賜進士。選大行人。辛酉。授山西道監察御史。甲子。推北畿督學。乙丑。以言謫。徙安仁尉。遽遷至湖廣提學副使。復左遷山東參議。陝西行太僕寺少卿。致仕歸。先生官大行。出使襄陵。王不綱於禮。先生以大義感動之。王卒以孝聞。在臺中。不但著敢言聲。而所條議俱報聞。其大者如救民困。裕國儲。清漕規。議

海運河工時弊。俱見奏牘中。馮漢者。京師巨猾。倚定國勢。為漕政梗。勢張甚。先生巡倉時。廉得其狀。朴救之。伊庶人潛謀不軌。服室器用。備擬乘輿。而善陰持當事者。短長當事者。味不敢吐。先是有上庶人不軌狀者。業已奉旨勘問。而庶人結左右為腹心。盡匿其狀。致其父子支解之事。益發矣。肅皇帝漸有聞。亦頗念之。會先生巡按河南。辭徐華亭。華亭曰。聞部內宸濠事且急。誰哉王伯安乎。先生曰。此與宸濠不同。宸濠能以策屈羣雄。羣雄亦樂為用。伊藩雖招致人多。然皆推埋市井無賴。如狐豚鼠。一飽搖尾去矣。可計而取也。華亭曰。直指其有意乎。先生曰。相國能從中應。言官敢愛死以辱國。華亭遂決意屬先生。先生至。知觀察耿公隨卿有心計。乃密謀於耿公。耿公與庶人承奉王鑒其逆。乃以詔計。呵喝鑒。鑒復從中應。凡庶人奸利事。悉報聞。而所請為死。實者鑒以意散之。殆盡。先生既聞其肘腋。離其黨與。絕其偵伺。乃疏數其不軌狀。上得疏。遂寘庶人鳳陽獄。

國除乃籍其資財充軍賦而所挾子女悉召而散之不煩血刃危禍頓消惟聲蓋遠河洛間矣是時上左右前與庶人腹心者垂涎府中裝乃以危言激上曰庶人資財上有也庶人子女上有也今御史悉瓜分之寘陛下何地上幾為動先生亦有聞不為動賴華亭解而始定自庶人法而諸強宗歛手聽先生指揮凡詭寄欺隱田糧為民間害者剪除殆盡夫以數十年所欲爬剔而不足而先生一旦處之有餘則撓磨澄清之明驗也先生兩秉學政不規規甲乙文藝惟以明道術正風化為急務然在楚跡北數久故楚士慕先生跡北幾較深先生最喜闡揚節烈忠孝事又最執法海忠介以直言下獄幾冒不測昌言救之沈公青霞以直言寃死憲上先生拔其子襄入太學為忠奮勸後其子積官至二千石在中州有黃甲乙者父官知州廉而貧甲乙幼而不能歸觀者二十年先生資以郵傳并授甲乙考校士常德有狂士以文置首選矣乃廉其行復黜人有告者曰是不

可為文士地先生曰文士易得耳予終不能以文先行有餘部欲私其父鄉賢及成國舅王朋以賕執法顯陵諸惡為地方害先生悉執法不少挫其強教有執類若此以故知者服先生高然亦以此業忌其齟齬有由然也先生之仕蓋三黜矣初以發嚴衛奸惡再以疎江陵連三以左新鄭罷先生仕楚而忤楚相仕中州而忤中州相二相之嫌先生宜也後來者宜無所嫌於先生乃起廢之典徒捷徑終南獨使先生老死東海之濱又何耶執銓者報云一人可廢國典不可廢公論已申其身不必用嗟嗟典可執也獨奈何有不盡執者執之正人而或濫及匪人則余不知其解矣元標雖未請事先生然從著述中讀所論孔孟顏曾及原人原性諸語大都先生學以求仁為宗以默坐澄心為入門以踐履操修為見性而妙於慎獨極於默識先生既殫厥心矣而總於惜格物之旨盡之世儒以一事一物為物而先生以通天下國家為物為格其力久故其悟深其悟深故其



用周。蓋嘗論慈湖師承文安人見其直截簡易不知慈湖夜半多披衣危坐一旦性體呈露直信不二後儒卒以意識卜度承之而慈湖之旨荒矣先生至雲溪館恍然有悟格物之旨實以吾身即天下國家天下國家其非吾身亦從因循中入而非以意識承當之謂其與無意之旨同耶異耶世必有能知者人知先生出則所至揚芳處則閭里歌德孰知先生之學所資者深哉然余觀先生於所忽矣先生初得鄉薦報至偶聞母夫人感先生不赴宴竟徒步歸血流竟踵又丁唐母憂廬墓三年夫先生純孝人也孝則百行攸基夫始進既不以榮名忽孝思終其身又肯以世氣墮忠獻先生生平大節孝固已始基之矣宜襄王聞先生言而有感也若先生者允可為復學鵠其並祀於慈湖之濱也允宜子三人長子望志不凡近可嗣家學其孫曹嫁娶及先生居鄉懿行種種具諫議公狀中余謹據先生學術并立朝之大者著於石先生所著有易學義林春秋賈玉奏議文

集若干卷行世銘曰

偉矣顏公、東魯苗裔。崛起文溪、鬱為名世。我我勇冠、直躬正色。澄之不清、撓之不忒。何物淮南、敢爾為天。請飭上方、氛祲全消。畿甸中州、咸布惠流。所去見思、所至民謳。解振南北、化行若馳。流風靡異、代有餘師。妙契格物、千聖同宗。匪曰億度、力貫心通。返其初服、式開末學。處世若起、靡然先覺。未竟其用、不用斯全。彼佞倖者、昧公孰傳。學宗無意、前有慈湖。吁嗟我公、與古為徒。勒于銘詞、過者式墳。一脈永泯、縣縣若存。

鄒元標撰《願學集》卷六上

顏先生諒傳

郭正域

公諱鯨，字應雷，母唐。未字時，夢負人婆娑白月中，下于懷，彌月夢如之，俄而公生。公穎慧絕人，兒時從蒙師學，慨然志古聖賢，往往離訓故，自爲辟解，洞窺性理。又秉心高亮，規行矩步，不埒鄉曲人，以澄清天下爲己責。嘉靖己酉，舉于鄉，捷聞，聞母唐疾，戴星徒步渡錢塘，家雨行百餘里，兩脰朱殷，抵家，母尚能飯，決旬終，傷弗逮，願膺也。毀甚，廬墓三載，守空山，降虎豹，人不能堪。丙辰，舉進士，丁巳，授行人。辛酉，授山東道御史，逮青疏，救京師民困，其略曰：今日商困已極，每集房歲派八千九百有奇，而糜費二千八百有奇；京六諸倉歲派十二萬，而糜費四萬；御馬三倉歲派十八萬三千有奇，而糜費七萬；祠肉盡矣，有司徵解後時，商價滯留幾五七年。丁年應役，白首拘囚，比當給散，權要取盈，窮苦貽累，是以有財力者滿充官校，投庇中常，而中人薄產沾染賣餅之家，逃亡不免，就死無地。乞令戶部自行稽覈，一切商人盡行報罷，更做先年減額疏上，商困始甦。富人馮漢者，佔定國勢，貸子錢濟卒，沒清糧梗清政，定國方有寵于上，巡漕使者索莫敢發。公方在事，軍民投牒，故伴下屬

理。漢意公庇已，果待定國書來見，即時出所告牒考訊，皆伏論殺之。其年疏請格那儲飭漕政，一支折銀，謂國家歲漕四百萬，約歲用三百萬，而以百萬爲厯做古三年九年之意。比歲議蠲議拆，漕輸僅三百六十餘萬，請以折銀給散官軍，人情利銀而舍儲存累，是因凶年改折之，故獲累歲全歛之征也。二性班軍，三任監兌，四查稽悞，皆稱自施行。又請維舟之役，不論遠近，四月過淮，五月抵灣，自潮縣抵灣，每舟一與小舟四，聽漕卒自運，淺而剝，深而止。一省糧耗，二省夫力。故事，錦衣衛卒驕悍，給餉之時，揮請倉廩惟便，公下令集軍京軍一體，惟官自界，不得自請。又爲議罷海運，癸亥，按河南，四方冠蓋貂璫旗校絡繹道途，閭里愁苦。乃汰省冗費，中使相戒毋入洛境，兩河以蘇。伊庶人與樸者，生而兇回，走金錢京師，內結毛尚兩貴人，張王二常侍，外及臺省樞要，分宜父子尤力爲地，上所爲立報，所疏請立下。又多布彼兄飛騎，自河北濠京師爲耳目，招集亡命，商洛懷孟間磧盜鳴，鎮之雄爲牙爪，諸所爲不法，罪惡萬端。日伺上春，秋高，調中朝有故，卽發監司莫敢誰何。先是，公將之中州，諸徐相聞，請曰：有如輜車銀矢卒起，兩河誰爲



仇咸寧王伯安徐默然良久曰彼內援深耳目廣黨與衆矣寧夏南昌之甲錯實挑之公曰正德時奸諛在朝人情皇恐今天子攬綱結網何憂可乘試以嫌疑離內交何所不貳以鈞鉅獲耳日何所不濟以生死奪羣黨何所不孤數校尉足辦矣願損七尺爲國殛之徐公大喜手加額公馳至河南以參知耿隨卿往卿僮多奇略謂公曰雒陽所能縱橫數十年承奉王鑑有心計凡公所爲彼力能破之隨卿故識其人謬爲心膂是可說而下也公屬隨卿往說之一夕卿潛詣鑑見鑑而無言問亦不答第微視鑑嘆息而已乃相對坐久之垂淚起頓足不休鑑心疑問故卿乃屏左右曰若死期至矣伊藩敗矣馬將軍奉密旨以京軍入洛爾名在黨惡且奈何因出檄示鑑鑑故信卿不疑相與伏地泣卿曰吾無以脫爾請爲若交于御史御史得君輸心共計且以君有從薪功寧獨無死鑑遂潛與卿來見公正色斥鑑所輔王諸不法狀隨卿從旁解之公曰爾第反罪爲功保無它鑑頓首唯命遂與鑑約凡府所議輒以報始定擒庶人計公念貴人常侍爲庶人中訥疏上格不下卽下諸河北飛騎旦夕且報庶人先矣乃奏記徐公徐公以

間說諸大璫中援遂絕御史溫如璋洛陽人備知飛騎主名潛以授公因爲上書大司馬楊公言狀楊公爲檄五城及河北監司同日逮捕無一人免由是京師事庶人不得聞時庶人護衛暨所招亡命尚萬餘橫行洛城中公念郡國不可無兵發兵則搖人心適汚寇起公檄郡國集兵東大梁則住汜水扼虎牢西商洛則住武關南汝寧則守熊耳北懷慶沁濟則扼河津各集部伍乘城列隘以備汚爲名召王鑑齎膝數千入王官以散其黨遂上疏劾庶人抗旨矯勅濫虐康回僭妄不道之罪十請亟正法上可其奏遂下庶人鳳陽獄國除沒入其貲公念兩河苦庶人虐殍宗祿乏供數百萬諸官女多強奪民間護衛多亡命請以金錢補祿糧賑兩河軍衛補缺伍官女散民間得旨報可而羣璫以無所乾沒造蜚語上聞事幾殆徐相國馳報公勿堅持爲身家累公不可曰從中官是滋蔓也某本以百歲從事死而可爲兩河赤子且甘之後相國往說陳王二常侍事得寢景王之安陸其府牙越界奪民產爲庄田衆民重科魏國亦佔產樹爲碑假欽賜名公擒景藩五人置之法仆徐僞碑戊遣其人境內肅然其經理河工大約五百里內往

役五百里外輸銀。其河去城而遠，卽小有侵謫，聽其自流，不與爭利，而填人力于巨浪也。又疏陳中外時事及錦衣列侯中官諸弊狀。先是，錦衣親帥得辟召諸校，諸校受諸俠少金，爲署名籍中，作妖書左道，誘富人子弟習之，復相與發其罪以爲功，得陞賞。列侯奉使所過，候館騷然，諸藩苦之。諸藩中使進奉，輒駕龍船，所過橫苦。公請校尉缺從大司馬銓補，錦衣不得自署，冊封改用文臣。諸藩進奉，遣屬吏不得用中貴人，遂爲定制。新鄭令某貪酷，爲時宰所庇，得遷州守。公按其事論黜，以此見忤。故事，臺省拾遺不及長吏，自分宜攬柄，併拾郡縣。公力言其非，謂新進小生姑試乃可。況比來有司試事，關係豪強，輒懷規避，謂台省偏聽浮揚懷怨之人，以此恐嚇州縣，傷義甚矣。事遂得寢。時德安接壤汝南，多蘊盜，宣大總督駐懷來，去邊遠，黔沐專兵柄，漸不可制。公請改德安屬鄖陽，移宣大總督駐陽和，而雲南置撫臣，得專制，皆報可。戶部主事海公瑞言事切直，上怒，杖濱死。下錦衣獄，且論死。先生借給事中馮成能言于朝曰：「諫臣不能言而部臣言之，已可愧死，奈何坐視？」令主上殺直臣乎？時相感其言，海公得不死。九月，提督北直

隸學校，以立志主靜克己諸條頒示諸生，士皆願化。又爲拔沈鍊子襄貢京師，以旌忠臣。所至旌賢表行，獎恬抑浮，勸學興禮。是月上封事，發嚴衛奸欺。先是，都督朱希孝受富人金補校尉，諸校列要郡，連上產千百計，不供縣官賦，抑小民代輸。大興令高世儒爲平賦法，令羣校均差，希孝劾世儒梗令甲，侵黷衛上，可其奏，莫敢爲辨。公疏爭之，略曰：「明王不私倖臣，良臣不顯市利。縱騎盡富人子，不占賦而賦獨病貧民。今爲貧民請命，世儒無罪，罪在縱騎。」上怒，請安仁尉。公單車就道，儒生泣送，不能別。亡何，陞湖廣廣慶府推官，南京武選主事。上政府書，言時事有大大可畏者四：曰閹宦漸盛，曰征求太煩，曰入任太雜，曰大禮大獄太枉。政府遽之。明年丁卯，陞南京吏部文選司郎中，湖廣提學副使。所頒條約一如北畿，取士先德行，試文重實學，以小學課儒童。貞魂隱德，先賢後人，表揚振拔殆盡。尤弘獎好脩，每超恒格，示不以雕蟲也。遊陟名勝，必偕諸生雅歌論學，色笑溫懇，使知向方。於是才華者恥不實，敦行者恥不文，士習文章爲之不變。夷陵王篆以相門客爲考功郎，願指當路，煽祀其父鄉賢祠，公嚴詞卻之。九月，在武昌，視總憲



築。楚王舅王朋橫惡，爲給事中辛自修論列，朋行金數萬賄京師，不赴理。宦楚者以朋爲金穴，公獨置之。法論戍邊，王及諸大夫皆爲朋請，公不爲動。王爲酒宴三司，天寒，各僦衣爲楊。先生却不受，同官有慙色。後朋竟以賄免，又稔惡，竟爲中丞汪道昆論死。出對理，一日宣言曰：「悔早不從顏大夫戍也。」官楚者數十年，獨大夫不受我賄耳。楚人益信公神明。武昌夜失囚，公聞報起視堂皇，立發十餘檄沿江巡司，詰朝次第就縛。兩臺有疑事，必就公質。顯陵在承天，部中護衛中官及官校皆挾寵靈，害小民，往御史包公思一創之，捕就理，輒誣奏御史震驚陵寢，大不敬。上怒，逮包公廷杖之，戍邊，竟死。公至是請臺使者追論于朝，屬陶別駕密檄其黨，窮治無所撓。二年戊辰，在武昌，斥伍大夫員不得祀。四月，校士湖南。五月，宿雲溪館，悟格物之旨，謂大學一書皆言仁體，天下國家皆身也。修齊治平皆明德也。物者，物有本末之物也。格物者，格天下國家爲一身。修齊治平爲明德也。格此則洞識仁體，而見天地萬物之理，知不至乎修齊治平在此矣。遊南岳，著祀南岳文。如春陵、祭濂溪先生、過寧遠、著舜陵辨，謂蒼梧爲三苗與區人跡不到。

舜年百有十歲，胡爲至此。三代前西北風而東南縮，彼欲以身過化，不知耄期而倦勤，崩葬九嶷，豈不思蒲阪帝鄉，禮宜歸葬。若曰：「天子家天下，不計委骸而傷民力，直以此身付之萬物中，視爲平等，不知有我，此無我之說也。」九月至長沙，偕諸生遊岳麓，大合一十三校之士，郡邑大夫、諸學博士會于岳麓，席地傍列，陳詩雅歌，發明心體。十月還武昌，大會楚諸生于濂溪書院，論孔顏曾孟著原性，訂學諸篇。後試恩貢，以忤時宰左遷山東參議。公初以書抵執政，有宰相位極人臣，所患不足者道德功勛。既修世廟實錄，核楚事，闡潛德，崇真儒，時宰以爲異已，遂以試貢士修職公了無愠色。時海中丞荐公異才，可大任，執政如弗聞也。亡何，新鄭秉銓王夷陵以父故，素銜公，從旁贊之，假大計去其官。公林居介特，不問生產，奉餘散宗黨窮交，衣麤食糲，著述日繁。建宗祠，儲義租，論禮教爲人道本，而時俗偷薄，棄蔑悖古，乃本儀禮、曲禮，參考先儒格論，斟酌時宜，期于可行，又爲家訓數十條，令子孫世守之。萬曆五年丁丑正月，集同志講學于慈湖書院，著慈湖定性規一卷。又著銷兵聚兵及金塘不可開議，時政方任刻深，慈令險于取名，嚴

田加賦、公力請之當路、得按成藉、毋有所加。又爲辨劉、趙兩家冤獄。丁亥歲海饑、設方略以救荒、老羸就食其門者如市。復與理鹽使者講、聽政得失。慈之窮民以負鹽爲生、官一切厲禁之、窮民無所得生。公請令民得輸稅給粟、肩負貿易、無過七十、官收其稅、弛其禁、公私稱便。又與邑令議、處積逋及查變產、隱產之弊、民以不厲。更議建江梁浦橋二役、以惠行輪、皆居鄉厚俗、好行其德之事也。十七年己丑、著易學義林。書成、嘆曰：昔孔子五十而願學易、其讀責之、錄鼎革之際、三致意焉。蓋玩之終其身、至章編三絕。今吾竊有志焉、吾藉以卒歲矣。若有前知者、公歸田十有三年、會今上收召遺佚、科臣鄒元標、姜應麟、中丞傅好禮、首疏于朝、白前權貴淹厄狀、請破格擢用。嗣後臺使歲列荐剡、前後凡十有八疏、而當事者意不在公也。竟以常格題、照先朝直諫厲汝進例、用湖廣提學副使予致仕。死之日、士民哀之、如喪考妣。停柩罷市。未幾、其門人祀于慈湖、學使者祀之于郡邑、里人建專祠、請中丞表焉。蓋公論定矣。先生生于正德九年正月己亥、卒于萬曆辛卯二月丙申、得年七十有五。子三子望、子忱、子恂、皆有名世才。史氏曰：嘉

隆間、儒者多談理性、褒衣章帶、百十爲羣。比其行事、何刺謬也。遂使篤論之士、攘臂而仍之矣。乃縉紳先生、亟稱顏先生窮理似王伯安、剛直似海忠介、清貞似薛文清、卓犖似劉忠宣、而位不滿德、所至以特直見、檢何哉。不客然後見君子、則庶乎不見、是而無聞者。比其晚歲、舉盈庭之議、爭之而不得、秉政者非不知其賢、而莫與立矣。蓋譚道之士、特立獨行、不媿影余者、先生弗可及也。其在孔門、則四科之列、靡不合矣。

校記

①人任：疑當作「人仕」。

②楊：據文意當作「賜」。



明儒

碑傳集 卷六八

明儒碑傳集卷六十九

海瑞

明故資善大夫南京都察院右都御史贈太子少

保諡忠介剛峰海公行狀

嗚呼、公正氣直節、獨行敢言、業已簡在帝心、昭于國史、即愚夫稚子、俱能道之、安所事狀、頗有隱衷、微行、足以師世範俗、而或出於士人所不盡睹記者、不佞龍忝在戚末、事左右最久、親炙最真、寧獨忍不搢管詳之、而令泯沒為公諱瑞、字汝賢、其上世以來未詳、在國初、以軍功世廣州衛指揮某者、隸籍番禺、今為番禺人、洪武十六年、答兒從軍海南、著姓于瓊、遂為瓊山人、不再傳、而族氏蕃衍、明經紛起、有諱寬者、以經行聞、領鄉薦、知閩中縣事、即公大父也、寬從子澄、登成化十一年進士、為御史、又有諱淵、諱鵬、諱邁、皆舉於鄉、俱名賢、有諱瀚、係廩生、瀚即公父也、以公貴、贈承德郎、尚寶司丞、加贈中憲大夫、南通政司右通政、母謝氏、

封太安人、加封太恭人、贈公警敏豪宕、不治生產、公甫四齡、而贈公捐館、太恭人年方二十有八、矢志勵節、日夜與公偕寢處、口授孝經學庸諸書、長就外傳、為訪擇嚴明師託之、其貞一不渝似栢舟、而慈訓孚翼、則有斷杼和丸之風、故公嘗自謂、勉自脩飭、若非冲年背父者、母氏之力為多、然公立志之堅、任道之勇、則固其天性然也、公生而頡頏、秀挺拔、風神迥異、稍知識、直欲學做聖賢、而紛紛世態、皆無當于心、以聖賢教人、千言萬語、只是欲人識其真心、率其真性、明目張膽、終身行之、卓然不牽於俗者、聖賢也、昧其真而餒其浩然之氣、不免與俗相為浮沉者、鄉愿也、非聖賢也、今天下惟鄉愿之教、入人最深、世俗羣然稱僻性、稱太過者、多是中行之士、而所稱賢士大夫善處世者、或不免鄉愿之為、鄉愿去大奸惡不甚遠、今人不為大惡、必為鄉愿、而孟子功不在禹下、當以惡鄉原為第一、公蓋隱括叔季人情物態、盡於鄉原一言、故其平生所學、惟務識真、必為聖賢、不



為鄉原。力破夫無害從俗之說。微較受賜之說。仕不為道。為貧之說。以為此皆聖賢偶有為而言。今紛紛為俗夫庸人藉口。豈不大謬。居恒著嚴師教戒。召神立腔子。下誨之曰。瑞乎。女知女之托形於天地間者乎。天付完節。女須完之。母宮室妻妾動心。母恂恂易操。母財帛世界而中流不砥。母對人語雄而媿影媿余。母質冕裳參狐貉而有媚心。恥心。母疚中而氣餒。母矜能而諱醫。母自許窮天地亘古今而不顧者。而終或不然。有一於此。不如適死。公執此以往。終身誦之。自謂聖人復起不能易也。然猶見時之人紛然舉俗說以進。懼夫纖節少拘。竟亦天地不肖子。於是復撰客位告辭與同志者共砥淬。而自號曰剛峯。以代歲傲云。乃若居室之間。人所忽易。公獨謂於此不謹。性命之理。即為之壅闕而不流。君子造端之道。謂何。以故位內位外。刑家肅然。一切男女僕役。至老死不踰閭閻相往來。處伯仲嫺嫺。恂恂怡怡。而坐立跪拜。則惟禮是嫺。有從子鵬與公年相埒。同鉛

槧。同寢食起居。又同上春官。然言必名。事必稟。毋敢幾微嫺狎。司徒郎二溪楊公於鄉為先達。年最長。而於公之門為姪婿。相見間。公纔弱冠。必持叔丈禮。不以長故貴。故稍假。在郡庠時。獨與一二同志辨學明古。即郡博且嚴敬。不敢問。餽遺常例。瓊人士莊為道學先生。相率師事。公惕然為作訓說。以詔之曰。今之學者。決狀元進士於科第。人恒壯之。此學莫自而來。聖賢以識真誨人。其說備在方冊。惟潛心玩味。而踴躍於諷咏。時舉伸由之。不恥緼袍。孟子藐大人。伯夷之敢於非聖服之心胸。往來不遺。或者充養有機耳。其程文藝則曰。文不過如畫師之寫神者耳。窮一生讀書作文。而於國家身心毫無補益。何異宋人所謂可惜一生心用在五字上者乎。故公之用心。匪特恥為聲詩。即古今文詞。要以闡發性靈而止。雖不棄古則而自成一家。大率如其人云。嘉靖丙午。督學林公始刮目公文。已廉其行誼。大加獎賞。適有所出婦許訟公。且誣裝資。林公詰問。以出妻令其可

嫁爲對。至所証裝俱不辨。惟稱貸倍償而已。林公益重之。己酉督學蔡公繼至。試題有不曰白乎之句。手公卷珍翫移時。因詢知公微隱事。嘆曰。茲所謂涅而不緇者。非耶。是歲公舉廣東鄉試。甫應癸丑一科會試。不第。而當四十強仕。即毅然自決曰。士君子由科目奮跡。皆得行志。奚必制科。遂就教。而瓊方平剿黎岐。安戢未定。公始舉于鄉。所答平黎策問。嘗有開道立縣之議。得者已才公經濟。至是伏闕上書。復申前說。其略曰。瓊之黎自弘治十四年迄嘉靖二十年。二十九年。凡三大舉。矣。臣嘗以爲弘治間開道立縣。可無嘉靖間兩次大征。即今大征後開道立縣。可無歲歲剿。年年守戍。聞者避之。已下兵部議。覆獻圖說。計便宜。燦若指掌。而議竟寢。已授南平學教諭。始至。申諭曰。教官非塾師比。職欽承明命。請以嚴師自處。諸弟子有一日之雅。當以從令自盡。乃首揭朱子白鹿洞五規。輔漢卿會粹六事。并摘鄉原忠信廉潔之似。孟子不見諸侯之守。孔子申張剛者之

辨。反覆啓迪。以發其真心。作其浩氣。毋論諸生講讀升散。必宿號舍。即其家冠婚諸事。亦稟請循禮而行。毋論行檢大節。所係乃兢惕。即減年微細。亦曰。即此已陷於不誠。不一之地。更學何事。相見拜揖外。不許更持一貨物進。而參謁禮儀。斷斷執會典憲綱。力以其身爲標幟。明倫堂不跪。道傍不跪。迎送郭門不出。上官至。一見後不復同。有司作三日揖。郡守諸大夫視學升堂。教官謁左右。跽公居中挺立。諸大夫色斂。語侵曰。安所得山字筆架來。蓋指公也。公志在行道。而一入官。區區禮節不見諒。謂此闕陷世界。何能有濟。遂告休。郡丞某恚公甚。欲聽去。太守某獨媿悔曰。彼所執。竟是吾誤也。時大司空朱鎮山公爲閩學憲。聞之。取赴正學書院修書。公力求去。鎮山公慰留曰。平生所學。謂何。所出謂何。只爭一跪耶。公乃留。按院至。延率諸生候郭門。有分守道某先進。見公長揖不跪。而誰之。侍者以海教官對。隨令侍者物色公。接按院作何狀。已按院進。公禮如前。分守公聞

之吐舌曰。今世有若教官耶。夫會典憲綱故事皆廢格。而獨創舉于公。雖若不無駭迂。而理有同然。則固更相嘆服。謂當于古人中求焉。用是抗顏於南平四餘年。所如一日。而守相臺察以上咸鑒誨之矣。閩中若驛傳不命有司而獨檄公酌議。公謂驛遞之疲。千瘡百孔。蓋由近年闕文冒濫所致。今當一切裁其不合法例者。而復國初五馬三驢之法。此為上策。乃若因職級崇卑以為應付多寡。而借闕不行中策也。禁止迎送勞擾。而就中稍為調停節減。以求諧俗。下策也。蓋中策下策。公已謂非國初之舊。然皆採時急務。故特舉之以為閩計。明裁革必可行乎。而公之由縣令以至巡撫。則固從上策矣。戊午春。擢知淳安縣事。一履境。睹痛苦萬狀。詢所以。嘆曰。天下事都被秀才官做壞了。豈直不才貪殘剝充囊索。即賢者亦鄉原正道交戰胸中。窮竭膏脂。博交延譽。乃輒歸咎朝廷征賦煩不可為。何也。征賦即煩。各有定額。去什一未遂。而額外無名可省不省。朝廷為之抑諸

臣為之耶。於是申飭所行事宜。而先為明其意。若曰。知縣知一縣事也。上而朝廷吾父母。中而撫按藩臬僚屬。使客鄉士夫吾長兄弟。下而吏胥里老百姓人等。吾子姓。遇之各有正道。若謂止可潔已。不可潔人。潔人生謗。謂凡所行不可認真。認真生怨。取禍不顧朝廷之背否。而以鄉原之道待其身。以鄉原之道待吾子姓。吾長兄弟。浮沈取名。竊取官爵。非知縣也。而丞而尉而師儒而里老而生員而吏胥。為各申飭。謂自吏胥而上。誰不身任民物之責。與有民社之寄。獨奈何自營私為也。即其所宜著為潔令。名曰淳安政事。蓋自信其粹乎聖賢中正之道。我祖宗頒行畫一之制。相與執守之。其自奉也。俸薪外絲毫不侵。雖家僮亦令樵採。庭甚清閒。吏書無事。亦聽其從農從商。里甲故用銀。每丁至四五兩。公只徵二錢有奇。百凡用度。取足於是。至上官檄縣取金銀。境內士夫。舊多委曲應之。公惟於其贖錢內理焉。有則送。無則已。撫按出例陰遺其吏書。謂無此則禍且至。公



獨曰、充軍死罪寧甘受、安可為此穿窬舉動耶。津要知原有餽問、外官入京有交際、謂要做官不得、不如是公獨曰、盡天下而不為上官之賂也、豈盡不遷。又盡天下而惟上官之賂也、豈盡不黜。安可自以其身甘溝壑也。淳故多淫祠、社學獨缺、公毀祠宇、以為社學、欲盡如洪武六年令乃止。而作興士子、以道義不以勢利。間有援例上舉、必諭之歸於正焉。維時都御史馮氏挾權相總制八省、驕政威焰赫甚。其子過淳安、索夫馬不與、怒捉輿臺、非理凌虐、甚至倒而懸之。公不顧、密執馮關防、詐偽中所云申文、得郵批、悉捕按如法。先是馮憲令巡歷所至務為節省、而其實不然。大率有司皆窮極淫靡、以事之、動費千百。計程只一日、當至嚴、嚴守相戒、盛為供具以待。公獨上稟帖曰、傳聞所至與憲牌異、欲從憲牌則懼招尤、欲從傳聞則恐違憲。下邑疲敝、未知所從。馮匿稟帖、署曰、照憲牌行。然遠道去、不過嚴矣。嚴守聞馮且至而中止、疑之。已知公具稟之故、慮禍且不測、盛怒。

待公入見、輒跪坐擊案曰、幾大官敢爾。語不停口。公惟欲容長跪、無一語辨。氣稍平、起揖而退、亦無後言。迨事竣、嚴諸官固無害。太守見謝曰、好了。淳安百姓難為汝、難為汝。然馮雖媿屈公、而陰嗾其私人來巡、驕曰、不驅海疆項、何以持風憲體乎。袁既受賄、便而按淳、又見公迎送不遠、供應不隆、有所鈞付、不唯唯應。詳曰、汝即欲學府官樣、還未還未。已而公給由申呈、駁云、方呈給由、已為陞任之狀。不准考覈論。然公無事可指摘、尋有通判嘉興之命。又以袁論之故、仍以原職改調。公聽調赴部。朱鎮山公貳銓曹矣。隆冬盛寒、公見猶服絲且敝。朱公曰、即貧不能製一官服耶。公始易一黃石絹。朱公為言、公清望於冢宰、嚴公而其鄰邑興國適缺、令遂改公補之。公抵任、察地瘠民貧、歲徵不滿什之伍、弊在浮糧。乃條八事上南贛都御史吳堯山。公次第請行、而獨急清丈。清丈甫畢、而報陞戶部雲南司主事。蓋鎮山公力也。公將赴部、太恭人怯北寒、思歸亟、不得已發王恭



人攜二男三女扶侍以歸、而輕身挾二僕北上。既視事、日見肅皇帝晚年玄修、大小臣工率勉強道服將事、乃慷慨上言、天下第一事以正君道、以明臣職。蓋為身家心與懼心合、臣職所以不明、求長生心與惑心合、君道所以不正。故以堯舜禹湯文武之治責君、欲洗數十年君道之誤、以皋夔稷契之輔責臣、欲洗數十年阿君之恥。其間批鱗逆耳、侃侃數千餘言、自許於有犯無隱之義。國史蓋詳載之。公是疏出、一日而直聲震天下。上自九重、下及薄海內外、無不知有所謂海主事也者。疏始入、即訪同鄉庶吉士王先生于玉堂公署、相見間自分必死、首以後事為託。詢其所由、袖中出奏草一通。人方危公、而公且談笑自若。至所遺後事、惟白金二十兩、曰死於爾乎、殯還我首丘足矣。已而對酒論文、談古今治亂興衰之故甚悉。至語及士大夫立身行己、惟以事事認真、集義養氣為主。徐而曰、今之醫國者、只一味甘草、處世者、只兩字鄉原。治古之盛、何由而見。語畢、從容赴

朝房、席藁待罪、鼎鑊自甘、絕無幾微可憐之色。王先生者、即今宮詹忠銘公、故嘗為予言之。嗟夫、死生之際亦大矣、而公就義從容若此、豈市直沽名、徵倖於一試者哉。疏入、為乙丑冬十二月。逾年丙寅、數月不下。時有廠衛人在公左右、偵食息暨所如往、而公則終日孑然、無所顧畏。上方憤懣、一日忽下公詔獄、論死。中外相顧失色、而會尚寶何公為司務、時上疏力救、公亦幾死。然竊聞公疏入時、上創覽怒甚、抵其章於地、已復取置御案、日再三讀、為感動太息、稱有比干之忠。又密諭輔臣在華亭集中云、他說的都是理、但言過激爾、遽加刑戮、恐後無此人了。然則肅皇帝曷嘗有死公之心哉。獄雖上、而竟留中、意亦以淵矣。臘月幾望、肅皇上賓、莊皇踐阼、首遺詔出公於獄、復原職、尋改兵部武庫司主事。丁卯改元、晉丞尚寶。四月、丞大理右。七月、轉左。適有波羅之役、奉使回省、公遵令甲行出使禮。三司諸公率以鄉官忽之、而今自處、其峻學憲羅公尤相齟齬、至以

私却沮太恭人旌節事。公亦不為之屈。十一月，陞南京右通政，復迎太恭人就養。而王恭人始偕來。己巳春正月，改通政司右通政提督騰黃。六月，陞右僉都御史，奉勅總督糧儲，巡撫應天。撫故與按並彈壓一方，欲有規畫，必衡隔後行。公則謂撫按各有專責，不得越俎相侵，乃獨以昔所為教南平者，令淳安者，令興國者，稍加潤色，擴充為督撫憲約，意蓋主於斥黜貪墨，搏擊豪強，矯革浮淫，釐正宿弊。令既布，嚴乎烈日秋霜，風物頓易。郡邑吏凜凜競飭，若非往日人。賦者則望風解印綬去，權豪勢宦斂手屏息。至移他省避之。有顯者請其門第以居，聞公明日將至，一夜遂易而黝。監造中貴某素驕橫，侈縱出入，肩輿八人，騶從甚都。一見公，即內媿貶損，不能自安。所用肩輿人遂減其半。吳故有淞江，匯震澤入海，瀕江田畝灌漑宏多，已被潮嚙淤為陸，議漕者憂之。無就。民有謠，惟是海龍王始開得耳。至是，公議開實應民謠，而按院某者先是惡公壓已，每事不與之商議，乃

於此舉故為相左，且欲按劍尋其後。公不顧毅然獨以身任之。措處公羨召募丁作，乘輕舸往來江上，督畚鍤，不旬月報竣。計費甚省，且役成而民不知勞。按院某驚訝竊嘆曰：萬世功被他成了。至今姑蘇民無不德之。獨以公在任不久，未及大究其施為，憾焉。江以南貧富相傾弱者，率投獻田地，豪家以為奸利，而仳離瘠苦之狀接于目。侵占吞奪之訟聚于庭。公氣勃勃，下令受獻者悉退還，或許贖，即恩厚如華亭相公家，亦義勸其退田不已。蓋公嘗論：欲天下太平，惟有井田一法。井田之卒壞而不復，惟有亟奪富民田一言。至于不得已而限田，又不得已而均稅，下下策矣。然猶井田遺意。故其兩制疲邑，皆用清丈，茲又令獻鬻還贖，意亦仁哉。顧勢豪沿襲腹誹唇稽，竟以奪富民田中公，而舒戴給事章交至，解撫事，專督南京糧儲。方巡撫候代，而糧儲裁革，實以計去公也。公以庚午四月回籍，閉門却掃，為終焉計。自始仕至此十八年，所祿入雇買居第一區，值一百二十



金、祖田十畝外無益。惟萬曆乙亥治太恭人葬事，兵憲陳公助賻金，始斥置墓田數畝耳。居恒稱不給，而交際所入輒周戚里貧乏，未嘗自私。邦大夫戈戟相屬，謫民瘼，問行政得失，必纚纚為正言之。恥面諛，亦罔及其私。曾有吏書算田畝，陰為公減一畝八分。公清出，不謂其厚已，必鳴面正之。山水諸癖一無好，而惟喜讀書。其所著述如泰伯等論、多破除俗謬，而猶喜引進後學。家居十餘年，日為課藝文，說經義。或餒困時，以手撐腹言，無倦厭。即相送出門，猶立談移晷也。平生然有用世志，嘗讀嚴子陵傳，至橫足帝腹事，嘆曰：吾人一身備萬物之理，則當以萬物一體為己任。士君子出處何常？視所遇何如耳。有君如此，安忍負之乎？歸未幾，而薦者踵至。都諫雒涇坡等會薦，有忠實日月、望重華夷之語。而吏部具覆奉命，遇有員缺相應酌量起用。逾年，萬曆改元癸酉，又奉命。遇有兩京清散員缺，推補時益籍籍望公起矣。嗣是御史若詹若龔若梅若王都御史若郭

給事若王谷具疏薦，而最後甲申冬十二月，鄧按院純吾報命薦如會薦。然上曰：海瑞既屢經薦舉，查有相應員缺，即便起用。不逾月，推通政司左通政。上又曰：再查相應員缺起他。逾年乙酉正月，起僉南臺都御史。未至，以為南臺都御史右侍郎。舉朝搢紳無不羨主上特達之知，而海內聞公起，亦誰不舉手加額，獨惜其起稍遲耳。蓋公是時年已七十有二矣。公以三月間命，即束裝就道。或勸公盍姑辭諸公，則謂主上有特達之知，臣子不可無特達之報。區區虛襲奚取焉？遂啓行。自瓊臺至峴峴，家僕皆徒步，有一小僮亦祇攜附前輿，不與馬。又自五羊至上新，惟坐一小船寂寂過，多無知者。五月履任，冢宰丘月林公未到，公署部事。見兵馬司票取坊上人辦公讞百物，又見該坊送各衙門取應票共三百餘紙，嘆曰：夫以五城之人當一京千百官出入用度之擾，誠難而苦矣。吏部既長六曹，安可不念先百姓？遂張示禁革。故辦事官更有輸銀公費，并新任有賀禮一切革。嘗思

念方今主聖臣良萬載一時而吏治民風猶如先日因疏引骸骨併陳一日治安要機謂欲安百姓先守令欲督守令先司道欲督司道先撫按而致望於閣部諸大臣歸本於君身治安之要誠無易此顧獨憤貪殘滿載論劾不止者蓋起於改枉法贓八十貫絞律而從雜犯准徒許贖非重刑決不能懲以故援霍文敏請復枉法律疏而因及國初尚有剝皮囊草特以明其言必可信而觀者不察遂謂欲復剝皮令焉且歷舉今政以責難於君曰願皇上以茅茨土階之心居九重金闕持智者行所無事之術御一日萬幾見堯舜母見天子意真語切而近於懇即帝心亦且難之蓋疏上為甲申二月而是時則又有南右都御史命矣公用世極銳上用公亦極銳決歲三遷咸屬睿眷自此疏一出忌信參焉而梅房御史遂憑藉雖黃房則大肆詆擊公質不勝房惟是彭君遵古諸君壽賢顧君允成三進士疏乃足以發揚正氣而培植善人耳公於時雖拜命履都御史任而歸

志已決屢疏乞骸骨第國是未清主眷未衰火甲夫差方題議未定時且大計故遲遲焉大計苦於愛憎荒煩是非難一公獨與冢宰李公秉公持正毋縱毋苛衆咸服之至於火甲止為地防守原無雜差今則一京千百其官率於茲焉取用雖節題革亦竟廢公乃一正之於官民界限使官不侵民民不病官總之為簡可照煩一冊使上以稽下下以應上留都民若弛重負出湯火矣而公意猶以未盡如京師為歟云比夫議既定歸志益決貽不佞龍書曰七十有四非做官時節況天下事只如此而已不去何為龍復曰此兩語足以決去就矣蓋六乞骸骨不得允竟以丁亥冬之十月十有四日卒於留都慟哉卒之前三日兵部送柴薪多耗七錢猶扣回病不藥臨危男僕猶不入內無一語及身後事獨抱真純以還檢篋內庫祿金一百五十一兩綾細葛各一微都御史王公麟泉率諸御史捐金治具何以歸乎子姓兄弟既無一在側雖有二膳四僕又愚弱不任而更衣



沐浴含歛。悉都御史王公、左右襄治。則諸御史噫嘻。公何以得此於諸公哉。南諸搢紳見公卒。相顧悼曰。天不佑善。俾正人氣奪。百姓奔相告。扶服悲號。若喪慈母。十一月六日訃至。亡論識不識。更相悼曰。安得復見若人。上聞。為之咨嗟繼惻。申命秩宗考典禮。祭八壇。水衡致金錢。它窀穸。遣行人許君子偉往治葬。太宰議贈官。加太子少保。太史易名諡忠介。蓋上之篤念直臣。恩厚如是哉。公生於正德甲戌十二月念之七日。享年七十有四。配王氏。封安人。繼封恭人。前娶許氏。生二女。出後娶潘氏。不越月亦出。側室二。丘氏。韓氏。人之口實。公者謂公此處認真太過。至六娶七娶。不知公娶惟三。而慎選輒易。則側室其出其死。抑亦所遭不幸。乃其中尚有人不能堪者。而公且安之也。子男二。長中砥。次中亮。皆王恭人出。一十一歲。一九歲。以公在獄時殤逝。晚又生一子。中期。丘側室出。三歲而殤。從弟珣有仲子中通。倫序應繼。公雖未立而起官時。屬以家。則繼者必此子也。女

三。長適蓮塘張筠。次適林知縣子林岳。皆許出。三適郡學生周維城。王恭人出。嗚呼。公之出處生死。其關於國家氣運。吾不敢知其學士大夫之愛憎疑信。吾亦不敢知。第以公之微而家食燕私。顯而涖官立朝。質諸其所著嚴師教誡。一一契券。無毫髮假。孔子所謂強哉矯。而孟子所謂大丈夫乎。古今一真男子也。論者槩其性甘淡薄。有採薇之風。天挺忠貞。有叩馬之節。謂道似伯夷。信矣。然其視斯民。由已飢寒。恥厥辟不為堯舜。言動必則古昔。稱先王。涖官必守祖宗成憲。挫折不磨。鼎鑊不避。即伊尹奚讓。望之如泰山。壁立。就之如春風太和。接談無疾言。無遽色。臨難無鬱氣。無忿容。簪楚子弟。捷滅獲。亦不見其厲色嚴聲。即柳下惠奚加。特其質多由於天植。學未進於時中。任事不無或過。而隘與不恭。蓋亦有焉。嗟夫。公所莅威。口碑戶祝。所至爭和道塞途。瞻望之處。留都時。有不識姓名。遠方老者。求供帚除。一月兩月去。又有相率求貌公像以去。學士大夫亦有焚香事

公每事必卜。如羅浮葉綱齋者。而不佞龍居門下。既弗克復公歸。又弗克嚴事公。謂之何哉。公始至留都。道城曰。吾嘗憐賢親不砥柱中流。落入俗套。三復斯言。凜若嚴師教誡在上矣。是用收淚短述。深自鍼砭耳。乃若所以不朽公於幽而勸天下於明者。則以俟夫立言君子。

樂雲龍撰（備忘集卷一〇）

南京都察院右都御史海忠介公瑞傳

京學志

公名瑞。字汝賢。廣東瓊山人。以鄉舉爲南平學教諭。初至。謁上官止長揖。曰。吾師席也。可屈膝乎。因著論云。孟子言爲貧而仕者。非也。抱關擊柝。委吏乘田。無在非道。而尤莫如教職。蓋人材所由造。世運所由理。其職亦何尊且難。乃稱爲貧哉。自世治。此說不察。故居此官者。多娼娼不舉其職。士習然而吏治。紛所從來矣。持論若此。尋進淳安令。淳。嚴邑也。地瘠而民貧。所產茶竹杉柏。外無他物。且重崖複嶂。民易逃匿。山下田畝。悉歸古姓。窮民卒歲不粒食。又當新安下流。諸官舫日五六至。夫役迎送。費不可支。公親民窮。慨然思拯之。初入署。例有燕。公第以祀神牲草草治具。乃召丞尉若學官弟子。若耆老。以次列。備陳所爲奉法字下意甚悉。竟日散去。淳安人固沾沾。知令志有在矣。無何。度田定稅。不使貧富得上下其手。官署中有隙地。課老僕樹禾麥。執蔬芥。旦夕取自贍。自江水外無關。淳安者。胡公宗憲總制浙直。權甚重。家僮過淳安。公無加饋。胡一日語藩臬曰。昨聞海令爲母壽。市肉二斤矣。蓋笑之也。豐城郭懋卿由中臺出。望鹽政勢張甚。所至縣令如上供。以得無叱辱爲幸。維揚



三臺使聘燕之費千餘金。耶將往，徵齊雲、陳所遇郡邑供辦，令甚峻。及淳安，公乃爲書上耶，言邑小不足奉迎，願取他道往，且言汰侈不可爲，與小民不當虐也。甚具。耶得書，色變。久之，遂罷齊雲行。曰：「今言是也。」落泉郡守聞之，股慄曰：「今何煩？」果我輩矣。公時已晉嘉興別駕，耶私人御史袁迎耶意，以他事摘公從舊職論調興國。興國地故單薄，歲賦不人民苦，浮糧爲患。公進八事上之中丞，而獨亟清丈以蘇貧民而均其賦。已陞戶部主事。時肅皇帝尚玄脩，朝政多曠，公慷慨言天下大計，謂興土木爲傷民，教推廣事例爲窮民，以師陶仲文爲非禮，以仙桃藥丸爲怪妄，甚者以不見二王不還大內，誹謗猜疑，僇辱臣下，爲薄於父子夫婦君臣。其言皆敵以下所不能堪者。上震怒，投其章于地。已徐閱之，意若爲動者，畱踰月不下。而會上意有所不可，遂下公詔獄。中外縉紳相顧失色，而公直聲亦遂聞天下。以何肅皇帝崩，莊皇帝奉遺詔出公獄，還其官，尋改兵部主事。已遷承尚寶，丞大理，南京通政，入爲左通政，遂以僉都御史撫應天。時公威名籍甚，中外墨吏往往里風解印去，權豪怙勢之家率相戒毋敢犯。一顯者藉其門以

居，聞公至，卽易赭而黝。中人監造者以八人肩輿行，見公亦減其半云。吳故有松江、滙震澤入海，潞江田藉其灌溉，已爲潮蕩淤爲陸。公斥羨募工，乘輕舟躬督畚鍤，開濬之，不旬月而成。又吳俗貧富相傾，弱者率獻田于其豪，以爲奸利，輸不必入，公獨邪異窮民而摧折士大夫之豪有力者。是時吳中貴人無逾華亭相，接問其家無少貸，而弟侍郎陟武斷殘民，輒違治如律，盡奪還其侵田。自是士大夫之名貪暴者多，鼠跡遠郡以避。小民始忻忻有更生之望矣。公嘗論欲天下太平，惟有井田一法。井田之壞而不復也，惟有亟奪民田一言。至於不得已而限田，又不得已而均稅，策斯下矣。然猶爲井田之遺意，故其令疲邑，撫三吳皆以清丈爲急，而力行條鞭一法，令額外征徭不至重困之。至今小民得保守田業，相率繪公像而尸祝之，比比也。然公竟以奪富民田府怨，而議者亦以此中公遂解官歸。里居十餘年，九卿若臺省前後薦公者無慮十餘疏。今上聞公名，起公南僉都御史，旋以爲南吏部侍郎。公至，首陳治安要機，謂今日貪墨爲姦，決不可縱，欲使百姓安樂，當簡守令，欲督守令，當責成撫按與聞部大臣，而歸本君身，多責難

誦疏奏、上深鑒其忠、屢徵召用、而柄地有陰沮者、乃以爲都御史、掌南院、決歲三遷、皆出特簡、海內端人舉手相摩、以爲特達之知、而小人之不便者、顧目公爲迂闊、詆之甚力、章亦解不下、公屢疏乞歸、上屢報聞、竟以丁亥卒于官、卒之日、貧無可給、棺槨、士大夫醵金以殮、士民哭公、至罷市者數日、祭于途、累數百里不絕、計聞、上震悼者久之、贈太子少保、諡忠介、賜祭葬、公在南都、一意自約、罷無名之賦、其理根排枝、概剔弊垢、見爲毛舉細察、要以惠養元元、毋耗敗財用而裕其力、蓋世人所視以爲迂、而公則斷然以爲必可行者、南都民故苦火甲夫差、公力爲蠲正、使官民不相擾、爲簡可照煩冊、以便遵守、民若出湯火、而公意猶以未盡、如京師法爲歉、科條甫備、而公不能待矣、惜哉。

海忠介公瑞傳

王弘誨

今天下冠帶之倫、其以賢豪自命者非少矣、然往往趣舍異路、而言行相詭、或借爲中行之說、陽押而陰爲開、而不自知其窺入于邪、愿之中、或見謂功業有道途、可指取、有名節、可展笑、凌厲恣睢、而苟爲高、而罔致嚴于簪簪之飾、其平居之所慕說、蓋稜稜若異

代人不可及、乃其行事之概、未及蓋棺而論定矣、名不虛立、士不虛傳、壯夫義士、非其仁心爲質、蟬蛻歷境、不畏義氣、毋榮倖生、則謂以較然稱大丈夫哉、今有感于忠介海公云、公生於嶺南、爲吾鄉之瓊、由人名瑞、字汝賢、別號剛峰、其學一切以剛爲主、其譚說理道、雅尚節槩、非陽浮慕之、而創爲名高者、自辭受取予進退、以至拱揖遜讓、居室食飲、務盡地而趨、嫌阿之態、側媚之行、絕不以稍於心、而縈于躬、用世之志、老而不衰、至縮胸儻易驟、而致通顯者、則寒耳而不顧聽、謀國之忠、持已之介、終其身斷斷如也、自爲諸生時、卽抱當世之慮、瓊世苦黎惠、每爲經畫區處事宜、始以計脩來、伏闕上平黎策、意謂開導置縣、以免征勦守戍之苦、識者相與壯之、已而就吏部選、曰仕亦各官命耳、何擇爲、選而得教諭南平、以倡明師道爲已責、首揭鄉愿忠信廉潔之似、孟子不見諸侯之中、孔子申根剛者之辨、以廣厲學者而作其氣、抗學官禮於臺使者及監司使者、務守會典憲綱、獨立行一意而已、臺使者監司使者相驚嘆、以爲古已還淳安令、至則校講民所疾苦、蠲除不俟日、身自飯糗糲糲、僅從悉令樵採者、俸之外、無所取、時相殷黨



鄢某者以都御史制入省。離政出行部。張甚。諸縣道咸盛供帳。爲敬。懼失其意。公挺然不爲動。至按其生事者。聞於鄢而置之。法。鄢貌喜而心銜之。公時陞嘉興府通判矣。鄢之私人某。窺鄢意。以他事摘公。從權職論調興國。地故單薄。歲稅不入。民苦浮糧爲患。公自爲七事。上之中丞。臺次第施行。而獨急於清丈。以蘇貧民而均其賦。已陞戶部主事。時肅皇帝恭尚玄脩。大小臣工率勉強追服從事。公陳說上言天下大計。謂今日君道不正。臣職不明。欲洗數十年君道之誤。則莫如以堯舜禹湯之治責君。欲洗數十年臣道之誤。則莫若以皋夔稷契之輔責臣。疏凡千餘言。多慨激。上震怒。投其章於地。已詳閱。意若爲動者。留驗月不下。會。上意有所不可。遂下公詔獄。中外縉紳相顧失色。以何。肅皇帝崩。莊皇帝奉遺詔。以原職出公獄。尋改兵部主事。已晉丞尚寶。丞大理南京通政。入爲左通政。遂以僉都御史撫應天。時公威名藉藉中外。墨吏望風解印綬去。權豪怙勢之家。率相戒毋敢犯公者。吳故有淞江。滙震澤入海。瀕江田灌漑弘多。已被潮蓄淤爲陸。公斥羨募工。乘輕舟往來。身自督畚鍤開濬之。不旬月而告成。又吳俗以

貧富相傾。弱者率獻田於其豪。以爲姦利。愉不畢入。其俗日告訐無已。公廉得其主者名。詣寧無少貸。悉令受獻者還其田。或計之。不使富家有侵奪名。由是吳賦無復逋負者。蓋公嘗論欲天下太平。惟有井田一法。井田之壞而不復也。惟有亟奪富民田一言。至于不得已而限田。又不得已而均稅。策斯下矣。然猶井田遺意。故其令疲邑。撫三吳。皆用清丈及令獻。密達贖。毋俾苦樂不相等。爲安養生殖至計。然公竟以奪富民田府怨。而議者亦以此中公遂解官歸。歸杜門。時不能溫突。意蕭然也。交際所入。以周族姻之貧者。邦大夫時過從。問政。纔爲言不少懈。取面談亦四及其私。里居十餘年。而九卿若臺省前後薦公者。無慮十餘疏。今上銳意太平。起公南僉都御史。旋以爲南吏部侍郎。公至而疏乞骸骨。行陳治安要機。謂今日貪墨爲姦。毫不可縱。欲使百姓安樂。其於守令務極選。欲督守令。先司道。督司道。先撫按。而致望于閣部大臣。及歸本于君身。中多責難之語。疏甫上。而又有南右都御史之命。決歲三遷。俱出特簡。海內士大夫舉手相告。以爲主上特達之知。而言官某某目公爲迂闊。詆公甚力。章亦寢不下。公疏屢報

聞竟以丁亥卒于官。卒之日無一語及私。貧無可給。棺槨都御史王公率諸御史相與捐金治具。計聞上爲震悼。命禮官議諡。諡忠介。且錫之祭葬。存沒之資於數爲優矣。公之始至南都。一意省約。罷無名於官之可去者。其理根排枝。慘痺爬垢。見爲毛舉細察。要以惠養元元。毋耗敗財用而裕其力。蓋世人之所視以爲迂。而公斷然以爲必可行者。南都民故苦火甲夫差。公力爲正。使官民不相擾。爲簡可照煩冊。以便遵守。民若出湯火。而公意猶以未盡如京師法爲缺科條。市備而天不慙道。公已相舍。豈天不欲斯世蒙仁人君子之澤耶。悲夫。當余官翰林時。公以戶部主事言事。自分必死。過余談治亂興亡之事甚通。又相與論文對酒。已乃出二十金遺余。屬之。我死必以此殯我。公今沒于南。子姪兄弟無一在者。而余職侍帷幄。無能觀含斂。諸責之是規。獨計公之精忠大節。所以傳不朽者。固自有在。而余以公意氣之交。能道公之事。其詳而且信者。宜莫如余言。故因友人梁君之狀而爲之傳云。

贊曰。海公者。非唐所稱楊綰流耶。方綰之相唐而大臣減音樂。黜貴撤騶從。方拜命而轉化。乃爾此豈有

聲音笑貌也乎哉。乃海公之砥節礪行而縉紳又多遺議。何也。夫謂公意不可一世則可。謂公無用於世則不可。因其不可一世也。而遂詆其不得用於世。則又不可。烏乎。行爲國棟。德足世儀。思以達名介而達利。剛標高碣。挽我叔季。若海公者。吾不得而見之矣。

以上二文并見《國朝獻徵錄》卷六四

校記

①「民」上當脫「富」字，見下篇所述。



儒藏

明儒碑傳集卷七十

羅汝芳

皇明理學名臣傳

雲陽後學譚希思撰 四川巡撫

公諱汝芳字惟德別號近溪建昌南城縣人幼穎異有大志差長罹大病遇禾川顏君教之習靜病日減遂事如師因一意性命學居恒泛觀魚鳥獸禽愛其群隊戀如悲鳴相應惻然思曰何獨人而異之偶塗竹逢客談笑竟日忘倦又惻然思曰何獨親戚肉骨而異之從此痛自刻責力祛已私喜歸人過歸已益歸人損歸已初學時每清晝長夜揮淚自苦久之已日有克甚至不愛髮膚念念以利濟為急嘉靖癸丑第進士寓京師與姜鳳阿寶胡廬山趙鄒頤泉善耿楚侗定向劉養正應峰諸先生聯同志會展夕切劘各有所得維時分宜柄政網羅名望公寧觸忤靡少染出守寧國衍聖諭六言曰令講生發明父子弟休戀環聽者萬計公即境即言發其渾淪活潑之機啓以並生同生之天有苦思慮起滅者則

未透覺之有以中常炯炯為得力者則以赤子原來帶來正之有以持心不放為工夫者則以意念端倪聞見想像之錯認者提醒之隨問隨答惟是性靈朗耀洞徹空澄而迥無隔礙自然圓妙迅疾一粒而九有盡含一息而萬年莫竟總括之以覺字覺靈知也言人心之靈動于感應其是非得失纖微罔不自知循其知而致焉是聖賢之閥鑰也于時聞者多有省寧之人信如著龜親如父兄入覲同徐巖泉熨謁政府徐文貞階于西苑曰宗社以人心為本今來朝官多譽俊所患學脉不端請合併一指示嚮往文貞躍然大會于靈濟宮蓋本朝稱盛舉焉嗣是所至宦轍群人而學如寧國然萬曆癸酉起復謁首揆張太岳居止多感傷張問故公由閭閻疾苦難上達張曰堯舜獨不病博濟耶公曰由某論之唐虞君臣刻刻時時必求博濟張默然未幾入賀以會友講學搜劾去或請少輟從時好公曰此學命根也某披瀝矢心即萬死不悔避或曰不懼黨禍乎公曰人患無實心實心講學必無禍黨人者好名士也非實心

講學者也。自是遊名山、求友生、涵泳理會、日益精進。其言曰：良知心體神明不測，原與天通，非思慮所能及。吾人一時覺悟，非不恍然有見，然知之所及，猶自膚淺。此後須周旋師友，優游歲月，收斂精神，凝結心思。思者聖功之本也，故思曰睿。睿者通微之謂也。通乎晝夜之道而知，方可言通。動而未形，有無之間，方可言微。至此則首尾貫徹，意象渾融，覺悟之功與良知之體如金、如火，煅煉一團。此方是功夫妙處。又曰：生者天地之德，人則天地之心。心之生德，精瑩靈明，妙應圓通，渾渾淪淪，初無名色。天壤充塞，似虛而非虛。神明宥密，似竅而無竅。故孟子直揭知體名之曰良。良字訓作易，直言其感而遂通，元不出於思量，發而卽至，元難與以人力。世人不省，緣此起箇念頭，就念生箇識見，因識露箇光景，便謂吾心實有如是朗照澄湛，不知此段光景原從妄起，必從妄滅。及至應接選用，着天生靈妙渾淪的心，心儘在爲他發主，他只去想念光景，盡認意爲心之誤也。人曰：獨之靈性通徹于帝天，獨之妙用昭察于率土，中庸指其爲

見顯則慎之所自起。大學嚴之於好惡，則慎之所由施。又曰：學問原有兩路，以用功爲先者，意念有箇存主，言動有箇執持，不惟已可自考，亦且衆共見聞。若性地爲先，則言動卽是現在，且須更加平淡，意念亦尚安閑。尤忌有所做作，豈獨人難測其淺深，卽已亦無從增長。公之學，惟從性地入手，故從虛上用功，坦然蕩然，忘垢忘淨，更無戚戚之懷也。無憧憧之擾，安排無事，賢愚無收，直欲心體與天地爲徒，意氣共爲魚活潑。又曰：吾人日用獨處，其念頭之慈祥恩愛者，爲仁；嚴刻峻厲者，爲不仁。吾人以生爲心，其不善宜長，惡惡宜短。試觀惡多於好，則惱怒填胸，不免爲惡人。如好多於惡，則生意滿胸，方叫做得好人。是又教人切近處。年七十四，萬友史問疾，公命具紙筆，手書曰：此道炳然，宇宙原不隔半分塵，故人已相通，形神相入，不待言說。古今自直達也。後來見之不到，往往執諸言詮，善求者一切放下，放下胸目中更有何物可有耶。願同志毋惑。諸孫問考終有何語，公曰：諸事俱宜就實。孟圓則水圓，孟方則水方。又曰：聖論六



言直接堯舜之統發明孔孟之蘊汝能合之論孟以奉行於時時則是熙然同遊于堯舜世矣於作聖何有言訖端坐而逝門人私諡之曰明德先生

諸儒學案傳

安福後學劉元卿撰禮部員外

先生名汝芳字惟德家世南城四石溪因號近溪其先豫章人遷建昌父前峰公娶甯氏生先生甫三歲偶念母而啼父抱之即止隨思曰心一耳何苦無幾變也五歲從母授孝經家人故亂其誦大怒隨告母曰何怒之難轉也十五從張洵水公學一日誦薛氏語錄云萬起萬滅之私亂吾心久矣今當一切決去以全吾澄然湛然之體先生焚香叩首矢心力行數月而澄湛之體未復乃閉關臨田寺凡上置水鏡與之對坐令心與水鏡無二久而成病及讀傳習錄病遂瘥丙申年二十八邑學庚子見顏山農公因述生死得失不動心狀顏曰是制欲非體仁也又曰知擴四端而火然泉達何制欲為先生悟遂師事之癸卯舉于鄉明年捷南宮聞父病不廷試而歸己

始建從姑山房接引來學戊申學易于楚人胡子宗正胡子宗正者舊以舉業師先生先生知其易有傳也迎致之執弟子禮胡喜使先生息心而深思之間謂曰若知伏羲當日平空白地着一畫耶先生畧為解說胡默不應徐曰障緣愈添本真益昧如是三月然後見許忽一夕有所悟趨父榻前跪曰兒今幸悟格物之旨矣曰何也先生曰大人之學必有其道大學之道必先致知知之則盡大學一書無非是此物事父然其言癸丑廷試授太湖令先是邑多盜先生修渤海之政以道化之盜悉平其諸政務一本於興教化明禮樂不為一切俗吏所為擢比部主事出審大同宣府獄過魯問道泰山丈人學益進迨守寧國教化大行以崇學術育人材為功課死陵六邑一時有三代風未幾丁外艱奔歸士民悲號不忍釋去有步至盱江者先生家居四方來學者日益眾聞山農公獲罪監禁留都乃稱貸數百金同二子及門人買舟往救竟得釋尋丁內艱壬申當道引哀詔促起復補東昌先生治東昌如寧國癸酉遷雲南副使

爲開水利、塹城壕、省徭役、政暇召同志講學、信從益衆。無何、轉藩叅、齋捧入京、禮成、請告出城。同志留會廣慧寺、忘者有言、於是得致仕之命。先生欣然曰、時江汝水之間、寧無斐然小子可拔者、復與諸門人聯轍各郡、走安成、下劔江、趨兩浙、金陵、往來闕廢、益張皇此學。戊子八月、晦偶疾、乃冠服禮天地祖考畢、端坐中堂、弟子環侍請教言。先生曰、徒言也不是、道滿前洋溢、俱是發育峻極。萬左史問疾、手書七十字與之。九月朔、盥櫛出堂端坐、命諸孫次第進酒、隨拱手別諸生。二日、整冠端坐而逝。年七十有四。先生接引友朋、隨機開發、所止處、弟子滿座。既歿、門人楊起元等私諡曰明德先生。

近溪羅先生傳

安成友人王時槐撰

太常寺卿

萬曆戊子秋九月二日、時江近溪羅先生卒。後九年、雨申、其孫國學生懷智伯愚甫、謁予于螺川。予延之三益、山房、細與辯對。臘盡春回、雨越月而後別。予因得先生會語、庭訓、策策遺錄、登繫焉。予初以伯愚

習聞先生緒談、意其戔戔口吻、而無暇受新益也。乃與默坐、不漫出一語。既踰旬、試叩焉。伯愚則若一無所聞者。虛中密究、務期自得。予大快、以爲先生真有後、可以續衍先生道脉於方來也。伯愚以先生小傳屬予。予顧淺陋、曷足以模寫測量於萬一哉。先生諱汝芳、字惟德、世爲建昌南城人。始年十七、因有感於薛文清公萬起萬滅亂心之說、即閉關、置水鏡于几上、對坐澄心、久之成疾。及讀王文成公傳習錄、喜而疾瘳。已而爲邑庠諸生。入省、見顏山農公、聞體仁之說、有悟。師事之年二十有九。舉于鄉。明年會試中式、不赴。廷試歸、學益勵。一夕忽悟大學格物之說。年三十有九始赴。廷試成進士。授太湖令。以教化代刑辟。暮問訟息。民和政聲藉甚。擢刑部主事。歷郎中。出守寧國。政如太湖。丁外艱歸。後十年、奉穆宗遺詔、始起復補東昌。陞雲南按察副使。年六十有三。陞左叅政。嚮請致仕、還從姑。開論來學。備涉燕吉。洪饒楚粵閩浙留都徵寧諸郡大會同志。京南之學不振。蓋歸休凡十有二年。享年七十有四。門人私



論曰明德先生云。先生平生學以孔孟爲宗。以赤子良心不學不慮爲的。以天地萬物同體。撒形骸忘物我。明明德於天下爲大。自少至壯而老。無一息不在學。自家居以及四方。妻奴童僕。族閭村市。以及通都大邑。縉紳大夫。千百徒衆之相接聚。無一人不勉以學。自令長歷郎署。領郡符。佐藩臬。所至無一地不以學爲政也。其作人化民。風動遐邇。詳具少宗伯傳。所楊公誌。大學士澁陽趙公表。侍御養貞詹公碑。郡司理鳳岑萬君狀中。予故不具論。憶嘉靖乙卯。予以南。主客郎出僉閩臬。道經太湖。先生時爲令。留止信宿。邀至演武場觀兵壯射。先生語予曰。吾茲校射中一矢以上者。賞有差。不中者罰。蓋不中者不得受募金。卽以增給中者。是移罰爲賞也。官不費而民壯自勸矣。又曰。吾此心。每日在百姓身上。周迴不暫釋也。予聞其言悚然。謹識之。及入閩。祇服未敢忘。復依其校射賞罰之法。行于漳南。久之以靖山海寇警。卒獲成效。壬戌。予以內艱服闋入京。先生時爲刑郎。邀予夜對。疊疊劇談。已而語人曰。吾與王子劇談。誠祝天願。

其有契于吾言也。其切憊懇至如此。乙丑。予爲符卿。先生以寧國守入覲。既見政府存齋徐公。出語予曰。吾適見公。首言公當勸主上以務學爲急。然必於其左右。贊御焉。先之。公誠能使諸大閣知嚮學。卽啓沃上心。一大機括也。公奈何僅循內閣故事。以塞其職耶。公大以吾言爲然。因嘆曰。諸君講學。只三五卷談。不足風世。得君相同心學道。寰宇受其福矣。一夕。先生招予過其邸舍。聯榻而寢。比四鼓。先生問予曰。近日何如。予曰。吾惟直透本心耳。先生詰問本心。予請示。先生曰。難言也。譬如蒸飯。必去蓋。乃知甑中有飯。去甑。乃知釜中有水。去釜。乃知竈中有火。信未易言哉。予曰。豈無方便。可指似處。先生曰。莫如樂。第從樂而入可也。萬曆戊寅。予歸田。旣久。先生亦謝事還。予買舟訪先生于從姑山房。請益。先生曰。學必有定向。庶可決成。予請示。先生直以一語酬答。予憮然有省。予留從姑。踰旬。見先生天真粹朗。彼己盡忘。八荒洞然。了無畛域。語笑動靜。食息寢處。神機自運。不涉人力。朝夕盥疏。與客。

共食。客至盈座，亦無增味。熙怡竟日。諸生不問則默，無繁言。蓋先生以精神感人，有出於言詮之外者矣。予見先生博大渾涵，普愛同人，累無揀擇，境隨靜鬧，不生取舍。乃自愧予之淺衷，局量耽僻，厭煩，誓當頓捨宿障，庶可通於大方也。時有士人以專持佛號求往生爲學者，予問曰：若此者何如？先生曰：得無全靠彼乎？予曰：學者攝心方便之門，不一，亦均之爲有靠矣。先生曰：此當有辯。臨別，先生送予舟行，以勿復致疑爲囑。甲申，先生過螺川，訪予白鷺院中。予試問玄門之學，先生曰：豈嘗有所聞乎？蓋言之予，漫述艮背之說。先生曰：內典謂吾人自咽喉以下，名爲鬼窟。因極口贊中庸二字曰：平常是道，何事旁求？蓋自是別後五年，而先生弃人間矣。先生既歿，海內咸望風追仰。然予竊謂後學真知先生者寡。彼徒見先生之標末而未窺先生之底蘊，故或妄意以爲慕先生之學而未免失其矩步，以蹈于縱蕩之歸也。先生脫略蹊徑，渾無朕跡，人所共知，而不知其中貞白無瑕，一切外物嗜好都絕，芥視千金，皜然不悅，舉以與人若拂。

輕塵，寔出性成，非由強作。當太湖離任，邑吏以公費餘金請受爲路資，竟斥置官庫而行。其介如此。至擲產貨金以急師友之難，傾囊倒囷以應饑乏之求，卽人以禮餽，隨手散施，澹然其忘情也。先生之薄利殆罕其儔，而昧者以有慾之心，藉口於先生之脫畧蹊徑，遂蕩然潰防，敗節以僭附於狂簡者，不亦遠哉？先生蚤歲於釋典，玄宗無不探討，繼流羽客，延納弗拒。人所共知，而不知其取長弃短，迄有定裁。今會語出晚年者，一本諸大學孝弟慈之旨，絕口不及二氏。伯愚嘗私閱中峰廣錄，先生一見輒持去，曰：汝曹慎勿觀此。禪家之說最令人躲閃，一入其中，如落陷阱，更能轉頭出來，復歸聖學者，百無一二。戒之哉。惟潛心大學孝弟慈之旨足矣。先生之立教一出乎正，而昧者以浮詭之心，藉口於先生之探討延納，遂冥然蔑倫叛聖，以沉溺於詖淫者，不亦遠哉？抑予讀先生會語，嘗引何思何慮，曰：此心非無思慮也，惟一致以統之，則返殊而爲同，化感而爲寂。又曰：感通其用，雖千變萬化而莫窮，然不動其體，則亘古亘今而無變遷。



也。又曰：吾自朝至暮，敬畏天命，如執玉，如捧盈，工夫豈不緊密？但視世儒之把捉修飾者不同耳。嗟夫！先生之學可謂大而本中，凝一而外融暢者矣。彼徒見其標末而未窺其底裏，輒號於人曰：吾爲近溪先生之學，而竟以恣情爲率性，墮於無忌憚，以反中庸者。予故謂後學真知先生者寡也。夫不知先生於先生何病？予特懼夫萬古學術毫釐千里所關繫者，至大敬著其說，以俟知言者擇焉。

聖學宗傳傳

東越後學周汝登撰

羅汝芳字惟德，別號近谿，江西南城人。正德乙亥生。甫三歲，偶念母而啼，父抱之即止。隨思曰：心一耳，何苦樂倏變也？展轉追尋，未明其故。五歲，從母授孝經，小學諸書。家人故亂其誦，怒不止，告母曰：何怒之難轉也？人言五臟能橫，其信然！十五，從新城張洵水學。洵水每謂人須力追古先，於是一意以道學自任。一日誦薛氏語錄云：萬起萬滅之私亂吾心，久矣！今當一切決去，以全吾澄然湛然之體。遂焚香叩首，矢心

力行，數月而澄湛之體未復。壬辰，閉關臨田寺，几上置盂水及鏡，對之坐，令心與水鏡無二。久成重病，父憂之，授以傳習錄一編，手而讀之，其病頓愈。丙申，年二十二，入縣學。庚子，入省，赴大會，見顏山農，因自述遭危病，失科舉，而生死得失能不動心。山農俱不取，曰：是制欲非體仁也。近溪曰：克去己私，復還天理，非制欲安能體仁哉？山農曰：子不觀孟子之論四端乎？知皆擴而克之，若火之始燃，泉之始達，如此體仁，何等直截？故子惠當下日用而不知，勿妄疑天性生生之或息也。近溪時如大夢得醒，乃知古今道有真脉，學有真傳，遂於稠人中稽首師事焉。癸卯，舉於鄉。甲辰，舉會試，曰：吾學未信，不可以仕，不就。廷試歸而尋師問友，周流四方者十年。建從姑山房，以待四方講學之士。楚人胡宗正，舊以文學受業，至是聞其易有傳也，迎致之，反執弟子禮。宗正喜，使息心而深思之，謂曰：若猶舊業，自平空白地著一畫耶？近溪畧為解說，宗正默不應。徐曰：障緣愈添，本真益昧，如是三月，然後見許。嘗著格物莫晚，乃錯綜前聞，互相參



訂說殆千百不同。每有所見。則以請正其父。父不為釋。然三年之後。一夕忽悟。心甚痛快。直趨父卧榻前。陳之。其父亦躍然起舞曰。得之矣。得之矣。因自遐想。往年從師論道。餅樣雖盡。完全饑飽了無干涉。徒爾勞苦身心。幾至喪亡。冀救竊幸宿世何緣得奪此等苦趣。癸丑北上。過臨清。忽遭重病。一日倚榻而坐。恍若一翁來言曰。君身病稍瘳矣。心病則復何如。近溪默不應。翁曰。君自有生以來。遇觸而氣每不動。當勸而目輒不瞑。擾攘而意自不分。夢寐而境悉不忘。此皆君心痛疾。今仍昔也。可不亟圖瘳耶。近溪愕然曰。是則予之心得。曷言病。翁曰。人之身心體出天常。隨物感通。原無定執。君以宿生操持強力太甚。一念耿光。遂成結習。目中固無紛擾。夢裡亦自昭然。君今設喜無病。不悟天體漸失。豈惟心病。而身亦不能久延矣。近溪驚起。叩謝伏地。汗下如雨。從是執念漸消。血脈循軌。隨入京赴廷試。初仕為令。入為部郎。出知寧國府。治寧國不事刑朴。惟以化育人才為功課。宛陵六邑。一時有三代風。歲大計。以守入覲。見華亭

相國徐存齋。存齋喜曰。我初不欲煩子以郡事。今觀之似更有實用也。近溪起謝。且請曰。先生加意於某。不過為世道計。如推此意以及同志。天下斯文不亢大幸耶。存齋默然良久曰。古今事亦有不由己者。即如狄梁公。及周之志固堅。而所托則張柬之。柬之時已向老。倘沒在武后之先。志且奈何。近溪發然曰。先生此言。知柬之而不知梁公。存齋曰。我何以不知梁公。近溪曰。梁公以人事君。則所舉柬之亦必以人事君者也。武后先沒其成事。固在柬之。即不然。柬之雖去。而柬之所舉亦自有在。梁公夫復何憂哉。存齋首肯。近溪復曰。先生以宗社為心。宗社以人心為本。今來朝兩司郡縣多極一時之選。所患學脉不端。則心事難一。先生起此合併一番。令其向往不幾。則終身德業豈不光明而後偉也哉。存齋躍然喜。翌日大會賓客。他日復見。語之曰。先生當勸。主上以務學為急。奈何僅循內閣故事。以塞其職耶。存齋然之。出而嘆曰。諸君講學。只三五卷談。不足風世。得君相同心學道。寰宇受其福矣。返郡未幾。丁父艱。奔

歸。士民攀轅悲號，不忍釋去。有步隨至盱江者。近溪家居，四方來學者日衆。聞山農獲罪繫留都，乃稱貸二百金往救，竟得釋。尋丁內艱。癸酉起復入京，見江陵相國問山中功課。對曰：「讀論語、大學，視昔差有味耳。」江陵默然。謁補得東昌。治東昌如寧國。未幾，遷南副使，為開水利，塹城濠，省徭役。政暇，召同志講學。信從益衆。丙子，轉藩叅。丁丑，賁捧入京，禮成請告出城。同志留集廣慧寺論學。江陵惡之，嗾言官疏劾致仕歸。復與諸門人聯轍各郡，走安成，下劍江，趨兩浙。金陵往來閩廣，益張皇此學。布衣梁汝元非罪囚，楚為鬻田往援之。有諷之者曰：「梁某害道，宜置於法。」近溪曰：「彼以講學羅文罔，予嘉其志，違論其他乎？」戊子八月，偶示微疾，與門弟子講學不倦。一日夙具冠服，禮天地祖考畢，端坐中堂。弟子環侍，請教言曰：「徒言也不是道，滿前洋溢俱是發育峻極。左史萬寶謂問疾，命具紙筆，手書曰：『此道炳然宇宙，不隔分塵，故人已相通，形神相入，不待言說。古今自直達也。後來見之不到，徃徃執諸言詮，善求者一切放下，放下胸

目中更有何物可有耶？願無惑焉。自是絕筆。明日為九月朔，盥櫛出堂端坐，命諸孫次第進酒，各各微飲，隨拱手別諸生曰：「我行矣。」諸生懇留，盤桓一日。許之初二日午刻，整衣冠端坐而逝。年七十有四。門人私謚曰：「明德夫子。」近溪學以孔孟為宗，以赤子良心不學不慮為的，以孝弟慈為實，以天地萬物同體，撒形骸忘物我，明明德於天下為大。自少至壯而老，無一息不在學。自家居以及四方，妻奴童僕，族閭村市，以及通都大邑，縉紳士夫，千百徒衆之相接聚，無一人不勉以學。自令長歷郎署，領郡符佐藩臬，所至無一地不以學為政也。嘗曰：「吾自朝至暮，敬畏天命如執玉如捧盈，工夫豈不緊密？但視世儒之把捉脩飾者，不同耳。」又語諸孫曰：「予初學道時，每清晝長夜，只揮淚自苦。此等境界，予固難與人言，人亦莫之能知也。嘗語知友曰：『不肖之為人也，嗜好不他著，精神不他費，惟是此學以繫命根，懸懸塵埃，翫之天日。三十年來，穿衣喫飯終日，雖住人寰，注意安身，頃刻不離聖域。是以披瀝矢心，號呼世夢中，或觸怒生憎，萬死終

不悔避。吉水鄒氏曰：先生有目與人同，不見人過則與人異。口與人同，樂道人善，則與人異。心與人同，以衆人心為心。身與人同，以衆人身為身。有官也，而以百姓之肥瘠為樂，勿恤於家矣。有學也，而以衆人之立達為學，勿執於見矣。其尚友也，時釋時玄，不居一究，一執於大道，其論著也。聖訓、帝典、極其闡揚，一根於真性上。焉者得先生眉睫間，下焉者亦欣欣化育中，以養以造。先生非吾黨之元氣耶？夫元氣周流，而護天壤間，不可得而見，惟觀造化生者，生化者，化飛者，飛，潛者，潛，動植者，動植，始知元氣之功大。吾黨自成者，成，自道者，道，得言者，忘言，得意者，忘意，得象者，忘象，不事雕鑿，渾然天成，始知先生之功大矣。

建昌府冊鄉賢傳

嘉定後學張

恒撰

參政羅汝芳，南城人。甲辰會試，癸丑進士。生而有聖人之思，夙已稟性天之旨。自陽明王子倡良知之學，本官私淑其傳，益加闡發，揭孝弟為良知之本體，指敬畏為致知之工夫，謂信得過，即聖賢實修，當得

起，即堯舜事業。于是人人皆直見本來面目，在在可保養，赤子真心，蓋直接孔氏之傳，翼顏曾思孟之統，而大有功于來學者也。若其襟懷光霽，魚躍鸞飛，度量汪洋，天空海闊，雖百家有一善，拜受不遺，雖愚夫生一問，曉告必盡。所著廣孝經、四書問答、五經翼編、明道錄、誠仁編等書，宗旨統一，血脉貫通，允矣印正。六經實非支離章句。至如歐歷中外，無論職任淺深，因事燭照，為民造福，疾革之時，細書別言，心地足占寧澈。身歿之後，家徒壁立，子孫不免饑寒。近蒙批允崇祀郡庠，竊以本官非止鄉國之善士已也，伏乞題請從祀，裨之得附先儒之列，與薛瑄、王守仁、陳獻章、胡居仁同祀。廟廷庶幾道統昭明，人心激勸矣。

萬曆十八年十月初二日，送主入祠。

太湖縣舊誌傳

嘉靖庚申年修

烏程後學王

杰撰

羅汝芳，建昌府南城縣人。由進士筮仕，廉介自守，仁惠及人。儲養諸生，稱事餽給。新建明倫堂，文會樓，累有興作，不妨於農。三年陞刑部主事。民為立去思碑。



儒藏

于城北以紀其化焉。

太湖縣新誌傳 萬曆甲申年修

楚黃後學王大謨撰 本縣知縣

羅汝芳字惟德江西南城人進士嘉靖甲寅任每事倣古循吏不拘文法勸書院群學官弟子員下暨閭里童穉日講良知學而專禮高年獎廉節招流移抑豪禁姦至學校尤所加意建明倫堂買學田二區以助貧生之婚喪者陟刑部主事歷官雲南布政使司左叅政甫去民肖像生祀之名近溪羅先生祠。

寧國府誌官師表 萬曆丙子年脩

南海後學陳俊撰 本府知府

羅汝芳字惟德南城人進士即中任政先禮教弛刑威念坊民隱建書院講明正學愷懌作人有古循良之風艱去士民遮道泣送之因見任例不立傳論曰鄉三老嘗述高皇帝時綜核名實法網頗密有司簠簋不脩輒見禽夷寧郡介山谷間民畏其上布令若流水敷惠若濡露可卧理也以吾觀于諸公器識才畧不必相仍然皆務農桑教化使百姓孝弟

力田盜賊稀少矣。袁廷輔及士顯並皆以身殉民尤為卓絕其尸祝于法當焉。屬者方名達時之節費賑為數尚大體羅名汝芳之崇篤道術比屋絃歌王名之簡訟約躬拊撝庭什暨諸邑令長亦猶有循蹟可紀以仕方顯不傳云。

回脩江西省誌傳

新喻後學簡而參撰建昌府學教授

叅政羅公汝芳字惟德別號近溪南城人幼聰穎方泣而樂方怒而笑心疑何苦樂條變也識者已驚其異及長專志聖學力祛已私孝友純至忠蓋性成嘉靖甲辰舉春闈寓京師同名士聯會切劘嘆曰吾人業孔孟之學必要求有裨身心意知家國天下以繼往開來為已任何必區區仕進為哉遂歸十載不廷試習靜從姑山房日以聖學為念至癸丑學有成始廷試叨恩賜同進士授太湖令用德化民政幾無訟擢比部主事學益進守寧國覺民性靈補東昌三月大治癸酉遷雲南副使轉藩叅政多奇績如破酋虜開二汁此其餘事也入賀語張江陵以致



君堯舜。張怒遂挂冠而歸。先生宦轍所到。群人而學。化行俗美。至今遺甘棠之恩。致政日。囊篋蕭然。以故後裔屢空。自幼讀書。從姑山後復納價創屋。爲講學所。日講學于其中。從游者益衆。宛然東魯之區。丙戌偕門人游吳。粵閩越講學。問道忘食忘年。津津靡倦。真孔氏不厭不倦之心也。比歸。戊子八月偶疾。弟子環侍者千餘。請教言。先生曰。徒言不是道。滿前洋溢。俱是發育萬物。峻極于天。又曰。人生天地間。須是頂天立地。志氣不可一毫落實。又曰。此學玄妙入微。不是說了就罷。須要發一個不惜身命。心無一毫爲世事念。時日不放。後日方有成就。至九月朔日沐浴禮天地神祇畢。命諸孫次第進爵。各微飲。拱手別門弟子曰。我行矣。珍重珍重。會語幸毋忘平生也。汝輩若緊此學。便是延我性命于無窮爾。門人依依不忍捨。強留先生。愉色許曰。我再盤桓一日。中午。萬左史言策問疾。手書數十行與之。非先生宇宙在手。造化生身者。能然乎。初二日午刻。整冠更衣而逝。逝之日。門人雲集。相向而哭。聞者不問遠邇。卽思夫思婦莫不設位而舉哀焉。城市中悲號七日。不忍聞。皆嘆曰。哲人之委。泰山其頽矣。當先生接引人群。隨機開發。有裨道脉最大。自生民以來。繼孔子而興者。其在先生乎。先生門人楊起元等私諡曰。明德先生。事蹟詳於都御史譚希思。理學名臣傳。禮部員外劉元卿。諸儒傳。太常卿王時槐傳。吏部侍郎楊起元誌。師相趙志臯表。督學御史詹事講。碼吏部員外鄒元標碑。暨諸名公之文。門人董裕。楊起元。蕭彥。鄧鍊等。於鳳凰山麓。建明德羅子祠。春秋祭享。有近溪子全集行於世。槩其生平。學詣玄深。道臻廣大。卓矣往聖之巨擘。昭然後學之芳規。允曰真儒。宜當從祀。朝廷擬入理學者也。

明雲南布政使司左叅政明德夫子羅近溪先生墓誌銘

歸善門人楊起元撰 吏部左侍郎

萬曆十有六年秋九月之二日。明德夫子羅先生卒。其未卒前十日。謂門人黎允儒曰。貞復典試在闈。吾欲與語。子試往訊之。起元聞之。自粵驅而至。則無及。

矣相與慟哭於位。於是門弟子百餘人暨諸姪繼宗繼先輔載孫懷義懷智等謂起元曰子宜知師子宜銘師起元瞿然謝曰夫子安足以銘吾師耶安足以銘吾師耶乃即張子預袁子世忠王子湧萬子煜黃子承宣楊子百里等所稱述暨起元睹記所及者次第之吾師明德夫子羅先生建昌南城四石溪其先出司徒祝融之後至漢大司農珠始家豫章柏林至唐侍御袍之子忠六公遷此代有厚德明興季文公新有室代父遠成永和公讓其產於二伯羅永孝義遂著於州里永和傳四世爲兩岡公兩岡生前峰公公以師貴封刑部主事配寧封安人安人夜禱北辰夢赤日入懷覺而有娠正德乙亥五月之二日而夫子生夫子名汝芳字惟德別號近溪甫三歲坐大園俟安人未至而哭前峰公趨抱之哭止隨思曰均此一身心何苦樂倏變也五歲安人授孝經家人故亂其誦大怒笑告安人曰人言肚內藏會橫信然七歲入鄉學即以孔聖爲的時時稱說孝經於家庭間無人不相愛敬十有五從新城張洵水先

生夫子志學益勵辛卯歸吳恭人于新豐一日誦薛氏語錄云萬起萬滅之私亂吾心久矣今當一切決去以全吾澄然湛然之體夫子焚香叩首矢心力行數月而澄湛之體未復壬辰開闢臨田寺几上置盂水及鏡對之坐令心與水鏡無二久之成病前峰公愛之授以傳習錄夫子讀而病瘳丙申年二十有二入縣庠庚子入省見吉中顏山農先生因述生死得失不動心狀先生曰是術欲非體仁也夫子問體仁先生曰知擴四端而大然泉達何制欲爲夫子悟師事之癸卯夫子年二十有九舉於鄉與同志會滕王閣明年甲辰舉會試與同志大會靈濟宮聞前峰公病不廷試而歸乙巳始建從姑山房以待講學之士矢心天日接引來學足不入城市戊申學易於楚人胡子宗正胡子宗正者舊以舉業師夫子夫子知其易有傳也至是幣迎之及有所扣不應夫子遂巡却拜執弟子禮胡子喜使夫子息心而深思之坐三月方見許可忽一夜悟格物之說曰大人之學必有其道大學之道必在先知能先知之則盡大學一書



無非是此物事。盡大學一書物事無非是此本末終始。盡大學一書之本末終始無非是古聖六經之嘉言善行。格之爲義是卽所謂法程而吾儕學爲大人之妙術也。前峰公詰曰：然則經傳不分矣乎？曰：大學在禮記中本自爲一篇文字，初則舉而舉之，繼則詳而實之，總是此理。至善之格言，明定至大之學脈耳。公然其言。庚戌約同志大會留都，秋會江省月餘，所流至螺川，集會凡邑同志。辛亥會樂安，會宜黃，歸立義倉，創義館，建示祠，置醮田，修各祖先墓，講里仕會于臨田寺。壬子，撫臺夏夢山公登姑山，請見夫子，命有司具路費促北上。癸丑，廷試年三十九，時內閣徐存齋翁定會所於靈濟宮，夫子集同年聯同志日至焉。季夏選太湖令，時靳黃英山多盜，江防使者遣兵戍其地，民苦之。夫子至，首請撤戍，盜不爲儻，領壯士突入，擒其渠魁，盜悉平。所至集父老從容訓誨之，於是小民聞風爭持果酒叩道傍求見，湖賦素難辦，因與之約，悉得詣縣自納，設櫃于門，民甚便之。後疏移修庠序，令鄉館師弟子朔望習禮歌詩，行獎賞焉。

立鄉約，飭講規，敷演聖諭六條，惓惓勉人以孝弟爲先，行之暮月，爭訟漸息。有緩急難卒辦者，父老子弟爭相趨營之入。覲嚴氏欲以臺省要往見，夫子曰：有命，旣而擢刑部山東司主事，時大司寇鄭汝泉公亟稱太湖之政，部曹無大小悉與正之，一時平反從末減者甚衆。前獄中每遇寒無日不報囚死，夫子命具湯藥熱飲食，時收放囚乃不病，已未滿一考，恩封父母如其官。庚申，出審大同宣府獄，沈青霞鍊者嚴氏寃害之也，死而株連甚衆，皆欲殺之。夫子悉從輕減，比返過魯，問通于泰山丈人，學益進。辛酉歸省，學者大集。壬戌，出守寧國，至寧國凡士民入府，則教以孝順父母，尊敬長上，或曰：孝順父母，尊敬長上，足以治寧國耶？曰：奚啻寧國已也。數月教化大行，遠邇向風。乃聯合鄉村各興講會，清逋欠，修堂廡，建志學書院，與郡之鄉先生及諸生沈子懋學、徐子大任、蕭子彥、詹子沂、趙子士登、戚子懷、郭子忠信、梅子鼎祚等講學不倦，郡堂絕無鞭朴之聲。南陵苦種官馬，力請撫按奏罷之，築涇縣南陵太平城及羅公圩。

修水西書院。乙丑入觀。徐存齋翁詢以時務。對曰。人才爲急。欲成人才。其必由講學乎。翁是之。遂合同志大會靈濟宮。回郡。王吉泉公按郡。郡中寂然無事。公謂所屬曰。太守誠以講會鄉約治郡。命集父老子弟而觀其歌詩習禮。皆賞之。未幾。聞前峰公訃。奔歸。士民縉紳送踰百里。有追隨至家者。丙寅。建前峰書屋于從姑山。四方來學者日益衆。戊辰。聞顏先生以剛直取罪。監禁留都。乃稱貸二百金。同二子及門人買舟往救。或曰。山農不及子。子師之何也。曰。山農先生。在縲絏之中。而講學不倦。雖百汝芳豈及哉。既而賴同志併力。設處得戍邵武。己巳。居寧安人之喪。夫子毀脊。辛未。厝寧安人罪。乃周流天下。徧訪同志。大會南豐。大會廣昌。大會韶州。由郴桂下衡陽。大會劉仁山書舍。是行也。遊瀛溪。月巖。謁永州舜陵。縱觀九疑。深入蠻洞。陟日觀于上封。讀禹碑於嶽麓。酌賈誼井泉。祀湘羅廟。貌而衡湘幽勝殆盡其槩矣。壬申。當道引哀詔促起復。癸酉。入京。見張江陵公。公問山中功課。曰。讀論語大學。視昔稍有味耳。江陵嘿然。補

束昌治東昌如寧國。未幾。遷雲南副使。甲戌。年六十。具疏乞休。同志強止勿上。季冬。抵雲南。治昆明隄。令從下者濬之。省原估費十分之九。與其父老履畝。募水利。復金汁銀汁二溝。民便耕種焉。乘暇。遍歷郡縣。凡水之利害。無不平治。杪秋。由大理入永昌。浚龍池。引沙河。乃適騰越州。莽人犯三宣。且逼州境。夫子以虛聲先之。莽人不敢近。兩院遂署行兵巡事。莽人掠迤西。迤西使人告急。夫子授以方略。大困之。復遣人馳諭六宣。但能滅莽者。即許居其地。莽人恐乞降。丙子。署提學事。時選貢方嚴。悉以正貢應。署司事時。欲多決重囚。竟多出少入。案安寧二州城。暇日。輒臨鄉約。其父老子弟群聚聽講者。動以千計。風聞遠邇。爭鬪漸息。幾無訟矣。二月。轉叅政。捧賀入京。起元受業焉。賀典既成。曰。吾今則可以乞休矣。遂具告吏部。出城。諸同志留會廣慧寺。忌者有言。於是得致仕之。命而歸。己卯。入粵。從南海歷惠潮至閩。徧訪同志。庚辰。修太平橋。辛巳。給諫鄒南阜公薦於朝。癸未。門人杜應奎。聶繼舉等及諸孫集刻會語六卷。

是歲給諫楊宜菴公疏。奏雲南邊功。夏通臨川。會崇仁。會樂安。門人黃子廷寶。徐子允修。陳子樞。曾子如海。吳子道南。黃子宸。詹子事講。陳子致和等。各留會旬日。乃入吉州。訪王塘南公。進安福。訪鄒頤泉公。至永新。拜山農先生。下泰和。會胡廬山公。是歲按治。輯珠泉公以地方人才。薦夫子。乙酉大會江省同志于會城。丙戌。麻城周柳塘公來訪。同舟下南昌。遊兩浙。至留都。日與朱子廷益。焦子竑。李子登。陳子履祥。湯子顯祖等。談學城西小寺。未幾。同志咸集。會憑虛閣。會興善寺。門人集會語續錄。趙潑陽公刻于太學。別後大會蕪湖。大會水西。大會寧國。從祁門入饒州而還。丁亥。門人爲建講所。扁曰明德堂。是秋建陽尹崔子肖迎夫子過新城。與鄧子元錫傾論而別。至建寧大會。有建陽會語。戊子夏。靜養從姑山。命諸孫勿往應試。六月。從姑山崩一角。風拔大木百餘株。八月。微疾。命門弟子來宿。日夜談學不倦。念五日。命姪輔三。孫懷智。門人聶希賢。周廷桂。董匠事。姪輓長孫懷義。門人鄭奎侍左右。七孫懷祖。門人王潛黃欽司。

賓客五。孫懷敬。門人黃文炳。李大經。司應酬。八。孫懷本。門人王一元。鄭時彰。司書札。以萬燿。聶鉉總之。二十九日。風興。冠服。禮天地祖考畢。端坐中堂。弟子環侍。請教言曰。徒言也不是。道滿前洋溢。俱是發育萬物。峻極于天。中午。左史萬言策問疾。手書七十字與之。自絃絕筆。九月朔。邀柳出堂端坐。命諸孫次第進酒。各各微飲。隨拱手別諸生曰。我行矣。諸生哭留。許再盤桓一日。初二日午刻。整衣冠端坐而逝。享年七十有四。夫子十有五而定志於洵水。二十有六而正學於山農。三十有四而悟易於胡生。四十有六而證道於泰山丈人。七十而問心於武夷先生。其他順風下拜者。不計其數。而接引友朋。隨機開發者。亦不計其數。身所止處。輒弟子滿座。而未嘗以師席自居。及門者數千人。直下承當者亦衆。配吳恭人生子二。長軒。號復初。配黎次輅。號玄易。配饒女二。孫八人。曾孫十人。逾月。門人皆至。凡數百人。掖柩出殯于鳳凰山里。人皆罷市盡哀。既而諸弟子相與言曰。古人之尊師也。咸有私諡。以志不忘。若隋文中。宋明道是也。今



安可缺乎。又相與議曰：吾師之學至矣。蓋孔子求仁之旨的在大學。大學一書是性體與矩式兼至者也。秦漢而來，悠悠千載，其間豪傑之士，聰明超悟者，見性體矣，而未必盡合其矩式。高邁勇往者，擬矩式矣，而未必盡透其性體。惟吾師之學發志最蚤，自髫髯之年，以及壯強衰老，孜孜務學，未嘗少倦。然求于四方，高賢宿德，惟恐不及。德無常師，善無常主，但聞一言之益，卽四拜頓首謝之。會衆智以稽古訓，并中庸以歸大學，靈透洞徹，生德盎然，而其躬行密實，殆篤恭不顯矣。故其隨人啓發，直指性體，至所真修，刻刻入神，非言所及也。每稱

高皇道並羲軒，而六論乃天言帝訓，居官居鄉，極力敷演。蓋畏天命，畏大人，學不厭教，不倦，平常而通性命，易簡而該神化。自孔子而來，未有吾師者也。今天論者，名言之跡耳，惡足以稱其德哉。天之高明也，萬物覆焉，其贊曰：大哉乾元，地之博厚也，萬物載焉，其贊曰：至哉坤元。今夫子之德合高明博厚而一之，故語之以地，則遺天語；之以天，則遺地，殆無得而名焉。

矣。於是又有言于列者曰：然則欲求吾師之學者，無如大學矣乎。大學首言明明德，則盡以明德諭諸衆，乃交贊曰：其可哉，其可哉。遂筮日告諭曰：明德夫子以某月某日葬鳳凰山之原。銘曰：赫矣

皇明，會合貞元，篤生夫子，揭日中天。信性信古，巧力具全。大信大順，仁孝自然。祖述仲尼，憲章

高皇，履懷靡遺，持載無疆。物斯並育，道亦並行。大哉夫子，明德不忘。鳳凰之岡，盱水之原。作人君子，是升是遐。聖遠言湮，衆說紛拏。道我會語，後聖莫加。

近溪羅夫子墓碣

樂安門人詹事講撰 提學御史

先師近溪夫子以天年終於萬曆之十六年戊子，是時事講方視學南畿也。計聞爲位而泣者七日。亡何厥孫太學生懷智持狀來徵講爲碣。講於師寔有罔極之恩誼，不可無言也。師諱汝芳，字惟德，家世南城四石溪，別號近溪。其先豫章人，遷居今所則自唐侍御君第六子近通始。歷國初，有季文者，代父從戎，義聲大壯里閭。季文生永和，魁然以孝友著于家庭。



永和之四世孫爲兩岡。則榮華負奇節。大元厥宗者。也。兩岡舉丈夫子三。其季爲前峰公。諱錦。卽師之尊人。封比部主事。如師初年官。公嫻於文詞。馳聲章甫中。籍甚。比稿落當年。乃去而講理學。嚶嚶然矯矢東越。安人寤夢亦曰。入懷生師。師極保時。卽悟啼聲。五年能執孝經禮。甫長雅。不好弄。群兒以狎侮。至油然受之。鄉人大奇其不群。弱冠受博士籍。悟尼聖之學。有不專於博士業者。遂卓然以身任正學。癸卯。捧賢書。明年捷南宮。人皆以爲華。師飲如也。叔子樂溪怪而問之。師曰。爾謂一第能了我生平耶。超一乘。卽有一乘事業。此壯夫終身有蓋棺憂也。隨輟。廷試事。歸姑山。決策尼聖。面水澄心。凝神易學。若無意於仕者。人謂寧安人曰。爾子幸一第。乃不爲進取計。何輕視若此。安人曰。吾兒正不欲輕此第。故爾。當是時。介紹於西昌。結駟于南楚。講業于中都。轍跡所臨。履溢戶外。聞者靡然顧化。師卽未拜一官。治一職。教澤已滿東南矣。歷癸丑。始就廷試。授太湖令。太湖巖邑也。民強且多盜。師至。修渤海之政。捕從竄。益以道

化之。不踰月而盜平。其諸政務一本於興教化。明禮樂。不爲一切俗吏所爲。个。觀天官最其緒。擢比部主政。時大司寇海鹽鄭公也。公素慕師。比在屬。謹甚。以爲得師。晚事無大小。悉與諮之。所明罰仲抑者甚夥。迨守寧國。教化益行。郡堂無鞭朴聲。日惟講學。水西志學二處。以崇學術。育人才。爲功課。宛陵六邑一時有三代風。六君亦聞風歸化。未幾。以尊人外艱。歸之。日。士民悲號。不忍釋去。有步至時江者。師在。四方來學者益衆。當道聞其賢。歷列。哀詔促起。復補守東昌。間行泰山。途遇盜將犯之。旣聞爲師也。拜而泣曰。吾意爲某某。乃羅爺耶。稽首而去。尋遷滇南副憲。時莽人犯三宣。急且逼州境。師遣馳諭六條。涕泣化之。莽亦涕泣請降。更爲開水利。塹城壕。省邊役。大布。朝廷德化。暇則召同志講學。如永昌諸處。信從尤衆。無何。轉藩參。齋捧入京。禮成。偕同志大會廣慧諸刹。諸大老咸傾蓋焉。時江陵柄國。喜操切。惡正學。諷附勢者言之。已。又召諸從游。修撰沈君懋學。編修曾君朝節。輩切責之。師喟然曰。時事若此。道復

奚望。遂具告天官。浩然歸矣。師之歸。薦紳談者憾。柄國併唾言者。欲甘心之。師笑曰。無庸。記云。君子隱而顯。且一時與萬世孰多乎。吾盱江汝水之間。寧無斐然小子可裁者。復與諸門下。聯轡各郡。走安城下。劔江。趨兩浙。金陵。往復。闕廣益。張皇此學。今

上戊子秋。偶疾。知將辭宿矣。乃起衣冠。謝皇天后土。召諸門人諸孫。授會語八卷。更手書大哉洋洋之早。丁寧。王史命各舉解。相酬以別。諸門人泣留。留一日。整襟危坐。拱手而逝。噫。吾師仕則以其學敷之政。不仕則以其政敷之教。歷七十四年。無日不在斯道。至死而後已。任重道遠。若此。就非本道之大原。而措之躬行者哉。蓋道之大原。出於天。天之所以立命。即人之所爲性。此性命之理。洋洋優優。隨境皆是。然而其事也。未嘗不運至虛而至實。其運也。未嘗不宰至實而至虛。故放之則忘。忘則淪於無。執之則助。助則滯於有。勿忘勿助。乃見真詮。卽研究有年。透悟獨到。常語人曰。鸞飛魚躍。無非天機。聲笑歌舞。無非道妙。發育峻極。眼前都是。其超然洒然。見之襟懷。雍然穆

然。見之家庭。油然熙然。見之處人接物。講常以學請正。曰。學貴靜乎。曰。不宜離動。在動處着力乎。曰。宜不失靜。體功宜何着乎。曰。心兮本虛。至虛要矣。何着。講常以寂爲疑。曰。性中萬象森然。何寂之憂。然則何如而爲得力乎。曰。知得得力處。便是不得力。不知得力處。便是得力。大都道具吾心。而吾身寔在道中。真機隨處洋溢。工夫原無別際。一念不通之人。者非道也。一息有間于道者。非功也。講每見師居常無日不觀師友。無念不通人心。自志學之初。以至令終之日。孳孳矻矻。惟成就後學是急。蓋師之心。仁心也。師之心。體仁體也。仁者以天地萬物爲一體。師其有之。雖其或時談玄類禪。不知有出世之心。乃可經世。或時笑號類放。不知其手舞足蹈皆爲自得。或應接吾人。不無分別。而簡文溫理之道。原自不混。嗟嗟。吾師之心。豈尋常世俗之見所能測哉。師不可測。詳具楊太史誌中。講不復贅云。

近溪羅先生墓表

古壘友人趙志皋撰

文淵閣
大學士



予素心理學、龍溪王公謂予曰、江右近溪羅先生雅好學、大建旗幟、爲四方來學倡、戶履常滿、束裝就業者無間遠邇。予欲得其人、兩相印可、大愜所願。爲快時先生尚守寧國、已籍籍有聲矣。歲丁卯、先生周流天下、徧訪同志、巍然臨予、所與公劇譚竟夕、相得甚懽。聆其的譚、仁旨毅然、身爲已任。公嘆曰、真顏氏子復出也。予目先生、葛巾野服、飄飄物外、真若秋鶴橫空、毫無煙火氣味。尚爾一儒生態也。自是得就教席、言言兩相契解、而彼此貽簡牘、交相責成、互相訂正、無下數十紙。逮丙戌、先生久解組、歸擔簦來遊、白下時、部寺諸大夫及都人士、日會百計、翕然從之。予時率六館師生、延先生大會、憑虛閣、悉剖底蘊。予得其精緒者、錄而梓之、已呖呖雄鳴於世。未幾、先生曳杖告殂。嗚呼、先生之學、入都指點人心、以日用現前爲真機、以孝弟慈爲實用、以敬畏天命爲實功、一念不厭不倦、爲朝夕家常茶飯、人人可食。何智何愚、破觚爲員、言言中的、徹天徹地、高之不得、率履不越、庸常卑之不得、易簡通乎天、載渾玄渾釋、忘俗忘儒、心涵

天地之虛量、沛江河之決學、之得其大者也。尼父筭筴一脈、千百年來、闕而不通者、直至先生而衍其派矣。世儒以玄疑之者、是得先生清淨玄明、而不得先生冲夷恬澹、以釋疑之者、是得先生吟哦不設、而不得先生廣博無垠。此皆遊其藩而不登其窻、交摸其貌而不探其神情者也。且名之不得、窺之無似、又安容置其間哉。第今之講學名家、分門各戶、競相標榜、稍相牴牾、而氣不相下、一窺影響、而執之爲有者、舉在先生下塵矣。予何敢私一先生哉。海內自有具隻眼者在。先生孫懷禮、懷智、昔遊予門、予得其兩生狀、一以慈和剛勝、一以高明柔勝、一種朴素真醇、毫無舛憤。予心賞之。卜先生後有人也。茲捧狀乞予表先生墓。予何足爲先生表其積履一二哉。若夫得先生大誼之槩、後所楊太史墓有銘、養貞庵侍御墓有碣、俱昭灼耳。目照耀今古者也。予不容贅一辭矣。予特表其生平好學一事、顯揚於墓道、俾尚友者知所稽云。

近溪羅先生墓碑

吉水後學鄒元標撰 吏部員外

鄒子曰予習從先生長者遊學問無足述數者不足論。即有足述數者。願學一先生言。嚶嚶自信。有告曰。道無盡。非一家能竟。輒拒而不入。病在匪虛。於道有窺矣。謂世之人。莫能窺其藩。亦不欲使世之人窺其藩。病在弗廣。夫天之高也。無弗覆也。地之廣也。無弗載也。執一自足者。道之賊也。日月之明。不私一隅。雨露之潤。不私一物。不樂與人同者。善之小也。蓋自予接近溪羅先生。則庶幾虛而忘我矣。先生丁丑入賀。予侍先生左右者月餘。承先生教言。不能有所入。迄今二十年來。先生已爲古人。始知先生坐我春風中。不覺于是悔且恨。恨不得先生起九原而請質之。今年先生孫懷智訪我雲菴。以墓碑見委。予閱諸名碩。臚列先生者甚詳。更何能贅一語。然夙侍函丈。不敢辭。先生姓羅氏。名汝芳。字惟德。學者稱爲明德先生。世爲南城人。家世累善。夢日而先生生。幼方泣而樂。方怒而笑。心疑何以苦樂倏變。怒笑異狀。識者已驚其異。長而學益進。閱讀書錄云。萬起萬滅之私。亂

吾心久矣。今當掃而廓清之。遂矢心學薛氏學。常坐危樓。起一牖如盂狀。左右置明鏡一。止水一。跏趺連旬。求除所云萬起萬滅者。然未奏廓清之效。而受朋從之害。病大作。前峰公授以傳習錄。病已。庚子入省大會。布衣顏山農在焉。先生舉前功問。顏曰。此制欲非體仁也。先生復竟所謂體仁者。曰。知四端而擴充。則火然泉達。其勢莫禦。先生恍然有契。遂於稠人中。絳首顏山農者四已。而師事之。癸卯舉于鄉。甲辰舉會試。先生曰。吾學未信。不可以仕。遂歸而尋師問友。周流四方者十年。學既通。乃赴廷試。癸丑。賜同進士出身。初任太湖令。陞刑部主事。歷郎中。出守寧國。再守東昌。陞雲南副使。參政。歸。先生凡幾仕矣。其仕也以學爲仕。其學也以仕爲學。期會簿書。雖未嘗廢。而真誠惻怛。盎然春育。興利也不計一世而計久遠。彰訓也不事強聒。因其固有。以故生而懷者。若嬰兒之戀慈母。去而思歿而祀者。若孝子之喪考妣。非可強致也。元標反覆窺先生于微。真令人心折神悚。非後世剽譚者可比。擬云。山農雖以學自任。放言矢



口得過縉紳不少。南刑曹業置之死地矣。先生以身代爲之贖。而顏得生全。且顏貧。視先生家若內庫。隨取隨厭。顏又喜施與。隨施盡。又輒隨其所請。先生年已耄。顏怒先生跪之榻前。顏批其頰不少動。曙而怒解。始起。夫顏橫難口語。學非有加於先生。而終身事之不衰。生之縲絏。周之貨財。事之有禮。此祖父不能必之孝子慈孫。而得之先生。嗟乎。卽此天地可格鬼神。可動矧曰其他。梁夫山囚楚。先生嚮田往援之。有諷先生曰。夫山害道。宜罹干法。先生曰。彼以講學罹文罔。予嘉其志。不論其他。夫當時以學自命者。稍出片言。夫山必無死地。視先生心何如也。胡宗正幼師先生矣。先生聞其易有傳。復不難北面宗正。蓋先生真見天下善無一處不具。天下人無一人不可師。已耶人耶。我耶物耶。渾然無間。誰能闕之。或疑先生學大而無統。博而未純者。先生云。大出於天機。原自統。博本乎地。命亦自純。予讀斯語。恍然如見先生。夫不本其自統自純者爲學。而以意念把捉爲統爲純。嗟乎。此學之所以難言也。或又疑先生學無結果。不知

太虛之中。孰先孰後。孰始孰終。彼所謂結果云者。是生滅根也。我且無生。而又何滅。我無造端。而又何結果之有。茫茫長夜。誰其覺之。予不能無思矣。蓋嘗論先生有目與人同。不見人過。則與人異。口與人同。樂通人。尊則與人異。心與人同。以衆人心爲心。身與人同。以衆人身爲身。有官也。而以百姓之肥瘠爲榮。勿恤于家矣。有學也。而以衆人之立達爲學。勿執于見矣。其尚友也。時釋時玄。不廢參究。一軌於大道。其論管也。聖訓帝典。極其闡揚。一根於真性。謂先生有見乎。則與愚夫愚婦同體。未嘗有見也。上焉者得先生眉睫間。下焉者亦欣欣化育中。以養以造。先生非吾黨之元氣耶。夫元氣周流。布護天壤間。不可得而見。惟觀造物。生者生化者化。飛者飛。潛者潛。動植者動植。始知元氣之功大。吾黨自成者。成自道者。道得言者。忘言得意者。忘意得象者。忘象不事雕鑿。渾然天成。始知先生之功大。予不得而窺先生之學矣。憶濫竽按垣。曾疏先生云。惟道是慕。功名富貴不入其心。達人必誨貴賤賢愚。不知其類。識者以爲知言。今

愧不能窺先生萬一、謹列大較如左。先生子二人、孫八人、曾孫十人。懷智孜孜尚友、惟願家學先生有後矣。先生生正德乙亥五月、歿萬曆戊子九月、葬二十八都曹坊祖塋之傍。銘曰、

神隱而費、力私而毅。嗟吸萬類、

胎育元氣。蚤竭心思、晚順天成。

何思何慮、斯道典刑。其心孔仁、

其仁以身。周流海宇、物我皆春。

濟濟多士、私益明德。繼往開來、

百世不滅。

本卷文均見《近溪子集》附集

校記

①卷：當作「巷」，見下篇周汝登所撰傳。

②題：當作「夥」，見《明文海》卷四四四。

③遜役：當作「徭役」。

明儒碑傳集卷七十一

龐嵩 周賢宣 葉朝榮 張元冲
張獻翼 陳茂烈

應天府治中龐公嵩傳

京學志

公名嵩字振卿居南海瀾唐鄉學者稱爲瀾唐先生嘉靖甲辰由鄉舉授應天府通判督治中先後凡八年大京兆缺屢攝府事初至早愷爲災公督賑安悉需洽公粟既竭貸之鄉先生富民誠意惠潤人多應者所全活六萬七千有奇已而乃其清遠於以勞拊循之所繇以復業者十萬六千有奇所部民苦役重公取公費議免之令甲首輸錢免其徭徭什之印庫以防侵漁清寄居客戶以助夫役移僻驛馬廄以甦衝塗嚴冒盜侵免及詭納官戶寄庄戶女戶神帛室匠戶以實丁口八邑皆蒙惠焉時江寧葛僊永豐二鄉數有水患居民餘七戶而已歲課不能辦公爲築堤開萊得田三千六百畝立惠民庄四召貧民佃之流移盡還而全邑訖無代恤之苦百姓至今賴之折獄無細大必得其情有張元二者以追逃婦不反

公躬至婦所見室畔聯崖矗立林木岷然心動行數十武而前佯執村老詢問之對曰我但見屍遂得元二殺人狀又高淳僑人亡其妻妻家以爲死執之公偵知鄰有畫工以其妻歸日還也計致畫工奪還之聞者以爲神戚曉王湧舉人彭若龍占良人妻殺其夫公并論死居間者萬方拒不聽公餽吏幹在事拮据百廢具舉尤加意造士暇則進諸生課之自損俸以資賞給歷寒暑無倦淹通五經爲諸生發疑扶異無不虛往實歸者早遊王陽明湛甘泉兩先生之門至是奉其緒論爲諸生規建會於新泉書院日與講習以故一時文行之士成就興起者爲多性嚴明嶄嶄不可犯而又與有聞於名儒巨公以是施之政亦以是持其身見義勇爲獨信一力雖責育不能奪也單騎行縣所至肅然一蔬片楮不以煩民人目爲龐青天云府在六年京察例而復與觀察公謂非理上疏請止之至今著爲掣令晉南刑部郎中曲靖軍民府知府在所士民銜德既去而追思之萬僊鄉有特祠至今俎豆不絕云

（國朝獻徵錄）卷七五



儒藏

右布政周公賢宣傳

王時槐

周賢宣字仲舍，蕩安人。歐陽文莊高第子也。第進士，授繕部主事，推荆稅，搜剽弊孔，商民咸稱利。藩校有小艇百餘，潛行劫掠，號滿江紅者，盡收之，繩以法，往來無梗。遷郎中，會建三殿，取材川廣，公建議材料積而不用，侵損實多，奈何復苦諸省之民。中貴人難之，公不少遷，屈竟得請。故事，大役一興，中貴人視爲利窟，蠅集其中，相緣爲奸。公酌估精覈，羣閹側目，竟出爲延平守。至郡，以厚風俗，正士習爲首務。時時引博士弟子，誦說經義，而一歸於實踐。士喁喁向風，屬島夷弗靖，烽火相望，山澤亡命，棄隙竊發。公用間謀，募敢勇，潛掩其虎，寇患悉平。考績，擢海道副使。民德而尸祝之，有永懷祠，有崇報祠，有安貢堡生祠，有撫安碑，有遺愛碑。其爲海道會倭寇，逼城公帥師敗賊衆於漳浦，民用無恐。廣賊遁諒入漳，公卽帥舟師親躡行陣，大破其巢，還良家婦女虜者二百餘口。是時兵革倥傯，公方率諸士講道芝山書院，辨義利，崇正學，訪修潔之士，躬禮其廬。尋參藩政，立條編法，民甚稱便。遷按察使，恃抑豪右之惠，苦小民者，尋擢右布政，會有修卻者，假拾遺劾罷。公既解綬，與同郡諸君子

結社白雲之巖，訓迪後進，不爲奇僻語，惟根諸日用倫常，使人自求自悟，以是賢愚各獲其益。嘗曰：生生之謂易，天地之大德曰生，此聖學宗旨也。素恥干謁，而邑有大利病，則未嘗不盡誠以告。邑大夫每信而行之，鄉人多賴其德焉。

（國朝獻徵錄）卷九〇

養利州知州葉公墓誌銘

歲丙戌、養利守葉公卒于官。其子編修君念皇祖括、自燕走粵、西逆其喪。余追而送之。編修君扶服泣曰：「孤不天，致降割于先君子。若以大夫之靈，煇耀先君子于泉下，死且不朽。其明年，介公門人陳黃門狀來徵銘。」曰：「先有約言矣。余不能辭。」公諱朝榮，字良時，別號桂山，閩之福清人也。生有異質，負大志。比長，肆力于學，于書無不窺也。而尤深詩。自其餽學宮，爲諸生高等，名大譟。遠近執經請業者，履滿戶外。公總風雅之眇論而衷裁之，聞者虛往實歸，淺深各得所願。高足弟子遵其業，咸顯當世。而公竟不得第，蓋五十而始用恩薦入成均云。旣北學，時與賢豪長者相結，天下士又無不內遜葉公。顧又不第歸，歸而公父歿矣。服闋，謁選爲江州別駕。江州四輪所輳，故稱衝疲多逋賦。公潔已恤民，民感其誠而賦以登。故事，歲入白下一掣，通關屬邑奉金錢爲馬資。公謹謝曰：「民有司，幸愛我，我不持。」

一縑入留都，無用此爲也。度支郎權征潯陽，守大夫推擇公爲主進。公惟嚴鍵閉，慎山納秋毫，無所緇。歲損算什之二三，而課亦羨溢。已而有墨使者至，公輒謝不往。使者竟以墨敗，波及諸側曹，而公則嶮然矣。別駕稱開局，而臺使者才公數令攝他邑。所至好爲民搜瑕與利，不以攝故苟旦夕。客謂公尸祝代庖，得無傷其手乎。公曰：「苟利吾民，吾何辭于越俎？」其在瑞昌，以滾河久湮不治，將徙嚙城郭爲民害，遂亟策疏濬。暴行烈日中，不爲罷。水竟歸其故。彭澤江省門戶，而垣牒且圯，公爲慮財用計，徙庸城，城民不知費而屹然成金湯焉。簿領之暇，復考求故實，勒成邑乘。彭澤之有志，始此三邑。黔首家頌而戶戴之，甚于真令。惟恐公之不久攝也。公雖強力于政，復履方董道，恥賓事大人以成名。薦紳先生過江州者，自旅謁外，卽知交積素，無私造請以故不甚驩貴人心。然廉潔惠愛，聲聞吳楚之間，卒無能抑公令名者。佐郡凡再滿，未及上擢。



知養利州。州處粵極微，抵交南一舍而近，蠻獠出沒，雕題雜俗，人皆難公往。公曰：「何憚哉？我不夷而華治之，渠則華我而不夷自矣。至則擇地建三鄉校，群子弟其中，躬爲論說，綱常大義。又移學宮于近地，條具科指，時時進獎而督厲之。於是士翕然向方，蠻夷君長亦望風慕義，款關之學如市，駸駸變椎結而端委之矣。他若拓城墾田，鑿池築陂，閉交關，戢蠻貊，罷市易錢，經畫紉措，率爲州民數百年計。養利已不能斯須去，公公亦不能怱然養利焉。時編修君成進士官翰林，屢書趣公歸。公報曰：「一州如斗大，安足展吾什一，聊徵吾志乎。」

東明啓祥，覃恩徧寰宇，吾舛而大父母之不獲與也。吾治幸有成，庶幾沾一命榮而大父母，吾不重去吾官也。兒須之矣。旣滿考，臺臣上公治狀，得褒贈公父如公官，母爲宜人，而後公喜可知也。曰：「吾願畢矣。」大夫七十而得謝，禮也。卽日陳牒致其仕。方秣馬治行，病一夕而卒。郡中三老子弟大

臨于衢，夷群蠻落聞聲心折，相與謀尸祝公矣。公生平無他嗜，惟嗜讀書，呻吟咄嗟，老而不倦。然其學一稟于六籍，不以支爲旨，大要責躬行而已。其治則設誠而致行之，不事粉飾，故偏爲醇儒，吏爲循吏，殆以經術經世務者，非耶？而陳黃門復謂余曰：「學者多言無鬼神，乃吾師數數奇異也。初，公執親喪，哀毀寢疾，疾且革，僚習見神人以越鞠方授之一服而霍然起矣。何？倭闕于海，神復來告之，期得先事而脫人，以爲孝感云。迨其卒也，有伍州慕女者死，且蘇言至一所，若世所稱城隍祠，我衣冠而南面者，太守也，而是夕公果逝。怪哉！蓋聞至孝之行，格于幽祇，愷悌之德，沒爲神明，方冊所廬列，若叔繼獲方于空中，仲卿俎豆于一邑，竊高其人不少概見，乃今觀于葉公，豈異也？而公且兼之，其猶在二子上乎？按狀，公之先自蔡徙閩，至宜興，公而始大，子孫多顯。勝國時，十數傳而爲廣彬，卽贈大夫公父也。母郭宜人，以正德乙亥某月日生公。

其卒也以萬曆丙戌某月日享年七十有二。子四。某某。向高。卽編脩君女。二長適林守定強。死殉夫。有烈士風。郡邑方上其事。次適某。孫男二。某某。公既卒。編脩君拾其遺文。有詩經存固瑞芝堂。業行于世。以某年月日葬公于某山之原。余于公之訃。有私痛焉。余先大夫嘗令彭澤矣。越三十年而公來攝彭。問父老遺事。輒稱朱介君不置。有墮涕者。公乃以邑人意請于當道。祠祀先大夫。而公自爲傳記之。語具邑乘。先大夫之不泯于彭澤。公之惠也。余忍令公泯泯而已乎。銘曰。謂公儒也。寒迹其所成。毋寧曰不顯。謂公仕也。晚暨其所施。毋寧曰不遠。神之洋洋。在彼南疆。曰永蒸嘗。其魂氣應歸于福唐之鄉。松楸之芊然。望九京之鬱然。卽官長夜。結爲大年。無涯之澤。以永庇爾象賢。嗚呼。是爲葉大夫之阡。

朱慶撰《朱文懿公文集》卷九

張中丞傳

中丞名元冲。山陰人。以嘉靖進士授吏科給事中。拜命而泣。或問之曰。吾祖爲是官。曾以直諫萬貴妃擅寵。賜杖。吾父逢禁日。必出血衣陳祀之。且涕洟曰。子姓有爲是官者。其毋忘此血衣哉。吾今爲是官。是以泣。蓋其祖以弘本科都。其父景琦。則以部郎知桂林者也。時嵩初入閣。元冲首疏嵩心術不光。不宜在帝左右。不報。先是。九廟災。上刻意營建。曾以木工郭文英有技愛之。加工部帶俸右侍郎。至是工成。廢其子文思院副使。而文英嗾。復請辭已所受俸。改廢兒子。乃復以其兄子爲鴻臚序班。元冲疏爭之。謂文英賤工。本以繩墨斧斤之能。奔走冬官。忽遭逢廟建。致濫名器。以無何廝役而帶俸。竊銜。其爲非分已甚矣。今復冒叨恩廕。在文英者慚慄。引咎不暇。乃復敢狎恩抗求。自處非法。小人之貪肆一至於此。且文思院非他文英出身之所也。工技必各安其業。而後有濟。今文英既已踰越。而復不使其子弟安



于其業此何意乎。上怒，不納。會織染太監以上用羊羢未給，請尚衣孟忠齋敕僨造，而元冲復爭之，謂嘉靖元年既已停罷，中使僨造歷至二十年間始遣尚衣李鉞偶一督辦，然即已徵還。此在神聖愛民，其為防微杜漸者如是其至，而小人罔上，重溷聖聽，其罪可殺。且內官之出，必有京師巨賄投充家人名色，于其奏帶常數外增一二十輩，依附撥置，需索騷擾，甚至較轡司府，箠縛官吏，此所係匪細也。上益怒，不納。然卒以其言直轉外，為江西叅政。既而進廣東按察使，巡海擒海賊徐碧溪、何亞八，敘功賜白金。大計考天下監司第一，補江右布政，轉左，尋以右副都巡撫江西。時閩廣流賊犯境，元冲疏請便宜統叅議趙鏐副使陳柯暨指揮屠墳、杜喬廣、東都司孫教、浙直冠帶千戶龔綸等各領兵堵剿，日有斬獲，遂驅賊出境。而其渠犯贛者，殺官吏，劫倉廩，焚掠，贛撫得罪。內官與政府憚元冲直畏其入用，并嚙之，勒回籍。元冲少從王守仁游，與同里錢德洪、王畿、徐珊共

闡明良知之學，而元冲尤以氣節自勵。曰：人之生也直。守仁嘗稱曰：吾門不乏上知之士。至于忠信質諒，無如叔謙。叔謙，元冲字也。又元冲嘗讀書浮峰山寺，守仁顧而登其巔，嘆曰：此山卓絕不羣，叔謙似之。為題浮峰書屋而去。嗣後學者遂稱元冲為浮峰先生。

論曰：元冲祖父皆名臣，以弘以建言得罪，而景琦為郎忤中官謫判，始知桂林。元冲其繼志而興者與。姚江之門有二：一以領會，一以踐履。元冲與畿、珊同學，而元冲冲然已。

毛奇齡撰（西河文集卷七四）

張幼于生誌

嘉靖中以制科之業稱公車者，無若吾吳郡三張。曰伯起，曰幼于，曰叔貽。幼于始字仲舉，一曰叔貽。貽尋夭，而二人皆厭去其業，為古文辭，益壯麗，其名亦益著。幼于交遊徧海內，咸欲薦不朽之策于幼于，弗顧也。一日



東訪余舍中而請曰有樂丘之石以干子。余愕弗敢應。已而曰不佞少長於君八歲奈何任君身後。幼子曰固也。世有不可知者。我先子則猶可得之子。子先我則無若子何。茲乃有二幸。夫及子之身而得不朽我也。與我及之身而得觀子之所不朽我也。子以為何若。然則何以不君傳而誌為。幼子又曰傳者傳也。誌者志也。我藉子而傳之乎。則無若藉子而志我之志也。於是為張幼子生誌。幼子初名鵬翼。已更名獻翼。其先自鳳陽徙而金陵。已又徙而吳。為望族。王父準能積著起家。有四子。以伯氏叔氏材任治生。棄之賈。而仲季恂恂守經術。仲卒。絲鄉舉至台郡司理。季游太學。得金吾幕職。而叔氏逆大廓其產。以誼俠聞。至傾郡邑。叔即幼子之父。所謂雲槎處士冲者也。當是時。處士以才能振其姓。家所蓄三代敦鼎尊彝。古圖書。書籍器玩。即代稱膏華者。莫敢抗。居恒自歎。誰與我守者。世得無以蔡中郎目我乎。已而伯起生。又七年。幼子生。皆生而白哲。始好秀麗。每出

市人連袂瞻盼。屬之曰誰家璧兒。當非復塵世間物。父憐愛之。為置師塾。日誦數千言。稍受筆。即能破累帛。而所造語奇。往往出意表。年十七。即以詩贊故翰林待詔文翁。文翁世所推伏。前輩無兩。輟食而讀。謂其客陸禮部師道曰。吾與若俱不及也。趣延入酒之。而是時伯起業已名文翁客。居數歲。逆客及叔貽。陸君亦折行而與幼子稱詩。故皇甫按察訪彭處士年。黃處士姬水。今劉按察鳳尤相得。唱酬無虛夕。當是時。操觚者以不得幼子一語為歎。幼子尋游南太學。兩司成至。不敢抗師禮。引以為上客。然至每大試。輟不獲售。伯起雖一獲售。其試南宮亦畧如幼子。故借悲叔貽之天。而相率為厥去。然幼子之所謂厥去。獨舉子業耳。故治易。至是益深湛。其思自比於絕韋折屨。而不已。蓋十年之中。而成三易。曰義經約說。曰義經雜說。曰義經臆說。已有讀易紀聞。讀易韻考。學易標間。後先將數十卷。時人往往以博叢歸之。而未有能頗習者。幼子意不憚。乃盡謝其故冠裳幅

巾袒裼置輕舫呼笛與縱游吳越諸名勝。建牙握節之使邦君大夫與搢紳逢掖之賢豪長者多幼于所故識。即非故識而耳幼于名者亡不延頸願結歡張先生先。生乃肯顧我幸甚。坐未定輒命酒酒至則賦賦罷則談。談劇則卜夜稍不跡方以內黛粉蛾睩肩隨之矣。蓋咸以何照擬幼于惟幼于亦自謂通隱也。築室石湖塢中。貌黧兄弟像而祠之。始幼于之及處士公也雖甚見憐愛而義方斬然小弗稱則賜朴而嫡母葉太君教而磨煦之若創其股。生母許少君以有子故代家乘其誨幼于不顧為慈。幼于精專其思以奉父及二母於三子中。最為得二母心。父及葉太君相繼歿幼于刻像私室以朝夕起居至伏鵲薦饋哭聲殷殷不絕。少君為之感動曰我幸無恙是兒脩辭色而奉養我他日卒不諱奈兒目枯何。其事伯起莊甚然伯起介少可而幼于多許晚節雖小異趣然未嘗一息而忘推兄也。吹埙和篴洋洋盈耳矣。痛叔貽蚤逝亡以為地下者則謁誌銘於余諸

傳誅哀輓多屬之鉅公名人云吾所不欲得不敢以加吾兄吾所欲得不敢不力於吾弟人以為實錄。幼于念處士公先仲季父塲其奉侍二父益謹所進菹甘以日計非產之珍以月計衣履既好以歲計五服之內宗戚中表有恃而室家者急朋友之難適於已若故諸生劉喬祖姚懋言兄弟韓崑徐玄素許高朱三重醫士馬應龍游客張昂王人佐輩或館餼或治喪塋或受孤寄或解紛難其始分誼不甚深往往竭財力為之弗計也。若素所敦重及貴人長者弗暇計矣。幼于既以顯重性又好客擊鮮飲醇之歡亡虛日以故環所居顧家橋里巷車騎冠蓋委積前後不絕。守令傾耳而待幼于亦時有闕說然不顧為所偏私人不能以是病幼于其兄弟所居重于二千石然善自挹損舍人子有外闢即被傷委頓猶好謝其敵而自引過至盜財物而露者猶掩覆之不使竟也。事詳家兒私語中。家兒私語者幼于所自著也。幼于念以任俠妻控產僅圖籍存而許少君益為老



藏

不能舍之而北。所蘊籍不得據。游跡漸近。不敢過數百里外。娶婦朱為吾女甥。賢。亡子。中歲為幼子置貳。舉三子而婦塲。三子曰里。曰仉。曰頃。以仉嗣。叔貽意尤念之。為做顏氏家訓。凡十八條。垂四萬言。以示軌物。他所著詩文。又數十萬言。其行世者十之六。弁山人曰。余讀幼于私語。述本天道。通證人事。上標先德。下述已構。詰見懿交。纖善畢羅。即毋論三子答問為何。所以立揚資事之道備矣。所著詩文最夥。不名一家言。其詣亦以先後為至末。大要才周而溢。學積而宏。今不必離古。不必合匠心成法。遇境輒會。斯所以為執苑之雄乎哉。古者親在不稱老。今許少君八十七。著無害。而幼于虬鬚蝟磔。雙權若玉。飲嗽御內如少年。乃遽斂其雄心。而謀束身之地。以身托得無為。吊詭乎哉。吾敢以其志志之。且為約曰。自此而吾與子所乏者。非日俟而續焉可也。

王世貞撰（弁州續稿）卷一〇九

明旌表孝廉文林郎監察御史梅峰陳先生墓誌銘

正德乙亥。陳先生如賓書林。墳成。明年丙子。得目眚。哭。母封太孺人張氏。加疾。謂山齋曰。吉凶未可知。吾平生所事見素。所友執事又甚。謂子曰。畢竟如何。子曰。吾而兄也。勉就藥。以觀天意。私叩其家。無一新衣。為之密備。甫畢。氣絕。十二月十有六日也。是日天氣慘黑。道路流歎。吊者皆失聲。先生無子。子立其族子遠揚為後。與松崖山齋治其喪。守滿君以棺來助。越明年正月六日。遠揚奉張奉先生暨配贈孺人鄭氏以葬。墳土未乾。德人先逝。噫。其如何。士民具純行。羣請之守帥。言之巡按王君應鵬。以聞。禮部覆可。蓋坊賜額。表宅里。進之鄉賢。以祀。月給米以卹其家。始先生以孝廉為吏部所知。奏食學祿養母。辭。繼以布政使陳君珂薦。上特嘉清苦。月賜米三石。資養。又辭。上溫旨諭受。及是。命三曠典也。先生諱茂烈。字時周。陳為瑞安大川顯姓。曾祖伯洪。功陞興

化衛總旗傳慶四、又傳贈吉安府推官善祥為先生父。父卒，先生甫十四歲，家貧，忍食以飽黃氏祖母。讀書時，夜分黃憫其羸，喻止，遂輟燈然誦，究心道學，作省克錄自考。黃卒，易所居資其餘，直買山碧瀨以葬二喪，親負土石墳成，間日一視，久之，三五日一視，哭盡哀而還。胡憲副榮重古行禮為子師。會試，道遇叔徒附之者，幸在抵京如封付之。附者請半，先生曰：「某者去，君者存，何半？」太學試第一進士，出使東廣，盡却贖金，修禮陳白沙，因領靜一之誨，退而與東所私論難。吉安持大體，開至誠，通以民瘼之懇。豪家利寡婦財，誣許婚，斷從守志。夫制悍妻，嫁有娠之妾，既生子，歸承其業，族人爭之，驗與姊氏為類，爭者覘服。時張守本以嚴聲強，徐輔以寬，當道尚深峻，徐開解為霽，信浮上下，官有賢薦而民有去惡，郡誌列在名宦。考績歸，至淮，以乏寒且凍幾死，所知覆以敝裘為救。為監察御史，袍服樸素，借騎一牝馬，身若無官而自係風紀之重。尚書倡者子受賂，崔者以道士

起，皆根植自固，言者屢劾。先生再劾，偕去，而崔猶留。先生以母老乞終其養，供母外，短床敝席，不辦一蚊帳，身治畦，一蒼頭給薪，出則執小油盞，妻子服食粗糲。一女適彭惠安，孫輔嫁具涼薄，皆人甚不堪，而泰然自足。日坐斗室，究極五經四書之旨，體驗心身，隨得隨錄。常曰：「儒有向上工夫，詩文特土苴耳。」孝廟上賓，與子相對慟哭，逆瑾亂政，相對憂憤。至羅織重罰，以恣毒士夫，先生曰：「某僅有死耳。」予起征藍，先生杜門養靜，悟領深而充養熟，隱衷粹行，對天地質鬼神，鄉國有懼，先生知為愧。予嘗評第物品，黃憲管寧之右，得在孔門，可幾閔冉，程朱高弟，子無讓焉。薦者謂康約如石守道而養獨純，孝行如徐仲車而所處尤困，殆未足盡者。予始識先生諸生，韓洪洞問莆人物，予曰：「從吾。」又問：「以先生對。」韓曰：「以莆再指一書生耶。」予曰：「是友自純家居，相信尤深，每晤言，躁慮消熄，宿疾為頓愈。」先生亦惟予言獨契。嗚呼，由今其復斯人耶？予既誌其壙，又銘其墓，其先生私耶？張



儒藏

壽八十九。先生壽五十八。墓五窆。封孺人蔣及余壽丘。預焉。銘曰。化樞物治。陶靈範精。光氣之會。公得其清。星爛日章。後先輝映。迨宋宗儒。于斯焉盛。公有正悟。意往神超。靜存動克。一真自如。搜竊記聞。亦敏則有。探幽索微。玄象誰友。世局斯下。邪論崩滿。始風聿還。亦允斯觀。

林俊撰 《見素集》卷一八

校記

①刻罷：當作「劾罷」。

明儒碑傳集卷七十二

王應電 查鐸 呂調陽 蔡汝楠

王應電傳

字學

郭子章

王應電字昭明。蘇州崑山人。精於周禮及字學。與吉水羅文恭公泰和陳子虛。廣求仁友善。嘉靖間。僑寓泰和。初著周禮解。已著同文備考而自序。序曰。道也者。文之體直也。文也者。道之神用也。六書也者。文之轉軸也。溥之宣教明化。遠之垂後憲前。故曰王政之始。經藝之本也。粵音大猷之時。氣化純完。文字闡揚。于是經恒明。政日休。自時厥後。氣化漓而文字舛。六籍散而治教靡。蓋文字之興衰。實與道化相爲倚伏。故聖者作之。明者述焉。昭代之所隆而否德之所略也。自有書契以來。倉頡古文判洪濛而開之者也。意融理靡。文約義該。明如日星。賁如草木。易知易從矣。歷帝王而降。禮制至周始備。器法皆古所未有。故字亦多古文所無。史籀變爲大篆。字學中不可闕焉者也。鐘鼎多出于三代之季。良庸貞質。不可復別。取二三策而已。小篆非聖王是師。以六國之所擅作者。參以已見。盡皆如著。以便筆札。六書之體。于是大壞。至

又變而隸而楷而草。存者幾希。自是以來。雖或以篆名篆。皆子孫于李斯者也。或宗古文而具矣。雖焉者也。至以私意作爲奇巧。或欲布置以爲齊整。夸衒者傳謠以爲博。滯陋者執守以爲經。而其義不可復尋矣。今欲釐正之。苟復循末世支離之迹。與之秤量較計。議論不愈煩。去道不愈遠哉。故欲究作者之意。必盡解前人之縛。而後可與言也。夫三才萬物。靡不有形象形也者。肖其形而識之。此字學之本也。其涉于形。衡思慮之所及。而不可以形傳也。則以其形而反仄增損。或重疊配合。于形不類而意則可通。或配他文成字。故曰會意也。天地氣化也。神而不有。萬物叢生也。蠢而無爲。裁成天地。曲成萬物。惟人而已。故酬酢萬變。紛紜百慮。孰非事也。以形以意。合數文而爲經綸之象。故曰處事。謂以人處事。又曰指事。謂指人之事。卽古語象事之謂也。書法有限。而物類無窮。字烏能盡之。主一字之形。而以他字之聲合之。因其形之同而知爲是類。因其聲之異而知爲是物。是義故曰形聲。非本聲而諧之。故又曰諧聲也。夫聲出于天。或有餘。或不足。聲之有餘也。一義而各爲一聲。不能聲爲之制字也。故以一字而轉爲數聲。轉注之謂也。



聲之不足也。一聲而或兼數意。不能意爲之制字也。故以一字而借爲數義。假借之謂也。前人之論。雖各有發明。但不無得失。且六義人所常言也。三母則人所未講也。故書母有十。雖體有萬變。不能遺也。字母二百四十。子孫相仍。至不能生而止。數字以萬計。不能遺也。聲母二十八。交錯于字母之中。雖聲以萬計。亦不能外也。自本而該末。挈之如珠。聯網布。汭流而還源。理之如攻玉。捕凶。用甲勾乙。損益益虧。刊俗而復古。定一而同歸。故知三母可以制字。明六義可以釋經。六義之未定。三母之不講。又何六書之云。且夫結字有主客。筆勢有逆順。畫有清濁奇正。體有向背動靜。故天文多圓。燭然一天星斗。地理多方。宛如大地。山河人道。統成參于俯仰。動植玉箸。施於數目。其畫直科斗。施於主點。其畫單鳥獸動而草木植。取用于鳥跡。柳葉也。服食居器。變動流行。化裁於鍾鼎諸文也。其類有八。書法亦異。考於古文。有潤色而無造作。驗之人心。有融釋而無阻礙。電益竊取之矣。後有覺者。欲知其方。曰法天也。崇古也。致虛也。研幾也。窮神也。天則開而我不與。古則因而我無作。虛則待其露而不先。機則成其能而不情。神則天機流行。莫知

其所以然而然也。可以與于斯義矣。昔者周公嘗設其官。曰論書名矣。見于行事。故弗存也。孔門嘗載諸言。曰書同文矣。無王者作。故弗爲也。我高皇帝採三重之柄。兼專徵之善。嘗命儒臣爲正韻矣。但暇給間。以小篆正楷書之。而索嘗以古文正小篆之謬。且嚴於章奏。而略于經史。古今刀筆之吏。或所玩習。而經學士夫多不識知。今上嗣位。五星聚室。夫室。天子之北宮也。望實附之。爲文書之秘府。而五星聚焉。非天將興起斯文之兆歟。故今三才之義。幽隱畢揚。而文字之書。明目者衆。愚生值其昔。化機自中。光不容掩。流不能塞。撰述成書。然而病困之餘。功不逮議。指歸未竟。昔漢武中興。大協音樂。而未諧厥成。倪寬云。天子建中和之極。兼總條貫。金聲而玉振之。遂一取裁于帝。六書之旨。其必有待于天皇考文而折衷之哉。因題曰同文備考云。又著書法指要。六義。應電。卒于虛。經紀其喪。并贍其妻子。爲刻周禮及同文備考二書。

續衣生曰。王荆公字說。自謂亞於六經。當時爲蘇子瞻劉貢父輩嘲笑。書遂不傳。今旁見於韻會。爾雅異

注亦多可採。特未見全書耳。王明齋同文備考、書法指要、六義全書、大有裨於六書。本貯泰和縣署。近多遺逸。予傳明齋、同文序、銘存字學、陳年、恐他日復如字說之湮沒耳。著書甚難、而惜書者甚希、予爲之三嘆。

《國朝獻徵錄》卷一一五

廣西憲副毅齋查先生墓志銘 潘國集

自文成先生倡學以來、興起者衆、若寧國貢、受軒沈古陵、餘姚王龍谿、錢緒山、四公、並高足弟子、而親炙四公、以私淑文成者、於涇上得一人焉、曰毅齋查先生。今知學來所接賢士大夫多矣、每見先生之友、言必稱我良朋、先生之門人、言必稱我師、而論其爲粹然有道君子也。先生歿已久、猶子友知謁余言文其墓中之石、余曷辭。按狀、先生諱鐸、字子警、別號毅齋。唐武德中、諱文熙者任池州刺史、因家於涇。先生大父諱漢德、父封文林郎德安推官諱景明、母崔氏張氏。文林公生子五四、出崔、一出張、公冢嗣也。年十四、崔孺人沒、而張來繼、先生事後母以孝著。率諸弟肄文、而更念匪學、胡文、匪聖、胡學、先後講於貢沈王錢四公間、所涵嚼最深。己酉舉於鄉、報至、猶偕同

志聚講、抵暮而罷、如弗聞也。屢上春官、不售、南還、卽台山與少傅穎陽許公、方伯拙齋蕭公、職方洪渾焦公、相切劘、而從遊若蕭都御史彥、趙少宰士登、蕭學使雍、趙憲副善政、王國子廷、鄭明經岱、探討上下、彬彬然盛已。乙丑成進士、授德安府推官、公等俗而不欲爲煩苛、其於卑赤、尤曲體其隱、爲營所中、先生爲直之、至以忤直指不顧、聞令有欲那移乾沒自潤者、先生微感之、令其省改、不以摘發之名自居也。其鞠獄、民就理、恐後情、法不蔽者爲平亭之、諸開釋者自慶幸、恨得公晚。久之、治理流聞、薦剡且上、一同官直指欲並舉而疑其年、先生曰、第論能職不耳、如以年則某長於彼、且二歲、直指絕歎、以爲難、德重先生未滿考、以卓異徵、道經新鄭、先生故新鄭相乙丑所舉也、時家居、見先生、思致書都門、爲公道地、先生堅卻之、以此忤其意、入京、拜刑科給事中、轉戶科右、仍轉刑科左、屢疏勸經筵、獲遷功、定管議舉人才、言不爲矯激、而識者服其得體、休暇輒從海內名碩結社論學、以爲常。未幾、新鄭因緣中涓起、且兼銓部、勢張甚、欲有所修舊隙、一日問先生、以直報怨、意何居、先生若弗喻其指、答問一以恬夷、刺之



令其自解。又欲出一罪人與進其私黨。先生兩執不從。因與之左。乃抑先生補山西參議。適當表賀。先生疾不行。撫臣迎新鄭。論致仕。父老留之。車為枳。先生油然而不以屑意也。新鄭罷臺。文章薦復。補先生舊任。父老爭歡迎之。至則革蒲東停喪敎習。定為藝餼。勒令互察。得歸土者不可勝數。有妖似獨能匿形。而人言多煽惑。先生出示驅之。妖謝相知者曰。養正人。吾不敢犯。為避去。兩閱歲。晉廣西兵備副使。抵家而奉文林公諱。喪葬一行古禮。公除。仍以舊職領廣西驛傳之任。三日。即以入賀行。還任三月。移疾歸。中丞郭公六下劄留之。不可。遂翩然東返。為復水西書院。倡明理學。即單執後進。折節引之。未嘗不與講。敵禮也。平居不至郡邑。至均田救荒。則力言於當事。為鄉人無窮計。臺使者時屢疏以薦。而先生已決終焉意矣。先生豐下黃額。髯歷歷可數。音吐若鐘。生平品格如麟鳳。心事如天日。言行有壇宇坊表。其於世人窺瞰依附。非特所不屑。抑亦所不知。乃其學則篤信文成先生致良知。簡易直截。為三字符。時講者各立門戶。先生獨守之。不易。謂良知不覺於見。即曰虛不染於欲。即曰寂。不累於物。即曰樂。無有無無。始終

無階級。俛焉日有孳孳。終其身而已。居恒澹然自修。恥不為表暴然。學者讀其書。知其學之深。考其行而不合於書者。蓋寡也。最後疾作。族兄秀視先生。問曰。得無動乎。先生曰。能病吾身耳。吾心何病。旦而起。索衣冠端坐。迺時遂瞑。嗚呼。此所謂任重道遠。死而後已者乎。時萬曆己丑十月三十日。距所生江德丙子正月十七日。享年七十有四。配太平謝氏。封孀人。生子三。琪清。琅清。玗清。並國子生。玗清先先生卒。今由子孫及曾玄雲。仍輩出。能世其學。固知先生之所延者長也。余嚮往先生有年。茲敘而銘之。竊比於神交尚友之誼。銘曰。士貴何必極。隨事而自力。毋忝厥職。士言何必華。以學興於鄉。足名其家。蛻變於茲。丘子孫食其休。惟千萬秋。

《國朝獻徵錄》卷一〇一

尤祿大夫柱國建極殿大學士少傅兼太子太

傅吏部尚書贈太保謚文簡諡所呂公調陽

行狀

吳國倫

頃歲文簡公自政府請告南還。攜其伯子祠部君道與國省族展墓。視其所治新第。且與國倫約婚。為遷復故土計。徘徊不能去者一月。國倫送之富口。別焉。公執手曰。先少保命諸孫名皆從與者。志不忘故。

土也。顧未及還而下世，予甚痛之。明年，予其家來，蒐
裘於茲矣。予時竊視公，已有病色。然猶與諸鄉長老
子弟接，強飲食不倦。去既越歲，國倫走一使省公，則
公病已去體，而神氣益王，心竊喜之。其冬，仲子諧計
吏北上，亦迂至興國，稍稍視生產，存親故。蓋公命之
也。問公起居，曰：「亡恙。」海內蒼生方望公復起，越歲未
兩月，祠部君使其從弟興訓以計來矣。嗟嗟，傷哉！公
姓呂，名調陽，字和卿，別號豫所。其先楚興國之大治
縣人，故居茅潭里。洪武軍興，籍其家子實伍，而公之
遠祖文勝名在戌籍中。五年戌天長，六年從戌桂林，
然率易歲一人踐更，未有家桂林者。家桂林自公曾
大父鑑始。鑑娶于劉，生綱。綱娶于宋，生璋，自號古愚
子，即公父。綱自少負奇，析節讀儒書，補郡弟子員，卒
與宋夫人早世，而所遺孤古愚公屬在襁褓，笑笑依
劉大母撫而成之。弱冠補郡弟子員，由貢籍仕為徐
聞令。徐聞人至今尸祝之。又古愚公與其配張太夫
人並好行仁義里中，里中人無不願呂氏滋大者。生
二子，長應陽，為郡諸生，卒。次即公。公之初生，太夫人
夢巨蟒入室，益異徵也。公生而早慧，特達。年七歲，會
古愚公遊太學，公尚未命名。太夫人遣之就塾師，持
周散騎所次千字授公。公欣然指律呂句而視其師

曰：「茲吾名也。」因名古愚。公聞之，大喜曰：「兒志不凡哉。」
稍長，受易多所博觀，史傳語而為文益奇。比初試，即
為督學上海潘先生所識拔，謂桂林一城，實遠為國
棟。嘉靖甲午舉于鄉，是冬始逆朱夫人歸，歸一歲卒。
戊戌，從古愚公之徐聞，讀書縣解。庚子，歸自徐聞，且
治裝北上。屬聞古愚公得調，遂不果北而復之徐聞，
扶持古愚公還。辛丑冬，逆張夫人歸。壬寅，公卒業太
學，聞永康程文恭公方聚徒談名理，乃執贄往見。文
恭與語，大奇之。公因僑寓隆福寺，下帷三年，益自研
事。文恭公日益崇性命之學，一切聲利不入其心。甲
辰丁未兩試皆不第，或勸之仕，輒謝曰：「士不難仕而
學不優，人益知公有大志。」庚戌舉進士，廷試一甲
第二人，授翰林編修。公雖以文學魁天下，為天下
史臣，然自視遠循一韋布耳。辛亥，迎古愚公暨太夫
人就養京邸，每尚食，公執匕筋。張夫人進羹湯，出極
誠款，二尊人悅之。其冬，二尊人夜寢中，煤膏公從夢
寐心動，若有人掖之起者，起而排闥入視，則二尊人
偃卧幾不能喘息。公自激清冷水數斗沃之，始甦。人
以為孝感云。癸丑，以編修秩滿，受封父為文林郎，母
為孺人。是秋，公以二尊人思鄉土，上書扶侍而歸。歸

踰一歲意猶戀戀不忍去庭幃二尊人以大義趣之乃復如京師共史職丙辰春會試上命爲同考官所取多海內名士時分宜柄國士多附其黨而躡至公卿者公獨固謝不往而分宜卒亦無所加公丁巳奔父喪已未又喪太夫人公哀瘁骨立截在草土者五年雖親暱罕見其面壬戌服除起家取道過大冶省族爲文祭其五世以上諸祖墓而後還京癸亥稍遷國子司業乙丑擢春坊諭德典內制隆慶改元擢南京國子祭酒尋改國子祭酒是冬擢南京禮部侍郎遇莊皇帝覃恩錄蔭一子戊辰改禮部已巳改吏部尋以吏部左侍郎兼翰林學士掌詹事府事辛未上命副少師江陵張公主會試得鄧以讚等四百人已卽奉命教庶吉士公凡三任成均率以其身爲型範先德而後統右愿慈而左智能以故出其門者多名實純美足爲公家類其由少宗伯以上日侍莊皇帝經筵每爲講輒先齋沐期以精誠悟主往往緣傳經傳聞列古義以爲時政規上亦時時嘉悅之暨修世廟實錄稽載精覈足稱一代典謨不獨以良史才自見壬申拜禮部尚書典禮多所釐定諸藩王外戚中常侍有所踰制而希上恩數者

一切議罷而諸曹郎吏亦莫不稟應奉其職會莊皇帝晏駕公從喪次除奏諸大禮頒布行之中外翕然稱善是夏今上卽位上幼冲方嚮意問學知公宿學大儒進文淵閣大學士協贊機密備顧問益公素以忠朴受知少師公故少師公首推穀公而上卽首任之爲天下望友在政府又與少師公同心體國興致化理上嘗親書大字賜公其一曰樞機克慎其一曰同心夾輔喜起都俞之風于時再見萬曆甲戌上命主會試得孫鑄等三百人是年修補廟實錄成上加恩晉武英殿大學士少保兼太子太保仍禮部尚書誥贈曾大父鑑大父綱父璋如公官妣皆一品夫人妻張氏累封一品夫人丙子公以一品秩滿上又加恩晉建極殿大學士少傅兼太子太傅吏部尚書錄蔭一子中書舍人是年伯子與周舉於鄉明年丁丑舉進士公入相凡六年遇上優禮師保每見稱不名上優不趨及諮訪大政多稱旨輒降溫諭褒之屢遷祀郊廟先師孔子暨上兩宮徽號大婚嘉禮以及納款獻俘諸盛事公皆以恭贊成之無一不當上意而所受上恩賚殊特非先朝宰輔所嘗蒙至于金錢文綺輿馬



什器之賜及夫大官傳食中使慰勞尤不可勝紀。公居恒自念遭遇非常不能圖報萬分之一。會病肺久而足又患疾徙履漸不自勝顧恐一日負主未忍言去。至戊寅秋公見皇上年日盛學日新朝政次第修舉又自度病寢劇恐歸不及首立喟然嘆曰帷幄非病臣素食地也。因上書乞骸骨書屢上上屢固留之而求去益力書至十上乃得請。上徐遣御醫視藥行人護行時與周爲祠部郎亦自上書請得扶侍其父上許之仍賜內帑金百金文綺二襲且詔乘傳以往曰卿歸幸善休沐尋當召卿矣。公歸里居一年疾稍平祠部君又得在告侍養會仲子興齊舉于鄉公且喜且懼曰吾家世受國恩而不世篤忠貞報之非人臣也卽非人子也。吾憊矣兒曹其忘忠貞之訓。是冬十二月廿八日公晨起猶對客食飲如常旁午病忽作口噤不語越三日爲庚辰元日公自起櫛沐坐正寢而逝計開上其悼之爲輓朝一日詔禮卿頒諭祭十一壇冬卿營宅兆于議贈贈太保仍錄塋一子中書舍人輔臣誠謚謚文簡諸卹典視常數有加公生平深沈簡諒內轡而色溫于人不輕喜怒事不輕可否而人事無所用其間以

嘗之論學本倫理立朝重名節爲詩若文古雅靡求。不涉蹊徑性尤喜澹泊雖被蟒玉未嘗去澹衣又門無私謁雖故人邑子不得妄陳一辭乃其所與少師公斟酌元氣總理萬幾事又在禁密非外臣所得窺而公且樹一士惟恐見知意一人惟恐見德人故益無所藉以頌公卽祠部君嘗語子鄉者平古田及懷遠府江兩大捷皆公石畫先之而使建議視師者尸其功大臣休休無他技信夫吳國倫曰初呂氏以戍人粵何學攀也乃一日而四世稱相臣遂爲粵西華胄豈其先陰德厚乎若文簡公父子相繼欲反於楚則又明於禮樂也已禮不忘本樂樂其所自生公其自托于五世反周之義乎予故狀其大者如此公生

正德丙子二月十八日距今六十有四年

（國朝獻徵錄）卷一七

明故光祿大夫柱國少傅兼太子太傅吏部尚書建極殿大學士贈太保謚文簡諒所呂公神道碑

文簡公以宿學名德受知 穆廟迄今 上以仲年嗣位遂采物望登三事維時寅亮之業煜燿文明而人知幾乞身終始醇白爲一代完德鉅人實有推公公姓呂名調陽字和卿號豫所其先楚興國之大冶人洪武初遠祖文勝從軍天長徙桂林遂家焉曾大父鑑娶于劉生綱卽公大父綱耻隸軍伍始折節讀書補郡弟子蚤世生子璋自號古愚子卽公父古愚公束髮讀書才名藉甚僅用歲薦仕爲徐聞令有惠政徐聞人至今尸祝之比居鄉與其配張太夫人莊好行陰德鄉人慕義無窮而識者謂呂氏先兩公咸以儁才天關不其暢融卜其後宜大古愚公生二子長應陽爲郡諸生卒次卽公公生有異徵蚤慧望而知其國器生十九年嘉靖甲午舉于鄉庚戌賜及第第二人授翰林編修癸亥稍遷國子司業乙丑擢春坊諭德隆慶改元遷南京國子祭酒尋改國子祭酒

冬擢南京禮部侍郎戊辰改禮部侍郎莊皇帝講帷攀上以弼成主德康乂生靈爲已任諷議凱切咸發于至誠 穆廟每爲勳客承納踰年改吏部尋以吏部左侍郎兼翰林院學士掌詹事府事壬申今上初卽位拜禮部尚書維時 穆皇升遐 冲聖嗣服廟堂多大典禮公以淹博鴻儒在秩完重地所條上經鉅犁然悉稱 上肯物望既以屬公而上亦雅知公端亮遂以公兼文淵閣大學士入參機務踰年進太子太保甲戌修 穆廟實錄成加少保直武英殿尚書如故丙子一品秩滿進少傅兼太子太傅吏部尚書直建極殿時 上富于春秋聖資英朗孳孳嚮意文孝講求治理公日在左右造郝陳謀敷裨天下大計上之初年吏修其職民安其業清和咸理夷夏晏然公有勞焉 上亦待公特優兩手書榮褒多尚方珍遺厚賚中官存勞終繹于家蓋自昔輔臣所未嘗蒙時江陵在首揆治尚操切號爲綜核其後漸綏如束濕中外稱不便而公獨用寬和長厚濟之江陵爲人陰刻鷲深擅行胸臆公知不可以口舌爭徒用



歟損國體無毛髮益乃陽示共和不輕爲異同而
陰從其中調劑酌收然又慎密不洩中外莫知其所
以調劑酌收者卽江陵亦不自覺第德公恂恂不懼
忤有所計畫莫逆而已以故終公在事不顯與江陵
開參商之釁而使天下陰蒙息肩之庥江陵友政雖
束濕乎而天下無事厥有繇哉其後江陵漸益益
遽猛恟忿誣上行私公知終不可與共事度勢又覓
其能奪起而歟歟徒身名不完習而安焉他日疇分
其咎者于是潛懷夫志而會公亦有足疾步微蹇乃
上疏乞骸骨上方倚注公不許疏凡十上乃得請
詔賜乘傳資以白金文綺令御醫侍藥使者護行歸
道與國與鄉賢士大夫吳大參國倫輩追往道故相
與徜徉楚佳山川繫念桑梓裴徊一月乃去抵家而
神益王闔門養重有古大臣常疏風居一年至冬十
二月公晨起猶對客如常亭午病忽作越三日爲庚
辰元日公自起櫛沐坐正寢儵然而逝訃聞上爲
震悼輟朝一日詔禮官議卹典加渥將作起墳贈
太保謚文簡廕一子中書舍人其始終眷遇如此公

爲人內和外莊貌共心毅喜怒不形于色可否不形
于口而深中不了了析名理極幾微洞三才淹通澄湛
平辦大事此不可動而樸茂簡重尤喜澹泊雖都卿
輔被璘玉而蕭然常布浮榮聲利眇不入其靈臺丹
府江陵之際所處大難而公善調之卒之人我兩得
身名並完始陰有其勞而終以脫屣物外自非幾
有道鮮克臻此公先後立朝一同考官一副一主會
試甄采識拔得士爲多三任成均正身端範埏埴俊
髦蒸蒸興起有辟雍振鷺之風一奉命教習庶吉士
士咸成令器爲主國楨桴登鼎鉉於穆哉懿德偉功
永垂竹素西南間氣實始于公公天性至孝方起家
史官迎古愚公暨太夫人就養京邸每尚食公親執
匕箸張夫人進羹曲盡誠敬兩尊人夜寢偶中煤毒
公從夢中心動若有人掖之而寤起視則兩尊人方
僵不能言公急沃以水乃甦人以爲孝感公貴累贈
曾大父大父父光祿大夫柱國少傅兼太子太傅吏
部尚書建極殿大學士妣皆贈一品夫人配張累封
一品夫人少傅滿廕一子中書舍人先是南部會覃

思廕一子入監讀書及卹廕凡三而長子興周舉進士爲祠部郎次興齊又以公歸之明年舉于鄉福德恭隆延及胤嗣天之所以報施善人亦厚矣公生正德丙子二月十八日卒萬曆庚辰正月一日年六十有五子男四長卽祠部君興周次卽舉人興齊次興文興武興周娶湖廣少參朱逢表女興齊娶太僕丞秦致恭女興文聘封川令陶昶女興武聘吳大恭國倫女女四人長適舉人毛如綸次適諸生蕭如范次適諸生常任次尚幼孫男一人嗣簡興周出聘延郡丞屠炳言女銘曰和風卿雲沛氣清晶維公之表岱嶽峻嶒溟渤澄泓維公之中濟若水火張若琴瑟習而調之海宇以謐知幾引疾消挂品密令終維始身名乃完羽葆鼓吹高墳我我懸諸日月公名不磨

屠隆撰《白榆集》卷一七

光祿大夫柱國少傅兼太子太傅吏部尚書建極殿大學士贈太保謚文簡豫所呂公墓誌銘萬曆庚辰元日豫所呂公卒於家計聞上輟朝一日詔所司議卹典諭祭十有一壇遣官營葬贈太保謚文簡廕一子中書舍人諸視常數有加而公之子祠部興周遣人持吳大恭國倫所爲狀來請余志公墓而銘焉按謚法平易不貲曰簡一德不懈亦曰簡余與公同政府知公深公爲人外溫而心辨中毅而貌和於事訥訥不輕爲可否於人恂恂不苟爲異同嘗曰大臣協心體國苟利社稷嫌怨共之安事獨殘其間無論彼已懷伎卽賢者各是所見政本之地斷斷而爭如國體何世儒嚶嚶猥小曹參而卑丙吉然則虞廷云寅恭者非邪自介柄政與公共事者六年內奉冲聖勤緝熙外贊密勿定計畫莫逆於心莫違於口六年如一日也蓋誠所謂不替不懈者斯可以爲簡也已上嘗手書賜公曰樞機克慎曰同心夾輔知臣莫如王信哉按狀公信呂名調陽字和卿別號豫所西粵桂林人也其先楚興國之大治人洪武初從軍戍天長後踐更桂林曰鑑者始卽家桂林是爲公曾祖鑑生綱綱生璋呂氏文學自綱始



儒藏

明儒碑傳集

卷七二

世爲郡諸生而璋以貢爲徐聞令徐聞人尸祝之璋二子長應陽蚤卒次即公正德丙子中春母張夫人夢巨蟒入室紫光煜煜寤而生公公生十九年爲嘉靖甲午舉於鄉庚戌賜及第第二人授翰林編修癸亥稍遷國子司業乙丑擢春坊諭德隆慶改元遷南京國子祭酒尋改國子祭酒是冬擢南京禮部侍郎戊辰改禮部侍郎莊皇帝講讀踰年改吏部尋以吏部左侍郎兼翰林學士掌詹事府事壬申上初卽位拜禮部尚書頃之上問余孰可與卿同事者余以公對上在東宮亦雅知公端慎遂召爲文淵閣大學士與機務踰年進太子太保甲戌修穆廟實錄成加少保直武英殿尚書如故丙子一品秩滿進少傅兼太子太傅吏部尚書直建極殿公先後歷官垂三十年半守史局三任成均四歷卿貳春坊典內制詹府教習庶吉士少宗伯日侍講讀凡總修嘉隆實錄者再分校丙辰副辛未典甲戌會試考者三所事成稱在禮部釐正典章自宗藩外戚中常侍不得踰制有所希請諸曹郎吏廩廩奉職由大宗伯入內閣若大喪若大婚若崇親薦號若降夷受俘諸鉅儀曠事咸稽公相成以當上心

上優禮公稱先生不名數命分獻郊廟釋奠先師時遣中官給賜上尊珍膳兼金文綺乘馬什器之屬不可勝計多自昔輔臣所未嘗蒙公故病肺又患足痿顧念恩厚未忍言去久之益劇戊寅秋乃踈乞骸骨上固不許諭留甚溫疏十上始得請賜帑金文綺乘傳歸仍遣御醫視疾行人護行聽其子與周以祠部扶持公於家居一歲疾良已會歲暮公晨對客食飲如常日中忽不語越三日元旦自起櫛沐端坐卒年六十有四公沉密簡重人莫窺其際嘗游國學從祭酒永康程先生談名理後公爲祭酒遂以永康學教授諸生先德而後藝以其身爲型範爲詩若文古雅醇厚不事模擬性尤澹泊雖蟒玉未嘗去絺衣門無私謁所樹惟恐見知所急惟恐見德頃平古田及懷遠府江當事者皆從公受策然公不自言人故無所藉以頌公公先娶朱夫人一歲卒繼張夫人名家子能以賢孝佐公初第時將父母歸中躬暨張奉七箸上食惟謹夜中其父母咸中煤毒公從夢中心動若有促之起者卽與張夫人起視則父母俱僵卧不能言急汲水沃之乃甦人以爲孝感久之以編修滿封父母如其官奉之歸蓋封四年而

奔父喪及禫又喪母哀瘁骨立後以少保總裁 實錄成贈曾大父大父皆如公官妣皆一品夫人配張累封一品夫人少傳滿廕一子中書舍人先是南都會 恩廕一子入監讀書及卹廕凡三而公四子長興周既舉進士爲祠部次興齊又以公歸之明年舉於鄉次興文興武振振濟美世且滋大周娶湖廣叅議宋廷表女齊娶太僕丞秦致恭女文聘封川令陶景女武聘興國吳叅政國倫女女四少者未字壻舉人毛如綸諸生蕭如蒞常任孫一嗣簡聘延郡丞屠炳言女公雖籍桂林數往來道興國省族展墓比其歸也視所治新第徘徊不能去又新構於興國語吳大叅曰吾先君命諸孫名皆從興以示不忘故鄉明年吾其以家來菟裘於斯矣會公卒不果公質行多長厚余獨心服其在政府斷斷乎有古大臣之風焉銘曰稽古盛際同寅協恭百僚師師以洽時雍譬伯與仲響和景從誠一無他深厚有容在漢丙吉今也則公主少不疑仰德乃風內寧外謐波恬漠空民安時熙歲豐守和自近就知其功我銘貞石以著模忠

張居正撰《新刻張太岳先生文集》卷一三

通議大夫南京工部右侍郎白石蔡公汝楠行狀 茅坤

公名汝楠字子木生而穎異甫八齡隨父東軒公遊南雍時甘泉先生進諸生講白沙之學公以兒年隨父入帷中從旁竊聽之輒點頭一座大驚年十八舉進士授行人函聖書賜齊楚諸王府所至輒按圖眺名山賦爲詩歌錢之碑記以貽四方片楮所落人呼曰漢之福衡也與燕張言河南高叔嗣毘陵唐順之晉安王慎中錢唐許應元姑蘇黃省曾及皇甫兄弟輩時時以聲律相高而公之譽問翩翩海內矣已而念父夷軒衰繇刑部員外郎上書乞南省以便祿養於是改南刑部尚書顧公東橋閩人也雅奇公才公至遂爲忘年友久之出守歸德歸德故州也雖陳之開多巨盜稍稍嘯聚竊覲非常者改爲郡而公以才爲郡太守佩二千石印綬首出填之下車不數月郡中肅然當是時公以強幹聞兩河間未幾以母憂歸歸築一室於前山之麓且恥賢豪士不當以五言終身也於是下帷讀三代以來孔孟莊列荀楊下及騷選釋老列仙百家之書而最注心者古六經今所刻諸經札記是也服闋補衡州衡僻楚之南服故多廢



而公則撤去故守歸德時幹局稍稍以經術醞醖之不務聲名惟以廉白長厚持大體民甚德之朔望數進父老于其庭與之揖讓問民疾苦復飭石鼓書院與諸生絃誦其中予嘗吏粵南過衡州始至封以內同諸州縣父老父老並稱曰宋鄭清之以來罕有也已而公復召諸生歌石鼓之堂珊珊戛金石抱經倚席尋次如掌蓋漢文翁守蜀之道也封以內多名山岫嶮祝融七十二峰之勝而公故善詩政暇數出遊遊必詠歌大略多附古者列國之遺郡之吏民至今能誦之者公既去郡之薦紳先生帥吏民尸而祠之徒四川按察副使公上章乞終養不報歷江西參政公又上章乞終養不報已而夷軒公不忍公之數上章不得也適遇江西邸舍公出則治簿書入則侍夷軒公父子以道相師友間行郡輒過鄒東那祭酒羅念菴司諫時時相與論學以究性命之旨久之夷軒公病且革公輿櫬來歸服闕徙山東按察使再徙江西左右布政使歷都察院右副都御史巡撫河南召爲兵部侍郎典戎政嘉靖壬戌會虜犯京邑天子稍厭司馬以下會公從諸公卿祝釐西齋宮上從帷中望見公貌寢出公爲南京工部侍郎尋卒于官

予嘗按公學凡三變而其蒞官持政亦數與學相上下初釋褐時競爲聲詩然饒刻藻麗過南省則洗去鉛華合響即劉諸大家矣歸德以後稍稍進經術然所至猶不能不以才指相高守衡州則寢寢近古循吏矣已而由戎政來歸予察公貌而扣之其息深深少也又若泠然萬物之外而世之升沉顯晦不以侵蝕其心者殆庶幾乎古之有道者已此其學於江西所得爲多公生平好著作不事生產內外綱紀諸僅僕米鹽以下並聽臧夫人操篋簞謹出入而不之知故公自少服官至卿貳猶蕭然如書生四方賓客所共從遊往往若披穆風神解以去亦忘公之歷官卿貳者嗚呼若公者詩所稱不競不綈國之典刑是已惜乎享年僅五十而沒沒之日南都公卿百執事以下無問識不識相與恚其棺而號爲之潸然出涕計聞於朝天子爲之賜祭葬中外士大夫移書臨弔者不絕所著六經札記而下別有自知集樞筦集白石文集八十卷藏于家

明通議大夫南京刑部右侍郎白石蔡公

墓誌銘

公其先上蔡人宋遷都而秘書郎源者扈車駕抵浙因徙德清家焉遂爲德清人七世祖舜卿仕元爲福建觀察副使舜卿生可宗可宗生文浩文浩生綱綱生本本生麒麟生玘玘舉于鄉爲延平府同知而同知生公年十八舉進士爲行人性穎敏有異才好讀書一覽輒過博極古今九經諸史六藝所纂百家所傳墳典丘索之遺鼎彝篆籀之秘網羅涉躡浹洽貫穿而時發于詩含英咀華落筆妙天下年少官薄而天下言才子者必首推公莫不以賈傳復生文彥再出諸公卿始皆欲收置門下尉籍甚篤公數謝不顧反心害其能會時方選才彥充宮館侍從輔導凡數十人獨擯公公閉門嘯詠不輟恬如也嘗以行人奉使還報命而轉比部

員外郎久之以母憂去起而復爲比部公故倦游益厭上書乞南復爲南比部優游郎署間而前數十人在選者十敗八九世以是高之自行入爲郎凡十二年所而轉歸德守歸德故州也方改郡而公首至譬之墾荒積諸無所承公翦草萊闢城郭初郡治小者立斷大者議聞具條令督率諸縣備制度以整齊吏民政一時皆新聲赫赫震兩河間矣未及三月又以母憂去起而得衡州公以歸德初建治當急而衡樸淳宜緩由是一切開略文法持大體務長厚數問民疾苦因其謠俗諭以得意煦煦拊循而令長丞尉率職于上父老里胥導命于下旣無橋度亦無廢弛愷悌之政行平和之氣通民忻忻若更生矣封以內多名山暇必出遊遊必有賦而此邦之人式歌且舞與之相應陶然樂也復立石鼓書院集諸弟子材俊者其中弦誦肆興球鏞



夾擊彬彬咏先王之風樂而忘歸。又進其尤材俊者授古作之指摩以道義勉之力行其得賢士尤盛焉。識者言公治歸德猶以疆幹名至治衡專以經術醞釀之近有道矣。然疆幹者易見而近道者難知公真不可及哉。自衡轉四川副使以父且老乞終養不報。又轉江西叅政再乞養不報。竟以父憂去。又轉山東按察使江西左右布政使晉都察院副都御史河南巡撫時虜犯內地山西諸寇猖獗勢且壓境公先機命將殲其渠魁散其餘黨經略具布紀綱肅然而益綏以寬大鎮以寧靜疆場宴謐民以乂安廟堂益重之又晉兵部右侍郎掌京管理戎政京營多與中貴人相連數問遺造請公獨謝弗與通固心望。又方䟽戎政敝將上諸中貴人益忌之時肅皇帝以虜事怒本兵而見公祝釐時足微跛不悅因中以飛語徙南刑部右侍郎公喜

曰是固吾郎署時所上書乞者也遂行。然公行二年而足益病醫誤治之竟卒。蓋年厯五十耳哀哉。公詩本奇而迹其所游歷登泰山上日觀觀日出海中間秦漢所故封金泥玉檢處謁闕里過洙泗並大江沿句曲遡武夷數居金陵瞻鍾山王氣涉雲夢望巫陽駐衡嶽徘徊祝融峒嶠七十二峰之上轉岷嶓躋劒閣渡河洛窺中恒入幽薊以歸。此皆天下大觀往往于公詩見之靈爽互相與發是以奇益甚焉。始其于詩喜鮑謝多擬齊梁如珠璣錯陳藻繪在目外無遺景內無乏思亦天下美麗之極矣。而公顧恥其雕刻晚節聲律益平與錢劉並驅高岑接踵然要之精詣各有至者。文亦力追古昔成一家言。引繩墨切事情春容雅醇有足觀覽。今所著自知堂稿七卷樞筦集若干卷白石文集八十卷嗟乎多矣哉。稱才子不虛哉。然公生八歲則其



父嘗携之大儒湛先生惟中見先生論道輒首肯其天性固有合也及仕而與江西鄒先生羅先生吾師唐先生益質微言究指趣學遂日進觀別著五經札記足明其潛心于道矣卽未及公所至而嚮令不死其學當何如哉悲夫公名汝楠字子木號白石生正德年十月初六日卒嘉靖四十四年七月三十日父同知公號夷軒公以南曹績贈祖及父皆通議大夫南京刑部右侍郎祖母嚴氏嫡母陳氏生母沈氏元配臧氏皆贈淑人繼配吳氏子一炳齊官生聘陳氏繼聘嚴氏女二長適國子生茅仲籍副使仲子也次適吳稼心炳齊將以隆慶二年閏十二月三日塋公郭觀山之原初公精白潔修不喜問錢穀產業而臧淑人力佐之起家及臧歿家落矣又多難炳齊勢不能立而寄于陳獨賴侍御朱公數保持之侍御公固衡之高賢自石鼓

出者也今恭浙藩開省湖郡所以恤公家者厚道高義卓冠一時公塋固待之而舉乃以副使狀來趣銘予與副使及公三人爲束髮交而于宦游頗與公相值知之較詳故備著云銘曰嗟乎蔡公生而夙慧才冠一時名滿海內江夏無雙洛陽鮮貳作爲歌詩超絕羣類咀其英華含蓄精粹蘊山川靈發鬼神秘國之琛寶朝之鼎英叶胡不薦于清廟黼黻當世而乃陸沉金馬東縛麒麟辟如太阿惟其所試珥筆文人分符循吏飾以儒學合于經誼歸德畏威衡有遺愛緩急以宜變化以概張弛不違惟道是賴踐更旣多撫綏靡懈秉鉞天中揚旌河外股肱皇家折衝邊塞方恃主知將熙帝載扼于中涓阻其大拜我思蔡公夙秉明哲始不競進晚不求合優游郎署尚持高節况臻政塗豈能枉轍德如玉溫操與冰潔乃如之人何

遽摧折。千里之足。隕于一蹶。郭觀之原。惟公之宮。山川崇深。望氣鬱蔥。埋其文章。化爲星虹。百世而下。光被無窮。

董伋撰 《董學士泌園集》卷三六

校記

①「除」字上或下疑當有「服」字。

②析節：當作「折節」。

③信：當作「姓」。

④文騎：當作「文綺」，見前吳國倫撰《呂公調陽行狀》。

明儒碑傳集卷七十三

馮惟訥 宋儀望 徐師曾

朱大韶 朱睦㮮 胡直

光祿寺卿馮公惟訥墓志 余繼登

莊皇帝之壬申三月二十又一日光祿寺卿少洲馮公卒于臨輦以其年十一月二十日葬公于堯山之原。歲十五年公仲孫琦官太史始以公仲兄海澄先生狀來請銘。登謝不敏而重違太史之命乃按狀志而銘之。狀稱馮氏之先世爲青州臨朐人高祖思忠徙家遼左復歸於青則公父憲副公始也。憲副公有文夫子五人四登科第並以文章政事擅名于時。東海馮氏遂有聲於天下。公諱惟訥字汝言別號少洲。正德癸酉憲副公爲蕭令生公于蕭。公生有奇質手神秀微。既長開敏沈毅辨悟絕倫名起齊魯間。一試輒受廩。領嘉靖甲午鄉薦登戊戌進士庚子除宜興令。宜興多大猾持吏短長善通賦有通至數十年者。公至刺諸猾搏擊之按籍而攝逋者逋賦大集以數萬計輸之郡。郡守大奇之謂令纔弱冠耳乃老吏不如。邑中咸惴惴無敢以少年易公者矣。公嘗督諸

生就試江陰巡江使者某以其間行縣至邑陽怒不候已而陰有所覬公若爲弗聞也者弗應也。使者愈怒撫他事中公調規令會邊警沓至烽火徹郊關諸南震恐公計久遠調經費爲城雙井鎮以備之。未幾遷蒲守。魏人擁車下不得發乃爲更定牧馬法而去。蒲劇州多宗室紛遷難治公治之甚容與暇嘗進博士弟子俾執經問難爲剖疑義士爭奮勵舉於鄉者視昔三倍之。乙巳晉丞維揚而公尋以外艱歸服闋補松江遷南京戶部員外郎郎中壬子丁內艱復補北駕部出爲陝西僉事分巡隴右兼督學政在鎮五年武備文教種種悉飭邊圉無事。陞河南右叅議分守河北壬戌擢浙江提學副使公念兩浙士風爲海內嚆矢廣布條教以示左質右文之意士習翕然咸歸於正。癸亥陞山西右叅政卽自其省爲按察使公旣秉憲一以彊明義之吏民見者語次尋釋皆得其陰伏廉然無所受私三晉號曰神君。丙寅陞陝西右布政使秦中多豪強馳騁閭閻錮屯田之利令籍不得稍公乃以法按其豪大搜諸伏田得萬餘頃事聞受白金文綺之賜戊辰轉江西左布政使藩司總錢穀日入以巨萬計吏弊蠲集公爲立抽名驗收之法



額外無毛髮餘羨宿弊頓祛。江右歲輸諸瓷罏及它經費甚夥皆當出于民又吏緣爲奸公私困耗公乃議令民畝出一錢以給諸務而諸絕簿書盜財物者率以輕重受刑遠近便得焉。卒未入覲闕下精覈下吏能否無所依違天官郎亟稱之曰諸方伯考覈言事繁然有執不存兩可者獨馮伯也是歲諸方伯去位者過半公名益起縉紳大夫咸以公輔期之而公請老之志堅不可挽矣疏上天子惜之特進光祿寺卿予致仕云既歸始構室墾田習靜遂爲終老計而天不憖遺不踰年逝矣公天性孝友歷官所至皆奉太夫人以行卽佳節夜歸必徐候戶外問寢食然後退其奔喪也徒跣數千里外柴毀逾禮兄弟之間自相師友友愛備至教育諸孤無異所生以至宗戚閭黨緩急皆以時周之咸得其歡心交游天下悉當時聞人相與考德問業各取所長然性嚴重不可以私仕宦三十餘年圖書詩卷外無長物督浙學時大學士袁公遣官致書謝而不發其介如此幼服庭訓用廉平爲理所至吏民畏而愛之在魏有德政碑在蒲在隴右有去思碑在江右則士大夫嘆服謂二百年所未見若小民又人人肖像于室飲食必祝

矣生平嗜書無所不讀每政暇卽手一卷不置博涉而深思閑積而約取發爲文章溫淳爾雅古歌詩取則建安近體在天寶大曆之間所著有風雅廣逸楚辭旁註選詩約註漢魏六朝詩紀文獻通考纂要唐音翼杜律刪註馮光祿詩集若干卷行于世史登曰立功立言古今勝事志士杰人畢力而趨者也然祠俗之士往往不顧才質之有限官無崇卑必斬卓詭業無工拙必斬表炫至強役其心以爭兼能之勝精悍然用力日勞所至日詘公少通仕籍循資累級數十年始長藩司而一旦棄去如脫屣結髮供文詞凌厲作者而冲雅和平無一切環奇競勝之氣舉世所共艷羨者一不入其心故操之無所強而出之常有餘不求聲而名我隨不務勝而人我歸可謂有道者矣。

《國朝獻徵錄》卷七一

大理卿宋公儀望傳

王世貞

宋公者諱儀望字望之其先丹陽太守哲徙吉水爲吉水人己又徙永豐定爲永豐人公之曾大父邢鉉官輸粟助邊拜縣令羊酒之賜里人榮之大父七品散官魁昂父聞義以公貴贈吳縣令再贈御史公之爲諸生也數試於有司輒冠然省試輒屈既薦卽第進士爲吳縣令未幾卽擢河南道御史後疾歸復爲



御史御史未幾即超爲大理寺右丞。已落職補知火陵州。未上。即拜荊州兵備僉事。亡何。超爲大名兵備副使。後監福建軍。尋削二秩。需次久之。補四川按察僉事。即復爲其按察之副使。後視福建學政。以婦卒。自免歸。道遷其官。參政。即入爲太僕少卿。甫上。遷大理左少卿。遂進都察院右僉都御史。巡撫南直隸。提督軍務。稱儲久之。以功遷右副都御史。改南京大理寺卿。已轉大理卿。有所齟齬。乞歸。需次里中。而公卒矣。公之成進士。自丁未以至戊寅。踰三十載。一居憂一移秩。一自免。再生謫。再需次。而其起家與還鄉之峻且速。大畧亦相當。公之不出天下。以爲非公無可與任事。而及其既出。則躡而肘之。必不使其有以自遂。其在下位。苟遇一名缺。亦必念及公。以爲非公不足當。而既遷之後。復嗆嗆背背。互相指目。以踰致累公。蓋公之才識果敏。精神煥發。足以鼓舞人之觀聽。而特亦一中其忌。至於道骨勁挺。高論橫溢。必不肯舍己而伺人之好。其忌者與知者錯。而爲公屈伸。最後知公者方柄國。舉東南腹心之地。以委公。公亦竭其力。以大有顯見。天下方延頸冀公之大用。而卒不勝其忌者。公亦老且不起矣。嗚呼。人耶。天耶。始公令

哭而其邑人猶少之。公不動聲色。發德好弊如神。胥吏洗手而治。念諸區所苦者長賦而長賦。所苦者長運。往往破家。公倡諸區各出公田以贖之。所出田計本受田爲差次。即貴勢無得免者。民以不困。爲大入冠。餉不計大司農計。專官併責。吳舊賦。人洵洵且竄。公自郡檄慰之。而條處其緩急。讀者良笑。乃與比邑合而置義塚於六門之郭。禁毋得水火葬。吳俗幾變。言公假故吳人。公創文學書院以嗣之。與諸生講道肄業。其中後皆出爲名公卿。如今魏郡太原二相國。其未表者。公既精於法比。時時憚憤。兩造數百人。不論時解去。而他所經畫。博節皆出人意表。故既微而人爲尸事之。爲御史時。上書論大將軍仇鸞擁兵居肘腋。扶虜自重。無人臣禮。時鸞恃寵驕甚。聞者爲縮舌。上雖內私鸞。而無以易公。寢不下。未幾鸞死。事露。僇屍及妻子。公意益發舒。陳時務十二策。爲識者所重。出按河東。雖持法亡所徇。許曉賦簡少事。公創河東書院。申東越之學。以與諸生講習。多興起者。移疾歸省母。病痊。復爲御史司大計。時公之鄉人李相有驢子橫而食。公欲糺之。不果。因論邊事。遂及東南。而以督臣胡之淫侈。撫臣阮之婪荒。請攝治之。

二臣驪子之心胥也。以是不說公。而會公將視三殿大朝門。又中貴人議工直日一銀。公不可。又欲悉易殿陛石。公又不可。第易其煨弗堪者。而驪子私買人五千金。屬工部歐陽尚書者。辟與工事。公又不可。於是衆怒最矣。公之遷大理丞。驪子自以爲公功。公盡所報謝。而遂巡引避。以請急歸。適風雷變。宰相欲有所廢樹。及大計吏而尚書遷吏部。與驪子比。而謀誅公。公之兵備霸州也。前是有西寧侯者。道其地。盜夜追之。倉皇溺死。盡剽其資財。詔捕之。格甚峻。公鉤得。其渠魁。悉置於理。霸人惜公威神。竟公任。無竊發者。承爲畿南輔。公請城之。最爲堅完。又疏豁洪武以來養馬通稅。民大悅。其自大名移閩監軍。召爲材公。而寔遠之。且困以兵事。後太宰於公按隄時。有所不悅。故也。公至閩。於大帥戚繼光。合英破倭。斷斬無算。入與棘事。所撰程式義冠一時。籍籍稱公有文武材。而計吏之復下矣。太宰修前指。必欲斥公以快。而考功郎一儒力持之曰。宋某材。且法不至斥。必斥宋郎。請先斥郎。乃止。議謫。而公方從容遊武夷。賦詩歸。而灌園意甚適也。屬邊事棘。廷薦公者前後十八。疏於。是公備四川按察僉事。以至復爲副使。視福建學政。

一以 高皇帝卧碑訓諸生。而時刻東越理性諸書。聖之所以鼓舞振德尤備。自是參其省政。佐大僕大理。皆不久遷。無可見者。其撫南直隸九郡。則自江陵張相國居正。所謂知公者也。公故令吳澤職民。國戚苦與吏弊風俗。至則一切務爲寬大。而於案問金瑣。深陽豪貴人之匿賦。而以重累卑赤者。亡所恤。諸郡邑中水。公上書請減歲租。發儲粟以賑。水不大災。足時海警。解吏士諱言兵。而公獨與兵使者王叔。某計益修餘皇。練卒伍。飭戎器。申嚴賞罰。亡幾。倭衆。即至。公遣舟師三覆之。於外洋。俘斬虜口。盡。儀器甚衆。公於清濁靡所不揚激。而所教勵尤在忠節。會有詔雪靖難死事諸臣。公謂金陵其死事所也。建表忠。聖聚而祀之。公之鄉人宋楊邦。又以不屈女直死。江軍其祠與墓在焉。而墓且湮矣。公行求得之。爲置封樹。因故祠。陞官而歲饗薦焉。太常卿袁公洪愈。國子祭酒姜公寶皆里居。非相國所急。而姜尤甚。公力薦之。意與左。使瑣臣繩公。公不順。人以是知公雖以材兒器相國。要之不苟爲附。誰者。坐與御史論鹽盜事。相異同。公廷辯不少屈。雖入爲廷尉。猶用前隙。指訾公。公所部一郎病狂易。嘗闖入交戟肆侮。公置弗較。



儒藏

明儒碑傳集

卷七三

也。而郎猶時時毀公。偶有中之者。遂繼及之。相公細其說。然猶小停。公任以解。公遂決意不復出。以至卒。海內咸惜之。得年六十有五耳。公生而磊落感慨。有大人志。一日讀宋史至秦檜陷岳武穆事。掩卷而嘆。贈公怪之。對曰。令兒生其時。不飲血而碎膽者。有如此日。又讀唐史裴度傳。所謂賊滅則朝天有期。賊在則歸闕無日。大嗟泣曰。壯哉男子當如此耳。相公遇公。當以名義見。必能為縣官致死力。公上於舉。于業負重名。然好習史漢書及少陵氏詩。善其言矣。偶從鄉先生聶貞襄公約所得。聞東越良知之旨。而服膺焉。東越者。故王文成公守仁也。公遂游貞襄公門。已又游歐陽文莊公德。鄉文莊公守益門。貞襄及兩文莊公皆重公。以為能負荷大事。故後印證於故羅文恭公洪先。其詣醇深。時方議以文成公從祀孔廟。而拘儒或難之。公曰。是未易以口舌爭也。乃著或問一篇。反覆數千言。大較謂堯舜開道心。精一之傳。未嘗求理於物。格心於外。孔門大學首言明明德。明德即道心之靈覺不昧者。然則明明德之功。要在致知。而訓詁之士。乃謂致知者推極其知識。是求之物而格之外也。文成公指而示人曰。致吾心之良知而

已。是知也。孟子之所謂孩提之知。愛知敬。顏子之有不善未嘗不知也。然則得大學之本旨。而上邇克齊。一之傳者。無如文成公。公之或問出。見者無不爽然。後十餘年。卒以文成公論祀。公於學能識其大。其為人氣象。不帖帖細瑣。然內行特純篤。贈公有九子。公最晚舉。能得其心。歿而公哭之毀。悉其婦家。以營喪葬。母太夫人九十矣。大會客稱觴為樂。比畢會入而視省者四五。公時已踰艾。猶蒸蒸然孺子也。所受產室悉以讓諸兄。兼為行履得好田園。輒買益之。推而至於三族之親。以逮疎者。又推而至於交知及間左。亡不沾公之德。以為恒。卒然有凶。吉取之。若奇。公亦自忘其德於人。少喜其邑之陽山。以自號。有詩曰。陽山稿。晚撫吳。又喜句曲之華陽。蓋取其詩文目之曰華陽館集。始子子仲兄之次子瑜。已而自有子曰。明曰。玘曰。玘有女婚嫁皆名族。許胡觀察行狀中。

（國朝獻徵錄）卷六八

徐魯菴先生師曾墓表

王世懋

嗚呼。此魯菴徐先生之墓。先生嘗讀書中秘。為諫議大夫。不稱稱魯菴先生。尚德也。按狀。先生姓徐氏。名

師曾字伯魯，類其菴爲別號云。徐氏其先廩姓，偃王之後，散處太末。至勝國時，有諱潛者，以龍慶州守始來家吳江。數傳至文亮，生達，達生綱，綱生養恬，公朝出後其從父緒，實爲先生之父。元配王孺人，子弗育。其氣凌孺人，實生先生。先生生有異質，弱不好弄，十歲就外傳，即匡坐讀書，終日岷然。授以易義，輒通大畧。十二能詩歌，屬古文詞。十四試有司，不得志，自是數絀而名益起。吳中子弟執束脯紛來受學，而先生亦抗顏爲人師。嘉靖庚子，先生年二十四矣，郡守馬公以儒士首選，上御史試，復被放，人皆惜之。先生不以數奇自沮，顧益下帷誦習，嘗程書自課，吃至丙夜不休。其學自易外，旁逮諸經，下至洪範、皇極、數法、陰陽、曆律、醫卜、雜篆諸家之言，皆能通其說。上論經生，卽世稱鉅儒，弗過矣。歲辛丑，始遇令喻公督學使，者揚公，兩公皆名能得士，於是先生試輒被賞，遂冠邑諸生，而諸生亦已敢雁行者。所遇監司直指無弗人人稱知己矣。丙午領鄉薦，丁未上春官，連捷，念兩算人年高，而生母在淺土，遂稱疾不對制，歸而養。凌孺人之葬已，養恬公召先生而諭之曰：「兒幸第春官，一命行及如廢前代之典章，弗考情於國家之令。」

甲以積胡以酬上恩。夫精義者致用，利用者安身，兒其勉之。先生奉父命，乃益專志於學。上何養恬公卒，先生自傷不以祿養，哀毀幾不勝，終喪事，上踰體。癸丑成進士，選爲庶吉士，閱二載，試恒居優，解館時，顧不得授史職，出爲兵科給事中。先生無幾微愠色，夙夜奉職而已。明年嫡母歿京邸，護喪歸，服闋，赴部補吏科。先生在兩垣，先後長官丘梁二公，雅知先生，請悉時務。凡天議多從商榷，卽公疏多出先生手。而先生亦自有建白，如酌處川兵，請立任兵備，祠之類，多見施行。庚申，奉命冊封周藩，使道休沐，閱歲，歷轉左給事中。當是時，肅皇帝春秋高，益摧折諫官，而相嵩用事，陰貽訾言者，以自便。臺省多循默失職，先生歎曰：「吾奉先人遺體，不忍卽狼藉闕下，奈何？」效積輩積月奉嘿，嘿坐致金紫乎。而會奉使時，脾疾作，至是益甚。先生曰：「吾有以自解矣。」因請告不往，關書舍於南湖之上，聚書萬卷，伊吾若諸生時。已遂風，疏乞休，銓部惜不爲請。隆慶辛未，再疏，始奉命有致仕，然天下益想聞其風。今上初用兩臺使者，薦竟起爲禮科左給事中，檄迫之出。先生謂然曰：「臣在先朝，以不能建明，故竊附周任之義以止。今羣龍滿朝，臣」



儒藏

老且病、何能復裨聖明萬一。復抗疏辭。上諒其誠、許之。於是海內愈益高先生之行。御史郭君論薦甚力、行且復召。先生託所知言之銓部、乃已。先生既無意用世、常思託遺經以自見。故晚年論著彌富。學尊望崇、鄉邦方倚爲菁蔡、而先生遽捐館舍。年歷六十有四云。遠近哀賻、遠同太丘。鄉先生沒而社祭、先生當之矣。生平所著有周易演義、禮記集註、正蒙章句、世統紀年、湖上集。所纂輯修註有文體明辨、詠物詩編、臨川文粹、大明文鈔、官學見聞、六科仕籍、吳江縣志、小學史斷、經絡全書、共數百卷。行於世。又以字學不明、欲緝全編、以贊同文之治。尤遠醫術、論著業已數十篇。此皆有志未成者也。燕居輒笑、咸有桀黷性。雖醇謹、僂僂自將。至取予大節、毛髮不可苟。堵宮蕭然、有以自樂。終不爲人居間也。吳俗好言冥福、先生之葬、元配併自營墳、誠其二子曰、吾生平不敢遂過、嘗有瘳瘳庶幾之心、卽冥報當不吾誑。小子志之、毋徇俗好爲也。余惟國家以科甲羅士、士繇此進者、爲願出所長自快。然中原之人、車好生耳。大江以南、官多六百石自免者、談者謂江南人多田園、子女之奉、以故輕去其官云。若先生當盛年美宦、一旦棄去、編

摩窮年、此亦詎有所染好耶。當其請告時、天下未能盡窺其指、見以爲明哲保身而已。載更兩朝、途險者已就夷、居靜者且思動、而先生卒堅臥不起。然後有以見隱君子之真也。昔蔡中郎爲人作墓碑、獨云於郭有道、無愧色。余非中郎其人、無足爲先生重者。然先生亦詎減郭有道哉。

（國朝獻徵錄卷八）

南司業朱文石公大韶行狀

王弘誨

公諱大韶、字象玄、別號文石。其先自吳興徙華亭。七世祖尚德、公贅烏溪里家焉。因爲烏溪里人。尚德傳道華。道華傳純庵。歷山西按察副使、有宦績。生子六、長旅溪。公諱恩、南京禮部尚書。次橫溪。公諱憲、爲公父。經歷南天策衛。生封檢討。餘山。公諱良、諷、吳、張、瑞人。瑞人孕公時、經歷君夢一羽士擁從卒、挾書印、目君於塗曰、將及而孫受之。夕而公果生。公生而神氣警爽、目光炯炯旁射。六歲從塾師誦、卽習于誦。一目數行下。塾師驚爲之避席。久之、封君卒業南成均、攜公以從。時張文定公爲祭酒、召置門下、授之儀禮數篇、過目成誦。文家大驚異。何物幼小乃爾。因徧見公于貴文端諸老先生、卽有聲於諸老先生。封君試累

不利、公重傷父志弗成、思所以大父門者、愈刻苦自奮。癸卯、以詩經魁南畿。明年對公車、報罷。歸自砥節、爲古文詞、博聞強識、學無所不窺。丙午游南雍、松溪程公以祭酒試而奇之、合六館士爲文會、令公司其雌黃、悉精驗。丁未登進士、選庶吉士、讀中秘書。故事、庶吉士選者、間臣爲選次先後以名聞、幸上俞允、肅皇帝嘉公所咏寶善詩、拔至第三人。公既嫻於文、而又得以文自見、其思雲湧川決、頃刻數千言立就。故相張文毅公及少師存齋徐公交口稱賞爲國器、用是感激、所爲文踔絕行輩。公雖操翰觚爲文人業、手尤留心經濟、凡禮樂刑政錢穀兵戎之數、俱縷縷口畫心計。每國家有重事、諸公相與議、必問朱先生云何。已酉、授翰林檢討。辛亥、奉使冊封湘藩、道雒陽、入隆中、探南陽鹿門之勝、事竣、即登太和、浮洞庭、望匡廬、從大江過金陵三山、諸名勝所紀咏著作爲多。已歸覲二尊人、稱觴爲壽、里閭榮之。壬子冬、復命還、癸丑、分校禮闈、所推轂俱名士。公既用三載考績、得封父如檢討秩、母爲孺人。時倭寇起東南、海上苦兵、親舍越在千里外、公燕居深念、計不令二尊人南而己、獨北、欲以情請。孫文簡公及徐公留甚力、公曰、官

重親耶。盜賊日暮、躊躇里閭、雖欲長侍二親、詎可得耶。遂得南司業去。先是分宜相未柄國時、以交驩封君、故與公爲通家。分宜子用事、諸離附之者不可勝數。公以濡足權門爲戒、分宜子銜之。而公又與倖臣陸太保有連、陸貴橫甚、公雖數往還、非其好也。陸意不能無小望、公雅欲避之、籍此自解脫。世莫知云。公既南、卽迎二親官邸供養、召六館士來取約束。時南都士習侈、公謂漸不可長。嘗慨然曰、太學故養士地、今諸生皆誦法孔子而鮮衣怒馬、六博蹋鞠爲戲、無有明於尚齒貴爵之訓者、教化之謂何。宜如宋祭酒訥故事、著功令示之、不宜數考問以盡其材已也。議沮不行。士論至今惜之。居無何、二叔果修前卻、擢公、旁有從史之者、遂中公浮言解官。縉紳青襟譁爲公不平、公夷然不屑、曰、吾向已知之。輩上君子肯爲余再伸志耶。歸構樓於城東北隅、置圖史、朝夕觀覽、左右遠眺自適、取名快閣。歲時行園、召所厚故人從、命鵬奕、談說鄉里事爲樂、絕不問門外事。四方造請碑志、序記、履滿戶外、公投甕以應之、有餘力。雖居里巷中、而名稱藉藉、實無異朝省時。公才偶儻、意不可一世、而勇於任事、誠以待人、有古君子風。其事二尊人尤



極孝養甘旨非先嘗不敢進誕辰必盛供具會親朋
梁飲娛二親意封君捐館舍旦夕哭泣哀毀耳幾瞶
又病目青終之委頓以卒公起家翰林及家居三十
平祿不加盈而施日以廣骨肉之親析而不殊母及
妻族無不沾公澤者其孝友篤至內行淳備益天性
云公生正德丁丑十月卒萬曆丁丑五月年六十有
一。

（國朝獻徵錄卷七四）

明周藩宗正鎮國中尉西亭公神道碑

張一桂

萬曆丙戌秋七月戊午宗正西亭公以疾卒於邸第
年七十矣其門下士鎮國中尉睦禾等走兩臺頌公
功德者五百人督撫衷公直指徐公疏聞於朝請
祭葬賜諡爲宗盟勳天子震悼下宗伯議如兩臺
言制若曰睦樸學行素優其加祭給水衡金錢共
葬事蓋異數也語稱得全全昌公庶幾無憾者而縉
紳大夫若士民猶環顧咨嗟而歎曰天胡不憖遺令
公百歲也則又曰疇復有閱覽博物其聲藝苑如公
者乎公妊十四月而生有貴徵少端穎則詣李公獻
吉一見大奇之曰此飛兔也老夫且睦乎絕塵矣稍
長學無所不闕刻意古作者與閩王道思越陳約之

結社講藝其驩所結撰出無經而走縣宇執牛耳詞
壇者五十年如一日也則又曰疇復有闡明經術羽
異聖真如公者乎公初工制義已歎曰揚雄非醇儒
也猶恥繡繁悅爲名高乃覃精於經學當是時衛君
聘名能易和太芳名能書周伯昌名能詩周涿之名
能春秋許守謙名能禮此數先生者皆河洛間宿儒
也公先後從之遊蓋年二十通五經而尤邃於易春
秋其學不顯守師說聚漢以來諸傳注日夜繙究務
求不詭於聖人謂春秋非獨爲攘夷復讐立案也乃
自爲傳以明筆削之旨易初主王弼後復取鄭玄謂
鄭學莫備於唐李鼎祚因刻其集解以傳高陵呂仲
本仲采與公講易東坡上驚曰子輔流也新鄭高
公問易之大義云何公以退對高公恍然有問曰四
聖之精蘊備是矣其爲名碩所推許如此則又曰疇
復有肫肫孝友內行修潔如公者乎公幼有至性事
父昆崙公晨昏不離側疾則嘗便溺天斬代者數矣
喪三年居於外有弟五皆從公受經先世產盡推道
之立祭田於白塔原歲時伏臘必合族祀先祠下退
燕於寢以爲常即諸儒習禮家亦自謂弗及也則又
曰疇復有馴行好修蟬蛻塵埃之表如公者乎梁緣

信陵遺風諸王孫不養雞而鬪則從毛薛把臂爲豪舉耳。公生貴年十五封鎮國中尉受世祿顧瞻然不滓被服如儒生海內藏書家推江都葛氏章丘李氏公盡購得之起萬卷堂日誦誦其中居恒以道德爲膏梁以禮藝爲園圃一切芬華聲色之好視猶土苴也。則又曰疇復有裒輶經濟明習當世務如公者乎。嘉靖中大盜陷歸德掠諸邑兩河震恐中丞衡水楊公訪於公公借著圖方略調兵食已次第條上數事。楊公從其策賊遂平復懼株連者衆請楊公毋以大逆聞又從之所全活者幾萬人楊公悉公才可大用援祖訓薦於朝格不報中丞章公將改黃河偕公行視其可否公徐曰河鑿而南且入泗得無爲皇陵虞乎章公愕而止未幾河決將灌大梁章公督塞終日水益急公載縑錢牛酒往勞之因說以及水所未嚙闕地樹木捷土石築焉河立塞其他諸公過而抵掌促膝所裨益者固更僕未易詳矣則又曰疇復有躬躬自牧折節賢士大夫如公者乎公名益重遊道益廣座客常滿客擔簦造門率館穀之馮軾結駟過梁者必傾蓋造公其或未至亦千里定交竿牘問訊無虛日若歷下李于鱗吳郡王元美蜀張肖甫楚

吳尚卿越徐子與汝南張助甫皆操風雅權輿一世而皆與公稱莫逆相引重云則又曰疇復有循循善誘篤老不倦如公者乎初宗學建詔博求可爲宗人師表者中外咸推毅公遂拜宗正之命蓋又六年宗學成而公始視事念身爲大藩祭酒感奮圖報稱布功令嚴科條擇諸生秀敏者占一藝講授以時於是絃誦之聲徹於朱戶斷斷如也癸未夏宗祿之議起公議不合遂引疾乞休上以篤行博聞學畱之不允丙戌再覲申前請復勉畱不允公益感奮圖所爲報稱者而疾作矣病中猶強起著周乘訓勅門弟子如平時豈所謂任重道遠斃而後已者歟已復咨嗟歎曰天胡不憖遺令公百歲也蓋公旣寐嗜欲而又善養生家言丹顏黃髮人方望之如魯靈光巋然常存何論百歲也而今已矣則豈惟縉紳大夫士民哉蓋天下共惜之公所著經學有五經稽疑授經圖雜著則陂上集中州人物志忠臣烈女傳大明帝系周國世系遜國紀纂中州文獻志訓林河南通志周乘開封郡志共若干卷行於世卒之再踰年戊子冢嗣勤羹卜以十一月十一日葬公白塔之原業已乞衷公銘諸墓而屬余以隧道之石曰先志也

余既感公高誼、而重蒙嗣請、不可以譙謝辭。按狀、公字灌甫、學者稱西亭先生。晚築精舍城東陂上、又自號東陂居士、卽與呂仲木講易處也。父奉國將軍豫齊公同鎔、輔國父曰鎮國將軍子介、鎮國父曰鎮平恭靖王。恭靖王者、高皇帝孫、周定王少子也。蓋以文行嬗其家者數世、而大昌於公。配恭人梁氏、蘇氏、俱先公卒。繼李氏。丈夫子一、卽勤業、封輔國中尉、有父風。蘇恭人出。娶李氏、封宜人。女子二、長適金吾指揮袁學端、蚤卒。次瑒、孫男子一、朝越、未聘。孫女子一、許字劉耀祖。明興、周宗最盛、翩翩多文藻、若倡明經術者、自公始。稽古禮文、二百年而有宗學、膺其任者、亦自公始。乃譚者率謂公今之劉向、較其用、不用以爲恨。夫向誠用矣、顧其言枘鑿不相入、卒弗獲如公之爲宗正而坎塲竟其身。公則乘時受任、舉生平所蘊籍者、究宣之、而始終恩禮爲極備。向用而不能用、其言公不用而能行其學。人或知向用之爲不用、而未知公不用之爲用也。寧以此易彼哉。第易名之典、羣情若歆然望於太常者。夫謚法不有道德、博聞、勤學、好問、爲文者乎、又不有純行不爽、一德不懈、爲定、爲簡者乎。竊觀天子所褒嘉公者、非一、不

曰篤行博聞、則曰學行素優、在公爲不用之用、在天子爲不謚之謚。華袞一言、不朽千載矣。公卽弗百歲、何歎也。系以銘曰、大明中天、泱泱萬河、爲周賜履。爰有鎮平、世德作求、奕葉濟美。公乎嶽降、矯節樹惇、學探宛委、載道者經、異說焚如、經殘教弛。公折其衷、譬彼登岱、羣山崩施。帝選於衆、詢謀僉同、以教胄子。若金作冶、若器作型、譽髦多士、多士伊何、習易奇袤、文羞軌轍。狂瀾東奔、誰其挽之、繫公是恃。公曰老矣、乞臣之身、知足知止。帝曰休哉、汝子宗老、汝其疆起、偶罹霜露、何恙不瘳、忽焉脫躡。輟相罷春、人苟可贖、百身其以。公澤在後、公學在經、公行在史、誰能長生、死而不朽、是謂不死。溫明賻襚、題漆黃腸、哀榮終始。佳城鬱鬱、我碑其豐、詔千萬祀。

《國朝獻徵錄》卷一



明福建提刑按察司按察使胡公墓誌銘

公諱直字正甫學者宗之稱爲廬山先生胡之先衛國公贊繇金陵徙吉十三長霸居廬陵次貞季陽居泰和之南岡至屯田員外郎衍始著衍幾傳至大始徙今義和田幾傳至子忠忠子三長雅登明永樂丙戌進士季和和子四仲哲寶坻司訓有儒行是爲公高祖生爾極爾極生行恭號謙齋事行具宗伯歐陽文莊所爲誌子三伯即公父諱天鳳號晴岡以公貴贈刑部員外郎晴岡公故志學晚益篤信文成致知之宜語在公自撰世叙中配周氏封大安人以正德丁丑八月十六日生公公生而穎慧不群謙齋公心奇之亂齡即嫻古文詞年十六補邑庠弟子員嗣晴岡公即世家寔甚周安人抗節矯居公策策茹苦以養故負才不羈慕古孔文舉文信國之爲人詩文則欲與何信陽李北地方

而著論駁文成之學歐陽文莊公傳文成之學者倡道里中知公爲任道器要招之不往嘉靖壬寅始因友人固要往謁文莊一見喜曰子來何晚維時文莊與同志講論語惟仁人能好人能惡人謂惟仁者有生生之心見人善若己有之未嘗有作好意故能好人見人惡若殛在躬未嘗有作惡意故能惡人云公素性嫉惡嚴聆之惕然有省始執弟子禮顧任放習未格也文莊語以立志曰明三德於天下是古人爲學之志而其功在致良知又曰惟志真良知自無虧蔽處心契其語又一日文莊歌歎乃聲中萬古心之句豁然若覺而嚮往志益銳癸卯舉于鄉甲辰下第時自有多忿多慾好文詞之癖勉自克制而不能恒也飄然有遐舉離世興丁未因友人往訪羅文恭于石蓮洞居月餘時聞其歸寂言不甚契而日炙其精神日履衰有感發乃北面稟學焉戊申寓韶州因病問禪於鄧仲質爲休心息念之學久之有見喟然嘆曰宇宙

實卽吾心、天地萬物非外也。病由是愈。益究心出世之旨、日有所悟、而疑儒學有未盡。時晤越錢緒山、以所見就參之、無當也。既歸、念其父大事未竟、母大安人仰事不慊、意快二無以自遣。始隱二有儒釋旨歸之辨而未決。已酉與計偕、浮彭蠡、值風濤、舟幾覆、不動。自謂得禪定力、以質於文莊。文莊曰、可以爲難、仁体未也。臨危不動而又能措畫相援拯、乃可爲仁。公頷之時、亦未深契。庚戌、館興化、盡聞心齋先生之學、服其傑出、而獨恨其徒傳失真。癸丑又下第、同志從吏仰祿爲眷計、乃勉謁選、得教句曲。公時席出世見、而又負高氣、處上下多窒、每自疚。已因課博文約禮義、舍然思曰、此孔顏授受旨也。日夜默求、忽恍然有悟、遂著博約說。意謂儒先以窮物理爲博文、固非是近儒致知之說。承學者以知之變化圓融者當之、而不復知良知之有大則亦誤已。約禮云者、約諸吾心之大則也。且卽告顏子爲仁、而曰非禮勿視聽言動、蓋視聽

言動皆文也、而禮卽在其中、無內外無先後也。自是用力益密、酬世應感、咸得其理、而上下亦相安。始娶前聞文莊仁体之說爲確論。嗣以正之荆川唐公、大洲趙公、益自信。公之學至此蓋三變云。乙卯、聘授河南鄉試。丙辰成進士、初授比部主事。時三聯余暨江羅惟德、安成鄒繼甫輩、昕夕切劘、分誼卽昆弟不啻也。越己未、以秩滿得贖、父贈聞公爲員外郎、母周爲大安人。時分宜柄政、慕公名、欲羅致之、要招之飲、公胥以疾辭、因衛之。會予以職事疏、彈劾部事、語侵分宜、分宜疑出公謀、因出爲楚臬。余爭領湖北道、公過家、以博約旨質之羅文恭。文恭初未深領、旣在楚、文恭貽書曰、吾於子博約說洞然無疑、斯道其有與乎。所貴足自。辛酉秋、余被命廵西、是偕仲弟子庸晤於漢江之湄。時公學以無念爲宗、舉以叩余、弟子庸曰、吾學以不容已爲宗。公數頷之。語在余著漢詩訂宗紀。公治湖北、一以學爲政、典教章賢、有賦懲墨、有苗內



江漢張公伏青藜之伴。獲其衆。分宜子術公不置。漢楚兩臺。百計擄公。卒不可得。分宜敗。晉四川叅議擬疏解。新命。齊久任。秉政者格未上。乃如蜀。公治蜀。如治楚。創水利。復流民。授計討逆苗。此其勛之鉅者。是時蜀白蓮教煽起。孽黨幾遍三川。而上川一路獨寧。以其化教章而約法飭也。丙寅。簡晉本省督學副使。緝正學心法。以倡多士。要旨歸於求仁。蜀人士因有興起者。無何。念周大安人甚。遂疏病乞歸。侍大安人晨昏。暇則以樹人善俗爲己任。四方來學者益衆。隆慶己巳。與友人相期習靜山中。作閉關錄以自警。畧曰。近壯聞學。今踰艾矣。生平忿慾矜名諸病。今反觀尙未盡瘳。所以然者。猶是依違在形骸上。取滋味。而不信有不依形之天味也。向世界止爭勝負。而不信有不着世之天勝也。自今決志濯江漢。暴秋陽。無顛頃不與天游。庶幾實見性命。可以全歸。蓋自盟其獨如此。時興化李公柄政。而江陵張公。內江趙公俱在政府。

雅重公。而臺省薦剡且日。至于是詔起督楚學。至則寓書三公相規勉。大意李則進以任。張則進以仁。而趙則進以用易。三公俱報書謝。而趙公時以類直去國。特書咨嗟感嘆。謂蚤得公書。必不至悻。如是云。公教楚士。猶教蜀。著志訓。必必惇惇。期偕之道。不屑。校藝間也。庚午夏。期余晤于赤壁。因與連榻。其商証語在知命說中。維時已擬。內召。而新鄭秉銓。入奸俠謗。竟以常調晉廣西叅政府。江之役。公實畫之。萌連跡疑者。悉力爲白。所全活甚夥。萬曆癸酉。晉廣東按察使。監鄉試。錄多出其手。其年冬入覲。過家省大安人。病足。在第公勉就道。至臨江。憂思成病。遂懇疏乞養。時江陵柄政。因寓書規之。一曰正聖功。二曰豫人才。三曰培元氣。念雖坎。退不忍忘。國恩云。既得俞旨。歸侍大安人晨昏。不離側。丁丑。大安人病。公侍藥視洩溺。拊摩抑搔。不以假女奴。居喪始終情極哀。禮極易。既禫。建舍覺山下。群弟子紹脩孔業。相羊棧溪。武

燒之。周將終焉已矣。遇今上更張。獨意者碩而臺省薦剡。又曰至甲申冬。特詔起福建按察使。蓋以原官爲重用之階也。其時余亦起官內臺。從吏於中。而同志友羅惟德、鄒繼用俱以大義督趣於外。公不得已。勉入闕。還檄意明進退義耳。牒敷上兩臺。兩臺知上有嚮用意。不允。公日坐私署。猶披積牘。檢中法不應死者數獄。手署平反之。越月。夜夢至人引以至道中。有無欲濯濯秋風回首之語。曰余於人間世盡矣。翊日神色微變。門人在侍者問師何言。不答。家人請後命。不答。良久。顧曰。文公云一片若常存也。頃之僚貳錢勳兩公至。猶正襟端坐。張目舉手揖二公已。翛然而逝。已酉五月二十九日也。公性孝友。撫弟姪愛加于子。於師友無間。存歿隱顯。恩義篤至。加于天親。其至性天植而學宗盡性。故然與。公自有聞來。有鞭後錄。有補過日錄。辛未歲著困學日記。晝一念。夕一夢。少盤于道。即訟爲已過。密藉記以自箴。癸酉申之甲戌

文申之。歲壬午。又有功全錄。其要以盡性至命爲宗旨。以存神過化爲工夫。而以絕慮忘言爲補功。故曰功全。甲申歲。又爲文自矢。告天志益憤。詞益懇矣。其文與諸籍皆藏之中笥。即子弟門人鮮有窺者。逝後發笥。乃始得見。門人天官卽鄒元標。京兆理蕭元岡叙傳之。所著詩若文凡十數卷。門人學憲郭子章彙曰衡廬藏稿。業已梓傳於世。晚著大虛軒稿。求仁志而衡齊八篇則專明學的。以待後學者。琯珣王元美氏洪都張明成氏叙述之矣。配蕭安人生子一。卽順邑庠生。娶張氏。孫男四。長士統。聘符丞陳昌積孫女。次士紀。聘督府參軍尹重女。俱娶王出。次士經。聘蕭永業女。娶敖出。次士綸。聘鄉進士曠驥女。孫女二。長聘陳進士秉浩家男。次聘庠生蕭九韶家男。俱娶張出。順將以戊子某月某日薨。公子預所營吉水之龍家原。先是郭學憲自蜀以狀來徵銘。時順復走使趣之。余因檢公生平而涕泗橫下。不能禁已。蓋曰天地之所以不



幾而世之所以爲貴者。以斯道也。人參三才而爲天下萬世立心立命者。以躬斯道也。世囿於道而不知者。然藉聖賢之教以範圍之於道。固無患也。彼以知道自命。而故决裂播蕩焉者。是以道爲玩。而視天地民物爲不相涉。其自待亦薄矣。予取友海內。獨欽公之於道也。斤斤焉。屢三焉。如護拱壁。如肩鉅負。辨析於毫芒。而執二於屋漏。聞吾黨一言一行之不軌於道者。輒擠眉捧心。若衷蒙刺。若天方墜已。彼哆譚上乘法者。見以爲未達。或矜以爲鈍也。由余觀之。彼所自負而侈然謂有得者。公蚤已能及之。顧恒懷靡及。而不自以爲得也。乃公之日省時教。所謂忿忿矜名云者。故彼所時有。彼悍然安之。而公不肯自安也。至其敦倫盡分。是不可見。彼以爲情緣塵迹而已之。公則以是爲性。真不容已。不肯自己也。是故舅婉子厚之逝。禪而尤厘莊周之鞭後。悟堦敬仲之見大。而不忘闕道之告天。蓋誠見夫道通天地民物。而所以立心

立命者。若有所受。而不容諉。若有所督責。而不容一息懈已。於乎。斯其自待者。爲何如哉。余惟公終生屹三。畢志任道。其宦業文章。乃其餘也。故不具論。直據公所自述。困學記與全歸錄者。稍省徑之爲誌。而系以銘。

銘曰。困而學。考成功。一全以歸。考能事畢。力肩斯道。今始息。予擬所述。銘厥室。一言無慙。幽可質。後世有考焉。其在是。

耿定向撰 《耿天臺先生文集》卷二二

校記

①子子：當衍「子」字。

②天議：當作「大議」。

③父：當作「大父」，脫「大」字。

④文家：當作「文定」。按，即前所述張文定。



儒藏

明儒碑傳集 卷七三

明儒碑傳集卷七十四

梁汝元 鄧鶴

方興時

李恭懿

傅明應

楊豫孫

丁旦

史桂芳

里中三異傳 耿定向

嘉靖季里中有方山人已鄧僧來自蜀已梁狂至自吉寓余里皆踰年所跡其行事大都與庸衆人異語曰光黃之間多異人其然乎異矣傳審異所以致同也梁也孔慕而佚行吾哀其志方也主修而禮遜吾惜其姿鄧也釋崇而言穢吾憫其陷而離也是皆可監已故傳之楊子云妄譽近鄉愿妄毀近鄉訕吾於人也誰毀誰譽哉茲傳三子也時若三子臨之在傍者噫嘻假佩纁綬子卒成上賢得所託爾藉令三子幸取裁於尼父寧至是乎念及此怛然內疚矣

何狂者姓梁名汝元後自變易姓名為何心隱余憊其行不中而悲其志故稱曰何狂云狂蓋吉州永豐右族也家累萬金族衆數十指少補邑庠弟子員從永新顏

鈞游與聞泰州王心齊立本指悅之遂亢然思自樹時吉州三四大老方以學顯於時狂倚知見威狎侮之獨脉脉心欽鄧文莊曰此孔氏胚胎也意謂大學先齊家乃構萃和堂以合族而躬總一族之政聯族諸子姓督課之為一家學凡徭賦緡錢時斂而輸之公不給者代為輸薄息而緩其償一歲邑下令督征狂謂中有非正供者抗弗輸為書抵令令怒以狀白當道當道故夙有聞也趙捕逮下獄擬遣時制府績溪胡公宗憲經略浙直孝感程學顏氏在幕用事說之撤江省撫臺安陸何公因得脫狂居幕踰年胡公語人曰斯人無所用用在左右能令人神王耳狂沾沾自喜謂胡公善用已也嗣程君陞同丞狂從之來孝感與方山人會礦山語具方山人傳中程君北狂與居嘉靖庚申歲也余時官北臺狂匿程君邸即同里士紳避不見聞從北部羅汝芳氏游余故與程羅兩君交善時相往反因語之聆其言貌若癡狂然聞出語有中吾表者時張江陵為少司成予



翠之城東僧舍與晤。狂俯首凝睇、目江陵曰、公居大學、知大學道乎。江陵為弗聞者、游目而攝之曰、爾意時時欲飛、却飛不起也。江陵別去、狂嗒然若喪、曰、夫夫也、吾目所不及多見、異日必當國、殺我者必夫也。吾黨學移別掉、不則當北面矣。比部主政錢同文者、日與游最昵。錢故不飲、一夕與語有契、歡傾一巨卮、至謂父母可無、斯人不可無云。無何、程同丞卒於京邸、予有西夏之命、狂移館別邸、從之游者、諸方技及無賴游食者咸集焉。余頻行、謂之曰、子慎所與哉。應曰、萬物皆備於我、我何擇焉。尋分宜子為言官論敗、或曰狂有力焉。蓋嘗授為冀丞者以密計、因達宸聰也。其黨因張之士紳中有遭抑而覲重用者、傾貲授室、館穀其徒、藉之運奇通奧、援禍蓋孕於此矣。既同丞喪歸、狂附舟往過白下、以刺授何少司寇。何公故前為脫難者、噪狂刺不恭、麾之不見、狂遂遁。巡城臺吏捕逮其徒董姓者、甘心杖斃以衛狂、狂乃得潛依錢主政游、閱粵間。壬戌冬、予赴南畿督學、

過之潯陽江中。予責錢奉命慮囚、出不報命、而為狂所誘遊方外、大不恪、趨令絕之北上。錢時唯唯、授予、而仍與偕遊、踰年始至北都。書來托予為援狂、予乃為轉心、文招之意、其格而易行也。狂一夕潛入予署、予謂之曰、惜哉、子懷此志而行若此、死矣夫。他日予第繞而墳而三號、哀子志也。居頃之、狂見吾門徒諸不悅、一夕復遁去。從此依錢東萊、或依同丞弟程學博氏重慶。已在越中、館沈茂材。沈為子訟誣及之、乃復還居孝感。隆慶壬申、程學博士挈之來、我仲子詰之曰、子毀家忘軀、意欲何如。曰、姚江始闢良知指、眼開矣而未有身也。泰州闢立本指、知尊身矣而未有家也。茲欲聚友以成孔氏家云。仲子曰、成家欲何如。狂云云。仲曰、嘻、道二、仁與不仁而已矣。孔氏求仁、子不仁、以若所為求若所欲、豈直緣木求魚哉。後災且不免矣。辭之去。余尋起符丞北上、狂居孝感。撫臺長樂陳公初聞人言有狂在、將檄下捕逮其徒、檢所嘗與士紳往復書、舍之。且寓書於余曰、初不

知為志學人也。予報書悉其素如是，而中辨其學術蓋所謂差毫釐而謬千里者。如人所言有託則重誣也。時有媚嫉予者，中于政府曰：「陳公捕治某已得，某乃以情囑而庇之。」故又以書恐陳公曰：「政府討公，拘人舉義不終也。」陳公大惶恐，亟更檄捕令益峻，乃執之新安，械繫入楚。安陸人乘而文致其事，會新城王公繼陳公來撫楚，初不詳其始末也。走書關中詢余，余即錄前報陳公書報之，且寓書李司空託為解。司空報曰：「政府左右且藉此中公也。」公益從井救人。狂以是竟斃楚獄，無救收者。瘞之會城堙，踰年，余屬其徒取其骸歸孝感，與程問丞合殯焉。因其志也。而為文以招魂，略曰：「決命捐生，汝何營？摸孔陳迹，失孔真。孔門宗旨曰求仁，蹈仁而死，未前聞。仁與不仁幾微分，吾昔與子曾極論。子既去余，余又移汝轉心文。汝心匪石，何弗後。塵埃識相汝何明，胡珠照乘不照身。傾萬金之產了不惜，犯三公之怒以為欣。庸言庸行，孔訓靡遵。舍南容，效彌衡，鶯斯之黨又

頻頻，眾惡歸汝。汝何云？憶昔與子久要言，子卒死兮哭汝墳。念子無歸，傷我神。惟子雄心雖九死，其不泯。爾憶予言，尚自新。魂兮歸來，寧為壁為祥雲，毋寧為厲為妖氛。云。天臺病叟曰：「泰州立本說，緊豈非孔氏指哉？惟孔氏立天下之大本者，無所倚而肫肫仁也。是故淵淵浩浩若斯已。狂以意識承之，不免於刑戮，有以也。然則狂可殺與？」曰：「高皇有異訓在，惜時不執此，正其罪以明學也。噫！志學孔者，幾微之差，且至於此。況志異學者乎？余懼學者不辨之早，至自殺且殺天下，故為之傳而附及鄧僧、方山人。嘗惟處其厚不處其薄，山人度猶龍斯指矣。鄧僧見謂先天與後天不相聯屬，豈大雄氏不二法門哉？傳之亦為學二氏者鑒也。」

鄧豁渠者，蜀之內江右族也，名鶴。少補邑庠弟子員，屢試列高等。初聞里中大洲先生談學，心厭之。已漸有入，則時時從之遊，即大洲家衆峻拒之，勿為阻。其家故去邑城三里而近，居常寓一蕭寺中，時往來邑城就大洲



問學、道經家門過不入。兒女子或見邀之、牽裾呱呱啼、勿顧也。時父年七十餘在堂、室有女踰笄未嫁、又有祖喪未舉、皆不顧。一旦髡髮遊方外、父尋喪、亦不奔。大洲重以為恨、為詩書諸名山招之、不至。慕余仲來余里、時年幾七十矣。仲館之高荀塘寺、屬友人劉姓者、昕夕騰之。劉事之惟謹、不當意、而昵里中一孩童祝姓者、欲集皆為孩童輸粟為從事、卒為孩童欺取其貲而叛。乃其子聞闕萬里來省、見即撫訶、居一二宿即斥遣之。時余督學南中、巡部遇是子于鳳陽道中、泣懇如此。余哀而斥康稍資之歸。鶴尋北遊衛輝、時其宗人為郡司理、因依之。適大洲起官過衛輝、渠出郊迎。大洲遙望見驚異、已識之下、與把手、徒行數十里、彼此潸然流涕。大洲且泣且痛、自悔責曰、誤子者余也。余學徒見過高、致子於此、吾罪業重矣。向以子為死、墮此大罪惡為不可改。今子幸尚在、可亟歸、廬而父墓側、終身以補前愆。吾割田租百石贍子。即作券給之。於時中州數孝廉來就大洲問

學、大洲令鄧與答問。大洲聆已、大恚曰、吾藉是試子、近詰何如。時聆子言論、乃荒謬一至是耶。夫以顏子之質、其學惟曰有不善未嘗不知、知之未嘗復行如此、奈何為此虛罔語、誤已誤人耶。重嘆息而去。大洲既入京、宗人尋以外艱歸、渠封還田券不歸、而復遊齊魯間。嗣大洲入相、乃來京候謁、大洲拒不容見、而心故又憐之、斥俸十金、屬里中一仕宦者携之歸。仕宦者携至涿州、渠病作、而仕宦者急於赴任、棄之去、竟死野寺中、無所殯云。余過涿、令人訪其遺骸、不可得矣。耿子曰、鄧鶴寓吾里時、曾集其言論、名曰南詢錄。中言色欲性也、見境不能不動、既動不能不為。羞而不敢言、畏而不乾、為者皆不見性云云。余覽此、甚惡之、曰是率天下人類而為禽獸也。渠後寓通州、屬其徒刻傳之、中無此一段語、毋亦渠自不得於心、削去之耶。近麻城令即衛輝司理子、亦大洲門人也、嘗從余遊、為述其始終如此。予惟此老敗缺處、稍有識者、肯能明之、顧其捐身

忘親陷溺若此。所入者何因。所為者何事。所成者何果。至所以迷蔽若此者。其興微之差。必有所在矣。昔孟子自任知言。蓋知所自生於心。而究竟其所終也。予覽大洲與吾友胡正甫書。深討其自負張皇。輕侮前訓。墮罪業而不覺云云。其師門亦已重斥之矣。吾黨尚多惑之。豈不誤哉。

方山人黃陂人也。名一麟。後更與時。自號湛一。嘉靖間弱冠為諸生。初婚。不安其室。託遊方外。潛走太和山之陰。習攝心術。岩居數年。其父兄莫知所在也。山人故英標雅質。靜久稍稍發慧。時毗陵唐公養晦在里。負世重名。山人特往從之遊。一見奇之。唐公方銳志用世。時苦倭患。言兵事。而山人兼嫻武技。益奇焉。于時吉州羅先生姚江王先生因皆與之遊。二先生誘之歸聖學。山人時斤斤檢飭。即一茶一扇。餽遺亦不苟受也。一日謂二先生曰。吾儕方外學。亦有秘訣。待人而傳。談聖學何容易耶。羅先生因密叩之。山人自負得息心訣。謂學聖者亦

須靜中恍見端倪始得。羅先生然之。偕約之入山習靜。吉州諸長者咸尼。羅先生不聽。遂與王先生偕至山人里居。頃之。王先生先辭歸。羅先生獨留棲道明山中。短榻夜坐。踰時。論山人無所得。憤悔至發疽。無恙乃還。既還。其夫人又殂。不及訣。以是心益恨山人。山人尋趨吉州謁先生。先生拒之峻。山人出索金若干跪請。願築室受業終身。先生以為害已也。叱遣焉。山人邑邑不得意歸。歸時予適訪山人。觀其親羣書盈床。意將以博綜為業者。一歲孝感程太僕。偕永豐梁子期會礦山。聯轡數百騎來。山人以兩僮舁一籃與往。甫揖。梁把山人袂曰。假我百金。餒山人曰。唯唯。即千金如命。程、梁二君觀其色詞閑雅。心欽之。遂與款語。說之以所學術。于上云。異日有過。羅公當拜下風也。山人由是漸易夙操。扶重臂為薊北遊。至雲中。依李制府。娶二姬。余時官內臺。山人書來言欲入京。予報曰。翔而後集。慎哉。時都門二三老陰招之。山人遂入京。寓廣慧寺。予就密室叩之。山人曰。予茲



行志將納約耳。即得卷過如此。敝納進。亦以此敝納進。紫貴非吾願也。予曰。唯唯。顧子所積蓄。欲陳於上前者。何先。山人盡表以告。皆儒生常談。余哂曰。主上明聖。如子所欲陳者。耳熟稔矣。子志雖大。其所欲勅者。無當也。子其休哉。時都門名公亦多與往還。張江陵謂余曰。昨晤山人。視其神情。中若有所為者。機達於目矣。子以其意告。江陵曰。方生此鼓。從此槌破矣。尋嚴分宜任子。聞其有黃白術。欲給之扶脯。李宗伯知其情。密以告子。子乃促山人亟避之。會予有巡西夏命。因挈之歸。行間一日。山人謂予曰。吾從此息機志學已。願學以何為宗。予曰。與友朋披赤剖心可矣。山人曰。吾志欲以明先天為宗。如何。予曰。披赤剖心。即先天也。山人惟時若亦易志為學。而多機。予故說之如此。既歸。而先所出妻家訟之。郡。郡守持之。而拘辱其伯兄。予便為解。乃免。山人為此。滋不得意。復出遊。汴洛邯鄲間。流言籍籍起。仲諭之。銷聲息影也。諸兄懼。乃強招之歸。予尋周。

告在里人于白雲山中築室下帷。且孜孜為導鄉善俗事。隆慶中。羅先生門人胡廬山氏督楚學。咎山人往。迂其師也。檄下有司捕治。業就逮。山人以計脫走。予寓書為解。意曰。昔山人之招致爾師於里也。率其父兄弟侄嚴事之。其家遂益勉于為善。樂施好義。家聲為之一振。予謂山人只此是其拔宅飛昇。而嘆服羅先生有過化功。山人故未逞而師。師亦非為山人迂者。學使不然。捕之急。山人遂走。附俠黨邵義。受知高靳鄭。且誤疑胡公之事。由于因於靳鄭所構。予謂予潛乘小艇走雲間。從史徐文貞謀復起也。靳鄭怒。遂矯旨特察諸臺諫。覓予橫州。余笑曰。不意鄉里後生亦能為崇如此。若為勿聞也者。靳鄭特疏欲用山人。不果。無何。今上改元。靳鄭罷相。邵義亦誅。山人踉蹌走匿太和山。循君山中。居無何。病瘵歸。歸而死。年甫四紀耳。疾之者疑其畏罪托焉。而夙奇之者。猶紛紛謂其得服食不死也。亦可姍笑哉。昔山人之出遊。假其資於季父者。累千未償。及病革時。

乃手撫中筭曰平生苦心所得惟此。蓋以所錄丹方與鉛汞餘餌膏季父也。其家素孝友。乃為此鬭爭。與至相夷。余為解曰。丹能長生。山人當不死矣。黃金可成。渠又何假而貨哉。山人多以此惑世士紳。世士紳往往為所惑。尤可惻笑哉。天臺病叟曰。嗟嗟。世之贊毀。亦何常之有。初山人一出而士紳相艷奇。以為子房長源復生。譽何溢也。及行敗身沒。世遂被以大不韙名。禍延家門。至形諸志載。抑何慘與。余去山人居僅五里許。計其始終事行。知之頗悉。惟山人故富室。養子也。一旦脫屣世界。兀然巖栖者累年。斯不亦飄然風塵外哉。彼其時以神情見賞識諸名公。非偶也。顧諸名公始則獎與太過。以滋溢其名根。而後復推抑已甚。挺之走險。以致墮墜如此。假令羅先生始聽其築室。山人或亦終身善士。既而胡學使不有以激之。亦當勉老里中一學究。曷至若是狼狽乎。雖然。使山人始出。即遇世廟。亦陶仲文等耳。安免遺詔之辟。晚即大用于高相。當與邵義諸俠駢首圓

牆中。安能全要領牖下哉。以是識世之讚毀得失。其禍福倚伏。不可知也。顧予撫茲宇下小子。以彼其資。知慧方啟。而使之向往無路。未知所裁。語曰。範圍而不過。曲成而不遺。余因有重惡矣。

《明文海》卷三九九

江西奉新縣縣丞李恭懿先生傳 張佳胤

恭懿先生沒。余守官。不得啟手足為訣。既殯。請舒太守所為誌。言先生家世行履甚備。先生愛門下士。惟余門下士知先生者亦惟余。每退食則記憶先生言行。皆誌所不載者。不可不傳。先生卜築別業東郭外。層岡翠柏。油然若雲。先生讀書其中。人稱為柏山先生云。先生上世俱隱。據負郭膏腴。相繼以貲。東自贍給。然未有以經學起家者。先生生而質靈明。自少寡言笑。簡重類大人長者。遇圖籍輒手之。不成誦不休。稍壯。治周易。余邑風號文獻。取科第者多以四經顯。而易學未行。時有老生趙某者。方以易教授國中弟子。先生師事之。老生故依



儒有私錄經解、不知傳何物學究、日夜局錮筭中如寶、諸生非厚利不得視。先生一日竊觀之、掩口笑曰、此物可覆瓿、且不能辱主司一盼、何云說義皇耶。乃究意圖學、務在自得聖賢之旨、一切糟粕筌蹄、僅資涉獵、非所嗜也。先生學既充粹、文日益有名、每試必高等、竟困於有司。先生一無愠色。嘉靖戊申、貢入太學、文學斐然、冠四方之士。餘姚李司成大器之、應順天鄉試、又不第、竟謁選授江西奉新縣縣丞。先生不喜操切、務以德拊循其民。奉新人狡悍、見先生仁廉、諸所供應夫馬、故慢命以累先生。先生捐俸為之、不足則倒囊中物、以此先生官愈貧也。後罷政歸、日掃榻讀書、內外弟子橫經問難、洋洋乎巴水之上。先生好深沉之思、平居不言人過、不妄取與、而惡惡甚嚴、人無敢犯。且絕跡公府。先生嘗對弟子談舉業甚精、故門人多高第者。至讀書不求章句、亦未嘗輕與人言。余自滇督學歸里中數月、每暇造先生廬、嘗謂余曰、易學久晦、坊肆中所售者尤可憎厭。與

諸弟子言、又非舉業所宜。因問余曰、六十四卦、始於何時。余曰、文王重之。先生曰、非也。觀繫辭取諸渙等卦、則三皇堯舜時事。書言龜筮協從、則唐虞時事。則六十四卦、上古已然矣。又曰、伏羲八卦非盡取於河圖、觀繫辭言仰觀象於天、諸句及天生神物諸句、亦自可見。又曰、先天南乾北坤、後天何不代之長男女、而南離北坎耶。此大道之玄、老易所同。又曰、古人釋經不敢自信、故傳不與經相參。小象原自為類、試讀之無不叶韻。至後人始分經傳、故宋人俞琰集說不為無見。若使易無序卦傳、不知後人將六十四卦顛鑿何狀矣。又曰、原始反終、故知生死之說與無極而太極同一意。無極云者、從前推後、原始云者、由後遡前。又曰、讀乾之象、見文王興周之德。讀坤之象、見文王事殷之心。余每聽先生言、輒聳然悟、以為今之儒者莫之先也。嗟乎、先生官不滿百石、官囊僅十餘金、滿然物表、潛心至理、先生洵有道人也。余既率同列做古議謚事、謚先生為恭懿、再舉先生平

日言行所未播人耳目者、使史氏採焉。若先生家世及子姓男女、語在誌中。論曰、先生食天之報、是耶非耶。始先生窮經好修、不能博一第、惑矣。已而領一丞、功德甚著、卒不得陟明焉、惑又甚矣。然先生嘉言善行、垂憲罔極、巴川之士人人能道之、先生可以不朽矣。諺曰、桃李不言、下自成蹊。先生無求於天下後世、而名與天壤俱、由是言之、天道於先生豈無意哉。

《明文海》卷三九八

愚齋傅先生墓誌銘 鄧元錫

昔孔門七十子之倫、通四教六藝者至衆、而獨稱顏回為庶幾、決克復歸仁於一日、喟然之嘆、蓋其覺也。然且終日不違、如愚若虛、以默成乎德行。宋濂溪周子以無欲標聖之的、程伯子妙齡指掌、躍然於吾與點也之意、而敬正涵養、渾然元氣一會於天成、蓋闇然之章上達天德、能有造者鮮矣。邇江門稽山之學興、天下學士無慮言證悟求、其默識默成、居安深詣如愚齋先生傳君、

余及見一人而已。先生名明應、字國卿、筠高安菱湖里人也。其先出清江、自遠祖君志始徙居菱湖。傳十一世而祖以明遠水東之蓮花山、大父埴又卜居珠浦。埴生義泉翁維孟、先生父也。先生生有至性。始學時、郡學博樂昌鄧公與吉水七泉周公講稽山之學於筠。筠士未有應者、先生携從父弟菱湖君賓應造焉。二公日默對無啟告、而先生津津有入也已。教之修念內觀。一日游城閭、體呈露、隱語友人、友人以謂鄧公。鄧公召問之、先生面發赤、背汗浹、而內省愈深。然念擴益進、欲汰愈生、慙克力至、體為羸瘠、而未有以得也。於是與賓應走匡廬、入鹿洞、即三賢祠棲焉。已果有所遇、澄心危坐、竟旬日而釋然於諸欲無欲、諸念無念、諸境無境、本心之體洞然也。萬膠冰泮、學覺超於無為。於是命侍子具浴、心閉目朗、諸觸處熾然如有光、自是精神以明。其言曰、嗜慾叢中、纏縛窠裡。惺惺者予、普還厥理。神明神明、倏其予啟。自茲內忘、并忘其體。一氣氤氲、歸於太始。又曰、



元氣未復、病於夏畦。元氣既復、泳於淵魚。藏焉息焉、允握乎元樞。修焉游焉、將元化之與舒。蓋自其始覺而篤信不惑已如此。於是歸與新喻簡君守貞、上高李君應時、謀君悅日、漸磨於學、忘饑寒暑雨、靡昕夕、怡愉以懌也。愈久愈質、閑邪若臨、守真如保、而居愚用晦。走桐江、石蓮、謁東廓、念菴二先生、從學焉、而其造愈淵。其言曰：不求人知而求獨知、是謂真知。不求獨知而求人知、是謂無知。又曰：皇天降命、纖穢不入。一念惡戚然、如斧斤之伐心。一念私照、如鬼狐之奪魄。蓋翼保純至又如此。心不二於一、故諸念不擾。事不迫於阻、故履險不驚。言不離於幾、故動人者微而觸焉者立解。其貌翼然、其氣冲然、望之儼然、即之溫然。見眉宇者、咸知其為有道之氣象然也。其言曰：體莊氣和、心正可知。心焉不正、氣體必移。是知直內方外、如明之與照、融融液液、何內外之可岐耶。先生於所性洞然徹視無間、以為此形上之體、乃天命人心之本、當深養完復、求為無忝。諸日用應感

與百年事業、獨當素位盡分、因物循則、順而應之、於此體無涉也。故不大事功、不矜智能、淡然內足、無後餘羨。雖文章功業、仙舉禪乘、世賢智之士希慕期冀、以為不可必得者、而先生介然無所動於中。乃世人得喪毀譽、用舍屈伸、死生壽夭、視之如蚊虻之過前、泊然無有也。其言曰：此理坦然、百姓日用、但明此盡此、即無近非遠、無動非神。又曰：吾人處世、盡道俟命、如舟行江湖、載滿矣、需風為行止。又嘗言：世有大人先生、諸皆明了、獨叩以欲根、未有不慙然失者、蓋達者鮮也。嗚呼、微矣。先生自弱冠造體守、不離於宗者三十年、有學造而無回易、有完養而無操舍、故氣習渣滓、日有澄汰、而冰泮霧釋、莫知誰之所為。病亟時、淹奔床褥、百楚備嘗、而靜正不亂、整衣冠以逝。所謂涵泳從容、未嘗着纖毫人力、而生平全力盡在是也。先生孝友成性、義泉翁客滇南、母歐陽孺人疾不能興、日夜侍、愛敬悃悃。時年十五、未學也。歐陽孺人命之學、於是湯藥外、日手經揭側、劬於學。義

泉翁還自澳、歐孺人沒、事繼母、集於歐孺人無間也、內外以曾閔稱。葉孺人沒、義泉翁手書訃曰、而母以某月日傾背、臨終獨言無以報若恩。蓋慈孝之感、至於此。伯兄早逝、撫二孤不啻己子。事仲兄友恭篤洽、於羣從兄弟子姓、驩如也。身任其經紀、護翼之勞、衆倚怙焉。倡構家祠、祀菱湖始祖以合族、乃羣應如響。先生戒勿亟、而衆益悉力自奮也。祠成、以其餘買田、為祀先贍族費、而灌薦瘞餒、畢申訓比、禮可觀矣。處家靜而理、馭童僕肅而恩、遇強暴格而化。家故貧、然持身冰玉、嶢然無濡染、而於人最恩。姍成有婚喪、未嘗以貧病故不周於禮也。有友人喪京邸、殫心力經緯歸其喪。諸事關郡邑利害、風俗隆污者、幾可反、必悉力圖之。其求友汲汲如饑渴、所與居分更漏切琢不厭。即造次旅泊、拉同志交臂、虛心求益、不是己見、人有片善、欣然樂取。心所欲、勿以施之人。故動之而從、率之而風、訓之而興起者、泯泯也。故生而無賢愚咸親之、病而無內外踈戚集禱之、歿而

無貴賤上下畢哀之、蓋微者遠矣。嘉靖戊午、舉江西鄉薦第三人。入宴日、御史徐公執手太息曰、余出京至張灣、業已聞君名、今幸薦君、得藉手報國矣。試南宮、屢絀。戊辰、以父老將需一官為養、會得葉孺人訃、奔歸。已又有義泉翁之喪、喪莫毀頓。是年有詔舉郡國鄉科、以次有文學行誼者、都御史劉公筠守鄧公以先生應詔。事且上、而先生疾不起矣。配教氏子二、長士簡、娶新喻簡氏。季士約、聘李氏女。適新喻簡應麟。孫女一。生正德庚辰正月廿一日。沒隆慶己巳十月十有八日。年適五十。其嗚呼哀哉。吾盱距筠七百里、壬戌始構見先生於京邸、莫逆也。比再見益親。與陳君省齋共眠食、砥益者三閱月。始聞變、即日走菱湖哭馬、會先生有治命遺訃矣。明年、士簡會從弟君狀來請銘。竊自念先生於予、子翼乎化、保危解厄、德不後師保、而讓善推能、咸受異與、蓋相視如一人。此其誼至深、顧安所得辭。惟是先生終生隱約、又鮮所論著、世未之或知。其德行純懿、造詣精一、非深

於道而通知其所存者、又未易及知也、顧又安能言。然中心怛怛、竟不容於辭避為也、益難言難言矣。為著論曰、先生始悟近陳公甫、持養如李愿中、悟而不肆、養而不迫、中和具體、漸於程伯子矣。而國博文君似韓天、詩直以為貧如顏樂、虛無不校云。系之銘曰、於維先生、有覺淵淵、敬修乾乾、將予溫之、肅穆密綿、履常立中、有哉不偏、劉彥修有言、韓子云、軻死無傳、殆不其然。華門圭竇中、默契聖心、如面承傳、亦何代無旂、重其然矣。

《明文海》卷四四五

會都御史楊

楊豫孫字幼殷、華亭人、嘉靖中、舉鄉試、授縣令、性端嚴沈毅、明於理學、即私居無燕樂之容、與人交、傾肺腑相示、而尤好稱引善類。年十七、舉應天丁酉鄉試、登丁未進士、釋褐南京吏部考功司主事、陞禮部祠祭司員外郎、中、陞福建監軍道、副使、改湖廣提學副使、能正己率人、望之儼然。諸生自考校外、不輕交一語。尋陞河南參政、召入為太僕寺少卿。未幾、改太常寺少卿、提督四夷館。時華亭公當國、引豫孫自輔、凡海內人物與國家典章、悉諮而後行。由是士大夫欲求知華亭公者、日輻輳其門。豫孫遜謝之、終不能遣、乃力求出、遂擢會都御史、巡撫湖廣。豫孫練達政務、諳識人情、案牘剖決如流、日坐鎮雅俗而已。接下官勤款有禮、吏犯小過、輒以好言勸諭之、不欲為求濕毛鷲之令、人皆愛而憚之。貽年、地方稱無事。以病卒。官遣命家人無受賄賂、以免我平生。其後上下諸司有所饋遺、悉卻不受。其守已峻潔、至死不渝。如此。所著有經史譜遺二卷、成史若干卷、文集若干卷。

《國朝獻徵錄》卷六〇



儒藏

丁別駕旦傳

滄園集

余師天臺耿先生督學南畿以正學風士類其文行異等者不以夷之儔伍中命有司以禮敦聘入試時楊君希淳詹君應麟郭君忠信王君敬臣輩不過五六人貴池丁君旦其一也君字惟寅別號海陽父黽母王生于五人季爲君生而穎異氣骨朗峻音吐如鐘髫髻中動應繩墨斷不可犯而事父兄則雍雍如也怡怡如也惟謹少長昕夕承兩老人懽婚嫁喪葬一切倚辦焉孝友之聲譁於一時聞鄉先正李古源有賢行爲啓以贊終身師事之尋師於鄉東廓王龍溪錢緒山歐陽南野諸先生所聞益淵博遠近之士負笈從遊者不可縷數君一以師友所講釋轉相授受大江以南蓋靡不知丁先生者監司守令屢相接於戶君談學論政隨機以應至孝子貞婦沈於下里者力請表章之小民冤抑不能自白語次間爲伸理不令其知也間有知而懷金謝者斥去之甚衆隆慶改元詔舉恩貢當屬君君輒避於姑孰以免久之當歲貢上矣復讓之徐宗梓而以身後之其恬於進取類此君雖貧士而扶顛振乏每傾困不恤如殯逆旅劉生及銅陵吳生其著者也歲壬午始以明經授湖

廣衡州府別駕君不以一官自菲薄位其守與義倉修社學諸剔故釐奸者甚具亡何督儲之會城監武林業勞瘁甚而又冒風霰省天臺師於黃安山中苦寒疾抵任而卒得年六十有四貧無以殯衡人甚悲之君學於洙泗濂洛以下鮮所不窺薄神情妙傳獨得之東越與西楚爲多居恒手不去丹墨燕閒之暇動必成書其淵源模範不怠羹牆曰思師錄溫國既老同氣彌敦曰恭友錄政有三要語具箴規曰名相行略臺省寶鑑守令寶鑑諸論學雜著詩文藏於家者又數十卷嘗作逐虎文虎屏跡作禱雨文雨立澍作驅山鬼賦鬼嘯聲遂絕此有貴於文者詞藻可無論已君氣岸絕出有不可干之勢而禮讓則如慢如僞退然不敢先見義如責育之不可奪而處父師間然如一無能解之人談玄析義霏玉灑灑而行事縝密一無可指議所稱鄉先正歿而可祭於社者君是也子紹輅紹軾紹輅紹輅紹軾舉進士爲翰林檢討收拾遺文略無放失而謂余素與君善屬爲傳嗚呼君於是爲有子矣

亞中大夫兩浙都轉運鹽使司運使惺堂史
先生暨配安人沈氏合葬墓志銘

聖人顯道而不墮於無、神德行而不涉於有、非可
道器分也、但一寓於器、則階循等歷、必有據而可
守、見於魯論者、班班可睹已、學者道之未明、而務
擺落古人之形跡、將蕩然無復可守之矩度、而反
爲浮誕情縱者之所托、非先生以身維之、寧知其
敝之所底哉、先生得年八十有一、以萬曆戊戌五
月廿有四日終于正寢、明年十月七日子書言等
將葬於利陽鎮之白石塢、以元配沈安人附焉、於
是持諸門人所排纘事行屬余爲志銘、余不敢忘
先生、又曷敢辭、先生諱桂芳、字景實、學者稱惺堂
先生、爲人風骨嶢巖、嶺嶺如教、望之廩廩不可犯、
先是嶺表鄧公德昌、陳白沙公弟子也、以其學授
傅公明應、先生讀書鹿洞、傅一見奇之、曰、子無第
豪舉、爲聖門有正學、可勉也、手書古格言以勗、先
生慊然異其言、益嚮學之意自此始、嘉靖癸丑、舉
進士、交於羅惟德、耿在倫兩先生、而於欽又與錢

公同文爲寮、講於學者日力、在留都六載、時譚者
以解悟相高、先生取行其所知而止、不輕信也、性
嚴重苦確、壹意內修、而於成就人材、則疊疊無少
勌、久之爲守、羣郡士民而造之、旌別淑慝、具有法
程、盜魁四十有八人咸自歸爲善士、晚罷官、巖居
監司、二千石延爲闔郡師、多士聞風響臻、一時爲
盛、余所知如李君曉、夏君子羽、康君靖、潘君士藻、
祝君世祿、陳君之可、嚴君而泰、陳君嘉訓、其最著
者也、當是時、儒者立、貪者廉、顯蒙者達、其爲法嚴
而信、爲道久而尊、嗚呼、盛矣、先生學以知耻爲端、
以改過遷善爲實、以親師取友爲欣助、若夫挾隱
造微、則俟人之自得、不數數然也、卒能抗橫流、衛
正學、令人不蹈於空虛、而卓然知行誼之可貴、其
功詎不大哉、先生起家欽縣令、徵爲南刑部主事、
晉郎中、出知延平府、以憂歸、再補汝寧、遷兩浙鹽
運司運使、以歸、所至省征徭、崇孝義、正風俗、鋤姦
貪、權貴者謂其矯激、而士庶悅其真、忤橫者憚其
檢柙、而善良豪其惠、因循者難其尅苦、而賢豪嘉



其志先後兩見論斤皆要人所嗾方其氣勢赫赫先生視之若無視守已捍民峻拒其求旁側爲之股栗先生自如也語載譜狀表傳中不具論先世系出溧陽侯崇徙餘干再徙鄱陽考諱某邑諸生以先生貴贈某官妣章氏贈安人配安人沈氏繼鄭氏皆有賢行以助成先生之學爲多子書言娶劉氏書褒娶羅氏孫稽古貢士華亭縣丞采古和古秩古稼古乘古孫女四曾孫祝男祝壽祝富祝冊祝祚祝萬祝永祝社祝華婚娶皆士族憶余弱冠未知所嚮往先生不難折節下之始以程秬相梯接耳已而意其無迂也乃徐引之學卽今稍知自立非先生其疇開之故追師先生而竊附於門下士以此銘曰

允矣先生文儒申申孰知其勇超育邁賁人以勢怵我操彌篤人以利回我白不辱權姦剥下虓虎不如守道捍民莫卹其軀信信宵人好佞醜正出力以濟大用弗竟位則有制道不可窮授老於家四方嚮風匪直也士上下是咨有直有曲繩之墨

之華繁實寡錄聖不作一奮自躬示以矩矱事功之盛眎世行藏學由乎已久乃益光石塢長歸有嘉者偶銘以昭之千載不朽

無銘撰（無氏續圖集）卷三

明儒碑傳集卷七十五

耿定向 徐渭 殷士儋

黃德大夫正治上卿總督倉場戶部尚書贈太子少保諡恭簡天臺耿先生行狀

先生姓耿氏諱定向字在倫楚黃州麻城縣人先世於春秋爲國姓至漢大顯封侯將相者不下數十輩後子孫散處江汝間元季兵亂有均用公者負奇氣率里中豪據險自保尋受朝命爲鎮撫鎮撫公生國寶高皇帝起淮甸國寶公攜次子必安杖劍從之必安公以功授濟陽衛千戶而長子必順率母周自光山遷麻城之太平里家焉傳五世爲鳴甫公大振生靜庵公金娶於秦而舉先生及仲子定理叔子今南京都察院右副都御史定力季定裕鳴甫公親身教家內行甚備而靜庵公棲跡衡門舉一切浮豔之好無以入其襟懷裏誠秉醇意泊如也靜庵公以先生滿御史考封如其官母秦爲孺人後與鳴甫公皆贈通議大夫刑部左侍郎而王母李暨母秦皆淑人先生生有至性甫二歲即依依鳴甫公側晝夜不離鳴甫公性方嚴遇諸子姓不少假獨鍾愛先生先生一日繞膝下以官級問遞至公卿矣曰更有上者否鳴甫公曰獨有聖人耳先生應聲曰兒異日當爲聖人鳴甫公奇其志已心儀其爲大人器矣七歲靜庵公手書大學授之爲命今名李淑人卽世哭之甚哀既葬時時率昆從瓣香展拜其

墓十二通書大義間有逸遺爲一時名流所賞異靜庵公嘗遣訪彭公甫台遂定交十四負笈從師去家七十餘里冬聞鳴甫公訃奔歸沿途哭聲不絕行路哀之癸卯補縣諸生誦讀出入率與公甫俱金令勿者甫下車有材名風裁赫然而機宜或未協先生因試策具言利害幾五千言令大驚實諸首每督學使至輒居高等時公甫讀程朱語有契先生亦奮自樹始相與講古聖賢學公甫實實規行矩步意以主敬爲鵠先生曰道在明倫盡倫所以學聖也惡用此拘拘檢柙爲著五倫圖說公甫不能易而先生亦不覺入公甫彙括中矣己酉落第諸諸從苦過更算賦不能庇始發憤下帷手一編至寒膚皸腹不知也壬子舉於鄉同情擬製綺若蓋先生竟以布袍宴歸是歲春公甫疾革訣曰以若之才雲蒸龍變會當有時第恐我死無與成若志耳先生搜泣誓畢此生母相負丙辰以春秋魁南宮授行人司行人逾年三殿災奉命直詔於楚便還里中仲子覃思大道有所悟入先生未知也有問者曰子學從何入仲子曰吾從無極太極入不落陰陽五行先生異其旨因與討論不輟間舉羅文恭語似仲子曰學須靜中得一番光景白沙所謂養出端倪是也仲子厲聲曰有何光景先生且爽然自失意意於存虛矣戊午春報命偕仲子入都與豫章羅維德胡正甫兩先生遊先生存虛之功實動顯於應感自覺支離一日與仲子飯忽契文成良知說仲子私語同志曰吾兄近能反約以約失之者鮮矣多復率



儒藏

命使衛、維德先生曰：子歸矣。仲子殆天授，非吾儕比。幸與細商之。至衛竣事，歸習靜五雲山，偶舉筆有省，語仲子曰：嘻，一身皆知體也，奈何耿耿於膺耶。頗自咤。仲子曰：通天徹地皆知體也。乃益大咤。己未入都，值詔選給事中，御史駱陽馮公爲少宰，使人諷先生一見，先生謝不往。秋，授雲南道御史。時分宜柄國，冢宰吳鵬爲之爪翼，賄賂公行，濁亂銓政，舉朝陰拱而觀，無敢發。先生列屬六事及諸以賄進者，語侵分宜甚。疏具肅皇帝實錄中。上震怒，因斥鵬，而分宜亦稍稍動搖矣。遣人偵先生甚急。姜公廷善，胡公正甫咸坐此補外。知交經先生邸巷，亟策馬過之。先生不爲動。其年巡東城，嚴良賤與服之等，謹閭里童蒙之教，省訟便民，平反重辟若干條。辛酉，奉命案甘肅，過里門，以近學陰仲子。仲子曰：然，孔氏之無聲無臭，亦自有形有象。孔氏之有形有象，原自無聲無臭。先生首肯之。自是於有無內外，精粗顯微，無二見矣。秋，仲以仲子行遊太和山，至均州而別。先生既履邊，著巡夏約法三章。至蘭州，渡河以西，迺寒折腰。故事，直指使至，中丞具貂裘裘帳以迎。晉庵戴公曰：余親耿公，蓋古道人也，而以俗禮事之，不可。於是諸將迎餽，贈止毋辦，一見以實告。先生感其知己，相得益歡。亡何，改督南畿學政。在事七閱月，所舉如太宰王公本固、宗伯孫公應麟、中丞孟公養性、方伯趙公希靈，皆藩臬中聞人，而獨司馬王公崇古，人少知之者。先生特迂爲之解，使脫類於時而後已。後王公卒，暨續邊陲，倚爲長城焉。往直

指使出都門，分宜必加幣燕之。至所部，括贖金稱謝，甚者以千計。先生第爲奏記，述古義諷之，而以蘇軾枸杞侑。其言曰：公荷國重恩，當求士以報。而因薦二人，其一卽江陵，曰：此異日可以託國者。其一卽維德先生，曰：此公鄉人中不食烟火者。尋分宜敗，諸蠅附者咸掉臂去，獨維德先生時過存之。分宜仰天歎曰：吾識公晚矣。向耿公會語我，耿公其聖人乎。先生既去甘肅，一敝篋自隨。經關中，直指以石經餽，先生喜而受之。已見役夫行海署中，惻然曰：節用愛人，非經中語耶。吾實此屬民，殆買積遺珠類也。因解留洛陽，與多士共之。有留經記。多抵任留都，鉅公名儒往往稅駕其間。英多特達之士，綴學者修者，蓋不乏人。顧渙焉而未有其統。先生至，毅然以斯文爲任。舉簡書所云崇正學，迪正道者，稟爲功令。直叙仁體以示人。案吏則先風化而抑培植，校士則獎名檢而黜浮華。桑陰未移而下自化。自屬吏諸生，日爲汲引，隨機立教，不強所未至。由其內者，先生爲之推離還源，相與踊躍，如寐得覺。由其外者，先生爲之易辟就衷，相與浣濯，如疾獲差。致導中衢，過者斟酌之，多少不同，而各得其宜。以故從遊之徒，或彈冠登朝，爲世羽儀，或重席談經，爲士杓的。繼屬蔓引，於今不絕。作人之盛，近世未有也。當海忠介公令瀟安，先生賞其風節，爲著傳薦之。徐文貞公，得入爲戶部主事。忠介抗疏忤旨繫獄，先生復假申救。文貞懼益上怒，止之。時文貞與新鄭新有郤，御史齊康探意露章詆文貞，朝議愕然。先生以謂此



邪正消長之幾不可失。上言趙璜、陸贄、李沐、排趙汝愚、爲唐宋覆轍。康之勅輔臣階也。僉謂高拱、嗾之。夫病國莫大乎妨賢。而凶德莫甚於圯族。拱亦何利而爲此。自古亂人國者。惟貪與戾。而戾爲尤甚。如拱者。褊心蠱氣。無大臣度。陛下將焉用之。書上。上爲還請康。慰留文貞。而新鄭遂去國。七月。晉大理右寺丞。凡都御史。御史在外舉刺。類不相詭。時撫臣謝登之疏論維德先生及兵憲王道行。先生特爲白之。且曰。撫臣職在肅吏治。時見吏治之弊。故其綜覈也嚴。臣職在育人才。每見人才之難。故其保惜也切。跡若相反。而實相成也。已。寓書文貞曰。閣下獨屬意張君。深相獎挹。誠爲天下得人者。顧性喜簡淡。吐握之勤。於閣下不什一。人或以少之。願更與進焉。書千言。拳拳以推賢援能爲意。蓋分宜時先生曾薦此兩人。分宜不能用。至是江陵藉甚公輔之望。而維德先生亦安其官如故。十一月。晉大理左寺丞。先是建崇正書院成。著會儀。選十四郡髦士羣而鼓鑄之。屬小子某領其事。余時奉先生之教。與二三子傳習其中。當是時。文貞以理學名卿。首席。設簾待賢。下及管庫。視先生不啻天符人瑞。而先生踞師儒之任六年於茲。摩蕩鼓舞。陳言邪說。披剝解散。新意芽甲。性靈挺出。士蘇醒起立。歎未曾有。皆轉相號召。雷動從之。雖糜他師者亦藉名耿氏。海內士習。幾爲之一變。戊辰北上。次汝甯。史公桂芳適爲守。初。先生在留都。以秦淑人誕日。事有加鑑。史時爲比部。見之拂衣起。先生固問之。警夷不言。第

歎曰。富貴移人。先生喻其旨。拜謝而已。至是始語之故。史公曰。子時何默默耶。先生曰。儒者所言。必以余不喜聞過。其誰復告我。因相與一嘆。是年得予告歸。文貞既老去位。新鄭起田間。以台司兼握銓柄。亟合黨與以行其睚眦。歲庚午。先生繇御史佐廷尉四年矣。猶以舊官謫判廣西之橫州。頃之。新鄭敗。御史馬明謨等薦先生。起浙江衢州推官。癸酉二月。晉工部屯田主事。九月。晉尙書少卿。乙亥。晉太僕少卿。尋晉都察院右僉都御史。協理院事。五月。聞秦淑人訃。奔歸。哀毀骨立。喪葬悉奉古法。不爲世俗禮。自今上臨御。江陵勵精求治。提衡宇內。宴然如一。後浸爲苛急。不類初政。先生以桑梓之誼。又雅爲所推重。屢進苦言。江陵卒瑣其規。不以受。而先生自此疏矣。戊寅。以靜庵公高年。歸居。奉之龍灣莊。躬稼圃以養。將終身焉。甫服除。以原職起撫福建。先生邑邑不自得。亟勒疏乞休。不報。靜庵公趣之行。先生含涕就道。既入閩。先撫臣劉公堯晦以閩濱海。當備不虞。願爲不虞備者。兵易而餉難。爲是權商稅。覈積逋。清隱田。拮据百方。而餉始稍饒。龐公尙屬至。一切報罷。民多戴之者。先生乘其後。從劉則民拂。從龐則餉。乃在所周咨衷益。審畫其間。用是於兵民胥不病。己卯。詔下方田。閩少廣。阡巨原。於峻嶺如梯。於窪谷如盂。於江陀海澳。則如漚。先生模廣輿圖式。地列區分。揭之後屏。山阻水涯之間。咸若目覩者。手條八法布之。不數月報完。力省而功倍。已又

一官民之則、立條鞭之籍、取丁糧所輸銀、署片札下之窮鄉、令猾胥不得高下其手、修保甲鄉約行之。以其間輯小學新編、闢訓導以教民。先生持大體、不囑喋苛細、而其所爲實賊來遠銷、應同風者甚具。時逆賊林道乾橫行海外、島嶼星列、迄於日際、往往爲其淵藪、四出剽閭閻、勢張甚。先生爲設方畧、徧檄諸寨會并力擒之。初、我兵得銅銃一、爲東埔鎮器、相傳失之則災眚立至、寨酋皇皇無所據。先生約獻賊腹心、并我兵之陷沒者數百人、乃以歸之。寨酋燕香頂受、歡語如沸、旋遣使齎金書牙蠟來謝、誓與通羅等國擒賊報效、且歲請貢以爲常。先生既雅有金粟馬羊之誓、而又以貢非國舊典、卻之弗與通。第上言、東埔寨酋稽顙效順、爲諸酋倡、我兵復歸、如獲再世、此皆皇上之仁覆露使然。即今諭以擒賊之後、格外懸賞、庶還羅進有犄角之藉、道乾退無主藏之藪、不煩尺箠而折衝有日。自是賊覲遠跡、海濱延袤數千里、綴帶含哺、無驚波怒濤之警。先生力也。先生坐籌帷幄、不屑屑博棧名、復恥以自張大、而當事者既久、枝柱於先生、疏上、詔止賜金、後先生竟絕口不言。庚辰四月、聞靜庵公訃、將解職、疏薦參議今奉常鄭公汝璽等、劾某官某等若干人、時論快之。癸未、先生變除險歲矣、會叔子出守成都、先生泣送之曰：先人種德、乃有今日、願以隱約終、澤未及人也。成都屬三十餘城、若能爲千萬家寄命乎、乃可以慰地下。亡何、詔沒江陵、登用耆俊、臺省中如周公邦傑、蕭公彥、鄭公元標、王公亮、涂

公杰、王公國、郭公惟賢、連章薦之。甲申三月、起都察院左僉都御史。八月、晉左副都御史。陸莊簡公爲御史周之翰所誣、曠先生爲別白言之、以爲光祖三朝耆舊、辟之喬松古柏、託根巖谷、千百年長養之、萬夫力致之、以一匠氏之誤斷而頓棄焉、不已悲乎。時新進者爭爲搏擊、相煽成風、不顧事實、先生陰爲調劑之、不得則頌言之、又不得乃疏聞於上。其保全善類而惟恐傷之、皆此類也。冬、疏請從祀文成公、得旨。乙酉、晉刑部左侍郎。丁亥七月報滿、恩贈二世如制。十一月、晉南京都察院右都御史。己丑、再乞休、俱奉溫旨不允。六月、以御史陳晉外午、引咎求退、并申救撫臣陳公有年、徐公元泰、周公繼、而都覆奏云、定向道義親身、忠直許國、立朝大節、歷歷可稱。即今總憲南臺、真足表僕士類。所薦三臣、實見其才器過人、未可終棄、誠爲國惜才、古大臣之用心也。繼業奉旨留、有年、元泰宜及時起用、仍諭某不必辭免。奉旨、都御史臺臣之長、是非可否、當言即言、何必自陳求退。著照舊供職。時陸莊簡、姜宮保、听夕與先生過從談名理、學者見之、繪爲三老圖。先生年漸高、又善病、無食頃不爲歸計。獨念國本未定、不難替癘陳之曰、臣歷觀前史、凡宦官之姦者、小之布交外庭、廣行賄賂、大之潛援官禁、動搖國本、賄賂行者、亂官常、國本搖者、危社稷。張鉞前罪、諸臣言之詳矣、而其後罪、則諸臣之敢怒而不敢言者也。臣久荷國恩、衰病浸淫、報效日短、若心知國家有隱憂而不盡言、悟主、冀銷禍萌、一旦身填溝壑、



目不能瞑。未報而先生求去益力。十月召爲戶部總督倉場尙書。至是凡九疏乞休。十二月奉旨。卿耆德碩望。簡任司徒。以疾固辭。情詞懇切。准回籍調理。痊可之日。撫臣等具奏起用。先生歸。櫪糧屏履。丈室蕭然。而閔時憂道之懷倍逾往昔。雖居萬山中。四方學士順風而請者如鳥投林。如川赴海。無不人人爲叩兩端。期於有瘳。間亦泚筆。多所撰述。其言珠玉布粟藥石也。要以沾丐小生。鍼砭俗學。不爲泛常無益之語。暇時率羣從入天臺山。天臺崔嵬鬱盤。興雲散潤。盡光黃間一與區也。而先生杖屨消搖其間。學者因稱天臺先生。叔子晉率常。予告家居。侍先生於斯。先生歎曰。吾與此山別矣。有八表父強七妻子。五旬弟傍七旬兄之句。蓋追思靜庵公八十時曾遊此云。及叔子再起奉常。親先生疾劇。日既湯藥不能去。自後氣息奄奄。猶整衣冠。危坐中寢。與門下士論學如平時。頃之。如假寐者而逝。蓋丙申六月廿一日也。距生嘉靖甲申十月十日。享年七十有三。遺命國恩未報。毋身後陳乞以增踰溢之愧。而臺使者計聞於朝。上震悼。采禮官議。予祭二壇。遣行人劉一煥治葬。追贈太子少保。諡恭簡。嗚呼。其於哀榮之典備矣。先生生而岐嶷。龐眉戟鬚。目無流視。坐無倚容。孝思忠直。出自天性。其好學不厭。若火之必熱。水之必寒。有不能自己者。主持正學。先後凡累變。大都以反身默識爲先。以親師取友爲助。以範圍曲成爲徵驗。一言一動皆足爲學者法。至於微言渺論。第以開端啟途。俟人之自得。他如

淫賊之詞。詭異之教。則排斥之。不少假借。蓋國朝理學開於白沙。大明於文成。文成之後。一再傳而遞失之。承學後進。竊其管輅。寄徑而穴焉。以至發城抉樊。受衍於荒淫之說。而失其大宗。先生重憂之。爲坊甚力。海內游道餐風之侶。悉咨親而求。是正。兄弟間自相師友。所爲鐫勉者尤篤。仲子卒。先生流涕長瀆曰。昆弟手足耳。若仲者。予心耳目也。天喪仲。是剔予目。燬予耳。與劖予心也。何以生爲。先生自謂於學得仲而有覺。其痛心入骨。非直以友愛故而已。後進有片善。必推挽之。於內外族。隨事拯濟。俾其得所。鄉人有見枉者。必言於當事。伸理之。惟卹苦念舊是急。不知其他。少居麻城之西偏。公甫語之曰。是鄉陋。吾儕異日必擇里而居。先生曰。天生吾儕。以化民成俗。夫何陋之有。後力議建縣。是爲黃安。頃雲夫牧豎亦知嚮學。弦誦彬彬。幾與鄒魯同風矣。歿之日。四方同志咸爲位以哭。鄉人追悼。彌久不忘。尋請有司祀雲宮。而留都既列之名宦。且有專祠。親先生而尸祝者。鳩工庀材。不飭而具。春秋舉事。奔走如林。亦足以見教思之無窮。而公論之不可泯也。嗚呼。盛哉。先生所著有繪簡類編。奏疏。讀草。應迹。碩輔寶鑑。耿子庸言。先進遺風。教學商求。小學新編。閔訓禮纂。牧要編。譯異編。儒宗傳。大事譯。學教。黃安初乘。耿氏家譜。觀生紀。詩文集。總若干卷。配彭氏。省祭公憲楨女。贈淑人。先十年卒。子一。汝愚。選貢。彭淑人出。娶彭。卽鄉進士公甫女。公甫死。先生歲時經紀其家。終身如一日。嘗歎曰。恨公甫不

見吾學之就也。後竟修潘楊之睦，以此女一，側室胡氏出，嫁戶侍周公思敬幼子之復。孫三，應某官生，應某，應某。孫女一，適尚書周公弘，贈子應嵩，鄉進士。汝愚以歲丙午五月七日葬先生袁英河之原，而叔子方弭節留都，時語余曰：惟子知先生者，盡狀之以請銘。余自結髮束修，以至於今，其幸稍有聞，秋毫皆先生賜也，其何敢以不斐辭。嗟乎！先生之道，如日中天，天下莫不知，而有爲先生手勅者，至造作謗書以惑其胥吻，雖浮妄不根，眾所簡斥，而無忌憚亦已甚矣。夫吾孔子不免羣小之口，端木氏嘖嘖焉辯之不置，必得江漢秋陽之說而後定。先生統承孔氏，而某之智足以知先生也，後乎子貢、曾子，第據事直書其崖略如此，所恃大君子椽筆發明先生之道而定其功，從祀之舉，必有副文成而興者。余小子屏營以俟，謹狀。

余汝愚《滄園集》卷三三

明故資德大夫正治上卿總督倉場戶部尚書贈太子少保謚恭簡天臺耿公墓誌銘代父

講學自王文成而後，辯才縱橫，名勢輝赫，盛甚矣。而其間真儒鉅公處已立朝之行業，亦往往有以是掩者。隆萬間講席之盛，莫如麻城天臺耿公。余猶及與公先後班行間，志意款款，相慕善也。而恨聞不聞道，當吾世而失公。迨公沒之幾年，公季弟中丞君以焦太史狀來徵銘。竊惟三十年來，爲耿氏之學者盈天下，表章羽翼則有中丞、太史輩在，吾姑撮其行業緒餘人所略而不盡知者紀焉。按狀，耿之先有諱國寶者，從高皇帝起淮甸。其次子必安，以功授濟陽衛千戶，而長子必順，自光山遷麻城，遂爲楚人。五傳爲鳴甫公，公祖也。子靜菴公，娶于秦，舉公及仲子某。叔子中丞君某，季子某。公少敦敏異，凡兒常問靜庵公何者最貴，累數級至公若卿，更問其上，鳴甫公曰：上惟有聖人耳。公應聲曰：兒當



爲聖人。鳴甫公奇之。初爲諸生。時麻城令金某者才而未練事。公因試策具陳得失幾五千言。令驚謝。實詣首。壬子舉于鄉。儕輩頗自眩飾。示得意。公布袍就寢。泊如也。丙辰。以春秋魁南宮。授行人司行人。已未。選雲南道御史。時分宜爲相。太宰吳鵬阿其意通賄門。公首發鵬奸。且語侵執政。跪上。罷鵬。分宜亦爲氣奪。辛酉。巡按甘肅。至蘭州。邊境酷寒。故事中丞具貂襜褕逆于道。而晉庵戴公曰。不可以故事待賢者。其廉重乎。于。人如此。改南畿督學。廩廩以崇正學。廸正道爲已任。建崇正書院。簡諸髦俊肄習其中。身爲師帥焉。其所陶鑄。不拘一方。要以叩新發陳。蕩邪刊穢。俾各有所得而止。卽一切按覈士吏。于簿書文藝外。敦風化。獎名檢。俗習爲之一變。時新鄭相國與徐文貞。劾御史齊康。詆文貞。公爲疏辯邪正消長甚力。上爲之謫康罷新鄭。而無何新鄭復相。遂修舊怨于公。時公由御史晉大理寺丞。四年矣。竟以舊官謫判橫州。新鄭

去。以薦起。衢州府推官。漸歷尚寶司丞。至少卿。秦淑人訃至。奔歸。喪葬皆如古禮。服除。以原職起撫福建。公以父老乞致仕。不報。先是。撫閩者劉公竟。誨念閩濱海兵弱。稍括稅督逋爲足餉計。而龐公尚鵬至。則皆罷之。公謂從前則病民。從後亦病兵。未可補苴目前而止。務爲之衷度。其宜使兩稱便焉。時丈田令下。所在爲厲。公獨倣廣輿圖法。區別其壤地。高下廣狹之宜。條入法下之報。完獨先。又一官民之則。立條鞭之籍。括丁糧零雜之數。署之片紙。使猾胥不得濫征。又修保甲鄉約。以間輯小學新編。閭訓禮纂。用提誨民。佐功令所不及者焉。廣寇林道乾。訐海上公欲檄東埔諸寨酋擒之。廉知酋世寶一銅銃爲我所得。乃與之約。若以賊首餉與我兵之被鹵者來。常以銃歸。寨首謹願以效死。而以金書牙璣來謝。且請通貢。公却其餽。且謂通貢非典也。弗許。第上言東埔寨酋震怖天威。矢擒賊自效。宜及是時。羈縻用之。蓋自是寇盜徒跡。閩里

始宴然而報功之日。詔止賜金而已。庚辰丁靜庵公憂。甲申再起都察院僉都御史。俄晉副都。時新進者勵澹氣。好搏擊。公惜老成之去。務完轉調護之。乙酉。晉刑部侍郎。十一月。晉南京都察院右都御史。六月。以御史誤論劾撫臣陳公有年。徐公元太。周公繼。公引過求去。有詔慰留甚切。而新進諸臺省遂齟齬公不休。求去乃愈力。十月。晉戶部倉場尚書。至是乞休疏九上矣。始得歸。先是公爲御史時。撫臣某論羅大叅某。王兵寇某。公疏爲白之。時公臺臣也。不嫌與其長異同。比其身爲臺臣之長。用公義率屬而卒不勝。豈非世道之變耶。公歸隱于天臺山。學者稱爲天臺先生。時公老且病矣。口誦筆記。不厭諸士新筮仕來謁。必強冠服見之。爲言學道治民之不易。如是者又數年而卒。時七十有三矣。公之學自謂啓自彭孝廉公甫。成于仲子。公甫以至敬爲的。公曰。道在明倫。著五倫圖。而仲子別有所悟入。一日公舉羅文恭靜中養出光景語。

似仲子。仲曰。有何光景。公與然自失。又一日舉箴有省弊文成良知之旨。曰。一身皆知體也。仲曰。奚但一身。通天地皆知體也。兄弟間自相師友。故仲卒而公有祝予之痛焉。公學大都以反身默識爲主。以語默動靜示之範圍。其於奇袤曲說排斥必嚴。蓋公沒而有以不經毀聖之詞上干吏議者。皆公所爲變色而爭者也。今之學者襲口吻易工耳。如公出處卓卓無倫。卽侏儒節可以觀人。狀記公巡甘肅時。受石經之餽。途見役喘汗相屬。曰。此非節用愛人者也。因解留洛。有留經記。而其在南都也。館史比部某適秦淑人誕日。饌客豐。比部怫然起曰。富貴移人。公俛首謝。其後晤史于汝寧。語之故。史曰。爾時若何不言。公曰。恐以吾不樂聞過而墮言者意耳。嗚呼。此軼事也。然正惟弟子不能學矣。蓋公沒而抱公遺經爲世名卿及名師者不可勝數。吾友瞿元立守黃。謂余黃之人有質雅而好修者。不問知其爲耿公之子弟與其弟子也。蓋公之



贊其化民善俗之效。易世尚如此。而言者乃欲以單詞憾公。其亦能如公何哉。公生于某年。卒于某。配彭。贈淑人。先十年卒。子一。某。彭淑人出。娶彭。卽公所從學。彭公前女也。女一。某。出嫁某。孫某。娶某。孫女某。嫁某。公計聞于朝。上震悼。于祭二壇。遣行人劉一焜治葬。追贈太子少保。謚恭簡。以某年月日葬于某。銘曰。聖湮遠。言波瀾。言道易。守道難。道守在官。守俱直如矢。中無渝。議論繁。道守格。成尼之不終。目道則存。守則亡。面目似。心短長。僕僕耿公。守常德。體仁秉忠。識以默。溫恭不懈。奉厥職。乃模乃範。天下式。江河湯湯。世變亟。一葦捍之。覆爲敵。含沙縱橫。影可射。嗚呼斯民。有遺直。不知其言視其則。

王衡撰 《綴山先生集》卷二二

戶部尚書謚恭簡耿公定向傳 京學志
公諱定向。字在倫。湖廣黃安人。嘉靖丙辰進士。少借友生講業。卽以典起。絕學爲已任。及登第。擢監察御史。時冢宰吳鵬與分宜比。濁亂銓政。公抗疏論罷之。分宜奪氣。按開西所薦舉後多爲名卿者。行李蕭然。二笥或餽以石經。應援後夫。卒留之境上。作四經記。壬戌改督南畿學。不以青紫業薄待諸生。而訪進以古學。留都因多好修特起士。公首得數輩。以正學印之。當其忘言默證。澹然一笑。不啻曾唯顏。二程之吟弄以歸也。有馴行異等者。拔之僑伍中。擬有司禮聘入試。里巷小民。謂以聖諭六條。而謂童子虛明。當養以正。至社學師。不難拜而教。遺之。故自膠庠以達里塾。家誦戶弦。彬彬比於鄒魯矣。輟車所至。十四郡隨亦興起。乃構崇正書院。延四方來學之士。而郡邑茂異。亦時召就學。以陶鑄之。蓋公爲國作人。冀善人多而天下治。其用心如此。生平愛惜人才。獎掖善類。每投揭政府錄用之人。無知名。嘗幼斯鄉。相福狹乏。大臣度新鄭相。以此憾公。以大理丞謫州判。新鄭罷。起。累遷至同寺少卿。陞都察院右僉都御史。丁內艱去。而是時江陵以忤情起復。與朝士構下公漸。

異矣。及服闋薦用，特出公巡撫福建。公爲書諷其退，諸諫臣不能用。會公復丁外艱去。江陵尋敗，臺省文薦補都察院協理，分部御史，晉左副，尋轉刑部侍郎。陞南京都察院右都御史，申臺規，拔三撫臣，抑新進，風聞彈事者，朝論題之。陞戶部尚書，總督倉場。八疏乞骸，予告歸家。居七年卒，年七十三。贈太子少保，諡恭簡。所著有庸言、奏疏、贈草、應迹、碩輔寶鑑、先進遺風、教學商求、小學新編、問訓、禮纂、牧要編、譯異編、儒宗傳、大事譯、學象、觀生、紀等書，行於世。學者稱天臺先生。國朝自新建後，漢學者編海內，而或參以意見，或蕩於情慾，皆影響良知，與新建鑿。公憂其敎也，嘗謂學先志，以悟而入，以修而證。又謂學有三關四證，語具在集中。晚年力疾答郭方伯書，幾萬言，大有謂孔子之立達，大傳無盡，所謂賢于堯舜者此也。孟子願學孔子，以子弟從之，孝弟忠信爲敷庸，以距放淫爲天吏之征計，以守道待後爲創垂之統業，可謂爲巫函不爲矢匠，而善於擇術者。故公平生乞乞，不厭不倦，在朝在野，無一日不與朋友相切磋。兄弟門人無一語不以學問相究竟。由越中以進之汴泗，卒澤於道德醇如也。公既死，遠近同志皆爲位以哭。

國都既肥之名位，復是學祠武勝橋西南，諸生以時瞻拜宇下，至低回不能去云。

（國朝獻徵錄）卷二九

徐文長傳

同郡陶望齡撰

徐渭字文長，山陰人。幼孤，性絕警敏。九歲能屬文，年十餘，傲楊雄解嘲作釋毀二十，爲邑諸生試，屢傷。胡少保宗憲總督浙江，或薦渭善古文詞者，招致幕府。筭書記，時方獲白鹿海上，表以獻，表成，召渭視之，渭覽罷，睨視不答。胡公曰：「生有不足耶？」試爲之，退具藁進。公故豪武，不甚能別識，乃寫爲兩函，戒使者以視所善諸學士。董公份等謂孰優者，卽上之。至都，諸學士見之，果賞渭作，表進。

上大嘉悅。其文旬月間遍誦人口，公以是始重渭。寵禮獨甚。時都御史武進唐公順之以古文負重名，胡公嘗袖出渭所代謬之曰：「公謂予文若何？」唐公驚曰：「此文殆蕭寺後又出他人文？」唐公曰：「何因謂非公作？」然其人誰耶？願一見之。公乃呼渭偕飲，唐公深獎歎，與結驩而去。歸安茅副使坤時游於軍府，情重唐公，嘗大酒會，文士畢集，胡公又隱渭文語曰：「能識是爲誰筆乎？」茅公讀未半，遽曰：「此非吾荆川必不能。」胡公

笑謂渭：「茅公雅意師荆川，今北面於子矣。」茅公慙，而亦勉卒讀，謬曰：「惜後不逮耳。」其爲名輩所賞服如此。渭性通脫，多與群少年耽飲市肆，幕中有惡需，召渭不得，夜深開戟門以待之。偵者得狀，報曰：「徐秀才方大醉，噪豷不可致也。」公聞，反稱甚善。時督府勢嚴重，文武將吏庭見，懼誅責，無敢仰者，而渭戴敝烏巾，衣白布裈，衣直闔門入，示無忌諱。公常優容之，而渭亦矯節自好，無所顧請。然性豪恣，間或藉氣勢以剛所不快，人亦畏而然焉。及宗憲被逮，渭慮禍及，遂發狂，引巨錐刺耳，刺深數寸，流血幾殆。又以椎擊腎囊，碎之不死。渭爲人猜而妬，妻死後，有所娶，輒以嫌棄。至是又擊殺其後婦，遂坐法繫獄中，憤懣欲自決。爲文自銘其墓曰：「山陰徐渭者，少慕古文詞，及長益力。旣而有慕於道，往從前長沙守季先生，究王氏宗旨，謂道類禪，又去。扣於禪久之，人稍許之，然文與道終兩無得也。賤而情且直，故憚貴父似傲，與衆處不免袒裸似玩，人或病之，然傲與玩亦終兩不得其情也。舉於鄉者八而不一售，餓數掾，儲鹿粟者十年，一旦



客於幕府、與文章、數赴而數辭、投筆出門、人爭思而危之、而已深以爲安。其後公愈折節等布衣、留者兩朞、贈金以數百計、人爭榮而安之、而已深以爲危。至是忽自覓死、人曰渭文士、且操潔可無死、不知古文士以入幕操潔而死者衆矣。乃渭則自死、孰與人死之。渭爲人度於義無所關、時輒疎縱、不爲儒糾、一涉義所否、雖斷頭不可奪。故其死也、親莫制、友莫解焉。平生有過不肯掩、有不知耻以爲耻、斯言蓋不妄者。其自名如此。然卒以援者力獲免。既出獄、縱遊金陵、北客於上谷、居京師者數年。獄事之解、張官論元怵力爲多。渭心德之、館其舍旁、其驩好然。性縱誕、而所與處者頗引禮法、久之心不樂。時大言曰、吾殺人當死、頸一茹刃耳。今乃碎磔吾肉、遂病發瘡、歸。既歸、病時作時止、日閉門與卿者數人飲、噉而深惡諸富貴人。自郡守丞以下求與見者、皆不得也。嘗有詣者、伺便排戶半入、渭遽手拒扉口應曰、某不在。人多以是憎恨之。晚絕穀食者十餘歲、人問何居、曰吾收之久、偶厭不食耳、無他也。尤不事生業。客幕時、有餽之、洮

絨十許匹者、遂大製衣被、下及所嬖私、製之服靡不備者。一日都盡。及老貧甚、鬻手自給。然人操金請詩、文書繪者、值其稍裕、卽百方不得、遇窘時乃肯爲之。所受物人人題識、必償已、乃以給費、不卽餒餓不妄用也。有書數千卷、後斥賣殆盡。轉楚破弊、不能再易。至積葉寢、年七十三卒。渭爲諸生時、提學副使薛公應旂閱所試論異之、置第一。判牘尾曰、句句見語、李長吉之流也。及被遇胡公、備比歲、公思爲渭地、諸簾官入謁、屬之曰、徐渭異才也、諸君校士而得渭者、吾爲報之。時胡公權震天下、所出口無不欲爭得以如者、而偶一令晚謁、其人貢士也、公心輕之、忘不與語。及試、渭牘適屬令、事將竣、諸人乃大索獲之、則彈捷遍紙矣。人以是歎渭無命而服薛公知人焉。渭於行草書尤精奇偉傑、嘗言吾書第一、詩二、文三、畫四、識者許之。其論書主於運筆、大槩昉諸米氏云。所著文長集、闕篇、櫻桃館集、各若干卷。今合刻之。註莊子內篇、參同契、黃帝素問、郭璞莊書、各若干卷。四書解、首楞嚴經解、各數篇、皆有新意。渭父德、以龍里衛戍籍



領貴州鄉薦。始至龍里也。土人譁之。總以教讀自晦。授童子孝經。故謬其讀。土人笑曰。是不足逐也。已而得薦。仕至夔州府同知。渭貌脩偉肥白。音朗然如唳鶴。常中夜呼嘯。有群鶴應焉。二年。曰枚枳。

陶望齡曰。越之文士著名者。前惟陸務觀最善。後則文長。自古業盛行。操翰者羞言唐宋。知務觀者鮮矣。况文長乎。文長負才性。不能謹飾節日。然蹟其初終。蓋有處士之氣。其詩與文亦然。雖未免瑕類。咸以成其爲文長者而已。中被詬辱。老而病廢。名不出於鄉黨。然其才力所詣。質諸古人。傳於來禩。有必不可廢者。秋濤編。原泉見彼。匪喧汜溢者須臾耳。安能與文長道脩短哉。文長沒數載。有楚人袁宏道中郎者來會稽。於望齡齋中見所刻初集。稱爲奇絕。謂有明一人。聞者駭之。若中郎者。其亦渭之桓譚乎。

（徐文長文集）卷首

傳

公安袁宏道撰

余少時過里肆中。見北維刺有四聲猿。意氣豪達。與

近時書生所演傳奇絕異。題曰天池生。疑爲元人作。後適越。見人家單幅上有署田水月者。強心鐵骨。與夫一種磊塊不平之氣。字畫之中宛宛可見。意甚駭之。而不知田水月爲何人。一夕坐陶編修樓。隨意抽架上書。得陶編詩一帙。惡格毛書。煙煤敗黑。微有字形。稍就燈間讀之。讀未數首。不覺驚躍。惡呼石簪。關編何人作者。今耶古耶。石簪曰。此余鄉先輩徐天池先生書也。先生名渭。字文長。嘉隆間人。前五六年方卒。今卷軸題額上有田水月者。卽其人也。余始悟前後所疑皆卽文長一人。又當詩道荒穢之時。獲此奇秘。如屢得寶。兩人躍起燈影下。讀復叫。叫復讀。傳僕睡者皆驚起。余自是或同人或作書。皆首稱文長先生。有來看余者。卽出詩與之讀。一時名公鉅匠。浸浸知嚮慕云。文長爲山陰秀才。大試輒不利。豪蕩不羈。總督胡梅林公知之。聘爲幕客。文長與胡公約。若欲客某者。當具賓禮。非時輒得出入。胡公皆許之。文長乃喜。衣烏巾。長揖就坐。縱譚天下事。旁若無人。胡公大喜。是時公督數邊。兵威振東南。介冑之士膝語蛇

行不敢舉頭。而文長以部下一諸生傲之。信心而行。恣臆譁謔。了無忌憚。會得白鹿。屬文長代作表。表上。永陵喜甚。公以是益重之。一切疏記皆出其手。文長自負才略。好奇計。諳兵多中。凡公所以餌汪徐諸虜者。皆密相謀。然後行。嘗飲一酒樓。有數健兒亦飲其。不肯留錢。文長密以數字馳公。公立命縛健兒至麾下。皆斬之。一軍股慄。有沙門負貲而穢。酒間偶言於公。公後以他事杖殺之。其信任多此類。胡公既憐文長之才。哀其數困。時方省試。凡入簾者。公密屬曰。徐子天下才。若在本房。幸勿脫失。皆曰如命。一如縣以他薦後至。至期方謁。公偶忘屬卷。適在其房。遂不偶。文長既已不得志於有司。遂乃放浪遊蕩。恣情山水。走齊魯燕趙之地。窮覽朔漠。其所見山奔海立。沙起雲行。風鳴樹偃。幽谷大都。人物魚鳥。一切可驚可愕之狀。一一皆達之於詩。其習中又有一段不可磨滅之氣。英雄失路。托足無門之悲。故其爲詩如噴如笑。如水鳴峽。如種山土。如寡婦之夜哭。羈人之寒起。當其放意。平時千里。偶爾幽咽。語秋墳。文長眼空

千古。獨立一時。當時所謂達官貴人。騷士墨客。文長皆叱而奴之。耻不與交。故其名不出於越。悲夫。一日飲其鄉大夫家。鄉大夫指筵上一小物求賦。陰令童僕續紙丈餘。進欲以苦之。文長援筆立成。竟滿其紙。氣韻遒逸。物無遁情。一座大驚。文長喜作書。筆意奔放。如其詩。蒼勁中姿媚躍出。更不能書。而謬謂文長書決當在王稚宜、文徵仲之上。不論書法。而論書神。先生者誠八法之散聖。字林之俠客也。間以其餘勞溢爲花草竹石。皆超逸有致。卒以疑殺其繼室下獄。論死。張陽和力解。乃得出。既出。備強如初。晚年憤益深。佯狂益甚。顯者至門。皆距不納。當道官至。求一字不可得。時攜錢至酒肆。呼下隸與飲。或自持斧擊破其頭。血流被面。頭骨皆折。操之有聲。或槌其囊。或以利錐錐其兩耳。深入寸餘。竟不得死。石簣言。晚歲詩文益奇。無刻本。集藏於家。予所見者。徐文長集。關編一編而已。然文長竟以不得志於時。抱憤而卒。石公曰。先生數奇不已。遂爲狂疾。狂疾不已。遂爲囹圄。古今文人牢騷困苦。未有若先生者也。雖然。胡公閱世

豪傑、

承陵英主墓中禮數異等。是胡公知有先生矣。表上人主悅是人主知有先生矣。獨身未貴耳。先生詩文崛起一掃近代蕪穢之習。百世而下自有定論。胡爲不遇哉。梅客生嘗寄于書曰。文長吾老友。病奇于人。奇于詩。詩奇于字。字奇于文。文奇于畫。予謂文長無之而不奇者也。無之而不奇。斯無之而不奇也哉。悲夫。下奇字音機。

《徐文長文集》卷首

光祿大夫少保兼太子太保禮部尚書武英殿大學士贈太保謚文莊棠川殷公士儋行狀

于慎行

公諱士儋字正甫。其先自濟南武定州徙籍歷城。高祖贈德府審理正旺。配閭夫人。生贈少保公衡。景泰癸酉以禮舉山東省試第五。仕至德府審理正。配李夫人。生贈少保公峻。以禮舉成化庚子高第。竟不第而卒。配武夫人。生洪麟。即太公。贈少保信軒處士也。配郭太夫人。七舉子不就。夢文昌星見。已而誕公。公生而淵席聰哲。神姿迥異。一歲即能言。且善識事。誕日示以昨盤。取筆書梓及石印一。它不復視。家公奇之。始太公輔于曆數。公生五歲即教以干支月建時道之例。因能於掌上推行。或賓客滿座。各舉所生歲時問之。公一一屈指無遺。客咸驚嘆。一日謂太公曰。曆家所載止六十年。過此者我向上推行百歲千歲。以至無窮。皆在我指掌中。何不詳載之。太公大笑。然私心異焉。七歲遣就外傳。章丘翟公數過太公所。見公慧。一日飲而樂。輒起請幸得少女備郎君箕箒。客從之。輒合袂爲約。翟公歸告其母。母曰。奈何嫁女他邑。怒然翟公願私獨喜。以爲得婿。其後翟公有吏



藏

事繁客次郡城。太公殯之客位。如居兄弟妻。以致諸其子。翟公母乃嘆曰。吾子知人。然亦未卜公之貴也。公生十年。能著文論。十四而籍博士。屬中丞蔡公經建湖南書院。試郡邑諸生。拔其尤肆之。公以垂髫異焉。公在諸生中最少而貧。嘗與一羽客遊。羽客見公苦學不自給。欲以煉藥訣授之。公笑曰。吾有帶經食力。奈何以丹砂誤人。謝不受。公既有名諸生。而翟公已前客次。家益貧落。於是夫人未笄而歸。太夫人女畜之。三年而後。刷見太公。故精易數。占事奇中。庚子翟公殯。且省試。謂公若茲必第。第且與曾大父合符。然書亦以十月二十日逝也。筆而志之。璧是歲公以禮舉。自試第五。生十九年矣。太公方病。聞公第喜且泣。已而以書一函授公曰。此吾平生所聞見陰德行事也。幸而試吏。母虐百姓。以負朝廷。公曰。不敢以志望之日逝。公既以外艱未卽。偕計吏乃校弟子室里中。不給菽水。又恥稱貸。往往成旦。購楮書春帖。太夫人剪絲爲花勝。令蒼頭入市賣。以供酒醴。其甘貧如此。丁未舉進士。選翰林院庶吉士。讀書內館。公故有仙才明識。而又力學淹貫。其爲文賦。數居上第。已酉。授翰林檢討。壬子滿考。贈太公檢討。母封太孺人。是

年奉命封伊周二藩。事竣便道過家。展太公之墓。又舉太夫人如武定上冢。大會內外宗人。既乃報使。時公仕爲法從。館署多暇。乃益謝絕交遊。閉門修業。文史疎薄。或不自給。太夫人在邸中。至課奴蔬糲。家人習于儉。亦咸安之。乙卯。檢討六年考滿。丙辰。同考禮部。所取多知名士。丁巳。太夫人病思歸。公乃上書。御母還里。戊午。太夫人沒。公水漿不入口者三日。杖而後起。朝夕几筵。三年不御酒肉。諸儒生執經從遊者甚衆。公益覃思著述。足跡不入公府。壬戌。起詣闕。會穆廟開閣潛邸。世皇精簡儒臣輔導。以公奏講讀。公念天下治忽係之。每當進講。必齋戒存誠。冀有所感。勅。至若德治道所關。或理亂興亡之際。及權奸女寵。官事外戚之禍。不憚危言激辭。以動高聽。穆廟天授聖明。每奏一篇。輒欽容深納。左右侍臣聞其敷陳。亦無不泯然變色。易容者。九年考滿。進右春坊右贊善。仍兼檢討。甲子。奉命典順天鄉試。丙寅。督同經局洗馬。兼翰林院侍講。穆考卽位。以公講讀勞。宜賜白金文綬。丁卯。擢翰林院侍讀學士。掌院事。尋晉禮部右侍郎。兼翰林院侍讀學士。公疏辭。不允。以大慶單恩。大父。父皆爲通議大夫。禮部右侍郎。兼翰林



院侍讀學士。大母、母皆爲淑人。世宗皇帝梓宮入山陵，以公也送喪金幣。上開經筵，以公充講官，仍日侍講讀，賜宴禮部，齊金幣。踰月，改吏部右侍郎，兼官如故。有詔修世廟實錄，以公充副總裁，賜宴禮部，齊金幣。是年，翟夫人病卒，長安。上以公講讀舊勞，特賜祭葬。公以六月上書，送喪東歸，詔賜乘傳，並資白金文綺爲道里費。踰時而還。其明年戊辰，大計畢，上時上新卽位，銳然更化，圖理公以職佐太宰，而日直講，幄不顯坐，曹治事。太宰楊襄毅公召問郡國上計吏，行其殿最，公以故事出贖所廉，判治迹纖悉，具備暢公多所倚決。事竣，有詔晉禮部尚書，兼翰林院學士，掌詹事府。公再上疏辭，溫旨褒答，不允。先是，公以史官留滯且二十年，至是從五品官，僚一歲中遷至上卿，而同事少師高公已前。世廟時爲相，及穆廟登極，少傅南光陳公、太師江陵張公皆以爲亞卿學士，以其年並相，而公名在後，以次稍遷，故未卽拜。然上心日夜已嚮注之矣。二月，會試天下士，命與少師李公典之。其月上謁陵，從賜一品織衣、銀碗、佩刀諸物。四月，以皇太子立，單恩大父，父皆贈資政大夫、禮部尚書、兼翰林院學士。大母、母皆

贈夫人。任一子太學生。五月，選進士三十人爲庶吉士，以公同少保趙文肅公教之。故事，教諸吉士，或以其成材，多所寬假，卽課文括誦，要以中程卽已，不甚數數也。公念朝廷掄天下士，儲之禁苑，責以後効，故日夜程督諸吉士，惟責實學，不以空言爲質。諸吉士各務體學稽古，以稱塞師法。館中燈火焚爇，或至內夜，公是歲以災異詔問九卿大臣用人理財之策，各以便安條上。會其時諫臣石星、詹仰庇嘗言事忤上左右，杖奪其官。又中貴人乘間多所求請，及內帑金緡乾沒不貸，有司莫難也。公疏以爲：上卽欲用人，當責之主爵。比臺諫以直言中法，不得洗沐，吏部書請錄用，並觸聞罷矣。理財責大司農，而內帑錢穀所增耗數，主計不與知，乃又求請差遣，紛紛無厭。如是卽條奏山積何益。請宣詔大臣，各取理道，凡用人理財事宜，但董成部臣，俯垂聽納，則定政自修，而災異可弭。疏入，中貴人譴曰：藩府舊臣，乃不以聖斷爲是，反爲言官地以明主之失。上亦不爲動，而益眷遇公。其年九月大閱，從賜衣一襲。十二月，大宗伯缺，命公回部管事。宗伯議上卽典條例及宗室誥法，名封勸報之規，一洗舊習。庚午正月朔望，日月交食。

公兩疏請布德緩刑、受言省用、及飭內外臣工講求利弊、問民病苦、各數百言、皆侃侃激切。初公在府、日侍講讀、及掌太宗伯不與。上還宮問狀、左右以顯職對。上念公講讀數年、猶未帶玉、於是諭內閣講官、士儻久效勤勞、加恩一階、進太子太保、會冊封四妃、以公充副使、資金幣。時經筵日講、或以冬夏輟免、公上疏請日講如祖宗故事、四時不輟。又請進講祖訓、昭鑒諸書、及大學衍義、貞觀政要、上皆稱善從之。時今上在東宮、睿質長成、公兩上疏以國家舊制、東宮講學不出八齡、請以時出閣、臣等規畫儀節以奏。上以東宮方少、未卽從。其後二年乃出閣如故事、以公預請故也。是歲天下大比、士子鄉公以有恩詔、選貢諸生集太學、用祭酒孫公鉉議、請增兩京制額各十五人。太醫署中故有三皇小像、醫令以便宜奉祀。其後世廟從祀、醫請作景惠殿于署、常以春秋命大臣將事。至是、公用侍郎王公希烈議、上疏以爲三皇繼天立極、功在萬世、而列于醫師之中、使勾芒四佐配享其側、于禮不協。請母祠于署而進歷代醫師祀于一堂、歲遣醫令以少牢行禮。疏入、報聞。初嘉靖末、議定宗藩條例、親王無嗣、以兄兄弟若

昆弟之子嗣王、不得以旁支請繼。已而肅懷王薨、無嗣、其大母定王妃吳氏請以攝府弟緝緒續嗣。禮部議、緝緒雖定王姪、其寔懷王從叔、以叔嗣姪不如令有旨以本爵攝府如故。至穆廟卽位、又以吳氏疏請、有旨如先帝令。已又以肅宗人疏請、結上左右爲內主、公再疏執奏。上曰、肅藩越在遠塞、下王無以填之、其令緝緒嗣王。公又三疏力請、以爲朝廷所以布大信者、有成憲可尊。海內所以安大分者、有明旨可守。今肅府請封、既達成憲、且二聖明命、赫然如一、若復從其所請、則條例不足遵、明旨不足守、人欲遂其私、事事欲更其制、朝廷號令何以行于天下。疏入、上意堅不可回、乃進郡王攝府、食將軍祿如故。其後緝緒竟封爲親王、則當時郡封徒以公在誦也。自上卽位再郊、未舉慶成之典。是歲冬至大報、以公請舉如故事。是禮不行者四十餘年、諸司案牘或無可稽考、儀文樂節亦多殘缺。公乃博訪故老、詳核令甲、肄習禮儀、奏定位次。是日百官與宴者咸相忭蹈、以爲盛遇矣。故事、殿廷賜宴、五品卿丞若經筵侍從、近臣列坐中左門下、他卽臺諫史官具列丹墀、而道家羽服之流或以六品列坐門下。公請令降



列丹輝序于太常祠官之後。議者避之。是月詔公以本官兼文淵閣大學士、入內閣輔政。公再疏辭。溫旨褒答不允。十二月、虜大酋執叛人趙全以獻。用運籌決策褒賞輔臣。加少保、晉武英殿大學士。官一子中書舍人、賜金幣。公上疏辭。請給曾祖以下一品誥命。上不允其辭而從其請。于是當理公以下三世祖考皆贈為光祿大夫、少保、兼太子太保、禮部尚書、武英殿大學士。三世祖妣皆贈為一品夫人。辛未二月、冊封六妃。以公充副使、賜之金幣。公平生志趣雅在守分知止、泊于世味。嘗從方外道人受養生之訣。以盛年入相、倚藉方隆、以居常思歸、不甘寵利。是年十月、累疏稱疾、乞骸骨歸田里。溫旨慰留者三。志不可回。疏至四上。上重建其意。詔以本官致仕。賜白金、文綺、乘傳還里。遣行人護送。有司月廩四石、歲給與人八名。蓋是時甫五十。公既退居里第、閉關却掃、不談世故。家無常產。又鮮生殖。貴至卿相、名田不過數頃。第舍一區、僅蔽燥濕。僮僕數人、門如寒素。居則燕坐一室、披閱圖史。出而延見生徒、論難經義。濟南諸儒生及門者二百餘人、或不遠數百里負笈以從。公即故湖南書院與立期會。部使者慕之下記所司。

為諸生供具。一時濟上彬彬盛文雅、有漢諸儒風。而公暇時、又召諸同遊故老罷吏家居者、月旦會飲、或遊山水之間、亦頗聲為樂詩、被之絃誦、以宣太平之盛。四方傳其音節、習而歌之。公則自嘆曰、嗟夫造物不假人以全。僕故齊之鄙人、幸得以經術蒙上恩遇、位至公孤、于人臣無兩。又得以其餘年優游靡畝、享無為之樂。自此以往者、假我十年、則福出于人間世矣。方是時、公年鼎盛、海內日傾其起、即上及太后亦數數問殷先生無恙、語頗聞外廷、而公固已與世忘矣。萬曆辛巳冬、公忽病股腫、輒戒門人子弟趣為我豫後。我其不延。明年壬午春、公日瘳。至六月之朔、病利下、數日不食、亦不數語。問以遺言、笑而不答。至其月八日逝。距懸車之日十有二年矣。計問上震悼、輟朝一日、賜祭十一壇、使使治葬、贈太保、錫謚文莊。

明儒碑傳集卷七十六

張居正一

太師張文忠公行實

先太師諱居正字叔大別號太嶽其先廬州合肥人也始祖福以壯士從高皇帝起濠渡江克采石從大將軍定吳越闢廣累功授歸州長寧所世襲千戶其後四世孫自林歸徙家江陵遂爲江陵人高祖旺曾祖懷葛公諱祖東湖公鎮皆賢隱德不仕至考觀瀾公文明而經明行修爲時望所屬然數奇數上有司不第遂棄去語在太保桂林呂公今少傳蕭坂張公大司空永天曾公所爲碑碣若狀中由懷葛公而下俱贈如太師官曾祖妣黃祖妣李俱贈一品夫人母趙封一品夫人始趙夫人嘗夜見室中有火光光上照天頃之一青衣童子約五六歲冉冉自天而下遶床左右遂派有身凡在身十有二月以嘉靖四年乙酉五月二日生太師生之夕曾大父東湖公夢有大水驟至流溢庭下大父大驚問奴屬所從來奴屬口對狀言水自張少保純地中流出首是夜會懷葛公亦夢有月墮水甕中流光發色化爲白龜浮水上曳有頃太師生因名太師自生應月精之瑞嘉靖五年丙戌先生二歲能言有殊異狀卽見者亡不人人

色動一日從世父龍湫公讀孟子龍湫公戲謂太師曰兒母自負兒能識余所指王曰二字則識奇耳他日龍湫公方坐讀書而會乳媼抱太師至龍湫公抱至膝上戲以前所指王曰字驗問太師太師識如前若素所誦習國中以此皆稱太師神童而長老先生有識者皆以公輔期太師矣五歲始授句讀輒授輒記十歲通六經大義以能屬書離辭聞郡中嘉靖十五年丙申就試有司時大司徒李公士翱爲郡太守先一夕夢上帝剖符封識玉璽令授一童子明日進所取士庭下太師名在第一李公揖太師升階目撫童子何如人果夢中所見者乃大喜更太師初名曰白圭不足名子子他日當爲帝者師余得聞命天皇帝矣願自愛會督學使者田公項行部至郡李公具言郡中有童子能文大奇田公立召之至試南郡奇童賦拔筆立就無所點竄田公目視李公曰太守試以爲孺子何如賈生李公再拜賀曰賈生殆不及也田公謝曰雖項亦以爲不及也遂補太師博士弟子高等適奉得唐北海太守李邕南嶽碑田公讀未竟讀卽以與太師曰子之才他日無論北海矣明年就省試時大司寇顧公璘開府楚中顧公者故海內所稱矯然名世臣也一見知太師王佐才語直



持使者馮公曰、張子天授即令養在朝廷、宜亦無不可。然余以爲、莫若老其才、他日所就當益不可知耳。此使君事也、使君其前之。於是大師揀中所射、焚業爲觀察使、陳君東所稱、陳君以爲請、而馮公竟用顧公言置勿第。至庚子乃第。會顧公以大司空有事于獻皇帝陵園、大師過勸顧公、顧公曰、張生幸過我、大器晚成、此自中材、僕誠不當以中人薄視吾子、遲吾子三年作相。然僕親見解承旨奇才、高皇帝遣歸受學、德念甚厚、即令謹待十年未晚、而承旨曾不少下、卒以此爲世所悲歎。我所爲語、馮侍御者、願吾子志伊學、顏母徒以秀才獨喜自負也。久之別去。顧公親屬文贈之、又解所繫束帶爲賀曰、此非子所就、聊以明呂虔意耳。二十六年丁未、太師舉進士、選庶吉士、讀中秘書。二十八年己酉、授翰林院編修。時少師華亭徐公在政府、見太師沉毅淵重、所爲文雖旁列于史百家者、言而其學一本之躬行、根極理道、以此獨深相期許、曰、張君他日即蓋臣重國矣。然太師體故孱弱、又倦遊、三十三年甲寅、遂上疏請告。既得、請歸、則卜築小湖山中、課家僮鋤土編茅、築一室、僅三五椽、種竹半畝、養一狸、終日閉關不

啓人無所得望見。唯令童子數人、事洒掃、煮茶洗藥、有時讀書、或棲神胎息、內視返觀。久之、既神氣日益壯、遂下帷、益博極載籍、貫穿百氏、究心當世之務、蓋徒以爲儒者當如是、其心固謂與泉石益宜、儻然無當世意矣。大父見太師居山中、且三年、而堅卧不起、常邑邑不樂。前問大人所爲、焦勞狀云何、大父輒起行、若不顧、而又時時以其言語所視者、以此恐傷大父心、遂出。三十九年庚申、以右春坊右中允管國子監司業事。太師至、則勸學興禮、建首善爲天下先。諸生弟子、即有秀才異等、咸爲選首。天下士願得若丘文莊在成均者、十年、令學士靡然向風。而會世宗皇帝詔文學侍從纂述、典都肇基事爲承天大誌、再閱歲、猶弗就。四十一年壬戌、少師徐公上言、太師有良史材、遂用中允充副總裁、領其事。蓋異數也。既受命、甫八閱月、而手自脫藁、爲十二紀以獻。書既上、世宗心知太師他日能以經術輔朕。皇太子與理太平之業、遂令以右春坊右諭德侍。皇考講讀。太師儀容峻整、每進講必引經執義、廣譬曲論、詞極剴切。以故皇考往往目屬太師、加禮焉。四十五年丙寅、進翰林院侍讀學士、掌院事。隆慶元年

丁 皇考錄用舊學進太師禮部右侍郎兼翰林院學士。未幾進吏部左侍郎兼東閣大學士。恭贊機務。永樂大典成。進禮部尚書兼武英殿大學士。二年戊辰。加少保。太子太保。賜衣一襲。時太師條上六事。省議論。振紀綱。重詔令。覈名實。固邦本。飭武備。皆朝廷大政。又以嘉靖之季。虜數犯塞。請舉祖宗大閱。禮以飭戎事而振士氣。皇考嘉納。遂以明年秋九月大閱于北郊。是日。天子躬擐甲胄。太師戎服扈從。選卒十二萬。戈鉞連雲。旌旗耀日。天子坐武帳中。觀諸將士爲偃月五花之陣。已乃閱騎射。簡車徒。禮畢。三軍之士皆呼萬歲。驩聲如雷。都城遠近觀者如堵。軍容之盛。近代罕有。四年庚午。用考績。恩加太子太傅。吏部尚書。官一子中書舍人。先是。元孽小王子裔孫阿着。故崛疆。而俺答者。又最疆。大有控弦之衆。十餘萬。馬四十萬。橐駝牛羊百萬。駐雲中上谷。伯兄吉囊蚤死。有男子四。有衆數萬。而俺答弟昆都力哈部落亦復三萬。與吉能埒。肅皇帝時。歲入邊。殺略人民畜產甚多。雲中遼東最甚。其後我叛人趙全與其黨李自馨。劉四。趙龍等。亡抵俺答。居板升。而最懷中國無賴亡命若趙宗山。穆教清之屬。又悉往從

處。知險隘。扼塞。爲虜鄉導。日夜放虜。候利害。處以故。二十九年。俺答大舉逼京師。四十年。犯薊。隆慶元年。陷石州。當石州失守時。趙全謂俺答曰。那顏春秋高矣。那顏莫若以此時。據有雲中上谷。東封居庸。南塞鴈門。獨以一面西制晉代。此五霸之伐也。謀未定。會俺答奪其孫把漢那吉。所聘婦子。襁兒都司。那吉怒。以爲俺答善淫。無卑尊禮。乃與其妻比吉。郊公阿力哥等十人。馬十三匹。息山西平虜城外。扣關而入。督府少司馬蒲阪王公。御史中丞嘉魚方公。上狀。朝議紛紛。皆以爲不宜納叛人。徒啓釁。或云殺之。太師獨勸。上納那吉降。授以官職。厚給賜。飲食衣服器具。置大同城中。俺答聞那吉亡。大驚。發萬人臨平虜城來索。廷臣懼。咸謂宜與之。太師獨不許。令諸將堅壁清野。勿與戰。故令那吉承其所賜。緋衣金幣。誇示虜使。而使謀者以好語款虜曰。爾能縛我叛人趙全等。獻盟誓於天。約以數年一騎。毋穿我塞。乃得歸而孫耳。時有謂虜久不去。老師費財。欲乘老酋得孫急。而因與爲市者。王公以爲不可。太師報書王公曰。公言良是。和戎自有體。彼卽欲得孫。謂宜先縛致全等。境上盡屏往來游騎。請命幕府。我乃然後禮



那古而歸之耳。乃今擁萬騎平虜城外，欲坐索而孫，何可謂誠款乎？設有吐蕃劫盟之事，謂朝廷何？夫全等至狡獪矣，彼豈能坐而待縛若鷄犬乎？假令語泄，彼得以爲謀，或聊以脅從數人欺誤朝廷，而我乃輕棄重質，非細故矣。此不可不慮也。且那古歸而老酋幸奉約束，無他賜，吾卽假爵封王，通貢市，無不可矣。有如虜諸所言，特空給幕府，殊無意稱臣。又多所請乞，明年又復寇邊，損國家威重，則雖得全等數十百輩，何爲乎？願公熟計之。於是王公遣鮑崇德一再詣虜營，曉以利害。俺荅仰天笑曰：吾何愛數十人頭，不以易吾孫？乃夜襲板升，得趙全等九人，縛致境上。上用太師計，厚禮那古遣歸，俺荅感泣，遂奉表請稱臣內屬，通貢市，歲歲勿絕。時大司寇案全等及狀悉具，上令禮官爲文祠告郊廟，戮之東市，支解以徇，傳其首於邊，旣厭快衆憤矣。上嘉太師殊勲，加少傅，兼建極殿大學士，官一子尚寶司丞，而詔集朝臣詣闕下，議封貢可否。一時衆議籍籍，有謂便者，有謂不便者。太師復以書抵王公曰：今之議者，皆謂和戎示弱，開市啓釁，此殆不然。僕獨以爲有五利焉：邊鄙不聳，稽人成功一也。我得以其間修戰

守之具，蓄士卒養馬，歲無援兵，可省行糧數十百萬二也。俺荅旣臣屬，土蠻吉能不敢輕動三也。趙全旣禽，卽板升十萬之衆可馴而致也四也。胡驕天亡，其兆已見，老酋死，其族必分，卽不死，必有冒頓呼韓之變，我得乘其敗而坐困之五也。王公得書，嘆息曰：張公可謂知社稷大計矣。然論者發言盈庭，猶欲伺釁而動，太師不得已乃詣文華殿，奉成祖封和寧太平賢義三王故事告上。上意遂決，許通貢市。隆慶五年辛未，俺荅遣使奉表稱臣，貢名馬三十四匹。上御建極殿受之，使太史奉金冊封俺荅爲順義王，其弟子若孫部落六十五人各授官，賜金帛有差。俺荅大喜，告中國使者曰：全等雖誅，趙崇山猶在此，屬不滅亡，終敗和約。王公以聞，詔捕獻獄如趙全等刑已，而套虜亦願修貢。天皇帝請得市易中國財物如宣大例。上報可，賜吉能都督同知，餘受秩者凡四十有九人，並賜衣帛。於是中國以段布皮物市易虜馬，虜亦利漢財物，貿易不絕。東自四海，西盡甘州，延袤五十餘里，無烽火警，行人不持弓矢，近疆水陸屯田悉墾，治如內地，墩臺哨望之卒漸已撤去，所省餉歲不下數十萬石。北地精銳所易馬

至數十萬匹。蓋居庸以西、天子無所復事事、得以一意備東虜矣。是年春、當會試天下士、上命太師典試。太師崇雅黜浮、思得真才以裨實用、故所舉士皆才行高秀、號稱得人。六年壬申、上念太師運籌制虜、茂著忠猷、加少師、兼太子太師、予錦衣正千戶、令世其官。一日、先帝視朝忽起走、語且囁、太師偕司禮監太監馮公扶持還宮。坐稍定、先帝召太師楊前執太師手、屬託甚至、太師飲泣不能止。既出、遂觸地號天、幾不可生。今上既嗣、皇帝位、念山陵大事、詔太師卜視。大行皇帝陵寢、太師當煩暑、以身暴烈日中、歷險乘危、上下山谷、與二三堪輿選、賜玄討得。大峪嶺吉。識者以爲乾坤莫隅、風雨呵靈足綿。皇家萬年無疆之緒矣。途歸、觸暑且病、將請休沐而。上亟欲訪落太師、亟召見。平臺慰勞懇至。曰：先生爲。父皇陵寢辛苦受熱已。追述先帝憑几、未命、稱先生忠臣。太師感激悲咽、不能仰視。倉皇數語、皆保王躬補王缺要道。上悉嘉納、賜大官酒饌、白金、綵幣。先是。上在。東宮、嘗晝寢、夢一美婦、大臣在側、若將有所陳見。上寤異之、以問內侍。內侍對曰：殿下他日當有太平宰相如其人。

及見太師平臺、長身玉立、髭髯脩美。上記憶夢中事、語內侍曰：此卽朕夢中所見者乎。因賜太師玉帶。太師以爲。上神靈明聖、必得虞九官十二牧、周四友、多士在廷、乃可以稱任使。以故疏請。大誥文武羣臣示。上意所嚮。又念國有大故、或啓戎心、天子設銳意滅胡、念非以此時、今匈奴有所震疊、不可故請。勅本兵令邊吏毋得解甲、謹備胡。是時薄海內外知。上意指旣罷、然收意。太師乃按劉文靖故事、請。御日講三日一出視朝、毋得以寒暄小故廢罷會。皇考將掩。玄宮、太師奉。上命奔詣昭陵恭題。穆宗莊皇帝神主。山陵禮成、用翊贊功進左柱國、兼中極殿大學士、官一子尚寶司丞。累疏辭免。上不許。益降勅獎諭曰：卿受遺輔政、有安定社稷之功、勲庸未足以酬。太師辭益力。上不得已許之。已復。親視宸翰、賜大字凡五。曰：元輔曰良臣、曰爾惟鹽梅、曰汝作舟楫、曰宅揆保衡。太師頓首曰：上幸嚮意文字、卽操觚洙翰、非帝王要務、亦無不究極精微、動以古人爲法、臣知所以事上矣。乃屬講官略采古昔帝王善可爲法者八十一事、惡可爲戒者三十六事、衍爲。帝鑑圖說以獻。上敬起受。



降。溫旨獎勞。令宣付史館。昭示君臣交修之義。時錦衣衛逮沐黔國朝弼至京師。廷鞠之。榜笞備至。太師爲請寬其罪。得減死。安置于南京。萬曆元年癸酉正月。時有大辟王傳上刑。其罪人業有所指。一時人情洶洶。皆以爲禍且不測。設非廉得其狀。從中持之。且連泔無辜數千百人大獄矣。太師心知其事大繆。不然。爲解說於上。請以百口保其無他。上意始解。竟以罪當其人。他無所波及。外庭未有知者。益彰天王明聖矣。二月。嶺東平。嶺東有巢曰洋烏潭。馬公等寨。其地在惠州叢山深箐。延袤八百餘里。一夫當關。萬夫莫開。故伍端黃世喬等得嘯聚其中。蚕食東路數十年。人望之如同紇冒頓。殆天厚其毒耳。

皇考時。藍一清。賴元爵至爲魁傑。而曾廷鳳。江漢王。果。葉景清。馬祖昌諸賊。亦據有堅巢。爲寇暴所從來遠矣。太師乃計移督府殷公言。嶺東故多盜。往歲當事雖舉兵首事。然徒嘗寇略。取所獲一二報。上虛往。虛返。卽名殺賊耳。僕以爲非大舉。將爲東南憂。且此屬皆閩越人。非若強胡不可化誨。旣稱聽撫。而猶據堅巢如故。此何爲者也。僕以爲自非望風解散。已列爲編氓者。不復言撫。公獨不見曾廷鳳之事乎。於

是殷公用太師言。大誓文武將吏。進搗其巢。俘斬盡一清等一萬二千二百八十有奇。諸走匿墮巖谷焚溺死者不可悉數。上謂太師等贊謀廟堂。算無遺策。將首論太師功。太師謝不受。上以太師功在社稷。乃勞謙不有。足立臣極。特賜金綺酬之。七月上言。臣嘗先帝時。所上便宜六事。其一願上幸綜覈名實。乃當事者。旣歲惕月。卒不能以實應。卽所敷奏徒文具耳。請令自今天下吏民所上封事。有事下四方郡國者。請令諸曹皆置記籍。與爲約期。而月令科臣。伏之。設所在撫按奉行。詔書不以時奏報。或已奏報。而諸曹故慢令。不與可否者。臣等當條列其事。請詔下所司詰問。責令對狀。上報可。十一月。以六年考績。進中樞殿大學士。不獲辭。萬曆二年甲戌正月。西南夷都蠻平。都蠻古瀘戎也。自漢遺唐蒙通巴笮。開犍爲郡。治道置吏。其後諸葛武侯僅能計平之。然亦弗靖。至數千年而至純皇帝時。程尚書李襄城至。煩十八萬之師。費金錢鉅萬。越四年僅克。蓋九絲凌霄等寨皆天險。故焚人屯聚其中。入其能摧其堅。而彼得以時出沒爲寇鈔。比年以來所殺掠我人民以萬數。至陸梁矣。方隆慶改元。蜀當事者以

都蠻上變。時趙文肅嘆曰：都蠻不滅，吾敘澶赤子且無噍類。安得昇一巡撫往任之？太師曰：吾楚一士足辦此。第名未著耳。公問曰：何？太師以曾公對。已乃卒請於上。詔曾公往討之。曾公故有偉略，約滅此後朝食。而太師又數移書曾公，其大指謂宜徵兵積餉，爲坐困之形，而募死士從間道搗其虛。先年破香爐、取岷洮，皆用此道耳。蓋先是言官有以間事論劉總戎顯者，罪且不貸。太師曰：臨敵易將，兵家所忌。倘蜀事不効，當并聞事逮治之。於是言者意始解，而顯以此懼且感，竟奮不顧身，受曾公方略，以平蠻自効。凡越六月而凌霄、都都、九絲等寨悉平。所擒斬俘獲四千六百有奇，得酋王三十六人，拓地四百里，得武侯所遺銅鼓九十三而還。七月，皇考實錄成，詔太師兼倅尚書官一子中書舍人。太師累辭謝不受。十一月，初東虜見俺答已得封，而獨已土蠻速把亥請封不許，故驕踞耻言修貢事。隆慶五年四月，寇連山驛。五月，寇盤山。六年二月，寇長勝堡。萬曆元年，犯鎮西堡邊外。秋七月，寇鐵嶺。冬十二月，寇鎮寧。太師患虜悖慢，令大築亭障，修烽火，前後所以授當事者機宜甚備，而虜曾不悔禍，轉益鈔暴。然每入犯，輒大創

而去。虜以此太恨，計邀建州屬夷，以二年冬十月入犯清河，逆酋王杲遂誘殺我裨將裴承祖等。時督府張公、大將軍李公聞狀，用太師策，鼓行而前，乘勝，搗紅力寨，斬首虜一千一百有奇，馬牛羊無算。上聞，謂遼東大捷，皆太師等運籌功。乃手詔太師勅諭云：朕以幼冲嗣位，賴先生匡弼，四方治安，九邊寧靜。我祖宗列聖亦鑒知先生之功，就加顯爵，亦不爲過。乃屢辭恩命。惟一誠韓國自古忠臣如先生者罕。朕今知先生實心，不復強特賜坐蟒衣一襲，銀五十兩，以示優眷，用成美德。其欽承之。十二月，太師以上方精核吏治，乃與太宰張公、大司馬譚公約，置爲御屏，中繪天下疆域，旁列上公而下郡太守，而上文武羣臣姓氏屏中，上之。上令設於文華後殿省覽。萬曆三年乙亥二月，太師請修復。祖宗故事，今日講官記注起居兼錄，詔諭制勅，凡郊祀、耕籍、幸學、大閱，皆令侍從。又選擇史官供奉文字已久者六人，日居館局中，編摩諸司章奏。其大臣便殿獨對，有密勿謀議得聞，史臣者令入對。大臣紀述，送史局銓次。五月，請勅吏部凡所在督學使者，非方正博聞之士，宜勿遣。督學使者所使修起

教。母得日坐都城中。虛談賈譽。計日待轉。使人得
干以私。宜以時偏歷所部郡邑。所至興廉舉孝。謹
學官博士弟子。每三年。四方郡國既大舉士。即令主
爵。御史大夫察舉其能否。御史中丞。部使者又非時
得以論列其事。其能明布論下。綱紀人倫。不涉流俗
者。詔進其官。設有羣聚徒黨。虛論高議。若受事請謁
及以突梯脂韋。事人輒罪之。而請諸不稱者。罪博士
弟子。務崇孝弟廉讓。敦本尚實。母得勦襲異端。游大
人成名。其有譏時好訐。不務成事。市語道諺。敢行稱
亂者。令有司論如法。上俱報可。萬曆四年丙子六
月。請重修大明會典。備一代典刑。五月。太師以
聖齡日長。宜躬御萬機。省覽章奏。乃取中書所藏
皇祖御書聖諭御製御批。凡二百四十有二。以進。是
時歲比不登。又多水旱。上詔書數下。賜民田租。乃
郡國守相奉。上詔書不勤督賦益急。閭閻愁嘆。盜
賊多有。太師乃與執政呂公。張公上疏。請。詔有司
加意牧養。令主計議佐百姓。民有窮餓。或歲大侵。若
貸足支八年。獨大帑無羨金。而民間復苦輸粟。終歲
勤動。不得休暇。蓋國與民皆受其病矣。請令今歲賜

民改折十分之三。上以實帑藏下。以寬恤民力。此
利之道。計無便於此者。上從之。十月。以一品九年
考績加特進。左柱國。進太傅。支伯爵俸。賜。璽書獎
勞。賜宴禮部。官一子尚寶司丞。已遣中貴賜太師手
勅。諭元輔先生親受。先帝遺勅。輔朕冲年。今四海
昇平。四夷賓服。實賴先生匡弼。精忠大勲。朕言不能
述。官不能酬。惟我。祖宗列聖。必垂鑒知。陰佑先生
子孫。世世與國咸休也。茲九年考績。于常典外。賜銀
二百兩。坐蟒蟒衣各一襲。歲加祿米一百石。薄示褒
眷。先生其欽承之勿辭。太師累疏辭謝。上重違其
意。詔許辭太傅伯祿。其他宜悉勉承。以見君臣相
信之義。太師遂不敢辭。萬曆五年丁丑五月。有詔修
慈慶。慈寧宮。太師上言。兩宮規制甚備。又至壯
麗。足以娛。太后萬壽。不宜時誦舉。羣臣嘖有
煩言。此徒以彰。朝廷過舉耳。上心知太師等忠
言。即入言。聖母得麗之。六月。嶺西羅旁平。羅旁據
東南山海間。東西二山相距。驚江急峽。飛巖斷壑。不
知其幾百里。諸獠窟穴其中。自天地剖判以來。未有
聞其藩者。國初邵中國。用創業兵。僅能定之。其後
馬恭襄。葉文莊。韓襄毅。雖彈壓其間。亦不能蕩平。張



殲吳平事無論已。至世宗朝諸徭召陽春山民耕而與浪賊黃德祥等四千餘人雄據兩山轉相寇掠遂至今日不可復撲滅。蓋其處萬山蔽虧之中嘗負固自喜以爲天兵無足憂非可單車片言指計而靡也。前督府殷公既討平惠潮上疏言賊當誅一時議者謂粵軍旅數興不無事矣。自古征蠻未有大得意者劉安諫伐閩越言可念也。太師曰不然會殷公入爲大司農乃推轂少司馬凌公請賜璽書屬凌去審定計畫討賊許留歲入帑金十一萬爲助。瀕行太師語凌公曰雖鞭之長不及馬腹。即今五指北三八寨諸徭雖乘間竊發然要當審所緩急耳。凌公既至乃部署十道師號三十萬分道並進一切方略悉如太師指刊木夷山摧破諸巖峒五百六十有四俘斬四萬二千有奇拓地數百里以其地置郡縣事聞上賜太師金錢謂廣東大捷實賴先生每運籌云是時臺官卜上大婚期得冬十有二月吉。太師度上春秋未可卽上書聖母言皇上爲天地神明主發動興事百神皆將受職非陰陽小數所能計且累朝列聖無以十五齡納后者臣愚以爲明年便聖母許之。八月太師以所撰加恩張英國等

勅上進上遣中謁者諭太師謂皇祖四十五年實錄字字句句都是先生費心看改幾次趣令擬勅加恩恩太師上書極言君臣分義欲必得請乃上爲感動特允其請令宣付史館昭垂萬世云。九月大父以疾卒於江陵先是念大父趙夫人春秋高私心願得陛下賜臣一月之便一日馳二百里歸爲二人壽又念皇考顧托臣至重非所宜言故居平常緬然長思寢膳多有涕泣處上察太師貌日瘠顧問左右曰張先生連日貌若有大憂固憂勤國家者得亡有二人念乎左右叩頭對曰良然於是聖母上出內帑綺幣金錢馳賜大父趙夫人而手書諭太師其爲朕致先生父母大父驚感泣再拜曰臣文明死無以報願藉手臣子以報陛下當是時太師念上恩禮隆異益不敢言省觀事然心不能一日置也乃書移叔父居王居謀迎養大父闕下大父不許輒報書太師疊疊數百言其詞嚴正剴切大要謂肩鉅任者不可以圭撮計功受大恩者不可以尋常論報老人幸未卽衰兒無多設不然之處爲老人過計徒令奉國不專耳然大父心知太師內顧則故令家僮日昇一與携一卮酒與二三老叟



游行山水間。有時躡蹻登崇岡絕巘。無異壯夫。蓋大父故健。而又欲故爲趨捷。以示無恙。故往往有人自江陵來。輒言大父善飯。不謂一日晨出。登王祭樓。蒙犯霜露。寢疾十有一日。遂卒。大父計既聞。中使奉聖母上所賜內饌。出問勞太師者。歸言元輔毀甚。幾絕。上大震悼。卽手諭太師曰。天降先生。非尋常者比。親承先帝付託。輔朕冲幼。社稷奠安。天下太平。莫大之忠。自古罕有。先生父靈。必是懽妥。今宜以朕爲念。勉抑哀情。以成大孝。朕幸甚。天下幸甚。是時朝野相念者。皆言太師親承皇考顧託。義不得復顧其私。恐上遂納太師請。皆歔歔嘆息。而會計聞之。夕卽薨。出斗牛間。其尾指婺女。長數十丈。臺官微言。按天官書。斗丞相之位。薨出斗女牛。主大臣移徙。天子愁兵起。天下受怨。於是上益惻怛。有詔詔吏部諭上意。勉留太師。太師聞命。計未知所出。卽哀號上疏言。臣幸未死。報國之日長。且國家非有金華之事。而令臣墨經在闕廷。非盛世所當有。上泣然流涕曰。卿篤孝至情。朕非不感動。但念朕當十齡。皇考見背。丁寧以朕屬卿。卿盡心輔導。今海內乂安。蠻貊率服。朕垂拱仰成。刻離卿不

安。遂待三年。且卿身繫社稷安危。又金華之事。可比。其勉遵前旨。以副我皇考委託之重。太師聞詔。水漿不入口者三日。又叩心雪涕。上疏曰。先帝不知臣不肖。臨終屬臣以大事。臣何敢中道棄去。但念臣生離臣父十有九年。卽死不及殯。攀號莫及。願賜死生惟陛下所用之。臣死且不朽矣。臣誠窮苦心鬱結而難舒。惟陛下哀憐。上覽奏。然不寧復手諭太師。卿言終是常理。今朕冲年。國家事重。豈常時可同。連日不面。朕心如有所失。七七之期。猶以爲遠。卿平日所言。朕無一不從。今日此事。却望卿從。又諭執政曰。元輔必不可離朕。卽百疏不允。於是呂公張公以。上意聞太師。太師遂躡蹻痛哭。號天曰。臣聞鹿死不擇音。臣誠不勝烏鳥私情。臣不知死所矣。遂上章極言曰。臣既不孝。背棄死者。臣有老母。今年七十有二人。命危淺。朝不慮夕。設令知臣被留。恐不復相見。長思勞望。鬱悵難聊。有不可知者矣。陛下方以孝養兩宮。奈何不推心置臣腹中。顧念臣母乎。且臣上顧君父。下念父母。欲留不可。欲去未能。臣之進退。實爲狼狽矣。假設令臣終不得所請。負痛

在列、無論精神沮喪、不能復爲國家發慮出謀。臣聞
憂苦傷人、卽臣犬馬、雖有不可知者矣。陛下
愛臣、何不生活、臣責他日後効。臣誠過激、願陛下
由候伺誅死。上曰、朕爲天下留卿、豈不軫卿迫切
至情、心相違拒。乃再遣中使賜太師手諭、朕以冲
幼、賴先生爲師。況朕學尚未成、志尚未定、萬機尚未
諸理。若先生一旦遠去、則數年啓沃之功、盡棄之矣。
先生何忍已。特差司禮監官同先生子前去造葬、事
完便接先生老母來京侍養、以慰先生孝思。務要勉
遵前旨、仰體聖母朕惓惓至意。母又有所陳。于時
太子太保新昌潘公等與吏科都給事中陳君三謨
等、山東道監察御史曾君士楚等、南京戶科給事中
王君蔚等、先後交章懇留。諸侯卿相大小百執事皆
詣太師所、備極寬譬。責以君臣大義曰、上固謂父
喪當守、君命尤重。夫人臣旣以髮膚屬上、惟
上所生死、勢安得自便已乎。且相君何能去、卽章百
上、無當於事、徒傷君父心。在禮奔喪、記奔喪之禮
凡一、而不得奔喪之禮、凡四、此言何謂也。於是太師遂涕交揮
謝言者曰、臣父至陳賤、今其卽世而聖母上賜臣賻千金、他
緒幣稱是。旣詔儀部往諭祭、尚書工部卽往營

葬事、爲加祭五壇、已又令宮集貴臣經紀其喪、卽令
以臣母來。蓋天恩加隆十載、今臣益道盡途窮、殆顛
連無告矣。夫上所以隆施臣父之謂何、度臣父地
下、且以已所不能報塞責望、臣何可旣負吾君
重違臣父矧上大婚期且近、而臣殊死求去、非
先帝意。臣不若以此時曷續贊上機務、侍講讀、有
如。上察臣所爲哀痛狀、上終當幸聽臣去耳。不
然、臣請益力而上有如震怒、卽嘉禮成而臣父
春秋奄奄之事、臣不敢以請矣。於是上疏言狀、且請
後歸葬事。上大慰悅、許太師得謝常祿、令大官日
給酒饌、在廷諸臣月致芻米。旣逾月、上遣中使召
見平臺、上悲感涕泣、慰勞太師曰、朕爲社稷
屈留先生、先生想父皇付託的意思、成全終始、纔
是大忠大孝。太師叩頭謝、遂出視事。萬曆六年戊寅
正月、禮官請舉大婚、詔太師充納采同名使。是月
慈聖皇太后將還慈寧、申諭太師朝夕納誨、終
先帝付託重義。太師頓首上書、聖母言、臣在外廷
所不能及、伏惟聖母調護、聖躬開導、聖學幸
甚。已又上書請上服膺慈訓。上拱手謝曰、當
爲卿等戒之。二月、上方行嘉禮、賴天地宗廟



會將府張公奏土蠻擁衆萬騎犯遼河、劈山、我兵出邊二百餘里斬首捕虜四百三十五級。聖母大喜，以爲此勉留張先生明效。上恭述示太師，賜以金幣。蓋先是黃台吉握重兵，養家奴寨強，委禽王台，王台涕泣以女女黃台吉子。一時言者遂謂王台陰陽中國，情偽不可知。太師蜀令邊將善遇王台，萬曆二年，王台卒，將致王泉獻。闕下大將軍斬馘虜千人，故天威益震蕩。平虜之役，斬首虜二百，虜日以益弱矣。三月，大婚禮成。上既恭上兩宮聖母徽號，將論太師元功，太師以持服故謝不受，即再疏請乞歸葬。上不得已，勅尚寶司卿鄭君欽、錦衣衛指揮同知史甘繼書奉太師歸襄大事，約既葬，即令所遣司禮監太監魏公朝與楚當事者趣令上道。期以夏五月還朝。又特頒帝賚忠良銀記一。凡軍國大事或有闕失，令具實以聞。漸行召入辭，便殿。上曰：先生前乃齎而前，蒲伏。上曰：聖母，朕不能一日去先生，重違先生意耳。然微先生，朕奚賴焉？朕今且暮望先生矣。太師再拜頓首曰：臣即行。今陛下新納，后出入起居，臣不能一日忘。願陛下善自愛。上曰：諾。先生行矣，其務溫飯，勉抑憂情，以稱朕意。乃

伏地悲泣不能起。上爲嗚咽流涕。入言聖母，聖母亦感痛。遣中使賜以金錢。明日，聖母上又遣中使祖道國門外，曰：先生既念上幸趣來，母勤天子召也。既行，乃要經素冠，乘布車，日行百里，見星而行，見星而舍。既至，則披髮徒跣，悲號趨入門而左，馮殯而哭，盡哀。遠近送者，素車白馬，同盟畢至。見太師焦毀過禮，皆大悅。遂以四月十六日葬太父青陽山之原。是時會大司馬梁公新至遼，戮力安攘，三軍踊躍，養善木屯之戰，我兵斬首虜八百八十二級。上念太師推轂梁公知人，詔本兵以督府所上功馳報太師。令太師議所以論功狀來聞。太師既報上因上疏言趙夫人病，請乞假臣數月，得扶持臣母。蓋太師意在行服墓次，特以此規。上即上不許而得屬茨倚廬，不即去，固雖加一日，愈於已意也。乃上得書大驚，而會太宰王公等與太常寺卿王公友等、吏科都給事中陳君三謨等、福建道監察御史、君希孟等，又皆先後上書請趣召元輔。上是諸公言，即趣令錦衣衛指揮僉事程君汝敬、丞乘傳造太師廬，賜璽書令促裝就道。太師聞命，猶起，起涕淚，恐不能決。使者曰：當宁倚重相君，凡軍國重務悉

待處裁設不卽往。臣朝臣汝敬且得罪。太師乃叩太
父墓下。慘愴悲號。使者促而登車。遂行。梁楚守臣奉
詔飛騎聞。上。上聞先生來。卽入言。聖母。
上遣中常侍具天廚禁脔。郊勞。明日召見。文華殿。
太師頓首謝。具以歲豐民安。邊境寧謐。狀上對。
上大慰悅。亟稱先生忠孝。賜休沐十日。乃叩頭趨出。
九月。趙夫人至京師。聖母。上郊勞。賞賚趙夫人
備至。恨趙夫人老。又善病。不能起。入宮。負。聖母。
上寵命耳。十二月。前少師新鄭高公卒。公夫人張請
寬卹恩。闕下。上怒。太師與張公申公。念高公無他
大罪。徒以仇直得過君父。爲婉言于。上得復其官。
予祭葬。先是。廟皇帝時。公族繁盛。國用困竭。以故
禮官所裁宗藩條例。多刻意抑損。甚或自相乖亂。不
可訓。太師與張公申公。念。諸侯王皆骨肉至親。而
令至是。不足以稱。天子親親至意。乃略舉事例。未
妥者十一事。上言。請勅禮官集羣臣議。著爲憲令。照
示。諸侯王。今大宗伯潘公所定宗藩事例。徐公所
定宗藩要例。諸侯王既感泣。益親。上而薄厚親
疎有體。又不至重困民財。足稱不刊矣。萬曆七年己
卯二月。河正成。先是。淮安故有水患。然或所及僅一

二縣。迨邑。揚固無恙也。至嘉靖中。河決崔鎮。呂泗。沖
龍窩。周營等處。往往奪淮流入海。淮勢不敵。則或決
高家堰。或決黃浦。或決入淺淮。楊諸郡悉爲巨浸。河
高出民屋上。敗壞城郭。田廬家墓以萬數。瀕河十郡
治隄。歲費且萬萬。及其大決。所殘無算。又其從小河
口。白洋河。挾永壩。諸水。越歸仁集。直逼泗州。則其患
不獨在民。且憂在。陵寢矣。異日者。漕臣吳公請開
草灣。夫水以海爲壑。開草灣。誠是矣。然金城等處。不
足以分殺水怒。以數千里巨津。而獨令雲梯開當水
衝。此勢所不得爲者也。當是時。有請漕海者。有請開
膠萊河者。有請開加河者。或請開衛河者。有請新集
故道當棄者。有謂朱家口等處決口當勿塞者。有請
鑿范堤者。有請開新興場牛園浦導射陽諸水入海
者。紛紛。籍籍。迄無定論。大要以爲。天子日有事
河。而河且不可爲矣。上一日以問執政。太師與張
公申公因進言。故河道都御史潘季馴可使。上乃
降。璽書。卽其家拜御史大夫。使持節行治河。一切
假以便宜。久任責成。出帑藏及留所折料漕粟八十
餘萬金。不問潘公出入。又令諸臣得條上所見治其
諸方命不及事事者。下詔勅勒治之。于是當事者人



人憐恐建官舍河上。胼胝沾塗。日夜焦勞。蓋貽年而告成事。爲土堤若干。石堤若干。塞決口若干。建減水閘若干。計費不過五十餘萬。省費金二十四萬。以歸水衡。今徐淮之間。延袤八百餘里。兩堤相望。蛇蟠蠅豆。殆如長山夾峙。而河流其中。且黃河以歸仁堤勢。不得南決。其勢既不能及。陵寢又高。家堰既塞。淮不能奔黃。漕皆盡趨清口。會黃河由安東雲梯關入海。田廬皆盡。已出數十年。棄地轉爲耕桑。而河上輒艘得捷於漕。輸入大司農矣。二月。烏思藏僧鎖南堅。偕奉書太師。詞甚哀懇。獻四臂觀世音一。香爐二。金剛結子一。堅錯者。卽闍化王答賴刺麻也。故號稱活佛。以傳經說法戒淫殺爲虜所尊禮。稱輪迴轉法輪功德。世界佛大國師。萬曆五年。套酋切盡黃台吉約俺荅迎堅錯西海上。飲長生水。俺荅所從部落數十萬人。徒以奉堅錯教。無肯淫淫者。其教化可知矣。太師曰。德澤不加。君子不饗其質。且吾天子股肱臣。義不得與外夷私交。遂歸之於上。上謂太師勲猷宣播遐邇。令納之。三月。太師念宮中貨賚無算。度不可得已。十日。因戶部進御覽揭帖。遂上言。臣等伏見萬曆五年歲入四百三十五萬。乃六年所入僅三

百五十五萬。五年歲出三百四十九萬。而六年所出乃至三百八十八萬。夫歲出則浮於前歲。入則損於舊。此不可不知也。願陛下以主計所上疏張便坐。時上方詔主計鑄大錢爲賞賚。太師持不可。曰。愚細小人譁於道路。方患苦所積嘉靖緡錢無所用。而上方又取外府以益左藏。今新鑄大錢。是使民訛言而奔也。上詔罷之。蓋先是宮中大婚以來。故事當得賞賜者。皆籍記以待。又供奉慈寧歲幣益不足。盡仰給東南織造。上不得已。乃從中出五十金。昇孫太監隆令得次第。更請外庭莫得知也。至是大司空請罷蘇松應天織造。上不可。太師與張公申公。堅持工部疏入見。上便殿。言近者松蘇大水。民救死扶傷不暇。且陛下嘗有詔。詔孫隆還。今既兩年矣。而隆織造東南如故。非所以信詔令也。臣等以爲部議良是。上曰。近降去花樣。皆出自內帑。不以煩民間。此須奉詔。其他未織者。悉罷不取。則惟卿等言耳。時承運庫以歲用不足。給屬夷緡絮。請於歲造外加織數萬。大師念東南民力已困。度所費非得四五十萬金不可。雖復入言。上得減織造之半。令出大帑水衡錢爲之。一年庚辰正月。大師服

除詔加大傅歲加祿米一百石進前所予錦衣正千戶世指揮僉事太師辭太傅時主爵言太師當以九年考績加恩太師言臣當墨經時既謝常祿印名有父喪臣服官之日淺耳不宜以九年考績上曰卿之所處實爲恩義兩盡足以垂範萬世遂許之三月太師以鴻典畢成聖德日茂乃拜手稽首跪履上將告歸上大驚愕曰卿豈得一日離朕如何遽以乞休爲請朕惻然不寧卿宜仰思先帝顧托之意以社稷爲重永圖贊襄用慰朕懷慎勿再辭是時交章懇留者滿朝廷蓋九卿則太宰王公國光等列卿則太常寺卿蔭公武卿等臺省則吏科都給事中秦君燿等山西道監察御史帥君祥等皆上言元輔不可一日去上上賜太師龍箋手勅曰自今以往三十年願先生無復出口矣太師遂不得辭十一月上有詔度民田先是高皇帝時天下土田八百五十萬頃歲久僞滋編戶末民無所得衣食其勢必易常產令豪民得以爲姦以故田賦之弊孔百出而其大者曰飛詭曰影射曰養號曰掛虛曰過都曰受獻久久相沿引爲故業於是豪民有田無糧而窮民特以力薄莫可如何始受其病矣及縣官責

收什一貧民鬻子妻不能輸納則其勢不得不行攤派蓋自浮糧所在多有而天下盡受其病矣然民愁無聊亡逃山林轉爲盜賊則其勢又不得不請減額今讀大明會典所載弘治十五年天下土田視高皇帝時已減二十七萬蓋自所減額日以益多而國家又受其病矣太師日夜憂勞念欲爲君國子民計非清丈不可然其意懷未發也會御史中丞勞公奉詔荒度閩田閩人以爲便太師遂與張公申公大司徒張公議請以其意詔行諸路所在強宗豪民敢有撓法若潞城饒陽公族等者皆請下明詔切責以故天下奉行惟謹凡莊田屯田民田職田養廉田蕩地牧地皆就疆理無有隱奸蓋既不減額亦不益賦貧民不至獨困豪民不能併兼又民間新所墾治皆賦其貢稅以新賦均舊額中則國初故額得以減科民賦幸益以輕而天下吏民皆莫幸有用以爲世業足利賴萬世矣十二月太師以上春秋鼎盛官省覽章奏裁決萬幾又以祖宗全章睿謀神功駿烈具載實訓實錄意義精深規模宏遠足垂億萬統緒卽上欲潤色鴻業不必慕稱上古久遠之事其道惟在盛祖宗成憲耳乃屬儒臣出

累朝實訓。實錄取其大者分類編摩爲謨訓類編以進。每文華進講太師必粗述大指隨事獻納。上皆默識之。九年辛巳正月太師請令翰林院官分番入直應和文章或令侍。上清燕質問經義陳說治理如唐宋故事。上從之。四月。上御便殿太師與張公申公持南科給事中傅君作舟所上封事入見。上言大江南北大饑羣盜大起元末稱亂首事者皆潁川蕭縣人可念也。請乞大發帑金十四萬往賑之。上既許諾則太師又言今天下至困竭矣。卽上幸履路節儉臣愚過計猶以爲大司農所入不足佐緩急。乃近者官中賜賚動至鉅萬夫今所謂常例豈盡出祖宗舊例哉。不過代相沿及如今年偶一爲之明年卽稱引以爲故事陳乞耳。臣不暇遽引如世宗朝土木煩興服御無度可謂多事矣。然其後晚年私府所積尚百有餘萬。今大司農既歲輸金花銀百二十萬奉。上而陛下又欲取外府益之。且陛下與其施及糴流以求福利孰與愛養百姓。獨常賦與民用以全活億兆元元之命乎。上爲感動。九月太師在告。上數遣醫問病。蓋太師病未踰月而。上心如有所失。遣中貴奉手勅趣

召者數四矣。太師遂力疾強起。十月以一品十二年秩滿。上念先生精忠大功冠於先後命支伯爵祿加上柱國太傅降勅獎勞賜宴禮部予一千尚寶司丞太師累辭不得所請乃勉受太傅。上亦知太師以古人自期致君安國不計爵祿不復強之云。二月太師疾。上勤念不置時時下手詔問先生安否及疾久不起。上益憂之爲涕泣不食。常賜內厨饌饌食太師黃門使者相望道路都人有感嘆泣下者。六月丁亥朔日有食之朔三日彗出五車口柱星以南太師念病在不棄遂上書請賜骸骨。上覽之感痛益使人覘太師願慎加輔助醫藥厚自愛。十二日。上諭遼東禽渠魁速把亥功加太師今官進前所予錦衣衛指揮僉事同知世世不絕。時太師病已益草不知所辭惟涕泣數行下言萬死不敢拜命。已而天子聞太師不粥遣中使問太師天下大計太師迷感昏瞶且數語報。上使者既去明日太師欲遷正寢未起沐浴而溘然長逝矣。卒之日爲萬曆壬午六月二十日距其生嘉靖乙酉五月初三日享年五十八歲。計開上大震悼輟朝數日。兩宮聖母上潞王賜千餘金他諸常等無算。贈上柱國謚



文忠予一子尚寶司丞遣官 諭祭治葬如例仍加祭五壇已轎車將發 上從張公申公余公請 詔太僕少卿于君鯨錦衣衛指揮僉事曹君應奎護太師而遣司禮監太監陳君政將趙夫人嗟乎大父趙夫人太師所蒙於 兩朝若白金坐蟒蟒斗牛五毒五絲艾葉纏身蟒衣紵絲絲幣金寶珠長春花飾寶珠銀玉花墜金艾葉符金篆字金簪銀錢銀八寶豆葉羊豕酒饌多不可悉數又 上念太師純忠有捧日之功取以名其所恭建堂 御書大字對句其上賜內帑千金佐之此皆非近代所有孤等不敢稱述孤等獨謂見 上平臺 上至召先生近 御座看朕容色執太師手相問勞 上朝夕居起飲食狀悉以示太師一日昧旦侍經帷日中尚未食偶病腹上卽手調所進 御羹饌令近侍捧至太師拜手食之 上始解顏嗚呼無論孤等卽百世後未死者誰之猶令人慨然失涕 主恩未報太師誠未可死太師何遽以死爲哉太師處性淡泊遇事有執持外壯而內平無所矯飾事求當諸理不拘文牽俗居常慕子房鄭侯之爲人貴在實造不爲文言虛辭自登仕籍伉厲守高不植黨與暨入政府調劑宇內遂杜絕

私門戒聞者無敢通一刺爲人造請已諸公咸亮其特介不爲私謁門外笑不見長者車及 上在亮陰太師湛靜沉默聲色不露以身繫天下輕重者若而年雖操心堅正風節稜稜似汲長孺不可招麾去來然道固委蛇中無滯礙已創一法人稱不便輒罷之百司庶府畢於吏議者卽不撓法回訖終能自効善復振之襟度汪夷不意苛察不以一青掩大節有人指摘細過置而不問獨於人勞動記存不忘推獎恐後諸司建白惟良是採若窾言無當雖文弗錄士一見其姓名卽得其材指高下他日遇事握銓者或難其人必指某某優爲之卒能其官如所鑒不謬常言策士謂水亟魚殮令滋民擾 國家自有制度何紛更之爲以故獨申飭 果朝令甲無所創造第恐沿習久則玩玩則弗震類靡久則墜墜則弗行不得不稍稍改絃轍而淬厲之大約以正紀綱審命令厚風俗興吏治阜民財充國計振武功訖文教爲指苟利公家專行一意不以遠嫌自累不欲沾沾令人喜爲衆譁沮紕愛勞天下若振濡若沃焦皇皇如不及聞一方歲飢至深念廢寢食必計安之乃已居官歷數三朝光輔二帝俱以精誠結于明主 先帝今上咸虛懷延納官



中府中事無纖鉅悉咨而行。已位上公持國秉耒重矣。於人臣無兩。而心常慄慄如負譴懷驚。生平竭誠體國。至挾精弊神。寢忘勦人。或勸其省思慮。進醫藥。輒謝曰。吾欲畢吾分。安得恤吾身。且也疆宇未寧。羣生寡遂。卽吾髮膚幸苟完。何益。故其趨朝常中夜振衣。卽金門未啓。或先往以待。日總統庶務。斷錯解紛。出自秘閣。則留公署。延見諸公。揚推政理。四方以其職事來者。接之人人各厭其意。未嘗以憊爲解。竟用勞瘁病。脾自辛巳六月以來。業已委弊。精力疾亟。作夜思。不怠於勤。比病困篤。尚伏枕筆畫天下大事。絕口不屬身後事一言。此中外所共聞知。惟瞻顧宗社。繫心帝室。屬續之時。旣瞑復張目視。大言主恩未報。未能辭大師。吾死且不沒。遂卒。嗚呼。若太師庶幾哉。所謂死生以之者矣。後生未進。不知國家大務。然伏見先皇帝時。專務資格。人莫得克其才。官職至耗亂也。今上詔行久一簡衆職。尊禮公卿大臣。郡國守相有治行異等者。皆進于廷。陞上親慰勞之。賜璽書金綺羊酒。六曹尚書郎積有功能。得拜卿寺。不得更相除調。外臣有所調選。悉就近其地。察繁簡通塞。並用三途。督府部使者論薦所

部吏與簡臺諫。皆以四分之一待。孝廉明經茂才有舉不及格者。罰小吏如楊果。趙騰蛟等。得爲令長行。大僕寺苑馬寺得行觀察使事。與都轉運公卿子弟有行能者。待以高爵。不以左遷困人。尤寓意遠方人材。不以衰老往遠方。有缺員。不復虛其官。如曩時京朝官不得通人餽遺。有以事請謁人。其所見託者。與其子弟能發其罪以聞。有厚賞。若官墨吏。下所司論罪。悉盡本法。然禁誹謗。理註誤。許所繫治吏得執奏。設舉刺失實。或有異同。必令推詳其一二。有賞罰疑誤者。許觀吏得廷辨之。以故凡在有位。感激懷奮。皆抱功修職。不肯謁告。不以趨走達上。其已得除書。及以使事修覲入賀。行者不宿於家。各務教養實政。不肯取辦簿書期會。衆賢輻輳。仕路廓清。卽虞廷師師周士濟濟。不啻過矣。往者將權不重。功罪賞罰不覈。又或苛細。使人不得展布。凡有罪當結問。輒以武弁當之。人視將士易與。將士亦以此自輕。不復振耳。今上審定廟謨。假督府一切便宜。不數易置。時出璽書金綺相勞。有壯猷宿望已數破虜者。卽賜召還。不欲盡竭其力。每三年遣重臣出行邊計。成功。大將軍進退予奪。皆取自上意。下至偏裨。亦皆

假軍事權、爲之罷監軍使者、令文吏毋得推沮。又賜將士養廉田、出卹金數十萬勞軍。謂建議者與受事者多意見不作、往往詔建議者卽經略其事。大將軍有衝陷折關能多立奇功者、不受通侯之賞。每勅邊吏乘時修戰守、持重安詳、示虜閑暇、毋得張皇調遣、徒罷勞士卒。又親理管兵罷班軍輸作、令所在有老幼當赴代者、悉罷勿遣。其所審畫禁兵、入衛兵、餉兵、南兵、浙兵、福兵、忠順軍、山東民兵、狼兵、苗兵、所在標兵、水兵、動悉機宜、以故將士感泣、皆引弓備胡。無不願居前、得一當匈奴先死。且往者禁網疎濶、吏民無所請事、多填委簿領書、不肯奏報。天子今詢事考言、以言覈事、以事覈功、非歲久不可卒舉者、皆校量繁簡難易多寡新故久近、程督府諸司、令以時報成事、毋得故緩其大者難者、以遺後人、徒以米鹽瑣屑之務苟塞。明詔以故人皆見素、無敢匿端、咸廉廉奉約束。士大夫非奉尺一、雖歷郡國、無敢馳一軺傳、縣次不得積食、勞所在候望省賦車籍馬之費歲若干。日久官屬旣盛、則出令者多、任事者少、今汰冗員什二三、用一事權、絕人觀望之私、歲省稍食若干。計郡國吏以賦入多寡爲殿最、不煩加賦、得民宿

遺歲若干。郡縣以邑人皆鈎校其數、姦人無所逃罪、得吏胥所乾沒若干。其較著者、則決策款虜、減客兵、清糧糗、有宿飽之士、無脫巾之憂。歲所省凡得數十百萬。卽如餉昌每歲所犒虜、不過二萬七千六百、而所省保定忠順軍及固原入衛兵馬、與山東保河濬、新寧夏兵餉、已至數十餘萬。卽大較可知。以故嘉靖之季、太倉所儲無一年之蓄。今公府庾廩、委粟紅黃、朽足支九年、猶得以其贏餘數十百鉅萬征伐四夷、治漕、可謂至饒給矣。往者罪殊死以下歲久不決、國墻爲滿、殘人得以幾幸、訟獄滋多。今上詔理官修大明律例、令有司毋賣獄、毋深文巧詆、傳致人罪、無輕人人死刑、無以獄案結竟無辜、無違囚、無縱遺逃、其覆讞具獄當戮死者、卽以縣諸葉街、以故叛逆妖妄如呂老十、猛谷王、馬西川、周元、張彥文、張永賓、張天福、張崇庫、王道、李一真、王志學、喬濟時、龔志向、黃崙、劉守業、賈邦奇、楊時貢等、皆駢首就戮、赤眉綠林、黃巾白蓮之禍、不足憂國家。且人重犯法、不敢微幸三尺矣。異時有人越貨事爲故常、有司匿不以聞、今上重弭盜之任、申保甲之約、設斬捕之格、嚴洗命之條、厲窩盜之禁、厚協捕之賞、寬未得之期、薄既獲之



罰則吏務詰奸人懷逸賊以故幅員萬里皆重垣密
樹如長蛇委蛇覆蔭中路警夜捕盜巡徼江海凡山
川陷穢水行載舟者皆萬里不持寸兵有道不拾遺
之風矣初上新嗣位之時因用大誥上不得
已念國家惠澤唯施及困窮不以惠養豪猾雖有
肯督賦然萬曆丙子業賜民田租輯寧邦本未可
謂刻急也且上曠蕩之恩寬大之詔抵等靡得
而志志其大者則是年太師偕呂公張公請蠲賦二
百三十四萬有奇今年太師偕張公申公請蠲賦一
百三萬有奇本色米六十五萬五千二百有奇絹布
一百四十二萬七千二百有奇顏料蠟茶三十三萬
七千一百有奇其他如已卯所減泗州寶應鹽城等
郡邑賦錢一十三萬二千七百有奇河南賦錢一十
三萬一百有奇所在有之多甚不記且上在位十
年而賑貸蘇松等郡凡七減漕七十餘萬賑貸淮揚
等郡凡十三減漕九十三萬不可謂非省愛鰥寡孤
獨窮困矣況外縣如馬船料價糧料馬價班糧工價
名糧均徭公費驛遞稅契等皆歲有寬政上又明
詔有司積貯以備凶年罷江南織造令所在守臣直
指監司歲時巡行郡邑問勞疾苦察舉冤獄毋得輒

自議法擾民與黎民休息上德念深矣豈無忝民
不識不知即從古已然乎夫俺荅至嘔還矣自
先帝甲申臨戎匈奴蒙恩謂將復有成祖犁庭之
舉故明年俺荅吉能遂請內屬夫疆者先臣弱者焉
往以故名王解辦元戎獻馘艾維南荒悃悃東越在
閩粵則朱良寶林道乾林鳳在粵則惠潮藍一清賴
元爵文昌李茂鄭大漢龍川鮑時秀東山石牛青水
卑公慎覃世活合浦黃章弟古田章銀豹懷遠章朝
義右江章明甫昭平黎福莊荔浦章公海北三章千
里河池韋朱武鬱林黃邦綠木頭峒覃扶王在蜀則
九絲阿大凌賓阿苟建昌阿怒都都方三傀夏葵明
叩在陝則偕文正登河州且戎上同官李宗鸞在滇
則臨安記來王魯塞易克鐵索青羅華金齒藍昌黑
在貴竹則安順者念繼王黎平汪約石應斗貴陽阿
利普安光見王播州楊貴在楚則五開胡國瑞及羅
旁府江北五峯咳龍哈十寨宜山都亮祿烏免多浪
里松里嬰田來賓松潘威茂風村白草諸賊或偽上
帝號或代襲王稱莫不頓顙伏辜獻圖請吏獨東虜
者太師謂外寧必有內憂故釋土蠻不誅以為外懼
然速把亥既會哈反帖阿都亦明安之事虜已累氣

脅息設 上欲滅胡，第令使一梟騎縛之耳，何足煩大將軍十萬之師乎？烏思藏奔，噍喇皆近古不賓之國，出平天，漂亞察，何斗皆上世難馴之民，今皆煦沫承流，奉琛納贄，豈非千載泰寧之一會哉？夫天下有一世之計，有萬世之計。今西自嘉峪，東至山海關，延袤萬里，崇墉密雉，如天險不可升，虜無能躡人。又南自高郵，北至太行，堤延袤四千餘里，兩堤崢嶸，屹爲鉅防，必不至引水病漕。且其所費皆取諸贖銀，不索水衡少府金錢，此皆萬世之計，非太師所能辦。蓋主上聖明，獨運甄陶，下有二三元老共熙帝載，諸所建設，修廢墜，皆諸監臣石畫，賴天地宗廟社稷，以故玄化滂流，浸淫衍溢，功侔往初，兼並神明。先太師何幸身親見之哉？且太師道雖直方，中實剛坦，少讀春秋傳，慨然曰：古稱政之所予在順，民心有以拂爲順者，子產也。吾殆類是乎？其論治欲倣官邪，齊民萌不專姑息，有救世之思。蓋獨見謂罔少密則莫能扞格，法可懸而不可用，特以初引綱維，不得不固，握其柄而信用之，意俟天下遵制揚功，風成俗定，然後恢闊禁罔，削除煩苛，示民長厚之道耳。其後臺省皆言諸象指者，競趨武健，刑多失束，非聖世事。

太師深然之，遂請 詔有司，以非罪榜掠人至死三人以上者，編爲卒伍，著爲令。嗟乎，深故之罰，其意斷可識矣。比年猶崇悍大，惜其未究刑措之施，遽以天年下世，可勝嘆哉！昔子產爲政，鄭人厥有惡言，居有頃，鄭人復歌之曰：我有子弟，子產誨之；我有田疇，子產殖之；子產而死，誰其嗣之。夫民不可與慮始，而可與樂成，所從來遠矣。乃太師生時，俺荅安國等卽爲太師置像，旦暮尸祝。公今其無祿卽世，鴻生鉅儒多稱引記功，宗以功作元祀，一篇之中，三致意焉。下至武夫健卒，田畯紅女，聞有垂涕者，其所遭遇豈不逾於子產哉？太師少讀書，破萬卷，無所不窺，然獨觀大義，惟務宗旨，不求蔓引泛溢，爲文不屑屑程度，不喜譸怪，第取境與神會，言與志足，而柔澹春融，得天然之致。每屬草輒棄去，不欲垂空文自見。篋篋中雖多所存，行世者奏對稿而已。至呈辭肅大寶，丹臚諸箴解，若講讀諸書，無非闡理，真經學士大夫類能道之。資由天授，警敏疏徹，博聞強識，尤明習 累朝故實，事至輒口誦某時著爲律，某歲掣爲令，不煩討核繙閱，日數行下，案無留牘，洞晰機宜，遠至南望堂竹之夷，北徹瓊表之虜，譚險阨要害，出沒向背，較若列



眉若懸寓。用能以樽俎折衝。機務紛紜。人或憂其難。駐太師殊閒適。自公退。則游情藝圃。旁通稗官小記。及諸賢書。習學試義。悉手自品臨。示諸子弟。其暇豫如此。家居。馴行孝謹。以處。君父骨肉之間。交直其難。不得歸持大父喪。以此常邑邑。何已。上凡所賜鮮新。不上大父靈几。不敢食。侍大母趙夫人於邸。備極色養。每所必適。寢所問侍者。太夫人眠食狀。乃行。甫歸。卽之親舍。從容宴語。怡乎猶孺慕也。于兄弟友愛。愛叔父居易尤篤。悼仲父居敬蚤世。妮妮于其孤姪嗣敏。拊而長之。尋以已所授廕與之。所教與孤等埒焉。庚辰春。季父居謙計至。哭泣哀思。再上疏請告。疏入。不報可。然後出。逾年。不永。霧毅朝士咸見之。蓋天植云。教子獨用嚴毅。慕萬石君之風。每丙夜肅襟危坐。諸子無論壯少。皆不敢入侍。居恒所面命。自砥節礪行。文藝兩端之外。無一語及垣屋田宅。及諸子稍長。業登仕籍。向用其告。以居官仕宦任職。惟比擬已行事。天下事有未發者。密不使聞。僉同乃可決爾。吾安能知。設或乘間問某事後當如何。卽脆然大怒曰。此非乃所當聞。輒引曹相國之事相戒曰。昔漢惠使者曹窋洗沐私。從容問其父。以不請事何以憂。

天下相國怒窋。答之二百。曰。趣入侍。天下事非若所當言也。夫窋爲中大夫而亦旣長矣。又奉帝命。乃相國怒答之二百。兒曹獨不畏曹窋事乎。于是諸子重足一息。毋敢出聲。每過庭。非有所問。輒良久待立。不敢出一語而退。匪卽報。卽除一令丞。茂由知。蓋不言垣屋田宅。不屑以治產導其後。此無足論。其于國家事。又惟謹。不以言者。太師爲國家之心。與其諸子之意。深遠矣。治家窮約如寒素。性好施與。大官之脯所入。以充歲時存問里中所知交。不求以羨姻。嫌。諸僮指廩而食者。若而人。總族中僅有田若干畝。根七十石。戒子弟輸納。無敢後時。其外繇非分所當復者。孤等不敢脫一錢。更卒有豪猾賄里胥。竄名太師籍中。歲歲復無有所與。孤等發其姦。守臣以聞。大司農請以其意布告天下。雖有長爵復復。母得過制。今罷民得寬力作。皆推太師意也。比卒。發陳篋。僅得上所賜帑金文綺。亦大都煩費矣。上聞而悼之。賜錢布薪。遂有數。乃得喪事如禮。太師先配顧氏。贈一品夫人。繼配王氏。封一品夫人。子男六。長敬修。禮部儀制清吏司主事。娶癸卯舉人高公嵩女。次嗣修。丁丑進士及第。第二人翰林院編修。娶四川左叅將。

賀公麟見女。次懋修。庚辰進士及第第一人。翰林院修撰。娶江西布政使司左叅議高公尚志女。次簡修。錦衣衛指揮同知。娶刑部尚書王公之誥女。次允修。府諸生。娶刑部四川清吏司主事李公幼淑女。次靜修。尚幼。聘工部尚書李公幼滋女。女一。適刑部左侍郎劉公一儒子。太學生。戡之。孫男六。重光嗣修出。重輝敬修出。重登重元懋修出。重潤重胤簡修出。皆幼女。三。敬修所出。許聘吏部左侍郎王公篆子。懋修二女。永聘皆幼。唯是本月二十八日。孤等將扶太師還楚。卜吉而藏。泣血拊心。以先人幽光與黃腸俱拚。是懼私心。願得長老先生。揭石墓門。以託不朽。非長老先生狀之。則事且無徵。恭惟明公道高。管鮑文。蔽班揚。單言迺適崇褒。半詞允爲信史。用是藐焉諸孤。敢微福先靈。綴經叩關。人以請。夫奉職守官。人臣常分。先太師謀猷入告。事在密勿。非世所宜知。孤等又敢自木強。不問外事。曠曠靡所睹記。特按疏草。慙令聊據拾什一於千百。事有缺漏。言無增飾。謹布之司籍者。伏乞哀而存之。賜一言以爲太師重實嘉惠九原。流精誠於窳窳。貽休百世。耀華衮於縑緇。豈惟孤等實世世子孫。非生死所能報塞矣。敬修等無任泣血。

哀懇之至。

張敬修撰
《張太岳集》卷四七

校記

①頓：當作「頃」。

②青：當作「皆」。

③輒：當作「轍」。



藏 儒

明儒碑傳集卷七十六

張居正二

張公居正傳

王世貞

張居正字時大，湖廣之江陵人也。少穎敏絕倫，十五爲諸生，眇小而是時尚書顧璘撫楚行部而試其文，奇之。已得召見，復大奇之，曰：「此兒國器也。」遺以金錢爲膏油費。明年舉于鄉，謝璘解所繫犀帶以贈，而曰：「爲若異時闊腰飾，然當且玉不足久，潤也。」自是又六年而登進士高第，改翰林院庶吉士。是時爲嘉靖之丁未戊申間，諸進士多談詩爲古文，以西京開元相砥礪，而居正獨夷然不屑也。與人多默然，潛求國家典故與政務之要切者，衷之而時時稱老易，以爲能得其用。諸老先生如徐階輩皆器重其人，相推許，遂得授編修。尋以妻喪請急歸，亡何還職。居正爲人頎面秀眉目，美瑣髭，幾至腹，沉深有城府，莫能測也。時嚴嵩爲首輔而忌徐階，諸善階者皆避匿，而居正行意自如。嘗考會試而其門生自喜客于嵩，能得嵩意，居正衆斥之曰：「李樹不代桃僵耶？」亟去，毋辱吾門。衆少莊憚之，而有天幸，毋爲嵩耳目者，嵩顧亦稱居正。久之，遷右春坊右中允，領國子司業事。居正待諸生嚴，亡所寬假，而獨與祭酒高拱善，相期以相業。尋

還理坊事，遂以選侍。裕邸講讀，王頗賢之，邸中中貴人亦無不賢居正者，而李芳數從問書義，頗及天下事。尋進右諭德，兼侍讀，預校永樂大典，復預修興都志，始解裕邸講，進翰林院侍讀學士，領院事。時階代嚴嵩首輔，盡以志事委居正，而其所具藁草輒爲輔臣文煒所制，及煒卒，階乃復從居正草進於上。中外目爲居正，謂必大用矣。世宗崩，階草遺詔，頗引以共謀。居正尋遷禮部右侍郎，兼翰林院學士。月餘，與裕邸故講臣陳以勤俱入閣，而居正爲吏部左侍郎，兼東閣大學士，尋充世宗實錄總裁。經筵開，爲同知經筵事。至秋，進禮部尚書，兼武英殿大學士。亡何，加少保，兼太子太保。去學士之五品僅歲餘，而至一品，其登進之速，雖張桂不能過也。時年僅四十。三當居正之進閣，閣臣凡七人，徐階最爲老宿，與李春芳皆好折節禮士，郭朴、陳以勤皆重厚長者，獨高拱狠躁，而以不得志於言路稍繇，尋引去。居正最後拜，獨謂輔相體當尊重，於朝堂倨見九卿，他亦無所延納，而間出一語輒中的，人以是愈畏憚之，重于他相矣。徐階既去位而春芳代，居正意仰視之，以爲不足與有爲，而大學士趙貞吉入，其位居居正下，然自負長策而材，間呼居正張子，有所語朝事，則曰：「唉，非



而少年輩所解。居正內恨不復答。而與中貴人李芳輩謀。召用高拱。俾領吏部。計以扼貞吉而奪春芳政。拱至。益與居正善。常是時。天子頗好游。而重武。居正上疏言六事。其一曰。簡議論。謂。朝廷之間。議論太多。或一事而甲可乙否。或一人而朝由暮詬。或前後背馳。或毀譽矛盾。是非淆乎唇吻。用舍決於愛憎。政多紛更。事鮮統紀。大抵事無全利。亦無全害。有所長亦有所短。要在權利害之多寡。酌長短之輕重。斷而行之。信而任之。二曰。振紀綱。謂。近年以來。紀綱不肅。法度不行。上下務為姑息。百事悉從委徇。以模稜兩可為調停。以委曲遷就為善處。刑法之加。惟在微賤。庶人之議。反重。朝廷賈誼所謂。嚴法者欲上。權乾綱。張紀綱。法所當加。雖貴近不宥。事有所枉。雖疎賤必伸。三曰。重詔令。謂。天子之號令。譬之雷霆。若風不能動而霆不能擊。則乾坤之用息。造化之機滯。欲部院覆奏。數日即報。不得緩之撫按。行撫按議處者。嚴立期限。不得延緩停閣。四曰。嚴名實。謂。今用人者。稱人之才。不必試以事。任之以事。不必考其成。至於債事之時。又未必明正其罪。惟魯少文者。無用而見譏。大言無當者。虛聲而竊譽。倘儻伉直。

者。忤時而難合。脂韋逢迎者。巧宦而易容。或以卑微見忽。或以名高見崇。或用一善而借資終身。或因一疵而取病眾口。官不久任。事不責成。更調太繁。遷轉太驟。資格太拘。毀譽太易。欲以嚴考課。審名實。責之吏部。官各久任。毋遽遷轉。五曰。固邦本。謂。近以蠲賦至半。國用不足。邊費重大。內帑空乏。分道檢括。庫藏盡掃。以致水旱災傷。坐視而不能賑。用兵供餉。百出而不能支。欲。上停免一切不急工程。無益徵辦。精擇守令。講求出納。其分道之使。一切取回。六曰。飭武備。則欲。上修。祖宗大閱故事。張皇六師。躬賜校肄。旌別技勇。汰易老弱。疏上褒諭。下部院議行。於是各推演疏指事。別為演多至十餘條。以媚居正。而所謂大閱者。上意果為動。令所司擇日行矣。大閱費不貲。時方諫。而給事中駱問禮頗言其非急。居正亦覺之。乃復上疏請停止。上不允。居正以善事。札諸公有密勿。疏草多委之。如救給事中石星。御史詹仰庇。停取戶部金三十萬。請。皇太子出閣講學。其草皆自居正。而同列李春芳。陳以勳。趙貞吉。殷士儋。之見逐。雖發之自高拱。而其機皆出居正。居正故所獨厚者。司禮中貴李芳。一日言官有忤。旨而當。

然者春芳顧而曰：當何處？居正遽曰：不過示責而貸之耳。春芳具如居正語，而俄頃居正以片紙使小吏投芳曰：此人狂矣！即上貸之，恐有繼言者，須請罰而後可。芳請於上，改停三月俸。而春芳後謂得之心，恨居正而不敢發。尋李芳以強諫失上意，秋網之獄，而居正小屈。後諸公去，且盡，獨居正與高拱在。兩人相得益密，會北虜請入貢，通互市，亦推居正贊之。初以滿三載加柱國，進太子太傅，再以六年滿加少傅、吏部尚書、建極殿大學士，兼支大學士俸。遼東戰功，加太子太師。和市成，加少師，餘如故。嘗者少師階，居正故受業知己也，其去由張齊之爲拱而終伐然，居正實言之。李芳謂階久倦宦，以是亟報許。既許而心愧之。階既去，然約束其三子，事居正謹，而拱銜階甚，必欲殺之。噤言路，追論階不已，而使其所讒誣飾其諸子罪，下撫按置獄，事益急。階求救于居正，居正從容爲拱言：階一旦巨測，公負薄舊僚名，拱稍心動，而居正頗復爲撫按居間，業稍緩，而拱之客乃構于拱，謂居正納階子三萬金，賄不足信也。拱無子，而居正多子，一日戲謂居正造物者胡不均，而公獨多子也。居正曰：多子多費，甚爲衣食憂。拱忽正色曰：公

有徐氏三萬金，何憂衣食也？居正色變，指天而誓，辭甚苦。拱徐曰：外人言之，我何知？以故兩自疑，而拱之客謂問可乘也。日稍稍以居正過聞拱，而都給事中宋之韓遂具疏，且論居正草成而居正知之，走見拱而盛氣言曰：公不念香火盟而忍逐我耶？拱錯愕出不意，曰：誰敢論公者？居正曰：公之門人宋之韓已具草矣。拱曰：亟呼而止之。居正曰：公發之，安能止之？拱曰：請出之外以明我心。晨入部，以某省參政補之韓，而其疑居正益甚。拱又前後薦其所善中貴人陳洪、孟冲柄司禮，而抑馮保。時尚寶卿劉喬庸疏，隨時政敗事，語侵拱，而給事中曹大埜則極論拱諸大罪，居正爲憾。自謫大埜于外，喬庸亦坐謫。或云居正實使之，或云獨大埜受之馮保，莫能明也。上一日甫視朝，忽馳而下，且墮于陛間。第云國有長君，社稷之福，語且不了了。居正與拱趨而掖之起，還宮，即不豫者月餘矣。卒臣日詣闕問安。上方卧，蹶然興，肩輿至內閣，居正與拱驚出俯伏。上携之起，而持拱臂，仰天氣逆結久之，始云：祖宗法壞，且盡奈何？亦復不了了，而持拱袂步，且至乾清宮門，始復謂第還閣，別有諭。明日寂然，而居正察知上色若黃葉而



肯立神朽、應有巨測、爲處分十餘條札而封之、使小吏持以投馮保。卽有報拱者、急使吏跡之、則已入矣。拱亦不知爲何語、第志甚、至關而詰居正曰、昨密封之謂何。天下事不以局我曹而屬之內豎、何也。居正而發、亦不能答、乾笑而已。徐而曰、吾日與飲食通、公安能一切瞰我。拱淺謂實然、不復置臆。而 上崩、拱與居正惓然具 遺詔草、拱復自具草以問、凡數事、皆欲收司禮權歸內閣。馮保聞之意不善也。上方諒開、拱有請必報、可以爲能得 上心、而族所善言官四五人列疏論保、謂必下拱、卽擬 旨逐之、而使其心腹韓輯報居正、行且建不世功、與公共之。居正陽笑曰、去此悶若腐鼠耳。卽功胡不世也、而陰使人馳報保、得預爲備而逐拱。居正既代拱、首卽請還鈔傳吏部、頃之、上御平臺召居正而論曰、父皇昔在御日、嘗一再聆德音、謂先生忠而高、拱邪、先生幸自愛、悉心見輔。因賜居正金幣及繡蟒斗牛服。居正頓首泣謝、謂今 國家要務惟在遵守 祖宗舊制、不必紛紛更改。至於講學親賢、愛民節用、又君道所先乞 聖明留意。上曰、善。亡何復賜居正白玉帶。自是賜賚繁渥、無虛日矣。時 上幼冲、虛已委居正。

居正既得國、亦慨然以天下爲己任、中外想望丰采。既已大計廷臣、於拱私黨多所屏斥、而他不職者亦皆是。復具 詔草請於 上、召羣臣廷飭之。謂近歲以來、士習澆漓、官箴利缺、鑽窺實際、巧媒躡取、鼓煽朋黨、公事排排、詆老成廉退爲無用、誇說佞便捷爲有才。愛惡橫生、恩讐交錯、遂使 朝廷威福之柄、徒爲人臣酬報之資。是用去其太甚、薄示懲戒、餘皆曲賜矜原、與之更始。書不云乎、無偏無黨、王道蕩蕩。無黨無偏、王道平平。朕方嘉與臣民會歸皇極、諸臣亦宜痛濯宿垢、共襄王道。自今以後、其尚精白乃心、恪恭乃職、毋懷私以罔上、毋恃祿以養交、毋依阿澳濫以隨時、毋嗜香翁皆以亂政。任輔弼者毋昵淫朋、以塞公正之路、典銓衡者毋作好惡以開邪枉之門、有官守者宜分猷念以濟艱難、有言責者宜竭忠直以資聽納。大臣當崇養德望、有正色立朝之風。小臣當砥礪廉隅、有退食自公之節。若或沈溺故常、堅守途轍、以 朝廷爲必可背、以法紀爲必可干、則 祖宗憲典其廢、朕不敢赦。詔下、百僚頗惕然。而是時 上尊尊崇 兩宮故事、天子非適生而尊、皇后稱 皇太后、若生母亦稱 皇太后、則別徽號于 皇

后以別之。馮保欲媚上生母李貴妃，乃風居正以並尊。居正不敢違，於是下議尊皇后曰仁聖皇太后。皇貴妃曰慈聖皇太后，而兩宮不復別矣。慈聖徙居乾清宮，撫視上主持國秉而倚馮保爲重。又與保俱德居正，中外大柄悉以委之，而居正亦自泯。勵亡所受徇，經筵開爲知經筵事。修世廟實錄爲總裁，尋加左柱國，進兼中極殿大學士，予一子尚寶司丞。上疏三辭，不許，而賜白金百兩，文幣四，有副繡蟒衣一襲，復力辭前命，乃許之。下聖書褒諭，以風示百僚。居正之爲政，大約以尊主權，課吏實信賞罰，一號令萬里之外，朝下而夕奉行，如疾雷迅風，無所不披靡，乃始快於志。居恒謂高皇帝真得聖之威者也。世宗能識其意，是以高臥法宮之中，朝委裘而天下不亂，以太阿不下授也。今上世宗孫也，奈何不使之法。祖時黔國公朝弼數犯法當逮，而朝議皆難之，以爲朝弼綱紀之卒，且萬人不易逮，逮恐失諸夷心。居正擢用其子而馳單使縛之，卒不敢動。既至，請于上貸其死，而錮之南京。人以爲快。漕河通，居正以歲賦往往迂緩，逾春而後發，卽水橫溢，非決則涸，乃采漕臣議，督艘卒以孟冬月

兌運，及歲初而畢發，發少罹水患。其始農頗不便之，久而習以爲常。太倉粟至支十年，歲與虜互市，饒馬則減太僕種馬，而多令民以其價納。民既樂于不擾，價以時上，太僕金亦積至四百餘萬，又爲考成法以責吏治。前是六部都察院有覆奏而行撫按勘者，度事之不易行，或有所按覈，或兩訐當質成者，其人各以私軋，則稽故之，至數十年而不決，遂廢寢。居正下所司，以大小緩急爲期限行之，誤者抵罪。自是一切不敢飾非，政體稍肅，而漸有不便於居正者矣。尋以六載滿加特進，中極殿大學士，賜白金，綵繡寶鈔，羊酒加等。居正有子曰懋修，與其弟居謙俱試于湖廣，得中式。懋修僅能成文，蓋主司有庇之者，人以爲居正不與也。而至會試不第，居正斷斷修怨，其主者人漸識其意。而是時吏部尚書楊博病免，當代廷議以左都御史葛守禮、工部尚書朱衡、南京工部尚書張瀚推衡自謂官官保，當前敘，而又素善事居正，頗以驕于公卿間。居正聞而厭之，然亦惡守禮，不能散彼如意，故特拔用瀚。瀚資望最凡薄，其預推也衆，固已怪之。自是忽見拔，舉朝大駭，益相率趣事居正矣。始內閣臣高儀不久卒，居正以呂調陽弱薦代之。



調陽與居正行同而年差長然秩尚卑居正引之數加恩至保傅調陽雖不敢有所持諍然內不甚附之居正事取獨斷亦不復諮訪嘗病假一日而遽入取調陽擬旨皆更定曰如此何以示遠近部院大臣緣居正指益易調陽甚或故抑絀其鄉人及親厚者以見公調陽惟仰屋歎詫而已上以師臣待居正凡所下御札皆不名稱先生或稱元輔有二白燕育于翰林院白蓮雙蒂者三居正以爲瑞進之上不自居歸德于居正而居正父母皆老壽無恙上嘗出塔緇金幣裝重綵以手書慰諭賜焉居正故妻無弟乃大治第於江陵城使提騎百夫長麗其者假干服顯陵之便而爲督治舍宇甫建而馮保言于上名其堂曰純忠左曰社稷之臣右曰股肱之佐名其樓曰捧日又爲僊語以正氣萬世休光百年美之皆御筆大書而出內帑白金千兩爲賀費於是全楚之臺使者監司郡守皆有賄已環楚而爲臺使者監司亦如之凡三載而就費直將二十萬自居正幣者不能十之一矣留都之小閹醉辱一給事中其長已執而賄笞數日且請旨繫治矣而它給事中爭上疏請究聞其語激居正取其尤激者趙參魯誦之

外而謂其欺幼主不道意以悅馮保也保故以德居正居正稍稍說其裁抑中貴人毋與六曹事毋輕銜命出使而即使提騎尾而陰訶其短惴惴畢事幸不見捷訶以是怨居正而不歸心保居正念御史在外驕往往凌撫臣出其上痛欲折之一事小不令詬責隨下又勅其長加考察以故御史給事雖畏居正然中多不平而仇勁喜事者出南京戶科給事中余懋學疏請行寬大之政居正以爲風已奪其職爲庶人而御史傅應植繼言之尤切然不敢有所侵于居正也居正以經筵進講畢訴于上謂此曹子欲市國恩收召朋黨以便姦縱私至下錦衣逮杖而戍之濱海給事中徐貞明等坐就獄視且索餉亦逮謫外御史劉臺居正所取士也由刑部郎改居正擬以爲德而臺居頗近數刺得其陰事而惡之俄出按遼東遼東捷御史不當報而臺誤報居正以故事裁斥臺臺益惡居正且分不得免遂抗章極論其黷橫十餘事居正怒甚見上俯伏而泣不肯起上爲下御坐以手掖之而曰先生起吾爲逮臺竟其獄以慰先生臺至下詔獄上命內閣杖之百而遠戍之時物議頗訾別居正不自安乃陽具疏爲解得不杖而奪

職還里。客有賀居正者曰：公真宰相度哉！居正蹙額曰：不過宋宰相事耳。古人殆不然。蓋以輕處爲未嫌也。亡何，吏部左侍郎、翰林院學士、掌詹事張四維進禮部尚書、文淵閣大學士，入內閣。故事，入內閣者曰同某人等辦事。至是，直曰：隨着元輔居正等辦事。不欲夷之僚佐也。于是四維恂恂若屬吏矣。張四維字子維，山西平陽之蒲州人。少于居正一歲，舉進士，改翰林院庶吉士，授編修。以久次爲右春坊右中允，充經筵日講進右諭德，兼侍讀。四維北人，粗讀書，自負能文章，而實少所通會。頗有幹用才，於尚書博爲鄉後進，而尚書王崇古其舅也。二人皆久任邊事，以故四維亦頗習之。最爲輔臣高拱所器重，遂超爲翰林院學士，復超爲吏部右侍郎，兼學士如故。轉左侍郎。崇古時總督宣大，俺答求入貢互市，崇古以請于拱，而四維交關其間，事頗有緒，拱益器之。而是時殷士儆長吏部，加太子太保矣。又上裕邸時與拱先後講臣也，而拱欲拔四維前士儆而入閣。士儆不獲已，則以中貴人陳洪援取中旨得大拜，以是心怨拱而忌四維。四維猶干進不已，其父監臨長蘆累貲數十百萬，而崇古墜在河東，相與擅二方利。按河東者御

史部永春怒二家之橫上疏論劾崇古、四維，詔勿論。而士儆謂四維有就可傾也，四維復疑士儆之使之以是兩相構，而給事中韓輯拱客，而于四維有鄉曲舊復指撻士儆。士儆以是益怨拱與四維，而卒不勝，竟罷去。有爲士儆不平者，復援永春疏指劾四維。四維意不懌，引疾歸。告歸未幾而拱復念之以修實錄副總裁召同尚書高儀掌詹事府事。將出而拱敗，復引疾予告。四維既饒于財，歲時候居正不絕而懇聖太后之父武清伯偉故籍山西，得四維重賂爲之白。太后信掌詹事府。時呂調陽樸而老病，致求去，不能當居正意，而維頗精悍，其督視修實錄功踰于昔。維其出不盡由居正，非其所惡也。既入內閣，事推居正，居正雅亦相狎。尋實錄成，調陽加少傅，太子太傅，而四維亦加太子太保矣。居正加左柱國，支尚書俸，頗再辭疏。上謂實錄國家最大典，且一句一字孰非出先生筆者，而何獨辭。居正復疏言：「一句一字果與計筆，第此臣子常分，何足言功。而通年以來，人臣苟効微勞，輒萌非分之想，小有不酬，則深獨賢之怨，臣實恥之。故不敢苟就，冀以少勵此輩。」上始允其辭，爲溫諭百餘言，頒示史館。諸拜恩者皆不樂。



而是時少詹事王錫爵遷詹事亦上疏辭不許。居正以錫爵官不及辭而辭者常有激也意銜之。錫爵侃侃自若。尋禮部舉會試而次子嗣修與呂調陽之子興周皆中式。居正等以嫌請避不允。于是假其柄於四維而詹事中時行使所知以副修卷上之。四維已次名二甲第一矣。既進御上啟姓名則拔嗣修二甲第二人而召居正謂曰無以報先生功貴先生之子孫以少報耳。居正叩首謝出語人冀塞言者口而劉臺言漸驗。虜款塞久不為中國害獨小王子之部十餘萬衆東北直遼左以不獲通互市數入寇然其人少弱非久即退而總兵李成梁悍勇善戰數却拒之。東直者奉寧編餘女直諸屬國夷好侵盜為不利成梁伺賊入輒劫其後營內殺老弱焚掠輻重又以春中陣騎掩之賊屋居不便移徙斬首幽生歲以千計。居正張皇其捷天子數褒美加恩輔臣居正多辭不受僅受賞而成梁至僉五等爵位三公而兩廣之破山賊者督撫殷正茂凌雲翼所南斬尤多至數萬其爵實亞遼左。天子謂居正運籌功多居正益重戚繼光者亦東南良將也既鎮薊門多挾南兵從而北人嫉之繼光懼而是時兵部尚書譚綸與繼

光以財通給善御女術頗用于居正。居正試之而驗則益厚給以示竅。繼光乃時時購千金姬進之居正且他所舉查多得居正意以是事與之權。諸督撫大臣唯繼光所擇欲為不利繼光者即為之徙去之。而成梁與二廣之賂亦接踵至居正不能却也。居正性整潔好鮮麗日必易一衣冰統霞綺尚方所不逮時錦衣大帥朱希孝所畜名書畫甚富且死哀其精絕者以識別居正既露之於是日有進以博一解顏然尚不能當嚴氏之十二而他珍奇瑰異稍浮之矣。居正天資刻薄好申韓法以智術馭下而士大夫之檢點者爭欲投其意張瀚以久任之說達然僅能行之潘泉守令而不能行之給事御史吏部屬譚綸用給事中楊言以戰驛遞之說達則兩都大臣諸方面之任成就民舟車就旅店食與貨商賈無別而其屬以公使行則馳驛呵殿道路不勝其陵替而遠宦者雖貴不任行矣。省冗官則郎署多長僚而待補者累累無罪而黜祿矣。清庠序則大邑之挾經就試者千餘人而獲隸學官者僅百之一貧書生改業而賈矣。皆觀以為名美而奉行之人卒不能堅久以故見害而不見利。然仕路為少清費亦減十三四。承平久姦盜

峭起至深入城市、剽府庫以去、有司秘之、莫敢發。居正特嚴其禁、匿弗舉者、雖循吏亦必黜。得盜即報斬決、以是有司莫敢飾情盜賊畏死、爲衰減而亦多倉卒不審者。例盜邊海錢米盈數皆斬首示衆、然往往取長繫不能完、至庚辰居正獨亟斬之、而追捕其家屬、文吏不習見祖宗制、創聞以爲駭而不便者、相率而爲怨謫。居正奮然身任之、不恤也。又以糧運阻、喜道者議通海運、然不能得、故時舟子長年而且謂山島多炸孽、能觸舟、於是膠州一大條謂有膠河故道、自海入青、穿萊而出、可以避之。其意欲通故河以利其鄉邑、而大僚之上佐久滯淫不獲登八座、和而請從事焉。居正大喜、命以侍郎兼憲職發青登萊三郡夫數萬人鑿之、然河之中道高下不能達、稍深則岍立頓迂道而其下多石、費十餘萬金、卒不可復、而大僚之鄉人未見利、不勝調發相與逐而噪之、乃中寢。然居正竟不罪此兩人而用之、其自用類如此。世宗朝士大夫失之言祥瑞者、居正輒頷而醜之。其秉政乃獨好飾祥瑞、以上下兩盡類言及災異則怒而見辭色、於是一切爲蒙蔽。滿九載不上考、請罷、溫旨慰諭如例、賜白金、麟繡御膳、肥腍上尊外、復加賜白

金二百兩、坐蟒衣一襲、綵幣八有副。坐蟒者、禁服也、惟司禮首瑞、上所憑倚、間得之、而居正凡三被錫。吏部具故事上進、左柱國、太傅、子一子尚寶司丞、聖書寶美、給四代誥命、賜宴吏部、凡三辭不允。最後辭太傅而已。上將行人婚禮、敕疑用情、欲加恩居正、疏辭、仍賜白金百兩、綵幣八有副。調陽等賜各有差。意聖去乾清宮、將返慈寧、勅諭居正、謂我不能倪皇帝朝夕、恐不若前者之向學勤政有累。先帝付托先生有師保之責、與諸臣異、其爲我朝夕納誨、以輔台德、用終先帝憑几之誼、社稷蒼生永賴焉。因責坐蟒、蟒衣各一襲、白金二百兩、綵幣八有副。居正侈之外、光勳朝野。尋馮保之責、與托寄約略埒是。而亡何其父封少師、文明卒、同列以聞、上遣司禮中貴人慰問、起止視粥藥、止哭、絡繹道路。三官贈贈白金共一千五百兩、鈔萬貫、彩幣三十皆有副、白架六十石、麻布百五十疋、香油薪炭稱是。上加恩居正雖踰于他相數十倍、然未嘗有意留之、而居正出錯愕、無專見、而最厚者同年戶部侍郎李幼孜等倡與辭、謂上冲年不能親萬機、不可一日無相公、何忍舍而遠去、遂以奪情之說進、而居正惑矣。故事、



首輔去位之三日、則次輔遷坐左、而翰林諸僚吏衣
緋以謁。至是諸僚吏皆衣緋入、調陽推不能識物情、
雖不遷坐左而不先期止其僚入揖。有報居正者、謂
翰林皆衣緋抵閣矣。居正悲、謂我尚在而不復少顧
忌我、卽一旦出春明門、何望更入。乃陽上書請乞守
制、而露意馮保、使固留之。時有議者皆以爲非、然而
不敢言之朝、而王錫爵與其僚張位、趙志臯、吳中行、
趙用賢、習孔教、沈懋學輩、皆以爲不可。懋學移書李
幼孜、責使諫止、且責給事御史不言。幼孜唯唯而已、
而泄之居正。居正怒甚、上遣吏部尚書張瀚宣
旨慰留居正。瀚在吏部、其事居正無不茅舉、且以浮
濫數爲言。官所獲、籍居正以安、然不敢以居正奪情
爲是。而左都御史陳瓚、北人也、倡六部請留居正。禮
部馬自強頗持之、未上而居正悲、則請于上。謂瀚
昏老、勅令致仕矣。御史曾士楚等遂上章、請留居正。
吏科陳三謨故居正客也、而迫于同事者小進、聞居
正之怒之因、蒲伏謁居正、涕泣求解、俄而疏亦上矣。
用賢不能平、約中行具疏、請勅居正歸、除服而後用
之。然其辭緩、而刑部員外郎艾穆、主事沈思孝繼之、
則稍峻、且劾、利議居正他事。疏上、留中不出。馮保蓋

欲取居正指、而居正悲怒、不知所爲、將擬加重辟。于
是王錫爵要申時行謁居正而請解、時行不可。錫爵
乃獨身往質居正于喪所、辭頗峻。居正勃率、且拜且
曰、上強留我而諸子力逐我、我何以處。使有尺刃
在我、我且自剄矣。錫爵辭不可已、而居正揖之出、則進
士鄒元標者復上章、至極言居正以元宰而首教大
倫、何以師表天下。且其人非能以仁義輔人主、不
過智力把持耳、用之何所利。前是、上已下旨廷杖
穆、思孝八十、謫遠戍。用賢、中行六十、爲編氓。而元標
仙疏草入、左掖門、視諸臣宛轉血肉中、不爲懾。疏上、
而中外壯之。得旨、杖戍如穆、思孝、皆滿絕而蘇。時
彗星從東南方起、長亘天、無所不掃、人情洶洶、久不
曉有奪情事。事創起而諸言者皆得罪、以爲居正實
應之。街議巷語、至作謗書懸之兩長安通道。謂居正
且反、不得已乃草詔戒勵羣臣。論所以留居正而罪
言者意、再及之、必誅無赦。馮保爲請于上。宣之朝、
謗稍息。于是使居正子編修嗣修與司禮大璫魏朝
馳傳往代司喪、而禮部主事曹誥并爲治祭、工部主
事徐應聘治喪。居正請不造朝、而以青衣素服角
帶入閣理政及侍經筵講讀。又請辭歲俸、上許之。

而日給酒饌二席、月給白粳十石、香油百斤、燭二百枝、茶三十斤、鹽百斤、薪炭稱是、計直踰于奉賜矣。始居正自矯飭、雖不能無任情、而英敏善斷、揮闊揮霍、庶幾以爲有魏相姚元之風、而其客面諛之、謂漢唐所未覩見、至相率而有伊周之目。居正亦雅自負、不世出、爲劉臺等所撻、志意漸恍惚、而至是始知天下之不見與、思以威權切之、益無所顧忌。居正謂羅倫、小豎子何所知、其書當投廁中。蓋先朝成化前朝臣、稍有事寄者、亡何不奪情。自閣臣李賢奪、而羅倫以修撰疏非之。其言雖不行、而嗣後人稍自知愛、非兵革無有言奪者矣。居正之聞喪、爲紳先生傅錦、倫疏紙幾背、居正知之、以故追恨倫、而亡何。上且舉大昏禮、故事諸受冊遣聘、皆勲臣主之、而首輔爲副使。居正以有服不當與、慈寧亦疑之、而使中貴人問居正、恐難於易吉。居正雖其事、乃曰：「后爲天下母、國之大事、孰有重者？」且居正受上恩厚、即令之赴湯火、不辭、而僅卽暫時吉乎？於是居正遂被紫橫、至以從事、凡十餘日。初、給事中李涿疏、謂使居正不服吉、不可以將禮、而服吉恐非。上所以處居正與居正所以自處、夫吉禮非金革比也、閣部大臣皆可使、不

止一居正也。上苟惜居正、幸更之。居正雖甚惡涿、以其辭直姑切責、而付吏部處。涿尋補按察僉事、出矣。錫爵意憤憤、請以省覲告。人謂相君不有父而君故省父、以形若短、且君何以責相君深乎？錫爵曰：「吾自知父、不知有相君、且相君之自爲情而自奪之。夫上亦之可也、今乃微。太后中貴人以要。上卽如所請、不入朝、不衣錦可也、而今且衣錦而從吉。卽從吉、吾意其賴之有泚、而顧揚揚自誇、謂人何幸躬逢其盛？于是竟請告以歸。故事、大昏禮成、閣臣第有賞、而無遷拜。居正知馮保諸中貴之欲得之、思以爲恩市、而身力辭之、以釣奇。乃擬呂調陽進建極殿大學士兼尚書、俸張四維加少保、兼武英殿大學士、仍各錄。子中書舍人而馮保等皆加秩蔭敘矣。上果謂居正讓而有禮、賜璽書褒諭、累百餘言。命吏部俟服除而援旨以請。已報遼東捷、賜居正白金百兩、綵幣八有副。先是、上所賜札稱「元輔」或稱「先生」而不名。稱「先生」者獨孝廟、然而諭而有之、不以施筆札。至是始兼稱「元輔」。張少師先生且待以師禮、而居正有奏謝、亦自負以爲帝者師、且引贊拜不名之禮、隱然兼蕭何、子房而有之。人謂居正傲于



上而卑于馮保、卽陳睿所不論也。居正見人情已定，乃始乞歸葬其父，再疏始允。使尚寶司少卿鄭欽、錦衣衛指揮僉事史繼書護歸，以三月爲期。拜畢卽上道。仍命撫按諸臣先期馳賜。聖書敦諭，範白金爲印記曰：帝資忠良以賜之。如先朝楊士奇、張孚敬例，得密封言事。仍戒內閣臣調陽等有大事毋得專決，仍馳驛之江陵。聽張先生處分。人謂古稱伴食同事，則有之。未有伴食于三千里外者。以調陽四維當拂衣，而調陽獨快快不樂，然未能果也。始居正念以閣臣里居者，高拱在未能一日忘，而殷士儋多左右翼援，或能乘間以出，謂徐階老易待，從焉之自代。適人布腹心於階，階諸子且信之。而居正復自念，階出而居正被召，還任名位固相等，而階前輩受業師，不敢據其上，乃請廣內閣員。詔卽令居正推，乃疏推太子少保禮部尚書馬自強、吏部右侍郎兼侍讀學士申時行，而時行已加太子賓客，恐不入銜，且謂自強資深，當加太子太保、文淵閣大學士，時行稍淺，當以左侍郎兼東閣大學士。詔如之。其辭同張四維。官保一品階，當上自裁定。卽不爾，亦當別具密啓以請，不應于推疏定之。靡非欲自張大而輕自強等。

體自強伉直，數與居正左，自分不敢望之人。以居正是舉，稍不易云。申時行者，字汝默，蘇之吳縣人。舉進士第一人，爲翰林院修撰。初從外家姓爲徐，久而後復之。時行美姿容，秀目疎眉，性溫茂，有體制而不促。隲能詩文，善筆札，見者無不親之。初以王父憂歸，服除補故官。與同年王錫爵善，錫爵與相切劘，不苟取與。久之，副順天試事，遷左春坊左中允，兼編修，遷充經筵日講官，進左春坊左諭德，兼侍讀，預修兩朝實錄，尋爲穆廟副總裁，進左庶子，掌翰林院事。穆錄成，進詹事府少詹事，兼侍讀學士。以久次轉詹事，再遷禮部右侍郎，改吏部，兼學士。世錄成，加太子賓客，食二品俸。時行以文事受知居正，又植德不爲唯異，居正愈安之。且念權寵盛，多樹敵，欲拔一二後進爲之繼，而得時行。旣入閣，與四維皆自昵於居正，談笑無間。居正當行，上及兩宮賜道里費爲白金者合千三百兩，綵幣十六有副。旣朝辭，復請見于平臺，上撫諭之曰：朕不能舍先生，恐重傷先生懷，是以忍而允所請。雖然，國家事重，朕將何所倚。居正乃勸上以大婚之後，宜樽節愛養，留心萬幾，因伏地而哭。上亦爲之哽咽墮淚，爲居正奏辭。

慈寧宮。皇太后復以銀八寶六十兩賜之。所以慰諭有加。出國門。遣司禮中貴張宏供張郊外。以餞百官。皆班于是。所經由有司飭厨傳治道路。然意居正奔喪。或參用凶禮。則飾白羅傘幔。執事與臺胥吏之徒。皆具素服以俟。而居正以邊將所饋遺兵器羅列禁衛。千兵百騎前後部鼓吹。光彩耀日。于是復皇恐相率易緇絲一新。復費不訾。前是居正父初死。巡撫都御史陳瑞癸丑所取士也。馳至江陵。乘輿與以爲入門。從者易白服。畢解紗帽。出麻冕于袖而戴之。已改加絰。伏哭盡哀。畢則請見太夫人。太夫人不出。跪于庭。良久。太夫人出。復伏哭。前謁致慰。乃坐。太夫人恻有小閣侍。居正所私留以役者也。太夫人脫而謂陳君幸一眄。瑞拱立。揖。閣曰。陳瑞安能爲公公重。如公公乃能重陳瑞耳。公公者。中貴之尊稱。然獲見而呼者也。太夫人亦爲之啓顏。至是陳瑞已遷刑部右侍郎。復與郎陽都御史徐學詩及司道守令會葬。所以賻遺不可勝計。光彩傾遠邇。時有同年御史于業者。罷久矣。而與居正故善。來會葬。至墓所。自能工堪輿言。密語居正。吾相地多。毋踰於此者。是且有天子氣。居正懼掩耳。禮而趣之去。既畢葬。且還朝。而

兵備憲臣與分守關帥約請居正閱操。用大帥禮。居正欣然許之。改服。上所賜繡蟒以御。禮成大出其金幣。勞賜加等。時遼東續奏大捷。上復歸功居正。使使馳論。俾定爵賞。居正爲條列以聞。而大學士呂調陽內慚。堅卧累疏乞休矣。居正疏以母老。不能冒炎暑。請俟秋涼而後上道。于是內閣兩都部院寺卿給事御史俱上章請促居正亟還朝。上遣錦衣衛指揮翟汝敬馳傳往迎。爲日以俟。汝敬陛辭。錫之白金彩幣。而令中貴人侍太夫人。以秋日取江路。繇真州上汝敬至。居正就道。先具疏聞。而撫按諸臣各馳報矣。上皆有優旨。而前是所經由藩臬守巡。迂而躋者十之五六。居正意未慊。檄使持庭參吏部尚書禮。至是無不長跪者。臺使越界趨迎。畢。卽身爲前驅。約束吏卒于陬飭厨傳。居正所坐步輿。則真定守錢普創以共奉者。前爲重軒。後寢室。以便假息。傍翼兩廡。廡各一童子立而左右侍。爲揮蓮炷香。凡用卒三十二。昇之。始所過州邑。郵牙盤上食。水陸過百品。居正猶以爲無下箸處。而真定守無錫人。獨能爲吳饌。居正甘之。曰。吾行路至此。僅得一飽。此語聞。于是吳中之善爲庖者。召募殆盡。皆得善價以歸。道經襄



王出候折簡要居正宴。故事人臣雖貴極公侯。謁王執臣禮。居正不欲執臣禮。辭不入。王強而後可。於是直入至偏殿。且賓主而出。王者之有北面。自襄王與居正始也。過南陽。唐王亦如之。諸撫臣爭相競以異禮待居正。而獨保定之孟重為甚。雖同事者亦羞稱之。居正入則孟重以兵部侍郎起佐京營大帥矣。居正既過良鄉。抵郊外。詔遣司禮中貴人何進宴勞于真空寺。口諭先生以午入。即召見平臺。以未入則質明見而兩宮亦各遣大璫李琦李用宣諭。賜入寶金釘川扇。御膳餅果醪醴百條。復班迎。以次日質明入朝。上延之平臺慰勞懇篤。且詢以途路所見歲計物情與北虜衰敗之狀。良久乃于假十日而後入閣。仍賜白金百兩。彩幣六有副。新鈔三千貫。雙羊上尊。御膳因引見。兩宮當居正之歸日。而御史趙應元以候代襄陽不及會葬。既得代而中悔。恐獲罪于居正。上書移病歸。前是有旨御史在外不得輕移病。非撫臣為代請而移病者。都察院糾察以聞。然亦視為故常。莫有舉行者。而居正之門客僉都御史王篆時佐院。要脇其長陳杓。使論應元。時呂調陽以疾在告不出。而張四維等擬旨特斥應元為民中

外知其自。咸憊憊而戶部員外郎王用汲遂劾杓以非法陷應元。阿附權臣。應元不當罷。且謂星變而考察所懲抑者皆居正所不喜。宜斥杓而留應元。其辭峻。詔奪用汲官。亦為民居正既見用汲疏。怒甚。辨其事謂臣賦性愚慤。不能委曲徇人。凡所指畫注施一槩之法。法所當加。親故不宥。才有可用。疎遠不遺。又務綜覈名實。搜剔隱奸。摧抑浮競。以是大不便於小人。而傾危躁進之士。漸談失志之徒。又從而鼓煽其間。相與惡。慮激。冒險釣奇。以覲幸于後日。為攫取富貴之計。蓄意積愆。有間輒發。故向者劉臺為專權之論。今日用汲造阿附之言。夫專權阿附者。人主之所深疑也。日漫月潤。鍊金銷骨。小則使臣冒大嫌而不自安。大則使臣中奇禍而不自保。明主左右既無親信重臣。孤立于上。然後呼朋引類。藉勢乘權。恣其所欲為。紛更變亂。不至于傾覆國家不已。此孔子所以惡利口。大舜所以疾讒說也。臣日夜念之。憂心悄悄。故敢不避煩瀆。一控之。聖明之前。遂以明告天下之人。臣是顧命大臣。義當以死報國。雖赴湯火皆所不避。況于毀譽得喪之間。皇上不用臣則已。必欲用臣。臣必不能枉已以徇人。必不能違道以干

與臺省紀綱必欲振肅。朝廷法令必欲奉行。奸宄之人必不敢姑息以撓三尺之公。險躁之士必不敢引進以壞國家之事。如有捏造浮言欲以榮惑。上聽紊亂朝政者必舉。祖宗之法請于。皇上而明正其罪。此臣之所以報。先帝而忠于。皇上之職分也。優詔褒美居正累百餘言戒飭言者然居正意欲逮治用汲而以四維等輕之遂厲色而待一語不接捥筆縱橫了無顧盼咸捧手受成而已及秋而魏朝奉太夫人所經由汴步皆設席屋張綵幔徐州兵備副使林紹至身雜挽船卒中爲之導護遠邇奔趨將抵京上遣司禮中貴李佑郊迎與魏朝結騎隊鳴鼓前列旗幟備穿御道而過觀者如堵上復遣中貴人賜金紫絲珍珠青紅寶石首飾雜色綢蟒帛羅凡四篋白金百兩而兩宮之賜尤有加所以慰謝居正母子義用家人禮居正乃亦噴笑失聲絢繡奇器寶玩以進上及慈寧宮所費頗鉅而錦衣總帥劉守有史繼書皆受役如奴客爲之收斂繼作矣高拱之逐其自出居正而有王大成獄居正復與發而旋救之拱既內恨刺骨而畏其權與文深又不能不外示戚居正始歸葬道新鄭拱已病若瘵

故爲篤狀與詣居正撫之乃大哭謂往者幾先焉瑋手雖賴公活而璫意尚未已奈何居正笑曰璫念不至此且有我在無憂也居正歸而拱意其不卽召使便賄太后父武清伯謀之武清伯納其賄不得間居正既入而知之誚讓良苦拱既失賄而知其洩憂慙發疾成居正爲請于上復其官予之祭葬之半而殷士儋歸歷城其密戚爲閣中掾與故裕邸中貴人善謀乘居正歸而用士儋居正復切責此掾怖而不能食數日死馮保有所私門下筆札人徐爵居正爲擢用之至錦衣衛指揮同知署南鎮撫又使其蒼頭游七與結爲兄弟居正有所謀使游七入以告徐爵爵以達馮保保有所謀亦如之游七亦入贊得官勛戚文武大臣至翰林給事御史多與還往通姻好游七具衣冠報謁據上坐爲款宵飲歡呼無間居正固與馮保通關然意思聞張四維之私結保也訕喝止之四維以是恨居正益甚僉各入貢久而以兵西追回夷使使之烏思藏迎所謂國師鎮南堅者創招提利以居之鎮南投書上居正乞賞而備以大士像璽璫金剛結居正疏聞且辭上褒稱居正輔理勲猷宣播遐邇戎狄咸賓朕得垂拱受成深用嘉悅勅



受之而別爲答賜時。上病疹愈。御朝羣臣皆廷賀。而居正以持服不與。復爲之御平臺以見慰。諭有加。賜金幣。御膳殺蒸上尊。執手使視顏色。居正稱賀。因勸上慎服食。戒色欲。上曰。聖母日與朕偕動止。三宮俱未宜召。居正叩頭謝。使還閣。而後鳴鐘鼓。見羣臣。嘉靖末。徐階執政。而李春芳在禮部。患宗室日蕃。行中外數萬人。皆仰給縣官。國土之人不足以供。歲額相計。議爲宗藩條例。于封襲婚娶子女名數。祿賜之屬。苛爲之限。至是居正條摘其間彼此矛盾。前後抵牾。或減削太苛。或議擬不定。或一事而或于或奪。或一令而旋行旋止。或事與理舛。窒碍難行。或法與情乖。輕重失當者。皆指實言之。請下禮部會議。入會典遵守。報可。居正于諸藩王賂却不受。亦無敢以私干者。而禮部尚書潘晟于居正前輩。頗謬爲恭謹。其在留都。率九卿疏請。亟迎居正入朝。居正憐而用之。而漸知其頗納賂。爲藩王道地。不悅也。微風言者論去之。而超用刑部左侍郎徐學謨。學謨少亦工文章。通曉吏事。而其守荊州。能爲民抗持。景王侵占沙市。適居正爲編修。使歸治妻葬。學謨禮厚之甚。以心德學謨。既費用事。學謨兩過劾歸。居正俱力持起。

之田間。自是凡四任。皆不離居正鄉土。未久輒遷。自成弘後百餘年。來禮部尚書必翰林擢。嘉靖之初。上以席書言大禮當意。由他曹特遷。言路攻之十餘疏不止。而學謨自刑部擢。亡敢有出一語者。人謂居正威在。世宗上矣。居正始所與姻家刑部尚書王之誥。之誥自用兵事。跋扈中外。不盡由居正顯。而又數與爭論。以養母歸。其所善者。卽同年侍郎李幼孜。嘗爲郡守。見辱於儒生。居正爲左右之。不十載而至八座。居正復與之通姻。遷工部尚書。幼孜無他長。以講學博士大夫名。每見居正。輒語移日。多布腹心。及獻樹朋黨。援引所私。而時一進逆耳語。以示忠赤。而他所爲。多情擅權事。未嘗不開端引之。出則傾身以交。仇直聲者。謂吾力言之。如相公不聽何。殷正茂爲戶部尚書。進大珠塊寶。天鵝扇。以如居正而得用。幼孜與正茂爭寵。而妬。數嗾言路論之。歸。而王篆入吏部。其見知愛甚於幼孜。數爲居正言。幼孜時時在外。揚相公之懷諫。而已力彌縫之。冀爲異日地。居正微伺得而悉之。幼孜以疾在告。居正授一札曰。吾憊矣。寡助之至。親戚叛之。奈何。幼孜懼。遂以乞歸。居正弗出也。而以曾省吾代領工部。省吾居正所取士也。爲

人貪而巧媚。小有文。其撫四川而循軍興乾沒萬計。入佐兵部。以右都御史掌南院。至是代幼孜。而居正之門人梁夢龍自勸遼總督入爲兵部尚書。其品在下中。尤善媚。吏部尚書王國光。山西人。與四維同鄉。有連。恐居正之疑之。而策從傍爲耳目。於是六曹咸傾心事居正。雖對妻子牀第。無不稱居正賢者。其始士大夫之諛以伊周。漸謂爲常談。不能得居正色。則進爲五臣。又以有稷契皋陶不爲重。則直進之舜禹。而居正亦恬然不以爲駭怪。至中允高啓愚之試士。遂以舜禹命題。非必有他意也。而諸當事者紛紛目啓愚勸進矣。時上漸備六官。太倉所儲金銀多所宣進。居正乃因戶部進御覽數目而陳之。謂每歲入額皆在其內。錫鉢畢盡。今萬曆五年歲入四百三十五萬九千四百兩。而六年所入僅三百五十五萬九千八百餘金。則已少八十餘萬金矣。五年歲出三百四十九萬四千二百餘金。而六年所出乃至三百八十八萬八千四百餘金。則已多四十萬餘金。質之該部。云因諸省責留蠲免之不時。追贖人犯財產之已盡奉旨取用之屢下。是以入數減而出數溢也。因甚憂其不可繼。而請上置之坐隅。時賜省覽。量

入爲出。罷節浮費。疏上留中。上復傳旨工部置錢應用。居正亦以利不勝費止之。時言官請停蘇松織造。不聽。居正面爲委曲以請。得損數之大半。復請停修武英殿工及裁省外戚選官恩數。上多曲從之。一日上御文華殿。居正侍講讀畢。而以給事中所上災傷疏聞。因謂鳳陽及江南諸郡屢無歲而徐宿之間民至屑榆皮爲粥。不早賑之。則相聚爲盜。賑之不可緩。上曰。惟先生所處。居正復奏。上至仁愛民如子。凡請蠲請賑無不賜允。而在外諸司往往營私背公。利民罔上。非惟不體皇上子惠困窮之德意。且不知臣等所以贊皇上之愚忠。殊可恨也。今給事疏云。報災則曰不敢報。云請蠲則曰不敢請。有何不敢報與請。而推調支吾。歸怨君上。卽積穀一事。屢奉旨申飭。竟成虛文。彼皆有自理。賊贖米。嘗佐公家之急。則將焉往。臣等不勝憤懣。竊以爲此輩若遇聖祖。不知當處以何法。上怒曰。審爾何不重處之。居正拜領命。乃又曰。邇年正賦不虧。府庫充實。皆以考成法行。徵解不爽。今江南北窮甚矣。河南風災。畿輔亢旱。將來蠲賑。恐不容已。惟皇上加意撙節。于宮中一切用度及服御。可省者省之。賞賚



可裁者裁之。至于布施一事，尤當禁止。與其惠緡黃之流，以求福利，孰若寬恤百姓，全活億兆之命，其功德尤大。上曰：然。用度當從省，卽實費亦故事耳，無所增加。居正又曰：夫故事者，邇年之所偶行，遂據以爲口實，非祖宗故事也。世宗朝用最爲不節，而晏駕之後，尚餘百餘萬金。今歲之所進內帑者二十萬，而隨取隨用，常告乏者，故事必不爾也。願皇上留神。上首肯之。于是有竊貨而督責奉行者，有肅如矣。江南貴豪如華亭金壇上海各持勢若奸滑，巧避匿而不肯完賦者，與溷鹵蟬螺之民錯莫知所辨折。居正聞而深恨之，以是選擇大吏精悍者嚴行督責，賦以時起，而民不勝簞朴，則相率而歸怨居正。闕家日益以富，閭閻日益以貧，然功與罪實相當。時會居正服將除，而上宣召吏部問期日，于是手勅元輔張少師先生忠孝兩全，今制服已滿，朕心加慰。特賜白玉帶一副，大紅坐蟒盤蟒各一襲，金盞一把，金盞蓋一副，用示眷念。俾朝見後仍御平臺召對，以後朝參經筵俱吉服如舊。既對，慰諭久之，使中貴人張宏引見慈慶宮，于宮門叩頭。仁聖皇太后賜白金文幣，尋見慈寧宮，禮如慈慶，而慈聖皇太后慰

獎尤至，賜御膳九品，金盞盞蓋金鈎白金彩帶，葷素甜食十二器，酒十觥，使張宏侍宴。甫就職而吏部以大婚勅諭請特詔，元輔社稷重臣，受先帝顧托，翊戴朕躬，以及大婚，弼成治理，勲績茂著，復加太傅增歲祿百石，先錄錦衣千戶嗣修爲指揮僉事，於南鎮撫理事。居正復辭太傅而受其餘。尋吏部復舉居正守制月爲之請，十二年滿加恩復再辭。詔復加慰諭，凡百餘言，謂卿之所處恩義兩盡，足以垂範萬世，特允所請，以全忠孝大節。至于卿之助勞簡在朕心，當別有酬養。時復當會試，大學士申時行與學士許國爲主司，而居正二子懋修、敬修與四維之子甲徵皆中式矣。居正乞上謁諸陵，卽具疏乞休。中云：拜手稽首歸政，則隱然復子明辟。凡再止而天子慰留懇切，最後手書稱：慈聖口諭張先生親父先帝付托，豈忍言去。俟輔爾成至三十而後商處。先生毋復興此念。居正乃出而嗣修狀元及第矣。敬修亦在前列，而甲徵次之，皆得禮部主事，而皆已邑不樂。人爲之語首甲幸有三人，云胡靳此二子而懋修與嗣修共列史官，每出則衆相指而詛，或作僂諺書而黏之官牆門下，客至引以相告，輒得外補。王

篆與曾省吾益橫南北給事御史則傳作舟王蔚、蕭耀李選朱璉、顧爾行爲之牙爪、而作舟璉尤恣肆、異鄙無恥人所羞而不道者、而南京兵部主事趙世卿抗章言時政不便數事、皆陰以指譏居正之操切、居正怒欲譴之、吏部尚書王國光爲畫策曰、譴之是成其名也、且或以動上聽、某請爲公任其怨、不旬日出爲楚府左長史、蓋杜其遷轉故也、又半歲當大察、屬南京吏部都察院去之、時尚書何寬與郎中李已不敢抗、而是時抗居正者穆懋孝、元標皆已遠戍、督撫大臣故拆挫之使不堪、冀以聞于居正、取一快、而王篆且夕待居正、知其不釋意於劉臺、以是乘間使其鄉御史賀一桂、嗾家疏其盜邊、假不法數事、於是江西之巡撫王宗載、巡按陳下有司悉爲之證、實而遂東遷、按于景昌、傳會之、坐遠戍而繫追其贓金、又繫其父子、竭產以償、不得則別以富人犯法者寬其罪、使爲之償、而後遣戍至嶺外、無何飲於其戍主所、歸而暴得疾以死、或曰戍主有所受毒之也、而是時王錫爵歸省久之不出、其女得道仙去、有所奉大士上真、俾錫爵與其友大理卿王世貞築室于城居之、而女仙之蛻附焉、錫爵屬世貞爲之傳、語頗傳

京師給事中牛維垣、御史孫承南故嘗客曾省吾、謂此奇貨、可以贊居正也、省吾遂爲維垣具草、與承南先後論劾錫爵等、語甚危、冀以動播上意、事下禮部、而尚書徐學謨方思所以報居正、操臂謂此妖孽不可長也、具稿欲大有處、而慈聖在西官聞之不懌、使中貴人張宏語居正、神仙者何預人事、而言路批根之、居正意絀、而學謨方盛氣以見、居正笑謂此二人者皆君鄉人也、事甚小、且已往不足道、學謨然、而退遂停寢、而南中給事吳之美輩復吠聲有言報聞、而趙用賢、吳中行亦與錫爵家近、王篆與省吾意未慊、則風陳於使用、故嘗請奪情、御史曾士楚、揆使伺用賢、中行短而甘心焉、且因以擘錫爵、士楚之初爲御史、新脅于長、不得已具疏、而中悔之、既至嘆曰、吾嚮者猶參蒞也、而今乃使我鷹犬耶、且吾已愧人復安敢愧天、因絕不復問、移疾歸、而居正竟亦無他、有狂生吳仕期者、寧國人也、與沈懋學善、時懋學亦移疾里居、而仕期嘗欲走京師上書、有所規于居正、而懋學止之、其語頗流聞、而吳中輕薄子僞爲故都御史海瑞論劾居正罪惡、亦傳至寧國、而有梓之者、標江都御史胡槓、同知龍宗武使究其人不



得則執仕期以塞。而憤詞知其爲懲學友也。使宗武捕而引懲學。且報居正欲自以爲功。而居正意不欲彰聞。曰小豎子耳。何足煩白簡。王篆則貽書宗武。必令引懲學。而宗武不可。乃餓死其人于獄。而寢其事。王篆思所以媚居正。與尚書王國光謀曰。彼前後上疏戾斥者。皆壬夫也。而意未嘗一日忘復用。欲杜之。則莫若中之考察之例。于是因大覲疏請錄諸戾斥者姓名于察吏後。而榜之示不收。居正悅報可。諸戾斥人皆非外僚。不當觀察。而戾者已重于察吏。不當拘。仰拘而異。且安能以例杜其用也。人謂居正敏識人也。而昏諂若此。知其不久矣。上之初卽位。馮保朝夕視起居。擁護提抱。差有力焉。小所扞格。卽以聞慈聖。而慈聖素誨。上嚴切責之甚苦。且曰。內庭可耳。卽使張先生聞之。奈何。于是上甚嚴重居正。而馮保意自得。所以事上不能一切從順。上漸長而厭之時。上左右孫海客用。則乾清官之用事者。孫德秀溫泰司禮之參佐。周海則兵仗之領局者也。皆貴幸。而不甘保之見凌。慈聖乃使保捕海。用杖而逐之南京。爲小火者。發孝陵種菜。居正請於上。謂海用處之輕。復削爲淨軍。而又疏條海用與

德秀泰及周海罪惡。請併逐之。其司禮監中貴及內侍皆勅令自陳。上裁去留。因勸上戒遊宴。以重起居。專精神以廣龍圖。節賞賚以省浮費。却珍玩以端好尚。親萬幾以明庶政。勸講學以資治理。上追于太后。不得已皆報可。於是左右所親信而他失馮保意者。所餘無幾矣。居正當上初嘗慕古君人治亂之事。而條治者八十一。亂者三十六。以應陰陽之數。繪而爲圖。以俗語解之。使易曉。至是復爲儒臣紀。高皇帝及列聖實訓實錄。分類而成書。凡四十。曰創業艱難。曰勵精圖治。曰勤學。曰敬天。曰法祖。曰保民。曰謹祭祀。曰崇孝敬。曰端好尚。曰慎起居。曰戒遊佚。曰正官闈。曰教儲貳。曰睦宗藩。曰親賢臣。曰去姦邪。曰納諫。曰理財。曰守法。曰儆戒。曰務實。曰正紀綱。曰審官。曰久任。曰重守令。曰馭近習。曰待外戚。曰重農桑。曰興教化。曰明賞罰。曰信詔令。曰謹名分。曰裁貢獻。曰慎賞賚。曰敦節儉。曰慎刑獄。曰褒功德。曰屏異端。曰飭武備。曰御夷狄。其辭多檢切。請以經筵之暇進講。又請立起居注。紀上言動與朝內外事。爲修史張本。日用翰林臣四員入直。應制詩文。上肯優詔報許。旋以滿十二載奏最。

上爲召吏禮二部傳諭元輔居正受。先帝顧命夙夜在公任事任怨。雖稱十二年滿實在閏十五年忠勤異常恩典宜厚。尋使司禮中貴張誠賜白金三百兩綵幣四十皆有副。坐蟒盤蟒各一襲。酒六十甌。鈔十萬貫。饒饌五卓。羊豕鷄雞餽蜜油麵菓果薪燭之類多以千百計。手勅褒諭稱其精忠大勲。朕言不能盡。官不能酬。及禮吏二部議上。加上柱國太傅。吏伯爵。俸仍加歲米二百石。予一子尚書司丞。給四代誥命。下筆書褒美。賜宴禮部。疏辭上柱國及伯爵俸而已。明興文臣無真拜三公者。謂居正當力辭。至是皆驚怪。以爲且必封公侯。加九錫。而居正亦益汰。毋論六卿其視四維等若不屑與。稱僚案者四維等事之益謹。而居正則亦已病矣。病得之多御內而不給。則餌房中藥發強陽而燥。則又飲寒劑泄之。其下成痔而脾弱不能進食。使醫治痔以效。尋下壅結而不能暢。不獲已復用寒劑泄之。遂不禁。去若脂膏者而大腸亦遂出。日以羸削。上時下諭問疾。大出金帛以爲醫藥資。凡四閱月竟不愈。而自六卿大臣翰林言路部曹下至官吏冗散亡不設。驛祠廟爲居正祈禱者。吏部尚書而下舍職業而朝夕奔走。仲夏曝身

赤日中。延至南都山陝楚汴淮漕撫按藩臬亡不驩矣。居正深居不出。欲使知之則令賂其家人以達。取一啓齒而已。上始令四維等理閣中細務。而大事猶卽家令居正平章。居正始自力。而其後憊甚不能徧閱。然尚不使四維等參之。遼東復以大捷聞。居正遂進太師。歲加祿二百石。予爲指揮僉事者進同知。而四維亦加少傅。太子大師。建極殿大學士。時行加太子太保。居正病益軋不可爲。乃疏乞歸。上復加優詔慰留。稱之爲太師張太岳先生。居正度不起。而上亦使人問可次入閣者。居正首薦前禮部尚書潘晟。次則尚書梁夢龍。侍郎余有丁。許國。陳經邦。而復薦尚書徐學謨。曾省吾。張學顏。侍郎王策等皆可大用。而指王錫爵等爲奸邪。上爲黏之御屏。潘晟雖居正故讖。然不甚重之。而馮保。晟故所授書者也。強居正使薦之。時居正已昏甚。不能有所主矣。居正待其子弟嚴。每三五日入問安。頷之而已。不交一言。而以貌羸甚惡人見之。卧帷中。至明不聞聲。家人怪而發焉。則氣絕矣。計聞。上愴悼。輟朝。賜齋壇麻布五百疋。米二百石。兩宮麻布二百疋。米二百石。又與潞王合。賻白金二千三百兩。香及油爲斤者。燭爲



對者以千計、薪爲斤者以數萬計、茶九壇、復增七壇、大約親國公之兼師傅者、贈上柱國、謚文忠、遣營繕、仍命京堂之四品者、錦衣之在堂上者、護喪歸、其子編修嗣脩等疏辭謝、上報諭、朕念先生受先帝顧命、鞠躬盡瘁、歿而後已、忠勞可憫、遣司禮中貴人陳政護喪歸、俱令馳驛、居正之喪與輜重凡七十餘艘、用夫三千餘人、前後十餘里不絕、于是四維始爲政而事漸變矣。馮保亟爲上言、起潘晟爲武英殿大學士、使行人卽家召之、馳驛來京、晟鄙而貪、士論所不齒、一旦脫廢籍大用、亡不媮且笑之者、而益以追恨居正。四維度時行不欲爲晟下、于是合而風給事御史數上章攻之、四維雖以馮保故擬旨留、晟然無所褒美、第云爲故輔臣所薦而已、以示輕晟意、馮保不悅也。而御史薦吳中行等諸臣當用、馮保怒而黜之、而給事中御史有詆居正時政者、居正之客諸大臣猶持不肯行、於是徐學謨歸女于時行之少子以自固、而馮保以病在告、少時給事御史復乘間論劾晟、晟上疏辭、四維擬旨放之歸、時晟已至臨安道中、委頓返駕、馮保病起、恚曰、我小病也、而遽無我、居正之黨王篆、曾省吾、朱璉微知之、且謂四維之

且甘心於居正而逐我曹、因委身自昵于時行、還往無間、而是時余有丁亦得入爲文淵閣大學士矣。皇太子生、上喜甚、因上兩宮徽號、頒詔赦天下、四維進少師、中極殿大學士、時行進少保、戶部尚書、武英殿大學士、而有丁遽加太子太保、遂無以杜中官口、而馮保至錄一姪都督僉事矣。張宏以下爲錦衣指揮、同知、僉事有差、保之始欲封伯爵、而四維以無故事難之、保詬曰、爾由誰得今日耶、而負我、于是篆省吾行數萬金、馮保與惟接、得從容言四維短而亟稱時行、相約遂王國光、則省吾代爲吏部、遂陳珪則篆代爲都察院、四維故珪所造士也、而省吾以陵工輒進太子太保、御史某者、篆所厚也、遂上書極論王國光、而中謂國光媚四維、拔其中表弟王謙爲吏部主事、四維避嫌不出、時行遂擬罷國光、而于工部覆謙交代、覘以御批責其鑽刺而謫之、於是言者紛然起、攻四維者甚、求徐爵、張大受爲保道地、皆有賄、於是時行小訕、言者以解、而四維謂時行之與謙、遂水火矣。國光既去、而擬當代者、馮保私其鄉人梁夢龍、王篆不敢違、遂推夢龍、省吾以篆之負約也、怒而相詬、至相擊、朱璉復爲之交、關其間、遂不可解、而上

故所幸中貴人張誠者見惡馮保，上不得已斥之外，而使密調保所爲，遂及居正。至是誠復入，悉以兩家交結恣橫狀聞。上且謂其珍玩寶藏踰于天府，上心動而馮保又以止。上郊天及選婚事得罪，左右浸言保過惡，其與四維善者泄之，而四維遂以屬其門人御史李植，使極論徐爵。徐入官禁，爲保擬旨，挾詐通姦諸違法事，而它復論曾省吾貪邪縱欲，欲以膏上，而上已執馮保禁中矣。于是御史江東之遂極論馮保罪狀，尋逮徐爵下獄，省吾勒致仕，而滿馮保爲奉御，居南京，其下大閹張大受等悉奪職從徙，而盡籍其家。保金銀百餘萬兩，珠寶異以萬計，它宅舍田產器用稱是大受等所籍亦不貲，內藏爲充物。而上益心斲居正，疑其藏積或過當矣。始居正卒，而王篆猶挾馮保以調疑，恐士大夫尚畏之。其銜恩者趣之若流水，有兩子，一試其鄉，一試于南都。試南都者，九卿給事御史出郊迎，巡按以下爲之飭傳舍，具郵供，提學至檄屬邑之餽同經者與處，而監試御史當試時，委曲使之同號，竟日至暮，美酒梁肉水陸之珍，絡繹饋餉。御史至自具草，使同號者酌量之，且代爲書，唯坐飲噉耳，竟得中前列，而

其鄉之試者亦與選。人情益憤憤而言官乃列上其事，并論劾居正三子，驟取上第。四維之子甲徵已爲山西之第二人，時行之子用。天第六人而天子用懋，官浙籍與選如篆矣。四維雖恨居正而畏其不利已，乃不復窮究，而第摘省吾篆之亂政悉削籍爲編氓。時給事御史新進者益務攻居正爲奇，併及其黨，而御史楊四知語尤峻。于是居正始令上柱國太師兼太子太師，再奪諡，而王篆曾省吾朱璉陳瑞輩毋不斥削，朝班幾爲一空，而吳中行趙用賢等皆召遷官有差。劉臺贈光祿少卿，還其產。御史魏允貞見四維時行之子先後預薦而亡有及之者，意不平，乃于建言疏頗譏切時政，而謂二相不改居正之履，輒而私其子，坐貶。二相皆有疏辨，時行尤齟齬強飾，而其後執政驟遷允貞至吏部郎，以爲差善補過云。四維知海內之怨居正深，一切務爲寬大，以收人心，而法度漸廢弛。至大計貪酷不誅罷削者，亦得復官及章服，而祖宗之法紀且盡矣。時行既已爲王篆輩所推，意不自安，會得寒疾，踰月不能起。四維語時行之客曰：夫首相者，若四時之有春，行必有夏，何俟煎迫耶？時行起，不敢謝過，唯默然而已。而甲徵用嘉復



登第、四維嘆其門客之在言路者、俾具草、令先攻尚書徐學謨以嘗。上學謨斥即攻時行。草具將上、而四維以父喪歸矣。四維家素富、累積金至百餘萬、而尤納賄不已。度不可如居正例奪情、乃大行金於上左右張鯨、張誠諸用事者、使為間曰、時行故居正所私、今復得其家金寶萬計、為覆露之矣。上頗心動、久而察知其無它、得稍自安。而御史羊可立者、亦四維客也、乃復追論居正罪惡、而謂居正以私構成、遂使人憲矯獄、逮庶人之妃、因而上疏辨冤、且曰、庶人之庫金寶萬計、悉入居正府矣。上喜、以可立籍居正、乃命司禮中貴張誠及刑部右侍郎丘機、情錦衣指揮給事中往籍其家、併勘故構王憲燦事。王憲燦者、其父王榮、以幼未立、而居正之祖父為護衛卒、太妃間居正少警、領且與王同歲、召而奇之、賜之食而坐王憲燦其下、且謂而不才、終當為張生穿鼻。王憲燦以是怨居正、而會居正登第、召其祖虐之酒至死。居正心銜王、然王淫醜、暴橫其國、遠近皆知之、彈劾屢上、後遂至削國、以幽死。嘗削國時、居正雖在闕、然不甚當事、所謂金寶者、謬語也。張誠等行、則居正諸子頗侵夜焚毀其奇貨禁物、而荊州守令以御史

意、先期錄其人口出、而子女避避空室者不及發、已剽其門、則餓死者十餘曹、皆為犬所殘食而盡。發其諸子兄弟藏、得黃金將萬兩、白金十餘萬兩。其長子敬修不勝刑、自誣服寄三十萬金于曾省吾、王篆、傅作舟等、然盡其產不能十之三、而敬修自縊、家人亦有從死者。事聞、時行等與六卿大臣合疏請少緩之。于是詔留田千畝以贍其母、而省吾等追究亦小緩矣。時御史丁此呂復追論科場事、謂高啓愚之以舜禹命題為媚居正、策禪受、且旁及諸黨人。時行擬旨留啓愚而報處其餘。於是吏部楊勣等駁此呂為賤、昧中人以大辟。若先朝之趙文華、王聯等旨下、雖出此呂于外、而奪啓愚職、焚其告身。給事中王士性等疏、上有所向、遂極論楊勣、且謂時行實寬居正而上之、于是內閣部院諸大臣復劾士性等、奪席之地、幾成訟庭。於是彼此相率而詣中貴人求援、時行、魏鉉得留、而大權悉旁落矣。其後言者復攻居正不已以媚。上于是復勅法司盡削居正官秩、奪其前所賜璽書、四代誥命、以罪狀示天下、謂當削棺戮屍、而姑免之。其弟都指揮居易子編修嗣脩俱發戍烟瘴地方。李植、江東之羊可立、以能發大奸

遷京秩有差。而時行等自用 聖誕推恩。時行加少傅、太子太傅、吏部尚書、定極殿大學士。余有丁加少保、戶部尚書、武英殿大學士。許國亦加太子太保、文淵閣大學士。其實尤先四維。時行假行萬金張宏、張鯨等。始獲稱元輔。每頒賞異于余。許。明年、雲南上蒼。國捷時行復加少師、太子太師、中極殿大學士。有丁加少傅、太子太傅、建極殿大學士。許國加少保、武英殿大學士。

《國朝獻徵錄》卷一七

校記

①時大：當作「叔大」，見前卷張敬修撰《行實》及

《明史》卷二二三《張居正傳》。

②鄉音者：當作「嚮者」。

③薨然：疑誤，或當作「薈然」。

明儒碑傳集卷七十八

耿定理 李學梅 陳吾德

王世貞 王之士 李贄

耿楚空先生傳

先生諱定理字子庸別號楚空諸學士所稱八先生是也。諸學士咸知有八先生先生初不自知也。而此稱楚空先生傳何也。夫傳者所以傳也。先生初不待傳而此復爲傳以傳之又何也。蓋先生初不待傳而余實不容不爲先生傳者。按先生有德不耀是不欲耀其德也。有才無官是不欲官其才也。不耀德斯成大德矣。不用才始稱真才矣。人又烏能爲先生傳乎。且先生始終以學道爲事者也。雖學道人亦不見其有學道之處。故終日口不論道。然目擊而道斯存也。所謂雖不濕衣時時有潤者也。莊純夫曾告我曰。八先生云。吾始事方湛一。湛一本不知學而好虛名。故去之。最後得一切平實之旨于太湖。復能收視返聽。得黑漆無入無門之旨於心隱。乃始克然自足。深信而不復疑也。唯世人莫可告語者。故遂終身不談。唯

與吾兄天臺先生講論于家庭之間而已。故亦遂以天臺爲師。天臺亦自謂吾之同學。雖有所契。然賴吾八弟之力爲多。子庸曾問天臺云。學庸語孟雖同。是論學之書未審何語最切。天臺云。聖人人倫之至。一語最切。子庸謂終不若未發之中之一言也。余當時聞之。似若兩件然者。夫人倫之至。卽未發之中。苟不知未發之中。則又安能至乎。蓋道至于中。斯至矣。故曰中庸其至矣乎。又曰無聲無臭。至矣。歲壬申。楚空遊白下。余時懵然無知。而好談說。先生默默無言。但問余曰。學貴自信。故曰吾斯之未能信。又怕自是。故又曰。自以爲是。不可與入堯舜之道。試看自信與自是有何分別。余時驟應之曰。自以爲是。故不可與入堯舜之道。不自以爲是。亦不可與入堯舜之道。楚空遂大笑而別。蓋深喜余之終可入道也。余自是而後。思念楚空不置。又以未得見天臺爲恨。丁丑入嶺。道經團風。遂舍舟登岸。直抵黃安。見楚空。并睹天臺。便有棄官留住之意。楚空見余。蕭然勸余復入。余乃留吾女并吾壻莊純夫于黃安。而因與之約曰。待吾三



年滿收拾得正四品祿俸歸來爲居食計卽與先生同登斯岸矣。楚空牢記吾言教戒純夫學道甚緊吾女吾壻天臺先生亦一以已女已壻視之矣。嗟嗟予敢一日而忘天臺之恩乎。旣三年余果來歸奈之何聚首未數載天臺卽有內召楚空亦遂終天也。旣已戚戚無懽而天臺先生亦終守定人倫之至一語在心時時恐余有遺弃之病余亦守定未發之中一言恐天臺或未窺物始未察倫物之原故往來論辯未有休時遂成扞格直至今日耳。今幸天誘我衷使予舍去未發之中而天臺亦遂頓忘人倫之至乃知學問之道兩相舍則兩相從兩相守則兩相病勢固然也。兩舍則兩忘兩忘則渾然一體無復事矣。余是以不避老不畏寒直走黃安會天臺于山中。天臺聞予至亦遂喜之若狂志同道合豈偶然耶。然使楚空先生而在則片言可以折獄一言可以回天又何至苦余十有餘年彼此不化而後乃覺邪。設使未十年而余遂死余終可以不化邪。余終可以不與天臺合邪。故至次日遂同其子汝念往拜先生之墓而先生

之墓木拱矣。余旣痛九原之不可作故特爲此傳而連書三紙以貽之。第一紙以呈天臺志余喜也。第二紙付汝念汝思使告而焚之先生之墳志余恨也。第三紙特寄子健于京志余喜而且恨恨而又喜也。蓋健推愛兄之心以及我可謂無所不至矣。故爲傳傳余意以告先生云。

敬少時多病貧生無術藉楚空兄介紹得受業于耿天臺先生之門。先生雖知余學沉于二氏然愛余猶子也。繼因往來耿宅得與李卓吾先生遊心切師事之。兩先生以論道相左今十餘年矣。敬居其間不能贊一辭口含黃蘗能以氣向人乎。唯恨楚空兄早逝耳。二日前得楚空長郎汝念書汝念以送莊純夫到九江專人馳書白下報喜於余云。兩先生已聚首語甚歡契。越三日則爲十二月二十九余初度辰也得卓吾先生寄所著楚空先生傳述兩先生契合本末且悉。余讀之不覺淚下曰。兩先生大而化矣。乃適以今日至豈非余更生辰邪。抑楚空先生復作也。因手書而梓之板成以付

汝念及余壻汝思。周思敬跋。

（國朝獻徵錄）卷一一二

李棟學梅傳

耿定向

李棟者，予里中人也，名學梅。初爲臬司，梟桀當世。宗賓天，詔下諸司哭臨，時棟伏庭下哭之獨哀。督學顏冲宇氏義之，因晉署司刑功曹云。棟兄弟凡四人，棟爲嫡且長，餘孽子。棟父雖諸孽而疏，薄棟田宅，便利者悉與諸孽，故諸孽富厚而棟獨窮。其大父不平，欲訟諸官，棟跪大父膝下泣曰：「弟吾手足，父鍾愛弟，卽愛我，奈何以腐鼠傷父意？」且也控孫訟子，以子慰父，匪矣。大父乃已。里人稱其讓。尋母歿，棟廬墓所者三年，往見廬墓者率爲廬居，乃棟執氣獨棲芥間，暑雨一蓋，嚴冬一裘，席耳。又苦貧，日不免以拮据生理出，出必返，卽深夜必至墓所。一夜至墓近溪澗，忽雷雨暴作，溪澗不可渡，乃持蓋立溪上，望墓踰號曰：「兒在此，兒在此。」如是者達旦。又一夜雪積數尺許，鄰有耆儒張姓者，意棟苦雪或他之也，深夜往闢之，席藁臥雪中，沒不可辨。環視久之，始見雪中隱隱一髻高，張益嗟嘆，轉語諸人人。近歲其父歿，亦廬墓側如喪。母里人稱其孝。棟前從事刑曹也，憲長方某氏亦廉其賢，特令督臬獄。舊吏督獄者，值慮囚時，可坐得若干金，乃棟受令卽自榜獄中曰：「諸囚犯於刑者中多。」



儒藏

以賄故上令吾督獄者勅法耳。若干法而唯賄何如。此囚不以一毫自愧且從家累糧且餽所以飼囚之無告者。又有囚法不應死。檄檢贖得其情請於憲。長生之絕口不言恩。其人懷百金致私爲同曹。檄取后察知德由檄也。乃置酒飲間更薦幣加金爲壽。檄已邪然握手去。人又稱其廉且仁云。檄往歲訪介紹謁余。余重其行見之。檄故古貌又冠履敝惡。賸然一田夫也。予間與友談經史或舉其凡未悉其末或億其意偶忘其辭。檄從旁代對每多助予。始檄亦常涉獵經史者。詢其少師里儒張高。高師郭先生慶善甫。甫王文成之門弟子也。其行誼蓋有本矣。耿子曰。夫也命夫其不幸而不生於元和。永建之年乎。藉令生於其際久已卿矣。乃檄故不善治生其家日落里人無識者咸嫌其迂而行革或反嫉其矯士貴遇乎哉。雖然若原憲高柴輩得聖人爲依歸則又不可謂不遇也。檄幸受知冲宇矣。

李贊撰（李溫陵集）卷一二

湖廣按察司僉事陳公吾德行狀 葉春及

萬曆己丑冬十一月壬辰奉政大夫湖廣按察司僉事陳公卒于位。公名吾德字懋修。先世莆田系出宋

太師真國公說。元初有曰俾者總管惠州。因家廣。至孟珙生封兵科給事中。南岸公文鳳娶封君人黃氏。生公。十歲能誦千支卦名。納甲畫卦九九之法。有強暴惡聲常及門。顧奇。公名公指峨嵋曰。山尖指日。公答。海闊涵天。謂若雖銳吾能容之。其人嘿然。已酉。選補邑諸生。庚戌。下街獄起。公隨給事公會遠郡縣獄。職案牘者三年。伯父又以饑饉會疫作。人期不入公。入侍。上書主吏得條諸輕罪。願繫活者衆矣。壬子。鄉薦第二人。先是督學使者嘗署泉事。論下街獄私某子甲。惡公守正不撓。及行部得一生所爲文奇之。已知爲公。則大恚。應鄉書。又大恚。里人曰。何恚爲。文亡論。三年。皇皇將父。以及其伯。籍今應孝廉方正舉。第一可也。癸丑。下第。屏迹公府。鍵戶發藏書讀之。聖賢載籍古今損益國家典章靡不研究。乙丑。成進士。授行人。奉使授蜀汶川王冊。建豐城李尚書瑩皆無私交。隆慶己巳。進工科給事中。當是時。東粵盜賊如宵。飾虛公執空文以罔朝廷。乃自督府上下相通。盜賊日多。公上八事。明賞罰。復兵防。議舟師。禁調出。補假貸。嚴虛冒。恤撫勦。卹忠勞。上從之。蓋自海內寇亂。皆藉民舟戰守。東粵之敗。參將魏宗瀚盡移入。

南渡港指揮李茂材力爭不能得。首一本至燬盡。茂材死之。此公所切齒也。庚午元日日有食之。鼓于禮部。公上疏曰。男教不修。陽事不得。適見于天。日爲之食。婦順不修。陰事不得。適見于天。月爲之食。是故日食則天子素服而修六官之職。月食則后素服而修六官之職。蕩天下之陰事。帝后恐懼如此。其至也。何況臣子。六經曠遠。國家儀注具存。往歲七月望。教月中軍都督府公卿大臣多從僕御。亂行無禮。雜沓喧庭。餽項而散。奇夫庶人馳走。宜不如是。臣竊恨之。元旦禮部教日。三事在前。百僚在後。御史侍儀。鴻臚贊禮。昭昭白日。非復暮夜。庭雜如前。大臣自攜茵褥。肆然安坐。臣欲告之。不敢出位。詩曰。敬天之怒。無敢戲豫。又曰。不規于人不敬于天。昧先聖之經。忽聖朝之誥。慢天道之尊。蹈戲豫之失。皆大不敬。元夕月復食矣。請先戒誓。御史不舉。臣謹糾劾以懲怠慢。臣聞春秋之義。貴元慎始。元旦元夕。日月交食。天心彌切。陛下下修省之詔。躬減省之文。幸甚。應天以實。請居法官。戒荒寧。罷遊宴。凡娛耳目悅心意。一切無益。勿復爲之。臣工承德。天休可逕。勅禮部戒誓。教日月無敢喧庭。自此始。命作紫山道中貴人

織衣浙江。式十餘區。公謂民力已竭。加之水旱。中貴人至將不勝。莫若徵改未完。便與同官嚴用和上疏。皆從焉。五月。攝戶科。適有買珠之命。與同官李紀切諫。皆免爲庶人。公攝官廬七日也。今上卽位。都給事中賈某薦公忠直。不宜久處間巷。召爲兵科給事中。癸酉四月至京師。卽劾中貴人鄧真傳內旨。官其姪錦衣總督劉燾奸賊。不宜召用。忤太宰楊博。先是己推尚寶少卿。楊抑之。而江陵新柄國。整博見疏喜。則令所善鄉人王篆給事中。張某諭意。一日見于直。直曰。江陵謂公疏善。俾濫宜不止此。公對不敢風聞中人也。江陵不答。是時江陵專言事者多承風。先白乃敢言。公自以非宰相私人。不附。禮部主事宋儒與兵部主事熊敦朴交惡。購敦朴欲疏。江陵與王篆。江陵遂令部尚書譚論劾敦朴。請外。公並劾儒。江陵與公不白。已憾之矣。十一月。成國公朱希忠。從行金錢求贈爲王。驗封郎陳某與六科並持不可。公復上疏力爭。江陵大怒。十二月。癸丑。慈寧宮火。公復疏陳五行休咎。江陵詆曰。安能腐儒語也。辛酉。朱希孝直廬火。丁卯。大內又火。戊辰。乃下其議。明年二月。扈出守矣。至饒。正風俗。作人才。廣厲學官。置僦士之田。談經校



執誘進聖賢之道。爲條教立父老正二。頒行于民間。勸以爲善去惡之意。其善惡皆有籍。行之出于至誠。莫不回心顧化。禁溺女。舉女名以公姓。或以縣減網罟之徵。定湖港之稅。革浮羨。遠貨利。故事。外府不籍以待太守。公盡移入內府。不私出納。鍰金把握易貪。夫便之則以積貯陶天下所印給也。春夏之間。商舟輻輳。故征于官。吏多侵漁。巡功因而掩取。至是以屬。常度外無私焉。卽欲用干平賈。新安賈人列肆郡中。爲質。偷兒得物輒以售之。喪資之家不能踪跡。有司亦視爲外府不問。一切逐之。權貴關說不聽。宗室結納有司。負勢驕奢。難繩以法。嚴正不阿。杜門斂手。卽吹笙度曲。惟恐明府聞也。僥稱沃壤。樂浮德安多山。亡命潛匿。番餘則演彭蠡。接九江。上流不逞之徒。與濤出沒。萬年尤盜淵藪。公飭什伍。鼓勇銳。有警掌固扞諸岸。戈船扞諸江。三年眠者帖席。初至郡城崩百餘雉。繕之而城中皆列柵啓閉。不獨大盜之備。亦欲以防偷兒。宗室夜飲不健。致建昌王被竊。召百戶呂希周授方略。微得二人。卽府之將作也。江陵已賊。公御史劉臺劾其授成國金十萬。出公饒州。持經者受顯禍。憾益甚。樂平進蔗。欲因中之。宣言上怒蔗

腐不可食。當逮太守以下。如此則株連臚部。光祿萬尚書爲言。乃止。第收治縣人而詔切責太守。偷兒竊建昌玉帶。則以售于留都。江防同知龍宗武偵得上。操江都御史王篆傳致其文。饒州巨寇。公坐謫馬邑。典史親老不欲行。屬馬邑失。因詔書問尉安在。得無之任違慢乎。公恐。馳至鄭州。御史某又劾公在郡時。違禁講學。擅用庫金指買學田。亦俸金耳。移疾蘇門。明年大計。江陵遂欲以此黜公。考功郎鄭某不可寬。削籍。公兩黜無愠色。田家冠優游里中。澹如也。癸未江陵死。都給事中余某薦遷某府推官。同知皆以親老不赴。甲申。二親幸以天年終。丁亥。詔起同知紹興。至則歲侵。奸民乘時並興爲亂。公職詰盜。殲渠魁二人而撫其饑者。郡中清居。五月。遷湖廣按察司僉事。分部武昌。巨寇劉汝國。虞孟新倡亂。久當事者往往坐視。幸脫身去。公下車。毅然討討。別部欲專功。寡謀。偵事。賊勢益倡。公率師詣壘。振甲督戰。士無一不當。百。已丑。春二月。大破之。劉汝國。虞孟新就禽。餘奔遁無脫者。上功幕府。冬十二月。自黃州行部歸武昌。道疾。二日卒。年僅六十有二。公長身偉度。望之知非常人。性忠誠。壹心許國。正直不能阿徇。故用輒斥。將太



用之不幸逝矣。公始罷歸，于有司未嘗通竿牘，一鄉利害則急之。庚午，羣盜充斥，邑西梁村雲鄉二壘反為賊窟，白骨蔽野。公請材官鄧子龍屯守，復臨江之戍，至今賴焉。辛未，鴨夷由厓門入犯，人情洶洶，聞左悉起赴敵。公父子輸粟餽糧，鴨夷乃遁。里中惡少年謀以七月七日為變，公密語守令朱別駕預待，不得動。明年春大饑，結他鄉千餘徒起，會之，於是勸分糴粟，市中賑困乏，亂遂已。既而鴨夷由新寧犯邑西界孔林，與鄧子龍計畫河守，賊不敢度。會朱別駕自五羊歸，受方略，舉兵西向，賊走出。許酋數十艘入內海劫略，鄉人奔城，舟塞河下，白有司居以間曠而慰藉之。于是時鄧子龍從征藤岡矣，則移書總兵張元勛召子龍。元勛白直指楊標，標曰：「陳公通竿牘急矣，乃促巡海副使劉穩屯香山，而令參將晏某從海上破賊，相戒不犯外海。」嘗登皂幕山，四顧徘徊，欲因舍步舊城，益以新會古博平康新興雙橋置縣，招流亡，復里甲，庶幾帶牛佩犢之衆，盡緣南晦不果，以為恨。語在端州志。蛋居海墘，以儉為業，往盜視之，玉石不辨，列柵自守，吏兵掩捕，一如昨風。公徹其柵，有名藉者書于間書，以後吏兵不敢動，而存活者衆。士以科第少

謀徒學，公曰：「母改作為也。」建文昌閣于左，而引紫水入泮池，科第自此盛。邑負山環海，內狹外寬，議者欲城其外。公亟言于當道，無任者。食憲何某至，乃城焉。白沙先生若節婦烈女祠，皆新之。有毀節婦祠祠司馬者，移書責之曰：「司馬法不宜祀吾粵，奈何徇一人之私而拂天下公議？」月吉與里父老會民讀法，語次及釋閭里化之。先是劫貨者多，寘舟宿屏處，俟贖用此賊不得藏。比伍中劫貨衰息，事聞利害名教為之不啻饑渴，皆此類也。丁丑自昌邑歸，朝夕得奉給事公，太孺人甘菴。太孺人體羸，未嘗離側，就養八年。父母安之。甲申春，太孺人告逝，其冬給事公亦逝，哀毀骨立，倚廬讀禮。饒州弔者相望于道。總管故居在廣州甫宜巷，長子居之，三百餘年，寓于他氏公廩而祠焉。墓失百年，公未嘗不中夜興嘆。會方士挾驗鬼術游里中，謂公青泉白石，一水雙牛，是總管公墓也。審其象，果得之，碑隱茅草。語在大司空陳紹儒墓表。張太母殯謝前山，見夢苦蟻，啓殯，三蟻適至，改葬三珠岡。此皆仁孝心通于神明，非苟而已。梁氏姊守志，白而旌之，為立後。弟卒，棺衾墳墓必厚，曰：「令吾他日無以加也。」族人貧不能葬者為之購，不能娶者為之食。

其厚于人倫如此。冠昏喪祭，惟古禮是循，昏無舉樂，喪無酒肉，歲時率子弟拜家廟，無出門之祭。諸子有過，必正色相對，竟日不語，改之乃罷。登第二十餘年，無私財，惟給事公之命，食不重味，衣不文繡，必儉約爲家人先。嘗歆侈靡，佚遊酣飲，雖里人必法，語之亦不敢不從也。

（國朝獻徵錄）卷四五

太子少保刑部尚書鳳洲王公世貞神道碑

王錫爵

肅皇帝時，海內文學知名之士，蓋人自標幟云。而吾友鳳洲王公最後起，實以異才博學，絕一世。每有撰造，率攬漢魏六朝三唐作者之奇而出之，而其地望之高，游道之廣，聲力氣義，能鼓舞衆海內之豪俊，以死名于其一家之學，直千古可廢也。一時士人風尚，大類王伯安講學之際，而公之愛俗有加焉。雖然，伯安以講學名，卒所以顯者功烈也。今世人皆知公之詩若文，而其平生行誼，非予莫知其深。惟是蓋棺且久而，麗牲之石虛而待予，予不敢以不文辭矣。公名世貞，字元美，鳳洲其號。系出瑯琊王氏，自晉丞相始，公導渡江而南，世爲浙人。後有崑山學正諱夢

聲者，因家于官，而大倉之王自夢聲始。又六世而爲公大父質菴公倬，仕至南京兵部侍郎。倬生都察院右都御史兼兵部侍郎贈尚書思質公忬，配郁夫人。質生公。公幼稱爲聖童，六七齡已能讀父書，至數十萬言。十五爲寶劄詩，得奇句。十八舉于鄉，丁未成進士。會選館，舉主諷公贊文于夏學士，公耻于謁，謝之。除刑部主事，獄獄風被，持三尺惟謹。緹帥陸炳方貴，幸用事，受巨璫，指匿姦校，問某欲貸其死，公搜炳家得之，炳宛轉請脫。既復因執政徐公以請，公不許。固安令以事忤嚴璫，坐蜚語抵罪，公廉知其誣，竟白之。時分宜相當國，雅重公才名，數令具酒食徵逐，微諭相指，欲陰收公門下，公意不善也。而相所譽郎中楊繼盛下獄，公爲納橐餗。楊夫人訟冤，公爲手定疏草。楊臨命東市，公又爲收其屍，治斂具，與諸同舍郎以詩哭之。分宜遂大訾公。銓司兩推公爲督學副使，皆格之。補青州兵備使，青州故多盜，盜之黨多游于株吏爲耳目，吏莫能問。公至，行保甲法，重懲購盜之賞，閭里輕俠少年皆收募爲用，羣盜屏跡。嘗按捕罪人雷齡，不得，齡故善捕盜，公心疑吏王尉匿之。一日試便尉詰盜，具得主名。公大喜曰：「是何神也？吾得盜媒。」



矣。立召尉責齡所在，果得齡。有豪徐進道被訟，罪不至死，而進道恃其宗強，黨與衆，陰謀勅兵反。公聞，故緩其獄，令捕盜自効，而進道謀漸解。遂縛之，盡散其黨。青人相與手額頌公曰：「吾曹父子安而室家聚，誰之賜也。」始東諸侯見謂公文人，少年不習爲吏，第飲酒賦詩爲豪舉耳。比公至鎮，而精嚴練事，發奸隱如神，乃皆歎服，以爲趙子都之流。解籍籍輦轂下，而分宣父子益忌公。又以公父司馬公父世廟特達，知不賓事左右，取釁滋起。會虜入澤州，分宜遂譖爲司馬公罪，構下獄當死。公亟解青所印走長安，與其弟太常公敬美叩闕請代。司馬急止之曰：「無遽死，乃翁爲也。」則相與內服，跪道傍，進諸柄人車，裨賴請救，而諸柄人皆側目分宜，無敢言者。於是司馬竟不免。公號跣扶掖歸，倚廬于旁，三年不飲酒食。既禪除，猶爲中書，居持心喪，遠邇哀痛焉。會莊皇帝卽位，與太常公赴闕訟父冤。略言：殺臣父者本諸父子，非先皇帝意，而臣父督兵剿遼，効首功八百級，尚虛解不奏，按澤州小失事，曲法至死。惟陛下哀察，疏入，有詔追復官。于是南北臺皆言者謂公父冤既雪，當一出報。主尋起補大名，公猶隱軫思痛，不忍出。

也。曰：報賜以力，孰若以言。乃應詔條上八事。法祖宗以弘聖德，正殿名以尊治體，酌恩義以處宗室，寬禁例以求才哲，修典章以彰國紀，推德意以昭大勸，明爵賞以徠異勳，練兵實以重根本。因寓書相國徐公、太宰楊公，具言其概。上止此，不復任馳驅，請以死辭。而兩公復書，以大義譴讓公。公不得已之官。尋遷浙江參政治。吳興時久雨，殺翔貴富人，閉粟高其價。公謂未可卒禁，乃首捐俸五十金，積穀以風富人。富人之粟益出。至冬，得三萬石，以代貧下戶賦，而以其餘賑復上疏言：吳越新罹兵火，它供億繁興，民不堪命。請汰內府內官大小監冗食，及清錦衣諸衛寄籍者爲根本計。事雖未盡行，然竟得改折漕糧十五萬，三郡人賴焉。再遷山西按察使。蜀都夫人病，兩疏乞休，未報。投牒竟歸。中道聞訃，但括星馳氣息幾不屬。服除，以薦補楚東旋，轉廣西。一月入爲太僕卿，復自太僕擢都察院右副都御史，督治邯鄲。邯陽在楚西南，無兵馬財賦之重，前中丞皆臥而治之。公獨刻意振刷，雨下車，劾一守一令，墨吏望風多自引去。前中丞嘗奏留邊餉備卹緩急，公以九州一家，憂在邊鄙，令通賑所部屯田，以本色備荒，折色充餉。

不必須邊餉而給也。而郎又適少事，奈何輟所急以事無用，竟奏罷之。公又以楚地再震，荊州壞廬舍尤多，疏引京房占，有臣道太盛語。又嘗遺京師人書，言江陵浸淫耳目之好，非社稷禍。其人泄之，而江陵積不能平，數言于人。然以公才高行清，猶隱忍收人望，稍遷南大理，尋以人言改應天府尹，拂衣歸。公嘗屈指前後所忤三相國，分宜、雁、眺殺入，入其網無得脫者。新鄭禍而赦于言，嘗力持其訟，究請急，二疏不肯下。既而悔之，知其無他腸也。若江陵則且忤且合，以飛箝釣餌，雜出中人，手書不時至，皆欵欵輸心道舊語，計未有以絕之。會于化女以守節感冥哭，立恬澹教門，公有當于心，輒焚筆研，謝賓客，與余結廬城南，戒食梵誦甚苦。間相封談平生所經啼哭險夷之境，如夢如醒，且沾沾喜也。蓋自是江陵始息意于兩人，不深忌于亦不復以官爵忤公子，兩人亦相得也。曰：此度世不足，逃世不有餘乎？嗟乎，豈圖末路更以此被物色，而公亦辱為子餘廬所累也。公初起南京刑部侍郎，為父請卹典，得贈大司馬，子祭。尋改南京兵部侍郎，以三品考與官蔭一子入太學。時已遷刑部尚書，會有言公曾被劾不當得考者，所司具言公

歷官行跡無玷，不與大計論劾比事旋已。然公自此歸志益決，凡三疏乞休，始允歸。歸九月而卒。卒之前數日，手條家戒及身後斂葬諸儀甚悉。及期，與僧某從容談笑，說偈而逝。若有悟脫然。而余女懸記公所謂卦盡八八者，亦竟驗矣。公至性過人，即篤老奉司馬蒸嘗必哭泣如初喪。與季敬美太常公友愛極篤，嘗宴客莫愁湖，是日聞太常計後過湖上，未嘗不流涕也。祖質菴公嘗置義田千畝，贍族人，公復以膏腴益之。及四方有所饋入，往往緣手散施，咄嗟而盡。酒人詞客，縑流羽倖叩其門，不以事辭，昏夜告急難，不以嫌辭。邑里中遇水旱繇役，請命當道，不以非分難。尤好以文字獎掖人，後生初學每得公一言品題，一面傾吐，則或希聲射影，傳相引重。或故于廣坐，字公以示親暱而勵者，甚或陰持幕中，嚶笑私語，責公公明知之，一笑而已。以故人皆歸心，或思及人而人不知所自，醉罵人而人反思之。趙公卒，問閨兒女，嬰屢相弔，海內士大夫無論知與不知，莫不太息焉。蓋其誠心為質，合覆廣而雕琢少。公所著有四部藁，世已刻行。四部有後集，未刻。有別藁，未刪定，藏于家。古今著述之富，公為第一。其所蒐獵百家子史，皆以意鎔



明儒

鍊翁然爲一家。故公之詩使事構體不嫌小出入要歸之元氣決札大海渟泓中無恒釘寒促鐙刻深險之態如其爲人寬疎磊落皆所謂得其大者嗟乎後世有蘇長公乃能評公之文有郭有道乃能第公之品而予以竹林舊社祖述耳目大都儼亦庶幾文獻之足徵乎公享年六十有五官至六卿法得專葬猶哀思司馬遺命附葬于項涇之原計開上特贈太子少保予祭二壇賜金四百緡送官治葬公長子兵部武選司主事士騏用遺命疏辭賜金不許。

《國朝獻徵錄》卷四五

秦關王先生

先生名之士字欲立號秦關學者稱秦關先生其先咸寧人五世祖志和遷居藍田其後子孫因家焉父旌號飛泉官代郎教授明理學有語錄藏于家先生幼承庭訓七八歲即知學教授公投之毛詩二南輒解輒爲諸弟妹誦之教授公喜有子後治大戴禮兼通易爲諸生以文名庠校間嘉靖戊午舉于鄉己未試春官不第由是益肆力舉業者累年後屢不第幡然改曰所性分定聖道遠人乎哉一曲經生華藻奚爲遂屏棄帖括潛心理窟毅然以道學自任爲養心圖定氣說書之座右閒關不出者九年蒿牀糲食尚友千古行已必恭與人必敬飲食必祭必誠兢兢遵守孔氏家法一時學者以爲藍田呂氏復出感慕執經者屢滿戶外士習翕然又謂居鄉不能善俗如先正和叔何乃立鄉約爲十二會赴會者百餘人設科勸糾身先不倦諸灑掃應對冠婚喪祭禮久廢每率諸宗族弟子一一敦行之于是藍田美

俗復興。萬厯甲戌病痺。屬又哭母過毀。步履愈艱。終喪而嚮道之心愈篤。謂非博取遠遊。終難進道。會仲子守亦與偕計。己卯遂復如京。是時先生已久謝公車。第日與諸同志講學都門之蕭寺。崇正開邪。力肩斯道。即時貴武譚及二氏。輒正辭距之不少假。既而道鄒魯。瞻闕里。徧拜先師及諸賢祠墓。低回留之不忍去。夢寐如見其人。久之始歸。由是秦關之名動海內矣。凡搢紳益茲道茲者。罔不式廬願見。表廬宅里云。歲乙酉。德清許敬菴先生督闕中學。講學正學書院。先生故許先生同志友也。禮徵先生為多士式。先生亦樂就許先生合志同方。相為切劘。時多士皆有所興起。後許先生以應天丞謫歸。先生亦南遊講學。出武關。浮江漢而下。迂道江之右。會南昌章子潢。新城鄧子元錫。廣信衢州楊子時喬。殷子士望。復東渡浙水。見許先生于德清。東南學者聞先生至。多從之遊。先生二子宗容。念先生疾。客久肅迎歸。是在己丑秋。明年庚寅八月。卒于家。壽六十有三。目

欲瞑。以手示二子為訣。亦曾子啓手足意也。先是南司成趙公用賢。柱史王公以通相繼疏薦。趙疏海內三逸。公居其一。疏云。孝弟力田。行不踰乎軌範。詩書敦說。名已動于鄉閭。雖久嬰足疾。而過廬者必式宜。如近王敬臣故事。授以京秩。俾表帥一鄉。矜式後學。後柱史疏大略與趙符。命下。宗伯議。議如薦者。指先生為孝廉。垂三十餘年。竟不仕。角巾野服。悠焉終老。至是詔授國子監博士。除目至。而先生已先物故四越月。一命不待。君子惜之。先生生平修姱博倫。篤于行誼。丁內外艱。毀幾滅性。處兄弟怡怡。未五旬失耦。誓不繼。鰥居終身。其于世俗聲色嗜好一切漠然。性不問家而好施。喜活人或謂貧所濟幾何。則曰。吾盡吾心力耳。置祠祭墓祭二田。為宗族置義倉義田。即植晦無多。實貧士所難。居恒晦迹却埽。即郡邑以幣交。未嘗苟受。亦未嘗輕謁。至于訪道求友。雖跋涉問關數千里。亦不憚遠云。先生篤信好學。見微本原。非沾沾矜一節一善以成名者。世或止以甘



貧苦節稱先生是豈足盡先生哉。所著有理學緒言、信學私言、大易圖象卷、道學考源錄、易傳詩傳、正世要言、正俗鄉約、王氏族譜、正學筌蹄、關里曉思、關洛集、京途集、南遊稿。所述有先師遺訓、先君遺訓、皇明四大家要言、性理類言、續孟錄諸書行世。

馮從吾撰 《馮少墟集》卷二〇

李溫陵傳

李溫陵者，名載贊，少舉孝廉，以道遠不再上公車，爲校官，徘徊郎署間。後爲姚安太守。公爲人中，頗外冷，丰骨稜稜，性甚卞急，好面折人過，士非參其神契者，不與言。強力任性，不強其意之所不欲。初未知學，有道學先生語之曰：「公怖死否？」公曰：「死矣，安得不怖？」曰：「公旣怖死，何不學道？」學道所以免生死也。公曰：「有是哉？」遂潛心道妙，久之自有所契，超于語言文字之表。諸執筌蹄者，了不能及。爲守法令清簡，不言而治。每至伽藍，判了公事，坐堂皇上，或眞名僧其間，簿書有隙，卽與參論虛玄。人皆怪之，公亦不顧。祿俸之外，了無長物。久之厭圭組，遂入鷄足山，閱龍藏，不出。御史劉維奇其節，疏令致仕以歸。初與楚黃安耿子庸善，罷郡遂不歸。曰：「我老矣，得一二勝友，終日晤言，以遣餘日，卽爲至快，何必故鄉也。」遂攜妻女客黃安。中年得數男，皆不育。體素癯，澹於聲色，又癖潔，惡近婦人，故雖無子，不寘。

妾婢。後妻女欲歸，趣歸之，自稱流寓客子。既無家累，又斷俗緣，參求乘理，極其超悟，剔膚見骨，迥絕理路。出爲議論，皆爲劒刀上事，獅子逾乳，香象絕流，發詠孤高，少有酬其機者。子庸，死子庸之兄天台公，惜其超脫，恐子姪效之，有遺棄之病，數致箴切。公遂至麻城龍潭湖上，與僧無念、周友山、丘坦之、楊定見聚，閉門下捷，日以讀書爲事。性愛掃地，數人縛帚不給，衿裙浣洗，極其鮮潔，拭面掃身，有同水淫。不喜俗客，客不獲辭而至，但一交手，卽令之遠坐，嫌其臭穢。其忻賞者，鎮日言笑，意所不契，寂無一語。滑稽排調，衝口而發，既能解頤，亦可刺骨。所讀書皆抄寫爲善本，東國之秘語，西方之靈文，離騷馬班之篇，陶謝柳杜之詩，下至稗官小說之奇，宋元名人之曲，雪藤丹筆，逐字讐校，肌裝理分，時出新意。其爲文，不阡不陌，抒其胸中之獨見，精光凜凜，不可迫視。詩不多作，大有神境，亦喜作書，每研墨伸紙，則解衣大叫，作兔起鶻落之狀，其得

意者，亦甚可愛。瘦勁險絕，鐵腕萬鈞，骨稜稜紙上。一日惡頭癢，倦於梳櫛，遂去其髮，獨存鬚鬣。公氣既激昂，行復詭異，斥異端者，日益側目。與耿公往復辨論，每一札累累萬言，發道學之隱情，風雨江波，讀之者高其識，欽其才，畏其筆。始有以幻語聞當事，當事者逐之。于時左轄劉公東星迎公武昌，舍蓋公之堂。自後屢歸屢遊，劉公迎之沁水，海中丞迎之雲中，而焦公弱侯迎之秣陵。無何復歸麻城，時又有以幻語聞當事，當事者又誤信而逐之，火其蘭若，而馬御史經綸遂躬迎之于北通州。又會當事者欲刊異端以正文體，疏論之，遣金吾緹騎逮公。初公病，病中復定所作易，因其名曰九正易因。常曰：我得九正易因成，死快矣。易因成，病轉甚。至是逮者，至邸舍匆匆，公以問馬公。馬公曰：衛士至，公力疾起，行數步，大聲曰：是爲我也，爲我取門片來。遂卧其上，疾呼曰：速行，我罪人也不宜留。馬公願從，公曰：逐臣不入城制也。且君有老父在，馬



公曰、朝廷以先生爲妖人、我藏妖人者也、死則俱死耳。終不令先生往而已。獨留馬公卒同行。至通州城外、都門之牘、尼馬公行者紛至、其僕數十人奉其父命泣留之。馬公不聽、竟與公偕。明日、大金吾寘訊、侍者掖而入、卧於塔上。金吾曰、若何以妄著書。公曰、罪人著書甚多、具在于聖教有益無損。大金吾笑其囁強、獄竟無所真詞、大略止回籍耳。久之、肯不下。公於獄舍中作詩讀書自如。一日呼侍者、薙髮、侍者去、遂持刀自割其喉、氣不絕者兩日。侍者問和尚痛否、以指書其手曰、不痛。又問曰、和尚何自割。書曰、七十老翁何所求。遂絕。時馬公以事緩歸、觀其父至是聞而傷之曰、吾護持不謹、以致于斯也。傷哉。乃歸其骸于通、爲之大治冢墓、營佛刹云。公素不愛著書、初與耿公辨論之語、多爲掌記者所錄、遂哀之爲焚書。後以時義詮聖賢深旨、爲說書。最後理其先所詮次之史、焦公等刻之于南京、是爲藏書。蓋公於誦讀之暇、尤愛讀史、于

古人作用之妙、大有所窺。以爲世道安危治亂之機、捷于呼吸、微于縷黍。世之小人、既僥倖喪人之國、而世之君子、理障太多、名心太重、護惜太甚、爲格套局面所拘、不知古人清淨無爲、行所無事之旨、與藏身忍垢委曲周旋之用、使君子不能以用小人、而小人得以制君子、故往往明而不晦、激而不平、以至于亂。而世儒觀古人之跡、又概繩以一切之法、不能虛心平氣、求短於長、見瑕于瑜、好不知惡、惡不知美。至于今、接響傳聲、其觀場逐塊之見、已入人之骨髓、而不可破。於是上下數千年之間、別出手眼。凡古所稱爲大君子者、有時攻其所短、而所稱爲小人不足齒者、有時不沒其所長。其意大都在于黜虛文、求實用、舍皮毛、見神骨、去浮理、揣人情。卽矯枉之過、不無偏有重輕、而舍其批駁譴笑之語、細心讀之、其破的中竅之處、大有補于世道人心。而人遂以爲得罪于名教、比之毀聖叛道、則已過矣。昔馬遷、班固、各以意見爲史、馬遷先

黃老後六經、退處士進游俠、當時非之。而班固亦排守節、鄙正直。後世監二史之弊、汰其意見、一一歸之醇正。然二家之書若揭日月、而唐宋之史讀不終篇、而已兀然作欠伸狀、何也。豈非以獨見之處、卽其精光之不可磨滅者歟。且夫今之言汪洋自恣、莫如莊子。然未有因讀莊子而汪洋自恣者也。卽汪洋自恣之人、又未必讀莊子也。今之言天性刻薄、莫如韓子。然未有因讀韓子而天性刻薄者也。卽天性刻薄之人、亦未必讀韓子也。自有此二書以來、讀莊子者撮其勝韻、超然名利之外者、代不乏人。而申韓之書、得其信賞必罰者、亦足以強主而尊朝廷。卽醇正如諸葛、亦手寫之以進後主、何嘗以意見少駁、遂盡廢之哉。夫六經洙泗之書、梁肉也。世之食梁肉大多者、亦能留滯而成痞。故醫者以大黃蜀豆瀉其積穢、然後脾胃復而無病。九賓之筵、鷄豚羊魚相繼、而進至於海錯、若江瑤柱之屬、弊吻裂舌、而人思一朵頤、則謂公之書爲消

積導滯之書可。謂是世間一種珍奇、不可無一、不可有二之書亦可。特其出之也太早、故觀者之成心不化、而指摘生焉。然而窮公之所以罹禍、又不自書中來也。大都公之爲人、真有不可知者。本絕意仕進也、而專譚用世之略。謂天下事決非好名小儒之所能爲。本狷潔自厲、操若冰霜人也、而深惡枯清、自矜刻薄、瑣細者、謂其害必在于孫。本屏絕聲色、視情慾如糞土人也、而愛憐光景、於花月兒女之情狀、亦極其賞玩。若借以文其寂寞、本多怪少、可與物不和人、也。而于士之有一長一能者、傾注愛慕、自以爲不如。本息機忘世、槁木死灰人也、而于古之忠臣義士、俠兒劍客、存亡雅誼、生死交情、讀其遺事、爲之咋指斫案、投袂而起、泣淚橫流、痛哭滂沱、而不自禁。若夫骨堅金石、氣薄雲天、言有觸而必吐、意無往而不伸、排搗勝已、跌宕王公、孔文舉調魏武若稚子、私叔夜視鍾會如奴隸。鳥巢可覆、不改其鳳味。鸞翮可鍛、不馴其龍性。斯所



由焚芝鋤蕙、銜刀若盧者也。嗟乎！才太高，氣太彊，不能埋照涵俗，卒就囹圄，懸柳下而愧孫登，可惜也夫。可戒也夫。公晚年讀易，著書曰九正易因。意者公于易大有得，舍亢入謙，而公遂老矣逝矣。公所表章之書，若陽明先生年譜及龍溪語錄，其類多不可悉記云。或問袁中道曰：公之於溫陵也，學之否？予曰：雖好之，不學之也。其人不能學者有五：不願學者有三。公爲士居官，清節凜凜，而吾輩隨來輒受操同中人。一不能學也。公不入季女之室，不登冶童之牀，而吾輩不斷情慾，未絕嬖寵。二不能學也。公深入至道，見其大者，而吾輩株守文字，不得玄旨。三不能學也。公自少至老，惟知讀書，而吾輩汨沒塵緣，不親韋編。四不能學也。公直氣勁節，不爲人屈，而吾輩怯弱，隨人俯仰。五不能學也。若好剛使氣，快意恩讐，意所不可，動筆之書。不願學者一矣。既已離仕而隱，卽宜遁迹名山，而乃徘徊人世，禍逐名起。不願學者二矣。急乘緩戒，細行不

修，任情適口，鸞刀狼藉。不願學者三矣。夫其所不能學者，將終身不能學，而其不願學者，斷斷乎其不學之也。故曰：雖好之，不學之也。若夫幻人之譚，謂其既已髡髮，仍冠進賢，八十之年，不忘欲想者，有是哉。所謂蟾蜍擲糞，自其口出者也。

校記

①載贊：疑衍「載」字。按，《明史》卷二二一《耿定向傳》、卷二四一《張問達傳》所引均無「載」字。

明儒碑傳集卷七十九

張四維

張文毅公神道碑

上御極之三年。蒲坂張公以宮詹晉宗伯大學士入參機密。又八年秉政。踰年以父贈公之喪歸其廬。蓋上時時念公也。嘗顧問左右。張少師無恙乎。何時服除。於是朝士大夫。雖傳張公且復召。海內延頸而望太平。曰張公且復召。然未及召而公卒。

上聞震悼。輟一日視朝。賜祭加等。為十三壇。遣官治葬事。贈太師。謚文毅。歷一子尚寶丞。恩卹甚厚焉。及是公伯子甲徵等奉閣學山陰公狀。屬余紀其墓隧之石。余與公共事。

三朝自詞林講幄入參機務。先後皆獲從公。凡公之論議著作與其曆注于國家者。皆余所親睹。即不斐其何敢辭。公諱四維。字子維。別號鳳磐。山西蒲州人。也。其先自解徙。世以高義聞里中。曾祖寧。配雷。祖誼。配王。繼解。父允齡。號喟川公。配王。寔生公。以公貴。曾祖。祖父。贈封俱光祿大夫。柱國。少師。燕太子太師。吏部尚書。中樞殿大學士。妣皆一品夫人。具余所為喟川公志。公生而穎異。甫能言。解夫人弄之膝上。問兒

所欲。公亢聲曰。欲一當明主。康濟天下。解夫人大驚。心知公非凡兒也。年十五。舉茂才高等。督學劉公恭雅自負。少所許可。獨奇公。年少而才。推曰國士。嘉靖己酉。舉鄉試第二人。癸丑成進士。以庶吉士第一讀中秘書。乙卯。授翰林院編修。無何。丁內艱。服闋。補職。壬戌。乙丑。兩充會試同考官。分校永樂大典。是時詞林少事。日游教微遜。公獨與同志。槌戶讀書。自傳記諸子百家。無不窮詣。博覽而充好深沉之思。蓋隱然負公輔之望焉。袁文榮公嘗以博物策士屬公。代對立具草。袁公嘆曰。此真博物君子矣。徐文貞公嘗召諸詞臣集直中。語及國計。屬公考訂贏縮。推利害所繇。曰。此參政異日憂也。隆慶丁卯。大典錄成。陞右春坊右中允。予五品服。

莊皇帝首御講幄。以公文經筵日講官。公盟心登對。多所開發。

莊皇帝常竦意聽之。是年主順天鄉試。尋陞左春坊左諭德。兼翰林院侍讀。戊辰冬。請假歸省。賜銀幣。給驛以行。及春而復。已巳。陞翰林院學士。尋陞吏部右侍郎。轉左。新鄭高公雅重公。推轂甚亟。而同事者忌。以為軋已。從中撓之。公遂以疾乞歸。壬申春。



儒藏

上出閣講學。慎簡官僚。以公充侍班官。協理詹事府。尋掌府事。兼教庶吉士。無何。復引疾歸。萬曆甲戌。詔再起公。以原官仍掌詹事府事。充

世廟實錄副總裁。

肅皇帝在位久。章牘浩繁。諸司掌故皆闕軼。公極意蒐討。自嘉靖辛卯以後三十五年間。朝章邊務。國賦人才。皆畢然具備。江陵張公昶然稱服。因出舊所編勅紀者。盡屬公筆削。乃定。乙亥。

上簡置弼臣。陞公禮部尚書。兼東閣大學士。入內閣。參預機務。公既拜命。侍

上講讀于便殿。賜公御書一德和衷大字。公稽首謝出。

上以公器度不凡。注視者久之。丙子。充重修會典總裁官。丁丑。主會試。

肅皇帝實錄成。加太子太保。進文淵閣大學士。賜銀幣鞍馬。戊寅春。大婚。以公贊襄六禮。勞加少保。進武英殿大學士。歷一子中書舍人。庚辰。一品滿考。加柱國少傅。歷太子太傅。歷一子國子生。壬午。遼左大捷。以次策功。進無太子太師。歷一子錦衣百戶。世襲。凡三進秩。皆子三代誥命。自江陵柄國。以刑名一切高

絕海內。其治若束濕。人心翕然。既沒。而親信用事之人。尚據要地。與權璫為表裏。相與墨守其遺法。閣中議多齟齬不行。公燕居深念。間為余言。此難以顯爭。而可默奪。今海內厭苦操切久矣。若以意示四方。中丞直指。令稍以寬大從事。而吾輩無深求刻責。宜可以少安人心。會

皇嗣誕生。而公喜可知也。曰。時不可失。乃手疏勸上。宜以大慶施惠天下。省督責。緩征徭。舉遺逸。恤災青。以養國家元氣。而出諸司所擬寬條。屬余損益。凡數十事以進。

上欣然命行之。尋以詔恩。加公少師。吏部尚書。中樞殿大學士。歷一子尚寶丞。先是。席江陵寵者。憚公而易余。故起新昌位。余上以逼公。及新昌論罷計阻。則欲談事構隙。乃因陽城太宰劾罷。嗾御史并劾公。御史楚人也。

上曰。元輔忠臣。御史何得妄言。待其章不下。手詔趣公出。憚公者。愈不自安。則貪緣罪人。爵開說權璫。保將為公難。御史疏再入。

上怒。鬁御史三級。出之外。公上疏引咎。乞宥言者。上褒答不許。是時權璫驕恣甚。

上積不能平、語浸淫聞外、言官亦微知

上指、乃共為疏論、爵及保不法狀。

上震怒、立諭公擬旨曰、奴輩盜我威福、久其亟誅之。乃

下爵詔獄論死、安置保于南京、籍其家。言者因追論

江陵事、

上欲窮竟其獄、公從中救解、事得暫已。然異時江陵私

人遺片殆盡、公請 詔臺省舉骨鯁端亮之臣、或起

巖穴、或拔自下僚、芥月間者、賢在列朝、寧改觀焉。公

一秉政而滌煩苛、鋤荒穢、拔根株窟穴之姦于

主上之側、其沉謀秘畫、有人所不及知者。然公口不言

功、而言者或攘以為功、公亦不自明也。蓋自是

上益重公。一日

上視朝、公立金臺側、眩暈欲仆、

上曰、張先生不耐早寒。命中使扶送至閣。癸未、從 駕

閱 壽宮、陟峻嶺、

上顧近侍曰、可令二人掖張先生。其優眷如此。無何、

川公訃至、公哀毀不欲生、

上特遣中使慰唁、微示以奪情意。公泣固謝曰、臣死且

不敢。

上憐之、賜賻襚特厚、仍命馳傳、給道里費、遣行人護行。

公辭

上于文華殿、勸

上以法 祖孝 親講學勤政、清心寡欲、惜財愛民、保

終如始。因泣下、

上為之動容、慰勞甚至。公歸、壽宮閣定、

上猶錄公勞、遙賜白金文綺、厓一子國子生。比服闋、

上將召公、而公疾革不起。是為萬曆乙酉十月十有六

日、距其生嘉靖丙戌五月十有二日、享年六十。公孝

友、天篤、內行甚謹。與人交、斷斷不能苟合、而厚于故

舊、不以存亡易心。蜀川公家居、月一馳使定省。既聞

訃、匍匐兼程、廢寢食、道病幾殆。甫至家、而後母胡夫

人亡、兩弟又亡。公雖病、猶強起為經紀喪事。宮保楊

南潤公知公于若輩、公以國士報。既沒、而葺其祠。諸

故人遺孤無所歸、公皆衣食之。無令失所。新鄭去國、

門下士方首鼠避、公時赴宮詹命、自獲廩取道、會于

逆旅。江陵嘗以問公、公曰、昔事高公、猶今事公也。去

而遠之、謂交誼何。聞者稱服。公居恒簡重、訥訥如不

出口。至其臨大事、決大疑、迎刃立斷。目謂貴育不能

奪也。壯勇款貢、衆言盈庭、謂夷情叵測。公于政府力

陳便宜、乃許。王少保嘗曰、微吾伯甥、幾敗國家事。五



開齒叛撫臣募卒討平之。或言卒當散遣，不且生亂。公曰：「有事用之，戰事已奪之，鉤是趣使亂也。」會滇南用兵，令一將將以行。平緬之後，卒賴其用。公在閣中，數為余稱楊文襄公曰：「本朝經濟國手，無如是翁。其誅瑾一事，大有作用，可謂振古之豪傑。意若深有概于文襄者。」乃公所以扶危定傾，安利天下，余竊以為過之。公配王氏，儒官恩女，初封孺人，晉宜人、淑人。洎公大拜，後封一品夫人者三。有子六人：長甲徵，兵部武庫司主事；次泰徵，禮部儀制司員外郎；次定徵，中書舍人；次久徵，次元徵，俱國子生。娶皆名族。次獻徵，早卒。女三人，嫁聘皆名族，詳在志中。甲徵等以丁亥三月十有七日葬公于蒲之風陵鄉，蓋公所自卜壤。上即以賜公，從公志也。余按萬曆初，端揆之臣當天子冲聖拱默，政權由已，而務文致太平，緣飾恩寵，示威重不可撼，上未必得主之心，而下至于盡失天下之心，故一去而敗，既死而人不思。及公以除惡逆姦結知主上稍易前人之絃轍，與衆更始。上既推誠相任，而海內皆忻忻嚮慕，庶幾以振興鴻業。然公柄事未久而去，去當復召而閤然不能須臾。

天固未欲幸海內耶？何奪公之亟也。嗚呼！悲哉！余故景公之大者，揭之碑，而系以銘曰：

翼翼虞都，代鍾賢哲。佐運匡時，有聲烈烈。顯允文毅，應期挺生。才為國華，行為士程。

肅皇之朝，雍容載筆。揆藻垂鴻，鑒坡石室。暨事

穆考，執經周旋。盟心解頤，廣展細旃。

冲聖在宥，公歸來復。勒成信書，乃符夢卜。

天子曰咨，汝作舟霖。其代予言，其沃朕心。公拜稽首，對

揚休命。一德和衷，不練不競。乃持大珪，易樂為春。

滌煩去苛，化瑟維新。乃屏儉壬，以肅在位。射隼于鵞，

投鼠于器。乃徵遠逸，寘之天衢。潤無考禁，揚無遊駒。

夙夜劬勞，不遑啓處。盡瘁厥躬，以報明主。

帝眷元臣，日寵綏之。其顛其危，俾掖持之。信若著蔡，歡

若魚水。君臣之交，終如其始。素車西邁，樂樂棘人。豈

不懷恩，非孝無親。祥琴在堂，蒲輪在路。秉箕行天，

公不返顧。柄政無何，其勲則崇。

帝心所懷，朔野攸同。去則有思，沒則有邇。何其厚矣，用

酬良弼。不墜厥功，不墮厥聲。于千百年，視此刻銘。

特進光祿大夫柱國少師無太子太師吏部尚書中

極殿大學士、知制誥經筵市、總裁會典吳郡申時行
謨。

張文毅公墓志銘

蒲坂張公諱四維、字子維、嘗讀書中條之鳳鳴山、學
者稱鳳翥先生。其先世居解州鹽澤、元季遷於蒲。遷
蒲後五世秀公、是為公高祖。秀生孟儒、公寧、寧生首
陽、公誼、誼生喟、川公允齡、公父也。以公貴、六拜封命
累贈三世、皆如公官、而曾大母雷、大母王、繼解、母王
皆一品夫人。喟、川公內操儒行、外託什一以游、而王
夫人為少保鑑川公姊、有家法、以嘉靖丙戌五月十
二日生公。公甫能言、解夫人膝、公微問所志、亢聲曰、
願得一當明主、康濟天下。解夫人大驚、當是時、已心
知公非凡兒矣。年十五、舉茂才高等、試輒冠諸生。後
九年、鄉舉第二人、又四年、於丑戌進士、以庶吉士第
一讀中秘書。每念國家待士厚、士董董工聲、悅以取
世資、是自薄也。於是參究

累朝典故儀章、詢考四方利弊興革、務當於實用。嘗侍
徐文貞公、語及國計、文貞公曰、此參政他日憂也。當
是時、公已隱然負鴻鈞之望矣。乙卯、授翰林編修。無
何、奔母夫人喪。戊午起家、時寵賂滋章、公獨有以自

守、泊如也。壬戌、重錄永樂大典、公與分校。隆慶丁卯
書成、陞右中允、無編修直。經筵日講、予五品服。尋
陞左諭德、無侍讀代。制草清武黃。戊辰、請告寧
親、賜銀幣、給驛歸。庚午、陞翰林學士、掌院事。詞林獨
學、不署講讀、最重班、食都御史上、時久虛其銜、一旦
以授公、人以此規公旦暮且大拜也。是歲、陞吏部右
侍郎、仍無學士、尋轉左。明年、又引疾請告、遣中使
問疾、賜羊酒蔬漿。久之、予告歸。會簡東宮侍從、起
公協理詹府、尋掌府事、教習庶吉士。無何、復引疾歸。
肅皇帝在位久、實錄浩繁、開局編摩、竟隆慶之世、青朱
綬也。

今上萬曆甲戌、再起公、以原官為副總裁。乙亥、進禮部
尚書、兼東閣大學士、參與機務。初、江陵公手自筆削
嘉靖初紀、僅及十年、而公接其後事、公故博洽有吏
才、討論潤色、悉當江陵公心。於是更出初紀、屬公定
焉。再踰年、書成、加太子太保、進直文淵閣、賜鞍馬。
大婚禮成、賜金花銀幣服色、加少保、進直武英殿、添
一子秘書。耕藉、以公率諸卿終九推馬。庚辰、一品
滿、賜寶鈔羊酒、加柱國、少傅、無太子太傅、廢一子國
子生。明年、以遼左旋功、進無太子太師、予武勝世錦



衣百戶。公之初拜也。

上手書一德和衷四字賜焉。時江陵公當國。登務戮刻。狹登進。廣誅戮。嚴開傳。急催科。惡聞災傷。喜行聚斂。最後算緡。假以法。令煩苛。海內囂然苦之。公居其間。邑邑不得志。壬午。會江陵公卒。是秋。

皇嗣誕生。加公少師。無太子太師。廢一子符丞。公乃密疏。宜下寬大之詔。因擬上詔書條格。以次罷諸政事。不便者。民懷若更生。而故江陵公私人。號稱楚黨者。益目攝公矣。初。江陵公病亟。而楚黨大懼失勢。乃詐為江陵公遺疏。薦起新昌以自代。而謀去公。先因權璫。保所親信者徐爵。結保為內應。而外嚇三御史。伺間交章排公也。於是一御史先論罷王太宰嘗之一御史。因重劾太宰。連及公。

上曰。少師忠臣。安得為此言。特其章不下。而手詔公出視事。最後一御史再疏。則被官三等。出之於外。公引咎乞身。請宥言者。優詔不許。而楚黨陰謀者更被劾去。當是時。

上已心嚮公。而尚微用事者。無所勝怒。日望外廷彈章。而他御史密測。

上意。交起抨擊。先論。周匝禁地。交通不法事。尋乃論。

保歷數保大罪十餘。

上大怒曰。奴輩盜我威福久矣。下爵詔獄。論死。安置保於南京。籍其家。或追論江陵公與保表裏為姦狀。上益怒。欲併籍江陵公。逮其諸子。公力解之。事以故暫已。當是時。楚黨坐斥殆盡。他御史氣益發舒。引繩批根。猶抨擊不止。公乃言於。

上。治道去太甚耳。宜畧苛細。存大體。從之。時六卿半易。省署為虛。公請詔舉耆碩。端亮前時所拍廢者。期月。間人望畢收。朝宁政觀焉。公當國未而歲。而遭父喪。上嗟嘆惋惜。計奪情不可。則贈卹有加。

慈宮謫卹各致禮焉。面辭文華殿東室。勸。

上清心勤政。節財愛民。慎終如始。因泣下。

上為動容。命乘傳。賜道里費。遣行人護行。公行病疽。疲河創甚。踰月乃抵家。

上以閔定壽宮。遂賜銀幣。復廢一子國子生。公歸而兩弟繼卒。後母胡又卒。比終制。竟以身從焉。乙酉十月十六日也。享年周一甲子。計聞。

上輟朝一日。賜祭十三壇。遣官治葬。贈太師諡文毅。復官一子符丞。公為人孝友。篤於故舊。人有德。一飯不忘。故人遺孤。往往待以舉火。公初在詞林。與新鄭江。

陵二公為莫逆交，二公繼在政府，有隙新鄭去國而公適赴。召命從獲鹿取道，會新鄭於樂城。江陵公知之，迎謂公曰：

上方震怒，安得私見罪人？公曰：「嘗昔事高公，猶事公也。」一覲一踈，謂交道何？江陵嘿然。他日款塞，朝議籍籍。鑑川公力持於外，而公居中為陳便宜。鑑川公嘆曰：「成吾事者伯甥也。」楚守臣募卒計五開叛苗，苗平，議散遣之。公曰：「有事用之戰，事已奪之餉，後何以使人？」會滇南有警，即命將將此屬以往，募卒感奮，遂用成功。其善謀能斷類此。公立朝三十年，登政府者九年，當國僅期月耳。壬戌乙丑，分試禮部者二；丁卯，典順天試一；戊辰，典武舉試一；丁丑，典禮部試一。是歲暨庚辰，於未讀大廷卷三，主會武宴一，春秋代祀先師三，幸太學分獻一，園立方澤分獻四，他以扈從郊陵閱武，賜蟒衣，駕鸞麟斗牛服，繡絛伽袋，煖壺諸物，不可勝計。夫人王氏，儒官恩之女，初封孺人，晉宜人，淑人，而封一品者三焉。子男六：甲徵，庫部主事，恭儉，儀部員外郎，皆進士，定徵，秘書，久徵，元徵，園子生，皆任子。獻徵，早卒。婦楊，次孫，次楊，次羅，次楊，女三：長適武選郎馬慥，餘皆殤。孫男四，女二。甲徵等將

以丁亥年三月十七日，薨於其所自卜之風陵鄉，而奉大學士王公狀，屬余為志。銘納壙中。甲徵，余所未所取士。余因憶辛未從公供事，文廷受諸士卷，輒口相雌黃，公正色曰：

天威咫尺，奈何戲豫？小黃門往來偵之，達

上所矣。楚黨排公，時余燕見，公輒曰：「久病當去，思引天下賢者自代，其在公乎？」如是者再，余踴躍不自安。無何，謬被簡命，意公或數言余於

上，而人不及知也。公又為余言，欲白新鄭冤，請卹而未得間。今以遺公。余出新鄭門下，深愧其言。三事狀所不及載者，銘曰：中條之陽，爰有鳳鳴。是鍾名碩，蔚為國楨。於文毅公，夙稱博雅。篤古濟時，如宋司馬。秘紬石室，草潤蘭臺。始終四紀，文直事該。

彌惺橫經，綸非補衮。道先啓沃，民瞻師尹。蕩滌新法，幹旋乾坤。斗杓潛運，大寒陽春。內清姦慝，外散黨比。蒐羅巖穴，布列庶位。老歷扶杖，思見治成。化瑟弘張，海宇廓清。惟晉有才，五百年後。萬曆之功，比於元祐。梓潼家難，殉父以身。倏棄箕尾，莫返蒲輪。鳴鳥不聞，千秋電閃。鳳德非衰，著茲樂石。光祿大夫柱國少傅無太子太傅禮部尚書武英殿



大學士、知制誥經筵事、會典總裁新安許國譔。

張文毅公墓表

萬曆乙酉冬、少師大學士蒲坂張公卒於里第。計聞上震悼、輟一日視朝、詔贈太師、謚文毅、官一子承尚寶、諭祭者十有三。其又明年丁亥、公之子兵部主事甲徵等塋公於蒲之風陵鄉、則公所自卜兆。

上遣官為營封樹云。公輔政幾十年、其正首揆也、僅期月耳。而當鼎革之會、夙夜奉公、知無不為、一切廣

聖澤、厚元元、芟餘壬、舉遺佚、皆出公石畫。天下方手額

公、而一旦以憂去、竟不獲起。故公雖以榮名始終、人

猶有憾焉。公諱四維、字子維、別號鳳磐。公幼即開敏

有異、大志舉茂才、試常為諸生高等。已酉舉鄉試、第

二人、次且成進士、以庶吉士入翰林。翰林職鉛槧、以

不關聞吏事為高、公獨取

累代典故及四方興除利弊反覆研枰。時華亭徐文貞

公雅知公、業以公輔期之矣。乙卯、以編修丁母王夫

人憂。戊午、復故官。越八年丁卯、

莊皇帝改元、以重錄大典成、晉右春坊右中允、予五

品服、充經筵日講官。已遷左春坊左諭德、無侍讀、而

公念父唱川公且老、乃給假省視。明年還朝、又明

年晉翰林院學士、掌院事。學士最華重、不輕授、於是人爭言張公且相矣。已晉吏部右侍郎、仍無學士、尋轉左。辛未、引疾乞歸。

莊皇帝眷公、不許。再疏、乃許之。明年春、

今上出閣講讀、起公充侍班官、協理詹事府事、尋掌府

事、無教習庶吉士、復引疾歸。

上御極之二年甲戌、再起公、以原官掌詹事府事。乙亥、

上手勅晉公禮部尚書、兼東閣大學士、入贊機務。丁丑、

以纂修

肅皇帝實錄成、加太子太保、進無文淵閣大學士。明年

大婚、加少保、兼武英殿大學士。庚辰、以一品滿三年、

加柱國、少傅、兼太子太傅。壬午、以遠功加兼太子太

師、又以

皇子生、加少師、吏部尚書、中樞殿大學士。前後廢子者

四方、江陵公棟政、法令苛急、如東濕薪、海內謫詆。是

年江陵公卒、公因密疏請下寬大詔、罷一切法令、

不便者、天下曠然若脫學縶。而先是江陵公病將卒、

其入幕黨人憚公當軸、即不得遂其私、乃詐江陵公

遺囑、為新昌公自代、為去公地、而大瑞馬保居中左

右之、流言籍籍起、及一御史疏上、

上持之不下。御史疏又上。

上怒甚，錮其三秩，斥之外。於是諸黨人稍折氣內，而
言官因其間得遂發保與江陵公表裏，構合諸姦狀。
時公猶藉葉私第待罪。

上立召公入，令擬旨寘之法，籍其家。已而皂囊日上，率
為諸黨人。諸黨人既以次逐罷，而言者猶不已。公謂
除惡務根，他可畧也。言于

上，請一切與之更始。又請拔用海內端直士，舊為江陵
公抑棄者，由是公論大明，中外清肅。然公以勞致瘁，

一日在

上前忽眩仆地。

上命兩中使掖至閣，明年春，扈駕閱壽宮。

上登山四覽，又顧謂近侍掖公。

上於公倚毗甚切，故恩禮優異如此。未幾，蜀川公赴

至，公號踊稱慕。

上遣使慰勞，賻贈有加。又辭

上于文華殿，稽顙進曰：臣豈儒幸，荷知遇，今雖遠離，不

勝拳拳之私願。

陛下法祖孝親，講學勤政，清心寡欲，惜財愛民，日

慎一日，保終如始。

上復慰諭，目送之。公既重傷，蜀川公而兩歲間，兩弟相
繼卒。繼妣胡亦卒。公輟乳告寢，悲感益集。乙酉十月，
方禪繼妣胡之喪，忽暴下不止，數日而逝。公居常恂
恂如書生，然深畧內蘊，人莫能窺其際。至樞大事，決
大議，霆擊斧斷，亡不中窾隙者。江陵公在位久，恣胸
臆，自便，公挾持堅定，意所必不可。江陵公終不能奪
之。性嚴重，寡言笑，與人斷斷不苟合。然能以意氣假
入人，樂為用。故一肩艱鉅，旋乾轉坤之效，倚辦俄頃。
論者方其功，不在華亭公下云。華亭公故知公於筮
仕時，乃公亦陰識視華亭公，所以間關上下，駭機伏
弩之間，口銜心算，且翕且張，時謂為不佞言之。又
嘗伏楊文襄翁稟敏兩公氣畧磊砢，無書生文吏瑣
瑣態，而惜後人無繼之者，意亦陰自許也。丈夫故有
志操，左券而前，卒與事合。嗟嗟，使公在位久，其耳目
同事益習且安，虛而委蛇，養天下以和平之福，功烈
可勝道哉。公內行篤備，在長安月一使人問蜀川公
安否，其喪也，憑棺一慟而仆。兩弟歿，公已病，猶殫起
經紀其喪。新鄭江陵兩公者，並以才識交公。新鄭公
得罪去，公起家宮端，取他道會于逆旅。江陵公恠問
故，公曰：疇昔之事，高公猶今事公也，奈何以去而遠



儒藏

明儒碑傳集

卷七九

之。其敦厚雅素類此。當公之里居宅憂且闕也。羣小憚公嚴忌其復起。間私問不佞。即蒲州公來。當別用一省人。公自度與之共事合否。不佞謹對曰。先生誠正人也。不佞以誠正輔之必合。嗟嗟。此亦不佞之左券也。雖時會未償。請以質之九原。無愧色焉。因蔡公行誼大者。授諸孤。使附於麗牲之次。以詔來許。若世系姻屬及公歷官受事之詳。非宗社所以重輕。茲不具載云。

賜進士及第。資善大夫。禮部尚書。兼文淵閣大學士。知制誥。經筵事。王牒會典總裁。太原王錫爵謨。

張文毅公行狀

萬曆乙酉十月十六日。故少師太學士鳳磐張公卒於蒲坂里第。厥嗣兵部主事甲徵等告哀於朝。恩命既下。乃撫其生平行誼。將乞碑誌於名世。元老以垂不朽。而先屬不佞為之狀。狀曰。公諱四維。字子維。中條有別峰曰鳳鳴山。因以鳳磐自號云。張氏自上世居解州鹽澤南陂。元季有思誠公者。始遷於蒲。其子友直公。乃占籍焉。友直生仲亨。仲亨生克亮。克亮生秀。世以高義聞里中。秀字彥質。是為公高祖。生孟儒公。諱寧。配雷氏。孟儒公生首陽公。諱誼。配王氏。

早卒。繼配解氏。首陽公生媚川公。諱允齡。配王氏。今少保鑑川王公姊也。自孟儒公至首陽公。皆以公貴。累贈光祿大夫。柱國。少師。兼太子太師。吏部尚書。中極殿大學士。自雷夫人至王夫人。皆一品夫人。而媚川公則親承封命。凡六拜。制詞焉。初孟儒公之卒也。雷夫人號稱未亡人。與其子女依外氏。故首陽公德外氏為雷翁媼。木主祀于家。首陽公好讀書。居常手一編。或為鄉人誦說大義。恂恂如也。媚川公生十年而首陽公卒。解夫人亦號稱未亡人。事雷夫人惟謹。里中號曰雙節。媚川公孝友仁厚。博信樂義。外託什一以游。而內操儒行。楚蜀燕瀛之間。無不知媚川公名。王夫人合德而隱。以勤儉治家。語具申少師楊太傅所為誌中。

肅皇帝五年而公生。公生而穎異。甫能言。解夫人抱持膝上。問兒所欲。公即大言曰。欲一當明主。康濟天下。解夫人大驚。夫人時或不懌。則具道異日顯親之具。以寬適其意。未嘗不解順而笑。固知公非常兒也。七歲就外傳。動如成人。出入必以禮。同學者皆嚴重之。十五舉茂才高等。時督學劉公縣翰林出視學政。高自簡貴。解所許可。見公年少有偉度。異之。則下堂循

行因脫觀公草。草未竟而劉公讀之以為奇。乃特移坐堂皇上。更數題試公。公立就。于是劉公嘆服曰。蒲即多才易得耳。若乃國士無雙。遂置以為第一。自是每試未嘗不第一。已酉。舉鄉試第二人。癸丑成進士。以庶吉士第一讀中秘書。公以為國家待士厚。不宜工摯悅取世資。以自菲薄。於是取國家典故。悉研究之。詢考四方利弊及興革所由。無不洞察。當是時。公已隱然負公輔之望矣。華亭徐公嚮公甚。謂異日濟大業者必在公。公侍坐語及國計。徐公曰。此叅政他日之憂也。其見期望如此。乙卯。授翰林院編修。無何。以母王夫人喪歸。戊午。起家除原官。是時寵賄溢。章士以造請相尚。公獨開一齋。與乾菴馬公。正峰孫公。數人吟誦其中。自守泊如也。當事者顧尊重公。已未。充廷試掌卷官。壬戌。充會試同考官。時主考相國袁公以博物策士。當代對偶。病不能具草。以屬公。公對具如袁公指。袁公嘆曰。真博物君子也。八月。充重錄。永樂大典分校官。乙丑。復充會試同考官及廷試掌卷官。

莊皇帝元年丁卯。重錄。永樂大典成。陞右春坊右中允。無翰林院編修。予五品服。充經筵日講官。公盟心

登對。與有所感悟。每至政柄。國計。宮壺。官寺之類。人所難言者。未嘗不三致意焉。左右侍臣聽之。無不灑然變色。易容者。

莊皇帝肅然敬憚公。是秋。充順天府鄉試主考官。冬。陞左春坊左諭德。無翰林院侍讀代草。誥勅。無清武黃。戊辰。充廷試受卷官。武舉主考官。是冬。給假歸省。

莊皇帝以公講幄。勞特賜銀幣。仍給驛以行。已巳。春。選朝。庚午。秋。陞翰林院學士。掌院事。故事。學士不攝講讀。銜則班。僉都御史上。途遇閣臣。不引避。朝廷重之。未嘗輕授。至是。特以命公。衆翕然謂。

天子且相張公矣。冬。陞吏部右侍郎。無翰林院學士。尋轉左。辛未。冬。以疾乞歸。至垂。

莊皇帝遣中使問疾。賜羊酒蔬漿。予告歸。壬申。春。今上在東朝。出閣講學。詔慎簡輔導之臣。乃起公充侍班官。協理詹事府事。尋掌府事。無教習庶吉士。居無何。復引疾歸。

上踐祚之二年甲戌。詔再起公。以原官仍掌詹事府事。充

肅皇帝實錄副總裁。是時。蜀川公年且七十矣。公方朝



夕色養。扁所居堂曰愛日。聞召不欲行。岷川公曰。家世受國恩。未有以稱塞。奈何以老人負。

明主寤寐旁招意。公乃就道。蓋公既入都而與情手頰具瞻。僉願公蚤相。

天子乙亥秋。手勅陞公禮部尚書。兼東閣大學士。入內閣。參與機務。公疏辭。優詔不許。公既拜。命侍

上講讀于便殿。

上以御書一德和衷大字賜公。公稽首謝。既出。

上顧左右曰。新輔臣器度與衆不同。注視者久之。冬至。

駕幸南郊。以扈從勞。賜公蟒服。麒麟服。丙子春。命

代祀先師。秋。充重修會典總裁官。

聖駕臨雍。以公分獻。冬至。命分獻于園丘。丁丑。命

為會試主考官。廷試讀卷官。夏至。命分獻于方

澤。秋。再命代祀先師。

肅皇帝實錄成。勅加公太子太保。進文淵閣大學士。

賜鞍馬。公之在宮詹也。寔專綜實錄編纂事。自嘉靖

十年以後。凡三十五年。間朝章遺務。國賦人才。暨柱

下伏前之事。衆觀記弗詳者。公悉殫心探討。博證而

精覈之。犁然具備。再踰年書成。江陵公覽而稱善。因

出舊所編初紀者。盡屬公筆削。乃定焉。九月。命主

會武宴。冬至。再命分獻于園丘。戊寅春。大婚納

幣。以公充副使。賜金花銀幣。仍賜蟒服。斗牛服各一。

以贊襄六禮勞。勅加公少保。進武英殿大學士。餘

官如故。予三代誥命。廕一子中書舍人。冬。扈駕南

郊。賜蟒服。駕帶諸物。已卯。三命分獻于園丘。庚辰

春。三命代祀先師。

上耕藉田。以公充九卿首。

上注視公終九推。眷禮有加焉。三月。扈駕謁陵。賜

蟒羅繡絲伽袋。煖壺諸物。廷試。再為讀卷官。六月。

奏一品三年績。賜羊酒鈔銀。加柱國。少傅。兼太子太

傅。餘官如故。再予三代誥命。廕一子國子生。辛巳春。

扈駕閱武。復賜蟒羅帶絲諸物。冬。四命分獻于

園丘。壬午夏。再命分獻于方澤。六月。遷左大捷。

上嘉公運籌功。進兼太子太師。餘官如故。復予三代誥

命。廕一子世襲錦衣百戶。先是。天下苦江陵公卒。八月。進

煩苛。吏詭放釣名。而民益瘠。是月。江陵公卒。八月。進

皇嗣誕生。公乃因慶典。密疏請下寬大。詔省督責。緩

征歛。舉遺逸。賑灾青。以培養國家元氣。

上憮然曰。先生言是。亟議行之。公乃擬上詔書條格。

羅綺錢文田之令。欲以漸罷政事不便者。詔下卿

國民忻然若更生。而楚人故竊弄江陵公政權者皆側目。攝公笑。九月。以大慶加公少師。無太子太師。吏部尚書中樞殿大學士。瘞一子尚寶丞。初江陵公病時。其帷幄私人日夜聚謀。憚公等二三當軸臣皆正人。且杜群枉路。乃詐為江陵公遺疏。薦起新昌公于家。以自代。俟其至。首去公。約三御史次第為排公疏。而紹介逋逃罪人徐爵者。往來關說于權璫馮保所。保從中可之。謀既定。於是一御史乃先論罷王太宰。一御史因重劾太宰及公。

上曰。元輔忠臣。御史何得為此言。持其章不下。而手詔諭公出視事。最後御史疏復上。

上怒甚。奪其官三等。出之於外。公上疏引咎求歸。而併乞宥言者。

上褒答不許。無何。言者發大司空回鹵不忠狀。司空故所謂帷幄私人也。

上遣中使至閣諭欲去司空意。公疏對如

上損
上乃勒之致仕。居數日。言官論奏權璫保及爵表裏為姦。歷數其大罪。

上覽奏震怒。昨爽召公入朝。令擬旨曰。奴輩擅我威福。

久矣。必速誅之。乃下爵詔獄。安置保于南京。籍其家。或追論江陵公與保爵交通毒害忠良狀。

上曰。此同罪。何得無誅。欲逮繫江陵公諸子。籍其家。公屢疏救解。以為彼誠負

上。然

上始終遇臣之禮。謂何。且國體不宜如是。

上猶未允。公乃以去就爭之。

上重違公意。事以故暫已。臺諫爭發舒黨人奸狀。于是諸帷幄私人盡坐斥。而猶抨擊不止。公言於

上。治道去太甚耳。宜畧苛細。存維道。

上從之。時六卿半易。朝省虛位。乃請詔臺省舉骨鯁。端亮之臣。向所遺棄者。布列庶位。一時六官之長皆

民譽云。每見必語之曰。今

主上神聖。公道昭明。各舉其職。無廢憲度。閣臣自不相撓也。於是事歸六列。言歸臺諫。公為調劑而奏之。更一切束濕之政。期月之間。朝宁政觀焉。當是時。公值

鼎革之會。鞠躬盡瘁。知無不為。至廢食息。一日

上視朝。公立金鑾側。忽眩暈而歎。
上曰。張先生不耐早寒耳。命二中使扶送至閣。癸未春二月。詣天壽山恭閱壽宮。司禮監給器具。尋



乃危 駕臨閱

上陟降高山縱覽形勝顧謂近侍曰可用二人掖張先生以登其恩禮隆異如此三月為廷試讀卷首臣是月嶓川公卒於家四月訃至京師公哀毀骨立如不欲生

上特遣中使宣諭曰聞卿父辭世朕心甚悼孝情當盡一尤宜節哀以慰朕懷副眾望中使諭

上意欲奪情起公視事公泣曰生不逮養沒不奔喪何顏以立於世為我謝

上臣死不敢奉詔中使具以復奏

上嗟嘆惋惜賜賻緘絲六表裏銀三百兩鈔萬貫及米油香燭諸物諭祭六壇遣禮部員外郎張志致祭主部主事沈一中造塋而王夫人得並祭焉公廷

辭

上命馳傳賜道里費遣行人護行

聖母及諸王賻襚各有差翼日面辭于文華殿稽顙奏曰臣行能薄劣日侍左右無所裨益今當遠離伏望

皇上法祖孝親講學勤政清心寡慾惜財愛民日慎一日保終如始臣不勝惶懼

上答曰先生輔政久朕所倚信茲以憂去其節哀自慰稱朕意焉因泣下殿中侍立者皆感動公既辭闕無程以奔旦夕哭臨癰生於腋過陝州創甚扶病渡河至首陽不能進月餘始抵舍九月

上以闕定壽宮遙賜銀幣歷一子國子生甲申二月癸嶓川公于勅建新塋葬之日公執紼痛哭徒步十餘里奉遷王夫人之柩與嶓川公及繼妣胡氏合窆焉輜車所至聚觀如堵見公悲號孺慕狀皆嘆息有垂泣者公既痛嶓川公不得一見為永訣而公兩弟又相繼卒繼妣胡亦卒公樂樂哀疾卒以身從焉蓋公初病腋癰繼病耳閉百藥罔效乙酉六月嶓川公之喪而弟室及從子又亡公以重傷復病脾泄十月朔禪繼妣胡之喪公已伏簣不能興矣月之既望晨戒僕人具盥漱整巾服扶藉端坐舉手揖空者三及昏而逝公天性孝友內行淳篤與人嚴斷不苟合而厚於故舊無間存歿初迎嶓川公於京邸徵續紳父老為好會以適嶓川公意事必咨而後行嶓川公既歸月一馳使問起居得家書必歛容屏息莊誦如侍側或久不至則憂曰吾親得無有所苦乎既登門足雖身理繁機而心時時念嶓川公嶓川公之卒

也。公歸抵舍，憑棺一慟而仆。所親或執六十不毀之文以解，公曰：「吾拜慶而出，銜哀而入，吾終天之痛安能已也。」及兩弟之喪，公雖病，猶強起為之經紀。曰：「吾痛吾弟，因痛吾親焉。」宮保楊南澗公自髫年知公，南澗公沒，公為修葺其祠宇坊表，執友劉君輩遺孤待公而舉火者數十家。新鄭、江陵兩公皆以才識交公，驩兩公既輔政，凡國家大事皆以咨公，公亦盡言無所諱。新鄭公之去國也，公方拜宮詹之命，自獲展取道與會於樂城，入都，江陵公謂曰：「新鄭以得罪君父去，公奈何見之？」公曰：「疇昔之交，高公猶今事公也，去而遠之，謂交誼何？」江陵公乃釋然。公生平嚴重簡默，訥訥如不出口，至其臨大政，決大疑，當機而斷，自謂資育不能奪也。北虜款貢，眾謂夷情且不測，公獨陳便宜于新鄭、江陵兩公，所甚悉，兩公從之，議乃定。鑑川公嘗曰：「微伯甥在內，吾事將不諧矣。」五開苗叛，撫臣募卒討破之。事平，或言募卒皆四方烏合，留之且生亂，請罷遣歸田里。公曰：「有事用之，戰事已奪之餉，何以使人？是趣使為亂也。」會滇南有警，即命將將此屬以往，疏請留本省征輸備軍興之用，所以卒定莽寇之亂者，本公之謀云。聞中大饑，公言於

上，出內帑賑窮乏，蠲租賦，民乃寧。其應變定傾皆此類。公歿十餘日，計聞上震悼，為輟朝一日，諭禮部厚恤卹典以聞。於是禮官奏稱：「故元輔當深文標切之後，而廣聖恩，薦忠諫，去憚壬，勞績最著，請賜祭葬，贈謚。」上乃命贈公太師，謚曰文毅，官一子尚寶丞，諭祭一十有三壇，官為營葬，則中書舍人鄭國俊、山西布政司參政劉中立來致。

上命始終恩禮備極隆異焉。公配王氏，儒官東泉公恩之女，封孺人。宜人淑人各一，封一品夫人者三。生子男六：長甲徵，癸未進士，兵部武庫司主事，娶楊氏，次泰徵，庚辰進士，禮部儀制司員外郎，娶孫氏，封安人。次定徵，中書舍人，娶楊氏，封孺人。次以徵，官生，娶羅氏。次元徵，官生，娶楊氏，獻徵早卒。女三：長適兵部武選司郎中馬慥，封安人。次字舉人楊燿，次字庠生韓曠，皆早殤。孫男四：贊、聘、南、氏，輩賢皆幼。孫女二：公生嘉靖五年丙戌五月十二日，卒萬曆十三年乙酉十月十六日，享年周一甲子。兵部君甲徵等將以丁亥三月十七日葬公于蒲之風陵鄉王庄里侯家庄之南，公所自卜兆也。家屏為公桑梓後進，寔踵公武



于詞林。初在史局，誦公文章，見其容爾雅，蔚為宗工。比從講筵，竊窺公學術，則見其直諒多聞，納乎聖聽，然而未睹公大全也。公既居中持國柄，乃伏睹公憂勞夙夜，寒暑匪躬，以身任天下之重，方其受邪剔蠹，一日而宇宙回春，此與司馬文正公元祐之政，豈異哉。夫文正公晉人也，閱數百年而公乃紹美，其罷新法，復舊章，同旋乾轉坤之效，同而勞瘁以致疾，又同。然遡觀其德，則均之以誠心，自然為本云。不佞何能贊公，謹叙次公生平而稍為銜槩之如此，伏惟名世元老覽而財擇焉。

賜進士出身、嘉議大夫、吏部左侍郎、兼東閣大學士、知制誥經筵會典總裁雲中王家屏撰。

以上諸文並《條麓堂集》卷三四

明儒碑傳集卷八十

周子義 鄧元錫

通議大夫吏部左侍郎兼翰林院侍讀學士掌詹事府事贈禮部尚書謚文恪周公神道碑銘

公故吏部左侍郎兼翰林院侍讀學士掌詹事府事以萬曆丙戌十二月二十九日卒明年二月會典成予以公都校舊勞不可以沒世掩手疏言狀上特贈禮部尚書賜祭二出水衡錢治窀穸並用尚書恩仍賜謚文恪蓋異數也又明年戊子十一月十有五日立墓龍山王家場諸孤炳文等以墓隧之碑請余與公同鄉舉官同詞林稔知公其曷可辭公諱子義字以方別號傲菴家世無錫人高皇帝時有志善者以耆老召見闕下抽一子從軍滇中寔始隸士伍志善有五子其仲曰昌言昌言子鑑鑑子濬濬以能詩工楷書名里中是爲公父祖父皆以公貴贈如公官祖母陸母吳並淑人公生端

重穎拔年十八用博士業受知學使者褒然首應畿試矣而公曰此不足崇德致用益發篋取五經及諸儒論說潛精玩索著數語及日錄見聞要於傳理翼經抒所獨得不爲雕績以自標異蓋自爲諸生其所挾持已如此嘉靖辛酉舉于鄉乙丑登進士第已選翰林庶吉士讀中秘書試詞賦類取高等然非公好也既授編修益厭薄剽說綺語獨昕夕考覽國朝典制延諸掌故咨諏之蒐羅放失舊聞至裨官諧史之記靡不精涉會修世廟實錄公與焉戊辰分校禮闈已已使荆藩還理誥勅充經筵展書官修實錄如故世廟初創禮更制故名繁鉅公博蒐簡取最有法久之遷南京國子監司業時時進諸生講說經義爲推本聖人所以立言之指諸生人人意自得也一切差假率試文義爲差次即故人邑子靡所私後祭酒至率按公成事爲絜法而是時給諫余君懋學上書刺時政語甚峻切疏從南中來而余公所舉士也于



儒藏

是江陵意公。掌南銓者遂阿指。欲中以考功法。迫公議不可。公聞即掩關臥。諸生日蟬集門外。環立請留。久之乃強起視事。亡何江陵奪情議起。九列競疏留。同寮目屬公。公戟手向堂上指曰。此類幾倫者何。卒不疏留。而公用是益逡巡不調。爲南司業五年。乃稍移北。又踰歲乃晉司經局洗馬。兼翰林院修撰。是時士習稍偷。尊尚捷給武健。而公獨用鈍口樸貌與衡立。以故當塗常疏外公。公殊不悔也。爲樸鈍顧益甚。已卯典順天試。尋清理武黃。庚辰再分校禮闈。夏遷國子監祭酒。尋充經筵講官。爲祭酒教授。畧如司業時。而法加甚。即寒素子厲志修業。寵異之如貴倖。即諸小侯以習禮至。繩束之如寒素子。故事大學生日給餐錢。往往爲猾胥乾沒。終歲不得。公下令諸生持券詣祭酒受錢。于是諸生皆徧給。而錢所贏積幾數十萬。又令諸生貧病者先月受給。死而無歸者特給。又斥其餘大治學宮。不以煩縣官。其綜理周密皆類此也。癸未。

晉禮部右侍郎兼翰林院侍讀學士。尋轉左。知貢舉。充會典副總裁。公故明習國家事。至是益精心校勘。因革廢置。犁然就理。予所疏都校舊勞者也。是夏奉命教習庶吉士。俄晉吏部左侍郎。掌詹事府事。兼領職事如故。公所爲教務端凝簡靜。而時有激勸曰。諸君起疏屬。儲禁林。荷上恩厚若此。而不以時自奮。安所稱常吉勉之矣。所品文獨重考索精詳。終不貴靡曼。乙酉滿三品考。上賜羊酒鈔錠給勲階。誥廕如制。嘗病。特賜酒米羊豕。士論榮之。丙戌副閣學太倉王公典會試。一時舉士多異才。而公務先雅馴。敘辭諄諄。以萬石君不言躬行爲勉。有先進風焉。時上親簡閣臣。未及公。及廷推。宗伯以公副。言者遂露章。謂公不早自決。然終不敢一涇公履。公聞之曰。安有爲人臣以不得遷官執鞅去乎。吾耻爲競也。然吾病矣。去固當。上卻御史奏弗省。溫旨慰留公。公上疏乞骸骨。再不許。歲且履端。不得已強起。會大官設春餅。公。

與冥。比歸猶儼然薦歲事已。雍容點檢架上諸藏書。殊無恙。厥明溘然逝矣。悲夫。公爲人寡言笑。斤斤繩矩。性孝友。少奉兩尊人考終。然居恒自恨晚達。不逮祿養。歲時薦享。未嘗不涕泗沾襟也。事其兄若姊甚恭。與室人相對若賓。接諸子偶得過。不譙讓色。怒對之。改乃止。日有日程。即斥語細行。輒備書以自鏡。與人交不爲款曲。至延引故舊。振急周乏。孜孜若不及。平生無尊彝圖畫珍奇之好。顧獨嗜書。書積餘萬卷。多公手蹟。凡三預校士師兩太學。所簡拔多天下賢雋。荐歷華廕。然公未嘗一干以私。公故不皎皎市廛名。乃卒之日。會嚴冬。賓友就視臥內。布衾練帷蕭如也。公所著較語二十卷。日錄見聞十卷。中書直閣記藏于家。其大者有 國朝故實可二百卷。殺青未竟。公自爲祭酒時。殫力編輯。竟午夜不寐。而寮友門人無一知者。既沒。搜得其藁。諸孤乃云。嗟乎。此亦足以觀公矣。世之降也。士大夫豪舉橫騫。艷奇節而弋尊名。未有質

行闇修。退然而處後者。公博聞淵詣。不爲藻飾。其內行淳備。屋漏無忝。不爲矜抗。蓋巍然先民之法程。無知不知。稱爲端人長者。假令柄用。必有以表儀當世。匡拯頽俗。而天遽奪之。謂之何哉。此余所以信公于蓋棺而深恨于推轂之晚也。嗚呼。公生嘉靖己丑。享年五十有八。配趙氏。封淑人。子男四。長炳文。官生。次炳謨。國子生。次炳勳。武生。次炳烈。邑諸生。女子六。皆嫁爲士人妻。孫男二。詳在少傳。許公志中。銘曰。世尚瓌節。矜雄詞。高足要路。爭先馳。下者齷齪如韋脂。抹撥禮教。隳天彝。公無抗激。無詭隨。履方應舉。圓中規。大圭未琢。美未漓。潛修篤行。寧無奇。執義凜凜。堅不移。吾耻儕俗。甘違時。粵初載筆。燃青藜。枕經籍。史耽湛思。學探閭奧。窮津涯。賢關望苑。何委蛇。談枕講德。相切劘。濟濟多士。欣得師。昭代典章。星日垂。惟公討論潤色之。如有用。公究厥施。坐令澆薄還淳熙。胡不弔鉉璫。期願。翩翮乘雲去。莫追。高山可仰。德可儀。先進禮樂。非



公誰。崔嵬馬鬣留豐碑，後有考德觀銘詩。

申時行撰《賜閒堂集》卷二一

周文恪公子義傳

王世貞

周文恪公者，諱子義，字以方，世爲常之無錫人，業儒而至。高皇帝時，有志善者以滇中役改隸軍籍，願其人倘尙負氣，更用是起家。有五子，仲爲昌言，昌言子鑑，鑑子濬，濬俱以公貴。贈如公，今官。贈公濬，工詩善書，里中縉紳慕稱之。然以好行德，不事家人產，產漸挫，而又難子。年四十七始舉一子，又三年而舉公。公生而端穎異，凡兒五歲，受書輒誦，十二能屬文。十五見其業於鄉進士殷君，殷大奇之，勸其出就試。公謝學未成，弗果。十八試於督學御史馮公，褒然首列，遂以諸生應試，不利歸，而益勤苦自力。旣而歎曰：大丈夫乃以一第市耶？謂日所啞啞佔俸者，於身心有絲髮益否？乃悉取五經熟誦，泳之，旣而取程朱諸大儒章句，釋之，已取漢人注疏，參之，融融如矣。乃復取濂洛關閩與薛文清、王文成、蔡祭酒之遺言而體驗之，稍筆之書。其翼經傳者曰毅語，凡二十卷。其發抒所獨得者曰日錄見聞，凡十卷。於是公之學成矣。里中弟子負笈請受者累恒滿，至藉其束脩之贏以供贍公及母吳淑人甘毳，而公躬啖蔬素，衣韋屨屨自若。然至當省試，輒以不應令報罷，人或謂公盡少。

貶就時趣耶。公謝曰：母以爲也，我固當有合。而贈公及吳淑人相繼捐館，公毀瘠逾禮。既服除，爲嘉靖辛酉，遂薦於鄉。明年復絀南宮。又三載乙丑，會試高等，對策復上第，選改翰林庶吉士，讀中秘書，所試詞賦皆甲，而公意乃不篤好，曰：此與舉子業何異？益治經術，明習國家典故章程，諸以筆墨事請者，弗盡酬也。復用試高等，留拜編脩。明年爲隆慶戊辰，分校禮部試，所得皆名士，與脩世廟實錄，奉冊封周之泰寧王。王國津送直可百金，公悉之，分理制誥，充經筵展書官。公於實錄所任纂，自嘉靖丙戌以後八年事，於議禮制度最名爲繁鉅，公考據剪削，亦最名簡要，有法未及就而遷南國子監司業。公至，日坐堂廡，與諸生講說經義，務爲精深，推本聖人所以立言之指，而其課業皆手自甲乙，最爲勤當。諸生人人自喜，以爲不虛值。是時萬文恭公、余文敏公相繼爲祭酒，其人介通不同，同於推服公，至取司業所定規條爲祭酒潔法。而是時公所舉十餘卿懋學治南垣，皆極論朝政得失於相臣，操切有所刺譏。相臣既已逐余卿矣，而疑疏草自公手，銜之。而公昉之官，至考三載，績一尺疏以通相臣車門，嗾露辭色，會留都大

計吏，吏部尚書嘗交關公，公一切禦以理，亡所徇。尚書竊得相臣指，欲誦公以逢之，而仲其志，賴諸公持之力，得亡它。公始中書語，卽掩關臥，曰：是不難我，我獲被耶？諸生日伺公門，環泣請留。久之，稍出視事。後以資次改北，前後通六載，始轉司經局洗馬，兼翰林院脩撰。祭酒今少傅許公貽書公曰：忠信蠻貊尚行之哉，意益有所指也。萬曆己卯，主順天試，從檢無小嘗亦號得人，兼清兵部黃吏，無敢以率略進者。庚辰，再分校禮部試。公故治書而改閱詩，如夙治，所得名士視戊辰，尋遷國子祭酒。其教授諸生，約略如司業時。至釐革姦案，節齎浮費，積金錢數千緡，拓傍公廨一新，不以煩縣官，則非司業所任也。當是時，相臣雖不專爲忤，而待公猶落落。公殊安之，會其卒，始遷禮部右侍郎，兼侍讀學士。尋遷左侍郎，知貢舉，充會典副總裁。已解部事，顯訓庶吉士。俄進吏部左侍郎，掌詹事府，其兼學士、總裁會典、訓庶吉士如故。公喜曰：吾知所以報國矣。庶吉士晨朝，公未嘗不諄諄以爲己之實學訓之也。間與論天下事及祖宗彝訓，而後傍及執文，曰：此若所由貴也。雖然，非若所急也。會典總齊百司庶務，公故長於其學，而至是益加精悉，目披



手校昕夕不倦。臺諫有請以明先儒從祀文廟者，公首以王文成守仁、陳檢討獻章應，而祭酒清、胡布衣居仁、章文懿、趙文莊、柝亞之下。禮部會羣臣議祀王、陳而布衣與焉。公既爲侍從長，而禮部以尚書缺請廷推，首侍郎沈公。公僅居次。既內閣以輔臣缺，請時居憂者禮侍太倉王公及吏侍山西王公得之。前後皆越公序。公泊然如弗聞也。或謂公不當去乎？公笑曰：以我不任去固當，以我不爲內閣禮部去，非臣節也。書不云乎？伯拜稽首，讓於夔龍。滿三載，賜鈔緡羊酒同尚書，贈封如令甲。嘗以病待告，賜醴薦膠米，醬菜同閭臣。尋偕太倉公主會試，所得多恢奇博朗之才。程文爲天下式，而公大意乃在崇雅敦實，於序辭諄諄以萬石君不言躬行爲勉。有某御史者希指，謂公兩見抑爲不能其官，而妄詆訶之。然不敢及公行履。公上疏乞骸骨，優詔不許。會典成，公功最多，而以校讎故耗精力，比且上而公病，一昔卒矣。上聞訃震悼，而會閣臣用書成得序遷，乃併上公功，待贈禮部尚書，賜祭者二行人治葬。一切用尚書恩，申隆文恪。公爲人孝謹天性，奉贈公吳淑人，獨能得其心，皆以老終。然居恒自恨晚達，不逮辭養，語及輒

愀然改容。歿時蒸嘗，未嘗不涕泣也。事其兄恭甚，時捐粟以成其義名。衣食嫺婦，畢身無倦色。又爲之宇遺孤如子。燕居獨處，恒欽欽若對大賓，疾言遽色不以加於僮僕。其御子姓如萬石君，試序所爲諄諄，蓋身有之也。於物無所嗜好，所嗜好獨書。祿賜購積餘萬卷，咸手自校讎。前後典試與成均所造士，仕宦幾徧海內，絕不以毫髮私干之，亦無敢以私請者。大商林姓者，故臚而交公。公既貴，請以五百金爲公謝絕之，曰：吾不復與而交矣。遊之撫臣致賀金滿百，公大驚曰：以一撫臣而賀金百，其爲百金當不貲，何以飽戰士哉？却不受。公時自謂楊氏父子四知三不惑，庶幾有之。志伊學顏，則服膺而未之逮也。公旣以明習掌故聞公卿間，有疑難事輒問周先生云何，公事爲條答無爽，然未嘗露德色。所著書自教語，日錄見聞外，有中書直閣記，評列後先宰輔賢否甚密，秘不以示人。國朝故實幾二百卷。

（國朝獻徵錄卷一八）

潛谷鄧先生元錫行略

黃輝

萬曆癸巳七月十有四日，先師鄧子卒于南城之仙山。先師諱元錫，字汝極，別號潛谷，南山公冢子也。高

祖栢崖公以進士起家、故自新城視源墟遷有津之南、以御史事仁、宣、英皇帝、以慈惠恭肅享有令聞。御史公生慈菴公、國學生。慈菴公生璧菴公、璧菴生南山公、年四十有四未有嗣。先是南山公築層樓自隱、曰南山樓。先一夕、南山公夢一白鶴自天而下、至其樓、南山公拔之、持與劉孺人是夕遂生師。時嘉靖己丑二月二十八日。生而穎特、南山公每奇之。甫五齡就塾、師黃君學、試以聯偶云、步武有人、甯道可繫桓典馬、隨應云、惜陰自我、及時須着祖生鞭。一夕夢一人儒衣與之言曰、清風灑巖洞、是我再來時。黃君大驚之、與南山公曰、是兒非我所能師也、盡請明師教之。年十一、事在川黃司訓、年十三時、師志廣、莫屬經典墳史、咸喜博觀。人曰、無已荒乎、黃師曰、譬之泰龍、隨其所嗜、豈必膏梁耶。時師氣勃莫遏、心所欲爲、果銳必達。人曰、母已戾乎、黃師曰、譬之養虎、隨其所如、豈可拘繫耶。時諸人同學於黃師者、俱聽講於師。黃師惟默聽、其啓口質直無文飾、直發明書片、黃師最欽服之。年十四、與觀泉朱公曰、君子儒爲已。又曰、君子下學、學而反諸身、潛諸心、闇然於幽獨之地、日用見在、實落用功、由是而身端心誠、神通應達。

今之學者經史、師友指示、昭著目前、而無益於得者、學不爲己故也。基於今誠患之。朱公時大愧服其志。年十五、南山公有疾、撫師曰、吾將逝矣、兒幼志未定、予茲復以家累見、兒學業其弗克終哉。師潛然淚下、跪前復曰、敬成父志、兒矢畢力于學、以紹先人光。南山公曰、而若是、吾目瞑矣。既逝、師哀毀如不欲生、水漿不入口。時張孺人、劉孺人愛獨至、而師日夕侍養、雖時講業於外、旦暮歸必鞠躬侍側。師王母或詢所事、或問所業、必委婉應對者久之乃退。待家人凜然、嚴肅、毫不敢犯。弟得替疾、時慮家計旁落、遂作弟訓、俾母謹浪、毋縱恣、母苛童僕、母刻農民、以母伏先人之遺訓。既弟以疾終、遺幼孤、撫育教訓之若子。年十六、作先世事傳譜、至南山公、乃廢筆嘆曰、先君孝友、刑家、廉清、範俗、抱仁、飭禮、以我厭世、孤愚鮮識。詩曰、明發不寐、有懷二人。又曰、夙興夜寐、無忝爾所生。今孤罪誠莫追矣。遂書遺行、日置座右、以自省悔、求無忝焉。年十七、僞富家、詩刻農民、慕古壯滄法、乃立、不問豐歉、歲有常數、薄收其息、以資耗、而鄉民之老者若婦之節者寡者、咸聽其貸而不取息。其人死、并以所貸即爲葬資。每歲臘春耕、即發社、以爲常、無



問寒暑必親履其地給之。年十九遊縣庠。時近溪羅先生倡陽明先生之學於邑。仙居師聆講者數時。即銳然棄舉子業。問學。年二十一往吉州謁諸老先生。求明此學。師王母憂之。以爲棄舉子業不事兩事。遊譚爲乎。師恐違其志。復畢志舉子業。年二十四遂買舟謁唐荆川公。舟入湖口。直風濤。舟幾覆。同舟者皆戰慄。獨師危坐默然。曰。生寄也。死歸也。無所逃。待之可也。乃焚香禱風。風稍息。遂返舟歸。惟日夕深造詩自魏漢而下并近體均爲刪訂。俱有評題。文則祖三代而宗秦漢。年二十五觀泉朱公有疾。師蚤夜供湯藥。及疾革。爲視含斂。經紀其喪。服葬祭。未無子爲立嗣。其妻孀居。歲時問饋。年二十六。聞諸大老講學於上清。偕師友往問學。時同事者數百人。諸老獨於師諄諄留意焉。往來書簡相與神交。乙卯秋將應試。聞朱氏計謫。即揮路費以助之。始登舟。泊都會。惟過走諸名公論學。師舍弗之計。隨領江西鄉薦第三舉。至爲天。於野。公。得師。卷大驚曰。是明人。第。民故者。使宋儒可作。亦自神乎。比歸。師念張孺人年高而孤。身遠遊萬里外。如承歡何。惟日往門潛脩。因示人曰。老母頽齡。愛欲篤。深開之志。修菽水之歡已。

輟北上之轍。諸非以文學論議相切磋者。不敢與聞。亦不敢請見。邑侯高公素推穀師。具路費爲勸駕。竟謝卻不受。戊午秋張孺人欲成其名。力促之行。因其裝復走吉州就學。與東廓鄒公三五劉公剖決印証。鄒公手書發育峻極皆從三千三百充拓。三千三百皆從成懼心體流出語以遺之。甫越月。聞閩寇侵新邑。遂馳歸侍養。自是與二三友時刻煅煉。研晰於本心。天人之辨。危微精一之旨。時門徒日盛。而司空心吾張尚寶司丞。譚川馬。皆當時受切磋砥礪者也。已黃師卒。爲營葬。養其子。輔之成人。子殤爲立嗣。黃孺人終身饋養。事之若母。辛酉冬。師王母復強應試。始遊京師。與高安愚齋傅公。陝西秦關王公。切劇此學。既歸。齊公蚤世。師冒雪往購之。戊辰試歸。受徒講業於天。日督同志。習相與作興此學。時心宗盛行。謂學唯無覺。一覺無餘緒。九思九容。四教六藝。桎梏也。師爲此懼。謂九容不修。是無身也。九思不慎。是無心也。日辰起。羣緒友。難。本。收。攝。放。心。至。食。辰。次。第。此當下。心體語畢。各因所至。爲覺悟之時。在門。素。彬。彬各有造。辛未。作。因。史。下。編。撤。所。居。室。爲。先。祠。規制。以御史公始還南津之祖。居祠中。室與西。最。一。室。居。上。



代御史公而下祖居四夾。慈菴公而下左立左昭位右立右穆位以繫族人之心而族之貴者賢者各立一主以示勸設族屬之位以祀族之無後者至高祖外氏則扶植御史公以有成者以東最一室祀焉春秋率族衆詣祠舉體恭敬嚴肅每事必親問之禮畢尊卑長幼集於一堂開示以孝友恭儉勤恕之道凡有曲直就質平焉出一語立斷善者獎勸不善者懲戒貧者寡者咸竭力周給之修家祠上則天地君親師左則祖右則社日有祭朔望有祭忌有祭於時復修義田義田者其先所爲供祭田也因水衝裂師獨捐已田三百餘畝浚成深川以殺水勢而義田漸復壬申丁曾王母強孺人憂擗踊哭泣水漿不入口者三日居喪一守言禮不事浮屠居聖室旣葬就墓側結廬居三年啜粥飲水旦暮悲號癸酉作三禮編注釋及函史上編甲戌復有劉孺人之喪居喪禮一如張孺人丁丑尚書毛詩釋春秋通成稿成雅川王公見之作而嘆曰至哉淵乎博乎闕乎乎天人古今之統而一以貫之矣遂爲書其首飾斥百金鑄其名其書曰潛學稿戊寅釋易於廬山王公見之作詩曰探測義文圖外意發揮河洛畫前機已師喟然歎

曰尼父五十以學易幾無大過文中子曰沒身已焉嗚呼卽沒身豈有竟哉又曰易理玄微卽程夫子易傳稿尙出於易簣之後矧固陋如錫耶以故易釋凡改竄者已更四訂猶未就摹已卯五經釋及函史下編成敬菴許公時爲盱郡守莅任三年具知其賢遣書昭之已命五邑士就學復請至盱與論學甚契至以程伊川先生目之先是都察院敬吾魏公奏請行師鄉社保甲法直指使者韓公行部訪隱逸遺賢時邑侯以大夫士庶交薦師遂以實跡上許公復以上直指使者爲題請于朝自是許公遷秩入京師與同舟談學者四十日而別已酉秦開王公斗津章公不遠千里而別相與切磋者踰月及別又念王公年衰遠遊命于抑君從以供煖藥輔以底家戊子南昌郡守范睢陽列師及南昌章潢安福劉元卿同薦于朝已而南京祭酒定宇趙公復請徵師如崇仁新會例疏中云如鄧元錫飭躬勵行志希聖賢少舉鄉試登母于家倦意仕進杜門著述十五六年矣其方嚴介潔行旣不爲詭隨其潛心績學才實堪於經濟臣謹讀其所著五經釋函史諸書精深閎博皆能發載籍之微義他若三禮編潛學稿等書皆極淵達成一家

言及訪之鄉評暨仕宦之在江右者。又言其親終廬墓。能立義倉以贍一邑之人。諸設施亦犁然精密。蓋嚴毅似胡居仁而博雅過之。高卓似陳獻章而灑落不及。其稱之士人如此。誠古之逸民聖世之遺賢也。臣以爲如元錫者。宜處之禁近。可備採擇。卽用之郡縣。當爲循良。旨下吏部。移文布政司。起送部試。有司登門勸駕者再矣。師乞養病未赴。己丑貴州侍御王少拙公復請徵師。疏云。臣聞帝王之治。惟以親賢爲急務。而其立賢則無方。是故有弓旌招賢之典焉。有鄉舉里選之法焉。而又辟召徵聘以起巖穴之士焉。若堯之舉舜。湯之聘伊尹。皆自巖穴而登之廊廟者也。中云。如鄧元錫。欲其起送部試。此進賢致慎於其始。甚遠慮也。但臣聞孟軻有云。大有爲之君。必有不召之臣。彼族國之君。尙爾。況天王之明聖乎。又云。至如鄧元錫。劉元卿。未可以爵祿常例引致者也。臣愚以爲。皇上當取法祖宗成憲。徵聘隱逸。二臣至則召入便殿而親試之。或質之經術以觀其學。或探之匡濟以觀其才。或察之動靜語默以觀其操。果有可用。則用之以備顧問可也。用之以輔導元子可也。旨下吏部。移文布政司。問病痊。令起送赴部。師

復具舊患日深。新患復作。乞恩在田調治。以終成全詞上之。有司三復勸駕。師又具患病委篤。乞恩在田調治。詞上之。時年踰六旬矣。至壬辰。直指秦公行部。又復題請。疏云。鄧元錫。襟期孤介。思緯淹通。數十年杜門著述。羽翼聖真。環百里惠德。普良維持風教。相應破格錄用。旨下吏部。吏部覆本疏。中云。以臣等所聞。鄧元錫。學行純備。人無間言。而跨俗守貞。不希榮進。其逸軌自可作人。是宜受王明之及。未可隱於山林。令聖世有遺賢之惜也。上遂以翰林待詔徵之。天曹咨內臺。內臺下按察。按君下縣。有司親致。按君陳公移文云。看得本官德性醇樸。問學淵宏。羽翼聖典。宏編備天地人物之紀。維持風教。清修居賢良方正之科。宗匠士林。著龜後學。博采輿論。金曰真儒。幸際清時。詎遺名碩。爲此仰府行縣。掌印官卽將發下文憑。親造其廬。敦趣就道。仰答國恩。勿虛盛舉。師時年六旬有五矣。至是。函史上。編成。師以禮。君命召。不俟駕。今爲貞疾。不赴召者再矣。今上以官召。不復坐辭。當扶病走。中途具疏以請。且以成威。昔扁鵲五嶽志也。始太叅川樓吳公爲昭陽郡守。欲延師爲上賓。師以張孺人年高辭之。至是復遺書問之。書云。

門下賓王佐之才、不用於一世而用於千百世、著書種種、儒術經制備焉、真足以興禮樂、致治安、而名理詞章皆虛文也。每一馳情、輒復長嘆、非徒感別、實有所繫於中。比見 天子懸賢、禁林虛席、詔下之日、莫不爲門下揚眉。門下將登安車就道乎、將爲魯兩生乎。然以愚意計之、則一官不足爲門下重、門下當爲吾道重也。又詩二首云、自罷金門謁、深山日著書。神遊千古上、心苦廿年餘。述作承先哲、行藏委太虛。清明開虎觀、詔下遣安車。叔世無巖穴、惟君隱獨真。形看起居注、清切動楓宸。已憑至拜命、不得已、卽理行裝辭親友、爲長別計。朋友年高者、師俱厚遺以助之。始行黎明、密掉小舟而往、以避餞客。時癸巳七月二日也。先期一日、空中忽飛素帛一條於邑學聖殿、一條於演武廳旂竿、卽與師里近。師於特底仙山辭太母劉孺人墓、卽日與厚山丘公及諸友論學竟日夜。已作書及格物說復敬菴許公。疾作、惺然兀坐、師自覺體然、無復餘羨。明日、遂草屨力衰憊、扶病赴闕、長途不能前進、乞恩放歸田、以終殘喘。辭疏并答路公書。時孫思恭與南吳念慈諸君在側、更無他

語、惟恬然而逝。乃癸巳七月十四日。沒之日、郡主路公躬往仙山、見其容含笑若生、爲涕下。聞郡大夫士凡素受業於門及相識者、俱走哭失聲。凡見者、村夫田婦、兒童老叟、莫不悲號。市井里巷、罔不傷歎。四方學者私謚爲文統先生。

《國朝獻徵錄》卷二一四



翰林院待詔鄧汝極先生墓誌銘

許子遠

我國朝中葉、自制科而外、以儒碩徵聘起者、僅有若春坊、蕭德吳聘君與弼、翰林院檢討陳先生獻章、及今上所授翰林院待詔鄧君元錫、禮部主客司主事劉君元卿四人而已。吳聘君辭官不受、陳先生受而不仕、惟遺聲光在宇宙間。近鄧汝極捧檄出門、抵盱江、將上疏辭官、亦遽卒。賢者用世、固若此其難也、豈名與位不兩全、造物靳之而然耶。當汝極之沒前二日、予遠自閩中遣使問出處、兼期過三山商訂平生未竟之業。汝極方在母墓僊山作報書及欲辭官狀、謂君命未就、義不敢過赴友約、語歷歷如平時、而適日即不起。異哉、其生死之際也。其冬、門人黃文學渾持所述行畧走洪都、乞萬學憲狀、而入閩乞余銘。余諾之。既三秋、其孫思恭復於同邑鄧孝廉澄所撰事傳來留都、申前請。余不能待、學憲狀始為之銘而銘焉。君諱元錫、字汝極、別號潛谷。高祖

義、中永樂辛卯進士、官御史、歷湖廣廣西僉事、立朝侃侃著風節。曾祖時康、祖廷璋、俱有隱德。父植、慷慨好義、所居面南山、因以自號。結層樓、招客嘯咏其中。配張孺人、不宜子。置側室劉、生汝極。汝極童而莊、然志氣高廣、不為羈係、塾師難之。稍長、南山公延黃文學天祥為之師。文學知其非凡品也、不為繩束、縱其所如。學日進。當是時、寤寐典墳、馳騁史籍、已廓乎有囊括萬古之思矣。而汝極性褊多戾、文學為之調適、維護其間。時創聞稽山良知學、眾賦弗省、文學以勗汝極、相與邁往、則矢志肩負、洗然契發於傳文之上。文學嘆曰、聖學非吾子不能及也。嘉靖丁未、補邑校弟子員。乙卯舉鄉試、第三人。南山公歿於此十年餘矣、張孺人且老、汝極謝公車不上。戊午冬、行至中途、復回車過吉州、問學於鄒文莊、劉師泉、劉三五諸先生。文莊手書發育峻極從三千三百光拓三千三百從戒懼心體流出語為贈、而二劉先生於汝極有深契、交加鍛鍊、學益有得。已而張孺人強之



庭試始偕計一再赴春官。及張孺人與劉孺人相繼卒，遂絕意世間功名事。杜門潛學，歷寒暑三十餘載，著經繹、上下函史等編。汝極之言曰：大哉先師之六經乎，洋洋乎天人之奧，倫物之情備是矣。刪述垂訓，功至罔極。近世學者牽滯聞見，迷離於原本，其師心自用，競口實於六經註脚之語，蔑問學而不事，吾深病之。於是首著書繹、詩繹、三禮編繹，闡先師所謂雅言詩書執禮者也。其言書也，莫重於人心道心，危微精一之旨。謂人心乘氣出入，而其本乎天者曰道，動於人則危，復其天則微，不微不危，微則康，猶反覆手精以察道心恒微之幾，一以止道心恒微之所，斯人祇天定而無危，是天地之中也。誠信而執之，時幾永保，千變萬化，吾常守中焉，是學之極則也。唐虞之典謨，夏殷周之訓誥誓命，率由是焉而已。其言詩曰：風者，風也。風本於家而化成於國，故端起於夫婦，雅者，正也。政發於朝廷而達之天下，故綱始於君臣。頌者，交神明之道也。主唱歎無淫佚，主清潔無

侈詞。風主情足以興，雅主性足以正，頌通神明則至於命極矣。三禮本曲禮，儀禮、周禮，而謂世以記並稱者，誤也。故取曲禮及少儀、內則、玉藻、酌、以彛倫日用先後緩急之序，編次為曲禮上下篇，而以表記、坊記、緇衣等語附之為經記。儀禮本古經為經，經有義見戴記者，類附經為傳。傳錯見他記者，撫取為外記。記各附其篇之末。周禮仍五篇之舊，而記於經相發若記者附焉。蓋科條畢具而失倫者，咸各歸其官。故其言曰：曲禮制而人道有理，曲禮、禮之本也。儀禮者，先王所以訓齊天下經仁義之大端也。周禮治要在論官，而六官三百六十屬，一準乎天行。周禮制而天道以明，民故以察王治，其大順矣。余讀書，詩、三禮繹，而知汝極潛心於古之大聖，繼天立極，叙倫經世之道，精以深，闕以密也。春秋者，先師明天道以正王統而定人心之書也。屬詞比事，大義森著，非擅可句字繹也。故作統言通焉。易本汝極所專經，晚益篤好，著易繹，諸卦爻具有繹。祖庖羲圖象作先

天圖原、宗文王卦辭作周易序卦、後天圖原、憲宣聖易贊作十翼通、又玩易反對為偶圖說、易草初就、余時守盱、得觀之、既自關中遺書汝極、謂易理精奧、稍著意見、落言詮、猶難以俟、後聖而不惑、汝極復書唯唯、乃更繹竄改者、至於再、至於三、垂易贊不休、而尚未以付剞劂、今所摹行郡中者、殘後出之門人弟子者也、然而殫精研思、開發四聖人之蘊者、既可謂大有補於先聖、有功於後學矣、史依洪荒而來、迄於勝國、考觀天人貞一之統、察古今離合之變、王路隆污、道術善敗之故、為上編、有表、有紀、有謨、有訓、有述、有傳、有志、體義各異、其材取諸史、其義稟諸經、故其言曰、帝之有紀、明治之有統也、翼以謨、而明穆交贊、師之有訓、明道之有統也、翼以述、而庚行不墜、聖賢在上、則推而行之、在下、則述而藏之、微是天莫屬其心、民莫必其命、而王路道術、遂為天下裂矣、嗚呼、此汝極之志也、史下編總三才之撰、觀會通之極、由上古迄當代、各紀一事、本末終始、臚列為二十

一書、其言曰、天官之分九野也、方域之奠九州也、人官之列九品也、是三極之道、歷萬世而同條貫者也、故首天官、次方域、次人官、天官莫大於時令、歷數以紀之、災祥以驗之、而天人之際大備、故次時令、次歷數、次災祥、方域莫大於土田、土田生德之本也、有土田而後有貢賦、漕河通焉、故次土田、次貢賦、次漕河、人官莫大於封建、封建政之根也、封建廢而任官、任官有統、而後九德服在位也、乃學校其本已、故次封建、次任官、次學校、有學校而後有經籍、經籍者天文地理人事之紀也、禮理天地之序、樂宣天地之和、而後人道成焉、故次經籍、次禮儀、次樂律、嗟乎、利誠亂之始也、夫子罕言利、常防其源也、長國家而務財賄、乃其來久矣、於是小刑明刑、大刑制兵、次貨賄、次刑法、兵制廢焉、春秋謹嚴、莫謹於中外之辨矣、故次邊防、次夷狄、異教之為常道裂也、自道之微始矣、當防乎其防、故受之以異教終焉、汝極之學於經史者、徧可觀其舉、已而異教考一編、鏡二氏與吾



儒迭為真勝之故。以及理性命得失毫釐之幾。可謂深切著明。篤信於聖人之道而不惑者也。而其要以反經為本。以天命為則。以禮教為防。以乾惕為行。一務於神明默成。而不事辨說。其言曰。小辨亂德。君子尚行。小人尚言。尚言好辨。辨必窮大索隱。以相高。苟務加人。雕刻渾淪。析玄解冥。焜耀如火。旋轉如風。令聞者惑心。愚志。雖足譁眾為人師。而無當於事實。有味乎其言之也。然

聞

汝極言足純師之石街巷。遂家於

浮。四傳為枏。中淳祐進士。修厚德。養奉其先。移狀本鎮。給印押世守。今藏於家。又四傳為丹徒教諭公逸。逸生英。英生文亮。文亮生寧。寧生琪。琪生濟。濟生畏。畏生震。長身玉立。有隱行。人稱老佛。君大父也。生四子。長月溪。公經。是為君考。少孤。依外家吳氏。娶葉孺人。且賈且耕。家頗起。為其諸弟以次授室。左提右挈。俾各有家。蓋亦手持立而能振中衰。為貽謀燕翼之計。晚年行營高敞。地奉父畏公遺墓。因自附焉。生二子。長即君。君幼多病。

十餘齡。始就外傳。三年通經書。補弟子員。方改制科文。藝有聲於時。而月溪公以貲稍贏。為賦役所困。又伉直不善事官長。數受厄。君長跼請曰。兒徒事空言圖效而坐視巢卵之毀。後將不救。則奈何。遂挺身代月溪公奔走於外。東至海。南至荆襄。歷寒暑無所避。又代之往役典庫藏。先是典庫者為有司所魚肉。率破家符下。相嚮泣。君曰。第以書生身當之。會廳直指鵬按浙。首疏行條鞭法。罷一切徭賦。君應聞不旬日而歸。既息肩。杜

門發憤。思竟前業。聞

又湛思。聞給朝夕。而富

人恒操其愚困踣之也。余做古社倉常平倉法。合鄉為社。審其歛散。教漸贏。則法漸廣。一主憫農。而其高年有疾及節婦孝子特優之。若在族姻。尤為厚視。待汝極而舉火者不知幾百十人。垂四十年於此矣。少與同里朱君僅共師黃文學。劇切為深。其後朱君天無子。黃文學以里聞受官卒京邸。亦無子。兩家爭衣食於汝極。高安傳孝廉明應以同志稱石交。其沒也。走數百里臨其喪。

而存恤之靡所不至。初舉鄉

執經滿座。大小畢

育之。成學若張司空

光祿

黃柳洙。涂孝廉雲屬。

並出其門。中歲重自潛歛。不喜為人師。乃臨川傅侍御

元順。南城縣邑宰鉉。左行人宗鄧。並以同袍執弟子禮。

汝極故不能辭。而若鄧孝廉澄者。晚進歸依。視在門牆

尤篤。蓋其感之深矣。邑司成王公材。識汝極於諸生時。

晚益折節相下。司成公既歿。卒賴汝極以片言徵信於

有司。方汝極學成。其書稍稍出。海內巨公長者無不慕

其聲。想見其人。諸兩臺監司若郡守邑令。往往致書式

廬。廼汝極義不往謁。雖幣交不苟受。余之守盱也。蓋三

年而後得接顏色於郡城已。還督學關中。偕過臨汝。入

洪都會鄧少宰。萬學憲與余。周還逾月乃別。無言不盡。

則相契以心。不在形骸之內矣。然而往返舟輿。必捐貲

宿戒。不以一夫一馬累吾有司。其操致凜然不可漬也。

汝極於文章雅不為酬應。問一操染。率傳經析義以相

教。而雄渾極變。規周漢而有其質文。詩妙襲近體而古

選。沉鬱蒼麗。漸風雅而成家。著述自經緯。函史外。有四

書。周易潛虛。集古今儒者詮解而折衷之。以為後學指

南。謂漢而下儒莫大於王文中。而以僭營之者過也。次

中說為六篇。而周元公之遺書。張子厚之西銘。程淳公

正公之遺書。彙為編以明儒統。周衰經降。而諸子之說

昌。史列其傳。傳所不及者有子約。近代以集名家者有

集約。詩自古而來取其卓然闢世教者曰世風。詞不必

盡詩而義存雅正者曰近雅。騷賦係焉。統曰詩約。明真

詩未嘗忘也。而諸經具有圖。昉義圖而來。曰文字之所

從出焉爾。諸皆藏於家。先是薦汝極於朝者。韓直指國

禎。秦直指大夔。趙司成用賢。王侍御以通。而司成之薦

以徵賢請。擬汝極於吳聘君。陳公甫之流。厥後主爵者

特起汝極以翰林院待詔。與吳陳相頡頏

汝極風致德業具可考鏡。視前軌孰高孰弘。必有能辨

之者矣。汝極卒不數月。而郡邑上之學使者。學使者下

郡邑學官弟子。並祀郡邑賢祠中。茲可以見東吳好德

之驗。汝極生嘉靖己丑二月二十八日卒。萬曆癸巳七月十有四日享年六十有五。配江氏。續楊氏。子一景儀。江出。亦娶江氏。女三。江出者二。一適生員徐懋文。一適黃涵。楊出者一。適南城生員丘徵。景儀後先生三月卒。孫男二。長思嚴。娶張氏。續楊氏。思嚴先卒。次即思恭。生員。娶黃氏。曾孫男三。玄一。玄二。玄三。並思恭子。未聘。墓在邑四十四都下村盤溪子山。午向。銘曰。

於爍儒軌。肇啟宣尼。下學上達。萬世為師。六經垂憲。燦若星日。天經民彝。藉以扶植。世衰道降。異學縱橫。玄寂變幻。乘其高明。彼忱高明。行僅為僻。浸而虛誕。誇張罔極。亦有豪雋。文章自雄。綺言無當。藻繪徒工。嗟爾鄧子。黎陽潛學。洞燭羣迷。獨追先覺。既繹諸經。載摩函史。上窺神化。俯究名理。疲精著述。易簣不休。既沒言立。光賁千秋。爰考素履。矩繩是蹈。克孝克恭。示民則儆。道之藩籬。曰存名節。而子皎皎。曾無玷缺。實大聲宏。升聞於朝。徵起史局。蒲輪在郊。擬疏辭官。叩閭路寢。行及盱江。少

微忽。頃自昔儒者。稀聞盛遇。天若靳之。莫究其故。嗟余涼德。辱子深知。銘于百世。非余而誰。

《明文海》卷四四五



藏

明儒碑傳集卷八十一

魏時亮 涂懋光 夏叟 李庭止

李大昭 袁黃

明南京刑部尚書敬吾魏先生行狀

魏敬吾先生者、非先儒之與刑哉。儒者口則古昔稱先王、鄉評官箴、往往多譽、議友都願志於貧賤、感心於寂寞。人曰諱學不足信、非諱學不足信、廣儒不足信也。先生孳孳講學、而躬行為務。昔官中大夫歲、租不能供一飽、怡然自若。常人砥厲初仕、稍被挫折、自度計無復之、鮮不回而易心者。先生被權臣中餉、例不得復用、甘守衡門、不一失足公庭、持已何嚴也。予故曰先生儒者之與刑也。先生當屬續時、呼其子士淳、士清、以狀托余。余夙知先生、不敢辭。先生姓魏、名時亮、字圖世居南昌木山里。父天相、嘗為袁州掾史、守奇其才貌、厚遇之。會生先生、見有異、粟乃嘆曰、有子可教、惡用供刀筆之役。

為。遂解職事歸而訓先生。先生遂用經術顯。登乙卯舉人、己未進士、授中書舍人、遷吏科給事中、積至戶科都給事中、陞太僕寺少卿。先生嘗以兵科左給事劾令大學士新安許公使朝鮮、却其女樂銀幣之餽。故事、詔王開讀、王北面、使臣西向。先生與許公固爭之、天威不遠、頗咫尺、吾何敢以一二忤天王命。王不能奪、竟南面。臨之、時與國中人諱學不能盡解、遺以明儒論學語錄、國中人錫布之。嗣往者、國中人或稱昔時二天使、庶而有禮。其不辱君命如此。在披壇、疏義成帙、大都毗主德、匡國是、節財用、斥奸回、寂著者、敵陷石州、請上而詰大臣。益榜廟登極、未發一語、故先生以是為請。越二日、上講罷、即問石州殘破狀。講臣云、不虞敵人深入、上囑需唇吻間、將有所商略、而中官王本者、輒從旁屬聲、謾罵諸臣工欺蔽。先是本陰運言官周公怡、陸公鳳儀、實欲借此恫喝臣僚。上怒本、目攝之、本猶語刺刺不休、其黨為胡者肘之、始息。上滋不悅而罷。中外聞其事、不敢



發先生勛本無人臣禮大不敬又數其不法事數條士論壯之。是時華亭與新鄭相見舉朝俱右華亭先生亦右華亭攻新鄭未幾新鄭再相盡逐故與已有郤者以考功法中之先生亦在逐中。人謂先生官不過四品家無資斧何以娛朝夕而先生卜築堯峯之顛曰吾用是老甘心焉。癸未今上親萬典朝政一新兩京臺省文章蔚爲之下部議起先生南大理寺丞旋改左通政陞太僕光祿二卿都察院副都御史協理院事代掌京營戎政晉工部侍郎陞南京刑部尚書先生之副憲也不減給事中風度疏曰救時綱領要務曰保民裕國之議曰法祖聖修肆創皆其鉅者餘悉具鈔中上多所舉行又請皇長子出閣講學上大感動方命擇日竟闕中沮先生歔歔頗同類有不便者假譴語嘲先生先生曰余不能効力宣猷報國家厚恩以謀謀効昇平則吾何敢後志卒不變先生至南會當大獄力以沈寃釋滯爲已任亡何而病薨薨之先數日億恙然精神凝定口不言

外事既終形神瀟灑若屍解去說者謂先生生平力學之驗云憶余爲給事中薦先生有器宇溫粹問學端平恬約如處子寒素如儒生之句人皆以爲知言既余識先生始知曩所言庶足似先生萬一然先生之學大都以靜爲主以敬爲宗常教學者云無感時此知常寂一敬以存之有感時此知常照一敬以宰之便是神明其德便是戒慎恐懼以此教人亦以此持身所至以會友講學爲事至先生自得之深卒不能測其涯也先生生嘉靖己丑卒萬曆辛卯享年六十三祖某父某俱以先生貴贈通議大夫工部左侍郎祖母某氏母某氏贈淑人配萬氏封淑人側室何氏余氏子士溥廬園子生勝原任吏部左侍郎王公希烈孫女士清聘御史陳君子貞女三長適熊維持舉人熊珍子次許聘兵部左侍郎萬公恭子次許聘御史涂君杰子所著大儒學粹教吾族行世志伊學顏宗會禮訓三卷藏於家先生性孝友處家庭族黨一本於厚里中數有忤者卒不計人

皆頌先生休度懿行甚夥。不知先生潛心於道。萬劫種種。一切皆性中浮露。安足為先生頌哉。元標蓋嘗論豫章縉紳往者班班。不能殫述。觀水洲某。萬合溪某。其最著者。水洲在肅皇朝以諫顯。三諫三撻。遭際良苦。合溪官太常。沒十餘年。不能其。今其子餬口四方。又李蟠某。某官尚書。家事蕭索。何先單行之修也。先生幾水洲之諫。而無其苦。同合溪之學。而遇其遇。並蟠某之顯。而效其守。惜天不恕遺。使天未喪先生。吾安窺其所至。今猶幸天王聖明。令先生再觀天日。以愧魴賢奸相於地下。雖然。即使先生終老先峯。他日論世知人。不以先生之遇為加損也。於先生真憾。誰狀。

鄒元標撰 《願學集》卷六上

徵仕郎鏡川涂君墓誌銘 鄒元錫

徵仕君既已官秦鳳翔府經歷。已轉楚沅州衛如前官。官十年矣。仕有聲。人意君仕優且廢學。而君歸。日切磋於學。不置也。君恒言。人何可一息廢學。夫王事若龍。學

焉得習。孔氏弟子患之。況下此數千載。學與仕益歧。簿書期會。錢穀獄訟。勤居將往。無已時。仕於學何當。而何謂學也。今經生受學。嘗有造者。往往以離索久而怠學。問之曰。日理帖括訓詁語。而妨學。即如言。即學何時何地。得自致耶。以余觀徵仕君。宦久而日深於學。即官而即切磋於學。則知不患妨功。患奪志之言。尤信矣。自近學興。名世者務索玄窮。大以自蓋。曰。性命。性命至存誠反躬。恂言質行。若以為不屑為者。乃其言彌高。其行彌濁。其心彌廣。其識彌狹。其悟彌卓。其忠信彌薄。苟自快一席之談。若可凌前聞。侈後觀。而虛蕩之風愈煽。俗彌溢以惡也。乃今徵仕君。獨拳拳立誠反躬。言恂行質。造次於修學。顧不難哉。有言學。它可勉。乃剛柔輕重遲速得之性者。難卒變也。君曰。無自恕。有言事難如心者。曰。無有寬。有旁及釋典玄言者。則浮大白。謫之曰。何為讀非聖書。蓋君之學。自信於知寸行寸。知尺行尺。尺寸之失。不如此也。可與共學矣。抑且比有立哉。先是予從師



友講業天峯仙居間。君選二子來受學。亦時時來質學。既翹然奮已入銓。適先師在川。先生貢禮官在都下。同舍同寢食切磋。而君以有立也。君語及先師。必追悼慨慕。益以信學之不可已矣。君諱懋光。字伯明。號鏡川。其先進賢人。宋季團練使伯一公徙新城。國初登甲第者三人。曾祖某。進士欽曾孫也。祖坦軒翁洛。父梅。例官帶。未官卒。自君未聞學。執父祖喪能喪。事祖母朱母潘能養。比入官能官。世以資限士。君起例貢而官聲藉甚也。在秦視汧陽篆。在楚視會同篆者再。所至字民慎獄。清徑平賦。賑饑掩骼。政具舉而苞苴餽遺毫無染也。間勦秦回賊。議建縣。治楚五開填峒夷尤偉。當道下獎檄者十有一。撫按會奏薦者再。欽獎者一。嘻。君之能官。學之力也。官久且更陟。而君念母老。求歸養甚懇。監司挽留之不得。聽致仕。而獎檄沓至。多美辭。其大者以為居蓮幕。介胄歸心。八年一日。攝花封。閭閻頌德。萬口一詞。且謂其未老以孝養歸。為士林盛節云。然君歸瘵疾作。乃

無何卒。生嘉靖戊子九月日。卒萬曆乙酉六月日。年僅五十有八。第藉令君不能信一旦之決。少濡忍幾幸一還。不克一面母而客死。即目何能瞑矣。人安可無學也。君室孀。子世增。世陞。繼室楊。子世積。世慶。積少而端慧。余進君。君必令侍。令問經問學。予奇之。無何夭。予為悼痛。而君安於命。勉寬譬不過戚也。曰。令慧者不夭。則公俗。余季子亦慧而夭云。噫。達哉言。增婦黃。陞婦袁。繼劉。慶聘璩。增子曰大亭。女二。適劉宗源。郭子然。其某都某山。先期增。陞。慶以君從子世修狀來請銘。銘曰。君仕有聲者華耶。學有程者實耶。華不竟曜。實不竟成者。疾耶。疾不永日。而既有立。死不亡者。貞石礫礫。

（明文海）卷四四五

夏叟傳 狀定向

夏叟。繁昌人。下里田夫也。性孝友。忱恂。里人敬信之。吾友張觀山以司徒即左遷。主繁昌教。物色之。招與講學。

一日就山號於會衆曰。夫為學。學為人。而今須求為真人。毋為做人。斐憮然內省曰。吾平日修持為人者。得毋未真耶。時時循省。求所為真者。隆慶庚午。偕數友訪余天窩山中。與處踰時。一日忽對鏡。驗其貌。肖兄。感念淚數行下。辭歸。跪而請益。余曰。白下有焦子弱侯者。往與資切之可。既歸。從焦子游。因漸知向裡。久之。自信得自然。旨趣以書抵焦子。商正。焦子報書曰。要自然。便不自然。可將汝自然。拋去。他方世界也。斐聞而自省。謂時胞中若然。如洗云。斐故未事詩書。至是始請於焦子。請何書。焦子曰。讀四書可。乃日取學庸論孟。次第誦誦。時以己意詮解。萬歷戊子。斐曳杖來訪余於留臺。曰。此以焦先生教。請四書。閱諸註釋。中更不了了。懷弟將白文反身尋繹。覺有會處。敢以質焉。中庸曰。思知人。不可不知天。竊謂仁者人也。人原是天人。不知天。便不是人。何如能事親。稱孝子。又論語所謂異端云者。謂其端異也。吾人須是研究自己。為學初念。其發端果是為何。乃為

正學。今人讀孔孟書。若祇為禁肥計。便是大異端。如何又聞異端。又曰。吾人須是自心作得主宰。凡事只依本心而行。便是大丈夫。若為世味牽引。依違從物。即名學道者。不能自信本心。勑襲紙上陳言。換傍人口吻。此皆孟子所云妾婦道也。又一日侍。忽喟然問曰。天理人欲。不知誰氏作此分別。懷反身細求。理欲似難分別。止在迷悟間。悟則人欲即天理。迷則天理亦人欲也。余聞之大為嘆賞。曰。嘻。斐能及此耶。難言之矣。斐又嘗謂焦子曰。吾讀論孟。竊思孔孟之學同。其道同。乃孔子為至聖。孟子何未能與擬。蓋嘗疑之。近日反覆誦思。如論語篇中孔子自謂未能者也。謂何有於我者也。乃孟子七篇更未見有此類語意。毋乃孔孟之所以別乎。非與。斐諸詮解多類此。倘所謂以我觀書。非以書博我者哉。又一日白下同志會。有友詢良知指意。一友曰。良知非究竟宗旨。更有向上者。無聲無臭是也。斐憮然起立。抗聲曰。良知曾有聲有臭耶。余聞之大叱。嘆曰。近學之蔽於

虛無見也。陷而離矣。叟乃見及此哉。因述之以諭同志。惟昔茂叔之於李初平。近代大成之於王心齋。董從吾皆以隤然野老。坐進此道。而英敏才僞。博聞強識者。反遜焉。彼皆空空故也。吾黨可省已。

（國朝獻徵錄）卷二九

布衣儲山李公墓誌銘

夫布衣而能使人興起聯屬者。此豈聲音笑貌所能哉。予見儲山李公其人矣。公豐城人也。姓李。初名正已。字道希。後更庭止。字某。別號儲山。父某。母某。幼習舉子業。不竟去。而為江淮楚浙遊。大困。意豁如也。歸聞盱江羅公開講。乃以布衣見。羅公方與諸縉紳集者數十人。公踴躍至。羅公命童子取水浴。浴竟。登堂禮公。公目攝曰。世間有此縉者。梁漢子乎。禮之。公不去。羅公側目有所入。而道頓彌深矣。從姑山有一僧辟穀久。望見公。頂有氣如虹。隱隱上騰。異之以語見羅李公。公語僧曰。幸與俱來。僧曰。此當以刺達公。始至。所與見羅公語。載刻中論者。

非公惜後語。一日見羅公曰。四書五經是修身為本。註脚。公應曰。修身為本。又是我底注脚。見羅公亦為首肯。時聞公名而禮之為朝夕依者。統則有與。橫額京兆。陽羨則有史太常五池。趙則有大司成陶石簀在。三君子處以十餘年之久。而統與陽羨會稽藉以興起。從遊者甚衆。多語錄。另有紀。蓋公學從盱江入。不事粉飾。絕諸意言色相神情。直與千古映證者在。故以一人之心而能通諸君子之心。通諸君子之心以信多士之心。語曰。神而明之。存乎其人。默而成之。不言而信。存乎德行。公其人歟。倘公而彷彿假借。疑似回護。即率諸弟子賓賓而几席。秦越眉而南北者多矣。楊少宰周少卿贈公詩。慧眼雙開金不著。剛腸一副鐵難如。每對一尊頭獨點。時論千古淚雙流。之句。此不可觀公哉。銘曰。

學匪虛諱。誰會其宗。猗歟儲山。老至心融。諸方共學。六辟四通。不落言詮。石振宗風。跡阻心親。我思有窮。用銘玄室。以告羣公。

鄒元標撰（願學集）卷六上



明潛菴李先生墓誌銘

見羅先生倡學劍江。學者景從日衆。至身先師事。令同志益有所慕。明潛菴李君其選也。余在貴竹。有寄觀我堂集。余披閱之。與君答問語甚具。余一通刺就正先生。笑未余賜珠。幸得識公面。至與余語連數日夜。曰。見理須徹。原頭工夫不離日用。曰。程伯子後之聖人。達天之學也。曰。人生而靜。以上不容說。須透此。乃有歸宿。曰。人只是爲形氣所間。克去形氣。便是修身爲本。便是止至善。曰。心性一也。形而下便是形而上。曰。率性之謂道。順之則天。逆之則人。語甚夥。徐盱衡語曰。先學禁甚嚴。余欲上正人心疏。會病作不果。今其責不在足下耶。余領之。越歲。吳明府安節令茲邑。余折簡寄之曰。里有滅明君知之乎。曰。非所謂潛菴李君耶。余再四禮賓席。不赴。告余以邑中諸利弊。業已次第舉行矣。且方需之佐。吾理乙酉。余有改部之命。過江上。問明府云。君無恙。余時方避客。擬入都門。即請告。與君結盟而共學焉。君遂以病不起。

矣。上自部使郡邑。下至族黨閭巷。或咨嗟涕淚。曰。李君亡矣。思君不得。或旌其閭。或爲其所常遊處。或形之歌詠。痛堂堂大厦而棟宇之圯也。嗟痛哉。君令子廷准。廷喻先後過余山齋。傳君治命。屬銘於余。余不敢辭。余乃取余同年水部徐君狀而志之。君諱大昭。字汝潛。號潛菴。自幼有巨人志。從兄右齊先生。每以名儒期之。既遊庠。雖有聲諸生中。然心鬱鬱不樂。聞吉先哲倡正學。則津津向慕。會越中王龍谿寓白鹿洞。君裹糧從之。卒業凡三年。已聞谿徐公魯源行部至。君復棄學。二公皆大奇君。乙亥。李先生歸自粵中。首揭修身爲本之學。公取其諸書讀之。從之遊。已察先生危病中學甚篤。適齋戒。稱門弟子。遂謝去。諸生君意雖起。曠而行斤斤如也。丁卯歲大侵。出餘粟賑族鄰。而全活者甚衆。有詐幣回者。公不較。又有寄金者。暴卒。尋族子壁之。又有殺其僕者。公遣人告城隍。七日竟得其人抵罪。而瘞枯骨。周急難。無算。所著有程夫子全書。儒門定脚錄。事學日抄。困知記。



畧及歲餘論學書載於家終之先二日猶呼二子及門人講學大都不越與余前所語徐自題其贊有曰一點酸心千古事春風座下更誰傳之句題畢乃呼諸子孫羅拜正衣冠終於正寢公於生死去留間若浮雲往來太虛蓋生平力學之驗云家為邑著姓高祖養素以子冢宰貴累封都御史三傳為高國公即君父以文無害為操曹永仕母荷塘黃氏侍御公妹公其冢嗣也配北門史氏繼娶游氏男二長廷唯邑庠生娶甘氏次廷奇邑庠生娶蔡氏二子皆績學慎行克繼君志女二長歸邑前康生黃給子某源男三應豹應雁應鵬孫女一俱廷唯出公生嘉靖乙未年三月初六卒萬曆乙酉年十二月十五享年五十有一銘曰汲汲而求師也卒本於修身皇皇而仰止也宋之伯淳有言必偉有行必真蓋力學之大人非止今之逸民

鄭元標撰《願學集》卷六上

贈尚寶少卿袁公傳

公諱黃字坤儀曾祖頤祖祥父仁代有著述不仕仁更能詩書法趙松雪公少失怙苦學善屬文祖督嘉善父氏因補其邑諸生名藉藉起歲大祲嘉善許令問消弭之策公引洪範五行及管輅邵雍語以對令異之遂聞書院令高才生受經隆慶丁卯選貢入南雍舉庚午鄉試負笈者雲集指授文規往往得雋去萬曆丙戌始成進士時年五十三矣公學通古今談時務鑒鑒甫釋褐奉總憲劄典常熟宮坊趙公用賢共議清覈蘇松錢糧公上賦役議一曰分賦役以免混派二曰清加派以絕影射三曰修實政以省兵餉四曰查派剩以杜加賦五曰免協濟以恤窮民又清減額外加徵米銀十餘條蒙猶以不便已率為浮言眩當事沮格不行識者歎焉戊子謁選得寶坻知縣邑賦畝二分有奇諸役編派反倍之車運皇木役最疲公建議請棄漕艘未集由會通河運入而移皇木廠于三賢祠北使濱水受木且去京密通取給便當事為奏之報可因盡革重夫重馬採石及

箭手諸役省汴里甲銀兩正賦而外毫無擾焉。內臣開
厥督貢銀魚為民屬。公上書閣臣謂魚自海抵邑。又自
邑抵京。道紆鮮易敗。請由海濱馳至京。應上供。閣臣允
之。自是中貴罕至者。潞藩之國鄰邑。率賦多金為公費。
水淺舟膠留頓。則費逾廣。公令囊沙壅下流。水滿舟易
達。及舟將至。則啟沙囊更壅其下。不移日越境。邑地窪
下。比歲大潦。公浚治三空河。築堤捍之。海水時溢入為
患。令海岸多植柳。高數尺。潮退沙遇柳輒淤。漸成堤。因
于堤內治溝塍。課耕種。曠土大闢。是時薊鎮主客兵不
滿十二萬。而年例銀及屯田民運諸項計且至一百五
十萬。撫軍以公曉暢邊事。檄令酌議。乃列十事以獻。曰
草養軍之虛費。曰汰臺兵之冗員。曰謹撫賞之機宜。曰
定市馬之良法。曰復舊耕之額田。曰廣山林之種植。曰
興險阻之水利。曰增將領之供給。曰置輕車之便利。曰
覈器械之冒濫。又兵備王令議防海事宜及軍民利病。
公各列八款上之。語皆石畫。壬辰。以大中丞塞達薦。特

召為兵部職方司主事。適倭躡朝鮮。朝廷大舉東征。甫
到部。經畧薊遼宋應昌疏請督畫軍前。兼督朝鮮兵政。
冬月浮海渡鴨綠江。調護諸將。拊循三軍。提督李如松
大捷平壤。部下多割死級報功。公馳諭禁之。如松不悅。
自引遼兵而東。委守平壤。不畀一卒。清正兵來襲。公遣
麾下及朝鮮兵三千邀擊之。于南山觀音洞殺數十人。
擒其將葉實。如松驕而貪。輕騎獨進。經碧蹄館。為倭所
乘。軍大敗。退守開城。林東征二士錄大司馬石星意遂主
款。應昌入沈惟敬之言。支吾封貢。公亦以將驕兵罷。浪
戰非策。上書本兵言之。未幾。竟中拾遺疏。劾為令時縱
民通賊。草職歸田。十餘年卒。年七十有四。天啟改元。大
冢宰趙公星南追敘東征功。得贈尚寶司少卿。生平著書
甚富。多散佚。今惟兩行齋集。歷法新書。羣書備考梓行。
子儼。天啟乙丑進士。官高要令。卒。公博學尚奇。凡河圖。
洛書。象緯。律呂。水利。河渠。韜鈴。賦役。屯田。馬政。以及太
乙。奇門。六壬。岐黃。勾股。堪輿。星命之學。莫不洞悉原委。

雅以經濟自負、未第時嘗受兵法于終南山中劉隱士、又嘗服黃冠獨行塞外者經年、九邊形勝山川營堡、歷歷能道之。其贊理東征也、訪求奇士、得馮仲縷、金相置幕下。倭酋清正者、故薩磨君之弟、關白雖篡、心畏之、使嬖人行長將前軍、而清正為後繼。清正倍道取咸鏡、趣鴨綠江、時如松敗保開城、而經畧駐定州、前後皆阻、倭計無所出。仲縷與相言于公曰、清正輕行長而貳于關白、可撼而間也。公乃遣入清正營、說使釋所虜王子陪臣、退兵決封貢。清正果如命、即日自王京解兵東歸。據東錄先是、公言歲星厯尾、尾為遼分野、朝鮮屬焉。今色不青而白、此兵徵。然朝鮮得歲而倭伐之、倭將有內變、朝鮮必復國。迨後倭撤兵歸、關白死、卒如其言云。

論曰、公自言生平得力靜坐、然其學流入禪玄、好為三教合一之說。其以兩行名集、亦取老氏有無雙行之旨。故與管公東溟深契、而說書義解多與儒先牴牾。然其砭訛發覆、則俗學所未有也。語云通天地人之謂儒、公

雖未為醇儒也、獨不得謂之通儒乎。

李廓菴先生世建曰、公初為張文忠公正居客、文忠議正樂、依古法造密室三重、又依蔡氏多截管以候氣。不應使公視之、曰、候氣之室宜擇閒曠地、今瓦礫叢積、則地氣不至、一不合也。外室之牆宜入地三尺、二重木室入地一尺六寸、三重木室入地七寸六分。今皆不然、僅可固地上之氣、不可固地中之氣。二不合也。室三重、各啟門、為門之位、外之以子、中之以午、內復以子、所以反覆而固氣也。今皆以午、三不合也。聲氣之元寄之象數、必有自然之理。今所截衆管大小不倫、四不合也。天之午常偏于丙、二分有半、今日圭所測是也。地之午常偏于午、二分有半、冬至候黃鍾之管、宜埋于子之中、位一而已、豈可多截管乎。五不合也。文忠如公言、擇地天壇之南、隅飛灰果應。文忠欲屬公以正樂之事、公請先正厯法、語不合、遂謝去。公嘗受厯于長洲陳瓌、其法本回回厯、以監法會通之、更定律元、糾正五緯、最為詳密、號厯法



新書。

參稽前編《愚菴小集》卷一五

明儒碑傳集卷八十二

呂坤 趙用賢 曾朝節 王之士
王世懋

分守濟南道右叅政宜陵呂公德政碑

蓋聞五帝三王不易民而始治、近圻遠鄙、率胥訓而可興、方範則不受囹圄、耐型則難規脩器、稼穡尚教以可升、螺螄恒祝以肖我、况乎五方之產、元元之民、含靈蘊性、戴天履地、乃至衰惡醜營、恣誕佻俠、野爲疆肉、懦則悍使、絕滅倫化、罹觸彘意、是甘吾胞之赤手、不殊逆裔之羅鬼哉、良繇人上非薄斯民、據執官守、經畫衣于末季、昉立木於輓世、甚則苛罰猛制、密羅數咎、反鏡索朋、塵瀑責澆、是猶希蠢動于化人之盛、驅魑魅爲蛆豆之雅、所撻者背、所望者賒、斯以難矣、我分守藩伯宜陵呂公中岳纘秀、大河酌潤、良璞比其溫厲、益齊方其醇湛、少不好弄、長不踐跡、目絕非聖之書、識絲萬有之變、見道則程昆可參、諸治則賈生可二、乃又口不立手、門宗志不流于憤激、著書而旁采漢儒之註疏、爲詩而無取

李唐之華靡、心聲間發、天籟自鳴、郊廟朝序之典章、忠諫節烈之風采、疆域星野之大凡、殊方重譯之併列、簪裾竹木之近嫌、醫藥卜相之煩夥、六經耿其疑義、史秤逸其元指、靡一不探委窮源、殘脚走靈、窓戶洞朗、卷羅刀筆、自昔鴻寶充枕、論衡秘帳、方之我公、不過平背之一毫、大千之粒米矣、越自掄魁鄉省、上第南宮、泰古損其心精、閱時幾千委頓、一行出宰、再攬墨綬、襄垣據儒以文史、大同學軍以從政、兩地氓紳、立石肖像、狄公之類常藉、樂氏之社再瞻爾、用城內遷、時維小宰、清通簡要、王裴合燬、回翔華省、亦既數年、尚書安其公正、寮友樂共夷粹、門無刺謁、室寡賓從、也置却于千里、請託問諸水濱、程功校資、清卿在疑、而公耻不事事、邑黻終日、會當 主上責問天部、例有外除、而公抗聲力請、願塞明詔、恬顏舍和、略不爲動、用濟上爲淮陽、去汲公于禁園、乃公卑車就道、結組于菴、滌慮熏心、蒿目握手、衆視守臣如疾郵、而公則孕男占籍、以爲圖、俗謂維嶺爲專業、而公則官方民瘼之必稽、已下車而下記、諄諄千百其科條、尋按部而按圖、鑒鑒金石其計畫、大乃鉅榜、小



則卑詞。或言偈而意簡。若諸徑則指深。首崇鄉約。東布
成書。敦長吏以提衡。仍非時而案驗。中間主在。別白良
惡。風勵百一。城邑虛市。雄宇敗靡。講席基列。月朔日望。
披期蟻聚。不妨工買。率便農訟。各心儀乎。皇祖六言。
抑意懷乎我公。三天矣。頻年屢值歲凶。人莫必命。公乃
朝無喪著。宵不帖夢。捐瘠丁躬。號泣填耳。觸一事則出
一便宜。歷一方則增一响沫。繇匹夫而計。殫盡人之黃
白。緣派媼而法。周闔境之蠲糶。括萬姓于徑寸。顯千里
于十指。發倉倒困。傾帑竭輸。奏記之文。月以十計。猶未
厭其數數也。主於草根對皮。苦董毒狼。遍閱神農之書。
示以食物之性。亟在實枵。隨恐中惡。才矜溝斷。復念招
撫。振則虞其贅聚。籍則汰其人。類。死傷則時其湯。死
喪則掩其暴露。董訖則納之教導。自督則肅之伎倆。公
素神明奕奕。遂致氣力微微。人百其身。公百其慮。卒之
已瘦民肥。大東奠枕。荒政之役。公其獨奇者也。公恒念
夫不對不梓。不畜不牲。不蠶不帛。不績不衰。乃教我民
及時時種。栽幾本榆。幾對棗。幾株桑。幾畦麻。塲圃任園。
牛牧任郊。雞豚狗彘。阜蕃其物。盆簞筐筥。備其器。又

令貨劑結信。毋相誑惑。貨賄六畜。不宿于家。酌入以爲
用。成賈以徵債。廣而及于耐。穀城旦白。餐鬼薪。獄不輟
署。罪疑惟輕。厥維重愛書。持論不下。人繫我抽。衆倡
余否。是非非是。慨然太虛矣。齊俗誇詡相高。炫服吊奇。
練裙惜巾黃之色。男子襲桂結之制。六帖徵逐。飲食若
泥。家無儋石之儲。坐有兼珍之膳。是風競煽。本實寢微。
公則削雕對訓。寧儉寒澠。絲枲糧食。卒歲靡積。再年以
往。能無比屋洋洋者哉。余每惟夫上有泥膏。多不究下。
心竊感焉。乃見公之吏治而得師也。公制一令。則輒任
長。輒喻佐領。則草吞食。輒戒胥吏。舞文詭法。是故三十
餘城。長丞以下。目咽監司。心怵要束。吐康曉上意。猶完
破積習。此尤我公立政之大端。既試之明效也。那何曰。
往者公滋濡服才一年。所屬城百姓。卽有謀爲立祠祀
之者。僅僅十一耳。乃今且再期。而人無弗呂父。里無不
仁君者。政成積久。民乃以和。不虛也。初。民聚族而謀。謂
開請留。擬用累勛超拜例。不謂山西之命。我人失信。百
姓猝猝。莫知爲計。徒走悻悻已耳。唯是天不佑我。不腆
之齊。古有祖楚。移以詔晉。其可乎。公大抵作用一準中

庸不爲祿暴聲跡。又不一任寬仁。故所揮霍率無留闕。
屬者與公論事。公從容謂余。不見古人。安復古道。不復
古道。安親古俗。吁嗟乎。意念深矣。既當吾世而得斯人。
卽爲之所役。所甘心焉。公名址。字叔問。不佞侗。子感其
手。徵文者爲邑三老。孝弟其若干名。其不能載金而
尸祝之者。萬萬計矣。

邢何撰（宋書集卷二）

嘉議大夫吏部左侍郎兼翰林院侍讀學
士贈資德大夫太子少保禮部尚書兼翰
林院學士諡文毅趙公神道碑銘

趙文毅公之卒也。七年而克葬。葬二十三年而
東卹贈諡葬典始大備。又八年而崇禎六年。距
公卒三十有八載。而謙益始書其墓隧之碑。謹
按趙氏其先宋簡國良顯公仲談之後。其子中
大夫士鵬守江陰軍。遂家焉。曾祖諱實。徙居嘗
熟。祖諱玘。父諱承謙。廣東布政司參議。嫡母蕭
氏。母張氏。公諱用賢。字汝師。中隆慶五年進士。

選翰林院庶吉士。授簡討。萬曆六年。江陵張公
當國。父喪有。詔起復。公抗疏請聽終制。杖六
十。爲編氓。家居六年。以原官召用。陞右春坊右
贊善。久之。遷司經局洗馬。管國子監司業。又遷
右春坊右庶子。十五年。以詹事府少詹事管南
京國子監祭酒。明年。陞南京禮部右侍郎。十九
年。召爲禮部右侍郎。兼翰林院侍讀學士。教習
庶吉士。二十一年。改吏部左侍郎。兼官如故。未
幾。移疾歸里。二十四年三月十五日。卒于家。年
六十有二。葬羅墩之阡。公應廣嘗選名在第四。
穆宗皇帝拔置第一事。神宗皇帝爲史官。
長身聳肩。議論風發。突兀班行中。人望而識之。
江陵之起復也。公與編修吳中行。刑部郎艾穆。
沈思孝。進士鄒元標。後先拜杖。闕下。削籍里
居。江陵威權日盛。人咸謂禍至無日。公闔門誦
讀。意氣自如。公有女許御史吳之彥之子鎮之。
彥懼及。坐鎮于其第下。曰。婢子也。用以辱公。公
返幣告絕之。彥乃大喜。公亦不以屑意也。壬午。
江陵卒。朝政大變。上始召用公。當是時。吳縣
申公。新安許公。執政。江陵舊人。未汰除者。猶布



藏

滿九列見公等驟起田闕不能無內慚且忌而公與吳公起家詞林執政者惴惴然懷應侯蔡澤之恐會御史李植江東之故以攻江陵擢用不快於吳縣連章侵之新安大怒遂懷臂攻江李而其疏所謂意氣感激偶成一二事自負以不世之節號召浮薄喜事之人黨同伐異誣上行私者蓋專指公等也江陵威震人主奪情議起舉國保留若狂彗星出西南長亘天道路以目公等出萬死不顧一生爲國家計網害何謂偶成一二事江陵之餘黨蠅營狗苟皆皆惜之如頭目而獨以朋黨坐公等新安於是乎伎而偵矣公抗章請罷極言朋黨之說漢宋小人所以去君子而空人國者慮開讒賊之端遏仁賢之路騁報復之私消是非之公長誦諛之風來壅蔽之漸其詞甚辨而直忌者無以難益深恨公太倉王公亦以忤江陵起甫入朝上入不平之疏力攻江李其意亦未嘗不在公等也自時厥後交口沓舌明與公等爲難而公知必不見容求去不得遂引而南矣公之南也執政畏偏心倖其稍遲及其久次于南也海內望公旦夕

枋用爲之按手扼腕其語不絕于耳則又患而苦之吏部郎趙南星抗論時事謂不當以畱曹棄公朝堂爲之大閔執政雖責譴給事郎署之右公者終不得已而召公比太倉再相有三王竝封之命公極論其不可且曰錫爵初至之日慨然以開立爲第一事引而身任之乃御札之密封揭帖之獨進閣臣禮部咸不與知一旦諭從中出道路籍籍謂默有啓告致成此舉數千里應召而來曾未浹月踰旬而已業不難之疑錫爵之心亦豈能安於此哉疏上事得寢而公旋進貳冢宰與部郎顧憲成辨論人材以進賢退不肖爲已任物望益附公公故所絕婚吳之彥者太倉人也遣其子鎮飛章許公公當國者主之蜚語流聞中外洵洵公抗疏力辯求去章三上得請舉朝大開訟公者章滿公車咸報聞御史大夫李公世達御史弘濟吏部郎安希范刑部孫繼有譚一召皆相繼去符入高攀龍亦排宵人鄭材楊應宿希風吠聲又得重譴去於是善類一空朝右持清議者噤若莫敢發聲當路相慶數年來黨局始騷自今幸少得棘泗



矣。當時之傾公與慶曆中以孤甥女子之獄誣歐陽公略相類。歐陽終得白且大用而公一去不復。此可爲歎息者也。蓋嘗論之。公之見逐在癸巳而其械成于癸未甲申兩年之間。不獨公生平用舍之局決于此。而壬午以後四十餘年之朝局亦懸于此。何也。江陵既逝。執政之精神才術不用之。以及舊政國體而專用以枝柱公等。吳沆江李樹約于前。鄒趙顧高俠較于後。裁量執政水火薄射而公爲之魁。難乎其免矣。始坐公以朋黨既逐。公以婚姻竝一機牙也。故曰。公生平用舍之局決於此也。執政既疑公。舉不信海內賢士大夫。于是乎燈傳鉢授爲畱中永錮之法。以壅遏清議。消磨人才。公沒之後。正人皆不見登用。用亦不久。而所謂鄒趙顧高者。遂與黨議相終始。故曰。壬午以後四十餘年之朝局亦懸于此也。公爲人孝友誠信。公忠強直。未嘗一日忘君父。未嘗一念不在天下國家。雖嬉遊燕笑。酒酣樂作。偶語及之。未嘗不側席而嘆投箸而起也。拜杖之日。刲敗肉如掌。陳夫人腊而藏之。公意有所不可。嚙齒奮臂。輒從容奉

橫進曰。公且休矣。盡亦爲餘腊地乎。公爲之斂容嘆息而終不能改也。東南財賦甲天下。賦歛日增而科派無別。徵輸日急而隱漏多端。公訪求悉其利弊。在官坊。延進士袁黃商榷四十七晝夜。條陳十四事上之。執政不說。以謂南人不當言南事。終寢閣不行。在南雍修國學。舉遺賢復勛舊。送監之制。斥豪右侵占之地。郭文毅奉爲繁法。在南五年。亟請建儲。早教。元子及育。言官李沂斥閹鯨。最爲剴切。令公得行其志。竟其學。君子必進。小人必退。國本必早定。生民必乂安。而神熹之際。國家必無鈞黨之禍。公之不用。蓋昔人所謂蒼生無福者。而豈一人之故哉。公強學好問。老而彌篤。午夜攤書。夾案燃巨燭。窻戶洞然。每至達旦。其爲文章博達詳贍。尤長於奏議書牘。有文集若干卷。晚年撰三吳文獻志。國朝典章因革錄。未就而卒。公初娶張氏。早喪。又娶湯氏。能爲五七言小詩。又娶陳氏。子三人。琦美刑部郎中。余嘗表其墓。祖美國子監生。偶儻有父風。隆美敘州知府。以廉辨聞。女七人。皆歸士族。孫男女若干人。曾孫男女若干人。

琦美、隆美皆公沒補廕。先帝思公有功國本，又蔭祖美之子士履為中書舍人。諸孫皆競秀，而隆美之子士春舉鄉書。公之沒也，小人希富國旨，數尋聲吠。公子第凜凜懼禍，以故卹典逮緩，墓碑亦久而未立。觀於公之身後，則公之剛腸直節，頌頌於當世者，其又可思已矣。銘曰：龍淵大阿，剗犀截龍。遇彼柔蔓，鉅其鏐鋒。暨暨江陵蛟龍，豹虎禮變金革，權傾官府。公奮巨手，刺其狂顛。陽劍一麾，有光屬天。江陵以後，盤互杈杆。便文自營，載鬼一車。葛藤蔓草，孰斧斯之。冰刃霜鏐，將安所施。國家多故，黨論椽揭。天不祐助，人與奚孽。白日行天，大星隕庭。元氣渾頓，惘然上升。死為閻羅司，彼姦魑金碧之神，尅期來告。讒邪螟特，職競作羅。治鬼斯克，治人則那。虞山熊熊，江流如帶。朝濟夕潮，公赫斯在。徵于史策，質諸鬼神。凡百君子，眎此刻文。

錢謙益撰（牧齋初學集）卷六二

資政大夫禮部尚書兼翰林院學士掌詹事府事贈太子太保植齋曾公墓表

萬曆甲辰春正月辛酉，禮部尚書植齋曾公卒。

于京邸。計聞。

上震悼不舉，百辟卿士無不悲涕。越月，其嗣子廷棟

至自衡州，以卹典

請得。

贈太子太保、祭葬賜廕，咸如例。再越月，嗣子持其

門人大司成蕭公所為狀泣請表其墓。夫表墓

非古也，人子欲標其行垂諸石，俾過者式焉，亦

猶行古之道乎。余弗文，何以言。按狀，公湖廣臨

武人，諱朝節，字直卿。植齋其別號也。其先世自

敏學公舉應天鄉試，遂世業儒。敏生華，華生祚，

祚生寵，號龍山，是為公大父。龍山公以忠厚醇

謹立家，敦行孝弟，力追古道，以是鄉里重之。謂

曾氏後必有興者。嘉靖乙未，公應異徵，生于龍

興里。少英穎異群，甫十齡，能屬文辭。十七補弟

子員，食廩餼，聲藉藝林間。一夜夢尼父自天而



下其室、公拜迎之、覺來汗淫淫沾背。自是志學之念興矣。廿有四、舉于鄉。日奉二人菽水、絕宴遊浮華之習。卜第龍隱山前、偕弟朝符、朝簡肄業其中。未三年、簡薦于楚、又五年、符薦于北畿、人稱湖南三鳳云。乙丑、公車還自大梁、得古太極圖、測于蔡孝廉家、朝夕潛玩、心開目明、恍然有悟。聞徽有程天津者、王泰州高弟也、往學焉。相與究格物致知之旨、備極明確。天津嘗問植齋之義、公曰、節之植也、不直則不立耳。天津曰、人心卽性命靈根子、欲自立、當從靈根上培養、自然枝華葉茂。公益有醒悟。自徽延入家塾十有餘年、且群里中同志易僉憲蒙泉、劉問卿、仁山、廖孝廉密齊諸君子訂會証學、互相切劘。蔬水宴如、非公事不履城市、不見邑宰、遠近從游者益衆。一日登君山、指洞庭謂門弟子曰、不慎厥終者、有如此水。則公生平學問標品、蓋自孝廉時已定矣。及丁丑上春、官廬傳第三薦紳喜動顏色、咸謂得人。時少年爭務競靡、公獨以澹

泊寧靜自持。有以譎言抵侮、繞指權貴者、公尤恥之也。在史局凡九年、遷侍讀、典春試。尋以會典成、遷諭德、復拜國子祭酒、充少詹。比年遷南少宗伯、改南少宰、尋改北少宗伯、協理府事。侍皇太子經筵。值三品秩滿、充會試副考官、教習庶吉士。辛丑、仍充會試副考官、教習庶吉士。是年三品秩六年滿、進禮部尚書、充日講官及起居注。以二疏進、曰、靜、日中、數千百言、大端欲

皇上主靜、以立人極、執兩端、用中于民也。上嘉納之、置之坐隅、以備省覽。時

元良茂建、冠婚禮成、

聖明欲擇老成人教之以道、而諭諸德、于是以公侍講

東宮。其三加告戒之禮、皆公爲賓、意念深矣。公遇侍講日、則因事納牖、旁引曲諭、必歸于道。

東宮怡然聽受、每加首肯。公作駢語曰、殿上集龍夔。

東宮曰：齋中希孔孟。曰：孔孟之學何居？公對：博約之功爲要。一時遇合，誠千古所未有也。班侍七年，勤勞備極。

上注念方殷，期保輔之任，永贊重輪。會公步履稍艱，上疏引年，疏凡五上。

聖眷愈隆，賞賚愈厚。延疇之間，公奄然逝矣。嗚呼！公不可爲完而歸乎？公性至孝，奉二人先意承志，無不得其惟心。及襄大事，則秉禮致哀，無一不可爲世法者。處弟符簡，無論教之摩之力，學成名，卽仕宦以來，一甘一縷，無不與其者。然喜施予，好急人難，而尤篤親族、厚朋友，以故五服內外無不濡潤。公者，其律已直而方，廉而辨，恭而有禮。雖盛夏希袒露，雖夜起必御巾幘。敬脩之學，不墮冥冥，不啻嚴矣。而于接物也，和喜平恕，油油然令人如坐春風。而曝冬日，生平不面折人過，亦不宿留人，非故善者好之，卽不善者未嘗深相忌也。歷典文衡，所得士千有餘人，中多名儒碩彥。其教習庶常也，行仁講讓，敦朴崇

禮以示之範。六年如一日。每于正業之暇，必集坐齋中，相與究晰身心之旨，喇喇千言不休。卽詩歌吟咏，亦無非發明聖真而引之于道者。以故出其門者，彬彬質有其文學，不離矩規而步不失尺寸。一時士論稱之，謂儒臣門牆桃李之盛，無如公者。則公育才之功，異日利我國家豈渺小哉？公立朝二十有八載，小心敬慎，樂易敏恭，非堯舜之道不陳，非孔孟之學不講。當疚癘衰憊中，猶搦管解貞觀全史以進。及易簣之頃，猶手書遺言曰：有愧大臣事君之道。慎始敬終之心，予斯可想矣。公之學以主敬爲宗，以致知爲入門，以躬修爲神化。其見于身，驗于爲者，一有弗協，則曰靈根未透。其門人誄之曰：先生口之所言，不如身之所行；筆之所載，不如行之所成。善言德行乎？蓋公得于天者厚，養于學者遠，故處君臣師友之間，無不止于善者。雖當楚學紛亂之際，獨守正不流，翼經拔邪，其端屏息。公之有功聖門，又豈其微耶？嗚呼！公其精神在孔



孟其命脈在道統其胤育在宇內之英俊其子
昭在天日雲漢之表詎寧衡湘洞庭之間有者
乎公著述甚富行于世者有紫園集若干卷易
測若干卷臆言若干卷古本大學解若干卷餘
不悉書表其大者百世而後可以風矣。

朱廣漢《朱文忠公文集》卷八

明故中順大夫直隸河間府知府少菴王
公暨配恭人韓氏合葬墓誌銘

萬曆辛卯余得請罷歸而王公爲河間守也相
與把臂道左憮然言別明年王公亦罷河間又
明年其伯子廷對走數百里衰苴及門以壙石
請則公及配韓恭人兩月中相繼沒矣嗟嗟人
生地上夢也聚散浮沆其於夢境在儻忽之際
耳叔涕而誌之曰公諱之士字吉甫自號少菴
其先瑯琊裔也世居青城鎮六世祖賁徙家鄒
平官大同府同知高祖瑒隱德弗耀曾祖晟爲
博士諸生大父黃山公誥以明經爲鄆陵教諭
父復菴公陽爲諸生後以公貴贈中順大夫廬
州府知府母孫封太恭人舉公一子兒時老成
敏慧大父奇之携至鄆陵延名師授經文業日
進趙公孔昭爲鄆陵令大見器許歸補諸生爲
學使吳公維嶽所知選肄湖南書院益有名諸
公所矣隆慶丁卯舉山東省試戊辰登進士高
第選潁州知州撫綏振飭威惠流聞治行爲江

北第一。滿考擢南京戶部員外郎。奏績謁告親親。出補故官。遷寧國府知府。以外艱歸。服闋。補廬州聲施益振。三年奏最。再受策書。計且遷官。而操江中丞忽用忌者語。列公兩臺。不與聞也。公因歸卧不出。久之。長安諸公趣詣闕。補保定府同知。會河間缺守。按臺徐侍御奏公故二千石。任治煩劇。擢守河間。居一歲。河間大治。而念毋大恭人年高。謀欲歸養。撫臺宋中丞惜之。留不爲奏。壬辰大計。復被蜚語中傷。得旨聽調。當事亦不知所出也。公得遂始圖歸。視甘旨。若將終身。乃無何。不祿矣。悲哉。公爲人性資坦夷。色笑可親。推誠接物。不設城府。而事有操持。奉法循理。屹不可奪。數牧大郡。用廉明敏慎。所至見稱。釐革興建。皆有可紀。頗有軍尉某。橫恣不法。士民重足畏之。公廉其罪狀。論報。直指收案致法。郡中震栗。廬江界部有盜嘯聚。至數百千人。勢且不利。公發兵傳檄。深入其阻。盜遂解。郡境以安。河間直兩京道上。日有過客。公一切罷絕。

宴餽務爲節約。即故人所善。但以卮酒往勞。不煩公帑。河間城東南地溇。雨水流潦。方舟而陸。前守錢公橋於其南。惟城東未及爲植。公復爲五橋於東。連亘六里。民不病涉也。語具李中丞記。別駕治粟以羨金奉固。郤者三。固進者三。不忍其愧也。受而屬之主藏。適有平糴之役。取諸庾而賦焉。其廉而不劇如此。河間民婦趙年十六。無故而死。公手其牒。心動。如聞有嗚咽聲。亟使廉之。則姑與少年通。因緣謀趙。趙斷指自誓。窘之百方。益罵不從。姑介少年並擊之。斃焉。遂具成其獄。而旌趙之烈。郡稱神明矣。所至興學。右文。尉薦士類。恩禮甚備。其所甄獎多成科名。然公爲吏。以質行自任。不飾名迹。又好以繩法操下。聽讞比無所阿私。故常爲僚吏所憚。屢見中傷。出入二十餘年。官不過牧伯。談者惜之。居鄉尤有恩施。嘗舉子錢千緡。聞里中大饑。遺書伯子。盡折其券。門外貨肆有挾局而覺者。實無所得也。公愀然曰。彼貧耳。倉卒妄意室中。操空



質而對吏使終身不比於人吾不忍也。亟命釋之。先大夫言氏之裔貧而貨其墓石止之不聽。給其值而存之曰。此非君家所有。不得它鬻。其惠愛皆類此。恭人者同邑韓公璋女也。生而婉婉端淑。家人宜之。笄而歸公。執酒漿縫紉以奉舅姑。備子婦禮。公嘗遊學它境。歲時歸省。闔扉謝曰。兩大人躬督耕織。日夜作苦。猶時時遣奴持筭器食勞君。凡望有成名以顯而世也。晨昏之禮。新婦在是。君其無歸。既貴有錫命。僕使亦充。日三上食舅姑。修脯醴醢。咸出其手。喪其父母。哀毀泣號。悲感行路。曰。痛吾親之不食於其宗也。葬事之豐。踰於有子矣。內政嚴整。御下以慈。治生勤儉。身衣布襦。寸帛縷絲。皆有葆藏。至那給親族。則無所吝。撫畜諸子。備極憐愛。然能董其藝業。不使少弛。有父師風。賢聲著於里黨。公生嘉靖十五年正月十二日。卒萬曆二十年十一月十四日。得年五十有七。恭人嘉靖十四年九月初八日。卒萬曆二十年九月十一日。得

年五十有八。凡生七子。而成者四。長即廷對。邑諸生。娶衡府奉祀孫櫟女。次廷奏。禮部冠帶儒士。娶長史同邑呂克恭女。次廷擢。娶山西叅政高苑張修吉女。蚤歿。次廷薦。娶浙江副使淄川韓萃善女。其三殤也。女一。適同邑太學生孫煥然。孫男六。長鼎昌。聘元氏知縣新城張篤敬女。廷對出。世昌。聘長山庠生李邦澤女。圖昌。聘御史青城于永清女。祚昌。聘庠生孫載陽女。運昌。鉉昌。永昌。未聘。俱廷奏出。曆昌未聘。廷薦出者一。皆幼。余親公歷守五郡。不出燕趙吳楚。皆赤畿地也。燕趙之郊。政罷而俗悍。吳楚之間。民剽而法繁。及公爲之。皆若所素習。然則惟是悃悃設誠。不言而化。獨無如中者何耳。漢世良二千石如韓張諸公。皆歷四五大郡。所至有聲。徒以牧伯地重。不從旁制耳。令如今法。諸部使者用柱後。惠文交錯於上。而下吏操輕重其間。何以致理。効如所稱云哉。余既誌之。因銘之曰。天之夢夢也。孰是人斯而不究其庸也。民嚮其腴。

已集於枯。或銘之孟。或張之弧。吏安可爲乎。嗚呼。

于慎行撰 《穀城山館文集》卷二〇

南京太常寺少卿麟洲王公世懋墓志銘

王錫爵

嗚呼。此故太常少卿王公之墓也。公名世懋。字敬美。父大司馬嘗命之曰。吾聞東海有鳳麟洲。爾庶幾埒而兄乎。置其讀書之室曰麟洲。已而慕王君公之行。別置號曰牆東生。宦小達。思自抱損。更署曰損齋。然而學者稱麟洲先生如故。王之先自即丘子覽而下。世有聞人。至五季而有諱仁編者。爲吳越王鎮海節度衙推。官嚴之分水。曾孫潛爲宋左司諫。六傳至夢聲。爲崑山州學正。即其官家焉。崑山後割隸太倉州。遂爲太倉州人。祖倬。歷官至南京兵部尚書。爲弘治正德間名臣。父忬。歷官至南京都察院右都御史。綜督勦遼軍務。贈兵部尚書。爲嘉靖名臣。妣郁。太恭人。公少慧有英氣。應對機警鋒出。甫十齡而病。蔡大司馬憐之。不欲強以咕囁。乃公領益苦。私習爲文章。其師愧歎以不如。自解去。以補國子生。中戊午順天鄉試。已未舉會試。賜同進士出身。肄事兵部。當是時。公父大司馬在薊遼。虜方深入。而相嚴欲以是中之。逮下獄。公與兄鳳洲公欲上書請代。而大司馬聞而止之曰。上怒方熾。是沃之膏也。毋速我死。遂不果。

上明年庚申大司馬竟不免公兄弟扶喪歸廬葬之側朝夕哀奠啜粥茹素太恭人憐其瘠而手和肉養畀之弗食也比三年除服猶被白布單衣不敢與宴會聽音樂惟於詩酒夙所嗜以自陶寫而已時鳳洲公業爲海內詞宗而其同社友李于鱗汪伯玉諸公皆有盛名當世公最後出與倡酬諸公輒大驚賞呼之小美會莊皇帝登極公兄弟於是伏闕上書辭大司馬免久而乃白又會南省臺以公兄弟薦太宰固欲俱起之公乃奉太恭人命謁吏部選中途而報除南京禮部儀制司主事南曹事簡公得以其暇肆力於文文益工居無何以郎中袁病攝曹事而魏國公之事起魏公者老而無嫡子其長子邦瑞弗愛愛嬖姬鄭之子邦寧會夫人薨賁緣請於上以鄭繼封且謀爲邦寧奪長地會有旨悉按錄諸勲貴當襲者入國子習禮魏公猝急畏公議遂以邦瑞應時少宰林濂領部喜而謂公中山王之德遠矣能庇其後人不遠禮而諸爲徐氏居間者大失望乃給祭酒姜公曰邦瑞強年矣而始不稱胄子者何以邦寧故也且邦寧不爲嫡而何以母拜天子詰稱夫人姜公疑未決而返之儀曹儀曹復返之魏國魏國乃

以二子俱請林公甚恨之然無以難也公乃移書都督幕曰鄭夫人固妾也其應封與否非所敢論第邦寧之生在未封前則均庶也而邦瑞爲長何兩請之有林公大喜卒從公後邦瑞卒爲嗣魏國儲祿諸居間者緦祭酒亦坐誅誤罷而後以無賄白都人至今稱王儀曹不訛法也居歲餘遷北儀曹員外郎檢校宗牒詳謹無害會以太恭人病請告歸至池河聞訃以不及待疾哭數絕而薨癸酉服除補祠曹尋遷尚寶永會傳劉二御史上疏言事觸江陵大相怒下獄公與大理卿石公爲傳治裝爲劉營救以是失大相旨方奉命弔祭泰藩遷江西參議治南康公偏竊懼不免乃精心訊牒勤職業而御史因挾與俱之九江饒州時分巡者未至一切以委公公未嘗習爲及其治之輒精於是御史以爲材而異之尋入賀萬壽還遷其省副使理驛傳驛傳在江右最繁官其地者顧毀譽不能有所損而會時政裁抑冒濫則又奉行過當至學官有徒步出入者公爲令下諸郡縣表其平上之臺臺著爲令已給司篆及署分巡道當省會至繁殷公于吏事益習有所剴割曲當理情即老吏莫敢措手尋監秋試冬入計南昌令者以進士任



可五載矣。始用小荷辦得上官意。屢登薦書。以是益驕橫。直凌司府。莫敢誰何。公盡發其奸而去之。時藩司之從事者新。不能有所悉。亦一以屬公。當省臺大會。方岳覈二千石及黃綬以下。嚟自察公獨條對侃侃。太宰嘆曰。才難。不其然乎。今者睹淑事敢言。獨吾省藩長與江右臬耳。大相故知公材。聞太宰語。欲收之。會公感疾。上書乞骸骨。大相寢不奏。而山東學使者缺。太宰以風公。公力辭歸。聞化女事而慕之。以書自通。無何別去。公嘗決一父子訟。而父辟甚。公痛杖其子。且誨之。已乃命杖其父。其子前匍匐請代。始釋之。父子感悔如初。有袁帥者好偵諸曹。得其事嘆曰。三代不啻是矣。移視陝西學政。強就行。其所條約。東明暢藻雅甲他省。諸生欣得師。無何而有給事中某御史某故習余與大相忤。乃上疏指摘化女事。謂余與鳳洲公譸張爲幻。而留省應之。至波及公。業已報聞弗竟矣。而公慨然謂身爲人師。率即事弗竟。何顏復臨諸生。乃移文兩臺乞骸骨。而余命家馭亦自河南謝學政俱歸。久之。大相卒。太宰第詣道學使。此兩人俱上考。尋起公督浙江學政。辭不赴。甲申冬。復起督福建學政。鳳洲公謂公可以出矣。余處子又處。

無乃偃蹇。天子之命而傷地下心。于是公勉而之任。時大試期迫。八閩故材數一邑待試無慮萬人。而其鄉應紳所在雲集。意皆有所望。公一切謝却之。專心閱卷。甫三月畢事。所升汰皆服人。進其省左叅政。分守福興道。入賀。萬壽於道報遷今官。居金陵。雖甚適少事。特不勝士大夫筆硯之請。戶履如錯。遺余書。讀古人生我名者殺我身之句。意色怏然。然而無以絕也。性喜山水。且欲盡遠諸名勝。補昔遊所未足。緒成一家言。而公業以勞損成病。火灼于喉。寢食爲減。乃移狀於卿沈。爲具疏請下吏部。極稱公賢。姑予告治病。病痊。有司奏起用。如六卿例。報可。遂歸里第。明年四月。手書折產遺戒多理身齊家要語。檢理身後事。喪禮爲儉。令宅人積日計之弗及也。曰。吾自今端坐以俟期而已。屬歲大侵。餓殍盈道。公乃倡諸大姓行糴粥。全活可萬計。死者浮屠法濟之。沾沾喜曰。吾胸中更無事矣。然尚矻矻者。述有潘思子望崖內外篇。經子臆解。其課子姓。爲諸生較藝不息。而性稍卞善恚。將百日。病復大作。二日而粒絕。又二日辰興。命移席中堂。強起坐。飲少水。亭午。呼楮墨。手書一紙。與鳳洲公訣。大槩謂種種諸證俱現。恐在旦夕。弟性。



敏有膽決。加以學力定力。遂能輕死破惑。六親既以無情。即見兄如不見也。未復謂天下雖存。能獨服事。尚可為。惟願廟堂勿固。龍勿近小人。勿聽人言。使人過。諸君勿偏見。勿立黨。勿思報復。即死無憾。既緘書未發。迫與自力起。使人掖而據胡床。盥手與足。既畢。諸子問有言否。曰。四月書已盡之。復何言。不昏散否。曰。無念。何所昏散。翛然遂逝。公以嘉靖丙申生。歿于萬曆戊子。春秋五十有三耳。平生孝友。重名義。其施于稍裁而能不失。居恒不輟。為公府居間。問有之。必宗戚之困。阨不平者。若州里之利弊。不能控者。嗜義若渴。有所聞汲汲行之。遠誠長慮。悠然能見事後。少亦微有耳目之好。觸一語立斷。遣之。居官好為條教。煩不至瑣。尤能曲暢物情。因事為功。好提獎屬吏。即不至曠濫。未嘗不弘揜覆。以故多感之。少而通易。晚視學政。旁通諸經。皆能撮其大要。亦喜讀二氏書。恒謂吾于兩廡。喪亡所食。苟陰用其實。而陽誣其名。或假竊其似。而自文其陋者。俱耻之。以故望崖編諸書。要皆其中精至語。識者謂不下白香山。晁文元也。其詩文繼鳳洲公而起。世以北宋之二蘇所著詩文集共得五十餘卷。其間部三郡。則說。窺天

外乘二酉。委談學國。雜踈前已行人間。

（國朝獻徵錄）卷七〇

校記

①嘗熟：當作「常熟」。

②綱嘗：當作「綱常」。

③延對：後文作「廷對」，必有一誤。

④「恭人」下當有「生」字，文意方完。

明儒碑傳集卷八十三

張元忬 王問 孟秋 鄧以讚

潘士藻 管志道

張陽和先生墓表

嗚呼。此為余友宮諭張公子蓋之墓。余之獲交于蓋也。自嘉靖丁巳。與太宗伯朱公少欽同師事侍御俞先生之門。余長于蓋一歲。少欽長余一歲。三人相視稱莫逆云已。余與少欽俱成隆慶戊辰進士。先子蓋授史職。而子蓋隨以辛未登第。官翰林脩撰。余三人復比舍聯床。切磋究竟。宛如同學時。何其惟也。詎今萬曆戊子。而子蓋逝矣。嗚呼痛哉。少欽業為狀。以請銘於相國王公荊石。而後命余表諸墓。顧余安忍也。蓋屢操筆而屢廢者。久之。雖然。誰安能無一言以慰子蓋。按子蓋姓張氏。名元忬。別號陽和。先世故綿竹人。為宋相魏公後。徙家山陰。入國朝。而父太僕公天復。以仕顯。母為劉安人。夢文

昌降於庭。而子蓋生。古貌稜稜。雙眉戟立。識者已謂不凡。及長。嗜學。誦讀不倦。而慷慨負意氣。論議侃侃。常從太僕公於儀部。每每詢措紳臧否。時政得失。隱然已見激揚之意。揚忠愍公死諫。為文哭奠。詞意悲憤。聞者佛之。讀朱子格致篇。輒覆卷沉思。務求所安。已聞王文成致良知之說。恍若有悟。喟然嘆曰。學在是矣。自是日究心焉。戊午舉於鄉。時太僕公督學湖湘。子蓋罷計偕往。觀適年始歸。築融真堂於龍山陽。講學其中。後連上春官不第。而會太僕公有滇難。下石者蜩毛集之。子蓋以一孱書生力脫奇禍。蓋期年而吞吐蠻烟瘴雨中。叩門號呼。洎於父子相抱泣於庭。事卒以白。而子蓋之精力頓耗是矣。既入中秋。自以釋跼取上第。期有以自樹。無媿科名。稱聖明之遇。日珥筆館下。蒐金匱石室之藏。而研究之。詞臣雍容文墨。車徒戶簡出為高。子蓋獨聚徒講求世務人才。有得輒籍記之。至國有大興除。必反覆詢考。務協於一。會上御極星變。御史某以直言被放。子



蓋疏請復某官。且乞取彤管列女傳進講兩宮。語甚切至。不報。無何。聞太僕公病。給假省視。歸。躬湯藥者十閱月。而太僕公卒。子蓋哀毀骨立。杖而後起。免喪。起家同修會典。已充內書堂教習。昭鑒訓忠。期埏埴正人。以脩僕御之選。蓋有古大臣之思焉。已又充經筵展書官。代單文官誥勅。直起居注館。會皇嗣生。奉書告楚中諸王。匡廬沅湘武夷諸洞天福地。足跡靡不遍。至必有會。會必有記。使竣。以便道歸。觀太安人依依膝下。不忍去。而太安人戚色替之行。行不數舍。心忽動。馳歸五日。而太安人不起矣。前後兩喪。皆以歸侍得躬舍殮。人以為孝。感云。再免喪起家。用詞林久次。擢春坊勸德。清理武黃。尋充經筵講官。既入侍。見上津津嚮學。時齋顏色。納講臣諷勸。退而色喜。謂宗社幸甚。庶幾抱微忠。伸末議。靖獻於萬一也。初。上御歷。覃恩。太僕公以坐誣被黜。不得與。子蓋疏白寃狀。請移恩。太僕公詔予冠服。至是。復懇疏以原官請。上以其違例。漬奏切責之。竟不許。子蓋大

窘。伏地慟不休。痛湧洗之不行也。控籲之無地也。烏鳥之私格而貫日之誠微也。竟伏枕奄奄。尋至病革。時余遭大故。踰伏苦塊。惟少欽守邸中。得與子蓋訣。啟手足示之。呼陛下者再。且曰。朝廷亦多有人。張目拱手謝門人之請。遂歿。嗚呼。詎謂子蓋而止此邪。子蓋少負奇稟。忠孝大節。明發不忘。自總髮以及艾。行已守官。耿耿為宇宙奇男子。而尋厥本源。則良知一脉。逮宗文成。而體驗實踐。自得為多。每謂學者皆說良知。不說致良知。去師門宗旨遠甚。又曰。上智即本體為功夫。下學用功夫合本體。其起悟融釋。表裏洞貫。不讓諸入室弟子。而矯偏救弊。以羽翼師說。則子蓋之功有焉。尤惓惓接引後學。成就人材。性剛直。嫉惡如讐。至於獎善。常若不及。如後文公文成兩賢祠。祀四鄉先生於學宮。議條鞭法。便於民衆。建龐公去思祠。推創法之功。以示不淫。皆本于盡力也。居恒負天下志。問偕鄉先生譙集。胥目子蓋為黼黻中人。願以古名臣傳及國朝經濟錄為相業助。子



蓋莞爾曰。忤微先生寵靈。得事明主。執秦誓一篇足矣。其自任之重如此。以故一時內外搢紳。莫不以伊呂罷歸之。而子蓋亦不復固讓。至處權勢實間。不激不隨。漢如也。文章春容爾雅。粹然一出於正。初太僕公作山陰縣志。既成。子蓋為續其後傳。又修會稽縣志。紹興府志。義嚴家鉞。稱一方信史。然並出張氏父子手。人謂有班馬氏之風云。撫異母弟恩義備篤。尤厚於親族。待以舉炊者數十家。孤寡老弱婚喪皆有給。越俗浸尚奢靡。居喪燕賓崇佛。子蓋以禮節之。若為家法。人多化焉。衣必重紵。飯僅脫粟。子弟稍不如指。輒譴讓不已。子婦有服珠玉文綉者。立焚之。暇則率諸孫歌詩堂上。陶然自得。人莫窺其際。大都從虛明中一竅作用。無失其本來者而已。余嘗謂少欽縝密。而不為子蓋剛毅。而有必為。皆任道之器。而余以淺衷弱植。左右二公間。庶幾箴砭薰培我也。而今子蓋逝。失一良友矣。可勝痛哉。子蓋以五品終。格於令。不得請諡與贈。越三年。吏部鄒君元標

以子蓋請。得如羅公倫例。以為不埋科名者勸。少欽狀子蓋謂後必有表章之者。不謂近在吏部也。子蓋可無憾矣。子蓋娶王安人。純德懿行。著於內外。子汝霖。汝懋。諸孫五立。所以紹休嗣美者。且世世弗絕。皆子蓋之所留也。爰碑刻石。用填余思。以詔來者。

（明文海）卷四五

仲山王先生傳 其起

嗟夫。經以載道。古者講經。即所以講道也。後世講學之名立。於是始目經為訓詁。而與道遂岐而二。自八閩虛齋蔡公以理性之旨發明經術。務與前儒相統承。而士始有所準。繼此而紫峯陳公。次崖林公。各以其學專門為書。而經學益著。然其書亦互有得失。而未能的然不詭於聖賢也。至我仲山先生潛心理窟。闡揚經旨。本三公之說。而折衷之。著為定論。學者治經。欲求通於紫陽朱氏。以窺孔孟之藩籬。舍是其無蹊徑矣。今其日抄講意諸書。托剞劂以行世者。可具論也。厥功豈不偉哉。先

生王姓、諱問、字子裕、學者稱爲仲山先生。比沒、又私謚曰文靜云。先生父曰樂莘翁、以經學師邑中、而伯兄計部公夙有文譽。先生無他傳、獨父子兄弟相師友、願敏絕人、得父兄指授而精詣之學益進。髫年遂與兄齊名、相繼登薦。嘉靖壬辰中式南宮、引疾歸、請書山中、從遊者日衆、學益大進。戊戌廷試、賜進士高第、授戶部主事。丁內艱、服闋、補原官、以便養。乞南、改兵部、尋轉車駕司郎中、擢廣東按察司僉事。行抵桐江、乞致仕。時先生年甫五十。當事者夙才先生、欲大用之、而乃決策引去。無幾、微還、回顧望事、蓋欲修色養之孝於樂莘翁也。比歸、日奉親遊、遊凡可以娛悅者無不至、而與計部公白首怡怡、情愛彌篤。孝友刑於鄉邦、大爲觀風使者所欽仰。薦疏屢上、而先生若不聞也者。夫篤於至性而爵祿曾不足芥其衷、則先生之學非徒空言也哉。家居却掃一室、焚香靜坐、上下千古而一切世故澹如也。時徜徉山陽水涯、與漁樵伍、築室寶界山、極幽人逸士之致。又於

東郭構綠蘿菴、招名僧居焉、講出世之學。扁舟几杖、往還湖山間、人蓋望而疑其仙云。絕跡公府、監司郡邑守相莫一面爲快、注意傾下。先生折簡相報、或短詠數言而已。先生雖不久於官乎、而其所設施則有卓然可紀者。由戶曹視權徐州、力刷積蠹、而又權舉貴賤、以本折配、吏咸平稱便。在南駕部、歲修馬快船、諸軍最苦帶中、往往逃竄以死。先生憫之、爲白大司馬、疏請官造、不以煩軍、遂不復有帶中累。其他請營房、覈軍籍、嚴查軍政、優快平船、月糧、經畫鑿鑿、迄今著爲令。而獲免帶中者、則家尸祝之。先生之經濟、此足以窺十一矣。先生自少至老、未嘗一日廢文學、四方負笈者雲集、開示指要、疊不倦、莫不虛往實歸。藉先生之教、以擬高第者、接踵於時。然要以立身行己忠孝爲本、不僅事飾繪已也。郡先達文莊邵公道、德文章表一時、而太守喻公、中丞唐公、學憲薛公、並以經學稱海內宗匠。先生始從喻公遊、喻公謝以不及、乃師事文莊公。一見輒稱許、曰異日子



不予讓也。已與唐、薛二公友善，雖學術行誼動相頡頏，而至其超然出處之際，則二公不無心服退舍矣。先生形癯神清，體不勝衣，而志甚勁，色溫而莊，無悅人之容，然久輒自醉。與人文情溢於文，而尤篤親故，調恤無間。馭左右甚嚴，乃其體恤又甚至也。天性澹泊，無嗜好，惟以翰墨自娛。詩冲澹入陶、韋室，字遒勁得晉魏人法。間或點染人物山水花鳥，則神形兩至，即專門名家不逮矣。楮墨流傳，幾遍海內，寸箋尺素，人競珍之。蓋先生之學無間，精粗咸潛心究意，故雖一藝而其工至此。先生勇退似錢若水，而才略過之。冲雅若杜祁公，和厚若邵康節，而浴沂風詠之趣，使得遊於聖門，則當與顏氏子者翩翩而並駕矣。嗟嗟，可不謂有道之士乎。某在門牆，辱先生知愛最深，嘗手書相勉，謂他日衣鉢當以付子。某深愧焉，方無聞，大有負先生。先生沒而冢嗣吏部君以傳見屬，夫子方負先生自規，而又烏能傳先生哉。然知先生而能言之者，某又不敢辭也。故獨推本其經學

之詳，撰次為傳，而使後人知淵源所自云。吏部君名鑑，方以文學經術顯於世，是足繼美先生矣。

《明文海》卷三九八

奉訓大夫尚寶司少卿我疆孟先生墓誌銘

今東魯仁賢彬彬矣，力承正學，我疆孟公其最也。公在同志，依公如魚之於水。公亡，同志悲公如岳之摧峯。斯豈偶然者哉。中州孟君叔龍與子於公最契，叔龍嘗已狀公，謂子當銘，子不敢辭。君諱秋，字子成，世居莊平，學者稱我疆先生。自幼凝重端淳，讀詩書即通大意，不為訓詁所束縛。里有宏山先生者，風志陽明學，公贊而受學。已巳恩貢入太學，庚午中京闈，卒成進士，授昌黎令。昌黎疲而殘於兵，公一意和惠煦育，興條編，修城堡，振文教，收孤獨，皆德政遺意。初人或謂其迂，久而曰：公固大儒也。上下交相信慕。陞大理評事。公悉心平反，賢聲大著。會山海關部司缺，人柄臣違公往，特頒勅許公便宜行事。公至，因緣為奸利者屏跡，而先是溺其職

者遂以蜚語傷公。公被計當調不赴。乞致仕歸。公之歸也。與妻孥人共駕一牛車。旁觀者掩口笑曰。昔鎮是者黃金滿載。身名俱亨。今自苦如此。而不得安其位。庶更安可為也。公怡然歸。陋巷單瓢。若將終焉。會時政更新。起刑部主事。積陞尚寶司少卿。卒。公之在都門也。一以會友興學為事。所論學諸書。具于刻。我彙集中。其最要者謂心非血肉之謂。未發不離已發。謂孔門學惟志仁。不論克己。謂惟了自己。即是聖人。皆上副先儒宗傳。無論世士色取行違者。不敢望公一塵。即號大儒。履繩蹈矩。而以意念為實得力地者。敢望公渥渙哉。公最留心國家事。世或以儒病公。使得竟公所為。世必享真儒之效。而公位不構施。知公之深。人人扼腕。雖然。孔孟大聖大賢。亦未得竟其志。然其學照映宇宙。孔孟固未嘗亡也。人心不死。公之學固自有在天之所以用。公在彼不在此。公生卒年月及子嗣。具孟君狀中。不具載。銘曰。嗟彼世儒。意念自持。生滅遺續。影響主離。

於鑠先生、能自得師。天聰天明、廓然無知。身有準繩、行無瑕疵。政追上古、黎民遐思。未竟厥志、斯文在茲。聖學有的、眎我銘辭。

鄒元標撰 《願學集》卷六上

明嘉議大夫吏部右侍郎兼翰林院侍讀學士
贈禮部尚書諡文深定字鄭公墓誌銘

夫宇宙有至道焉。匪至人弗會也。嘗讀子思子曰。苟不至德。至道不凝。似以道與德而二之。終之曰。上天之載。無聲無臭。至矣。至則真矣。夫道者。蹈之。與民共由之也。德者。得也。身所獨到。心所獨契之謂也。凝則形神不分。聲臭俱泯。與道合。真古今一息矣。定字鄭公墓。凝道畢世者也。公名以讚。字汝德。學者尊為定字先生。新建青崗里人。青崗卜居自成。和公始。和生瓊。瓊習靜菴中。夜半忽生蓮花。紅光燭天。四隣驚為火。走撲之。則紅蓮也。始異之。卜者曰。茲地其有至人挺生乎。瓊生綬。綬生富。



隱德弗耀。富生明。寧庶人奇欲觀之。匿不就。明生儼。茂子擬首薦。不果。是為公父。以公貴。封翰林編修。晚以伯子衡州守貴。贈中憲大夫。公自幼簡默。內耽常閒。編修公與人論學。輒牽衣尾其後。間出語。類風儒。而復勤學。公憐其幼。扁之斗室。公遂習靜。斗室神情益瑩。出而曰。心之精神謂聖。千古聖賢只此一事。一貫吾夫子宗旨。多聞多見。引人法耳。間以所得者發之制執。少年未之奇也。洪溪東公驚而語曰。是兒終當以學鳴天下。督學敬所王公。謂以聖賢心發經傳旨。吾道主盟其在斯乎。大奇之。丁卯舉於鄉。辛未舉進士第一人。初江陵為主考。閱諸首卷。不省而置之。晚得公卷。曰。刊落鉛華。獨存大雅。業已奇公文。接公儀。復冷冷抑抑。如玉如金。江陵神為悚。歸而伯子問相國狀。公曰。相國必大有為。但恐緩急弛張。絳韋不佩。未知所終。伯子怪其語。而今果驗。廷試賜一甲第三人。官翰林編修。未嘗妄有交遊。取于茹荼忍寒。童僕方啾啾。敗絮中。公起以殘指膏火。燃指

哦曰。不是一番寒徹骨。爭得梅花撲鼻香。初服官時如此。亡何親改元。新鄭逐逐。遂將眷眷多事。公過江陵。時有匡拂。江陵弗善也。遂移禪刹。以病請。江陵持不下。遣子就學。已聞封公病。始從公請還里。封公逝。親為含飲。服闕。有終焉志。丁丑。強起。至武林。念太夫人未偕。遂歸。時龍溪王公寓西湖。羅會稽。張山陰。兩翰撰約公對龍溪精舍。龍溪曰。何功。公曰。此體無止。即以無止為功。又問曰。信得良知不。曰。新建云。萬死一生得來。豈敢置疑。惟是以知是知。非為良知。竊恐學者妄認耳。龍溪素心服。已而備語談公。公曰。天也不做。地也不做。聖賢也不做。龍溪曰。秀才家何得如此大言。海內人復以公必能光明絕學。而江陵奪情後。橫政愈甚。羣望公出山。言庶幾有入。已卯。一就列。公竟不入。遂還里。朝夕依太夫人側。諸縉紳罕親其面。惟昆弟朋友互相切究。友以用世違者曰。學不到舍我其誰。終非天民。書屏几曰。天則不言而信。神則不怒而威。用世一番。須令天地變化。草木

善始為不負。然其功實基於潛。如龍不在能見能飛而在能潛。倘乘雲霧上青天。人窺一鱗一爪。何以霖雨天下。易之密。書之微。詩之綱。皆是義也。客生偶有齟齬者。即省曰。我未誠耶。澄心半刻。客竟易顏。常曰。我常虛而人不礙。我不留而人自化。又曰。從氣上起。終是平夷。從性上發。自關中和。其虛明若此。居家臺省。則無五日。戊子特疏起。纂修不赴。辛卯。詔起。官允。管司業事。疏辭。已拜南大司成。公疏云。文廟之祭。以元長舉其酒。謂之祭酒。多士之業。以師氏考其成。謂之司成。夫孔訓莫先禮義。以冒進之心。其禮必不享。士習莫尚恬退。以躡等之身。其言必不從。以進之心。為退之跡。既前史所重惜。居爭之實。蒙讓之名。亦造物所深忌。將使不肖以臣為趨。滋仕路機變之巧。抑俾賢者以臣為戒。掩家庭真切之心。此豈修職典。開賢路。初指乎。奉旨不允。始勉奉太夫人行。至則有謂公者曰。南國士跳弗馴。宜嚴公至。多士洗心以聽約束。常示諸生曰。吾非不欲求諸生愧我所無。

也。亦非欲諸生懼我所有也。願以神情與生相交勉。諸生體然頓化曰。熟成內臣。且有聞先生名。過而謝罪者。我輩違先生約。不得此為人。公自是益信曰。嚴必律身。始律身弗嚴。誰能悅之。方其久與多士造。或有補益。晉南京禮部右侍郎。吏部右侍郎。方大計。公以天自誓。即故人親知。不一顧。時溫三原冢卿。陳餘姚。朱益都兩總憲。皆海內名德。同心共濟。計籍出人。共稱服。亡何。署禮部事。疏請建儲者至再。忽有三王並封之旨。公疏云。天之不言而信。由今日明日。今年來年是也。故信也。自諸冊立以來。茲數奉聖諭。舉行典。然皆指皇長子耳。未嘗言侍嫡也。今驟而傳之人。創而聽之。故不勝其異。至以凡人之見。上窺聖衷。而以為非情也。皇上以天自處。身度聲律。萬萬非以虛辭示天下。但臣等竊詳聖主立嫡之條。謂有嫡立庶。斯為清倫。非必有待也。若大典一行。主器有托。皇祖在天。實所欣鑒。臣等又竊聞中宮鍾愛元子。朝夕保護。不啻已出。願早正春宮。猶切於億兆臣



民萬萬。皇上以厚中宮而緩冊立。或者未諒中宮之心。臣又聞古之帝王將舉大事。既內決於心矣。必謀及卿士。謀及庶人。無所不從而後行之。蓋有見於人心不可拂也。今日並封之旨。至使人心不能釋然。安在其為順天下也。且信者國之大寶。帝王所以使天下精神相通。指臂相使。恃有此也。皇上即位以來。何令不信。獨建儲一事。屢示屢易。人將謂詔令可更。法守可玩。自是令一出而疑隨之。指臂不屬。從此始矣。時疏不知其幾。獨贈史公語語血誠。轉吏部右侍郎。兼翰林侍讀學士。公復疏云。昔人所稱餘糧。謂澄汰流品。養重也。如以病人充之。精神不強。孰別必混。所傷滋大。臣又聞昔之為吏部者。多務獎恤。遷斥浮競。蓋以開廉恥之心。塞遠化之路。臣林壑病夫耳。皇上通聽廷諸臣言。再蒙召起。遠化其如臣矣。不復自量。與聞餘事。身範不肅。將使賢者以臣為戒。不肖者以臣為趨。辱命益甚。安在其用臣為也。不得已從公請。讀疏者謂其疏既移世軸。其功甚大。方

計所夕名。一親太平之盛。亡何以太夫人謝世。過哀感疾長逝。先是病宿郊寺。知友強之歸。僅存殘息。道路是虞。乃抵家。正衣冠坐曰。奇事奇事。諸婦問此處見學。曰不敢不勉。遂端坐逝。自都門以及走卒。人人無不心焉者。此堂聲音笑貌。能盡守臣以聞。詔贈禮部尚書。特諡文潔。賜祭葬。廕一子入監讀書。蓋殊恩云。昔陸象山自幼即悟宇宙吾心。公自少即悟心之精神。謂聖王終身日化月融。精密廣大。高明篤實。所與諸生語及楊少宰諸士。載佚稿者。皆發前人未發。世儒罕瓊者。不足論。即以道自任。妄以色相莊嚴。去公之旨遠矣。人觀公六十猶慕一生傍母。輒以公至仁純孝。不知公不自以為孝也。觀公半生林壑。過然陋巷。輒以為廉靖孤介。不知公不知其為介也。人知公衾影無愧。一門揭揭。以為內行純備。不知公故然不自足也。此皆公妙明性中流行。時而發之。使公得大行所學。以一性遍覆海宇者。可限量哉。常思漢時斯學。便晦遂以憲北顏子。予每窺公深

潛純粹、曉夜端坐、忘疲、即當時顏子明道不知何如也。夫人語及天地聖賢、望而震焉。公曰：姑舍是。與龍溪密未竟其說、以予違之、即先天不違、行地無疆之謂也。即為仁由己、不由乎人之訓也。天地且不違、我何必法天地。仁不由人、我何必師聖賢。此公未竟之旨也。恐非汪汪千頃波者所能窺也。元某性最愚不善、下辱公心背交深、深觀公執為心降。公沒念及、不自知涕之無從也。嗟夫、至人之生豈容易哉。封公當魁而僥失之、以醇德隱儒林。太守公為郡邑、永操實政、老猶粹修、不急第諸生穆然大雅、不知有兩兄貴。家庭和他德、所醞釀者深、培植者厚、天之於公也、篤公之於世也、究世有真心求道者、公其正鵠矣。公生嘉靖年月日、沒萬曆年月、享年十

銘四

聖主側席、詔起東山。屢疏乞身、海宇望殷。勉副君命、解袂賢關。出擁羣比、入奉慈顏。言位餘衡、言掌邦權。惟實惟清、世氛若洗。公乎與論、名揭殿陛。羣推德望、師師以濟。臣也有母、疏乞桑梓。望公之起、萬有同情。遭時之否、而公不起。士患梁萎、人歌蒿里。蕩蕩江流、誰窺涯涘。堂堂大厦、其將誰峙。猗歟我公、何仗何求。其身則隱、其神則幽。起居食息、惟道是謀。夢寐神情、與天者游。沉潛邃密、見孔於卓。繼往開來、昭明絕學。淳深粹穆、不彫不琢。一代山斗、巍然先覺。憐予孤愚、道義情真。如輻倚轂、庶幾古人。公今往矣、淚落伶俜。每一念公、願贖百身。平原正直、光輝萬寶。微言細行、皦如天日。撫辭銘公、一言匪溢。誰哉傳史、監此直筆。

鄒元標撰《顧學集》卷六上

尚寶司少卿潘君士藻墓志銘 潘國集

自吾師天臺先生倡道東南海內士雲附景從其最知名者有蕪陰之王德儒芝城之祝無功與新安之二潘潘之字朝言者既以絕世之姿不究其用于時以死而與吾輩遊獨去華氏爲最久當是時自天臺教外旁出一枝則有涇陵李宏甫去華並師而嚴事之吁其盛已去華諱士藻學者稱爲雪松先生世居婺源之桃溪家爲仕族嘉靖中少司馬珍者旦少司空希曾大司空鑑大司馬潢鼎盛一門卽崔氏之重笏累載不足多也君父法以君貴贈如其官母胡封太宜人君舉萬曆癸未進士少以孝友顯鄉里已以直諫顯朝廷乃什而起而爲符卿官禁近稱顯融矣而卒道遇不調以初以彼其志曾不究百一而又太宜人年餘八十子職未終宜君之不勝以死也嗚呼痛哉君爲人磊砢有大節與人言必盡傾望而知其君子也而尤自負人倫之際所至必交其長者每得一人推挽之使盡其用而後已其人或頗蹟瀕於危人皆引避或陰擠之君必反覆疏雪以身保其無他以故君坐展常滿朝廷之上莫不爭知去華者億君始舉進士一日過余曰余于同籍得二人問之則

近左蕭君汝芳嘉沮將君照也後二人爲郡縣錚錚有聲皆以彊項受奇禍君又力爲牽復今二人皆知名于朝爲賢士大夫者君力也其司理溫州也衛公承芳爲守與他丞倖皆賢士皆與之鳴于唱和若頃麓然而郡事大治別駕王貧且死君賑其孤又移書學使使祀之鄉賢祠其與人交有終始皆此類君以戊子徵授御史巡視北城有二閹闢出官門戲良家女婦干振者執之無辜聞而命之去君謂若好出討簿脫汝矣不聽君移文司禮司禮以聞上怒曰東廠職何事而事自外廷發邪命杖二閹斃其一自是諸中貴洵洵思必報而大瑞職東廠者亦以故銜君矣獨以火災陳言大瑞被摘君疏中不可使聞於左右近習語以激怒上謂君歸過責直上怒甚幾欲杖之廷竟落三階調邊地于是得廣東布政司照磨以去初君之被徵也晤余南都余謂君必爲諫官爲諫官要在培植人才許與氣類無事翹翹一鳴以塞責也君首肯余言既至都授御史君方錯綜時事莫以次第上時都君爾瞻里居獨心異其不言既而聞君家謫乃嘆曰眞吾友也噫余方以輕擲戒君而爾君以速去服君何邪雖然當是時中貴之焰未甚熾



也。使君說得行、內廷累息、安得驕揚博掩以豪奪吾民至此哉。乃言之未用而第收其名、明乎非君意矣。辛卯、始改刑部照磨、兩瞻亦自銓部調至、旦夕相與講學問政、愈其驪也。壬辰、晉南吏部主事。七月、改尚寶丞。君既以諫辟起、爲中朝所屬目、又性侃直、觀時事輒扼腕不平、惟有力者始思中君、故君言尚寶久不從。獨關西李敏肅公深知君、詳于家宰孫公、調之吏部、而君辭甚堅決、第舉南中召流目代。若前考功郎蔣君時榮、今尚寶卿劉君日升、尚寶丞葉君茂才、皆矯矯推重一時、其它多未易悉數。方君之辭吏部也、李公曰、固知公不欲、然士論所爲屬公者、以此君正色曰、公直以不欲吏部郎知我乎。李公以此益賢重君。癸巳、晉司少卿。徐孫李踵去、知君者益少。丁酉秋、德孺卒京邸、君與余治其喪、而頃之余亦以譏罷、時權有力者以余故訾君益急、君益爲余不平。亡何、其人卒敗去、而君意且倦游矣。庚子夏、以冊封奉太宜人、僑居畱都、與余及無功聚首、時覺君字間有病色、然議論英英猶映蔽數十人、不意其遂不起也。至十月二十有九日、竟以疾逝。嗚呼、痛哉。余坐疏懸見察于時、獨意君沈厚可屬大事、乃哭德孺曾幾何、

而無功與余又復撫君尸、治君喪如德孺、其可惜也已。今歲宏甫以誣被逮、死燕邸、余既不能奮飛而相知者率陰拱而不肯援、使君而在、亦豈至此極也。嗚呼、痛哉。人世浮雲、須臾變滅、唯知命者不憂、與立德者不朽。余與君其又何憾。初、兩先生之學、人或疑其異指、君獨取會心者創而用之、以自名一家、異議間多盛傳之者。雅嗜讀書、聞賢人君子之言行與時事之大者、動有紀述。嘗見其數鉅冊于几間、君輒自掩避、不欲遽傳也。今行世者有間然堂雜集、詩文集、周易述若干卷、亦足見君之大都矣。生嘉靖丁酉八月二十五日、距其卒得年六十有四。配汪氏、封宜人。子四、師曾、爲鯤、泰衡、兆繁。爲鯤、泰衡諸生。女三、壻爲胡有敬、張承叙、董大臨。孫一、嘉生。師曾等以某年某月某日葬君某山之原、而丐余爲銘。銘曰、聖言浸遠、罕究陳、世儒乘之、雜僞真、硜硜者流、局前聞、空有互聞紛以繪、嚙勇如君、廓其源、并苞絕異、昭羣昏、驅除異論如蠱、蚤日月皎皎、開浮雲、有書載之、垂無垠、世如不信、砥茲文。

廣東按察司僉事管公志道墓志銘 清園集

管公東溟與余同遊耿恭簡公之門平生銳意問學意將囊括三教鎔鑄九流以自成一家之言其志偉矣。萬曆戊申七月十五日以疾終於家同志聞之相嚮哭因奉其主於恭簡師之祠柑食焉。未幾公仲子珍手排纘事行屬余爲志銘是其可辭。按狀公諱志道字登之先世隸郡之崑山弘治中分隸太倉始占籍爲州人。五世祖子忠子忠生選選生江江生和世有家法和生釐以公貴封其官公父也封翁三子而公爲首童稚中習禮容儼若成人六歲就傳讀書一再過成誦稍長學日益出試有司督學方泉趙公以冠八邑嘉靖癸亥恭簡師來總學校拔之稱人之中而授以學。甲子奉先師意尋師取友不憚竭蹶一時如盱江羅先生東崖王先生輩相與討論揚扞忽有省於中庸明哲之義而以參於古先生之言意豁如也。會郡守蔡公繁精舍造士檄公主盟公言劃切聞者多警醒常言士必有選世不見知而不悔之胸襟然後可與深造又必有行一不義殺一不辜而得志弗爲之節操然後可與立身蓋其自信者如此。隆慶庚午領鄉薦辛未成進士初選得南兵部車駕司主

事。大司馬劉器其能事倚以辦駕部故董貢艘衛卒苦積役僅餘皮骨公計生之言於大司馬裁去三百餘艘攤江濟兩衛中資水夫工食之餘而四十衛之困稍稍甦矣。他如清蘆洲均國課募水兵要政悉舉江淮有一二悍卒警千戶某流言本兵將以水卒充操練私軟血伺隙而起聞者殊恐公夷然不動巨測者輒自解散徐治其爲首者數人而已。癸酉今上改元覃恩封父如其官母封安人甲戌丁封翁憂不移時奔歸同官以公所積貯羨金若干爲襄事助公固辭服闋需次都下見江陵父死不歸甚非之以來主故不爲顯諱乃約沈修撰君典上書以諷江陵不能從會言者益衆輒疑謀出公業心銜之矣。十一月補刑部貴州司主事疑獄滯訟立得其情部有獄夜一人直之公入以其間訊諸罪人枉直狀書於簿冀爲異日昭雪地常省其饑寒拊其疾病不以囚故棄也。戊寅春大婚禮成爲九事以上皆切中時敝疏傳都中紙爲貴中勅上躬撓大政無使旁落江陵怒而不敢言九月轉部員外郎十一月出爲廣東按察司僉事分巡南韶蓋按廣直指爲江陵私人屬以陰構之也公前疏明舊制欲司道與直指均禮故江陵



以此難之。出都、猶以連劾論申憲綱請入粵、又上風紀未盡十二議、雖涉外臺而意實以繩政府、直指初亦避公風采、三越月、爲要人累嗾不得已露章劾公、然無可污蔑、不過枝梧其詞以答風旨耳。時粵方中寇公履任一月、卽奉撫臺檄出清遠督兵、條東寇事不下千百言、大都主撫而不主戰、主善後之策而不主目前之計、情形曲折、明如指掌、次第行之、諸寇斂迹矣。而得旨降調解任。馳歸、薦紳父老填道瞻送、爲之出涕。明年補鹽課司提舉。庚辰大計、置公老疾中。當是時宵人比周、相與傾公銳甚、而公亦以此名聞於世。壬午江陵敗、諸言事者立致通顯、鮮謀及公者。乙酉以臺疏得僉憲銜致仕。辛卯李敏肅言於冢宰陸公、乃補楚臬。公以母老不便遠出、堅不欲行。會有阨公者、乃決意乞歸、有旨回籍聽用、而公宦途之跡如掃矣。當權臣橫甚、弱者處之以爲利、強者攻之以爲名、公獨以身折其衝、而卒之無顯名、無後利、豈不嶮然不緇之心胸哉。平生之學、最所爲書甚具、曰某集若干卷、某集若干卷、其言閭閻遠近、詞辯淵、大歸冀以西來之意密證六經、東魯之矩步、二氏以是行於已、亦以是言於人。至晚節爲四子訂淵。

則一歸平實、而公之所詣彌不可及已。嗟乎、公爲人取獨立行一意、而或至以違衆賦世譏焉、然古君子之心、有親戚不知而所推之氓知之、鄉曲不知而千里之人信之者、于公奚疑。公生嘉靖丙申正月九日、距卒年七十有二。

（國朝獻徵錄）卷九九

校記

①言：疑誤，或當作「官」、「居」一類字。



藏 儒

明儒碑傳集 卷八三

明儒碑傳集卷八十四

錢一本 李逢陽 余繼登

劉元卿 陳與郊 孟化鯉

原任文林郎福建道監察御史 誥贈中

順大夫太僕寺少卿啟新錢公墓表

錢公之塋也。有奇窩逋客自誌。業已納瘞中。吉

水鄒先生復系之銘矣。是時

顯皇帝在位。諸逐臣槩不錄。留爲

聖子

神孫紹庭首事。公遂以舊御史終。天啟二年。用鄒先生及諸公言。凡以國本譴逐者存。則不次擢用。功者優數階。於是先生得晉太僕寺少卿。予祭一壇。先生之子春亦嘗以御史昌言。抵權貴。出叅外藩。近得召用。亦太僕寺少卿。旌忠褒直。哀死榮生。一門兩世。載錫之光。而前後官閥巧相符。又一奇也。太僕公念主恩重。不

可不揭之以責隧道。屬我史臣書其事。夫公之可書者無如國本一疏。謂自古人君未有以天下之本爲戲。如綸如綽。乃展轉靡定如此者。一人言及。卽曰此激擾也。改遲一年。屆期而又有一人言及。又曰此激擾也。改遲二三年。必使天下無一人敢言。庶得委曲遷延。以全其昵愛之私語。揣摩多中。且齒及椒掖。上嫌之。姑寢弗報。踰四月。杖孟給事養浩。以公疏與給事疏同指。并褫公官爲編氓。則公去國之餘也。若其遇事憤激。侃侃發抒。惡持斧之使。包匿恣入。谿壑罔饜。亡以風厲下僚。而反教之貪。負陛下任使。則有糾舉江西按臣祝大舟疏。惡秉國成者。實有總攬之權。達達駕明旨以箝衆口。使嘉言路塞。直臣道消。科名私及子弟。覬謁遍滿長安。則有敬陳論相大義一疏。念邊陲孔棘。動需干城。而使過之典明王所不廢。則有請釋李



材疏。河西敗衄、樞管之臣茫無成筭、而徒與言官爭是非、則有叅兵部侍郎許守謙疏。墨令狼籍載道、司府大吏容隱爲奸、則有訪問貪官疏。其它疏不勝舉。至崇祀一疏、所推擇爲文毅、文恭、兩羅公、布衣陳真晟、學正曹端、尊獎名儒、紹明理學、公所托寄在是矣。自蒙譴歸、葺毘陵先賢祠、卽其旁構經正堂、與遠近賢士大夫考德問業其中。是時椒蘭臭味、過從靡間者、在同邑則今大宗伯孫公、贈尚寶丞薛公、在錫山則贈太常少卿、贈尚寶丞兩顧公、今少司寇高公、前光祿少卿劉公、贈光祿少卿安公、在金沙則贈光祿少卿于公、在雲陽則贈太常少卿姜公。講席雲蒸、擬于河汾、鷺湖之盛、而公與顧奉常實爲尸盟。奉常之學、大公獨高、奉常救世之衷、苦公持世嚴。

定陵末年、謠詠競起、羣鋒衆簇、攢集于東林、公出

而與諸君子萃處于講堂之上、辭氣嶄如也。於行藏、誹譽之關、廓如也。讀書研理、愈邃而著述亦愈積。黽黽類也、取其黽勉亡息之義、則有黽記。尋洙泗之脉、以淪其流、而堤其泛潰、則有源。滙編。睠顧宗國、觸事傷心、竊取考亭之法、備神廟一朝信史、則有邸抄。其於易、自田何而下、亡所不披晰、而澄心冥契、所得於靜悟爲多、則有像象管見。有象抄。有範衍。圖書象數變通之妙、秦漢以來鮮知者。邵堯夫聰明蓋世、然得李之才秘授、而後能窮其奧。如公無師之智、不傳之習、究其所得、略與堯夫等。其寄窩逋客自誌、亦髮髯安樂窩遺韻焉。堯夫之將埒也、先語君實。吾欲觀化一巡。又題一詩、有客問年幾何、六十有七歲之句。公先期營窀穸、刻期八月竣事。又以掘地得錢兆、在庚戌、遂賦詩曰、庚戌年遙月易逢、今年九月便相衝。又曰、月朔初逢庚戌、令

夫行應不再次。且至月圓後成行。亦預曉臧獲無爽。昔人謂邵子觀天地運化。陰陽消長。以達乎萬物之變。然後頽然其順。浩然其歸。繼之者其公平。然邵子生平不立朝。惟以巢由外臣爲康濟自身之計。視公則異地矣。公通籍

神宗之世。始而歿。繼而蹇。程伯淳。朱仲晦之遭遇。公互有之。伯淳爲監察御史。裏行。惟積誠感悟。不欲掇拾短長。其所值爲王介甫。猶可以道理規諷。然未嘗不面折之。仲晦在外。則鞠治大吏。在內。則力詆時相。夫豈得已。公所遇固非韓平原。而唐仲友。王淮之徒。不乏也。卽伯淳處此。能養其鋒稜。不試哉。自公歸田後。朝事屢變。而黨人之禁愈烈。稍以儒名者。無所容其身。其禍擬於南宋。惟公能以天山之遜自免。而同志諸君受齟齬者十八九矣。

英明嗣服。萬類維新。陞伏者進。竄謫者庸。幸國脉

醞厚。同心協力。可望太平。猶異於宋之嘉定。使公在當筮得利見之爻。爲羣龍先路。而今已矣。公嘗言天下事。一人爲不若衆人爲。夫與公共爲天下事者。孰如公之子。今太僕公行出而大用于世。公之靈尚式憑哉。公生平好獎與後進。其以壬子冬侍公于經正堂。負牆終日。受誨孔多。卽不敢言堯夫之於歐陽棐。然其不見棄於有道久矣。故標其大節。垂於麗牲之石。使世之君子過而式焉。公諱一本。字國端。別號敬新先生。常州武進人。登萬曆癸未進士。始爲廬陵令。著循吏聲。今猶俎豆學宮。比桐鄉之朱邑云。其世系。生卒。子姓。具在鄒先生誌及雲杜李先生傳中。

錢啓新墓銘鄒元標

當啟新錢公令廬陵也。予時以司封郎家居。觀公行事。置漢庭卓異中。不知雌雄。法之所在。大吏不能回。豪右目攝之矣。予曷言曰。此亭一者。寧時汶一乎。數年中。興文造士。救荒弭盜。均賦表訟。天政未易更僕數。所最注心者。借諸者。碩究心名理。不明不已。又初祠祀諸明德君子。政崇大体。類如此。召入為福建道御史。首疏前按江西御史取贖錢壞憲體。上聞疏怒。逮御史於理。衆御史瞋目語難曰。故屬吏胡不為班行地。恨不即寄之九淵。公不問。然自是海內內篋篋都捐。其所劾約者。不可量數矣。銜命事西粵。諸聞公至者。相戒曰。是常紀上官。上官得重罪去者。至則默貪墨吏。糾陰庇屬吏。監司者二人。覩報冊立易期。公極言壞祖制。并語侵掠建中。涓相頓吐舌。又引網維。陳大義。譏切輔臣十餘事。而疏。千餘言。敵以下所不能堪。會杖孟給事。養浩。奉旨落公職為民。公飄然歸郵亭。不知故御史也。牢落湘江。一故人始以舟護歸。而杜門自譚。道著述外。絕無嗜好。即干旄在門。不得一望而來。所著有象像管見。洪範

行窮年兀。發儒先所未發。又慮世儒之溺于彼教也。作源流通編。又作史記。良工苦心。有功世道甚大。嘗與顧光祿分席為郡盟主。忽東林議起。至公一無加過。推大理者至再。吾黨方以公為碩果。而忽長逝。之先數月。經紀後事。賦詩示期。秘不欲傷侍御心。家族人聞之以未必然。已果然。人皆以為駭。不知原始反終。故知先生之說。公於易學。沉潜反復。死生大事。必有深入未易語人者。學在洗心。洗心則蔽吝。則通晝夜。自其常事。復以了死生。歸之彼氏。請觀公可矣。三十年來。以錮人山林為勝局者。人一落網。便如九幽。望天子予當謂為人而錮者。必其自錮者也。心行果真。即沉之萬仞波。渾浩氣猶貫霄射。若如公出而有為。如雷建之震物。由甲而拆。處而有守。如清風之煦物。亡不涵濯。昔人謂修於家。壞於庭者。而今有色於外。壞於家者。若如公者。細而愈新者也。益嘗窺公微笑。公令時有要臣致書曰。無以家子弟而有閑說。即復書曰。令非聽閑說人者而作是語。要人色止。又一要臣子弟僑寓左右。進人之之歸。衆錯愕。謂不情。予獨為掣節。夫鮮天下大節者。其胸



襟必有橫海宇之度而後能任重道遠。非猛將男子
能之。若公者。豈今之人哉。世羅才者。志無矜。矜之匪。備
國以銀鉅寄公。才足以揮斥八極。氣足以坐銷萬機。
何事不辦。徒令公老死泉石。使望精光者。歎。讀遺
書者。興慨。人之云亡。邦國殄瘁。世棄才。國安得有才。
此予于公而反。不勝已於懷也。公子某。進三楚。同公
志操。要予銘。即不委。予亦當秘錄以貽千古。而矧論落
石文。敢以不文辭。公名一本。字國端。別號敬新。銘曰。天
祐皇明。篤生偉人。岐嶷孤寡。為國畫臣。筮仕螺川。民呼
召父。魏碑道周。連城何武。誓筆西臺。氣凜秋霜。擊牛為
風。膽落班行。射命而西。淨掃狐穴。誰云荒涼。六月霜雪。
國本政地。侃。千言。孤忠自許。聞者心寒。直道難容。親
駕於楚。披心慕古。通乎晝夜。千古大事。剖析玄微。論然
以往。如脫垢衣。河圖洪範。列聖心印。獨証先天。粹然以
正。弄。林華。實不中實。出處如公。心行雙清。學匪虛談。
行貴端。潛修如公。吾道之寶。公有令子。步武臺綱。後
先為烈。家有是象。正氣洋洋。公實不死。予筆如天。百世
其似。

《明文海》卷四四五

禮部主客郎中李公逢陽傳

李逢陽字維明。國初藉金吾後衛家。南京幼端謹
如成人。家庭間顰笑不苟。雖盛暑。恆整衣冠危坐。終
日無傾側容。視世沒溺財利。惟恐汙之。游郡庠。京兆
喻時延置家塾。教其子。逢陽以師道自重。出入未嘗
左顧。見者肅然。喻亦重之。戊午舉於鄉。喻定薦之。逢
陽聞之。弗善也。絕不謁謝。喻亦不介意。人謂兩得云。
性篤孝。母歿。哀毀骨立。啖蔬處外三年。悉如禮。隆慶
戊辰第進士。時方選庶吉士。逢陽本第七人。當道雅
屬意逢陽。固避弗就。乃授戶部主事。改儀部郎中。會
選官人。惟簡其貌類端淑者。艷冶悉置不與。奉命
遣祭楚王。事竣。以百金為贍。卻之。歸未幾。友人楊希
淳病。逢陽親視湯藥。或謂宜少避者。不從。楊卒。未決
旬。亦竟不起。逢陽篤於踐履。不事空談。及見天臺先生。
然後心服。謂人曰。吾裝來毛髮動止。皆非是。又曰。
吾不聞學。得為古之矜者。止爾。今而後知學之不可
已也。幼與希淳為石交。相切劘。李以教篤。勝。楊以達
脫勝。皆金相玉質。彬彬君子也。兩人一時俱歿。人咸
惋惜之。有集若干卷。少司寇吳自新合楊稿刻而傳
焉。

《國朝獻徵錄》卷三五

資政大夫禮部尚書兼翰林院學士贈太子少保謚文恪雲龍余公繼登墓誌銘

于慎行

禮部尚書兼翰林院學士河間余公以丙曆庚子七月十六日卒於位。部臣以聞。上深嗟悼。詔贈太子少保。謚文恪。賜祭。使使護喪。出少府金錢治葬。如法。蓋上之篤念講臣恩卹備渥如此。公諱繼登。字世用。別號雲衡。其先越人也。高祖士賢。北官於燕。占籍交河家焉。三傳至贈宗伯信。以貨行。賈爲公大父。余公生。贈宗伯伯恩。以貢入太學。仕爲東昌府史。配褚繼陸。皆贈淑人。陸公母也。公生八歲而考妣客歿。焚焚千里。扶兩棺以歸。宗人脫而弱之。欲謀其產。所以時訖。百方竟得無恙。而謁里師受經。誦習日力。年甫十三。補邑弟子。宗人之謀寢。嘉靖甲子。以詩舉京兆。萬曆丁丑。乃成進士。選庶吉士。卒業館中。好考覈國家故實。及前代治亂所繇。至校大制作。筆鋒縱橫。超乘而上。諸公交重焉。已卯。授翰林院檢討。癸未。分校禮闈。是歲纂修會典。越五年書成。進修撰。賜白金文綺。宴南宮。戊子。奉使周藩。歸而舟蕩於河。舟人皆號。公具衣冠拜禱。風止波恬。如或翼之以濟。已丑。充經筵

講官。旋擢右春坊右中允。兼編修。簡直日講。與北海馮公同說通鑑。時上希御法。遂講臣具牘以進。公乃與馮公議。以便宜稍引古誼。傳時政得失。冀有所感悟。不談說効。說經語。辛卯。與試留都。壬辰。陞右諭德。兼侍讀。典試武闈。癸巳。轉左庶子。兼官如故。甲午。進詹事府少詹事。兼侍讀學士。充正史副總裁。乙未。廷試充讀卷官。旋擢詹事。掌翰林院事。丙申。大內火。公偕講臣上章切諫。其年拜禮部右侍郎。兼官如故。明年戊戌。充知貢舉官。會三品滿考。詔中使齎羊酒至第勞焉。予三代誥命。大父母父母所爲受。今稱矣。其年轉左。郊廟大禮。攝正卿以行。公在講筵。且十年。皆與馮公共事。而馮公再謁告歸里。所直日亦公代進講。獻納爲多。歲時受賜金繒及他珍異。差次閣臣。不可勝紀云。當其時。禮卿闕。且二年。廷臣所推舉無處十餘上。皆留不下。及再以公名進。名又在後。上竟用焉。在位執法守政。夙夜勤恪。遇天地大節。時政闕失。抗事力諫。無少規隨。戊戌歲終。舉奏四方所報地震雷火及西寧鍾自鳴。紹興地出血。二氣舛錯。古所未有。今郡國元元皆征調。酷權織造。開採爵結無聊。勤難安。幸上思惟天心。圖謝過之實。疏入。報旨



儒藏

惕然。明年九月，太白經天，狄道山崩，湧土出五。公復上言：方今星躔失度，水旱爲沴，黎山開礦，地祇空虛，不能因脉，山崩川竭，陵谷變遷，閭閻窮困，郡邑蕭條，戾氣凝而不散，怨毒結而成形，甚可憂也。臣子不能動君父言，數愈熾。陛下爲天之子，天以非常譴告，尚可恬然數日不報。公見士習文體日趨浮詭，深用爲憂。上言：今俗不遵聖經，倡爲異說，竊佛氏緒言，煽亂耳目，謂經籍傳註皆爲糟粕，倫理法度皆爲虛幻，惟一了此心，則踰閑蕩檢，無害性真。後學小生，轉相崇尚，雜入制義，名爲新說，甚悖理傷化，宜紀其端，勿使進奉，冒竊爲功。令下學官，釐正焉。公自署郡時，請元子冠婚，疏凡九上。及正卿席，並請建儲，又至八疏。病甚，猶伏枕視草。久之，上意感動，勅所司爲具，將行大禮。而公既受特知，四推內閣，旦夕且有後命，亦不及少待卒矣。名位固所不念，國之大計於公志何如哉。公爲人樸直端方，忠誠體國，平居以慎密自將，穆然簡默，言不出口，卽顰笑許可不輕假借。及當大議大政，持論侃侃，無所回撓。條吏卽有不當，常正色攝之，始若不堪，久而知其無他，更信服焉。居常廉儉，不視生產。學士同年曾公嘗過其里，茅屋蒿徑，一

如諸生嘆息而去。平生不受人私，亦未嘗以私干人。少子從學官試，夫人所爲一語，終不肯發。貨產既耗，又以分給親族，室無藏廩，官無藏橐。爲文典重，懇至，以意識爲宗，不尚綺靡。詩法孟賈陽，尤工爲歌行。所著文集若干卷，通鑑進講錄五十卷，國朝典故紀聞十八卷，行於世。生嘉靖甲辰，比卒，得年五十有七。

（國朝獻徵錄）卷三四

禮部主客司主事瀘瀘劉公元卿墓志銘

鄒元標

安成自文莊公以學鳴海宇數十年，所稱心行雙清，特起紹述者，吾友徵君瀘瀘是已。徵君子黨所藉以轅末路者，乃溘然長逝，不勝梁木之嘆。仲弟上卿泣而持狀過予曰：「先子生而先生薦于朝，沒幸先生銘于幽。」先子辱知不淺，其無辭。某謹拜狀而相對爲世道悲者久之。公諱元卿，字調父，初號旋宇，既號瀘瀘。先世爲安成南溪人，自幼雄奇穎敏，入塾諸師賦而遜謝去。既負笈盡吾伍君伍門，麟經者各有秘錄，靳弗與。公奮然曰：「豈神授耶？」遂自出，好軸成一家言。諸人皆驚詫以爲異，然非公好也。入郡爲青原遊，與夫語曰：「昔之青原挾妓酒人歌新聲者，達旦自兩鄒

公子入廷絕響。公聞而惕然有省。兩公子卽會憲汝海、宮洗汝光氏。時自東魯歸。嚶嚶以正學倡諸里人。公入山汝海以學。嘗公、公喜動于心。歸而陳諸宋儒語錄。堆案盈几。玩而三思焉。汝海退與汝光心喪者久之。時周太守鶴皋羣諸士試。公盡以所學發于論。太守大奇。以爲真儒。再出。不獨以科名器也。入蜀。遂魁江西。偕其師伍君及劉侍御輩。仍以學相切砥。偶幸未業入彀。主司以其策多憤激語。遂置之殿。江陵聞而大怒。下禮部以飭多士。公歸而師事三五劉公。倡學里中。里中勃然興起。甲戌不第。抹其引。杜門不出矣。而里中從遊者日衆。公子諸先輩語淺生厭。深生疑。乃出而謁蘭溪徐太常黃安耿司農。公子蘭溪機稍動。至聞耿氏時提生。生謂易一語。欣然自信曰。孟氏不云乎。四端充之。足保四海。吾方幸矣。不流也。而故遺之火。不然也。而故滅之。彼滅與遺者。二氏之流。吾所不忍。以此爲學。卽以此地人。而所初復禮。仁中道一德。諸院咸有常會。西鄉諸習俗。得公一變。堯水諸盜。得公一弭。兩邑爭界不輸賦者。得公一定。人共矚彬彬如也。太守汪公親風行之咏歌。此足徵公學矣。公雖絕仕進乎。旣而強應聘出。埋光剗采。其

與名賢一移世軸。觀時不可爲。遂飄然歸。然國子薰德者甚衆。儀部疏從祀諸先大儒。釐正女直諸疏。皆其鉅者。然知者皆謂公具大有爲之才。使有力者盡去崖角。必大有可觀。惜公未竟其用也。公性敏。又諳于典故。有可裨閭閻者。聞必行。行必力。蓋嘗慨世之學者。漫無實履。與世隔闕。是墮名相。俯首冥心。鈎深致遠。是墮理窟。公與衆人游。春風習習。人皆可親。然徐而叩之。淵懿粹穆。人終不可得而及。夫使世儒知有真品。有實用。公其人矣。或者謂公學度世有餘。于出世一路。未必無疑。不知公久學於性命之說。豈不有聞。顧不欲深語。以啓世儒儼等之習耳。公最篤於倫。一門以內。雍雍穆穆。無可選之行。合祠。朔祠。輯譜。皆竟先世所未有者。至於汝海、汝光被導之功。心口不負。生嘉靖甲辰三月。終。萬曆己酉七月。享年六十。六。所著有山居草、還山續草、大象觀、諸儒學案、賢爽編、六鑑舉要、國史舉凡、晤語測言、思問編、何其編、先正義方、禮律類要、明賢宗解、髮江證學、大學新編、行于世。

（國朝獻徵錄）卷三五



太常寺少卿陳公墓志銘

歲己丑余謁選人故事朝罷則謁省中時海寧陳公爲吏科都給事中旅進一揖而退又十二年余自武林入覲公時以奉常里居特越疆顧余舟中數言而別又十年余解分陝節訪邢子愿臨邑則公子祖臯中文罔身亦幾不免子愿潛然出公書示余李本寧能排難解紛而無所取今之魯仲連也且與君善君何不爲余言余不知公何所知余比僑寓江淮從浙人問公家事云當事者亦知祖臯冤爰書再三謝明審獨以公故獄不可反而公邑病卒矣又五年獄解祖臯將塋公與母朱孺人乃奉舊史董玄宰先生所爲墓碑屬余志墓余不能報公地上何忍負公地下志曰公名與郊字廣野先世齊高氏至南宋入浙居臨安永樂間東園公諒從海寧爲陳氏贅壻因從其姓于世榮世榮子亮亮子晃晃子經經子中漸以公贈吏科給事中母嚴太孺人四子伯爲公仲廣西參知與相叔與侯季與伯王父于諸孫中奇公伯仲以爲能大吾門而金壇廣文朱公舜臣與王父同爲郡諸生甚驩以女字公公十六爲郡諸生就婚金壇金壇曹太史見而稱之此我輩人二十有四以春秋聚于鄉再不第南宮歸而足疾三月不庭醫凌生

針之愈隣人速公與叔弟于獄雖對簿手不釋書會試舉第四人出王文肅公之門授河間府推官時王母王孺人年九十有三公留朱孺人事兩姑獨之任其冬王母卒公承重歸服除謁選人奉母以往復除順德府憲令理官從侍御史按部獄出入官臧否經其手而執政方綜覈名實用法嚴幾輔吏奉行刻深公獨顧念官以推爲名卽孟氏善推所爲之說也人之自愛孰不如我吾何求多焉理出富人坐殺人抵罪者或白宜違嫌公正色曰人之命乃重于吾之名乎有僕行盜而主不知主坐死閱其詞數過若有白頭翁嘆息于側得情釋之臺使按劾惡人逮繫累百千公第治其魁諸吏小過悉宥不問所保全甚衆所平反不可數計暇則進諸生授經談藝四方聞者自發從遊順德於八郡爲小而隣國前帥質成來學戶限欲穿矣六年以高第徵遮道泣而留行者二三百里內接踵呼爲陳佛至今尸祝之已拜給事中首疏請召用因江陵得罪者趙用賢吳中行沈思孝艾穆鄧元標宋鴻謨郭惟賢諸公會計吏疏禁餽遺念母家居移疾還子舍假滿遷戶科右工科左上營大峪壽官言者聚訟公爲折衷輒觸時諱壽官成上親臨視公以侍從受緋衣之賜已爲禮闈同考官事

竣乞致仕養母以有弟三人非例罷。

命冊魯世子妃假道歸省遂不欲出母不善也入報命尋遷吏科屬大計復疏申餽遺之禁至云有如餽及臣門臣當指實參治如臣隱忍當按實先行治臣其或緣此詬臣反中臣則付之國論國法臣不敢知而朝衆更爲蜚語是夫陰招之陽卻之者也己丑復爲禮闈同考官科臣兩同考禮闈亦數十年稀見以是益誨姤矣居省中所言裁織造減營建修實政停助工皆關民隱國體復請登進陸文定陳恭介鄧文潔邢司馬王司寇那太常諸公皆名臣也已擢太常少卿督四夷館母八十復乞歸省行五百里聞訃匍匐奔還越三年有以行取考選過濫追論銓曹及公遂免官構別業城隅終老而贈公以輿論祀鄉賢喜曰無過佚前人之光于願足矣建宗祠置祭田三黨有緩急脫朱孺人簪珥以助邑西路場窳觴苦言于朝均其役某千戶子歲荒自鬻還之卒得世官所受業師有子爲具六禮以婚而周其一歲之資孀姊族女中表姪賴公生有養沒有歸性不飲酒博奕不握筭不出遊惟以臨佳帖種名花爲適作傳前小令令童子歌之以起倦色自六籍外剏心太玄潛虛好屈宋揚馬張左諸家賦考訂音韻所爲文上下兩

京六朝獨不作詩賦曰不能及古人無以效顰自點將莖母兄弟子姓衆各擇吉避凶公曰昔邾子繹利于民不惜其身苟利吾親何所不可甲辰冬改贈公兆附母日者言是化公本命公不顧決歲祖臯遘禍公自省生平未嘗寬一人而今寬吾子命矣夫僦居視子業體叔弟疾公超視而泣吾弟以身代吾訟吾不能以身代吾弟疾也安仁吳中丞過武林公詣之語良久輿歸中道疾作遂卒朱孺人與仲子以喪還萬曆庚戌十二月四日也距生嘉靖甲辰二月二十有三日年六十有七朱孺人生嘉靖甲辰正月四日傷其子又傷公以子死病不聊生辛亥六月十有六日卒年六十有八孺人事兩姑孝事公莊治家勤儉公以故不問生產晚歲奉佛虔卒時面西向方大暑天忽寒竟欬色如生長子祖臯太學生娶儀郎錢公某孫女痛夫在大譴大何之域憤激哀毀死玄宰爲之志次子猷太學生娶吏科都給事中沈公某孫女孫男三其一殤存者仲邑諸生爲猷後娶孝廉丁公某孫女次信太學生娶觀察凌公某孫女孫女一適中丞許公子良孫鳴岐俱祖臯出公官九列而蒙彼其之刺子出萬死一生父母婦因之死不得與子哭泣之哀豈方術信耶抑公所謂命非人力也余讀祖



畢啟事曰先大夫居諫院江陵敗矣太倉未當國而絀江陵者云江陵黨絀太倉者云太倉人此無庸辨若以吳縣執政故併及諫臣先大夫去位後國是人情視昔何若而先大夫獨蒙不遑聲以就木也余與董玄宰自史臣外補所經風波非一旁觀世局祖臯語非妄衆惡必察焉爲具論之可藉是答子愿矣朱孺人從公壙例得書銘曰子無罪就死婦爲夫死父爲子死母爲父死維天降割亦泰憫矣父喻耆死母踰耆死子無獄死歸葬親死維天顯道故靡與矣知所微憾在損名耳賢愚同盡名安在矣兩舊史氏不徇衆毀爲死者一洗質諸達人辭亦費矣

李維楨撰（大泌山房集）卷七八

奉政大夫吏部文選郎中雲浦孟公墓碑

夫學已以內事修之身其德乃貞修之家與鄉其德乃信修之天下其德乃大故曰君子以成德爲行日可見之行也不見之行不足以爲成德而世以二三之見誦說敗行塗飾人耳目不可以欺三尺豎兒矧曰天下後世蓋余自外未入朝心素服師者吾師朱鑒培先生友則王聊城洪陽外所稱二孟先生張宮諭賦二孟行者是已孟先生性平人素誌其墓而雲浦先生下世久遠在中州東郭亡由常竊自恨表弟王銓令新安拜而屬曰此我友也真儒也披其圖書跡其後裔是念未幾而先生弟以墓表見屬此子志也先生諱化鯉字叔龍先世閩中邵陽人洪武間移新安遷占籍高祖真曾祖聰祖倫世有隱行倫生秋號雙臺隱行具盛太史誌中贈南京戶部主事母衛氏封太安人夢日如斗以嘉靖乙巳閏正月廿四日生先生於儒學東長而修傳其聲望而知爲有道人也自幼即知虛心下問諸長者曰此誰家



子必成大儒。十七補邑弟子員。念人生如瀛海。波波一生。不可為人。西川尤先生力行古道。造就學馬。諸君學小。記曰。漁洛真傳。具見今日。進歸而與里人教行不息。諸君學不但奇其文冠中州。即行亦以為漁洛衣鉢。應貢第一人。廷試第二人。入太學。同郭司馬青螺。孟尚寶。我繼貴官。唐慎軒其退。最後仕而與我繼繼。珍尤密。庚辰成進士。早已授南京戶部主事。管銀庫。出權河西務。公痛革風弊。殆盡。付稅銀。縣收支。目不覩一錢。惟與士民講聖諭六語。中藉發明正學。行之日。士民尚像祀江干。過客題祠曰。司農權稅。沿河邊。絕勝山陰。取一錢。共祝。索中金百鎰。何如生像祀十年。丙戌。奉命賑河北。散賑有方。全活數百萬人。猶加意於善人。即布衣委巷知學者。必致禮焉。將還朝。改考功主事。丁衛夫人憂。起補稽勲員外郎。歷文選郎中。公念以人報國。本自素志。乘可致而復走私門。所學謂何。孤立行一意。所推較必海內。共以為賢者。所排斥必走權門。屢為國說者。中涓無請。輒

尼。疏起都給事張棟。上案令棄官。政府封還。陰陽其詞。於上前。上遂以忤旨調外任。時正當大選。先生星夜治文書完。跨蹇臨歸。兩都文章不平。先生意氣自如。諸方面都邑投一刺。不可得。津遼間遇君何往。而先生已遁去矣。歸而舊弟子候於黃河。續舊盟者數百人。歌聲洋洋。聲振林木。盛矣。初先生謁西川歸。而大倡會西川曰。聖學盛行於西矣。乃先生謝絕事。跡昔益宏以昌。豈天欲以斯文柄付先生而不欲先生盡施之行事耶。新建之學。北地諸君子多疑而不信。篤信不惑。西川與荏平。迨先生而三。然諸君子故不能不疑新建之言。而不能不信先生之人。其事變臺公。衛安人聚順無違。兩尊人謝世。公以不得視舍。為恨。明並必博賴二弟曰。彼代吾送終。視二弟即吾親也。里遺荒歉。啓雙臺公發廣濟人貧不能償者。折券棄責。里中人以為嚴師。以為慈父。合家鄉國而徵諸行者如此。蓋隱顯一致矣。或以先生未得大行為憾。不知國之大事。理財用人。其巨者。先生初

試民部大挽食墨之末流。再試銓曹。欲開拔茅之廣路。亦足行矣。不盡行者天也。時予與先生同舍。兩人各有肝膽。咸被逐去。既而趙高邑。顧無錫。鄒雲夢。王淵川。亦皆不竟其志。予黨不能事人。故不能用人。惟不能隨時。故不能有裨於時。然使時知銓曹自有正路。吾道自有正法。能屈吾黨一時者官。不可奪吾黨千秋者志。則所被一時者小之乎云爾。史臣至此宜何如嘆息焉。嗟乎。二程先生當宋盛時。皆位不稱德。今炳炳日星。為萬世師。先生何必以位顯。伊洛淵源。千古如生可也。兩臺為公名績。伊洛後。而以專祠祀先生。允宜。先生沒。萬曆廿五年正月。享年五十三。配其氏封安人。男一。誠。邑諸生。娶董氏。女二。一適梁允濟。一適王親賢。皆諸生。十月十三日。塋於邑東區谷之北原。銘曰。真主更絰。時際一清。鵠鵠言士。言司銓衡。言士宅心。竭於天子。孤介捐瘠。恥為權使。尼於要人。并棄其身。日新月累。山谷沉淪。

皎皎我公、吾道冠冕。退則循循、進則蹇蹇。世事日非、言賦歸來。惟二三子、藉公以裁。一人振鐸、萬夫齊遠。河洛之間、藉公振鐸。偉矣我公、克紹二程。公其步趨、吾道正明。不落階級、不墮見解。獨擅其要、先立其大。流風餘韻、百世之師。天未喪道、斯文在茲。

鄭元標撰 《顧學集》卷五下

孟先生傳

先生蓋伊維間真儒篤學好修者。卒二十七年。海內如吉水、西安、虞城諸君子爲詩爲賦爲贊爲誌銘爲墓碑。是不一人而獨無傳。呂子乃爲之。曰：先生姓孟名化鯉，字叔龍，其先秦人也。洪武初，有好奇古者始家新安焉。好古生真，真生聰，聰生倫，倫生秋，是爲贈南戶部主事。變臺公配衛太安人，夢有光如日，大於斗，遂誕先生。蓋嘉靖二十有四年乙巳閏正月二十有四日也。先生幼而警敏，長而端摯，其度修而美，其性凝凝，識者知其非常人。爲兒時嗜讀小學，八歲讀孝經論語，十三讀易，旁通經史及左國秦漢，比爲文自構一格，不傍人籬下。十七補諸生，便慨然以古道自任。館於盟津，一日謂其外兄曰：古人爲學必正心修身，無愧怍而後即安，豈沾沾舉子業哉？於是聞四川尤先生質直力行，倡道淑人，遂往師事之。讀擬學小記曰：廉雅真傳具在於茲。凡四川先生所言，手目繕記成帙。會督學試所部，拔其文行皆第一。尋愬恩，詔首貢，肄業成均。試第二。有友郭青螺、黃慎軒、孟我驥，而我驥尤密，聯會講學，以道義相砥礪。癸酉，中河南鄉試第九。故事，同年具呈坊價，先生慨然曰：吾輩方將起家清仕路，抑弁競乃先行請託耶？獨不列

名。凡先生初貢及偕計，有司以故事微驛遞路費，先生皆峻却不受。庚辰成進士，授南戶部主事。時相欲致先生爲重，終不往謁。尋服變臺公喪，起補戶部主事。筭銀庫，痛革宿弊。出榷河西務，口不言利，惟與子矜耆老講聖諭六語，務明正學。行之日，士民肖像祀江干。丙戌，江南山左大飢，先生奉命往賑，哀益稽核，全活無算。尤厚資善士。是年改驗封主事，會衛太安人卒，先生兩丁內外艱，哀毀骨立，喪制一準家禮，斟酌合宜，可爲法式。居喪不茹葷，不入內，不妄言笑。蓋先生天性孝，事兩尊人無間，或慍則率婦長跪請過。變臺公易簀，先生之留都任在途，以兩叔父視含飲，比喪事，每朔必稽顙曰：見兩叔父，即見吾父母也。服闋，補稽勲，歷文選郎。先生私念用人本朝廷公典，或干以私，豈不上負君，下負所學？故一意孤立，雖大貴人氣焰薰灼，不少徇。往例銓法多先白政府，然後補牘，先生不爲動。中璫請託，毫不假借。勅守閣，勿通一刺。凡諸舞文吏所得自行其意者，搜剔殆盡。於是內外率側目視先生矣。張可菴棟以都諫建言，國本論時論，雖之弗敢用也。先生疏起之，上業令票旨，政府封還，陰陽其詞，遂忤上調外。尋以中外力救，削先生籍。先生神色自若，猶夙夜治文書付所司，始跨蹇歸。



儒藏

歸之日、簪紳絡繹、出祖於郊。見先生行李蕭然、家奴徒步、皆嘆曰：「賢者去國、我輩口位、獨無愧於心乎？」郡邑長吏率求一見不可得、或負琴津途、問選君何選、而先生已微服過矣。初、先生從西川遊、歸而設會講學、寒暑不輟、多所興起。西川毋對人曰：「吾道西矣。」嗣與我鄉諸先生講學京邸、又於川上建兩賢祠、後爲宗賢樓、聚圖書、羅俊乂、四方之士聞風負笈、若陝、瀘、嵩、永、維、孟、汝、羅、秦、晉、聯翩而至、無慮數百人。至是、先生歸、諸弟子迎於黃河之湄、歌詠之聲、遏雲振木。先生於道益精進、所發明益開朗澄澈、非獨擴良知之緒、卽上邇洙泗、中衍伊雒、常亦非先生莫屬也。先生所至、人化之、在權則清貪墨之風、在銓則抑奔謁之途、在里則以恬淡古樸爲里俗、先故里中不用聲歌、不曳綺羅、婚嫁不論財、非喜宴不用鼓吹。人謂新安有古人風、先生之教也。雖窮鄉幽谷之人、無不稱曰：「孟師孟師。」先生精神強毅、每漏下五鼓、卽起課諸子弟、夜分呬唔不倦。亡何疾革、弟化鯨侍藥、猶孳孳勉以爲學。又口占四詩、有聞道未足之意、遂瞑。門人相視失聲、城爲罷市。迺有老嫠婦聞而悲之曰：「天下無福耶？其感人之深如此。海內君子過其墓、皆泫然淚下。凡弔先生者、不曰『皇夔稷契』、則曰『濂、雒、關、閩』、不曰

精心卓異、千古有賴、則曰『堯、舜、道之墜地、慨斯文之喪天、嗚呼痛哉』。大抵先生之學、以無欲爲宗、其教人則專以孝弟忠信、慎獨爲要、不爲高深玄冥之論、至平至實、至易至簡、至純至粹。有門人王蔡君以悟者、自總帥師、先生信先生尤篤。其贊先生曰：「仕以達道、學本無欲。知言哉。」先生丁酉正月二十六日卒、葬城東函谷之阜。明年祀鄉賢、大中丞鍾公復以輿論建祠、春秋特祀。壬戌、奉詔贈中大夫、光祿寺卿。子一、誠、舉明經。孫瑛、璘、璣、璵、皆孫文恒、余甥孫也。瑁、舉甲午科、貢書、璘、與文恒皆舉明經。皆能繼先生志。所著有尊聞錄、讀易錄、言、諸儒要錄、理學功臣言行條、名賢卓行條、焚黃堊冠儀、注文、集八卷、行於世。先生號雲浦、學者稱雲浦先生。

呂子曰：「道學不明、世日趨於墨、表謬詐、脂韋、嗜香而不可砥也。相習而常、惟言學則非而姍笑之、以爲怪。窺厥所由、豈以世有一種偽學、口而弗躬、不然、則迂執而弗裨於用。今觀先生力行孝弟、古道淑人、且理財用人、齊家化俗、隨試而効。故凡口而弗躬、迂執而弗裨於用、皆學之似而非也、非學之尤也。先生當世趨波靡之日、靡而不淫、炎而不競、逃而不悔、此之擔當於道、豈顧人姍笑、豈向人面孔生活、與吾道之一砥柱、而惜不假之年、

天也。邇淵源者曰伊雒爲洙泗嫡派而先生崛起上接
月川之鉢近振西川之鐸程邵以後一人而已近先生
之居如此其甚讀其書尚論其人夫亦愈知學矣。

呂維祺撰 〔明德先生文集〕卷二



儒藏

明儒碑傳集卷八十五

瞿九思 郝敬 于慎行 劉渚

陳金鉞 胡用賓 錢翊之

瞿九思郝敬傳

瞿九思字齊夫號慕川黃梅人父晟官太僕卿幼麻痺五歲就家塾弱甚星者言兒至十歲始可育晟懼弗督以學晟授戶部主事行兌江西九思從事羅洪先晟任廣平知府九思年十二督學試廣平以隨任子弟例考爲生員檄還黃梅是時嚴嵩爲政九思作定志論上父言權奸柄國貞良被害願父乞骸骨避賢路指類極廣陳義甚高晟讀未半改容已乃歎曰小子剴刻人物其言大過因秘其書年十六晟病日夕不解帶湯藥親嘗晟遺命治喪無內主可迎婦受弔九思遵遺命素車迎婦俾主柩內九思居望室既葬廬墓畢禮後黨日爲婚年十九謁耿定向問春秋二十謁曹大章於京口至南京謁瞿景淳林廷機許穀江西督學徐熢迎主白鹿洞遂如江西與熢論太極定性之學致書羅汝芳論文行年二十五謁鄒善於河南督學胡直迎主濂溪書院復講學於嶽麓書院石鼓書院萬曆元年巡撫趙賢聘修

湖廣通志其秋中鄉試知縣張維翰繁敘激變縣民謀辱公庭維翰誣九思號令徒眾爲異謀御史向程劾維翰激變吏部尙書張瀚駁之九思遂長流塞下其二子伏闕上書白父冤張居正故才九思乃釋歸九思由是閉關著述與門人休寧張復策進心學四方從學者日眾其學原本六經至古史傳記山經地志天文圖籍律歷算數稗官野乘無不搜羅而本朝國史時政典章利弊尤悉可施實用才最敏贍手自鈔錄至指罷不復能字撰著口授門人弟子更相代書猶不給凡十八年不與外事當時自部院大僚及州縣吏求書恐不獲士大夫過境以不得見爲恥萬曆己酉巡按御史史學遷疏薦九思濂洛關閩正傳宜備侍從上命徵翰林添注待詔九思奏云臣原籍湖廣黃梅中萬曆元年鄉試尋以縣事褫革節經先後撫按臣昭雪薦揚於萬曆三十七年聖恩復臣衣巾本年十月復蒙聖恩授臣翰林院待詔奉命之日不勝惶懼夫翰林地近職親爲清華之選待詔承顏納誨司應對之官是必一代名儒庶幾無忝厥職臣何人斯遂辱斯命臣少習先人之業挾策而上賢書原非矯語巖穴者無端受譏遂隸編氓光天化日之下獨爲向隅之泣每北望神京不禁乘風引領豈徒



傷其才長尺短、不得一自効於明時、臣戀主之情、根於秉彝、決於夢寐、亦臣所不自解也。今陛下一旦拔臣於幽廢之中、錄於顧問之列、天高地厚、莫喻深恩。臣有心胸、獨不思生至國廷、百叩舞蹈、以昭千古盛遇。願臣行年六十五歲、元氣耗於思慮、血氣侵於寒暑、手足委頓、耳目昏眩、雖欲伏闕、其勢不能。第念聖恩不可以久、職官職不可以虛糜、草野之士、淺識寡聞、無裨宏謨遠略、然一得之愚、發於感激、亦不自知其迂疏也。先是萬曆甲午、纂修正史、榜求天下知樂之士、而所得張敬、李文察、猶不甚精、在樂則疑於淺近、在詩則疑於散佚。臣載觀秦漢以來、歷代興、國、漢、則分爲六十二部、唐、則分爲十道、宋、則十八路、獨我朝兩京十三省、宛然與周詩、二南十三國風符合。此殆天意欲國朝詩樂比隆成周、誠不自揣、遂欲作爲明詩、以準周詩。如兩京、則準兩南、十三省、則準十三國、事屬郡國者、則準小雅、屬京師者、則準大雅、以廟、陵、及鄉、射、賓、祭、樂、章、則準周頌、以天下藩國、四彝、蕃、國、朝、聘、燕、饗、樂、歌、則準魯頌、以歷代帝王、陵、廟、樂、歌、及兩雅、關、里、天下、儒、學、祭、孔、子、樂、章、則準商頌、卽於其詩、幾、章、幾、句、之下、博、考、國、家、典、故、著、爲、機、宜、以、便、省、覽、至、於、音、律、未、叶、終、不、可、被、之、管、絃、又、嘗、以、司、馬、

遷、李、文、利、二、說、就、中、審、度、定、十、二、律、分、寸、合、之、易、範、律、一、一、相、符、夫、以、臣、之、固、陋、豈、敢、自、謂、知、樂、竊、念、聖、朝、大、典、關、係、匪、細、神、人、賴、以、和、協、萬、物、賴、以、昭、蘇、昭、德、象、功、於、是、乎、在、故、臣、不、識、忌、諱、謬、欲、著、爲、詩、歌、務、使、詩、與、律、比、律、以、聲、諧、洋、洋、乎、登、歌、曼、聲、之、餘、無、異、成、周、之、盛、然、後、臣、心、始、快、臣、願、始、酬、願、因、於、貧、病、尙、未、成、編、伏、願、陛、下、察、臣、病、困、免、臣、赴、任、使、臣、更、加、考、驗、百、無、一、訛、然、後、獻、之、明、廷、以、備、太、平、之、一、助、至、於、臣、之、生、平、別、所、著、述、數、年、之、內、漸、有、成、績、臣、荷、病、骨、垂、延、未、與、溝、壑、他、日、並、得、以、芻、蕘、一、得、恭、奏、九、重、庶、幾、上、報、聖、明、不、次、之、恩、下、畢、微、臣、引、退、之、素、此、臣、區、區、之、本、懷、也、吏、部、覆、疏、九、思、淵、源、正、學、粹、白、眞、修、馳、蚤、譽、於、中、原、大、節、日、無、權、輒、抱、奇、冤、於、一、旦、終、身、念、絕、怨、尤、翰、跡、垂、三、十、年、著、書、凡、十、餘、種、愛、國、忠、忱、形、於、筆、札、太、平、盛、業、決、於、神、瓊、泉、石、而、有、斯、人、廟、堂、足、爲、瑞、慶、應、準、天、順、二、年、臨、川、縣、處、士、史、與、張、幣、聘、來、京、授、以、論、德、萬、曆、三、十、一、年、梁、山、縣、舉、人、來、知、德、以、奏、薦、授、待、詔、故、事、皆、得、賜、歸、有、司、歲、給、月、米、今、九、思、遺、際、與、二、臣、同、而、著、述、之、功、不、啻、倍、之、准、以、原、官、致、仕、仍、令、有、司、月、給、米、五、石、以、示、資、助、舊、成、撫、按、具、奏、酌、量、擢、用、有、旨、報、可、學、遷、於、廣、濟、龍、坪、建、江、漢、書、院、

迎九思主席。卒年七十一歲。從祀府縣鄉賢。所著有六經以俟錄、中府口授、中府位育圖、洪範衍義、仁統孔門、愼解和變圖、實用編、時務表、邊略、倣古綱、蓄艾編、土俗章程、蕭元錄、佛鑰、孔廟禮樂考、明詩擬、幽贊錄、文莫堂集、紀思錄、言善錄、知命篇、歷正同仁手札、後先進呈。子甲，字釋之，年十九舉於鄉，早卒。卒，字曰有，七歲能文。方九思被誣流徙，甲年方十三，爲書數千言，短服號呼，歷抵公卿，白父冤狀。次子往返徒涉，不避寒餒，天下稱爲雙孝。

郝敬字仲輿，號楚望，京山人。父承健，以舉人授蕭寧知縣。敬幼警敏，有神童之目。任俠負奇，嘗殺人繫獄，同縣李維楨力援得免。由是折節讀書。第萬歷己丑進士，由知縣歷戶科給事中。益都知縣吳宗堯奏山東稅監陳增貪橫，神宗不問。敬上疏大略謂：陳增背旨營私，剝官虐民，包買鉛鈔，抽丁加派，種種不法。益都一縣支費官銀二千，合六州二十九縣，歲派銀十餘萬兩，皆非無據。不行勘問，何以正貪殘之罪？彰陛下之無私。宗堯一縣令耳，書生貧苦，猝得一官，豈不自愛，而橫挑虎口，微必不可得之幸，而呼必不可回之天平？自今以後，開采之役不停，內臣之差遣不罷，則知明旨所謂勿擾者，寬慰

臣下之權辭，而以有司之不應需求者爲阻撓之大罪。雖三令五申，豈惟陳增勿信，臣亦不信。陛下且以獲利萬金，晏然無事，而不信臣言，但陛下所謂利者在帑藏之私蓄，而臣所謂不利者在閭閻之傷殘。陛下所謂不害者在目前之苟安，而臣所謂害者在將來之巨測。乞先停止，然後以宗堯所奏下撫按劾問，正增不法之罪。不聽。而山東巡撫尹應元亦極論增罪，神宗切責應元。斥宗堯爲民。敬再論奏，奪俸一年。增誣訐宗堯，贖私詞連青州一府官僉，旁引商民，皆坐籍沒。敬復力諫，前後章疏十二上，不納。坐事謫江陰知縣，以不檢失人望，遂投劾歸。杜門著書，凡數十種，總名山草堂集。而九經解尤爲自得，窮搜其牽，十年始成。大旨見於自序，其略曰：三代而下，取士明經，經之不明，由取士始。士業一經，守師說，得當則入官，經猶敝帚矣。宦成則優游林邱，嘯詠餘日，思入學鼓篋，如傳舍假寓耳。安望知類通達，強力不返，以化民成俗，副國家取士之意乎？余早歲受詩，成進士，三試爲宰，諫官。而十年之間，兩黜考功。予云：誦詩三百，授之以政，不達，余心慙焉。甲辰歲，遂棄官，隱一畝之宮，僻在荒郊，衡門長掩，乃取經籍，課誦久之，於訓詁外，微有新知，苦性鈍，隨筆備忘。前後涉獵九經，爲九經



解分九部、乃銓九教。敎庖羲作易、文王演序、周公繫爻、孔子贊翼、四聖相授、道本一致、百家之說紛然煩碎。執義者遺象、徇象者失意。邵雍圖先天、分易爲二考、亭主舊策、義守卜筮。小道可觀、致遠恐泥。緯緯亂正、易道旁鶩矣。作周易正解部第一。四代之書、選茲述矣。漢之伏生、九十記憶、太常晁錯、種門隸習、凡得二十有八篇、與四代之宏璧也。晚出古文、託名孔壁、良楷異質、漫不相襲。而二千年來、硃佚瀾其良玉、不可弗別也。作尙書辨解部第二。詩三百五篇、授自毛公、古序精研、六義明通。考亭氏盡改其舊、斥爲鑿空、遂使雅頌失所、國多淫風。先進後進、吾誰適從、其毛公乎。作毛詩原解部第三。孟子云、王者迹熄而作春秋、五伯得罪三王、春秋爲五伯而修也。世儒誣仲尼獎伯、貶天子、退諸侯、吾聞諸夫子、直道而行、與民共由、豈其講張名字、深文隱語、如世所求乎。作春秋直解部第四。禮家之言雜、而多端迂者、或戾於俗、而亡者未覩其全。蓋記非一世之人之手、而道有所損、所益之權。訓詁之士、穿鑿附會、理學之家、割以別傳。辭有純駁、義無中遺。舉一隅則矛盾、觀會通則渾圓。作禮記通解部第五。儀禮十七篇、禮之節文爾。先儒欲引以爲經、夫儀烏可以爲經也。儀者損益可知、而經

者百世相因、其辭繁而意瑣、或強世而違情、昔之讀者、苦於艱深、支分節解、盤錯可尋也。作儀禮節解部第六。周禮五官、終始五行、司空考工、水藏其精、緯象之言、縱橫之心。說者謂是書周公所以致太平、六官錯簡、河間補經、世儒因相考訂、而不知本非闕文也。作周禮完解部第七。天縱聖人、爲斯文主、弟子問道、而作論語。廣大精微、包羅羣有、無行不與、誰不庄戶。四時行生、日月開闢、大道忘言、默識善誘。小子何述、詳說以補。作論語詳解部第八。戰國塵飛、處士橫議、周道榛蕪、文武墜地。鄒魯相近、澤未五世、顧學曰私淑、又七篇之言、居山仁義、稱堯述舜、入孝出弟、守仲尼之道、以待後之學士。反約則同、詳說豈異。作孟子說解部第九。首易何也、八卦文始也、次書何也、二典帝始也、次詩何也、二南王始也、次春秋何也、王降也、次禮何也、記也、非經也、次儀禮何也、儀也、非禮也、次周禮何也、非周公也、非周公而經何也、昔人經之、因也、次論語何也、集大成也、終孟子何也、五經之都護也、經五而九何也、三禮皆禮也、論孟皆傳也、猶之五也、五用九天則也、書成通爲卷一百六十五爲解一百六十七萬言。起草於乙巳之冬、卒業於甲寅之春。越六年己未、殺青斯竟。竭蕭貽之才、費桑榆之陰、唯以

僕所夙負、無愧明經而已。敬於諸經、極有苦心、實能見前人之所未及、而避實趨虛、多憑渺索、求之太至、則不免於鑿也。宋人以義理之精、薄漢儒之訓、故訓故誠有不得古人意者、然其功鉅、自不可沒、而宋人或以意氣貶之、不盡由理義也。敬窺宋人之失、而以宋人薄乎漢者、薄宋人、識力亦孤絕矣。而宋人功鉅不可沒者、敬亦往往意氣報之、非盡其識力之悞也。書斥古文、詩用小序、似矣。顧解伏之書、既有所不必解、而辨孔之書、至以周公居東爲兄之至情、亦臆說矣。詩小序之必以首句爲古、雖近似、然亦有不可強爲解者。敬必遵小序、而斥朱傳、不知序取首句、其言未嘗不出於朱子也。周官既不信矣、而又以司空非闕鑿爲陽分六官、陰法五行、冬水藏精之說、則破碎支離、幾於侮聖言也。明中葉後、餘姚王氏之學、再傳失其真、士大夫以良知混儒佛爲一、漢陽蕭氏以郝氏爲良知流弊、而敬著駁佛之篇、與沙門復支往復辨論、凡五千餘言。與黃安耿氏、蕪州顧氏、弟兄出入於老佛者、不類。明代湖北人士、著書之富、莫過於應城陳士元、敬則其亞者也。然陳氏於諸經之外、旁及二氏百家、蓋以博雅爲宗、非敬例也。敬中年自置一棺、題額爲一杯齋、作記自銘、語似達生者流、又爲生

狀死制其銘、略曰：請我爲儒、我百家諸子、請我非儒、我詩書執禮、談元妙者、尋常見聞、窮神化者、隨身規矩、蓋百子之道、不遵忠恕、堯舜之道、不遵孝弟、苟索隱而行、怪賞罔民、而欺世、敬生平學行、未能及此、然亦確有所見者也。敬卒年八十有二。子宏範、崇禎壬午舉人。志曰：瞿九思、郝敬皆儒而佚者也。九思以墨吏誣陷長流、蒙釋、敬亦以殺人繫獄、幸李維楨解之、然皆能折簡讀書、卓然有所自立、所謂雖在縲紲之中、非其罪也。九思之論樂律聲詩、諧聲比律、當矣、而斤斤於郡縣之世、必欲以兩京十三布政使司、上同二南、十三國風之譜、鑿矣。敬於九經諸解、實有心得、爲先儒所未發、然思而未粹、於學往往以己意推求、而無所本也。五經本於漢制、六藝亡樂而得五也、後世七經、九經、十二經、以及十三四經名、計部稱之、亦無不可、敬之言曰：用五而九、天則也、鑿又甚矣。

資政大夫太子少保禮部尚書兼東閣大學士
贈太子太保諡文定毅山于公慎行墓誌銘

葉向高

毅山于公以大宗伯謝病里居者十七年。乃與余同
拜綸扉之命。同趣朝。而公忽病。病遂不起。海內方
喜公之柄用。冀其有所展設。聞公之訃。無不愀然咨
嗟。爲世道惜。天子亦深加憫悼。卹賻踰等。贈公太
子太保。易名文定。遣列卿護葬。事。替再踰年而始克
葬。門人邢公子愿次公之生平爲年譜。李公道川狀
之。而公子緯持以乞誌銘于余。余在詞林於公爲晚
進。不敢以交游禮事公。而當公之末年。所授分推轂
惟余。方相期以匡濟之業。而公已矣。今者之役。其安
可辭。公諱慎行。字無垢。一字可遠。別號毅山。其先世
出登州。卽史所稱高門之系。入明。始徙東阿。高大
父忠。爲邑三老。忠生時。以高年賜爵。時生玘。爲平涼
府同知。以節廉著。祀名宦鄉賢。公貴。而高年公與平
涼公皆贈禮部右侍郎。兼侍讀學士。平涼公娶於劉。
累贈淑人。生公。公生十一歲。失劉。執喪如禮。嘗條淑
人言行著于篇。讀者悲咽。十四試童子科。郡縣皆第
一。學使者孝豐吳公異之。拔冠充郡。隸學宮。州判某

來攝邑。以側理隴。廉簡公。公不受。平涼公問故。曰。此
分宜客也。宜遠之。藩伯萬安朱公招公與濟南于建
真。同其子維京講業。以閩士鄭日休爲之師。磨礪薰
蒸。學日益進。遂以辛酉舉省試第六人。佹解首矣。而
主者以其文大奇。故稍抑之。髻而赴鹿鳴。諸大夫卽
席欲爲冠。公以未奉父命辭。衆皆嗟重。再上春官不
第。屬朱公開府濟上。公復從之遊。戊辰第選庶吉士。
師殷文莊。趙文肅二公。殷言詞章。趙言經濟。趣操不
同。而皆深器公。庚午。授翰林編修。纂修肅皇帝實
錄。明年。請急歸。又明年。召修穆皇帝實錄。甲戌。同
考禮闈。穆史成。以勞賜金幣。晉翰林院修撰。編纂
六曹章奏。會典重修。公爲纂修官。隨以推擇充日講
官。時上方勤政。勵學日御經帷。早出晏休。孜孜不
倦。而公與同事諸公皆一時名流。所開陳裨益甚多。
公主講唐史。每至成敗得失之際。未嘗不反覆論說。
上輒爲球聽。講罷。時出御府圖書傳觀。或分命題
咏。公不善臨池。詩成則倩人書之。具以質對。上又
大書責難陳善字。賜公中外相傳。謂爲盛事。丙子。進
翰林院侍講。明年。世史成。加俸一級。江陵相欲奪
情。公與同官蘭谿趙公。新建張公輩七人共爲疏力



儒藏

言其不可而疏章則公與張公所創。其時毘陵吳公姑蘇趙公以言奪情事杖北闕下。公疏入而桂林呂公從中止勿奏。江陵以講臣故未敢顯斥。乃佯以他事致公喪次。字謂公子吾所厚而亦從人爲此耶。公正色曰。以公厚我。故爲此相報耳。江陵斃然再踰年。已卯。公遂引疾歸里。居且四年。詔入日講如故。同講六人多公同年。官高者至貳卿。下亦銀緋。而公猶守舊秩。久之。乃進左諭德。時江陵已謝世。言者懷慕其罪。上震怒。命司寇丘公同內嚮往籍其家。當江陵柄國日。既大夫士大夫心。及其敗也。咸推波助瀾。欲其之以爲快。公獨貽書丘公。言江陵嘗有勞于國家。是非功過。當爲別白。卽間有所受取。亦可指數。家之所藏。遠較分宜。近視馮瑞。皆萬分不及。而必欲捕空提虛。廣爲搜括。以稱上命。竊恐株連蔓引。今起公私皆受其累。是江右之已事也。又江陵老母在堂。諸孤少不更事。覆巢之下。顛沛可傷。宜謀干有司。請于明主。乞以聚廬之居。立錫之地。以合于古人惟葢之義。纒纒千餘言。極其切至。乙酉。典試南畿。晉翰林院侍講學士。丙戌。讀廷試卷。晉禮部右侍郎。兼侍讀學士。先是。壬午。南畿所舉士有挂議者。上命覆

試。大宗伯沈公以嫌避。諸公莫敢決。公爲表之。軒五人。輕一人。衆咸帖服。一日。方坐曹。誼傳午朝鳴鐘鼓矣。百官倉皇趨入。公獨遲遲偵之。則訛言也。上聞。責禮官鴻臚對狀。奪兩月俸。公與馬已以執奏。泰藩封事忤。旨用他事奪俸者。再隨轉左。戊子。畿試。儀郎高桂擢舉者八人。上命覆試。試之日。廷議開然。公測停乃解。已丑。會試。爲知舉官。考滿。改吏部。掌詹事府。甫蒞任。卽擢禮部尚書。兼學士。疏請冊立。請郊廟。請禱雨。及宗藩條議諸大典。禮而冊立最懇。章無慮十餘上。時上意已默定。而不欲人言。屢旨責公。公持之愈堅。至自劾乞罷。坐是又奪俸三月。今甲。親王故絕。以將軍入繼者。衆子不得封郡王。滿王違例請。公力格之。京考行。諸臺臣不便也。御史某以爲言。公議仍用京考。拂其意。迨山東疏上。遂構公預洩典試主名。上諭閣臣詰公。閣臣爲解。乃已。猶奪俸三月。公自爲宗伯。屢以職事廷爭。屢引疾。上時而慰留。時而誚讓。嚴旨與溫綸錯下。公雖感激。主恩而於義度不能留。業堅去志。至是遂杜門力請。凡九疏。乃報允。賜金幣。給驛以歸。時新安許公。山陰王公亦以言建儲事先後去。公歸而掃墓築塲。出

賜金置酒、延親故道說生平。時往來別業白庄、觀刈獲自娛。間或出遊、近則雲翠、天柱、大壘諸山、遠則岱宗、靈巖、鄒嶧、華不注及泗上諸泉、皆有詠述。四方冠蓋過阿城、無不造廬請謁、公多以病謝。惟二三知己或門生故舊來訪、則下榻留連、累日夕而後去。臺使者每報命、輒首薦公。南北宗伯有闕、必以公名上。屢推內閣、再推教習庶常、皆不用。久之、以講臣聞、上復思公、以舊官詔掌詹府、使講春秋。比公疏辭、又復不報。至丁未歲、廷推閣臣七人、公爲首。乃被命以太子少保、禮部尚書兼東閣大學士入輔政。公再辭不允。而余亦自南來、過公、公喜甚、約余子從舟而吾從陸、相次趨朝可也。時公以宿疾發、微有所苦。既就道、則趑趄不欲行、徒以與余有成言不可負、而余亦數使人邀公、謂公不來、吾不敢先入國門。公乃自力前、抵近郊、尚平善。陸見之、辰以快寒拜起、舒緩司儀者欲毋糾、公不可、仍自具疏請罪。上溫旨慰公、令亟視事。而公固勅舍人勿解裝、爲歸計。自是病卧。一日、忽草遺疏、惓惓以親近大臣、補官官、起廢棄爲請。呼所善門人、使受而書之。已伏枕長嘆曰、吾終不能報國矣。更數日遂逝。逝之日、適南都以所梓穀城山

館集至、公猶反覆披閱、指點訛謬、亟馳一快遺余。蓋此集乃余請以什梓者。嗟夫、寧知公遂以此訣耶。公生于嘉靖乙巳九月二十九日、卒于萬曆丁未十一月二十二日、得年六十三。始劉淑人夢蒼摩羅果綴寶甚巨、遂生公。故公自兒童時已儼然大人器度。弱冠登第、入詞林、人即公輔期之。高文襄公以相臣握權柄、與公尊人有通家誼、嘗向朱公問公。朱公謂公宜一往見、公卒不往也。御史劉臺上疏被逮、人以江陵故率避匿、公獨往視。當江陵世士大夫附麗稱功、頌德者十人而九。疾而被禍、所爲引大體調護營救者惟公。諫者不謂然、而以公嘗服忤江陵、無以難也。事定之後、始相與服公。所與司寇書、天下傳而誦之。其爲宗伯、固以直諫取忤。至于被摈而去、去而久不陟召、說者謂公或別有所桡繫、公終不自言。其最相知契者無如歸德沈公、卒相繼爰立、世亦並重之。直講前後十四年、遲承恩顧、凡郊祀、陵祭、幸天壽山、閱壽宮、無不扈從。錫賚精鏐、實楮、金符、文綺、彩扇、綉錦諸物無算。而敦倫好施、所得俸賜多分給羣從族親。益置祠田、緩急交游知故及其子弟、故橐中嘗無餘財。自宗伯謝政歸、始構數椽、僅僅中人居耳。居恒



愛片言如柳下惠仲由而爲人排難急困往往不吝。至鄉邑大利害如條編徭役災告諸事抵掌論說無所諱避。性尤好書常夜分誦讀至老不倦。于文早學。學六朝麗綿密晚年乃益近自然有歐蘇之致。里居日久四方慕其名凡碑版志傳贈送誄祝之類無不欲求公之一言。羔鴈填門公擇而應之常有餘力。其詩則服膺李于鱗骨力氣格大足相方。所著自梓集外有春曹奏議讀史漫抄經筵講章兗州志筆塵史摘若干種皆宏博精覈成一家言。當次第傳於世。郡邑皆祀公學宮兩臺使者復下檄專祀公。余既次公事爲志而嘆曰其故天之於人斯也夫以公之沈深挺勁寒暑快快不吟不吁爲世所倚信多假之年則文潞公少假之亦庶幾司馬君實也而奈何奪之速哉。然公嘗爲余言時事大難如有不可遠而蔡剛成近而薛河東皆吾師也。由今觀之吾又安知天之奪公者非以成公平乎。九原可作尚當起公而質之。

（國朝獻徵錄）卷一七

劉孝廉約堂先生制行狀

羅大紘

隱君劉孝廉者泰和城西人父太僕公爲浙東慈谿令。生君故名制字君東約我其所自號也。晚年人稱

約堂先生。其先世居邑之龍溪自俞溪遡泮塘至長沙定王皆可譜。高祖父仕昇曾祖父汪俱有至行。祖父坦溪翁端祥以子太僕貴贈儒林郎光祿寺寺丞。父策齊翁逢愷嘉靖辛丑進士釋褐爲慈谿廬江兩縣令。歷官南太僕少卿。母周氏封安人。太僕令慈谿政行俱勵。一夕夢神人抱童子授之曰佳兒也爲慈人報德。遂生君東。君東生有異質五歲能受西銘九歲問天地窮際。日月往來之故。太僕公奇之。稍長有丈夫志。目光若曙吐辭音韻洪暢矯矯以氣節自任。年十二讀書駕部齋閣時椒山楊公以直諫得罪詔戮於西市。君東遙屋空行至夜半聞已死慷慨歎曰楊公千載有餘烈矣。始冠著尚志論又爲無愁子。隱逸先生。明空道人傳。無愁子酒也。隱逸先生菊也。明空道人燈籠也。論操尚不羣語更藻拔三傳興致散朗翩翩然有塵外之思。識者稱爲達器。太僕致政君東隨歸補諸生高等。明年丁卯隆慶改元舉江西鄉試。君東嚮學方銳不欲赴公車。太僕勉之曰欲爲天下士豈可不友天下士。入燕盡友諸名士如太僕教亡何太僕卒。明年聞訃奔歸朝夕依靈席足不及內。親友相對未嘗破顏。君東負才名高識古人士友

咸器重之。同郡鄒食寧汝海曾大理于健公車往還共談名理。大宗伯尹洞山公中丞魯魯原公大相期許而觀察胡廬山公屬望尤深。貽書告誡必大人言行。君東頗自刻厲期有所到。他如益都朱司寇南都焦太史蘭谿胡元瑞新建丁右武臨汝湯義仍諸海內名士初試南宮皆在燕社中談苑賦詩相得甚驩。最後稍豪於酒久之乃作楚生戒以自儆。君東雖好結客然律已甚嚴。試南宮下第大學士李公得其遺卷心奇之欲致一見。君東不可曰落第書生豈可自呈身相門耶。後江陵張公欲致之東閣亦拒不相見。然四方同輩文學行誼有聞或工詞賦工書法必多方訪求盡其能。家藏書無算尤喜名人草書如宋仲溫解大紳帖更所珍愛。每出視友人輒咨嗟歎賞舉醇酒酌之爲快。蓋樂善好友重交誼矜然諾其天性也。荆王太傅李九標爲孝廉時相善李無子有一女杯酒修好未聘亡何李死女之母亦死人皆謂李氏一門衰落兩家子女尚幼且無媒妁解盟不待幾矣。君東折柬告親友曰使李君未嘗見吾稚子而許也吾猶當撫其孤女也。矧言猶在耳渝之義遂迎女歸至長乃婚其子。及李氏爭產起訟太守汪公曰

李無子唯一女當分其貲產半予女餘以分同祖親。君東辭不受曰吾成盟爲義也若分其產豈不反吾初心乎。太守義之不強也。癸未下第有故人司選者勸就京秩。君東咲曰士能爲大用不能爲小用吾不敢當。然能爲可用不能爲枉用君亦信我乎。司選曰劉君志自鵬落耳。君東歷試南宮不遂欲懸車終養太夫人不可。亡何太夫人卒君東哀毀歎曰吾已矣夫。二親不存吾年近艾復逐逐何爲遂投牒不仕。明年有司致公車常費辭不受。構終慕堂志孝思也。又歎曰士不得志廟廊則游園亭適志耳。遂築園以自怡名之司空曾公投詩贈曰爲園自擬陶徵士作賦人稱漢子虛而君東自序之曰吾從先君宦轍二十二年半在長安舉於鄉八上禮闈友四方名士憶在先人膝下挺秀發奇披翰振藻自謂生而爲吉州男子縱不能杖馬箠驅馳萬里外繫單于頸亦自當策天人陳禮樂立名清時或犯顏極諫以報天子豈意至今日哉。己丑丁先恭人艱僅存餘息盧次沾濕兩足幾成支離年與疾俱至日月云過志業杳然。得時則駕不得時則蓬蒿而已。先人之敝廬旁有隙地古樹數株方池半畝因結茅爲園藏先人遺書萬



卷及古今金石篆隸之文寶墨名畫數十家。詩竹萬竿、種柏千行、古梅蟠松、緋桃藥柱、蓮蕖蘭畝、名花間錯、布滿庭砌。題曰自怡園。取陶隱君語也。予往還燕都、歷名山大川、探奇選勝、獨徘徊匡廬、覺有神會。石象之南樓數十尺、傑出城頭、可攬貢江。予所獨契、固在於斯。夫大人達觀、任化昏曉、時申則紆其文采、運屈則歛其風藻、故馳騁翰墨、登封作頌、已非吾分。卧箕山、固首陽、又非其時。扣角悟主、輪遶要譽、亦義之所不敢出也。想蘇門之逸响、系濠濮之玄韻、哦詩松下、誦古林間、時展草隸、品其精劣、研鍾史之遺刻、摹解宋之鮮墨、神與情會、悠然自得、盤踞匡廬、恍凌三疊、對五老、雲生几席、泉響嶼島、采其玉芝、精以瑤草、寓目南樓、清氣襲衿、嶺水東注、風恬波澄、時一命酌、高唱朗吟、澹泊虛洞、精瑩爽靈、憶子真於盤中、招東方之歲星、斯亦劉生之一時也。若夫良朋通刺、守令枉駕、穿曲巷、遶錦屏、淪茗竹檻、浮白花前、嘯琴、日客不以爲傲、主人亦不厭也。任性而動、隨意所一琴一詠、無喪無得、雄心頓盡、解吾發結、人境俱遠、伴先哲、客有問予曰、君在園中何事、應之曰、禹禪緡綸、孔顏行藏、盡在於是。後遊士過君東園者、爲什

英多、編爲怡園雅集。太守黃梅汪公、武林張公司李、慈谿劉公、長吏張公、徐公、萬安陸公、皆式其廬。辛丑、建太子覃恩、詔天下舉人不仕者、授都察院都事、予冠帶。友人勸就之、君東曰、吾且者已弁髦之、假者何爲。又感時事、欲入燕上書、過少宰鄧公、勸沮之。歸構焉、文館見志。直指桐城方公、問君東高尚、無書不讀、欲表其閭、且疏薦於朝。君東託友人辭之。雖杜門却客、而宗族閭里、孝義甚篤。念龍溪祖祠祭薄、送田數十畝、豐其牲牷。歲饑、承太恭人命、發廩賑之。邑有度田覈口、爲畫佐有司之闕。太僕公、今慈谿、廬江有惠政、並俎豆學宮、而慈人復以脩勣、楊慈湖先生祠、倡明學脉、奉主祀、享慈湖書院。吉水少保魯公、亦以太僕有鄉行、言於學使者、入郡縣鄉賢。君東遺子廷曾、至慈告廟、自送郡縣主、皆涕泣盡哀。慕崇德、錄昭德懿德錄、附二親之志。太宰羅文莊公、學宗程朱、爲西昌理學宗、自世講良知、而文莊之學墮。君東曰、程朱一脉、豈可遽廢。校編文莊集、梓行於世。學者耳目爲之一新。少宰劉槎翁詩刻久敗、君東曰、國朝詩以唐音鳴者、人但知起自北地、不知吾槎翁已先。是濫觴、輒爲訂梓。并脩快閣志、以槎翁有快閣詩。君



東少承胡廬山先生引接同輩諸賢者皆相與講學而君東志在進取後稍爲任達至末年矍然曰此豈足畢吾生耶遂罷招納謝交遊廢登臨壹意默坐讀先儒書會其大旨尤尊信王文成具見焦太史區侍御曾太僕往返書中其答區書略曰不佞弟於陽明先生推尊太過或亦不無緣弟童而習之終其身若臨我父母師保不似世人僅口耳而良知之也夫生知者豈必堯舜文孔哉孔子且猶遜其生知自謂好古敏求而已然好古敏求衆人不知孔子獨知之卽生知也文成間關鳥道龍場苦心始悟大學一闢舉世習訓詁而文成獨反求諸心以其苦心得悟誠爲困知然舉世安於所習不知困而文成獨困則吾知困者亦生知也他書不具載載其所獨契者遺子廷曾受業鄒爾瞻氏曰汝當以賢者爲師毋效阿父甲寅年七十一脩中元祠祀戒子姪曰吾期將至矣八月遣廷曾徵鄒爾瞻手書太僕公墓碑曰勿急吾十六七猶能待汝於是乘肩輿歷園亭命孫與諸子盡茗行酒盡日而休曰從此逝矣後寧復有主人翁廷聲耶廷曾還數日輒病友人王養初京兆周章南駕部盛服造縣令聞君東病且革不解帶趨視君東使

人謝二君而卒卒之日母問知不知皆爲歎息流涕平者于七八百人爲文祭者數十家吉州人士唯西昌風流儒雅差別各邑而君東產於浙受鑑湖剡溪之氣以故踔絕大非凡流少居燕邸著三傳殊爲平生之識其軒豁通朗類明空道人對客豪飲於無愁子得趣最深然終於隱逸晚節更勝也予嘗謂君東生於洙泗當與琴張曾皙相亞在晉人蓋阮步兵王右軍之徒哉予與同年鄒爾瞻居田間久知君東其子廷曾將乞銘於爾瞻而屬予狀故次第其生平以俟作者

孝廉約堂劉公墓誌銘

鄒元標

予以癸酉舉于鄉時吾師大司寇朱鑑塘先生李古州數向予語諸孝廉至約堂劉公大爲擊節而最後予丁丑成進士浮沉南北大理魯于隄水部蕭希之太史焦弱侯爲予言公從諸君子明月論心深悔從事斯學之晚是時予心儀公矣頃予倦遊棹舟過白下數從公別業杯茗譚心知公爽達豁落益軒然墮埃外人恥與世俗儒同伍非世眼所能測也公旣殯就予遣其子宗魯來從遊乃公下世宗魯過而泣曰家大人抱才不偶所知者二三君子石上之銘惟吾

師是託。予不敢辭。按狀公諱淵字君東別號匡南晚號約堂。先世出長沙定王後凡數十傳而爲坦溪公。贈光祿寺寺丞是爲公祖。太僕少卿策齋公公父也。公少穎敏少卿公絕愛之。以弱冠登丁卯鄉試人謂公一第轉瞬間乃連蹇不第。人爲公扼腕公慷慨自喜。凡四方能文者善詞賦者善書者咸與遊。諸能文者曰君東才十倍稍出緒餘便可蹴蹋吾黨而君不屑曰吾里自有正學諸先輩謂雕蟲小技壯夫不爲吾不得比壯夫乎。凡鄉里先正長者術王新建學必尊信其說曰吾家大人得諸先生長者不敢忘也。諸舊遊者間調笑曰君東何苦爲此君謝不顧杜門不。上公車者幾二十年。一日予過而諷公仕公曰劉生傲骨卽仕又陶柴桑矣。予笑曰柴桑官三月後賦歸來辭膾炙人口。子一日不仕何歸乎。公笑曰辭中有既往不可諫亦悔其仕而非與其覺迷塗而返吾寧不失足迷塗之爲愈。予曰若然又加柴桑一等矣。笑而別。一日公復過予論易。予曰易之道在復吾輩繼擾擾名場欲場中情識熾如是非毀譽紛如無了期未有不至頻復迷復而滅頂者。迷復之凶及君道也。吾輩心爲君君爲主則百體從令故曰首出庶物萬

國咸寧卽不遠之復。公起而言曰雷陽物也。復之象曰雷在地中。先王以至日閉關蓋飲其強陽歸于無有。故曰剛反則亨。予拜公曰公之廿年捷關獨處其有得於復之義耶。公起拜曰不佞敢云不遠之復惟復以自知而已。不佞敬服公之造。常語友人曰君東先生非削跡爲高者蓋有見於其大者然也。公家有藏書名賢墨跡數千卷名園花卉奇石半類三吳風致。然公暫娛其中曰它日聽兒爲町疇場亦可吾何與焉。其達如此。性最孝祠祀家政極其脩舉。每念太侯公精心服官爲人辭訖泣數行下。及祀謚宗名宦配祀慈湖則忻然喜曰差足慰先大人地下矣。訓宗魯一以澹薄恭讓爲語故宗魯世公之訓如公生之日人人以公有賢子公可瞑矣。銘曰抱璞不售而歸于匱雖則蘊匱其光可燭西昌仕國亦多偉人公其傑特晚韜而絕濃而能澹剝而能復旣明且哲先民芳躅目如電光舌如懸河誰截橫流孰能不波有子能文公實不死揭茲懿行以俟傳史。

居士陳鉅泉墓誌銘 何喬遠

萬曆甲午歲、豐城李孟誠先生以止修之學倡通閩中、
中士從游甚衆。獨同安陳時仰居以諸生科高第、而
李先生推同有三陳焉、其一為居、其一則居之族子復新、
其一也。概稱豫章、得正石而方重。慈孝能殫、得
下和質而始珍。人知李先生之推重於居、而不知居之
無待而與、自任衣冠而已然者。蓋居之學見先生而發、
其止修之旨、迥居之學未見李先生而一遵居教窮理
之緒、則尤確然而精密。李先生之說盛行閩中、居不遵
沿其意旨而推明之、而居教窮理之緒、自亦究心程朱、
濂溪諸儒、未有能契其蘊者也。居之言曰、二程年十四
五便脫然欲學聖人、吾年幾何、自謂後生、轉眼便是四
十五。又云、朱子年十四歲便慨然有求道之志、窮理
幾如反躬實踐、色莊言厲、行舒而恭、坐然而直、凡集必
正、書籍必用必懸。自少至老、如寒暑暑、進退顚沛、未嘗
少離。學者第思無立志、志如此、我便見朱明通弟兄、何
愧矣。又曰、今之論士貴有識見、然徒善議論、龍文章耳。
識者、識聖賢之可學而罷也、識己之當學聖賢也、識學

聖賢之愈于求功名富貴焉也。也不憂貧、不諱賤、惟恐
不及聖賢而已。又曰、吾身有大處、儀範之一敬而已。鮮
惡、執止自況為仁、欲盡慈信、敬用五事、自符于言貌觀
聽思也。呼我小子其敢夙夜不敬。又曰、大德不貽、小德
出入可也。此可起人、非所律己。守道之士、寧拙而守
拘于道內、毋溢于道外。步、收斂、至德性堅定之後、自
無勇融而不帶美。又曰、工夫在平時、未見工夫、惟于欲
斷未斷之時、勉強接去、大工夫也。身于細常事物之大、
尤貫穿于著衣納履、爾為公書之一舉一動。又曰、無言也
而如見、無容也而如承、無思也而後若、不類也而亦融、
無義也而亦信、此真所謂默而識之也。又曰、學問盡上
之妻子、處下之夢寐、攝養則則夢寐之間不在身心而
在天下、涵養則則妻子之懷非相親、誠則相親。又曰、
會友所以輔仁、講學所以修德。自昔賢人千里從師、豈
求友志難同、旋不報、足宜問事空譚。士又必先見此
意趣、如魚得水、然後可相勵有成也。蓋居未見李先生
之時、堅志而遠於往己如此矣。維吾泉蔡文莊公於
今猶稱理學名臣、夫考當時所與門徒講論者、不過即



儒藏

科舉之中列而入於聖賢之道、而文莊之學所以金然、
推仰于世無間然者、唯其著述五十條、如「克治進修」
之務。蓋士未有不功于自治而可以盡操學問之虛譽
也。如君自任衣冠之日、所以自勉如此其至、吾所以事
先生之門藉居焉、重、而非君之學藉李先生而長者、君
自得從李先生之說、所以發明師說不遺餘力。蓋求友
聚會、敦行敦業、而於漳中吳九川、蔡廷賢、吳中王台輔
則契好尤深。後進初學方藉君發蒙立操、而君遽然
亡矣。然君雖亡、而所以治身修德之言具在、有志于道
者、當聞而興起也。君諱金鉉、時仰其字、世為同之莊江
人。其先有貞貴公者、六傳而生存立公、存立生見果公、
是生君。生嘉靖某年月日、卒萬曆某年月日、時年五
十五。子某。銘曰：仁為己任、死而後已。是惟莊江之陳
子。陳曰：菊兮、存芳正、時經卷兮、歲年正。思美人兮、終
古已。後千百年、時時約是。

明抄本（明文海）卷四六

松庵胡先生傳

國家尊崇宋儒、士以理學名世者、指不勝屈。然十
九縉紳先生順風而呼耳、布衣之士惟陳剛夫、王
心齋、胡敬齋最著。當萬曆時、廷議修從祀之典、進
者三人、而悠悠之口尚有遺論、惟于敬齋則翕然
無敢置半喙、豈非居敬之學真得宋儒宗派、而非
如頃悟懸解者、可以虛辭借耶。今新昌有胡松庵
先生、與敬齋俱江右人、俱布衣、其學俱以實踐躬
修為正的、造次不苟。沒後、新昌人請于學使者、視
之鄉賢。蓋雖未得與敬齋並居兩廡之列、而已隱
然無愧于學宮之俎豆矣。先生諱用賓、字其佐、別
號賓巖。以子觀察君貴、贈中憲大夫、浙江按察司
副使。生而廣穎豐頤、氣度偉如。初就塾、即以聖賢
自期許、同輩若熊觀察、蔡學憲、熊兵憲、皆以為畏
友。為諸生、攜舉子業、亦匠心命意、發明道術、不作
流俗綺語、以求合于時。雖屢困有司、不恤也。久之、
而行誼愈孚、其學問所得亦漸以顯。融章灼、為世
所尊信、執贄而請、開塾而延者、屢恒滿戶外。日經
師易得、人師難求。欲求人師、就有如胡先生者、而
先生愈益自好、斤斤于義利之際。嘗夜拾遺金、候



至明還其人。有少婦私挑，毅然絕之。人或咲其愚，先生曰：吾愚于欲而明于理耳。晚乃舉觀察君，知好學，程督甚嚴，日舉西江之理學，節義相勗勵。曰：此皆以聖賢心傳聖賢口者，吾兄勉之，毋效俗人所爲，愧鄉先進也。其論文章，則謂歐、曾、蘇、黃不在漢唐諸人下。國朝如瑯琊歷下，自是大家。若皇陵、晉江之談理刺骨，亦何可少。論治道，則謂千古治亂否泰，皆根于人才之消長，皆卓有獨見，不隨人口吻。平居惟澄神默坐，神遊千古，胸中空洞，不着一物。久之而靈慧漸露，見人動止文字，卽能定其終身。觀察之舉于鄉及第南宮，皆豫策之，殆庶幾于至誠前知者耶。當先生爲諸生，父以充軍，槍米憂憤成疾，又會嫁女，無所得貲，沒而意恨恨也。先生悉解其室人簪珥，衣婢以予妹，敝廬數椽，薄田數畝，盡鬻以償充糧。曰：以此慰吾父耳。叔無嗣，所爲奉養葬祭無少缺。邑令知先生貧，遣人遺數金，曰：以此爲觀察膏油費。先生語其人：此令君恤貧士耳，毋漏乃翁。觀察既貴，臺使者遺以冠服，弗御。邑大夫賓之費厚，力辭不赴。郡守樓君稱其性情，遊義皇以前人物，在秦漢而上，人皆以爲知言。

生于嘉靖辛丑三月初四日，卒于萬曆丁巳三月十四日，得年七十有七。請在陳司馬、朱太僕表誌中，不具論。

論曰：近世士大夫以講學爲詬病矣。夫使講學者而皆質行直修如胡氏兩布衣，其決能病之。夫布衣無羶薌之染，無榮辱得喪之念，超然有鳳凰千仞之致，苟能篤志于學，宜士大夫不能及也。而余所親觀察之居官制行，猶有布衣風，則松齋先生之教遠矣。觀察余所舉士，乞余爲先生傳，且曰：此吾父命也。余甚愧其意，乃所傳先生者，僅如此。世有志理學儒林者，亦可以觀矣。

葉向高撰（芥園餘草）卷八

明故陝西鞏昌府通判錢君墓誌銘

鎮江有好學修行之君子曰錢君翊之。以明經起家。爲山東萊州府膠州州同知。遷陝西鞏昌府通判。以年至致仕。講德譚道。爲鄉先生。凡十餘年以卒。其子玄以戶部郎中賀君煥之狀來請銘。於乎。自宋以來。儒者各唱師說。以立門戶。謂之講學。而姚江之良知爲最盛。世之談良知者。其是與否。吾不能知也。以謂莫若反而徵諸其人。以其人爲質的。而學術之是非較然矣。君少卽有志於問學。聞良知之指。有所契合。會以貢入南雍。江西鄧文潔公、楊端潔公皆官留都。君握衣兩公之門。往復扣擊。及其官膠州。楊公爲吏部侍郎。檄致君銓曹署中。是正所著書。決歲而畢。故所得於端潔者爲尤遽。君居官計口食奉蕭然如老書生。膠州有孟公堂。宋蘇文忠公遺跡也。刻後祀菊賦於石。陷置壁間。時時誦之以自廣焉。州有軍丁戶絕者。臺使者欲勾補之。君奮筆署其牘曰。有軍不清。官之疲也。以民代軍。官之橫也。臺使者怒甚。卒不能奪。君譏然亦竟以此知君。鞏昌通判分駐西寧。逼處土番。

覈兵餉。繕城堡。戒嚴以待變。而又請於監司。賞番酋就擒者。以風動之。諸番感擊。卒以無事。其去官也。惟載長安石刻十三經。以歸。顏其堂曰石經。我冠深衣。與諸生端拜講貫。老而不輟。此君之生平也。君其有得於良知之深者耶。抑亦扣擊于文潔。端潔而不自有其少學耶。抑其進而求諸古人之學。知而允蹈之。而不復涉歷乎近儒之門戶也。然則世之講學者。以君爲質的焉。其可矣。君感端潔公之知遇。晚年走數千里。漬酒墓下。其在長安。故丹徒令龐君時雍抗疏忤權要。交知縮頭。莫敢問君獨送之國門。執手而別。君之剛毅特立如此。其所得于問學者。要不可誣也。君之卒。以天啓壬戌二月二十四日。年七十七。配呂孺人。先君十六年卒。年六十一。孺人與君合德。自學以至宦成。篝火宿肉。內外斬斬。子一人。曰玄。以某年某月葬君于丹徒縣之黃漩。合附呂孺人塋。銘曰。錢氏武王始開迹。點簡尾。蹕徒厥邑。雲洲傳芳。弘祖業。有子七人。君奕奕。樸學拙宦。絕藻飾。元氣浩然。迓玄宅。厥子辭賦。美金璧。後如有聞訊。炫石。

校記

①學學：當衍一「學」字。



藏儒

明儒碑傳集 卷八五

明儒碑傳集卷八十六

楊起元 瞿汝稷

明吏部右侍郎楊復所先生墓誌銘

今上己亥歲九月二十日。吏部右侍郎復所楊先生卒於墓廬之側。兩臺使者以聞。上哀悼。輟朝。賜祭葬如禮。不肖某甲辰起田間。又明年。同門戴士衡君以其伯見。所狀來徵銘。憶白己丑歲。先生分校禮闈。蒙收不肖為門下士。先生不以文章器不肖。進而與談性命之學。奈機緣淺薄。無能時承密誨。方卓先生晉少宰。獲遂私願。不虞有太夫人之喪。又不虞甫暮年而先生從遊地下。庚子歲。不肖奉大夫致政。過白下。倉聞訃音。慟而哽咽。僅附同門一致奠。及捧訃狀。且泣且讀。向南天拜而呼曰。吾師乎。吾師乎。非不肖之銘而誰銘焉。謹按先生諱起元。字貞復。別號復所。世籍惠州博羅縣。代有大人。歷宋元入我明。有伯安公者。四傳而生。始由伯頭鄉徙歸善。潤以次子順封徵仕郎。順為先生曾祖。由武功歷官山東膠州。生男八。次五天祿公。是為先生祖。從生子三。季傳芳。號肖齋。司訓潮郡庠。封文林郎。翰林院

編修。配郭氏孺人。肖齋公學研經史。識精理數。其所著要義諸書。用以開先生者。不可殫述。觀其履歷有云。頭上青天。一點浮雲淨盡。庭前白日。五更夜氣流行。其大較可規已。先生公之長子。生而穎敏。為兒時。緝有大志。幼弟恭平。先生甫八歲。作文以請。鬼將焚時。叔祖天樞公視之。見其詞嚴義正。情哀意懇。淚盈數行。下每誦讀。尤嗜學論。肖齋公命著講義。觀其意。其所發明。得一字。以為天德王道之本。又嘗嘆趙則平。不過區區臆見。猶能知論語一部。佐制守。使其知學。則宋室規模何讓唐虞。且言編論語必首學。乃知人能弘道。學固所以進人於弘也。肖齋公大奇之。常以數虛為誨。先生出語人曰。大人將欲見兒虛其心。寔其腹。年十五補郡弟子員。肖齋公設帳傳經。郭孺人拮据治饋。先生見而涕曰。兒已置身儒林。乃不能報科名。迨二人以祿養。將人子謂何。於是下帷發憤。兩寅歲。督學使者羅公拔之首。決以丁卯元屬惠庠。蓋謂先生也。明年果領鄉薦第一。年方二十有一耳。屢困南宮。惟是孜孜問學。不遠千里而師友是求。聞江陰李先生往請益。言下大悟。遂



以弟子之礼。為萬曆丁丑登進士。廷試二甲第五。選庶常。授翰林院編修。時當事者頗屬意先生。明年請告歸。四方同學者踵相繼。于是構樓永福之巔。終日商榷。若將終身焉。乙酉起原官。雅不欲赴。肖齋公進先生而前曰。得無以我二人在念。今幸尚健。飯亡恙。獨不能從先遊乎。適借與之官。丙戌分校禮闈。丁亥。轉修撰。冊封崇藩。戊子。主闕試。己丑。復分校禮闈。轉國子監司業。又明年。轉洗馬。兼修撰。充玉牒纂修官。賜金幣。未幾入經筵。進崇聖志。熱聖學。以隆萬世。極治蹟。壬辰。仍分校禮闈。先是。先生所取士。文皆雅馴。故茲命即再三不督。云。時肖齋公已家居。先生出闈。嘗思。不樂。若有神先告者。省親歸。而中途聞訃。徒跣星奔。慟而欲絕者數四。郭孺人曲為解慰。得不死。先生苦塊。柅側柴毀骨立。出肖齋公所。閱書。畢。陳靈石。宛如獨立。適庭時已而卜吉兆。肖齋公見夢于斗嶺之墟。用襄宗。窆。構於墓側。至釋服。猶然居之。乙未。起國子監祭酒。先生以母老乞侍養。上令奉母承懽。屬太孺人心知其意。日促治裝。不得已而應命。猶居月餘。始就道。今讀其志。思詩與別墓詞。悽

惻婉痛。丙申。晉南京禮部侍郎。會宮殿浩災。旬陳不職。乞賜罷。以還天譴。旋以太孺人病乞回籍終養。未得請。丁酉。復上修寔疏。大約以承郊廟。隆聖母。卹民隱。勤步禱。當無怠御。極初心為言。未幾。轉南吏部侍郎。其明年請奉母歸養。未得旨。兼攝南禮部主事。上元儲冠婚疏。歲星陵工成。適祇命祭告。聞墩民有割股愈親者。乃表其廬。行縣優卹之。其因親致孝類如此。未幾。召為北吏部侍郎。先生知太孺人有歸意。草疏致辭。與太孺人之卒。值奉樞還。奠于馬嶺。先生仍廬居。往來于二墓之上。一步一鳴咽。林木振微。若為助哀。乙亥。構初宇郡城東。肖齋夢示以聯曰。學問則士希賢。已希聖。希天。人丁則十而百。已而千。已而萬。何精相感。召若斯之至也。秋季得病。廬中。知不起。召子。但囑言。就浴所。振衣冠。焚香北拜。有過家拔擢。未酬報稱。稽首天南。永辭聖代之語。二童子掖回卧內。所善友人徐叔敬遠在五十里外。急召之。至。先生躍然起曰。固知勞君。已。應然肯真。所謂死友也。徐君猶為慰籍。先生正言曰。形骸有盡。神明不滅。豈以或而亡乎。已而纔。數言。惟欲徐君以諸子之幼在念。囑

子便惟以不望家致為高。越翌日，將召醫，先生乃曰：「吾者醫病也，非醫命也。」將修祈事，先生又曰：「祈者祈所願也，吾願見親父於地下，更何祈？」眾曰：「若此，將何歸？」曰：「親在安師，語畢，忽起，周視如遠行狀，遂斂手端坐而化。距生年嘉靖丁未九月二十四日，享年五十有三。」先生曰：「世祖有初於五指，而聖學王臣夢之詩，及先生薨，則又有教魚，所望枯柏之點，發祥閭秀，豈偶然哉？」先生學宗明德，行篤倫常，於書無所不讀，最嗜性命之語，為真詮。於當世之務，無所不周，嚴切格君為上務，於賢無所不學，而嚮往於江，立廟繪像，何殊藥室之情。於先故舊門徒，靡所不厚，而恤孀妹，撫其孤，愛諸侄如其子。即生成之思不啻。治家純尚德化，而正容惜物，今非禮者自起，敬起愛。若居官二十餘載，而版食門閭猶然，未第體道。愛世僕，必優念維桑，里族不煩，則又皆其餘事。先生配梁氏，以編修初考封孀人。繼室林氏，俱先卒。側室張氏，男七人，長見璉，以迎祖母，擢道卒，未娶。梁出，次見峻，聘廣州鄉宦彭哲與女。次見暉，次見輝，雙孕，暇聘庠生姚楷女，俾聘鄉宦車梁女。次見明，聘庠生陳毛仲女。次

見成，待聘俱林出。次見暉，待聘，歿。女一，梁出，適國學生王漸魁。門人吳道南曰：「人於學，固年以進，先生之聖功，蓋以始末。人於親，則物稍遠，先生之孝思，慕以終身。況隆師無間，友生及弟，惟知親愛，推斯以何所不洽，更何以緒餘屑之。然為先生表見哉。且先生亦大矣，神明不滅，斷祈無事，最所建臨，深願薄，真無愧曾子易箦時已。嗟春山之北，願幸斯文之未喪，乃為之銘曰：學言孔志，孝言舜恭。與我師，亦趨亦步，趨步匪跡，神交冥寤。明德紹宗，旦暮猶過，聲氣應求，山遠來聚。大治洪爐，是欽是鑄。聖王臣兆，已先付五百貞元，匪師奚庸。將佳城，即寄霜露。靈品在天，應無所位。神祀無疆，永綿聖祚。」

明抄本 《明文海》卷四四四

明長蘆轉運使加太僕寺少卿致仕瞿公墓誌銘

瞿公雖以任子起家而海內稱其行品清高文學賔富。歷官所至。建豎卓然。以期以鴻鉅之業。固有巍科甲第之士。所不敢望者。余私心甚頌慕之。而公之弟。今楚學使者星卿為余所舉士。公歿而星卿以墓中之文屬余。喜於為公後也。乃又愀然悲曰。天乎。奈何遽奪公哉。公宗伯文懿公之伯子。諱汝稷。字元立。別號洞觀。其先自宋季有義不仕元者。始居虞山五渠里。五傳至宗大。宗大四

傳。是為文懿公。世稱昆湖先生。娶李夫人。四十始舉公。在母腹時。醫妄以為瘕。欲去之。百藥不效。生而偏體皆青。羸甚。嘗患疔毒。醫言不可治。忽有異人授以方。立愈。人遂以公為遇仙。是後公識解日進。涉獵淹通。宿儒不能抗。然以善病。文懿公不欲令苦讀。遂用蔭入成均司成。姜公周公試以詩賦。拈陰韻。皆立就。才名傾六館矣。文懿公請告里居。公旦夕扶持。不少離。居喪毀瘠幾殆。三年不入內。時督學君纔五齡耳。公念文懿遺囑。每撫之悲號。至旁近。侍者皆為出涕。



卒喪而有家難、內訌外煽、又主以貴勢、人推固萬端、公屹不為動。嘗有假蓮社招公者、至則闕無人、而道旁有持刃伺者、賴偕友道徹乃免。蓋久之禍始紓、而文懿公遺產亦盡、蕭然四壁矣。謁除、得臺幕、移某府幕、皆以潔廉著。同官與列侯爭禮、執政右列侯、衆莫敢對。公抗言、軍府參佐惟視篆者、得稱屬、餘則否。求樂中儀注可考也。執政無以難、議遂定。秩滿、晉郎比部、持法介介。宗室為扶溝令、所秩訴於朝、逮令下、曹讞公。謂令甲宗室出郭有禁、是安得至邑庭。如至邑

庭、即邑民耳、以令治民、當何罪。大司寇懼忤。

昔有難意。公曰、此某所治、即有譴、某自任之。讞上、令竟得釋。居比部且三年、以有所避、請改南、得繕部。南繕部雖閑曹、然有金錢出內及內外營造諸役、亦繁數也。公鈎校精覈、一錢不妄費。胥徒縮手。權開故有材木可備興作、往在事者置不用、而與商為市、所糜無算。公請罷商用權木、司空是之。嘗與陳御史某共權龍江關、有羨緡、故事充主者、交際公、請於御史以歸部。御史盛稱公。黃州楚

劇郡素稱難治。乃以公守黃。公念黃俗
善訟。每聽讞必手具爰書。所麗法皆明
告訟者不移晷立辨。郡庭肅清。居間皆
絕。採木

詔下。他郡率用富民充役。多破產。公獨
給官繒。擇衛弁董其事。民以晏如。趙直
指文炳微行至黃。得公治狀甚嗟服。以
為龔黃。召杜再見也。而以爭麻城令事
糾公。移邵武甫下車。稅璫檄列郡。欲有
所求取。詞又倨。公爭之臺使。不得。遂投
牒徑歸。主爵者雅重公。起守辰州。其地
民夷錯居。易以生釁。公寬平鎮靜。莫不

安之。保靖土司彭養正有嫡長子象乾。
弗愛。庶子象坤而象乾者。酉陽土司
冉御龍甥也。御龍故與永順土司彭元
錦有隙。養正死。元錦遂聚兵逐象乾。立
坤。兵拿不解。當道議征之。公謂楚民方
困。用兵非計。乃檄喻元錦。謂立後以長
國有成法。誰敢柰之。撓法以取禍。智者
不為。且爾不見。呼拜與楊應龍乎。播州
之後。爾實在行間。前車不遠。而柰何蹈
之。元錦得檄。涕泣自陳謝。象乾卒得立。
而象坤自其父在日。已竄名。征播叙跡
中。至是遂賣緣得給宣慰劄。公念如此



必再爭難未已也。亟白兵使者取其剽
五燬之。奸謀乃息。時復有大將議剽苗
黔中。議割辰四衛一邑屬黔。皆以公言
格。辰人大悅。擢長蘆運使。權璫欲加商
稅。公力爭乃止。又勸其蠲換單稅。璫不
可。公請於鹽使者。疏罷之。潞藩例有
食鹽。中消射利。至用舟千艘藏匿私販。
射殺杆柵。公為極言利害。且將論奏。中
消懼。減至六十舟。後遂遵之。洪水為災。
當道議賑卹。公謂賑無益也。令所部悉
覈地利。當興與貧民能勝畚鍤者。計工
授食。浚利國濠六十里。興國河八里。橋

梁陂池道路。悉行繕治。民賴以無事。未
幾失其配王淑人。淑人賢能以勤儉佐
公。後而公悲甚。又竭力官守。尺寸必親。
即鹽使者每事皆倚辦。公坐是愈瘁。屬
當入計。事竣遂以病乞休。銓部方用異
等薦公。不聽。後知公病篤。乃為請以太
僕少卿致仕。

命下而公沒矣。公至性過人。事父母極
其色養。以太夫人率於家難。摧痛尤至。
人聞其哭聲。無不隕涕。事庶母殷安人
如母。教誨星卿。自壯年至成立。諄道
義。絕不及生計。分產諸弟。輒推佳者。而



自取硯確。歷守三郡。長驪司。皆脂膏地。未嘗取一錢。在黃日。有武弁得巨蟹于江。以獻。公笑。留之。仍投之江。自蚤歲。即精禪理。參入微奧。嘗著有指月集。而最。不喜溫陵人李贄。以為得罪名教。居恒好講學。至當官。則絕口。曰。毋樹幟。以啓倖也。所著詩文。二十餘卷。絕似漢魏間言。其牢騷佻傖之感。多托之于賦。凡十餘篇。卒之日。為萬曆庚戌三月十三日。距生嘉靖戊申四月初三日。得年六十。三。自家難後。娶贈淑人常氏。繼即王淑人。子三。式來。娶趙氏。少宰趙公用賢孫。

女。繼歸氏。庠生紹懷女。式黼。聘錢氏。副使順德。孫女。式鉉。聘蕭氏。按察使應官。孫女。女二。一字嚴。知府澂子枋。一朱字。俱王淑人出。以某年某月某日。葬於文懿公之東偏。公遺命也。余於公。僅一再望見。蓋臞然不勝衣。而其浩然之氣。嶙然之守。質之孟氏。所稱一介不取。千萬人吾往者。真無愧也。每念國家用人。如公者。當在三旌九列之選。乃世人拘。擊。雖能知公賢。而終不能為破格之事。以處公。即余初入政地。嘗與晉江李公。力薦公於銓曹。而竟莫予聽也。乃無何。

公亦逝矣。故余因志公而不能無公私之恨焉。銘曰、

弱其貌、強其守、蓄其施、豐其受、惟忠、惟廉、惟孝、惟友、是社稷之寶臣、而人倫之魁首。胡官僅外寮、年亦中壽、是孰窮其有、惟德業文章、蔚在人口。於戲、茲之為不朽。

賜進士出身、光祿大夫、太子太保、禮部尚書、兼文淵閣大學士、知

經筵

日講、

制誥通家侍生福唐葉向高拜撰。

明長蘆都轉鹽運使司都轉運使加太僕寺少卿致仕元立瞿公傳

公諱汝稷、字元立、吳郡之常熟人也。以父文懿公任爲郎、累官長蘆都轉運使、

詔加太僕寺少卿致仕。初、文懿公爲公娶徐尚書女。文懿公歿、公三年不入內、公仲弟夔與婦徐以姦聞、公叱嬖徐去之。郡邑吏皆尚書門下士、親知故舊、承望風旨、游說百端、公不爲動。尚書養刺客、遮道刺公、公僅以身免。公往謁尚書、踞上坐、尚書厲聲詰公、生自念亦有所悔乎。公仰而應曰、悔不能刑於寡妻、至於兄弟。尚書卒無以加公。王元美爲之詩曰、瞿生狀眇小、氣雄三軍帥。有志必自酬、無鋒可令避。蓋稱篤論焉。公筮仕得臺府散僚、顧獨以潔廉著、嶽嶽持大體。軍餉自府幕給發、有入官常例錢、公在後軍府、悉謝去。已稍遷中府、故事、後府都事出、軍士跪逆諸途、它府則否。軍士之跪逆中府、自公始也。同官與豐



城侯爭禮執政右豐城公取永樂中儀註以進執政莫能難扶溝令以扶宗人被逮嚴旨下部議公爲比部郎當具讞請于尚書曰宗人安得佚宗正條微服入令庭令自扶扶溝民耳何罪讞上令得釋南繕部爲奸商窟穴興作輒倚辦商所冒破縣官金錢無算公請用兩關榷木榷木不至朽蠹而商不得比而爲奸榷龍江關與陳御史某共事一羨緡必歸之公南都人爲之語曰長御史乃怕短主事蓋公狀短小故云而陳御史者乃益盛稱公爲言于大司空朱公遂用推擇爲黃州太守公生平念任子一途在于綺襦統綉之間非國家所倚重而其人亦鮮激昂感槩如長沙黃巖者奮欲一洗之中更家難益自刻勵少侍文懿公長游于王元美陳廷祿趙汝師諸君子國家掌故及近代人才政術無不淹通服官南北投分皆海內名士志節慷慨相與引重而公又嫻習吏事潔身修行歸本

于實用以一任子居閒曹人望之如鉅公長者云而黃故羯獍好訟公謝絕請託手削爰書大聲誦之琅琅徹堂下訟者叩頭服罪傳相救屬詞訟衰止公嘗爲詩曰訟庭橫高霞質成澹無事蓋其治狀若此無何徙治邵武中貴人括稅者移檄八郡用監臨體公爭之不得遂移病歸公于黃法不當徙以爭麻城令忤按臣故比歸聲益起卽家拜辰州太守湖南土官永順彭元錦最强與酉陽冉應龍相仇殺而保靖彭象乾者應龍之出也象乾失愛于其父欲立其弟象坤元錦助象坤聚兵逐之事久不解公移檄諭元錦曰竊聞宣慰悅禮樂而敦詩書數奏膚功不自矜伐苟循是道金日磾之賢可跂而及也乃以挾立彭象坤一事噴有煩言夫立後自有成法撫按司道諸臣孰肯從宣慰而紊國家之法耶宣慰世受爵封耳目綦聲色口體綦甘適指揮進退罔不如意三州六司之人豈盡勇力

才諤不逮宣慰而俛首聽服哉亦恃國家之法耳終身覆幬國家之法而不知法之覆幬我是猶魚之在水而不知水之生我也魚不知水之生我蕩而失水則雖有鱣鯨之力且制于螻蟻矣人不知法之覆幬我縱而收法則雖負富强之盛且罹于僇辱矣宣慰自恃富强謂

朝廷莫如我何宣慰自計孰與寧夏之哮與播之楊氏哉哮拜以降胡數立戰功歷位總戎遂有驕色既而鄭經畧行邊以其子承恩隨軍承恩視邊城諸軍皆出其下歸益驕先是歲一日有雀集拜之左肩旋而右繞者匝匝凌雲而翔拜喜語人曰烟霄遐舉此其徵乎及寧夏兵亂衆欲推拜父子則先歲雀翔之日也于是乃逐亂軍爲變寧夏城與虜僅隔一後衛守後衛者爲蕭如薰楊司空之婿也狀貌如婦人女子拜遣驍將哮雲往攻之楊司空女力贊其夫誓以死國如薰鼓勇而前

以一矢斃雲拜爲奪氣拜父子卒就屠滅雀集之祥可知已矣以拜之強倚北胡之援而一荏弱少年與一翠帷砥室之女子竟能當先而挫其銳天下事何可易量乎宣慰之強不過哮拜敵國之援不如強胡職司楚地者又豈乏一弱將一女子哉竊爲宣慰危之也哮拜事尚在北隅播州之役宣慰嘗馳兵而與之角矣往者萬人喪者八千蓋十不存二其強豈後宣慰播地之險且廣又孰與永順也安疆臣九域土司之冠也以女女應龍子豈不念其親姻而從大軍共滅應龍計一失足於應龍且與應龍同禍故忍情決愛以圖自保也今宣慰纍端尚淺翻然知悔白圭可全若不良圖而逡巡護前噬臍無及竊爲宣慰惜之且宣慰所以甘心象乾不利其立者以象乾西陽所自出慮其合而扼我也宣慰一出師而象乾僅以身免西陽疆土亦日蹙其無奈宣慰何亦已明矣重虞易與之鄰國



而忽視不可干之國典不亦異乎。昔尉陀決計于陸賈而彭寵失聽于朱浮豈賈浮之言有善不善哉。兩人之聽異也。宜慰誠能聽本府之言尊國家之法保靖立後一從漢法請力任其無咎不然宜慰所樹碑家廟以播事垂戒子孫後事之師豈遽忘之也。元錦捧檄泣曰太守生我矣遂解兵去不敢逐象乾而元錦所題詩句流傳巫黔間語頗不孫又匿彭勉忠數人不聽出當事者欲窮治之公謂元錦用命不用命關係國體詩句有無不足問彼既用命又欲窮治其用事之人恐威損而法不行。管仲相齊下令于流水之源令下而不察下之所未必從非行令之術也。後先奏記數千言保靖永順酉陽三司事乃大定。亡何勦紅苗之議起。公上議兩臺曰苗地接楚蜀黔三省當楚蜀者晏然無事冠盜竊發卒歲不過一二舉黔視楚蜀多苗警邇年頗寧息今茲之舉實起于黔總戎陳某蓋黔有

食糧熟苗龍惠大種苗也居小橋頗爲部落所歸。中國羈縻之假以指揮服色總戎初至遽革其糧苗警日起總戎以爲皆惠也二月總戎使健步王仁續至惠寨仁續淫苗頗惠并苗婦殺之白狀于總戎總戎誘惠殺之盡滅其家五月復殺其弟富夫漢法民姦人頗女者并殺其頗則勿問惠故奉漢法也又以白總戎何至殺惠而滅其家乎。繫起如是幽在我矣奉詞討之不亦難乎。據沈洋之疏謂其地徑不過百三十里則自方四計之五百二十里圓三計之亦三百九十里況其地勢與南越同真有如劉安所稱山川要塞相去寸數而間獨數百千里者未可以幅員程計者乎。四五百里之內其人奚止數十萬上下山險若飛履茨棘蘄岩跳躍如猿猱方跳躍時以一足獶張背手傳矢往往命中掉鎗以衛弩執弩者口銜刀而手射人度險能整退必設伏此苗之長技也而其性好獨居阨守

不能遠攻。今若盡殲其類，則彼將聚而救死，苗長無樂生之心，部落有必死之志，以數十萬之衆，據四五百里不可測識之山川，我未可以速得志也。我國家征苗之師，宣德六年興師至十二萬，而都督蕭綬最稱勇畧，綬馳師池河，入苗心腹之地，屯田築圍，以示久留，諸苗震悚，綬受降，設堡而退。正德之師二萬三千，嘉靖中興師如正德之數，既復益萬餘，而殺傷亦畧相當。國家之不盡殲苗也，亦愛苗而不攻乎？抑亦窟穴遐僻，道路阨塞，未易窮討乎？

二祖創業垂統，凡夷漢雜居之郡縣，必名之羈縻，蓋取漢虞詡之言，欲臣子顧名思義，知懷柔撫綏之道也。今乃橫席中國，強大興無名之師，括杼軸皆空之財，供組練不貲之費，勞瘡痍未復之衆，攻往古不臣之夷，苗之所結怨一人，我之所騷動三省，背

二祖之訓，貽兆姓之憂，失策甚矣。爲今之策，惟

令各哨堡傳諭苗長，其不願助龍氏爲亂者，人自首與之，劉諭以携其党而誅其不用命者，苗自縛渠魁以獻，餘悉赦勿問。即使一偏裨提千若百人往足辦矣。不然，黷武興戎，兵連禍結，國家之患，吾恐其自勦苗始也。議上事得寢。大抵溪峒蠻夷難擾易亂，不當以漢法治之。流官治夷又不能一切循漢法，生蠻夷心，而卒以糜弊國家。永順紅苗兩役，微公其不爲播事者幾希。公以一郡守削赤一隅，再弭疆圉大故，曲突徙薪之功，世故罕有能明之者也。貴陽按臣欲以四衛屬黔及復設沅州總督，川湖貴都御史公條上其不可狀。公守辰猶能抗國家大議，以守臣說駁御史。去今才十年餘耳。長蘆鹽政日弊，公以都轉運使往治，風清弊絕。如汰潞藩食鹽之艘，蠲商人落地之稅，皆與中涓文移往復，力陳利害，乃著爲令。歲大侵，議興工作，浚利國濠六十里，與國河八里，事舉而民不害。是歲上

計京師

詔舉天下清廉異等官。公與焉。庚戌春。公病甚。還長蘆。且卒。政府福清公曰。我真失瞿公矣。及其聞之。未章也。亟言于銓部。題覆卿銜致仕。

命下時。公卒已六日云。公孝友天性。文懿公晚猶近女色。公難于彊諫。第持其衣袂而號。文懿笑曰。嘻。我知之矣。李夫人以家難卒。公廬墓哀哭。感動路人。公諸弟。獨星卿賢。且少孤。公教督之不遺餘力。卒爲聞人。余少以姻家末屬。侍公于公出世經世之學。蓋竊聞一二公少嗜禪宗。赤髭白足之侶。靡不叩擊而醉心于東溟。管先生納履稱弟子。其與管先生論學書有曰。師教在融三而歸一。稷謂得其一。則無問三也。真得其一。不妨人喚作一家。貨。否則爲三脚貓。終無用處。著石經大學質疑窮極原委。管先生心折焉。痛嫉狂禪。思以實行楷柱之。于溫陵李先生斤斤不少假借。

公安袁中郎。溫陵之徒也。入銓部。顧首推轂公。吾邑趙少宰汝師與婁江王文肅負一世望。兩雄不相下。公以通家往還其間。不激不阿。然于婁江卒無所附麗。公所與游多當世直節士。婁江所側目者。婁江愈益嚴重公。余以計偕過長蘆。與公劇談三日夜。自分宜華亭以來。朝著變更之局。與國論牴牾之端。抵掌而譚。不失毫髮。余以此益心服公。公居恒謂代無全人。人無全是。黨人無裨于漢代。而宋賢有辜于新法。于祭耿恭簡文見微指焉。然而不敢盡也。公病革時。余候公邸中。微言死生之際。公執余手語曰。一泡起還一泡滅。吾何怖矣哉。去易簣僅浹旬。其志氣清明如此。公少好辭賦。遭難時作松聲賦以自廣。邵武歸作雲鶴。武夷二賦。及行路難十八首。格調在江鮑間。寄託深遠。殆有過之。五言古雕金鏤彩。步趨三謝。佛乘碑版之文。多間總持。出入海藏。宋文憲以後一人而已。公子未語。



余先公于子有烈士之知，必事也。傳先公者，嗚呼，亦也。斯爲公子也夫。史議益曰：崔公蓋質有其文，真實有用之君子也。浮沉散曹，一麾出守，再見齟齬西戍之間。閣部大臣雅知公賢，駁駁向用矣。以一卿銜死，不竟其用。嗟乎！士生斯時，其能用者與有幾？公乃以不竟其用，令人有餘思焉。於乎！悲夫。公嘗語余：古今政治名實參半，如朱子所行常平倉，亦虛名無事實。欲有所論著，不果。余故述公所論永順紅苗事，詳著于篇，令後世得以覽觀焉。賜進士及第翰林院編修彌甥婿錢謙益頓首拜譔。

以上二文并見《樸園集》卷首

校記

① 據全句文例，「希天」上當脫「聖」字。

② 「聘」下當衍一「聘」字。

明儒碑傳集卷八十七

顧憲成 趙南星 鄒元標 馮子咸
許孚遠 季道統

明南京光祿寺少卿涇陽顧公碑

顧公名憲成字叔時世稱涇陽先生者也其先不知何許人宋有將仕郎百七公者始家上舍里數傳至廷秀商文毅公爲表其墓再傳爲如月公諱麟又三傳爲友竹公諱緯邑諸生公之曾祖也父南野公諱學始居涇里以公貴贈戶部主事母錢

封太安人生公兄曰涇田公性成仲曰涇白公自成弟曰涇凡公允成公自涇田公書卽多覺悟十歲讀韓退之諱辯每遇南野公諱輒避之然不可勝避爲鬱不樂師問知之以告南野公昔韓咸安王諱忠語其子曰汝諱我是忘忠也夫忠可忘則我可忘也自是遂不諱忠南野公喜以告公學之不可忘亦猶忠矣公謹受教公少時家貧不能延

師就學隣塾歸必篝燈誦讀恒至達旦其爲舉業之文握管立成瑰朗新妙而雄逸之氣馳江決不可圉也隆慶庚午試爲邑諸生萬曆丙子舉於鄉皆第一其冬居南野公之憂庚辰舉進士爲戶部主事海內學者翕然稱公之文章宗尚之然公篤志孔孟及宋大儒之學潛究默行不屑爲文章之士是時江陵當國方橫舉國若風中之蒲葦公與南樂魏公允中漳浦劉公廷蘭慷慨論議持天下之名教是非江陵聞之不平以語中相國申相國三公之座主也三公皆上書欲其匡救江陵然江陵固不可救亦未敢與公壬午江陵大病舉朝醵金爲祭禱於神公拒不預同曹代爲署名公使人塗滅之江陵竟歿申公及新安太倉秉政以公爲吏部主事尋以錢太安人年高告歸丙戌除驗封司主事明年考察京官時辛公自修爲御史大夫而海公瑞爲南御史大夫執政羣小咸憚之於是御史房寰醜詆海公此時涇凡公成進士遂與同年諸公壽賢彭公遵古同疏劾寰皆放歸三年



然後用之學官。涇凡公之直聲震天下。爾二顧云。於是辛公司計。當路皆喪其私人。惡之。而工部尚書何起鳴被劾。人有謂何若能去辛。可以德執政。卽同歸。誓耳。何大喜。遂許辛公。而給事中陳與郊等並劾辛。何以戰國從橫。實圯辛。而辛何果並罷去。御史高維崧。趙卿。張鳴岡。左之宜。皆以劾起鳴降官。公乃上疏言。何起鳴許辛自修。旣罷自修。謝之矣。而又降四御史。此皆出

朝廷意耶。降四御史。以承望。彼陳與郊等顧非承望耶。疏上。謫桂陽州判官。日與諸生講學論文。戊子。轉處州府司理。司理刑官也。公專以孝弟教人。多所感格。己丑。居綏太安人受。辛卯。司理泉州。壬辰。鄒手如爲考功管大計。舉公廉吏。尋陞考功主事。吏部從來無出而再入者。非乎。如不能爲也。時上久不立

東官。至是

詔與

兩皇子並封。云待嫡嗣。其時首相則王太倉也。

上殊信任之。公唱四司上疏言。臣等稽祖訓。

東官原不待嫡。

元子並不封王。且

陛下建儲之期屢改矣。今日待嫡嗣。是無期也。又貽書太倉切責之。太倉懼禍。並封之議竟寢。人以是知太倉所欲爲。無不如意者。而第假

上以行其私。癸巳。公爲司勳。鄒公元標已投之南刑部。求去。有

旨放之去。公力勸太倉疏留。勉從之。及餘姚孫太宰罷。推代者。時少宰趙公用賢署吏部。太倉屬以推羅宗伯萬化。宗伯翰林也。又其氣類。故欲用爲冢宰。以盡數大權於政府。公曰。往者內閣之推不專在翰林。今已專據之矣。而復兼冢宰。是翰林之外空無人也。此斷斷不可。少宰以告太倉。太倉志甚。然其議遂格。而陳公有年爲冢宰矣。及公典選。有會推內閣之

命。舉七人。山陰王公爲首。而宗伯不與焉。太倉益

悲甚曰、羅君推冢宰曰非翰林所宜、今推內閣又不可、何耶。復以屬陳公、陳公不聽、而王給諫彈宗伯疏亦至、公遂削籍歸、而陳公亦竟去。給事中遂公中立上疏力救公、亦見黜。先是、公見羣賢被擯者日多、欲漸汲引、非太倉之意也。值其假沐而推孟公一脉、王公德新輒得旨。太倉佯喜、謂公曰、此機括甚佳、自此益亟推舉、欲以爲激。

上之怒而除所忌、又委過焉。自公去而懷忠持正者無不得罪、林下充實、吳中尤最盛。是時涇凡公亦得罪歸里、公兄弟與羣賢時聚而講學。其學惟就孔孟宋諸大儒之書闡明之、溫故知新、不離乎區蓋之間。高明者聞之可入、始學者聞之不駭。公之白當道爲東林書院、大會吳越之士講學其中、東林之名滿天下矣。戊申、起南京光祿寺少卿。命偶下、公知當道無意用之、不出。既而推京兆不下、易以他人。又推僉院爲陪。時富平再出爲冢宰、其先爲冢宰、乙未管外察、黜馬督學猶龍、丁參政

此呂等賢者。少司馬沈公思孝面非之、遂上疏得旨逮此呂羅致之、遣戍而死。富平猶恨沈公、而又有人言沈公欲奪之位、及淮揚巡撫李公三才亦其所不悅、李公方被羣喙、公貽書政府及冢宰、言李公在淮揚能制稅璫不敢動、安民弭亂之功甚大、其人磊落、非暮夜受金者。又言沈司馬、馬督學之賢、富平怒、語人曰、吾已容之矣。於是一二攻李公者、語稍稍侵公、公惟自反、不與稽也。又其甚者、以東林爲詬駡及海內廢棄之人矣。論者以江陵刀劒也、其害雖慘而有所不及、繼其後者猶天地之害氣、氤氲于風雨霧露之內、依托於雷霆震電之中、以致其毒、爲禍甚烈且深。公竟不用以殆、善類咸悼之。南野公故豪傑之士也、顧公爲諸生時、在位者或念其貧、有所餽遺、南野公一切不受。顧公早捐俗情、屢空殆庶、益得之庭訓焉。公生于嘉靖庚戌八月七日、卒于萬曆壬子五月二十三日、年六十有三。配朱氏、封安人、處士怡橋公女。生三子、曰與淳、太學生。云云王孝廉以尚雲從之所爲



狀來部上。屬趙子爲之碑。趙子曰。余自壬午與顧公同爲戶曹。顧公已講學矣。余樸鄙任真。顧公乃厚異之。癸巳。余筦京察之役。顧公再入銓部時也。其教我甚多。余被罪太宰。餘姚孫公亦奪俸三月。公與李公復陽同疏救之。不理。而涇凡景從諸公皆貶官。無何。公亦削籍去。大抵太倉之權也。而太倉再被。

召公猶倦倦望之爲善。及所上福清富平書。望之破露錄善。去私効忠。蓋其憂天下之深愛。

國之至。不暇計其可與言否也。時貴以其異已。遂詆及講學者。夫無論其講學。第觀顧公弱冠通籍。二三相國皆同鄉愛之。江陵夙卽拔之要地。顧公以救失爲報。無姑息之意。二三公者。見謂自心。恨不可解。此固超出恒情萬萬矣。其於名教是非。

社稷安危之計。無不挺身力爭。竟至罷官。其居家非孔孟之道不談也。善無鉅細。無不爲也。行無隱顯。無不兢兢也。一事之美。一節之立。不足以稱之。豈非慥慥君子哉。鄒爾瞻亦講學者也。以言事遭。

戍。旣復其位而旋錮之。講學者皆欲忠國家。於身無所利。倘亦可以無苛咎乎。嗟乎。顧公不灰可也。然灰可矣。余與公相知深。靈陶之紀。寧可遜謝。其詞曰。

三五旣遠。鳴鳥噬天。哲降非辰。世道是肩。進思盡忠。直行抗言。抑撥薦莠。斷。

社稷安。元老曰呼。庸爾余患。佩之以珖。不復爾還。仲尼素主。堯舜讓賢。厥惟素臣。何愧九官。邪說亂正。吾道之姦。昌言排之。夷庚匪艱。兄弟同道。讎焉雲騶。混沌未期。聲名永傳。

明朝列大夫南京光祿寺少卿涇陽顧公墓誌

銘

涇陽先生系心斯世斯道者數十年一旦長逝天不可問矣元某雖未奉促膝之懽然巖岫間魚鴈不甚沉寥擬藉公為歲寒盟而公遽然元某豈獨一人痛哉公子淳之涉長江持大行高公存之狀來請銘予不忍辭按狀公諱憲成字叔時學者稱為涇陽先生顧之先自將仕郎百七公始家上舍里數傳至曾祖諱緯邑諸生諱生夔夔生南野公學以公貴贈戶部主事母錢氏封安人生四子公其仲也自幼沉毅異常兒讀韓文諱辨每至封公諱輒嘔不忍吐師以告封公封公召而語之曰昔韓公教子不諱兒奈何諱學公尊教惟謹常私書壁曰讀得孔書方是樂縱居顏巷不為貧以自傲一日師講禘之說章公請曰夫子既不知何以知其說者之於天下如斯也惜或人未能再獲夫子之蘊矣又一日講養心章公又請曰愚以寡欲其善於養心否為主欲為復

主強則百物退聽其應類多類此師驚而謝曰子俱如是觀五經註腳豈虛語哉庚午補邑諸生丙子首應天試以丁封公憂未計偕庚辰登會試高等授戶部主事朝夕與魏南樂允中劉漳浦廷蘭切磋砥礪不愧科名觀時政紕繆忠佞倒置輒憤不能平擬書上申相國有所匡紕後觀魏劉二君書說而當遂附名進江陵漸有聞方以語相國未幾遂謝世不然事有不可知者在江陵病傾國走羣望禱葉署名公走馬立削去後江陵卒始晉吏部孜孜人才即幽隱不遺以錢太安人壽請告者三年閉門讀易春秋二經丙戌起驗封司丁亥大計會有亂何尚書起鳴者尚書疑卒大中丞自修陰欲諸御史遂得降級公上書抵尚書語侵內閣甚力而屬望大臣臺省與被言者各當自反其言甚公而正通國傾服當路不悅落公職判桂陽州先是蘇柳二公及莊定山俱以謫至州人士望公來如三先生式臨之執經就業者甚衆亡何轉處州李公下親民事有閭閻者曉譬之



藏

各欣然去。方以此得淳屬其心志萬一而兩臺禮公以差歸。公歸丁太安人憂。起泉州理。壬辰大計舉公廉察。欲第一。尋推考功司。公至官。三王並封議起。首疏偶同官爭。及與太倉往復爭者。侃侃無所回互。竟得寢。已趙高邑南星司計。盡然諸要人子弟。嫻嫻公實左右之。趙忽奉旨罷。公疏願與同罷。不報。已領銓事。凡公啓事與海內意所欲用者。當路色沮不欲用。太倉所欲用家鄉與內閣公復尼不行。久欲中公。以公時望攸屬不果。乘公推內閣起王山陰。遂削籍歸。自公歸。正人披靡。遲者細者如銜風之葉。無寧羽矣。公歸得重病者數年。至甲午始甦。各有劄記。沉潛梓密。與讀書錄相表裏。同學者日衆。乃與高大行景逸關東林集同志。歲有會。月有紀。其所最研辨者。無善無惡心之體一語。曰如是則善可不為。而惡亦可橫行。蓋有感於世之儒名盜行者。不佞聞常教書商度。公曰。子言救世也。故自爾爾。與子密證。以俟異日。然公之所造亦淵乎微矣。嗟乎。使天假公年。

世觀真儒之效。惡可量哉。蓋嘗論非無誤執者。自公經執出世。遂以為王聖復起。握管者却步。非無啓事者。自公奏剏出世。遂以為子瞻再生。起草者屏息。世非無登壇者。自公東林一闢。世遂以為瀛洛更甦。虛騎者愧恥。顧公一入銓曹。東方彈冠。遂之桂陽。再入銓曹。東方引領。細之家山。三起光祿。堅卧不起而竟天。耶人耶。公雖不得盡其用。然所與天子宰相爭是非可否者。皆國本重計。宗社遠猷。即寤寐寐語。夢覺問惓惓不忘國家。夫非實以身肩斯世斯道者。所必不能。謂公一日樹千百年計可矣。彼抑公者。蓋天以斯文之責付公。公必不以彼易此。鄒子於公有餘慨焉。公之上書右沈司馬。李司徒及銓曹諸事。原不為一人一事起念。又官從大夫後。與山林上書者不同。世遂有不深惟公者。公常教書曰。近從十磨百鍊。逼出真身子來。公宜可及哉。公已竟數年。諸君子彬彬質有其文。異世且加賴之。如公弟季時。國子薛君。果其人者。恨不起九原而肉之。以為世儀。矧存



存寥寥、獲其毛羽、猶懼吾道不振、而思推殘之耶。公居家孝友、可追古人。平居所與友人觀摩者、惻惻雍雍、居然名儒軌轍。為末學計者、能不熟數公執行而一今後世有所師承焉。公生嘉靖庚戌八月、卒萬曆壬子五月、享年六十三。配朱氏、封安人。處士某女、子三。與淳、廉例生娶莫氏、邑廩生某女、繼娶鄭氏、霑益州二守某女、次與淪、陽、次與沐、郡廩生娶唐氏、翰林庶吉士某女、繼娶嚴氏、太學生某女、女二。一適王孝廉永圖、馬平令某子。一適太學生王世學、行人存之公子。孫男五。柏、梅、俱淳出。柏聘劉氏、南京兵部郎中某女。梅未聘。杓、桂、俱沐出。杓聘義興王孝廉某女。枏聘琴川太學生趙某女。桂未聘。孫女八。嫁聘皆仕族。以萬曆年月葬於山向。所著有藏稿、劄記、大學通考、實言、東林會約、商語、還經錄、性編、祭梓編十餘稿、行世。銘曰：

世運昌明、公揚於廷。世不我與、公投於林。有鳳九苞、嘒嘒其音。四方來儀、異地同心。

匪曰好我、陸緒是尋。手挽江河、力破重陰。猗歟我公、如玉如金。不泯者行、洋洋者神。是耶非耶、吾道陸沉。我銘匪諛、天日監臨。

鄭元標撰（顧學集卷六上）

齊鶴趙先生小傳

先生磊落英邁、卓然物表、了無蓋藏、渾無涯際。臨事直心、自遠矢志、報國嘗見其於銓曹孜孜矻矻、繫念海內賢人君子、推轂遷除、益無虛日。機要所關、身不得為必倡率同志為之、激以名節、無不感奮。以功郎司癸巳內計、所訪必擇其所聞、必考其自。先生有姻親為公論不容、客謂先生何以處之。先生頻頷曰：此官在長安暫耳。此身在鄉井常也。異日作何面目相向。客曰：君愛其親、誰不愛其親者。先生即謝曰：然。此國事也。於是先生黜其姻、而家宰一人在吏部者、黜首揆一弟在太常者、黜當路私人無一得免。國論大快。謂二百年計典絕調、而政府憲甚、尋謀逐先生。先生歸築一室郊垌、擁書閉

戶非其人不與見也。性善飲酒，為小詞多寓憂世之懷。酒酣令人歌而和之，慷慨徘徊，不能自己。先生敏慧天植，見人望形而別其臧否，聞言而悉其底裏，積數十年後，無不驗者。題覆章奏，破小人陰私，洞徹其肺腑，故當世疾之如仇。今年六十，健壯如少年，而先生則素閑養生之道，能以呼吸使其氣轆轤周身如環。嘗曰：服食之法，草木不如木，木不如禽，禽不如獸，獸不如人，人不如人者，乳之類已，謂攝養也。

高華龍撰（高子遺集）卷一〇

鄒忠介傳

公諱元標，號南阜，江西吉水人也。中萬曆丁丑進士，觀政刑部。遇江陵相奪情，公上疏指斥其非，謂居正才雖可為，學術則偏，志雖欲為，自用太甚，進賢未廣，決囚太濫，言路未通，民隱未周。若令在京守制，天下後世謂陛下為何如主。疏入，上震怒，杖一百，謫貴州衛，即日就道。在戍所讀書講學，生徒就者數百人。有巡方御史至衛操閱，公必戴鐵帽號衣，持戟負弩雜軍伍中，巡方知之，亟遣人謝罪。公厲聲曰：此君命也，何以謝為。神廟親政，擢為給事中，知無不言，旋忤時公。天啓改元，起刑部右侍郎，入朝首疏言：今日急務，惟在和衷。朝臣一和，天地應之，何論事論人者各有偏見，偏生迷，迷生執，執而為我，不復知有人，而禍且遺於國。又續陳末議：一曰拔茅，一曰開幽，一曰理財，一曰振武，一曰驛遞。又言保泰四要：一曰簡，二曰儉，三曰和，四曰厚。又疏請卹忠直諸臣。陞都察院左都御史，會遼陽不守，經撫罪案紛紜各袒。公言：王化貞用而反為，用而反為間用，宜法

上刑。能延弼有益世之氣。料敵之明。而長師失地。功罪同科。比楊錫多一逃。較袁應泰欠一死。人服其正。當是時。馮恭定從吾爲副憲。與公同心。因建道善書院。尊山中講學盟。而科臣朱童蒙等特疏訐公。公疏陳共學之原。以定衆志。畧言。隆慶卯辰間。徐階當國。手書謝仁定性二書。與諸士人商度。今未嘗以是少其相業。神宗酉戌間。臣等亦每集于演象所。月有講會。時執政諸臣嘗過而問焉。若以講學惟宜放棄。斥逐之日。以此澆其磊塊。消其抑鬱。無聊之氣。則如切如磋者。道學一語。端爲濟窮救苦之良方。非盡性至命妙理。亦視斯道太輕。視諸林下臣太淺矣。連上四疏。乞休以去。魏璫燭旨削職。居亡何卒。崇禎初。追贈太子太保。諡忠介。公爲人正直忠厚。當初入朝。朝右望見公衣冠。以爲有異。門牆高峻。如泰山喬嶽之不可仰。而嚴霜烈日之不可近。公顧顏然鵲然。威儀易直。語言坦率。無人而不得至其前。一段懇懇愛人之念。渾渾赤子之心。絕無分毫矜名負氣籠罩。爲飾之態。嘗言人才少有少用。老有老用。長有長用。短有

短用。我爲紅爐。是鐵可鑄。我爲太虎。凡鳥可飛。在都門。適錢宗伯謙益邸舍。抵掌談笑。久仰於坐隅之樹。語方更端。未悉摩腰坦腹。綢繆熟屬矣。又方中丞爰。獨揭公於家。蕭然一室。臥榻之側。繫一伏雌。坐談良久。卽命夫人烹以饗客。會以之官。至彭澤。公懼毋舟。挈酒欲亟得夫。而夫星散。公持尺牘呼尉。至鵬謁詰之。須臾夫集舟行。公旋自慚悔不已。呼尉至。以好語慰勞之。道祥刑要覽一冊。每謂人曰。惟桑惟梓。必恭敬止。彭澤吾桑梓地。奈何以尉而遂忘恭敬心乎。詞暴氣厲。恐不可令知者見也。其疎節直腸。謙光古道。大都若此。然於軍國大故。朝廷大議。人才挫折。忠邪消長之故。一語及之。意氣全滿。目光注射。若矢之激弦。星之奔杓。曾不可禁禦。每有所見聞。輒草疏入告。伸紙屬筆。率其意所欲言。其所以告君父者。一如其告有朋。告妻子。意不假膏飾。文不加點竄。久之。或併其削繁忘之。公歿後。閩人林銓梓其奏議詩文若干卷行世。

論曰。西江鄒氏。系自武林。則溯木本水源。忠介公嘗



與吾家同靖云。檢知忠介之爲人也。明識治道。如醫
友傳。通達國體。如陸敬輿。質直不阿。如汲長孺。廉潔
無私。如包希仁。忠義懇篤。如司馬君實。是固兩朝之
麟鳳。豈止家乘之山岳乎。顧自江陵以後。忠介見忌
時相。不得大用。晚登三事。復爲寇黨論逐以死。惜哉。
古人有言。愛民如有病。見客似無官。惟忠介公足當
之矣。

鄭燮撰 傳抄野乘卷三

貞靜先生馮子咸行狀

馮琦

余叔貞靜先生本軒公卒於治水。再過月而葬。謹紀
其行略。侯大君子哀而銘之。叔諱子咸。字受甫。別號
望山。已復更曰本軒。益其志也。父治泉翁。母李夫人。
少失怙。李夫人慈母也。而嚴父。既長。娶黃孀姑。公女。
丙寅。爲郡諸生。癸酉。舉於鄉。一再與計偕。退而隱於
治水之上。以紹明道統爲己任。讀書力耕。以沒其年。
初從端恪公聞濂洛之學。斷以聖賢必可爲。以莊敬
自持。一切積習力祛之。世俗所共趨力矯之。曰。勿目
廣大爲闊闊。勿目放恣爲灑落。尺寸寸而已。世以
爲拘。吾無恤焉。丁亥。讀書於宋莊。時時靜坐。久之自
得。曰。道在是乎。吾向不識虛靈之體。而從事於莊敬。
若微繆然者。故去道遠。大學須靜信矣。其大旨務在
識心體而涵養之。以推及於親身。應務皆設誠而致
行焉。少不及事治泉翁。事母甚孝。母病。食不知味。寢
不解帶。逾年卒。哀毀骨立。泣盡繼以血。餘息僅屬。舅
氏貧。不能自存。公薄田數十畝。常減口食以奉之。事
之如諸父禮。居常嘆俗失世。敗始於禮亡。欲酌古今
憲爲禮書。推行宜自宗族始。修家廟。定祭儀。立族約。
設好會。名曰敦睦。曰。凡我兄弟無相遠也。以傳之子



孫世世春秋伏臘無使有廢祀母敢不躬讀母敢怠不如禮事兄長甚恭撫子姪款款罵至必教之以正晚舉二子曰琬曰琰甫釋懷抱卽口授句讀拱揖端立皆如成人治家宗顏氏家訓常以義勝躬秉耒耜佐以陶治自食其力人饑之無所受曰恐吾無以報之恤困窮親義所安每飲過曰恐吾無以繼之公居治水貧民環而依之者百餘家癸巳歲大侵公身爲倡宗族兄弟與其鄉大姓皆出粟貸貧民親劑量其多寡貧者遂予之貧而有地可耕者予之而取償於豐年明年稍豐鄉人爭還粟泉而聚之設義會以備荒死喪者亦得取給焉與父老約各以禮義訓其子弟無敢干有司法鄉人率其教多爲善良與人處初落落不可合久乃益親客至不張具班荆而語刈蔬而食之與士言士與農言農無餘言有一善亟稱謂之有過婉詞正之告之以過未嘗不受也曰責我者是以全人望我也不然則視我爲庸人也我亦不敢待人以庸人凡公所稱謂與所責課者退而皆自喜也其生平最驩無如司寇朱公其次唐茂才在家庭愛某猶子也訓誨之如嚴師於鄉人好馬君馬君卒哭之慟徒行風雪數十里送葬公自是始病矣病劇

朱公及余皆薄遊京師獨茂才旦夕視公病百餘日至廢棄鄉人義之公既卒耕者陶者負擔者皆掩涕卽四方之士不識面者聞之亦爲咨嗟太息云所著書如日進割記自警私錄耕餘筆談讀禮抄往往有深識精詣然不欲以著述名或謂公何以不就省試曰禮異規弓情非捧腹何僕僕公車自炫竊焉然則謂選乎曰古道之亡也久矣不量鑒而正衽低取辱焉或問爲學曰須剛須恒不剛不決不恒不久問敬曰惺惺之謂敬檢束非敬也問廉曰靜則廉問應事曰凡事歸之當然欲高人則害本體問處人曰和氣誠心不可出理之外問立身曰有志士不忘在溝壑之意則能立矣事無與人相干涉則灑然矣鄉人皆好之如何曰徇俗者無志問處小人曰不惡而嚴能自守也自守可以化小人不然卽爲所化矣平居議論類如此大略行誼似曹月川涵養似胡敬齋平居論學以程朱爲歸見近時喜談佛老雖舉一世從之意不謂是而其所宗以爲真者是者雖百折不易也吾友鍾叔濂稱之曰貞不絕俗隱不肆志孔門四科處延九德其人乎識者以爲知言學者解爲自靜先生享年四十有九

兵部左侍郎贈南京工部尚書許公孚遠神道

碑

孫 鏞

兵部左侍郎許敬菴公者。德清人也。諱孚遠。字孟中。少負不羣志。中鄉舉。卽從歸安唐一菴先生講聖賢之學。登嘉靖四十一年進士。十月授南漢衡主事。督龍江關。凡河道皆有廉明聲。商舟過。必儀舊令。宜載瓶入都。胥人每倍困之。公人令計舟大小爲額。商人悅焉。運舟入閘。例輸米舟五石。名曰纒價。公欲革之。不可。則止收一石。得米四千石。以千石築堰。千石賑貧。餘二千石建倉貯之。備不虞。遠近頌者藉藉。十四年。調南考功。在南都三年。盛講學。明年。調北稽勲。益家學。胡莊肅意也。胡公任南參贊時。以汰營兵事。知公非徒以講學也。而文選郎中胡公汝柱方錚錚自附講學。每引公款語。先是。選君高貴。不輕與新進交。一談。胡公乃爾。然皆講學家常語。道已所得而已。而諸寮詫其事。以爲必議流品。各遣人竊聽。無所得。則爭問公。答以實。不信。於是滿署側目。而一二同年銜之尤深。會莊肅卒。蒲州楊襄毅來。襄毅雅不喜講學。又與胡選君不合。而一時講學諸公亦少橫心諫多爲之羽翼。間巷誼傳。謂將欲盡易置諸大臣。襄

毅心憤之。故事。銓部調司多以入署月日爲次。前僊不論。而公則已滿一考。適考功主事缺。胡公以俸欲起公。襄毅不允。止調驗封。垣牆間因有訛傳。銜者益刺骨矣。然前僊有深淺。亦不可槩不論。至近歲。竟行隆慶改元。大計吏。京官黜者科甲共四十一人。而浙人幾半。公有後言。楊公聞之不喜。因移病歸。後三年。新鄭高文襄起掌吏部。以與華亭有隙。痛抑講學者。起公考功主事。卽推廣東會事。時廣有倭警。而大盜李茂許俊美復張饒海上。助爲聲勢。公發十策。大約以水陸夾攻爲要領。卽身率二軍薄賊壘。一軍軍石城村。一軍軍烏嶼。兩魁大懼。公遣使諭之。卽乞降。且願縛倭自效。適遊擊希功將掩降者覆之。茂俊美復逃去。一方皆驚。公見事急。卽身航海抵賊舟。示以肝隔曰。必活汝。賊衆掩泣羅拜。遂獻所擒倭黨七十餘人。身隨公來。公又建善後十二議。迄安堵。報上。詔賜金。旋移閩臬。會新鄭罷。復閩察公。請兩淮運司判官。是歲隆慶六年也。是時一榜所黜皆高黨。公乃高所麾。又銓部例止黜一人。已有東明穆矣。何復及公。則以掌考功者乃夷陵。卽前同年友。銜公深者也。公小意將遂終隱。往見一菴先生。請焉。先生曰。我二十

九建言歸今七十四矣。此二十六年中未嘗一
起也。惟枉已則不可耳。今汝雖暫挫。然前途自平坦。
但踏實地行何害。異日追悔晚矣。公遂之官。萬曆二
年。擢南太僕丞。明年。遷南文選郎中。又明年。請告歸。
遂丁內艱。服闋。補車駕郎中。是時江陵當軸。前考功。
乃其門人。方佐都察院。益用事。揚人如掖。推人如擲。
天下從風而靡。公由然自如。亦不存舊吏部意。嘗謁
江陵。問及馬政。公慨然條議。大約謂富戶養種馬。重
負累苦。其肥乃日步作之。然不堪戰。徒毛色佳耳。不
若取其直。可買三戰馬。又京營騎隊踰萬匹。厚給芻
豆。止取餽飽足。猾問之。若何衝陷。如燕人語。舟且
豪貴占佔者多。是皆可裁。去銖銖民血。何爲守膠柱。
失矢數。因陳便宜四策。初。江陵亦漫爾致詰。不謂公
響應無窮如此。深心契焉。一時談者盛傳之。吏部歲
時有公會。凡舊新任者咸在。一日偶會公不在。王夷
陵出。公手簡與衆觀之。大都王欲自歆其德。謂忌者
欲處公以府。若託申閣學。居間或可免。而公拒之甚
力。且仍作昆弟語。衆咸愕相視。無何。建昌之命下。
矣。公明於經世之大體。沈細有斷。余素敬慕公。至此
始識面。公亦第畜余。每相過談世故。公所權衡必究。

極纖微而持之以蕩平正直。凡邊情。漕務。財利及
細事。皆酌論。一一皆有措置法。不徒指弊蠹也。其論
人。不過刻謂濟世須才。若止律以品。誰不能者。即獨
矜品。品卽下。何若才者。猶實有益於世。遽大將李薊
大將戚當事者。重倚之。人或病其專。公曰。將材定難
今。但二人填鎮。卽心折矣。是時方又令守任。其處公
知府。非徒摧抑。寔冀久羈之。然寔不出相君意。人皆
謂江陵擅威福。諸如此類。衆皆默避。彼當之。彼則不
辭。斯則其善取權者也。公守府廉謹。無庸談尤。以敦
教化爲務。大約如黃潁川。韓馮翊規模。不廢講學。新
城舉人鄧元錫。篤行著書。公甚重之。親造其廬。謁焉。
十一年。入覲抵京。因攜鄧叟所著田史示余。余曰。可
濟世否。公曰。未敢輕許。然是務寔踐人也。是歲余掌
選。以公倅甫及二年。未敢破例。會鄧給事元標特疏
薦公。明年遂遷陝西提學副使。以身範訓士。考校肅
然。甚敬舉人王之仕。又前江西舉人鄧元錫。劉元卿。
皆積學不仕。公移書當路薦之。後三君得徵。以公爲
之地也。三年。擢應天府丞。先是高淳有窪田。直當塗。
水下流。得隄乃可耕。而隄址在當塗。大姓靳之。兩界
鬭。遂鬭相殺。歷數十年。訟莫決。適章君嘉禎知當塗。



縣、系與公契、因共平心讞解之、訟息而罷。公又請發帑金萬五千、令可隄者咸隄之、饒獲者數千家。會都御史李公材以滇事被逮、公與李同年、以諸相相知、因刻揭投諸司申救、然亦止、冀免其死耳。而南遣某遂劾公、詔降二級降外、歸數月、獲送考封公。終後三年、起廣東僉事、轉廣西副使、尋擢右通政、晉右僉都御史、巡撫福建。時倭擾朝鮮、浪傳乞封、本兵議許之、衆論不然。方紛紜未定、然其端原自閩、發之公。至福建、密募死士往彼、圖偵焉。簡營兵、請帑金六十萬貯以備猝警、無事不用。裁行都司及各府巡司、清海地課、諸雜稅不關司農者悉并入稅局。由是餉漸充而民所供顧減。已而偵者來、悉得彼詭謀、并諸島酋相警狀、疏聞於朝。謂發兵擊之爲上策、禦之中策、不可輕與封。本兵至膠執見之、亦悚然。至親見司禮道、其實謂卽切責某數語罷封貢最善。後奸人惑之、乃復搖動。卒之倭患得息者、用公中策也。公又念嘉靖中倭亂、本由嚴海禁者激成之、今禁故在也而不甚嚴、關出入者往往皆是。且人懷一篆符、至急時乃出之、或公然爲盜。今欲嚴之難、莫若開其禁、皆官給帖以往、令爲官商、私出者罪無赦。庶幾法得行而

海患弭。詔允之。閩人便焉。饑民囂亂、劫會城、避匿、公開門待之、陰受方略、捕治數十人、遂定。及獄上有司、株連甚多、悉宥之、止罪渠魁三人而已。呂宋者、海南小國也、素與我通商、人掠其貨、反指爲賊。公曰、是我商不直、彼何罪。上疏赦其國、罪商人。海外感德焉。有府同知甚貪、公廉得、劾之以疏。會按院其人按院鄉里也、遂大忤、因條議閩中事、假他語侵公公、不爲意。朝議兩是之。然公禍萌於此矣。講學者多黨公、不黨。守建昌時、有講學而負高名者、公雅重之。及以事囑、則謝不與交。又南昌一講學魁、亦以請救拒絕。學都憲布衣交、且同年、何以救之見中。及戍閩中、仍以開府禮見、衛官公弗善也。諸葛武侯曰、吾心如秤、公近之矣。在閩二年、擢南大理卿、尋晉南兵右侍郎。是時倭未平、公旣佐留樞、仍募閩人往探、又贊尚書料理諸兵事。當事者以公熟倭情、改北兵左。然公在南都以開費、又盛講學、與禮部楊公起元俱以部堂爲領袖、持論不同、傍觀者頗起口語。又昔按閩者適宦南都、二十三年外計已謀以冒濫中公、至是復借講學造端、遂不可解。公抵清源聞之、以病乞。詔不允。比白簡上復特賜留、然公意在必歸矣。五請

得允歸家不殖生產亦不如二疏行樂日孜孜以講學爲務嘗以所著論語述齊余然公于陽明服膺然所講者非良知派也生平質直不離傳之委曲事至立斷身所行如所講常以身驗學遇人無厚薄咸吐誠磊落可喜蓋自謂學所得如此然彼口語亦坐此矣公以三十二年七月卒詔予祭葬贈南工部尚書錄一子子大受今業國學繼二男也墓在烏程官澤山銘曰

賈誼不公卿國史曰未爲不遇主且前席策旄名世如其過嗟乎許公信數之奇雖歷卿貳贈正卿夫何以爲陳力南工移南銓以北非絕類也而衆忌已歸雖名予告寔與時遠兩相修卻病夫乃一麾麾未莽年內察復及之彼相既銜銜相者乃求疵下石於筭惟恐起有時左官九載駕部隨伍楚相最難合適有合竟爲衆沮少參且凱僅出守府督學關西晉取京尹縱轡康莊前跡盡泯一書鳴義後起旁吻翻方舉忽鑑志士有憤輾轉數階始晉中丞振武敦仁善政有經胡因小隙頓構青蠅雖涉棘幸旋佐司馬彼心未忘讒說仍播殫力競競竟退在野君子滿朝孰袒爲左榮遇幾何如許坎壈夫以公之學其才使

恒要以贊明時霖雨八紘豈不偉哉即不然而其言行其志伸異已無猜正氣猶扶猶慰吾儕今所遇如茲孰主其裁然而公守益堅其講學不衰抱道以終不朽者來俯仰古今何合何乖

《國朝獻徵錄》卷四一

司業季亦卿道統傳

葉向高

昔在癸未讀中秘書者二十有八人陳州季亦卿爲第一十餘年間浮沉生死大異昔時乃近者復失亦卿情其如何因爲之傳亦卿名道統字亦卿先世昭信公自宣州徙陳昭信公四傳至贈檢討公是生亦卿亦卿少而穎七歲之母家里師問孺子知書否因探古文辭令讀讀已輒成誦覆以難里師里師遂謝季氏兒未易輕也第年試補弟子員久之乃第以庶吉士授翰林檢討居翰林沈精覃思大肆力于文章乃聲詩尤工四方嚮詩者雖附其門亦卿皆引與切劇持論甚高而大指在朝川襄陽二家致亦似之以使事過里屬贈公沒亦卿宿及視疾至卒喪皆如禮再入翰林分校禮闈稱得士已晉司業蒞留雍南中士汰易爲邪亦卿約束甚嚴納之繩檢諸生廩廩坐舍中講誦不絕聲趾無敢尸窺其才者喜得師更來



儒藏

稟業文日彬彬矣。先是雍士登薦書殺故額五之一、亦卿疏復之。比歲自成均舉者皆高足弟子。時謂亦卿操士嚴亦重其倫鑒。無何以疾乞歸。疏三上不得請。遂自危行。至荆山卒。會有詔徙北雍。以左中允視事。而亦卿不及聞矣。方亦卿去時。心念太夫人甚。晨夜疾馳。冀得一見。然卒弗見也。悲夫。計自白下來。案相與誅。季君貌重而行淳。庸詎止此。已復相與太息。安得風流文雅如季亦卿者。亦卿善飲。雅以飲自負。登筵遠送。若不勝爵。比四坐稍酣。亦卿乃引滿無算。強容與俱。客多避伏引去。亦卿故自如。益復浮之。旁覲坐者。君胡不自力。令高陽生笑人。於是亦卿酒聲與其詩俱噪。其在吾黨。惟四明王季羈。清東楊曰泰。稍相酬酢。業皆先亦卿往。亦卿然不自得。去之留雍。喜官舍稍勝。有亭水竹間。課士之暇。輒坐飲其中。且飲且吟。後半歲以病謝客。而近酒治聲律如故。或謂亦卿之詩得酒爲助。其病亦十一由之。廣柳歸里人皆哭。往里有某姓者。修却于鄰。誣以拾遺金抵法。衆共寃之。亦卿白之官。乃解。阮孫二姓約爲婚。宴不能就。亦卿出資佐之。凡亦卿之樹德于鄉多此類。卒以見思。亦卿既沒。遺稿多削。僅存若干卷。有子鏡。能

世其業云。論曰。楊子雲有云。師哉師哉。桐子之命也。然而禮言嚴。書言寬。何相左也。案其指歸。嚴則尊而寬則行。孰能廢諸。季先生與余並時而教兩雍。科條不同。要于尊道立教。是在吾友。余不及也。夫江左六朝之遺也。流風靡靡。非吾友厚爲之坊。習愈替矣。昔司空在坐。桓譚變色。嚴正之移人如此。故余因論季先生得教指焉。

明儒碑傳集卷八十八

郭正域 葉茂才 趙邦柱

禮部右侍郎兼翰林院侍讀學士贈太子少保禮部尚書諡文毅郭公改葬墓誌銘
萬曆中歸德沈文端公在政地江夏郭文毅公在翰苑咸以公廉彊直爲時斗杓而兩公者亦深相得也。四明沈文恭公當國日久訾議叢集不能不意忌歸德郭公署禮部事於四明多所枝拄言者詆訶四明連及其黨其人皆宿昔歸附郭公者於是四明之私人謀傾郭公以翦歸德。械旣成矣楚宗人華越上書首告楚王非恭王子王大懼輦輸其金錢走闕下使人私於郭公幸母窮治楚事請以餽首相者餽公公怒揮之去而持楚事益力。四明以下皆宛轉爲王請公固不可及楚中勘疏至假王事頗有踪緒華越首不盡誣公持議益倨諸爲楚者疾其梗已也又患其知楚賄而軋已也訟言楚宗之來皆公使之相與盡力排公而嗾王飛章劾公以相抵公抗疏伸辯以王餽金書上聞且向人極言楚藩行賄狀移病疏四上乃得允舟泊楊邨

須解凍而後發而妖書之獄起。上初得妖書也。以謂牽連宮禁甚閭骨肉憤懣不能食下詔大索四明之私人聚族而謀曰楚事方殷而妖書踵作此可以一網而盡也以楚事傳致妖書則妖書之人可懸購而以妖書證明楚事則楚獄可立解也於是四明從容爲上言妖書非他人必臣下相傾爲此微引其端以聳動人主御史康丕揚則曰自華越訐楚王而奸人無所忌憚妖書楚事事不相侔實一根柢給事錢夢皋則曰首相一貫不主楚事則妖書不出矣次相賡不上楚揭則妖書不出矣妖書實出郭某而沈鯉爲亂臣賊子實與同謀四明乃擬旨窮治務得真賊并勒公以楚事聽勘荆門州故同知胡化老而狂易上書告州官阮明卿謂妖書出其手事下刑部夢皋等告尚書蕭大亨胡化與郭同舉於鄉郭在楊邨乘婦人與宿歸德邸舍相與竄謀不可失也大亨讞胡化使引公及歸德化叩頭大叫痛哭曰阮知州殺我一家我自來叫寃郭舉進士後二十年音驛不通何謂同作妖書我亦不知誰爲歸德公等但爲蜀



大殺人媚人即見。皇上斷胡化之頭亦如此說。蜀犬者斥夢臯也。刑部郎王述古如其言具獻。上曰誣也。盡釋之。而東廠捕得妖人皦生光。異時嘗以宿憾把鄭皇親。造妖詩大署其門者。上意欲歸獄於生光。四明意未厭。揭請詳鞫。丕楊抗章訟生光之枉。請少緩其獄。賊之父。子兄弟可授首闕下。所謂兄弟者。指公與其兄國子監丞正位也。上怒以阿庇反賊罷丕楊。四明力救之。以免。而獄益急。丕楊方巡城與提督陳汝忠追捕無虛晷。逮賢人沈令譽及名僧達觀。從令譽床頭獲片紙。語連歸德門人刑部郎于王立。吏部郎王士麒皆削籍。而恨王立尤甚。欲并殺之。歸德與監丞之門。邏卒周徹戶闔不敢晝啓。楊邛拉岸重圍擊柝。踞呼徹晝夜喧傳。上出龍票逮公及王立。喝令早自裁。可以無辱。公曰。大臣有罪。當伏法死都市。何爲自屏草外。時五十初度。乃賦詩曰。濁酒一盃聊自壽。大家頭上有青天。意氣自如也。汝忠盡械公。僕隸寵婢乳媪及傭書者男婦老幼共十五人。刺髮鍼灼。五毒參至。每上彭耆兩脅肉拉毀墮。

地竟無所得。汝忠以金吾告身誘書役毛尚文。令引沈令譽而以乳媪龔氏十歲女爲微會。訊之日。東廠陳矩詰龔氏女。汝見妖書版幾何。曰。版有一房。矩笑曰。妖書僅二三葉。而版有一房乎。詰尚文曰。沈令譽語汝刊書何日。尚文曰。十一月十六。戎政廣平王公曰。妖書以初十日獲。而十六日又刊書。將有兩妖書乎。考皦生光妻妾及十歲兒以鍼刺指爪。令引公皆不肯。生光坐篋與中。瞠目仰罵康錢。死則死耳。千刀萬剮。我一身當之。奈何教我奉沈相意。妄扳郭侍郎。總憲三原溫公。禮部侍郎晉江李公。越席而起。曰。獄獄者苦不承。安有既承而反相抵者乎。御史牛應元。湯兆京。沈裕皆爭之力。矩嘆曰。朝廷有人。遂具獻上。大獄乃得解。公既去。御史史學遷勘楚事。其寃大白。四明積不爲清議所容。乃拉歸德與偕去。而楚宗與王相構不已。至於刼王人殺開府三十餘人。駢首就僇。假令華越之來。公果爲禍始。公與諸宗衡宇相望。當此之時。或取一編管焉。或取一秉耜焉。公其能晏然而已乎。羣小聚謀殺公。欲借妖書以解楚事。久之。

妖書寢而楚事乃益白。公之不爲羣小所殺者，天也。其大節凜然，終不得而抹殺者，亦天也。公何憾矣哉！先是，楚勘疏入，詔廷臣會議。人持一牘，李公在部，爲撮略以進，而諸人謂公匿議，單不上，公不置辯。李公上言曰：「臣爲之也。」言者乃息。妖書獄急，翰林華亭唐公偕晉江楊公卽墨周公、會稽陶公正告四明郭將，不免人謂公有意殺之。四明跼蹙無所容，揮杯茗酌地，以子孫爲誓。唐公復進曰：「亦知公無意殺之。」臺省方希風下石，而公不早結此獄，似有意瓜蔓，何以辭於天下後世乎？四明色沮，獄漸解，而蕭大亨欲脫皦而坐公也。手削爰書授王述古，述古抵其藁於地，曰：「此獄若成，刑部諸郎當盡數抵償，不獨明公也。」大亨默然而止。順天通判孫許面折戶部尚書趙公世卿，奈何附權相以害正人。趙立命駕往說四明，四明亦爲心動。當是時，權相之勢焰熏天，障日，官府震動，海宇軒簸，而詞臣散僚引据名義，獄獄不少鯁，避如此。然自時厥後，詔獄繁興，黨籍代有，傾危之禍，釀於縉紳，而婦寺小人相挺而乘其敝，誰生厲階，至今爲

梗。吾觀國史至癸卯甲辰之間，未嘗不廢書而嘆息也。公諱正域，字美命，楚之江夏人。其先世有諱聰者，以驍勇事高皇帝，受長弓大矢食案之賜。子孫世習武，至公父諱懋始以文舉於鄉，仕至趙州守。以公詹事考贈如其官。母王爲淑人。公舉萬曆癸未進士，改翰林院庶吉士，除編修。甲午，充東宮講官。陞春坊中允，歷諭德、庶子。凡五年，皆不離講幄。神廟嘗夜飲，偶問哥兒此時出閣否？自是東朝每午夜出講，以爲嘗。天寒甚，爐無宿火，公大聲語近侍曰：「無論皇太子王體柔脆，不耐寒凍，卽我輩三四措大，承乏禁近，亦何忍其霜天雪夜，膚僵口噤以死乎？」翼日語傳禁中，爐火郁然矣。事雖瑣細，公所擁佑。東朝良有深意也。敘遷陞南京國子監祭酒，條上監規七事，請倣司馬光十科。胡瑗二齋以授真才，請罷納貢，毋以明經之選夷於鬻爵。李都督者，寧遠之孫，魏國之壻也。騎而過文廟門，學錄李維極執而扶之。侯家奴百數踞邸門，而寧遠魏國盛氣，愬公公曰：「以學錄扶都督試過，雖然，公侯子入學習禮，亦國子生耳，安



得褻衣走馬橫絕先師廟門。以先師扶國子生。非以學錄扶都督也。卽上疏。曲有所歸。不若兩平之。令詣門交相謝而罷。居二年。陞詹事府詹事。儲講如故。壬寅。晉禮部右侍郎。掌翰林院篆。踰年。回部攝部事。公在部。諳典故。惜名器。堅執持。敢諫諍。不貸錯胥吏。不假權郎吏。部務爲之肅然。孟夏朔日食。值廟祀。公言。禮諸侯旅見天子。入門不終禮者四。日食其一也。當祭而日食。牲未殺則廢。宜以朔日專救日。翼日享廟。從之。封益王。使者將發。而王薨。公斷以聘儀。遣喪入竟。則遂也。諸侯相聘。必致主命。况天子之於臣耶。卒遣使行。夏至陪祀。諸臣託疾不至。公謂祀事不虔。上久不躬祀所致。請下詔勅厲其意。實以諷切。人主回夷候內府王價。羈留病死。號泣道左。公曰。明主可以理請。奈何以小費失外夷心。疏請支給。上趣令承運庫予之。其援據典訓。顧恤國體。皆此類也。日食之占曰。日從上食。占君知佞臣安心用之。以亡其國。四明惡之。召欽天監。臺官罵曰。若妄言禍福。當叅。公曰。宰相憂盛危明。顧不若瞽史乎。彼能叅

我能救。毋恐也。四明聞之而止。兩淮稅使魯保請專勅關防兼督漕直織造。歸德持不可。而四明票旨兼予之。公曰。改造礦稅之別名也。保得關防。是總督四省也。勅可與關防不可與也。四明強應曰。好。而使文書房近侍以。上命魯公公持之益力。四明告歸德。上怒甚。必有處分。歸德曰。郭以此去官可矣。四明慙。并恚歸德。而上顧司禮曰。保不要關防也罷。郭侍郎是好官。四明疑公有內援。益比而孽公矣。秦王爲其庶子。請封世子。公堅執不與。又請封郡王。四明擬旨下部。公堅執不肯覆。四明又使前奄以。上怒脅公。公弗應。榜示部門曰。秦王孫中尉進封。次子不得封郡王。母妃年未五十。其庶子不得封世子。不得違條例告擾。於是秦府所推金錢皆不效。而恨公者益深矣。謚議起。當奪者之子孫訴於政府。四明曰。我在誰敢奪。公曰。敢奪者我也。援筆判曰。如黃光昇當謚是海瑞當殺也。如許論當謚是沈鍊當殺也。如呂本當謚是鄒懋卿。趙文華皆名臣。不當削奪也。疏上。竟格不下。而謚議不果行。公之與四明相枝拄者。其



大端如此、而其它固未可悉數也。公在儲講日、久深悉。神廟父子慈孝、儲位必無艱危。罔立之後、政地頗自負定策、公爲詩志喜、有會誇麟趾周公子、不俟鴻飛、漢老人之句。妖書事發、請戒諭東宮侍衛、伴讀等官、以公爲東朝講官、可鈞連發難、雖震驚弗顧也。上召皇太子慰諭曰、哥兒莫恐、不干汝事。皇太子亦語近侍、何故曲殺我好講官。奸人聞之、氣奪。本公所以得全者、神光二廟之力也。公歸田後、聲實益著、海內望旦夕枋用、以爲一出則太平可立致。聞公之訃、雖芸夫紅婦、無不嗟咨歎息、謂天之無意於斯世也。公在史館、與福清葉文忠相厚善。公高明果毅、勇於擔荷、福清樂易善柔、妙於調御。兩人交相規切、心皆不以爲然、而不相非也。福清大拜而公溢逝、海內惜福清不得公自代、而福清亦用以爲恨。雖然、公雖不用、其所自樹立已足以表見於天下矣。嚮使得君專政、優游綸閣之中、以調停爲變理、以遵養爲包荒、以朝廷爵祿爲果蓏、以國家元氣爲癰痔、身羸老成長厚之福、而國食敝窳朽蠹之禍、公亦豈

願之乎。用而負國家、不用而自負、用不足以爲伸、而不用不足以爲訕。以此易彼、必有能辨之者矣。福清之論楚事曰、七國未削而錯先危、公弗是也。卒有妖書之禍、嗚呼、錯則已愚矣。人臣殺身有益於君、則爲之矣。安得謂胡廣、趙戒賢於李固也。舉世悠悠、鮮不智彼而愚此、可勝歎哉。公卒於萬曆壬子五月二十四日、享年五十有九。妻張氏、繼室畢氏、生子四人、文封、武封、昭封、宣封。其三爲任子。女二人、嫁宗人蘊、鍊、李、柳。公沒後之四年、上俞禮部請、贈禮部尚書、賜祭葬。天啓初、奉光廟遺詔、疏恩舊學、加贈太子少保、蔭一子中書舍人、加祭一壇、謚文毅。嗚呼、成光廟之德者、先帝也、孰謂先帝不聖明哉。公爲文章雄健磊落、似其爲人。生平好有用之學、於朝章國故、河漕鹽屯、兵食大計、四方風土人物、利弊興革、儲峙胃中、倒篋而出之、裕如也。所著有黃離集若干卷、皇明典禮志、武昌江夏郡縣志、楚事妖書始末、十三經補注、凡若干卷。葬以乙卯二月、墓在龍泉洞山。文忠公旣誌而銘之矣。其改葬於某阡也、昭封以續志

屬余曰：昭封生於楊邨，僅十日而乳媼之夫械去，媼日夜哭，乳潼不下，懂而不死。以父任爲郎，坎軻跋扈，幾填牢戶，真世之不幸人也。惟夫子哀而賜之銘，他日庶可以見先文毅於地下。余曰：此吾之志也，其何敢辭。銘曰：

於穆上帝，高居法宮。靈璫沈沈，應門九重。日車中天，雲旗在下。豈無宮隣，厥有金虎。矯矯郭公，江漢炳靈。如弦斯直，如冰斯清。豫章銅山，淮南寶賂。火齊堆盤，金錢塞路。經書滅節，史紀易馬。九廟神靈，誰與敢假。銅匱旁午，銀璫錯互。鬼神畫號，真宰上訴。殺機蹶張，箝網林植。全身保名，聖主之力。自公之去，視天夢夢。章奏寢閣，朝著霧蒙。自公之亡，說人罔極。葦笥藉盈，端禮碑泐。嗟公一身，繫國紀綱。國論職志，黨禍濫觴。流言丹青，木沈石浮。窮塵一昔，枯竹千秋。勒銘幽石，爲示無止。母耽黃扉，而媿青史。

錢謙益撰 《牧齋初學集》卷五一

嘉議大夫南京工部右侍郎葉公墓誌銘
萬曆中，東林之君子退而講學，海內負清名者爭相引重，而黨人則深惡其軋已，閒執其一二

瑕疵者以相詆譎，指清議爲橫議，陰護其所扶，謫之人以箝天下之口。甲寅乙卯之間，其說始大熾。葉公官南太僕，抗疏開之，以謂決裂國論，敗壞人心，莫此爲甚。當是時，言者方雄唱雌和，引繩批根，公眇然孤踪，忽發譴議，羣驚且恚，聚族而攻公。公不激不隨，端坐而肆應之，且累疏乞歸，言者卒無以勝公。神熹之際，東林之與黨論迭相勝負，然公之言卒未嘗不勝，其故何哉？嗚呼！公之所以勝者，蓋有所以爲公者在也。公諱茂才，字參之，其先世自吳江徙居無錫。高祖諱昌，曾祖諱茂，祖諱謨，世有潛德。謨生聯娶許氏而生公。公面目清削，不苟言笑，體骨稜層，若出衣表。自爲諸生，見者已改容異焉。舉萬曆己丑進士，選刑部主事。念父老，改南京工部。權關蕪湖，盡革它稅，不名一錢。胥吏以嘗例爲請，公爲俚語訶之曰：勿多言，左右排列金剛，撞我不動矣。已事，上美金數千。奏疏曰：久旱而得通，故有美金，請不爲例。且進美非臣志也。神廟嘆嘉，賜白金松布以旌異焉。改吏部郎中，再請告歸。久之，起禮部郎中，歷陞尚寶司司丞，少



藏

卿南京大理寺丞南京太僕寺少卿始一出家
居十五年矣又七年起太僕寺少卿改太嘗寺
少卿皆不赴陞南京工部右侍郎甫三月請致
仕公仕宦強半在南什九在告布衣蔬食食淡
攻苦有堂三楹不施丹牖安人老矣躬親紡織
青燈白髮熒熒丙夜其肥遯苦節雖小夫稚子
無閒言也當言官與公爲難盛氣奮筆爭欲有
加于公問影吠聲描頭畫角已不遺餘力然終
不能毀公之廉以爲貪而訾公之恬以爲躁至
于今衡門如故子姓蕭然雖夙昔操戈向公者
未嘗不聞其風而感讀其書而思望其室廬而
低徊不能置也嗚呼此吾所謂有所以爲公者
也公生平學問躬行實踐信心爲已感民彝痛
國是是非非如風檣弦矢觸而必發豈有意
與黨人爭勝負哉天啓中閹禍將作急流勇退
優游終老高忠憲之殉難也慷慨急難以免其
子緹濟選卒交跡於道不少鯁避人始知公非
以智免也孔子曰吾未見剛者又曰仁者必有
勇其公之謂與公卒於崇禎二年六月十七日
享年七十有二安人華氏卒於天啓四年二月

二十六日享年六十有八公性篤孝自營生壙
於江陰馬鎮先人之穴左沒後之五年十月與
安人合葬焉安人生子繼武九歲而殤生一女
嫁秦雷震側室胡氏生二女嫁孫竑禾薛憲伯
公之卒也其嗣子繼斌光輔得請賜祭葬乃
屬職方華君允誠爲狀而謁銘於余華君學行
卓然稱爲公後進者也其狀公爲信銘曰
居官三十年泊然儒素閱世七十年渾然赤子
夫人不言直哉如矢角巾東歸虛堂隱几穎然
真氣沒而不死我鏡銘詩用勵頑鄙

錢謙益撰《牧齋初學集》卷五二

奉政大夫、通政使司右叅議觀一趙公邦柱墓志銘

郭正域

予與安甫自童子時同起庠膠。予長安甫五歲，乃安甫先予六年舉於鄉。後予六年成進士。予在翰林，安甫在吏部。予南，安甫亦南。予歸，安甫亦歸。安甫於里中獨雅重予，兩人生平多切劘語。凡文章行藝，予不忝一日之長，言無忌諱，而安甫領畧獨深。予遭大難，安甫驚悸泣下。其後安甫無疾而逝，天何奪吾安甫之速也。按狀安甫姓趙氏，諱邦柱，其先豫章廬陵人。宋宗室有經畧豫章者，世家廬陵，自敬榮公徙楚之咸寧，生魁賢，魁賢生鶴，為諸生，饒於庠。生安甫，其仲也。性穎敏，秀白皙，望之如玉人。時蒲圻魏順甫有文名海內，一見安甫文，大奇之，曰：「吾閱人多矣，無如趙仲子。」遂以次女女焉。年十四補諸生，十九為歲內子，舉楚第三人。已丑舉禮闈，授戶部主事，監崇文門稅課，九門鹽法，薊州邊餉，一毫不入私橐，人稱其守。改吏部主事，有饋玉卮而說言墨挺者，覲其受也，見而卻之。諸凡干瀆一切，皆拒。念姚太宜人病，請告歸而太宜人逝，以不及會，斂領天擗地布席撤側，服闋謀屏居田野，奉太公菽水，而太公促之行。甫泊

棗而太公捐館，哀毀骨立。會銓部與政府不協，相君故以事憾先後吏部諸郎，遂下旨半逐諸郎，而公名在所逐中。調南京禮部儀制司主事。朝野不平，而公無幾微見顏色。在南十年，買舟負米以供朝夕，意豁如也。少宰止菴楊公宣言於朝曰：「以趙某才品，可久淹南耶？」改南京吏部文選司郎中。時太宰為見臺曾公，有道經留都者，訪人才於曾公，公曰：「諸曹吾所未悉也，吾署中宜莫如趙賢已。」陞南京光祿少卿。曾公意未愜，既致政去，復以書言於當路，不令公知也。會以皇太子千秋入賀，時宰握其手曰：「公久淹南中，此間宜藉重公。」公薄其人，不答。久之，陞通政右叅議。故事，諸中貴以銀臺為外府，所請乞訟詞以百數，動至破人產。公痛懲其敝，關說不行。諸中貴伺公上疏至殿庭，環而評語以百數。公不應，第命持一名刺詣司禮，諸閹悉鼠竄。會科臣有附執政疏言相權漸輕者，公適在大司馬李公坐，謂公曰：「此疏殆有微指。」李公曰：「何謂也？」公曰：「是欲以追四明山陰責耳。」李公未達，明日臺省藉藉如公言。李公謂公曰：「僕聞全疏數過未喻，公見疏首即了了，此其智奚翅三十里哉？」有丞某具疏言天下事，以時宰方唐楊綰，宋文彥博，公

其夢煥視聽屏去不奏。會署務旁午於一切奏報多所釐正。梓爲書。安甫故瘦削似不勝衣。又重感時事紛沓有遠引意。遂乞差歸里於近市隙地構一小樓爲避暑計。亡何以疾卒。平居無疾言遽色。臨事不以利害禍福動其心。自髫年與伯兄貢元公季宜黃令共朝夕。驩甚。及宦遊撫諸姪如已子。處私室雖溽暑不岸幘。變童季女不入門。食不兼味。布衾裘葛不敝。極不更爲也。嘗言仕宦須早爲歸休計。卜地爲園林。鑿池養魚。植花散步。聊以頤性命。攝身心。何必車生耳哉。通籍至臚仕。手不釋卷。尤好爲詩歌。不作近人語。而天奪之年弗竟其學。所著有享帚言。南遊草。悠然齋尺牘。納言愚得周易注疏等書行於世。生嘉靖戊午。卒萬曆庚戌年五十有三。

《國朝獻徵錄》卷六七

校記

①太嘗寺：當爲「太常寺」之誤。



儒藏

明儒碑傳集卷八十九

馮從吾 高攀龍 繆昌期

甘丙 馮應京

太子太保工部尚書諡恭定馮先生神道碑

長安爲風氣所滙、大河縈繞、太華矗峙、原隰沃演、扶輿萃靈、遂遂有杰人鉅公起而應之、如漢之第五伯魚、楊伯起、唐之韓宜陽、宋之呂正獻、公皆其選也。關中往詰、史不勝書、獨臚舉四君子者、第五倫作司空、韓休作相、罷爲工部尚書、呂晦叔平章軍國事、亦以司空拜。千百年後、有官闕同者、馮先生也。伯魚在朝、忠不隱諱、直不避害。韓休直方、不務進趨、尤爲時主畏憚。晦叔自少講學、以治心養性爲本、其勲業得之問學居多、而鸛雀鰓魚、啣集講堂、諸儒有關西孔子之稱者、惟楊伯起。千百年後、進而竭忠同、退而

窮理同、合四君子而會爲一人者、馮先生也。馮先生者、大司空少墟也。王文成嘗作人心有仲尼之詩、鄉塾傳誦、擬于裨鐸、俊兒郎厭其腐弗習也。先生之父手書以授、而先生犁然有當也。居兩喪、哀毀如禮。以論學爲德清許公孚遠所器重、連掇兩闈、觀禮部政。入朝者多飯中貴家、先生獨携茶餅往、所到必以理學書一二冊自隨。選庶常、以端靜寡營得之、然不規規詞章、嘗以文人何如聖人、廣最同志。除山西道御史、視中城中貴以半刺通者、卻必峻、若輩聳息。都中饑、官爲設糜、無裒道殣、時自取啜之、廼克有濟。壬辰大計、以先生司偵選、包匭肅清。生平與相知、贈答書卷而已、人目爲秀才御史。司城者、結首揆、紀綱爲厲、疏斥之。省中胡汝寧、權門客也、屢彈不去、以先生一疏逐。

神廟中年、朝講浸廢、或飲酣斃、左右給使齋心草

疏有困麴、藥而驢飲長夜、娛窮窶而宴眠終日等語。

神宗怒、欲賜杖闕下、會長秋節、輔臣救免、遂請告歸。三年、還故官、督長蘆鹽政。每按部、德教爲先進諸生而教之、遴其鄉之堪表率者而崇獎之。至吏而餓虎、賈而碩鼠、無遁法焉。有倚相君子求庇、竟從白簡、坐是與要人左、遂以它言官株累、削籍林居二十六年。

光廟改元、累用符卿、同卿、廷尉、召因兄喪未行。

熹廟初、與鄒忠介先後出山、適有遼左之警、羣心惶惶、爭遣其孥。先生獨盡室以從、示不返顧。亡何、廣寧失守、經撫携手入關。先生謂不逮治、何以勗守關將吏、率同官具疏、朝論譴之。後以中丞佐西臺、而忠介爲御史大夫、善類倚兩先生爲重。兩先生方尋山中講學之盟、以興起忠愛、其衛世良苦。又因廷議進藥事、謂可灼以

至尊嘗試、而許其引疾去、當國何心。至挺擊之獄、與發奸諸臣爲難者、必奸也。議甚正、羣小聞之、齒擊矣。於是刺講學者踵接、而先生與忠介後先乞身去。又二年、起總留臺、未赴、卽家拜工部尚書。是時逆璫猶以人望羈先生、乃正氣怒張、璫亦磨牙向人、因疏辭、予致仕。次年、褫其官。有同鄉踞均衡者、選一狂獬撫關、中日夜窘辱先生爲事。已而營見其清、不忍加遺、惟毀書院、曳先師像擲城隅、以洩其憤。先生痛如切膚、吁嗟病榻、晝夜趺坐、二百日夜不就寢、竟以此長逝矣。希孟諸生時從奉常姜公士昌、御史大夫高公攀龍遊、而知先生。比辛酉壬戌間、相逢京邸、甚驩、每爲余娓娓談林居事。方其以御史奪職歸、捷扉塊處、九年不出門、六年不踰戶、燕寢三楹、竟日危坐。夫人司啟鐺、親朋罕以刺通、有問學者、一穉子肅而入、坐久、碾來半剪葵韭爲供。



轡軒客及內外臺使者至、沽斗酒烹一伏雌、油而退、去後杳不相聞。若公庭及單車應

召、卽號同志、無掌大赫蹏相貽也。始病怔忡、以靜存調之、靜極而通、深造逢源、得之病中居多。有侍先生數十年、未嘗見有擇言擇行、流露從橫、居然性體、擬之大儒、宋以上勿論、其在 昭代則河東餘干之間乎。憶辛酉冬、中州某公一日集十餘客、先生與希孟俱預焉、頗商及學問事。酒三行、鄒先生振音歌、人心仲尼之詩以侑之。余固疑其爲講社也。浹旬而馮先生折簡相招、集城西道院、至者幾三十人、多一時名卿。先生拈若合符節語、窮其合一何在。間有一二送難者、迄無了義。余歸、從枕上尋繹、復念世人側目羣賢久矣、輦轂下復闢講壇、謠詠之四也。甫明而鄒先生叩門來、謂此會子母往。余躍然曰、余固欲止兩先生。鄒先生曰、馮子以學爲行其道

者也、毀譽禍福、老夫願共之。又數日而先生來、余諷曰、國家多事、士大夫宜講求者非一端、講學宜少需乎。先生曰、正以國家多事、士大夫不知死綬、抱頭鼠竄者踵相接、宜喚起親上死長之心、講學何可置也。余嘿然不敢對。壬戌八月、余乞假還、先生召余暨魏給諫大中、盤桓抵暮而別。別後人言蜂起、先生歸秦、又二年、璫禍作、余從鋒林劒樹中留此身、以事

聖明。然骨脆力蹇、迄未窺學問之藩、而先生不作矣。髣髴生平、豈獨詰人之痛。茲其子嘉年以麗牲之石見委、櫟括其梗槩而繫之銘。先生諱從吾、字仲好、學者稱爲少墟先生。世爲長安人、官爵存歿、卒葬、婚嫁、詳誌狀中。銘曰、終南惇物、榮以渭水。山高土深、民風茂美。挺生巨人、秉中蹈軌。輔世覺民、視聖而履。揚庭呼號、豈曰滄訛。生平所學、以獻



天子遇則霖施。違則霞舉。往復平陂。卜公出處。一榻經年。兀坐不起。竹徑雲封。荆扉雪壘。雍頌儒生。振衣納屨。春滿河汾。風清濂沚。以翼天常。以維人紀。詎曰聚壇。號召徒侶。含珠布襦。信信未已。維蠅有矢。維蠶有尾。糾聯貂豎。毒流海宇。牖下考終。得死所矣。道山爲岡。理窟爲房。鬱鬱蒼蒼。馮公之藏。

姚希孟撰《棘門集》卷一

資德大夫都察院左都御史贈太子少保
兵部尚書諡忠憲高公神道碑銘

今上御極更始。首僇逆閹。言者始上故資德大夫都察院左都御史高公死狀。天子曰。意是吾守正捐生之臣也。贈公太子少保。兵部尚書。諡曰忠憲。崇禎三年某月。公之子世儒始奉天子之寵命。大葬公於錫山之阡。俾謙益書其墓隧之碑。謙益謹按。我皇祖神宗皇帝久於其位。天下恬熙。小人近倖孽牙。其間一二君子奮起下位。以指柱國是。而朋黨之論始出。所謂一二君子者。高邑趙公。無錫顧公。其尤也。公舉進士。實出趙公之門。萬曆癸巳。趙公忤時相被逐。公以行人奉使還。甫三日。卽抗疏分別忠佞。極言閹臣不當陰除異已。鋤善類。以空人國。奉旨詰問。侃侃不少。鯁避。遂降揭陽縣丞。註典史。而顧公亦以言事罷歸。無錫故有龜山先生。東林書院。公與顧公修復遺址。講學其中。久之。東林之名益高。海內清名之士。淹久不用者。其應和益廣。而羣小疾其厲已。爭相標目。遂譁然以東林爲質的。天啓初。大起廢籍。公與趙公相

次枋用羣小滋不說。會應山楊公疏擊逆閣魏忠賢而公以考覈回道御史褫閣之私人崔呈秀於是羣小合謀嗾忠賢曰東林必殺公忠賢怖且恚亦曰東林殺我然不知所謂東林者何等也。甲子冬假會推事盡逐公等。乙丑戊趙公逮楊公等殺之。丙寅又逮公等七人公不辱死于水。嗚呼朋黨之禍至於斯極矣然其所繇來久矣。公與趙公實與之終始豈非天哉。公初聞有使收捕與家人處分燕語若將治嚴就徵者。夜分闕其室爐香拂然也。封題宛然也。及諸河形神離矣。裳衣戍削口鼻未嘗少沾濕也。湛淵潔身不以苟生辱國。北向叩頭不以垂絕廢禮。結願來世不以之死忘君。從容就義守死善道。嗚呼難哉。公為人齋莊閑靜不苟訾笑。淵停嶽峙如也。東修立朝其發念未嘗不歸君父其持議未嘗不本名節其幹旋護持未嘗不在世道人才。故以一散曹得譴去而天下以大人長德歸之。其自田閒起家也。熹廟幼冲婦寺中外盤平爲窟穴。公慨然以斥遠奸清國本爲已任。抗章極論前後三四上。羣小激怒先帝謂訕

朕不孝欲以危法中公。又請禁講學以撼公。公弗爲動也。御史大夫閔會言推公公固辭不可。公居恒謂此衙門得人可以救世。申憲綱舉臺規察守令確有成畫受事之日雙藤倚戶外風采肅然。逾月而報罷當是時外庭攻閣急羣小依閣亦急公欲外輯外廷內齊政地中渙羣小爲彌縫匡救之計而亦莫能聽也。嗚呼公之不能久於位者天也其不能救閣禍者亦天也。公何與哉。公生平學問以誦法程朱其知實踐爲主揭陽之行發憤窮究所至登臨吊古雲水孤清益恍然發悟。家居二十餘年水邊林下洗心退藏尤於靜中得力。湛淵之時內不獲身外不見水皆我之靜境也。委順而去與聖賢之曳杖易簣夫何以異。嗚呼如公者斯可謂學斯可以講矣。公諱攀龍字存之世爲嘗州之無錫人。祖諱材父諱德徵妣陸氏實生公。材有弟曰較任黃巖知縣壯而無子遂以公爲子。其後皆以公貴。贈太僕卿妣皆淑人。妻王氏封淑人。子三人世儒世學皆任子。世寧邑諸生。公之沒也世儒請于朝得贈三代如公。今官公卒于天啓丙



寅三月十七日享年六十有五其世次官爵及所著書若干卷誌于墓譜于家者皆不具書嗚呼近代朋黨之禍烈矣其始則宣政之碑也其中則淳慶之禁也最後則延熹建寧之獄也彼方立黨籍公則爲溫爲蜀其如公何彼方禁偽學公則爲雒爲閩其如公何彼方逞黃門若盧公則爲膺爲滂其又如公何精金之鍛百鍊良玉之火三日張羅布網蔓衍三朝愈變而愈毒適以完節畀公彼小人者冰山既傾腐骨猶臭徒爲海內所咀嚼唾罵傳之無窮令其轉而自計當亦知其不可也雖然公之忠君愛國死而彌篤靈修美人之思有餘恫焉何樂乎與怡淫謠誅之徒比長繫短于身後也然則嬋媛太息摠幽憤以告來者其亦吾黨之爲而無乃非公之志也與謙益不肖附公臭味之末懂而不死敢因公碑首竊述朋黨梗概而系之以銘銘曰唐虞世遠麟鳳憂出非其時來何求高冠長佩芳澤稠珩璜琬琰紛相摻回翔延佇經九秋虹蜺揚光白日霏蘭芷不分蕙爲茅先君後身衆所讎一夫九首擇肉投帝閭高高靈璫幽死

暴都市生索囚天地爲籠逝何繇清冷之淵水滔滔寒裳抗跡依前修崖山巨浸清淮流公非水解乃天遊皎如白日臨中洲危從三后參前駟雲旗掩露衛九旆手援斗柄駕龍轉騎鯨被髮覽冀州俯視人世殷戈矛蜩蟬沸羹爭朝咽靈不言兮心豫宛乘風載雲過帝丘

錢謙益撰（牧齋初學集）卷六二

來直大夫左春坊左諭德兼翰林院檢討贈通議大夫詹事府詹事兼翰林院侍讀學士穆公行狀

曾祖王

妣惠氏

祖桓皇贈通議大夫詹事府詹事兼翰林院侍讀學士

妣桑氏皇贈淑人

父炫皇贈通議大夫詹事府詹事兼翰林院侍讀學士

妣夏氏皇贈淑人

本貫常州府江陰縣東興里

天啓四年應山楊忠烈公劾奏逆閹江陰穆

在左坊羣小愬公於閣。謂膠與楊厚善。老於文學。奏草實出其手。閤銜之次骨。是年。推公掌南院疏閣不下。旋移疾乞歸。勒令致仕。明年。坐楊公獄。詞牽連追贓。又明年。詔下急捕。公公坐檻車。取故紙敗筆。籍記其平生。使其子授子曰。敢以是累後死者。公歿。予時特捧其書。歎且泣曰。予兩人同里。同館。同志。同諫。黨籍城西之亭。北寺之獄。行且從公。而後何暇以餘生游。竟理筆札之責乎。後十年。予又坐黨放逐。家居久之。喟然而歎曰。嗟乎。予於公。乃今可以言後死矣。其可以已。謹按公諱昌期。字當時。舉萬曆癸丑進士。選翰林院庶吉士。丙辰。授簡討。請告歸。里七年。熹宗初。補原官。主湖廣省試。壬戌。升左春坊左贊善。冊封建德王。甲子。復命。升左諭德。是冬。勒致仕。又三年。而有逮捕之禍。丙寅四月某日。畢命于詔獄。今上卽位。詔贈詹事。追及其二世。而蔭一子入監。公之先為書塾人。居小山之湖橋。國初徙江陰。曾祖王父及王父皆為儒。任俠修長者之行。其父母馴行孝謹。饁耕相敬。有古儀法。雖其聲名不出閭巷。而鄉之言家風者。歸焉。公少負雋

才。邑令詔安胡士鰲賞異其文。問知其父連染繫郡獄。立請出之。弱冠有盛名。遠方宿儒多樞衣受業。無錫顧端文公延致家塾。端文前輩名家。公與之上下議論。才辯蠡涌。端文無以難也。年三十九。舉於鄉。兩都人士聚觀歎息。以謂衣冠有異。如唐之李邕矣。公與同年生顧雲鴻鏃礪志節。以古人相期許。子從雲鴻識公於公車。雲鴻攷經紀其喪事。遂定交。端文與高忠憲公開講堂於東林。公退而語子。東林諸君子有為講學而有意立名黨錮道學之禁。殆將合矣。公既登朝。癸丑甲寅之間。朝論攻東林甚急。還觀其所為。壹皆便文養交。蠅營狗苟。附時相。走私門。惡清流。清議為害已欲鋤而去之者也。公未嘗心許東林。而疾黨人滋甚。每歎曰。吾惟恐人為偽君子。肯與人為真小人乎。往往肝衡扼腕。形於言色。朝論遂以東林目公。公弗辭也。當是時。子以史官里居。羣小畏子之出而忌公之翼子也。曰。必亟剪之。是將令虞山速飛。於是嫉子者亦移師向公矣。乙卯有東宮挺擊之事。御史劉廷元以風癩蔽其獄。提牢主事王之宋扶摘主謀御史劉光復。主廷元議。疏攻省垣之右提牢



者。公爲之評曰：一御史以風癩二字出脫亂臣賊子。一御史以奇貨元功四字抹殺忠臣義士之來。懸以公言爲徵。廷元頓足曰：繆官吏館安得司空城旦書耶。吾屬他日無噍類矣。明年將散館。工垣劉文炳再疏侵公公甫拜官未上移疾歸。又明年內計公與子竝中蜚語。南昌劉公掌院力持之而止。自時厥後。子兩人取次爲黨人射的。黨人之忌余甚於公。而其恨公而欲殺之也尤亟於子。則以挺擊前議也。天啓初。逆閹已驕橫殺。光廟伴讀安。還南昌。福清葉公召至。公正告之。以謂內傳不可奉。顧命大臣不可逐。公三朝老臣。當以去就爭之力。過其漸。無令中人手滑。福清迂其言。領之而已。又二年。高邑趙忠毅公爲冢宰。號召海內清名之士。澄汰品流。塞絕微倖。公與高公、楊公及桐城左公嘉善、魏公參預其議。位置標榜。傾動朝著。朝右皆側目。按手怨詛交作。楊之草疏也。公密告左曰：內無未外。無文襄一不中。而國家從之。可幾倖乎。左默然不應。疏上。福清言於閹曰：此豎在君側。小心一旦去之。不可易得。公勃然曰：誰爲此言者。可斬也。福清色變而起。號於人曰：西谿欲殺我。西

谿公自號也。福清口語籍籍。流聞大內。與草奏之說相應。而公之禍不可解矣。公罷歸。未踰年。劉廷元以副院入。坐賊未竟。旋被收考。無何。王之案亦考死。廷元者。故所主風癩御史也。被收日。出就廳事。邑令岑之豹遽前捉其手。妻妾不得訣別。惟聞銀鐺聲琅然。撼版扉慟哭。徐傳語慰勞而出。閹既飲章捕公。織閣實誣奏始上。且有收捕五人後命。公中塗得之。疾呼家僮曰：虞山免矣。喜見顏間。忘其身之在貫索也。詔獄死狀秘。外人莫得知。四月二十九日。棠體中傳出寸紙。自是而絕。五月二日。獄吏以死上。竟莫知何日也。正統八年六月。閹振殺侍講劉忠愍公球。忠愍之亡。以二十一日。二十三日。家人始得聞其諱。祭自二十二日。後凡三舉。蓋疑之也。今公之絕命。則未知其爲四月。爲五月也。而其家遂以四月二十九日爲忌辰。忌辰一也。劉則疑之。繆則意之。亡於禮者之禮。孰是而孰非。均可以痛哭矣。其歛也。十指墮落。捧掬置兩袖中。蓋閹以草奏故。屬獄吏加梏。拳焉。其它楚毒備至。又可知也。閹自以爲得甘心於公。不知其代人操刀爲議挺擊者釋

憾也。嗚呼。慘矣哉。公性純孝。父木疾。臥蓐十七年。午夜聞警。歔歔。若杵臼撞胃。趣整衣立牀下。執喪致毀。踰禮。覃恩再贈。皆以制詞屬于肅。拜請乞。涕泫淫覆面也。邦君大夫少受一言之知。使車輅必枉道過其家。哭其墓。與人交。推賢讓能。救過分謗。死喪急難。爲之側席而坐。作秀才時。卽以民瘼吏敝爲已憂。邑令臧罪狼籍。官舍有井。開唐李嘉祐手刻詩句。載以歸楚。任滿管束保留。公移書逐之去。江陰民比屋謹呼曰。繆舉人活我。癸丑上公車。無以辦嚴刺促借貸。幾不成行。雅不欲以廉潔自喜。曰。此細事耳。樂易疎豁。不立厓斤。少而讀書於所謂西谿者。既貴。誅茅種樹。棲息其中。度阡越陌。與田夫牧豎偶語。响濡疾苦。爾汝相狎。軒車造門。意有不可直視。旁睇手撥衣裾。一揖之外。忽忽不相酬對。好爲人規切過失。不少鯁避。或其人護前諱短。面頸發赤。更刺刺不已。信心而行。衡口而言。事過語閑。如颺迴浪息。都不省記。而褊心之人驟而與之值者。鮮不以爲深衷溪刻。頗有鱗而胃有甲也。同年進士。金謙會戚里。棲席觥籌錯

互。公至。兀傲據上坐。視轂載。嗅茗椀。卒發一語。舉座愕眙失色。久之。欠伸思睡。顧左右取馬去。坐客始叫喚相慶。更酌盡歡。聞焰之方熾也。士大夫或中立祈免。公從衆中面數之。其人赧而亡去。公顧問曰。彼得無未喻吾指乎。蓋猶以爲有隱乎爾也。嘗爲人撰制詞。或訴之曰。彼賣公去矣。一日來謁。使人尾其後。追還其名刺而焚所撰稿於通衢。行人走卒填咽聚觀。弗顧也。初欲祝揚疏。其旣上也。匹馬過從。朝於楊而夕於左。聞弗往。則雙藤以拒門。往往離立長安道上。停車拊馬。戟手罵詈。聞刺探已十餘曹。公等故自若也。生平不識酒醴。不好歌舞。客至設食。糗糒錯列。餽餽雜進。劇談極論。移日分夜。客皆倚倚假寐。公方整襟危坐。如昧爽。盥頰時。惟情僞計成敗。揣摩天下事。不失毫髮。几席戶牖之間。多受人欺給。瞪目顧視而已。爲人謀周詳微密。處分井然。至於屏營箱篋。籌算錢穀。心慵手懶。雖庸夫稚子皆睨而笑之。口多微詞。兼好諧謔。就急徵。行至毗陵驛舍。緹騎抹首。鞞袴。擇樹植立。與客談時。宰諂附高邑狀。俯躬起立。佐聲折。



支曲盡情態。綆騎爲譴笑失聲。其跌宕嗔嘆。行緩可笑。多此類也。讀書爲文。不事訓故。不傍注脚。聊且繙閱。通曉大意。穿穴解駁。別出新理。陶淵明書不甚解。孟浩然學不爲儒。庶幾近之。盧懷下問。自視歉然。每語其門人。子弟勸學曰。無效吾腹笥。枵然爲貧子。捃拾度日也。嗟乎。世之高冠長劔。大儒臚傳者多矣。其亦知公之自命失學者。乃所以爲善學也歟。公生於嘉靖壬戌七月既望。其歿也。年六十有五。娶李氏。累封淑人。生男子五人。女子五人。李柔靜仁恕。有婦德。痛公遇難。蚤夜呼憤。得疾驚惑。不嘗以死。李有姪曰應昇。官御史。後公考死。所謂收捕五人者。應昇其一也。考諸國史。詞臣死。閹難者。惟劉忠愍一人。後一百八十三年而得公。天子既愍而恤之矣。而易名之典。猶有待焉。或曰。有尼之者也。邇公之爲人。篤於君親。重於名節。厚於朋友。慎於取予。是其所長也。勇於爲人。急於疾惡。疎於防奸。忽於酬物。是其所短也。其所短者。雖有深讎積怨。吹毛索瘢。亦不過如此而已矣。而其所長者。耿然著明。如秋霜夏日。顧猶有異議焉。

何哉。忠愍以血裙葬。公以墮指斂。死無辜復。歿無家忌。後先慘死。寃動天日。獄卒之殺忠愍者。悔作逆天理事。懊恨成疾。未幾而死。羅文恭公記其事。今之士大夫。讎公於死。後曾不如忠愍之獄卒。是何可令文恭見也。恭惟甲令大臣。應得諡者。禮部廣加咨詢。稽覈名實。應諡而未諡者。覆奏補給。固非一人一時所得而專決也。當都堂叢議時。予已罷歸。無從奮筆彈駁。謹撰行狀一過。上之有司。他日節行定諡。廷辨可否。庶幾可考信不誣。謹狀。崇禎八年七月望日。舊史官嘗熟錢謙益狀。

錢謙益撰（牧齋初學集卷四八）

明太學生子明甘君墓誌銘

子明名丙、字子明、別號琴亭、太守康平公孫、封侍御若虛公仲子、叅知子開介弟也。先世載譜籍中。與兄叅知少而失恃、鞠於大母。同叅知受學三吾劉公、恪尊繩檢。邑方試諸儒童、子明素而跌坐青原淨室、家索之歸不得。大母泣曰：「老年望孺子青衿如望歲。」孺子爾爾。老而失望、奈何。子明聞而歸試、其令嘉定人、大奇其卷。蓋子明淨定久、發為文彩、映人心目、實不從文章家得來。為諸生、督學郡邑、守相器待異等。偶有憾、憤棄而遊太學。太學自祭酒司業以下大器之、文深郎公、翰拱焦公、皆以為入室弟子。三試棘闈、俱入數不果。後知為子明卷、咸大惜之。子明於麟經內承家學、外藉良朋、所得既遠、一時名流爭推轂之。然君雖不遇、而於三教得其要奧、抉心嚮往、凡世儒擬議色相意識揣摩者、絕不一駐足。曰：「此學究見地、所見者大、惟文深弱侯及子與。」大京兆劉扶生知之、而一時友若劉瞿父、無美諸兄弟、周幼清、咸

尊信之。它人相晤、公亦不一啓齒。或與之飲酒、酒後耳熱、始發舒其磊砢之氣、已復循循如初。所著有擇善篇、揚北前修、為世炯戒、亦畧見一斑云。子明雙目神情內強而貌樸古、其於書不深嗜、其詩不止名山勝境、足跡半之。於世味澹無所營。子嘗言曰：「胡我老景者子明也。不謂子明以訪焦先生、留都遂不起。嗟乎！予老矣、誰復知予念友之痛也。」君生嘉靖某年七月、卒萬曆乙卯年某月、享年六十。娶某氏、繼娶某氏。子某、邑庠生、娶某氏。墓於某處。銘曰：嗟子明、非今之人、蓋古之人、世多遇而子明何奇也。遇者如烟雲聚散、誰復知之。奇者文藻陸離、月旦推高、將與山川而並耀來茲。世有知者、其以子言為不欺。

鄒元標撰 《願學集》卷六上

湖廣按察司僉事某岡馮公墓誌銘

蓋余之得交于某岡馮公也、在壬辰同第之後云。公端凝沉靜、言若擬動、若議、窺其意向、必為聖人而後已。聞



有闡揚聖學及志行端良者。竭屢師友之終歲講究。如不及然。絕不為口耳炫露之習。曾會學淮浦累月。其事謂余曰。吾未嘗聞慕岡之有言也。又會學京師累年。其同事謂余曰。吾未嘗聞慕岡之有言也。余以問質公所學。公曰。吾日日有領略焉。蓋心研躬體。期之乎自得。以故月異而歲不同。己亥年。謂余曰。吾其正月之冰乎。固自覺將泮而大進。乃在幽獄時。曲暢旁通。未嘗有所窒礙。比出獄。將遊歷四方。盡交天下士。參驗取益。忽以病終。悲哉。其門下士戴子任。跋涉來都下。以誌銘屬余。嗟乎。即無戴子。至今自不容已于言。公諱應京。字可大。慕岡其號。先世自開封遷廣州。有永祥者。洪武間從戎南都。隸籍泗州。銜定居盱眙。凡三傳。曰方賓。賓生高。高生贈承德郎兵部主事。寬岡公世登。是為公父。官順德訓導。祀名宦祠。盱眙以鄉賢祀者也。配贈安人陳氏。生公京邸。甫八歲而贈公卒于官。伶仃還里。逾年始就小學。路拾遺錢。持以告母曰。當詢其主還諸。年十四。請宋

儒程子遺書。忻然有會。志聖道自此始。十五充博士弟子。十八升增廣生。繼乃廩于公。督學直指至。必旌其行。衆口食貧。竭力旨甘以娛母。嘗居泗。一夕忽心動。曰。母必有疾。亟歸。果然。藥之愈。六試省闈。辛卯登賢書。壬辰成二甲進士。觀吏部政。輒辭坊金。不以煩里閭。時哱冠方熾。守臣多求去。公上疏請降資為邊方尹尉。練兵戢亂。未許。是秋以老母假歸。次年安人卒。哀毀幾絕。苦塊蔬食。不入內舍者三年。丙申。除戶部主事。督餉前邊。窮險隘。究輿替。諮方略。創戶部職掌及經武考諸編。丁酉。東倭不靖。轉兵部主事。虞憲殲謀。倒囊延士。以資當事。大都公食衣不厭麤菲。而日夜皇皇為天下慮。非以接欵豪傑。則考訂典籍。每自外歸。必呼筆識其所得之人。與所聞善言行。以為常。己亥秋滿。奉勅授階。褒贈二尊人。馳書祭告。乃分田二區。業陳劉二甥。贈其兩姊。夫世之責人自責耳。誰復念先人遺血如公者。且父事其師。而周其師之子。與父執之子。俱皆有室有業焉。是年擢

副職方郎。庚子擢金憲湖廣。備兵武漢黃。既下車。亟行部。延見吏士問利弊。一以厚民生與教化為務。首舉鄉約。保甲。社倉三事。其崇賢獎節。息訟弭盜。懲淫斥異。繕城葺祠。除道疏川。利農通商。諸德政。槩見于著述編中。先是楚苦稅監陳奉之荼毒者二年。公入境其賦頗戢。已復狂逞。辛丑春公乃上疏劾其不法九大罪。而稅監誣讒之疏亦至。詔降公官。尋削籍。尋逮繫。公初聞降報。即解組登舟。士民開然。哭聲震原野。華舸攀追夾岸。號呼者信宿不絕。爭繪像尸祝之。建生祠若干所。及在途聞逮繫報。遣妻子東還。而單騎赴中都。龍興寺候逮。冲襟愉色談道不數。黎明即起。誦高皇帝御製文集。或詢楚事。曰。盡臣職耳。非有意為之也。械入金吾署中。稅監亦見撤。于是楚民不啻更生。而公且罹刑勒禁詔獄。海之內咸謂公以一身易全楚之命。烈日爭光。而全楚世世感之刺骨。顧公子楚事偶然耳。儒者以無事為本體。以有事為應接。而世人能觀人于有事。不能觀人于

無事。假令以楚事槩公。則謂公為楚事掄亦可也。公在園室。倡諸同繫儒紳。紬繹孔聖心宗。討論皇朝典故。或閉閣靜存者幾三月餘。時有契悟。忘憂躍喜。而經世實用編成大抵尊崇聖祖。備體用之全。歸信紫陽。析儒禪之異。平生精力多見于此。甲辰奉詔釋還。杜門簡出。足不涉公府。率族衆舉祖先之祀。田夫舉鄉社之約。而祖祠義田。叔焉邑之倉學壇。埴興焉。蕭然蓬戶之中。暮述不輟。暇則課少年歌詩。習禮習射。一日忽謂門人曰。吾夜夢聞二語云。其流行者光輝。而其所以流行者散也。我將去矣。越旬日。腹疾作。謂親友曰。百年頃刻耳。宇宙即吾家。萬物吾同氣。所謂我身是私身也。生死公于天。吾何得私宰之病。三日劇。密存不發一語。丙夜恭坐漏下五更而逝。面色如生。天地晦冥者十許日。遠近悲悼。是為萬曆三十四年丙午正月二十日。距生嘉靖三十四年乙卯五月二十一日。年僅五十有二。楚以名宦祀而盱眙祀鄉賢祠。夫世之仕者非無可紀之績。然于道



無窺不隘則雜其或從事學問馳心曠遠遺落世事亦
焉用此若公者其學有用其政有根操履粹白精神流
益學當如是也已配張氏封安人備有令德人以此觀
公之家政子二長寔公以兄之子為子者娶陳氏繼楊
氏次霜側室李氏出娶霍丘選貢周允升女霜之生也
公曰吾有嗣可致身于國矣及能讀書公曰令讀五經
俟年十五觀其志果端人也則授以舉子業為國用不
則否嗟乎此之為心事寧尋常可埒哉孫男四堯徵堯
缺堯缺皆寔出堯會霜出孫女一寔出堯徵娶庠生元
時雨女餘皆幼墓在邑西之靈山葬以癸丑年十月廿
有缺日銘曰衆視聖若驚而思與之頑思與之頤衆談
學若艷而如饑之哺如渴之吸厥學有成是謂正學可
宗為轍嗚呼公固自信吾亦信公以傳信于來哲

曹于汴撰《仰節堂集》卷五

校記

①嘗州：當作「常州」。

②嘗熟：當作「常熟」。下文同。

明儒碑傳集卷九十

薛敷教 歸子慕 祁承燦

陳際泰

光州學正薛公以身墓誌銘

嗚呼。余何忍銘以身耶。以身與余同舉進士。同出高邑。趙儕鶴先生門。兩人相見相笑。以為相遇晚。自是無日不相遇。從交相勸勉。以身古心古貌。所據皆古人準則。其識甚敏。而本真應物。又令人樂而親之。是年。余以憂歸。以身以言事歸。兩家相距不五十里。旬日不見。輒相念。而以身造余為多。一蒼頭挾一被一笈至余家。不以身為客。蔬食菜羹。研經訂史。未嘗不窮日落月。有過相規。凡以身言余有疑其偏者。已竟服其義。蓋余受以身規恒十之九。以身受余規恒十之一。有事相辯。凡余言以身至拂然去。已復數然來。蓋以身為余容者恒十之一。余為以身容者恒十之九。如是二十四年。如一日也。嗚呼。已矣。以身不可作矣。余忍為之銘耶。以身病。余

過之。自論學憂時外無雜言。將瞑。命其孤以墓石屬余。嗚呼。余又何忍不為以身銘耶。以身大父學憲公諱應旂。世稱方山先生。生景尼公諱近魯。性至孝。居方山先生憂而卒。遺命歛用衰絰。配劉太孺人。生子三。以身其仲也。諱敷教。號元臺。字以身。娠時有青雀入懷之祥。生而絕穎。少不好弄。五歲即善屬對。十五補諸生。海忠介公撫南都。見而亟賞曰。生寧獨文人。必忠義士。當是時。以身慨然以天下自任。每從方山先生閱邸報。有不平。目眦欲裂。先生從旁脫之心。獨喜。會顧叔時。李時兩先生問業。先生呼以身謂曰。此東南珍物。若與締兄弟交。已復手一編示曰。洙泗以下。姚江而上。盡是矣。於是以身復以道自任。戊子。舉京兆。明年成進士。會南御史王公藩。臣上疏。不白憲長。都御史吳悟齋。耿楚侗交參之。以身曰。是欲為執政箝天下也。上疏爭之。略曰。臣無言責。性惡權奸。頃見左都御史吳時來。欲申飭南臺憲規。其言專為定向而發。竊以為遠臣箝口。近臣煽威。竊祖



宗之片詞、營狐兔之私窟、必欲創一警百、誓為腹心、吁亦狡矣。掌院者陛下之掌院、言官者亦陛下之言官、事可風聞、聽斯無壅。就使藩臣論列、果非定向、不宜阻遏。節節關白、動成掣肘。嗣今設有彈劾、長官者、誰與通之。隱機先露、則危其身、謹議復停、則負其志。事當密而不密、禍且移之國家。時未安得視僚友為重、而視陛下為輕耶。如海瑞先朝憲直也、房寰醜詆、尚自包容。定向何人敢妨言路。為時來者、不惟不能參駁、反而朋連、無論愧古名臣、即回想抗論嚴嵩一疏、有覲面已大抵少年厲志、多思豎立、垂老顏顏、輒喪生平。見人覆轍、怒髮裂眦、慙已浮榮、脇肩攘臂。何則、道心難固、勢利易迷、習尚使然也。即二三輔臣、陽托飲醇、陰圖登進、適又故峻諸司、共繩庶采、九列之體貌、尊而九重之聰明、塞矣。嗚呼、害可勝道哉。伏乞亟下明詔、嚴黨邪之禁、更易兩都臺長、以清首憲。疏奏、當路大恚、座師潁陽許公、至以貢舉非人自劾、以身奉旨歸。明年庚寅、蔣瑞人卒。辛卯、授經

王隆觀。壬辰秋、起鳳翔府教授、尋遷國子監助教。癸巳入部、有竝封三王子詔、以身具疏力諍。復貽婁江公書、有曰、中官有出而始重、則仁聖之心不安。後官有出而終輕、則慈聖之體亦屈。竝封事寢、大計難作。時考功郎為儕鶴趙先生、盡黜當路私人、內閣張洪陽位與婁江公合謀、偕劉黃門道隆論拾遺事、奪其官。士論大譁。以身與于公孔兼、陳公泰來、賈公巖、顧公允成、張公納陛、各具疏、謂南星考察京朝官、先黜其姻親、都給事王三餘、又黜本部尚書孫繼甥、本部司官呂允昌、而後舉執政所陰庇之臺省表裏為奸邪者、盡黜之。命下之日、舉朝震肅。咸謂二百年未見。而一旦奪南星官、謝諸黜者、何以令天下。於是閣臣益怒、盡奪六君子官、而以身得光州學正。以身與光州士砥德勵業、不啻父兄於子弟。諸生有以口語得罪府掾、掾誣生殺人罪、郡守以掾故成其獄。以身廉得情、白之守、守不可以身持之堅、竟得白。光人負沉寃者、胥之以身、以身多全活之。光人謂以

身寧獨師保我實父母我也。庚子歸省劉太孺人遂不復之光州。癸卯太孺人卒以身執喪不飲酒食肉服闋遂不食肉。甲辰顧涇陽先生修復東林書院華同志講學以身喜曰此吾歸宿地矣。自是恒居東林所與知交必勸之講學曰天生英雋決不欲其斤斤結褻自家閨閹。檢押祇賢落魄爾。曰脚跟站定眼界放開靜躁濃淡間正人鬼分胎處。曰道德功名文章氣節自介然無欲始。又曰學苟不窺性靈任是皎皎不汙終歸一節。但世風靡矣不憂著節太奇而憂混同一色托大道無名以濟其私則中庸之說誣之也。平生所持如此故筮仕以來未嘗受人一餽垢衣糲食以沒其身。嘗有詩曰百年吾取與留作後人歲。又曰古人持晚節休作等閒看。余猶憶始交以身時餽之食則稍嘗而謝曰不可以此滑吾手。及病余餽藥餌復稍嘗而謝曰行就木矣不敢忘當年矢志以身於忠孝廉節之死不二其天性也。性復至慈蠕動之物不忍傷害於人油油然雖至俗客不憎

惡獨惡傷害人者尤惡傷害善人者耳目所及盜賊兇人必使不得虐民後已嘗見一人毀葉參之以身從稠人中憤然起余力挽之不得自後其人所在以身必避匿終身不與見至解人之厄揚人之善常若不及拈筆成詩文率本於情止於禮義嘗作真正銘曰學尚乎真真則可久學尚乎正正則可守真而不正所見皆苟正而不真終非己有君親忠孝兄弟恭友視身以廉處眾以厚良朋切劘要於白首鄉里謗怨莫之出口母謂實實內省滋疚母謂瑣瑣細行匪偶讀書學道係所稟受精神有餘窮元極趣智識寡昧秉拙省咎殊途同歸勞逸難扭世我用兮不薄五斗世不我用徬徨五柳無貴無賤無榮無朽殞節逢時今生諒否必真必正夙所自剖寄語同心各慎厥後以身年五十九而卒自同好至鄉閭婦豎無不思而痛之嗚呼此可觀以身之真正矣所著詩文諸集藏於家銘曰飄乎自樂耶幾春服舞雩之點漂乎自持耶則蓬門委巷之思渾乎同羣耶幾油

油與偕之惠。子乎獨往耶。則望望去之之夷。夫固不敢謂其即點也。思也。惠也。夷也。夫安得謂其非狂也。獨也。清也。和也。猗與斯人。蕩滌污世。砥柱流俗。是之謂忠信。廉潔為聖人所思。世人所師。

高攀龍撰《高子遺詩》卷二

陶菴先生傳 高攀龍

陶菴先生者。歸子季思也。蘇之崑山人。名子恭。字季思。其父故太僕震川先生諱有光。歸子兒時即有至趣。嘗掛酒衣帶間。見一卉一石佳者。輒引酒自賞。自餘童孺所弄。一切晚視無所屑。及長。苦心為文詞。釀味沉情。而出之以輕聲。速度飄飄乎如被濯于醴泉。甘露而蕩以清風。被以鮮霞者。辛卯舉南畿。乙未從京邸。交於嘉善吳子志遠。過錫山。交於高子攀龍。三人相得歡甚。時高子築室於蠡湖之上。曰水居。吳子築室於祥蕩之上。曰秋。歸子既三對公車不第。又兩喪婦。得羸疾。築室於崑之西村。曰陶菴。三子遞相遇從。几席湖山。衣被風月。

飲食園史。見者以三人相對一室。終日默然自怡。而不知其所事也。然歸子病相尋不已。遂屏跡陶菴。陶菴者。縛茅為屋。插蘆為牆。屋後樹梅。庭藝菊。杞室中張一琴。書數百卷。一壺一藥。囊一瓿。果他無長物。歸子鼓琴讀書。宴坐默識。窮天地之無垠。察品物之有自。陶然不知身之病也。時復行吟溪畔。覽物從容。作小詩自娛。客至。煮蔬沽酒而已。歸子自居陶菴。不與衣冠之會。不詣府縣。不受當路問餽。不為宗黨爭訟。伸白。不為子侄應試干請。雖甚貧。養其子之孤者。養其弟婦之寡者。雖甚病。於人倫事未嘗偷情。少孤。事諸兄友愛特至。平居無疾言遽色。農夫牧豎相與依依如儕伍。周念童僕如子弟。其病愈久。其學愈進。客有至陶菴者。登其堂。未見其人。不知塵念之從何去也。見其人。未聞其語。不知和氣之從何來也。飲食焉。笑語焉。退而慨然以嘆。油然而思。人人覺其形穢。不知心腹腎腸之胥易矣。此所以為陶菴也。或問高子曰。歸子何以願學陶也。高子曰。嗟乎。使歸子



明儒碑傳集

卷九〇

而得志所謂斷斷休休者其人與。而以病廢所自饜足者東籬南山之味而已。此誠天下高士也。而使歸子以高士名則世之不幸也。崑山令王公時熙嘗造歸子屏賜從載酒榘而往。歸子欣然納之清言彌日。時以為白衣之致。及卒學者稱為陶菴先生。而以傳屬高子。高子謂吳子曰。惟子則能傳歸子矣。吳子曰。子弟傳之。凡人之美人懼溢。歸子不懼溢。天下之美備是矣。高子曰。子懼子之得其郭郭而遺其神理也。吳子曰。不然。歸子如水壺。內外瑩徹。其郭郭者其神理也。高子曰。善夫。吳子之傳歸子也。歸子有一子。名奉世。歸子遺言教奉世曰。人能親近賢者。雖有下才。不至墮落。吾無以貽汝。貽以此言。歸子得年四十有四。其卒以丙午十二月二十日。

《明文海》卷四〇〇

大參祁父母夷度先生墓表

叙曰。學迦古宗。禮樂有聲于伊洛。仕昭至性。謀猷益懋于山陰。地鍾禹德之休。生諸賢而琳球常潤。月乘貞婦之瑞。降一士而瓊瑋殊輝。食報之奇。繇于樹厚。晉階之密。肇自風丕。有明大參知曰夷度祁公者。諱承業。字爾光。譜讀于祁。吳炳炳晉來。源深于上汴。脈脈福嚴。自五傳以來。代有偉才。郡鳴義俠。耕讀久而博士始聞。風節遙而議垣彌著。公甫十齡。輒授百諫。折柳幾墮。而生嗜書。及宵而旦。羽客夢以異徵。千里琢其英物。此慧啓泰鴻而凝重所自陶也。博上古中古之遺。五燈不晦。探今生往生之秘。二乘旋闢。幼而敦禮。耿不忘殘。爾乃心悅于大士前。神愴于藥王下。遭火不戒于堅子。進饌更虛于殘僧。用以豈弟。釀其血誠。荻左邀其真。春風登賢籍。早拜令侯。慈節未旌。九關隕涕。崇恩靡及。一室摧心。公時首補寧國令。毋以簡忽。毋以逸修。囑民使馴。弱民俾淑。負山不藥。所訊明允。踰年茂



績繁轉長洲。經冊緯冊。亂絲理也。熟戶荒戶。鴻鴈集焉。課兩邑之文英。學道行愛。新二都之宣廟。迴統尋源。舉滿清華。忠將報瀝。第要路。照臨。惟醒。宿士所繇。落落不悔。家學逾嚴。而壁弗辭。抵標內映。至期乃得南中。比曹。越歲又請南駕主事。慈周肺石。洗沉寃數十人。察見司舫。裨帑金三萬計。璫不中飽。運有良規。于是清勾則迂。歸縮步。涖驗川。伏飛先登。頌不脛而合。祠不請而符。至夫出刺于吉安。乳水心契。于茲連原。卬翼情深。繇來飲馬。鸞洲聲徽。手疏可宗。左道思窮。治諭攸鑒。士體飭公無矜。秀業明公益勵。此章貢災。民乃魚矣。公重金以呼卒。而發穀以賑民。且驕陽肆。民轉燼矣。公蹶步以禱天。而饑血以捨地。尋而路莽。方攀轅正切。理無照。照拂。袖允宜。園居得詠。益濟先愛。圖史盟幽。尤申後勅。公忠履懷。曠然遠式。爰有充間。矯大賢派。矯矯天飛。章章帝賚。至如補沂州倅。及遷宿州守。當緩中恪。秉巨內虔。皇華不阻。郵政事新。乃宿

不受蹂躪。國不能橫征。公其保障哉。自塔當原。壽春符。付之一炬。二東宜貸。泗上獄。縱其諸饒。且夫琅邪篇宛。載芳蹟。符離紀寔。逆情忱。至如管佚于職。方副郎。圭璧人倫。絲綸因望。野遐。有北門。黔越益多。東箭。公獲常。選練。寧遠坑。奴之現。審視清勤。朝廷隆司馬之寄。政以勝最。仁以性成。猛遠前賢。急程後胤。壁觀通簿。書于徽。牧津証名。盡于渺。邊才倚重。人不能私。河朔要衝。公豈獨斷。又還河南。集食。備兵。于砥鎮。見公先。燬於聲。先誓于發。軍抵。戈而乃作。紙。康退舍。而乃寒心。黜毛帥。疏則餉有餘儲。賦厨傳。儀則驛道禁石。公何難。旱苦子遺。蝗不毒境。浸憂莫挽。版以據城。從焚溺而生者。公之甯遠也。繼仍轄河北。少泰。再擢江西。大泰。茲者地限江河。及爪。殊効。職均藩臬。迨。又惕思。爰。畱川。功用佐樞府。青盈四部。通逝者之如斯。業藉百年。願賢首識其大。是蓋擬脂車其尙迫。乃竟犯。混康而。益。露者乎。享年六十有四。崇禎元年冬月。寢疾。

卒于里。合寧與長與南北駕二部及吉而沂而宿、并中州江右者、思繫孔運、靈獨桐鄉、德邑邵、頌浹省臺、輟歌輟春、雙鳧何方、古與書淫、岐嶷墨莊、擁褐服采、無異暫肌、憂多于憚、飲水淡肝、城府不有、嫉猜渾忘、履穀中肅、樂易時揚、良知精髓、光煥縹緗、案牘摘發、遊刃化馳、悠然東山、唯古人師、片語落花磚、不數習永、丰游、台鴈、同泛于猷、五色雲開、義猷之堂、一輪月、之乳、因有無垢呼爲勝朋、文成捐爲畏友者矣。其年某月日、隕于化鹿山之陽、願將以滌塵垢、完同學、濟國經野、近安遠恬之身而歸于奄忽、名世挺生、擢冠柱史、正色而從、諫轉聞、校讐而奸宄截隳、興除彰瘴、長洲苦役、將貽以米牟、慰在天之靈、能無慊乎。復暨伯仲氏快讀、未見之書、競奮六月之息、吏尚廉平、洵有天道、成於戲、緬公大誼、則彤筆躍而欲鳴、稱其殊猷、則喻糜酣而思舞、雲深霞蔚之區、嵯嶇嶺之、胃、令千秋下仰止者、神溢于立馬、樵蘇者意悚

于寒楸。銘曰、

燁燁公族、爲晉巨卿。汴流遐邇、徒越隸萌。五傳開美、聞人樂耕。代衍忠節、門垂直聲。公經瑰異、夢符上清。舞象穎發、破萬卷精。童劬購書、如郭百城。得雋食厚、應王之楨。撫字所部、夙夜心行。或平補救、或亂止旬。幹天諸藉、早淙推衡。河東惠風、植民端生。秦銅盈把、荆世靡爭。坦以自適、猜無相傾。捐金砥澗、子來吉兵。拯溺功高、譽浹上京。入而叱駕、咎錄孔明。岳牧仰屋、公建孤擎。志于寒雪、乃表白珩。侃侃大猷、左公右卿。暇則著書、素履怍怍。傑然松老、臨叩崢嶸。嬌誼薄天、貴卽乞旌。

帝重年格、潛下陳情。冠挂禹穴、逍遙禪盟。心狎泉石、疏常蕭簾。皎乎大儒、磬礪水精。建駿基廣、康功不寧。几几猷念、逝水莫停。豐碣倚雲、深鏤鴻名。懿實憂古、舊知銘成。杼毫杼素、上燭長庚。詞峽欲傾、風雷相驚。遐哉喜起、嗣者盈盈。山高楸密、靈長卯塋。

陳仁錫撰《無夢軒遺集》卷六

陳行人傳

公名勝泰字大士號方城臨川人天分殊絕讀經史一目數行下嘗點二十一史不三月而成人以爲畧公曰諸君目鈍我特看爾爲制義宗先正而盡垂淨靡之習日或抄數十莖不少倦積文萬餘海內得其文怪不敢視久且姑置自金壇周鍾唱嘆於揚齊風者始翕然宗公卒淹科目二十餘年至庚午得於山陰宋運昌房舉第七人辛未不第妻東張公采深慕之特請於銓司往令臨川斯夕與公遊醉復止諸公與臨川數君子此唱彼和文風丕盛甲戌計偕六公震孟授公卷荐第二人成進士授行人滿五載不一遷已卯主貴州試所校士無足當其意者告歸不數年以疾卒所著有五經讀太乙山房稿一十五卷子士鳳士驥善屬古文詞有父風

論曰先生洵一代文人也晚受知于文文肅公甲戌

榜放紙貴雒陽而功名未顯事業無聞齋志以歿楊解元維斗謂大士文無一不自傳註大全及先輩中來特故爲高懸其貌奔放其勢幽渺其思使人不敢以傳註大全及先輩之跡求之庶非有靈心妙運則不能也斯言真知先生者哉

鄭澗撰（啓禎野乘）卷七



藏

明儒碑傳集卷九十一

袁宏道 馮復京

吏部驗封司郎中中郎先生行狀

萬曆庚戌九月初六日、中郎先生卒于家、得年僅四十三。親戚鄉黨如失所怙、中外寒士哭失聲者數十人。弟中道、少先生二歲、少同塾、長同校、以失母蚤、倍相憐愛。後先生宦遊南北、中道皆依之、如形影不離。自先生示病、卽日禱於神、求以身代、已而逝。中道痛不欲生、遂得血疾、幾死、乃逃之玉泉山中、排愁破涕、及痛定、欲哀次先生遺事、以求海內二三鉅公、爲誌銘以垂不朽、而每執筆輒痛絕、屢欲書而屢中止、則囑姪彭年草創。彭年曰、姪也不文、卽文也、而丁未以後事稍知之、丁未以前事皆未知也。且大人在世時不能一息離叔父、則始終知大人者、非叔父而誰。予不得已、收淚而直述之。按先生姓袁、名宏道、楚之公安人也。其先世從江右徙、斲黃間、遭世亂、離譜牒莫詳。至洪武中、爲戍卒、屯田

公安之長安里。曾祖處士公諱映、以任俠聞。祖處士公諱大化、慷慨然諾、有獨行君子之德。歲祿捐數千金活人。子諱士瑜、自稱七澤漁人。卽先生父也。七澤公儷於龔、是爲龔太安人。邑河南左布政使龔公諱大器女。生三男子、長曰宗道、季曰中道。先生其中子也。先生之生也、太母于夢月入懷、故小字曰月。少時卽具倍年之覺。年四歲、着新履、舅龔孝廉呼謂之曰、足下生雲。先生卽應聲曰、頭上頂天。孝廉大駭。八歲、龔太孺人卽世。先生不數哭、一哭卽痛絕。人以是知其有隱慧焉。總角工爲時義、塾師大奇之。入鄉校、年方十五六、卽結文社於城南、自爲社長。社友年三十以下者皆師之、奉其約束不敢犯。時于舉業外、爲聲歌古文詞、已有集成帙矣。戊子舉于鄉、主試者爲山東馮卓菴太史、見其後場出入周秦間、急拔之。明年上春官、時伯修方爲太史、初與聞性命之學、以啓先生、先生深信之。下第歸、伯修亦以使事返里、相與朝夕商確。索



之華梵諸典、轉覺茫然。後乃于文字語言意識、不行處極力參究。時有所解、終不欲自安岐路、特燭火微明、以爲究竟。如此者屢年、忘食忘寢、如醉如痴。一日于張子韶論格物處、忽然大豁、以証之伯修。伯修喜曰：弟見出蓋纏、非吾所及也。然後以質之古人微言、無不妙合。且洞見前輩機用、白雪田中能分鷺鳥、紅羅扇外瞥見僊人、一一提唱、聊示鞭影。命名曰金屑。時聞龍湖李子冥會教外之旨、走西陵質之。李子大相契合、贈以詩、中有云：誦君金屑句、執鞭亦忻慕。早得從君言、不當有老苦。蓋龍湖以老年無朋、作書曰老苦故也。仍爲之序以傳。留三月餘、殷殷不捨、送之武昌而別。先生既見龍湖、始知一向掇拾陳言、株守俗見、死于古人語下、一段精光不得披露。至是浩浩焉如鴻毛之遇順風、巨魚之縱大壑、能爲心師不師于心、能轉古人不爲古轉。發爲語言、一一從胸襟流出、蓋天蓋地、如象截急流、雷開蟄戶、浸浸乎其未有涯也。壬辰

舉進士、不仕、復與伯修還故里、家居石浦之上、偕外祖春所龔公及舅惟學。惟長輩終日以論學爲樂。當是時、伯修與先生雖于千古不傳之秘符同水乳、而于應世之跡微有不同。伯修則謂居人間、當斂其鋒鏑、與世抑揚。萬石周慎、爲安親保身之道。而先生則謂鳳凰不與凡鳥爭巢、麒麟不共凡馬伏櫪。大丈夫當獨往獨來、自舒其逸耳。豈可逐世啼笑、聽人穿鼻絡首。意見各不同如此。已復同伯修與中道遊楚中諸勝、再至龍湖晤李子。李子語人謂伯也穩實、仲也英特、皆天下名士也。然至于入微一路、則諄諄聖之先生。蓋謂其識力膽力皆迥絕於世。真英靈男子、可以擔荷此一事耳。乙未謁選、爲吳縣令。先生始以其學試之政。人皆謂吳門繁劇、而先生超脫、或足以困先生。乃先生灑然澹然、不言而物自綜、事自集。吳賦甲於天下、猾胥朱紫其籍、莫可致詰。飛灑民間、溢於額而不知。先生一目了然、摘其隱射之條若干、呼猾胥曰：此何

爲者胥不敢欺。皆俯首曰弊。凡十餘詰。皆不敢隱。皆俯首曰弊。先生俱寘之法。而清額外之征。凡巨萬。吳民大悅。又不拆征收之封。惟苛兌者許民告白之。而以其所贏代輸者爲傾鴻費。上官聞而便之。以其例下諸邑。悉如吳縣。先生機神朗徹。遇一切物態如鏡取影。卽巧幻莫如具門。而終不得遁。故訊詞恒片語而折。咄嗟獄具。具人謂之升米。公事自非重情。無所罰贖。杖之示懲而已。以故署門酒家蕭條。皆移去。縣胥隸之類。或三四爲曹。共一役。不食縣官。惟借公事漁獵里閭。先生揀其宜用者食之。無所差遺。終日兀坐。不能糊口。皆逃去歸農。有屢投匿名牘者。先生出。見縣前占星人覺點甚。念必此人也。呼來占星一紙。視手跡與匿名牘無二。訊之立伏。其妙於得情皆此類。先生爲令清次骨。才敏捷甚。一縣大治。宰相申公聞而嘆曰。二百年來無此令矣。居常不發私書。塵覆函數寸。待過客無所闕乏。然亦不甚豐腆。日中蕭然無事。與客

酒奕爲歡。曾以勘災出。徧遊洞庭兩山虎丘上方。率十餘日一過。暮年而政已成。會吳中有天池山之訟。先生意見與當路相左。鬱鬱不樂。遂閉門有拂衣之志。值先生偶病瘧。又家中有書來。云詹姑病危。初先生幼失母。育於庶祖母詹姑。戀慕之甚。先生聞此。去志愈決。凡七具牘解官。而當事者才之不聽。吳民聞其去。駭叫狂走。凡有神佛處。皆懸幡點燈建醮。乞減具民百萬人之算。爲詹姑延十年壽。以留仁明父母。其得人心如此。而先生終不肯留。乃置孥於錫山以待命。當事知其不可強。姑令予告養病。俟病痊補教職。先生旣得請。聞詹姑病已愈。且囑之母歸。而大人亦云世豈有二十八而懸車者。先生不敢返楚。乃爲人貸得百金爲妻子居諸費。而走吳越。訪故人陶周望諸公。同攬西湖天目之勝。觀五泄瀑布。登黃山齊雲。戀戀煙嵐。如饑渴之于飲食。時心閑意逸。人境皆絕。先生與石簣諸公商証。日益玄奧。先生之資近狂。故以承當

勝。石簀之資近狷，故以嚴密勝。兩人遞相取益，而間發爲詩文，俱從靈源中溢出，別開手眼，了不與世匠相似。總之發源既異，而其別于人有五。上下千古，不作逐塊觀場之見，脫膚見骨，遺蹟得神，此其識別也。天生妙姿，不鏤而工，不飾而文，如天孫織錦，圍客抽絲，此其才別也。上至經史百家，入眼注心，無不冥會，旁及王簡金疊，皆採其菁華，任意驅使，此其學別也。隨其意之所欲言，以求自適，而毀譽是非一切不問，怒鬼嗔人，開天闢地，此其膽別也。遠性逸情，瀟瀟灑灑，別有一種異致，若山光水色可見而不可卽，此其趣別也。有此五者，然後唾霧皆具三昧，豈與逐逐文字者較工拙哉？戊戌，伯修以字趨先生入都，始復就選，得京兆校官。時伯修官春坊，中道亦入太學，復相聚論學，結社城西之崇國寺，名曰蒲桃社。踰年，先生之學復稍稍變，覺龍湖等所見尚欠穩實，以爲悟修猶兩轂也，向者所見偏重悟理，而盡廢修持，遺棄倫物，偃背

繩墨，縱放習氣，亦是膏肓之病。夫智尊則法天，禮卑而象地，有足無眼與有眼無足者等。遂一矯而主修，自律甚嚴，自檢甚密，以澹守之，以靜凝之。己亥，遷國學助教。庚子，補禮部儀制主事。數月，卽請告歸。歸未幾，伯修下世，先生感念絕，牽血者累年，無復宦情。時于城南得下窪地，可三百畝，終以重堤，種柳萬株，號曰柳浪。先生偕中道與一二名僧共居焉。潛心道妙，閑適之餘，時有揮灑，皆從慧業流出，新綺絕倫。而遊展所及如匡廬、如太和、如桃花源，皆窮極幽遐，人所不至者無不到。發於詩文，煙嵐溢毫楮間。蓋自^③花源以後，詩字字鮮活，語語生動，新而老，奇而正，又進一格矣。時陶石簀有書來云：聞足下田居甚樂，有大心腸以玩世，有硬心腸以應世，有窮心腸以忍饑，真非吾中郎不辦此。昭素有寬腸，弟有窮腸，總輸兄一硬字耳。蓋實錄也。先生居山六年，自覺入真入俗，綽有餘力，而大人亦與其一出，以結世局。丙午，乃偕中道入都，補儀



曹主事。曹務清簡、蕭然無事、偕諸客文酒賞適。丁未秋、李安人卒於邸、乃以存問蒲圻謝公之便、送柩潞河。歸至中途、得銓部報、先生歸覲封公、以戊申春暮入都、補驗封主事、攝選曹事。猾吏多舞文、屬當急選之期、故事製或時凡瑣尾事皆曹郎躬爲之、吏無敢近者。一吏忽排闥而入曰、每次大選、例與都吏一二美缺、今有某驛缺、已予都吏百金矣、幸以見與。先生目攝之、叱之出。私念曰、銓事一至此乎。時攝銓者爲少宰楊公喬、方病卧旅中、先生往問病、私語以猾吏某把持銓政、主事誓爲國家除此大蠹。楊公曰、吾輩身爲大臣、受制胥吏、切齒久矣。但此輩內結中官、外恃姻黨、設有不惻、爲累不淺、慎之慎之。會猾吏私一姻戚、已罷官而仍留之、刻報中。先生廉得其故、大憤曰、如此則銓柄盡歸此輩矣。時主者擬以疏聞、而後逮治之。先生曰、此胥吏也、但寘之于法、以一知會疏上、則疾雷不及掩耳、雖有與援、將安用之。遂如言具疏、而

猾吏未知也。入署傲然自如。先生令兩隸持之曰、去、送汝入刑部、汝不得活矣。即時繩之以往。猾吏錯愕、不知所爲。已而疏下、竟以欺罔坐重辟。蓋吏部事權久已旁落胥胥、此輩率長子孫、其中引繩批根、憑藉狐鼠、傳舍堂屬、陰爲把持、稍不可則興謠造謗、麾之出如振蒿率卑下之以爲常。其主案老吏、司屬少有以疾言厲色加者、至是稍惴惴云。先生始立年終考察書吏之法。疏云、外官三歲一察、京官六歲一察、又有不時之糾、此輩獨否、則尊崇反在京秩上矣。彼何所畏而不爲惡。故歲終有考察之法、可者留之、不可去之。疏上、報可。命所司如議行。更立刑具、同於諸曹、不法者不時朴責。楊公居牀第、聞先生處此猾吏事、蹶起而嘆曰、此吾所切齒腐心者也。今能如是、吾死瞑目矣。公病亟、招元生謂之曰、此中陰氣逼人、借公陽明來此、少壓邪氛耳。又曰、吾佐銓四年、未見一實心任事君子、每竊嘆曰、朝廷之上如斯而已乎。今得公矣、國家



之福也。惟自愛。遂逝。其後太宰孫公丕揚繼主銓政。未熟近日銓規。偶推升教職。有南北中三籤。以便選人。太宰見之。謂郎中薛公芳曰。銓法惟公安得分別遠近。隨意規避。今後不必揀地。方爲南北爲中。但掣出卽是。薛郎中曰。此法已上疏允行多年。實爲穩便。孫公老耳微重聽。依稀聞上疏字曰。汝與我抗疏爭論乎。我歷事累朝。但知奉行故事而已。今屬官曲意徇情。壞朝廷法。反使堂上官一搖手不得。何其橫也。推案而起。司官皆錯愕。不知置對。先生從旁高聲曰。郎中謂明公大臣。不當親細事。芳爲明公代勞。非有他意也。孫公色微霽。口誦不親細事四字。怒遂解。已謂蕭少宰雲舉曰。適言不親細事者何人。何沉雅也。蕭公曰。此公安袁宏道名士也。蓋此後孫公知先生爲大用器。甚重之。部中一切事稍稍可密用轉移之法矣。已酉。先生主試秦中。試官以避嫌。不過搜求。先生曰。豈可以一已之功名。忽多士之進取。故通場皆閱。所取士

大半得之落卷中。及出榜。多名士。其錄爲天下第一。先生典試後。與左轄汪公可受密以道相証。遍遊秦中諸勝。歷中嶽嵩山。登華山絕頂而還。所著遊記及詩。渾厚蘊藉。極一唱三嘆之致。較前諸作又一格矣。庚戌。中外官例應取者留京。暫受部啣。以候選取。時候行取者七十餘人。以久在部次。求太宰早題。孫公云。原疏無行取等字。何乃不安其官。遽欲逼迫本部。躡取清華耶。急命該司取原疏來。疏已失。止得疏稿。上果無行取字。止有聽候選取四字而已。孫公怒甚。曰。是以我爲耄也。老夫卽具疏。治此諸人欺罔之罪。諸司官力解不得。先生適在火房卧。夢太宰披襪褰衣。匆忙走出。已挽之。醒聞此事。私嘆曰。言路之塞久矣。太宰豈可復上此疏。助之否。隔且大招紛紜。甚不宜。急草一札至孫公處曰。暫受部銜。乃近日權宜之計。以上久惡言官。得旨甚難。故姑諱行取。以選取代之。今天下事已如轉石拔山。若不委曲通融。事何由濟。惟明公

念之。太宰得札，意始解。先生之善爲調停多此類也。先生攝考功事，一時清流多見拔擢。居吏曹凡二年，偶曹務稍暇，攜二三賓客出遊城西，以水聲林影相娛。少宰蕭公聞而嘆曰：他人作吏部，閉門惟恐見客，袁吏部不拒客，客亦不能爲累，此等風流韻致，真當于古人求之耳。會考功事竣，遂給假南歸。孫公別時咨嘆，幾欲泣下。念年已老，後不及與共事也。途次偕中道遊百泉，及遍覽襄中之勝。時公安已爲水囓，不適有居。先生乃定居江陵沙市，傾囊及市去公安宅，易得一居，欲修葺之，迎養封公。其中治一樓，名曰硯北，取段成式杯瀝之餘，常居硯北意也。樓之前作一小樓，凡三層，可望江，名曰捲雪。先生宦况漸冷，有意栖遲，遂定卧遊之計。其學亦曰趨平澹，常語中道曰：吾覺向來精神未免潑散，近日一意收斂，樓成，每日坐三炷香，收息靜坐。又曰：四十以後，真粉黛縱情慾，便非好消息也。語多如此，不悉記。然大約悟達以後，不欲廢息。

養神事也。至八月中秋後，微動火。九月初五日，晚尚與姪祈年譚時秬，至初六日早，以血下注不起矣。去若坐化者，哀哉。先生識見與豁，機用圓妙，有知之者，謂其識如王文成，膽如張江陵，假之以年，天下事終將賴之，而不逮下壽以歿，天下惜之。生平事封公甚孝，兩異母弟安道、寧道，爲封公所愛者，先生居宦時，極力厚之。念母氏少物，止有一姊一弟，皆有無相共。尤重友誼，憫孤寒，如丘坦買武功爵，不給，立解腰中銀帶助之。寒士有覓書尺者，卽爲推挽。爲吳令，不取一錢，貸而後裝。居官十九年，不置升合田。生平不見人過，有過輒爲掩蓋。門客有負之者，卒亦善遇之。好山水，喜譚詠，不能酒，最愛人飲酒，意興無日不暢適，未見其一刻皺眉。高目，居柳浪六年，睡或高歌而醒，好修治小室，排當極有方略。所著詩文，始有敝篋集，乃作諸生孝廉及初登第時作也。繼有錦帆集，令吳門作也。繼有解脫集，吳門解官與陶石簣諸公遊，吳越諸山作。

也。繼有廣陵集、棄兵令就教、暫攜妻子寓儀真作也。繼有瓶花齋集、則爲京兆授爲太學助教及補儀曹時作也。繼有瀟碧堂集、則六年高卧柳浪湖作也。繼有破硯齋集、則再補儀曹作也。繼有華嵩遊草、則官吏部典試秦中往返作也。蓋自秦中歸爲明年庚戌而先生逝矣。其存者仍爲二卷、外有批點韓柳歐蘇四大家集、宗鏡攝錄、西方論檀經刪、皆行于世。先生生于隆慶戊辰之十二月初六日、卒于萬曆庚戌之九月初六日、享年僅四十有三。妻李氏封安人、成都太守李公台孫女。先生卒、子二：長彭年、嫡出；娶羅氏庠生次岳年、側室出；娉蘇氏、卽蘇御史雲浦惟霖女。蓋中郎逝後、念遺孤而許字之者也。女二：長許娉雲浦第二子、次許娉雲浦弟生負惟霑。長子以萬曆壬子十一月一日與李安人合葬於刀環村法華寺之原。弟中道哀傷中直述其事、百不旣一、伏惟大君子採而誌之、幸甚。

袁中道撰 《珂雪齋集》卷一七

馮嗣宗墓誌銘

君諱復京、世爲嘗熟人。國初成懷遠衛。高祖諱玘、官御史、弘治中疏請歸故籍。祖諱梁、父諱覺、皆不仕。妻盛氏、生三男子：舒、偉、節。知十。天啓二年卒、年五十。君強學廣記、不屑爲章句小儒。少而業詩、鈞貫箋疏。嗤宋人爲固陋、著六家詩名、物疏六十卷。謂冠昏喪祭不當抗家禮於會典、作遵制家禮四卷。羅舊聞、述先德、作先賢事略十卷。族譜四卷。年四十餘始見本朝實錄、謂通紀詳而野、吾學裁而疎、弁山炫博妄而繆、憲章典則自鄒無譏、作編年書、駁正得失、曰明右史略、草創未就而歿。君形容清古、風止詭越、翹身曳步、軒唇鼓掌、悠悠忽忽如也。性嗜酒、酒杯書帙錯列几案、歌嘔少倦、則酌酒自勞、率以爲嘗。數踏省門、不得舉、詠左思詩、馮公豈不偉、白首不見招。往往被酒高歌、至於泣下。嘗之白門、日旰、輒登雨花臺、縱飲慟哭、哭罷復飲、飲已復哭。人不知何所爲也。死之日、語家人曰：吾將爲冥官、以日中上。人曰：須明日乎？曰：非也。鬼神以夜半爲日中耳。及時而絕。銘曰：



阮籍死矣。哭聲十年。君字嗣宗。其哭亦然。唐衢
謝翱。後善哭者。君亦何爲。有淚如寫。遺書滿家。
子孫繩繩。先號後笑。請眎斯銘。

錢謙益撰 《牧齋初學集》卷五五

校記

- ①楊：當作「揚」。
- ②盲：當作「育」。
- ③花源：據上文當作「桃花源」。
- ④不惻：當作「不測」。
- ⑤留之刻報中：此句疑有脫誤。
- ⑥啣：當作「銜」，見下文所述。
- ⑦嘗熟：當作「常熟」。

明儒碑傳集卷九十二

卓爾康 沈守正 顧大韶

卓去病先生墓誌銘

去病姓卓氏名爾康。其為人孝于親、忠于君、篤厚于朋友。以通經術、講經濟爲能事。孤峭介特、以世道爲已任。雖其生值叔季、身沈下僚、天下之士識與不識、皆信之無異詞。去病杭之塘西里人。父光祿署丞明卿、能詩、結客諸老先生、皆字之曰徵甫。去病徵甫之少子也。而出後于其兄學錄文卿。少有至性、事三母皆盡孝。萬曆壬子舉鄉書。本生母卒、終喪三年、哀動路人。此其孝于親也。憤時俗重進士科、糞洩乙榜、厚自灑濯、務使所居官大。授祥符教諭、署儀封封丘、假守許州。所至頒立教條、釀雍河、築圯城、爲百世利。入爲國子學錄、轉兵部司務、陞南京刑部主事、工部屯田司郎中。在司廳、危言覈論、動引古誼、兩尚書便文老吏皆屈已從之。左遷常州府簡校、徙大同推官。盧公象昇爲督府、建白兵事、稍自發舒。量移兩淮分司運判、不以衰晚故、取看囊一錢。歲大祲、涕泣爲淮人請賑、語切直、多忌諱、用是罷歸。甲申之難、早行呼憤、涕流漬床席、不踰年而死。此其忠于君者也。兒時與

胡胤嘉休復同學、嚶嚶好古、長以許孟中、高存之二君子爲師友。休復選庶常、卒官、爲木主祀于中霤之左、并祀休復父太公及壬子舉主余御史之無後者。與人交、寬論不知已而嚴于知已。後門寒雋、傾身慰藉。鉅公要人片語責望、終身不交一言。晚而與余定交。語人曰、吾得此友、藉以報塞國家、非以爲交遊光寵也。其相期待如此。愍六經之學不達而師倖、摩跡編削、句籀字櫛、期張衆目爲羅、以蒐獵聖賢之指要、作易五十卷、詩學四十卷、春秋辨義四十卷。茂苑相國進講春秋、將錄其書以獻、去位不果上。萬曆間、河決山東、去病年二十、與休復落第居金陵、遣老丁生裏糧視張家堰口、諸生皆目笑之。舟船南北、迂道沂沿、訪問黃淮分合情勢、作河渠議十篇。旁及禮樂、郊廟、財賦、漕運、錢法、官制六要會要、各有成書。而尤詳于武備、人皆易之、謂希上兵法耳。比官雲中而略卜之議起。卜者順義王後也。西哈市馬以卜爲僉、足取我一金而陰啗哈金強半、謂之啞食。哈恨而謀併之、乃好言謾我、卜陽事天朝、陰導天朝。若捨卜而固與我、願併力爲漢圖。諸降部落却附、從中蠶起、可反手滅也。邊吏皆盱衡鼓掌、謂侯封可契



展取。去病奏記盧公，謂邊吏不知大計，其故有三。卜四世保塞，今棄之以媚哈，諸聲謂漢少恩不足恃賴。一也。哈易我而畏，謾言爲我國，所謂空給王易耳。二也。哈開歸化城十五日不解，卜街我甚，必東走以尊我。三也。計莫若宣諭西哈，保全殘卜，堂堂正正，存中國大體。我一言而解卜圍，往卜設餉，譯此所謂知大計者也。盧公大悟，趣下邊吏施行，宣雲遂解嚴。當是時，盧公嚴重，去病朝見，屬吏罷，輒開後堂，延去病上坐，部折謝不敏，隅坐，請事議上，時漏下二鼓，盧公炳燭傳飯，贊明而事定。于是向之易去病者，詫去病果知兵，又惜盧公能用去病而坐視其抑沒以終老也。崇禎末，中書沈君廷楊以海運超拜，特疏請余開府東海，設重鎮任援勦。去病家居，老且病矣，聞之大喜，齒圖系說條列用海大計，惟恐余之不得當也。疏入未報而事已不可爲。去病晚歲論兵，常爲東事及其所期許于余者，至是而心灰夢斷，臣精銷亡，不復能久居此世矣。此可爲痛哭者也。去病卒甲申十一月廿九日，年七十有五。妻李氏，側室劉氏，詹氏，子三人，向、人、伊、人。泉女一人。泉以乙亥歲塋去病于泉鶴之阡，抱其遺書哭而請銘于余，余見而悲之。

余嘗謂去病以文士喜論兵，述戰守勝負之要，似尹師魯。遇事發憤，是是非非無所忌諱，似石守道。歐陽公論守道曰：其違世驚俗，人皆笑之，則曰吾非狂癡者也。然則天下之士雖知去病，其能推其用心而哀其志者，則亦鮮矣。去病有集二十卷，余爲之序曰：百年而後，深思尙論，想見其爲人，亦必有如余之廢書嘆息，泣下沾襟而不能自止者。蓋其言之而益信。銘曰：

世之稱君，咸擬以儒林廉吏。琬琰刻鏤，余之惜君，則獎其長情奇志，怫鬱于下泉。鶴舉之原，宿草芊眠，此何祥邪？有光問于斗牛之間。嗚呼，張華雷令不可得矣，孰知其然不然。

錢謙益撰（牧齋有學集）卷三二

都察院司務無回沈君墓誌銘

萬曆時杭有三士焉曰胡胤嘉休復卓爾康去病沈守正無回奮手流俗之中以文章志節相摩厲海內稱之如唐人所云四變者休復舉進士選翰林庶吉士踰年卒去病無回皆不第無回官都察院司務卒於官其子允舍屬去病為行狀而謁銘於予予之諾其請者蓋十年於此去無回之歿十九年矣嗚呼去病之稱無回備矣稱其行誼則曰為子而孝也初舉於鄉痛父之未葬衰絰而襄事不以公車為解鄉之稱孝者歸焉為友而信也視友如其兄弟視朋友之父母如父母視朋友之子如子鄉之論交者準焉為舉子而廉也公車二十年不以名利謁監司不以竿牘干縣令自守泊如也鄉之自好者觀焉稱其經濟則曰為學官於黃巖以文墨而精吏事學田之伏匿者八百畝一昔而鉤得之台平之諫也設方略購死士佐兵使者定變老於兵閒者莫及也稱其立朝則曰為司務四十餘日以散寮而著風節嘗朝之日司廳應奏事者不至無回獨被糾免冠待罪口不置一喙皆得

不生人謂古大臣風彷彿錢若水欲與知州陪奉贖銅事也嗚呼無回之可稱者如是而已乎余為舉子與休復無回方舟而北休復蕭閒淡漠如定僧靜女無回神宇高徹顧盼風生余居其閒兩相得也已而與無回游處觀其所撰著鈎玄提要朱黃盈帙知其人博學深思而好古者也盱衡揚眉指畫天下事其辨博如環之無端其斷割若觸之能解客散辨息端居燕處若風之已過而水波湛如也車蓋成陰生徒成市道廣智周人人以為親已介性所至戒標榜絕依附如松栢之獨立人未嘗不望而自遠也嘗以宋人擬之休復似孫明復去病似尹師魯無回似蘇子美明復諸人其所遇斯已窮矣三君者之自見於後世與諸人孰多才耶命耶其可為歎息者不獨無回而已也今年余過休復故宅其寡嫂具特羊之饗去病居士位允舍以子婿行酒炙明燈促坐譚休復無回游跡相顧涕洟而罷去病方罷官歸門仞蕭然意殊不自得而余亦已老矣允舍諄復以銘墓為請去病助之尤力余之慨歎於無回以謂去病稱之未盡



者余之文果足以盡之耶。天之厄無回也。使其可稱者如是而止。余與去病又將若之何。嗚呼。其可悲也已。無回之先自南宋已家臨安。父煙江公諱某。母某氏。天啓癸亥三月二十八日卒。娶謝氏。子二人。長允含。次美含。某年某月葬於某地之阡。所著雪堂集。濬河防倭議。行於世。他著作皆燬於火。銘曰。

祿命之術通天咫。煙江有識詒厥子。玄黠滯難發。麟趾鹿鳴之秋歲。陽癸有才無命一官死。五十年昔夢耳。請視巾箱尺牘紙。我作銘詩歌萬里。有如不信問瞽史。

錢謙益撰 《牧齋初學集》卷五四

顧仲恭傳

顧大韶字仲恭。嘗熟人也。父雲程。神廟時爲南京太嘗寺卿。仲恭與其兄大章字伯欽。學生子也。連袂出游。人不能辯其少長。有張伯皆仲皆之目。伯欽舉進士。奉使休沐。顏面膚腴。衣冠騎從甚都。仲恭老於書生。頭蓬不櫛。衣垢不滌。口不擇言。交不擇人。潦倒折拉。悠悠忽忽。每引鏡自詫曰。顧仲恭乃如許。仲恭少治詩義。專門名家。竟陵鍾惺定爲本朝第一。長益肆力於學。

問六經諸史。百家內典之書。靡不亂其津涉。啓其鈴鍵。而其所沈研鑽極者。詩經、三禮、莊子也。其讀書也。一覽卽了。大義通明。指歸又不憚穿穴。訓故用以會粹異義。則削隱滯。一以爲通人碩學。一以爲老生宿儒。蓋兼而舉之也。其論詩以爲詩有齊韓魯三傳。毛傳出而三家廢。鄭箋時與毛異。唐宋諸儒多與毛鄭異。朱子盡埽毛鄭。槩以鄭衛爲淫風。世儒皆知其繆。其尤踳駁者。則不取義之興也。既不取義矣。又何興乎。又有全不會小序之意。妄自刪改者。伐木之序曰。燕朋友故舊也。自天子至於庶人。未有不須友以成者。此篇乃答上篇棠棣之意。雖燕親戚而以朋友爲重。棠棣譏雖有兄弟不如友生。此言人不可不求友生。至於父舅兄弟。亦當以酒食相親洽也。朱子取小序首句而刪去下二句。則直以父舅兄弟爲朋友矣。其可通乎。鴛鴦序曰。刺幽王也。古之明王交於萬物有道。自奉養有節焉。朱子直注云。鴛鴦于飛。則畢之羅之矣。君子萬年。則福祿宜之矣。夫鴛鴦之羅畢羅。此豈吉祥善事。而以興人主之福祿乎。此二章乃一正一反。以爲諷諫。于飛則畢之羅之。在梁則戢



其左翼明動者之有災靜者之无咎也。周自昭王南征而不復穆王西征而徐叛自此以還以巡狩爲危事故卜征五襲吉而後行此所謂交萬物有道而詩人以為諷也正與魚藻王在在鎬飲酒樂豈同義一吟詠而知非盛世之詩矣此之不解豈所謂以意逆志者乎。今欲刊定一書當用毛傳爲主。毛必不可通然後用鄭。毛鄭必不可通然後用朱。毛鄭朱皆不可通然後網羅羣說而以己意衷之。嚴粲詩輯作於朱注之後獨優於諸家而大全之作敷衍朱注一無發明用履齋說可也。其論禮記謂自宋以前爲禮經之學者惟知有鄭注孔疏康成以耆德雄辯壓折千載穎達依阿其旨無所是正。自宣和有好古之主于是三代器物閒出於墟墓伏匿之中學者援以證漢人之多謬而陳氏之集說出焉。未有集說以前學者之患在于疑而不能明既有集說以後學者之患又在乎明而不能疑不可以不深維而自得也。其論周禮則地官之原隰羸物小司徒之上中下地以及鄉師鄉老州長之名秩春官大宗伯之天產地產春官之

世婦夏官馬質之旬內外司燿之出火內火冬官之量豆瓊案以及匠人營國皆援經據傳考古徵今以訂補注疏之疏闕而小戴記是正者尤多。其辨五帝世繫曰康成千載儒宗而惑溺緯書王肅引經據傳用以難鄭惟五帝世繫則康成紕史記本紀而取春秋命序曆最爲有見王肅據家語五帝德以闢之斯爲繆矣。五帝德篇太史公採爲本紀謂黃帝少典之子也正妃嫫祖生二子。一曰玄囂是爲帝嚳高辛氏之祖二曰昌意是爲顓頊高陽氏之父。帝嚳生堯及稷契顓頊生鯀鯀生禹。自黃帝至禹皆同姓而異其國號。夫三皇五帝之事若存若亡詩書之傳所不載聞可推尋則必於左氏內外傳求之。左傳邾子之言曰炎帝以火紀故爲火師而火名黃帝以雲紀故爲雲師而雲名少昊氏之立也鳳鳥適至故爲鳥師而鳥名。自顓頊以來乃紀于近。縣此言之則少昊在黃帝之後顓頊之前明矣。今本紀五帝不數少昊而直曰黃帝崩其孫昌意之子顓頊立則將置少昊于何地乎。或又曲爲之說謂少昊即玄囂玄囂號曰青陽

而少昊號曰金天、迺然有金木之別、其非一入可知。且玄囂若立爲帝、豈容降居江水、或又曲爲之說、謂少昊卽少典、如是則反爲黃帝之父矣。黃帝與炎帝戰於阪泉、克之而代其位、何容炎黃之閒更著少昊、其必不然者一也。孟子曰、天下之生久矣、一治一亂、五百年必有王者興。左傳曰、九州之險、是不一姓。此乾坤消長、剝復自然之理也。少昊氏之衰也、九黎亂德、顓頊乃命重黎、絕地天通。顓頊氏之衰也、共工氏霸而不王、帝嚳伐之、而序正星辰。皆其子孫失德、衰敗、而異姓代興。若黃帝之後卽少昊、少昊之後卽顓頊、顓頊之後卽帝嚳、數百年嘗治不亂、則九黎共工、安所廁足於其閒、其必不然者二也。古者帝王革命、必改正朔、易服色、殊徽號、異器用、繼世而有天下、則否。若少昊、顓頊、帝嚳、親爲黃帝之子孫、而儼然革命、更姓改物、視其父祖如興王之待勝國、則悖德已甚矣。其必不然者三也。凡左氏所云高辛氏有才子、帝鴻氏有不才子者、皆歷代帝王之苗裔耳。受氏之後、雖數十百世、亦曰某氏、非必指其身也。而讀者不察、

以鯀爲顓頊之親子、以稷、契俱帝嚳之親子。于是竹書紀年謂鯀一百九十歲而誅、推其受命治水之年、蓋已一百八十一矣。堯之禪舜、舜之禪禹、大約在九十左右、寧有一百八十方膺重任者。八十九十曰耄、有罪不加刑焉、寧有一百九十而置大辟者。堯未舉舜之先、書稱百姓昭明、庶績咸熙。稷、契果親弟、八十年而不知堯、豈若是之愚、而羲和四岳諸臣蔽賢焉若是哉。其必不然者四也。命序曆之言曰、炎帝號曰大庭氏、傳八世合五百二十歲。次黃帝、一曰帝軒轅、傳十世一千五百二十歲。次少昊、曰金天氏、卽窮桑氏、傳八世五百歲。次顓頊、卽高陽氏、傳二十世三百五十歲。次帝嚳、卽高辛氏、傳十世四百歲。此康成所据以紬本紀、而予亦深信不疑者也。黃帝壽三百歲、後九世合得千二百二十年、或亦有之。或一十字爲衍文、闕疑可也。康成信緯書、莫失於六天之說、謂天皇帝等俱有名字、而後世乃千載遵用、莫得於帝王世數之說、而後世絕無信從者、以此知人心不同、衆言淆亂、而好學深思者之寡也。陳壽蜀志稱秦宓

見帝系之文、著論以明其不然。今其書不傳、而禮記疏中載孫炎駁王肅聖證論、文多散佚、予乃彙合、傳以已意、作五帝世系辨。其餘如正蘇明允太玄論、駁蘇子繇洪範五事說、辨李翱五木經、縱橫浩汗、不下數萬言、而謂太玄可以不作、欲追廢桓譚、張衡于千載之上、吾未之敢許也。仲恭論經學于近代少可、惟推武林卓爾康、十五國風論、以爲通儒。爾康勸仲恭著書垂後、仲恭復之曰、古人之書汗牛充棟、吾輩雖勤學者尚不能十窺二三、況吾輩之才學遠不逮古人、而後之學者其勤又未必及吾輩、縱復有惠施之五車、其誰傳之。又曰、春秋以前作者之事備矣、雖有聖人、但述而不作。宋元以來、述者之事備矣、雖有志士、但當誦而不述。爾康無以難也。慈谿馮公元颺按部海虞、造門修謁、請所著書、仲恭亦以斯言謝焉。晚而語余、吾欲將十三經、諸子、墜言、滯義、標舉數則、勒成一書、竊比於程大昌演繁露、王伯厚困學紀聞、庶幾可以謝諸公及吾子矣。易簣之前、繕寫所楚詩經、禮記、莊子、俾其子屬余、今所傳炳燭齋隨筆是也。仲

恭自負才敏、傑然有志於當世。衰晚病廢、志意約結、作爲文章、以自慰諭。嘉定程孟陽稱之曰、李文饒之流也。作竹箴傳曰、竹氏之興、蓋顯于禹益之世、至周浸盛、有名策者、與端木氏之名方者齊名、竝以強識聞。方專史職、而策好博小物、爲人修直無煩。帝命與投鉤氏、互司利事、市民之分貨財不平者、咸質厥成。又善事鬼神、神降言必憑焉、巫覡莫及也。其族初在遼西、今支齊桓公伐山戎、斬孤竹、乃遷中土。漢帝將立后、未定、侍臣請決之策、帝不能用。晉武卽位、問世數、策對以一舉朝駭愕相顧、咎策失言、策不以屑意。然其言卒驗。後更名籤、仕齊梁間、爲諸王保傅。久之罷去。入唐、爲陳武烈帝大祝、傳帝意、作韻語、簡奧類焦贛易林。入宋、復辟江東神幕、更爲長句、俳俚通俗。關壯繆侯之改諡、武安王也、倚勢辟之。王甚神聖、得籤佐益著膺璽、明興、爲王立廟京師正陽門、命籤典謁、凡士之求官位者、商賈之求奇贏者、吉凶利鈍、無巨細皆謁王。王倦于酬對、穆然無言、目籤使以已意答之。籤受命如響、巧發奇中。萬曆間、名浸盛。太宰聞



而賢之薦于朝命入吏部貳文選郎事先是選郎多黷貨或異儒徇請託有賢自好者避怨議嘗惴惴衆推籤廉平遂以選事委焉每朝廷有大選選郎第按故事注品官其地之遠近善惡劇易與人宜否一決于籤太宰據籤所定成奏上之天子天子輒可其奏內外無閒言籤亦喜自負浸以驕泰入吏部堂立太宰下挺然無所屈居嘗慷慨大言堯舜以後代無真人使我得行其道無懷泰豆之治何足云哉或問曰子道已行矣又何閒焉籤曰未也鄉會試之榜翰林科道之選皆本朝所重也數者我無一與焉悉以畀吾吾志快矣士之失職者傳其語爲口實舉朝爲之不平于是臺省交章劾籤怨望宜下法司訊天子曰籤忠臣也下法司且死將廷鞠之期日命籤聽于朝公卿以下咸集遣司禮太監詰籤汝以小臣與聞大政分已踰矣猶懷怨望何也籤曰臣何敢怨望哉臣見中朝貴要人共爲欺罔以誤主上受主上深恩不勝孤憤故發此論耳主上試面詰在廷諸臣吉士之選不以資緣進乎吏部之有

頂首科場之有關節不累見白簡乎使臣爲政縱賢愚同貴何至繆鑿若此宋歐陽修知貢舉惟朱衣之言是聽夫朱衣第善點頭耳臣乃善爲詩四五六七言皆知宿構使修復知貢舉舍臣無與共事諸臣自視何如修乃毀譽臣耶于是公卿以下同詞奏曰籤侮朝廷輕當世之士無人臣禮且籤在吏部縱吏胥納選人賄上下其手籤陽瘖不問詐爲愚忠實敗國事罪當誅籤曰敗國事者非籤也諸臣結結吏胥其爲姦利百方賣臣臣疎于簡下理宜有之書曰有過無大刑故無小臣之見責過也諸臣之責臣故也主上以爲罪宜誰坐且臣本山林人自虞夏以來修身數千歲廁迹巫覡祝史之間隨俗上下主上特簡臣佐吏部臣豈有心求之哉臣不飲不食無妻子之累得賄將焉用之主上若以臣爲不肖卽日解臣吏部職聽臣仍歸武安王廟得死所矣臣謹伏階下以俟太監以狀聞天子曰吾固知籤忠命還部掌選事如故籤知世不容忽一日棄官遁去莫知所終或曰觀昔大士挈以歸淨土云野史氏曰古之司銓者權氏



敬氏皆名能其職。權氏善低昂人。錙銖無所假。類非長者。敬氏好面詆人。醜恨者至欲撲殺之。明哲保身。吾有憾焉。固未若蔽之虛已御物。德怨兩忘也。或疑蔽蓋巫祝之流。不宜在廊廟。是殆不然。太戊以巫咸爲相。成王侯卜正于滕。巫祝又豈可賤簡哉。蔽遭逢聖世。致位津要。蟬脫穢濁。以全其軀。詩曰。逝將去女。適彼樂土。嗚呼。賢矣。又後虱賦曰。李商隱有虱賦。陸龜蒙有後虱賦。李止譏其齧臭。未盡其罪也。陸更賞其恒德。則幾好人所惡矣。作又後虱賦以正之。仁不害人。義不穿窬。傷人及盜。漢法必誅。二罪并發。乃在濡需。請數其惡。始服厥辜。昆蟲之醜。實繁有徒。與人相通。損益各殊。蠶絲蠶蜜。翻効勤劬。絡緯促織。蜻蛚蟋蟀。螢飛蝶舞。助人爲娛。若斯之倫。固不可無。鼠婦蚰蜒。穢我階除。胥庭網戶。蟪蛄蜘蛛。螻鳴于土。蚓歌于塗。怒臂螳螂。祝子蒲盧。撲火役鬼。投燈煎軀。爰產竈馬。羶聚玄駒。地鼃蝸牛。負蟻推車。總屬堪憎。無傷于吾。若斯之倫。聽其所如。爰有白蟬。善齧吾書。蠹侵嘉樹。蛀耗宋珠。蝗螟綠螳。嘉種是鋤。醢敗于蚋。肉敗

于蛆。飛蟹蝕柱。青蠅沈裾。是皆吾讎。害禾剝膚。情在可宥。我咸赦諸。蠶尾惟蠹。鉤牙惟蝮。蠅虻似蛾。玄蜂若壺。蛭縮如絙。虵行蠕蠕。守宮壁鏡。藏毒不虛。凡彼蜚螫。可辟可祛。有犯則殺。固難盡屠。蛔蛇匿胃。蚘蠱潛膚。我欲除之。無形可剗。蚊恃矯翼。蚤憑輕軀。我欲捕之。轉盼而逋。若汝虱者。何能爲乎。形眇一黍。質無半銖。或入吾禪。或托吾襦。旬日累代。繁孕而居。黑食頭垢。白吮身腴。爾類日肥。我貌日瘠。瞥焉見察。循髮鑽視。既貪且懦。既鈍復愚。肉食之鄙。曾莫汝驗。湯沐既具。汝命難紓。罪在不赦。慎勿怨余。虱聞斯言。匍匐俯伏。靜聽譴訶。祈緩涕沃。傾耳察之。杳無聲觸。齋心以聆。若訴若哭。號物萬數。惟天如育。蠢動含靈。誰非眷屬。身命布施。于聖軌躅。嗟君之量。何其褊促。我食無穀。我啜無菽。天賜我餐。惟血也獨。我首無角。我喙無啄。微啞君肌。何遽爲酷。君何不廣。請觀朝局。聞諸商君。吾友有六。皆錫天爵。皆賦天祿。榮妻任子。亢宗潤族。吸民之髓。掌主之目。債事無刑。廢職無辱。嬉遊畢齡。考終就木。我美我友。飛而擇肉。我罪伊何。太倉

一果。君欲我誅，盍速彼獄。我聞亂言，怒髮上矗。最爾微蟲，寧望禽畜。積汝億命，不比奴僕。敢擬朝士，騰茲謗讟。卽汝明刑，豈止湯沐。繫之以髮，懸之于竹。細條爲弓，繡鍼爲鏃。弦絲射之，一發洞腹。尸諸棘端，以爲大戮。仲恭焚棄其稿，自定爲二十二篇。此二篇最善。贊曰：余壯而始與仲恭游，每舉韓退之評柳子厚勇於爲人，不自貴重，以相磨切。已而讀班史，至陳遵謂張竦與原涉應客之言，未嘗不爲反復流涕也。傷仲恭浮湛里閒，所謂親見楊子雲祿位客貌不能動人，其文章議論將久而不傳，故採擇其可觀者著之於篇。葉適敘陳同父之文曰：使同父晚不登進士，則終爲狼疾人而已矣。仲恭亦云。嗚呼，悲夫。

錢謙益撰（牧齋初學集）卷七二

校記

①嘗熟：當作「常熟」。按，本集中「常」多刻作「嘗」。下文「太嘗寺」亦當作「太常寺」。

明儒碑傳集卷九十三

鍾惺 文震孟 耿橘 鹿善繼

退谷先生墓誌銘

退谷先生者、吾友鍾學使伯敬先生也。退谷既葬、其弟曰快者謂元春知獨深、可不須狀而銘。又地下人偏嗜其文字、不宜舍所嗜乞他人銘。元春唯唯。居數月、其嗣陔夏復以母黃宜人之命申焉。元春返其幣而哭、使予不爲文則已、使予而尚爲文也、舍是奚述焉。雖然、退谷異人也、不奪其形影精光、使必傳於世、徒絮絮然爲誌墓之言、彼其詩文譔述雖傳矣、而形影精光終不能行於天地之間、則是誌墓者之罪也。元春伏思累日夜、至不寐達旦。退谷初在

神宗時、官行人、思有用於當世。與一二同官講求時務、厭呻吟不從病起、玄黃水火、終日聒憤、以爲吾若居給事御史、務求實用、不競末節小名、愛戀身家、如鷄鶩之爭食、婦女之簡狎、庶不令主上厭極大創、禍流縉紳。然其要惟在讀書、讀書而後實忠實孝實用出矣。先機蚤見、已若知有嘉廟之末年與。

今上之神聖者、是其人真可大用。會有忌其才高者、阨之、使不得至臺省。後遂偃仰郎署、衡文闡海、終不能大有所表見、而僅以詩文爲當時師法、亦可惜也。退谷羸癯、力不能勝布褐。性深靖、如一泓定水、披其帷如含米霜、不與世俗人交接。或時對面同坐、起若無親者。仕宦邀飲、無酬酢、主賓如不相屬。人以是多忌之。而專積思於書史、齋頭亦致法書名畫、瓶几布設、不數日、繕閱功深、塵堆硯表、卷帙正倒參差、常從塵硯中磨墨一方、頭眼入於紙筆、作書生家紙格細字。居官垂老、無一日間嘗恨世人聞見汨沒、守文難破、故潛思遐覽、深入超出。綴古今之命脉、開人我之眼盼。故其所著書出、賢者通志而鉅夫長根、雖甚謗怨者、意欲投之於廁、而不能禁其不行。萬曆甲寅乙卯間、取古人詩與元春商定、分朱藍筆、各以意棄取、鏘秀除穢、笑哭由我。雖古人不之顧。世所傳詩歸是也。幾以此得禍者數矣。小儒輩侏侏暖暖、刻爲書破之。退谷笑謂我曰、是何見之晚也。吾輩除此書外、自有可傳後者、正不須護之。使人不如我輩、讀此書而



儒藏

必欲其興與世之如此書而必欲其廢廣隘深淺相去幾何。予深高其言。退谷改南時。慨秦淮一水閣。閉門讀史。筆其所見。題曰史懷。孤衷靜影。常借歌管。往來陶寫文心。每游入午夜。棹回曲倦。酒盡兩岸寂不聞聲。而猶有一燈熒熒守筆墨不收者。窺窻視之。則嗒然退谷也。東南人士以爲真好學者。退谷一人耳。所至名山川必游。游必足目淵渺。極升降縈繚之美。使巴蜀歷三峽。入東魯。觀日出。較閩士陟武夷。東南之久客如家。吳越之一游忘返。山川豫待。人士歡迎。典山水交游如長。直不欲名士耳。其詩文未嘗不勇進而動徙也。年四十八九。始念人生不常。佛種漸失。悲淚自矢。以爲讀書不讀內典。如乞食。終非自費。男子住世數十年。不明生死大事。實質而去。一妄庸人耳。乃研精楞嚴。眠食瀟湘。皆執卷熟思。著如說十卷。病臥猶沾沾念之。曰。使吾數年視息人間。猶得細窺妙莊嚴路也。退谷簡易如楊子雲。劉子政一流人。敝車羸服。挾雙僮出。不治威儀。嘗遊虎丘。遭兩公子見侮於途。醉狀敬傾。作捉搦聲。踢勢。同行客怒欲毆之。退谷急止之曰。此惡少也。吾趨

避之耳。明日傳刺。有兩書生求見。蕭衣冠。書幣恭謹。以文來。贊稱弟子者。退谷出舟相見。則向人也。爲細閱其文。不復言。兩人慚無措。退谷雖嚴冷。然待賓接士。一以誠厚。薦人惟恐其知。曾答富路書。至半。停筆思曰。彼方有何士。爲一言之久之。思得一人。喜而書。汨汨然若有所請屬者。其後所薦人多。雖黃退谷。彼特未知前書中語耳。使以書中語告之。斯當何如也。性喜擇士。凡一見而知其人。卒以成名者甚衆。遇有真實。雖其人在千里之外。心憶口追。常如隔隣。人有佳文妙談。日自尋味。以潤澤其胸臆。不問所逢貴賤。皆執其裾而詳告之。故往往才人成就。歡悅無量。但以愛人慧巧。不肖者因而呈身。濫入交游。詢懣齟齬。皆棄于此。亦可爲士大夫不慎之戒矣。退谷內行過人。凡大父以下。先世貽家孝愛。爲生艱難。事皆起環於心。未嘗一日忘。生嗣父母恩。養教誨。言之哽咽。不能竟其詞。弟姪相依。孤寡盈前。歡笑疾苦。一往無繇。然居喪作詩文。遊山水。不盡拘乎禮俗。哀樂奇到。非俗儒所能測也。予嘗記其一事。生父訓導公以受禮



部郎中封去毘陵。退谷亦秩滿遷閩中督學。侍親還家。舟泊九江。歲除。明晨服吉賀正。訓導公素嚴。忽中繼室之言。不聽上舟。退谷衣冠立岸上良久。長年所微錯愕。不知所謂。已而上舟跪拜。訓導公咄咄促之起。問姬安在。則猶牀上卧。退谷復衣冠拜牀下曰。太夫人安否。謹再拜賀。太夫人正。後侍童爲予道如是。予兩時間之歎仰而已。退谷爲諸生十二年。常不利。癸卯舉孝廉。至庚戌始爲夷陵雷公簡討所深賞。中第十七人。成進士。爲行人者八年。中間使四川山東及典貴州。乙卯鄉試者凡三差。擬部者二年。改授工部主事。上疏願改南曹部。持不覆者又二年。授南禮部儀制司主事。轉祠祭司郎中者又一年。陞福建提學僉事。考較興化。延平。福州三府者一年。尋丁父憂去職。大計中人言。服闋居家者凡三年。而退谷卒。壽益五十有二矣。生于萬曆甲戌七月二十七日。沒以天啓四年六月二十一日。葬以天啓末年丁卯十月十八日。塋去阜市十里笑城之南。所著書有隱秀軒全集。評閱諸書。俱行于世。退谷諱惺。字伯敬。先世江

西永豐人。正德中始徙景陵之阜市。曾祖諱弘仲。祖諱山。最有隱德。山生二子。長卽公嗣父。諱一理。號裕齋。公嗣母陳宜人。次卽公生父。諱一貫。號魯菴。公武進縣訓導。生母馮宜人。皆以公貴。拜大夫。宜人妻黃氏。亦封宜人。安廣陵女吳氏。以過悲。繼公死。黃宜人所生子肆夏。年十四。爲諸生。穎邁早卒。嗣子陔夏。亦諸生。娶謝氏。有孫矣。母弟四人。憐早卒。憐諸生。詩文甚奇。先退谷卒。憐又先卒。獨五弟快在耳。快真朴長齋事佛。通書畫。事子如兄。姪二人。昭夏。納夏。昭夏亦諸生。元春旣已爲誌。憶昔年退谷之作魏長公銘也。曰。後死者之墓之誌。烏知夫誰手。予戲謂退谷。有如一。旦填溝壑。所謂君雖恨于臣。無可奈何也。當時戲言耳。豈意一片幽石真落予手乎。悲夫。何以銘銘曰。

餐幽獵秀。無終極。水性霜臺。與宰匿。得意靜書。不再歸。海嶽如從君受職。驅煙排霧。待拂拭。紛紛餘子。不相識。強來君前談法式。鞭笞鳳麟。加裁抑。爾曹蠢蠢徒失色。勤農竟湯。費稼穡。汗流至踵。沒籍湜。大勇猛。

人歸蓮域。厥多開障。宣慈力。海印放光。只頃刻。發檀求之不可得。茫茫衣履我銘側。

聖元集 卷二

文肅公傳

公諱震孟字文起。先世衡州人。自衡遷。始定居於蘇。有諱林者。偕其弟森。後先舉進士。林官至溫州知府。森巡撫都御史。而文之族始大。林生翰林。待詔徵明。徵明生國子博士彭。彭生衡輝。同知贈左諭德兼侍講。元發。元發生公。年二十一。以春秋經舉應天鄉試。凡十上禮部。天啓二年始舉會試。以殿試第一人授翰林院修撰。於是嘉宗幼冲。太監魏忠賢擅權。羣小相次用事。方下講學之禁。而謀盡逐東林黨人。公乃疏請勸學勤政。語侵忠賢。忠賢怒。指摘疏中字。以為朝訕。有旨將予杖。閣臣力救。改降二級調外。遂策蹇以歸。公故與姊子姚文毅公希孟及里中周忠介公順昌友善。其志節略同。又視東林諸先生輩行甚後。而平未論議。數相企慕。故羣小爭自為黨魁。及歸里。忠介公既被逮死。文毅復以事錮職。公日夜懼不免。豫設家人。俟緩騎到。即引決。幸而不及於禍。未幾。一妾男子作步天歌。以寓刺譏。厥衡捕獲。即鍛鍊獄辭。令牽連公。公亦遂削籍。崇禎改元。薦起侍讀。尋進左中允。左諭德。充日講官。累至左庶子。少詹事。兼侍讀學士。纂脩嘉宗實錄。日講如故。公在講筵。見人主聰察過甚。而諸臣方用門戶相齟齬。莫有能當上心者。每臨講。必反復開陳。務關切時事。以諷。帝輒改容嘉納焉。旋察公挺挺忠正。論說有裨於國。中軍輔選。嘗曰。文某倒好。始講筵於五經廢春秋。禮記不講。神宗方命講禮記。至是又命講春秋。聞臣溫體仁輩素不樂公。而春秋非顯門。不能講。公少習是經。為大師體仁不得已。以公應命。講至宰嚭歸。則傳。則凶禮也。於例當闕。帝令補講。章進覽公乃推明春秋之義。極言嚭以六卿之長。而壞法亂紀。自王朝始焉。用彼相。帝甚嘉歎。降諭諸講官。今後當講者悉以此類推。舉朝益知公將大用矣。其明年廷推閣員。公資淺不在推中。特旨命吏部取公。年籍履歷入。遂拜禮部左侍郎。兼東閣大



學士入閣辦事。公之為史官也。值北兵甫退。吏部將借邊才以翻前所定逆案。公再疏爭之。羣小已相與側目。繼又上疏請改正光宗實錄。其略曰。臣撰以菲才。備員史局。頃因纂修。恭請光宗實錄。副本校對。見中間舛誤甚多。而悖謬之大者。莫如先帝之冊立與挺擊。紅丸三大事。祖要典邪說而應和之。蓋逆黨崔呈秀等請旨重修。見今藏於皇史宬者是也。方進呈之時。皇上初登大寶。要典未竣。逆案未訂。以故含糊從事。後來亦無復發金匱之祕。洗石渠之藏者。至今邪說猶在。僕謂一入史宬。不可復改。則流傳後世。將安取衷。國是攸關。非細故也。因條次所宜改正者。其目凡五。疏入。大忤體仁輩意。而帝獨心善其言。出御平臺。手公疏示閣臣。帝親意。體仁公而體仁及王應熊兩人猶斷力持之。詰問良久。兩人者辭窮無以對方。叩首曰。此誠逆黨所造邪說也。今要典之燬已久。又蒙皇上申飭。即可垂示後世矣。實錄雖不果改。而奉俞旨申明。略如公之奏焉。由是益與體仁輩忤。既入直。應熊去位。而體仁深中多數。乃力求所以中傷公者。會都給事中許公譽卿及公婿家福建右布政申紹芳得罪。公竟以是罷去。先是吏部尚書謝陞不厭眾望。穀為科道官所糾。陞頗疑譽卿指使。譽卿故公所推重者也。用是并疑公。最後陞納山東布政勞某賄。推擢登萊巡撫。眾議大譁。因交章彈陞。陞寤甚。具疏自辨。遂誣譽卿。紹芳坐以馮籍與援寧官講關其事。絕無左驗。蓋陰借以傾公也。故事。凡奏疏至閣。中閣臣以次分票。是疏不隸體仁所。而體仁微取之。竟擬旨削譽卿籍。且票且目公。公從容曰。言官為民極榮事也。彼方德公王戚之耳。體仁益慍。露章言皇上所以鼓勵天下者。惟此爵祿名位。而文某云云。以朕肱心膂之臣。出此悖倫滅法之語。欲以激怒帝。帝果意公有私。得旨閑住。公罷而譽卿削籍。紹芳亦下獄矣。公歸里。南半歲而病歿。當公之病也。聞文毅公訃。往哭之慟。其病遂革。距

受殺歿時相去僅十有五日。四方賢士大夫爭悼惜之。公性方嚴不苟合。以是數忤小人。在內閣不滿三月。雖屢見寵顧。而受同官排陷。訖未及有所設施。家居公廉自守。苞苴不敢及門。通籍凡十有五年。至於貴顯。其第宅猶仍諸生時所居。從未嘗拓地一弓。建屋一椽也。生平深惡內閣。不與文通。有太監曹化淳者。故出王安名下。淳慕公賢。嘗遣私人祈公。僕得循例往來。外廷事敢不惟命。或勸公往投謁。公哂曰。此謁一入其府。尚可漸洗乎。其後見排體仁。咸謂化淳與有力也。越三年。始復原官。致仕。又二年。贈禮部尚書。南渡初。追謚文肅。公嘗因流賊不靖。疏言致亂之源有四。中間指斥廟堂。猜疑黨人。蒙蔽與將。無紀律。兵無行伍。淫污慘劫。驅民為賊之狀。尤極痛切。及公既歿。明竟以此亡天下云。有兩子。長子東。最知名。明亡。隱居苕塢之內舍。杜門著書終其身。前史官汪琬曰。琬嘗訪公故居。蓋已易主矣。因抵其讀書之所。所謂音瑤嶼者。俛清沼。攀脩柳。慨然久之。適大風颯颯起。林木間。輒想像公掀髯抵手痛詒逆黨時也。琬謹按公行狀及東所撰烈皇小識。詮次為傳。以授東之子點。俾後生有考焉。

汪琬撰（東坡文鈔）卷三五

漢海公墓志銘

狀公諱楫字庭懷別號蘆陽河間獻縣人也公於海虞之人至今思之稱焉狀公公諱道於虞山之麓孝著尊之曰蘆陽先生去官歸而孝養其母孺子慕以況其齒則里中之人傳事稱曰政孝子也常熟為姑蘇屬邑古虞仲所封地故蒲虞公令虞廣而威法必行而喜為民興便利邑有南湖故蘆蕪公布方畧通舟而面伏而身乘小舟泊湖中夜半群盜集而劫之伏發盡皆就縛并根株擒治其兇也故豪於縣橫海上負重俠名公諫減其家室中豪豪者弗喜也乃公在官邑中竟無盜初公獲盜未劣竟執與士大夫講學書院中城遠馳庭下曉講論已引問其情前事若何盜皆叩頭願更始公引去越數日卒痛杖之編為兇薪罪之海濱磧礪地令耕而自食人籍其名期望時稽察之故盜感其更生而漸改步為良民虞故水國水時利時害公下令按圖籍開濬修澤漁之事而責之曰主者顧曰主者皆責金盡但坐享佃戶供歲入不復問故會通塞何狀公下車抗不服公械責人求室饋於里門以警甯抗令者而令

乃行水蓄澤不失時而歲收大穰邑人曰縣名常熟真常熟也憶萬曆戊申東南郡邑大水城門往來以舟渡米價踴貴而常熟之民晏然蓋公出所儲官廩數千石平糶散之民間而民間遂忘米珠之苦也公之遠識而能舟造邑人類如此公既內微擬補諫職先督授司馬職方郎而中浮語達之去蓋公勞民事捕盜開水利時諱者已數云邑民安而令公危矣虞故子游之鄉公因其遺俗倡明其學術創為學道堂修歌樓又刻古今聖賢宗像而人為之贊扶其宗趣其與人語每曰我有一物名曰照妖鏡直我刀一生抵當我不過其論學後明諸心而以即是物為宗如象山先生所云人情物理上用功夫是也然公自信頗真而大歸經人以必如我余聞諷以贈語曰因物則聖宗執我則霸學公初讀我言而未許及來京師為會所中則不患忘余言謂公真愛我公今且從事此十年而乃可副公望也而未幾公尋歸矣公歸而奉事八十母時承歡親膝下雖邑城鄉落中有此曰林村世瑞人故姓林村以其宅名也公就其地築林壘奉母瑞人時游其上



儒藏

明儒碑傳集

卷九三

以慰其故土之思云。及母喪人泣而公哀念不置。負土
廣其墓。塋於像其中心。而自塋一跪像其旁。暮年而戒。則
誦親友三日。無事之夕。而公卧于臺下。洞中。明燈而公
化矣。相傳其事。父老以為公報母志畢。故捨其身以
去。是以為耿孝子也。嗟乎。公之死。傳獨為公痛。憶余在
京師。每故會談海內人物。有幹濟氣力能擔荷世道者。
輒口定蓋焉。故策下士大夫皆知公為用世有學
問定際者。而公竟不及一指蓋以沒。此其恨事獨在公
哉。邑人悲。知人惡。善。惡之人惡。而余悲何能已也。據余
所習聞而志之。弄為之銘。公之先世。曰。我籍。至公而品
具。耿氏春秋中。不具述。獨撰其大如此。銘曰。或躍于淵。
備龍德也。泥而在田。文明赫也。李高而德情。亦隨源澤
也。叱而不從。井深之不汲也。吁。嗟先生。如刀斯銘。如磨
斯光。銘不復割。光忌太揚。獨留精彩。瀛海茫。我銘
其石。千秋之藏。

明抄本 《明文海》卷四四六

太嘗寺少卿管光祿寺丞事贈大理寺卿
賜諡鹿公墓誌銘

崇禎九年七月二十七日。奴酋兵破定興。太嘗
寺少卿鹿公死之。明年正月。其子化麟伏闕上
疏曰。奴之掠畿南也。臣父移疾村居。無城守之
責。臣父念定興當涿南保北。背障神京。我入郡
邑。誰與守。自己巳奴警。望風斃首。臣節掃地。非
不知孤城難守。老親當念。誠不忍棄梓當存亡
之會。朝廷無仗節之臣。遂令臣侍臣祖居江村。
辭丘墓。授兵登陴。今弱民疲號。今不一死守。七
日而城始陷。臣父守南門。奴從東北隅上。挾刀
索衣。臣父嚙齒大罵。天朝鹿太嘗衣。肯復羯狗
奴耶。奴怒甚。斫三刀。復射一矢。罵不絕口而死。
臣父贊樞輔於關門。厲志恢復。奴素懾其名。肉
薄環攻。志在必下。臣父以無備之城。必破之。已
獨堅誓死之心。衡拒方張之虜。捧一堞以塞潰
波。挽杯水以澆烈焰。以投閉之吏。死朝廷。以抱
病之身。死鄉里。不獨城存與存。効斯民勿去之
義。且欲人戰家守。折狡虜南下之謀。假令人盡
臣父。則一隅可保。九塞可寧。是臣父為一城死。

義為小為天下大義死忠為大也。疏上。天子下所司按覈。十一年二月。兵部覆請。詔贈公嘉議大夫大理寺卿。廕一子入監讀書。尋祠賜諡。予祭造墳恤終之典。無不備。蓋異數也。先是公殉義之冬。十二月十二日。化麟奉其祖太公命。權瘞於祖塋。拜疏歸。待命苦次。哀慟不勝。喪而死。化麟之子盡心謀於其祖之執友孫奇逢。與其徒張果中。請吾師高陽公志墓。而屬于表其隧。十二年五月。予哭高陽公既除服。乃喟然而歎曰。嗚呼。高陽既沒。鹿之誌非予其誰宜焉。乃按歸安茅元儀及盡心所著公事狀而誌之。曰。公諱善繼。字伯順。其先小興州人也。國初有諱榮者。徙居定興南之西江村。曾祖諱府。封文林郎。山西平陽府襄垣縣知縣。祖諱久徵。江西道監察御史。贈光祿寺少卿。直言厲行。蔚為名臣。考諱正。累封如公官。妣田氏。贈恭人。正貴公子。少為諸生。縣令宋繼登請與相見。正方糞田。投畚鍤而往。縣令歎息。遂奄時。傾身急諸公之難。所謂鹿太公者也。公端方謹慤。歸如斷山。少以祖父為師。小章句。薄溫飽。慨然有豪傑聖賢

之思。萬曆丙午。舉於鄉。過容城。與孫奇逢酌酒切脯。定交。楊忠愍墓下。癸丑。舉進士。與吳郡周順昌。吳橋范景文。襍被蕭寺。雞鳴風雨。以節義相期勉。選戶部山東司主事。職鹽法。與同舍郎袁世振。爬搔利病。洞悉源委。袁後疏理兩淮。卓有成效。著為繁令焉。丁田恭人憂。服除。補戶部河南司主事。署廣東司事。遼左方闕餉。請帑。疏皆不報。會廣東解金花銀至。公奏記大司農李汝華曰。每歲廣東解金花銀兩。恭進大內。此近例也。頃督部有扣留之議。此時仍進大內。則部議終成畫餅。欲徑解太倉。則俞旨艱如拔山。莫若題留為便。考會典。國初金花銀折糧。俱解南京。供武臣俸祿。各邊或有緩急。亦取足其中。正統元年。始改解內府。歲以百萬為額。嘉靖三十二年。題准三宮子粒及各處京運錢糧。不拘金花折銀等項。應解內府者。一併催解貯庫。悉備各邊應用。不許別項挪借。夫曰緩急取足。是內府與外府分用也。曰備各邊不許挪借。是備外府用而內府不得旁分也。今邊烽告急。軍需乏用。卽奉金花全數。一旦復還太倉。亦率緣祖



制非奪大內所有而益外府也。唯是皇上批發度之高閣而中涓憂感其閒急難得旨。一面題知一面剴納銀庫轉發遼左。權自外操不至如帑金之絀。勝不可問。天下事為之有機。留與不留係於進與不進。此際閒不容髮。萬一宸怒不測。請以身任罪。不然局外者方議留而局內者且議進。無論清議不可。即主上視吾輩何如也。司農如公議上請。上怒奪公俸一年。勒令補還。司農不敢違。公力持不可。謝恩日。中官閹門扇不聽公出。勒問太倉云何。管太倉主事劉榮嗣報曰。發三日矣。然實未發也。中官傳發。肯促令補還。公曰。有銀何用。借無銀又安用。補。中官愕眙不敢應。公曰。但執善繼語回奏。死生唯命。不敢易一字也。中官數息而去。無何堂官奪俸二月。公降一級調外任。舉朝交章請留。不報。擬降山東運判。亦不報。公遂移疾去。而司農竟如數補進矣。嗟乎。金花不可予邊。而他賦乃可補金花。忽而扣留。忽而補進。忽漫無所執持。奈何不令。人主厭薄臣下哉。光廟御極。首復公官典新餉。改兵部職方司主事。是時遼陽

初陷。中外匈匈。公受事誓天。淚流浹面。杜絕請託。申明法紀。為大司馬草疏。請逮某。斬某。以申國法。法不能行。請自臣始。言官羣噪之。公抗章力爭。無以難也。大司馬以撫夷行邊。請用廢弁坐贓敗者。職方郎耿如杞持之不肯覆。司馬疏爭之。奉旨命司官不得違阻。公上書福清曰。邊疆之壞。繇於債帥。中外諸貴人入其債而請求於職方。職方自愛其官。不得不徇諸貴人之請。今幸得一憂國奉公。不徇情面之人。反奉不得違阻之旨。胥天下以職方為市。永無不債之帥者。自此一言始。勿謂能違阻之司官為易得。勿謂去能違阻之司官為小失也。福清謂其刺已也。怒已而屈服焉。歲壬戌。高陽公以閣臣理部事。高陽清嚴果銳。以天下為已任。請寘逃臣熊廷弼。王化貞於理。公舉手加額。遂委心焉。從高陽閱關以歸。高陽自請督師。公請從。吏部司官缺。太宰堅以屬公。公不可。曰。相公一日在師中。即一日在幕中。鹿善繼。韓爌如戟。肯回頭作吏部郎乎。高陽當關四年。經營遼河東西。恢復遼疆四百里。安插遼人四十萬。入而造膝密畫。出而

指授二三大帥實倚公爲左右手。禁餽遺絕宴會。朝齋暮鹽。漠然兩書生也。布衣敝馬。出入亭障。聞延見老較退卒。與相勞苦。因以勾稽將士。察識營壘。鼓勇敢。拔跣跣。錄寸長。理小過。二十年名將咸出高陽之門。公之功也。高陽自寧遠還鎮。屬公入都門。催軍需甲仗。已事而還。去家二百里。不遑省視。中朝自此知關門決計進取。而沮抑之謀百出矣。十二車營成。高陽將渡河。入奏。逆奄懼有晉陽之舉。矯旨趣令歸鎮。中朝忌高陽者。進謀於奄。議省餉減兵。以陰撓之。公詒書兵垣曰。遼之當復。非直以故有之。封疆不宜委敵。無遼則不能有薊。禍遂迫於京畿也。今之持論者。大端有二。一曰慎重。一曰簡汰。夫進取則當慎重。振刷則宜簡汰。而出於今之君子。則慎重非爲進取。意在退怯。簡汰非爲振刷。意在壞兵。而總以巧行其撓沮恢復之計。夫百計而鼓之進。不能當一言之退也。三年而集此衆。不能供一日之曠也。不征不戰。去將去兵。垂成之緒。既廢。前日之禍復作。遼廣潰陷時。都門之光景。猶能記憶否。身在事外之朝士。以隔壁之

猜而索邊人之情。心在事外之邊人。以一面之詞而迎朝士之意。索邊人之情。有遂持邊情以爲朝論。迎朝士之意者。因借朝論以憾邊情。從此恢復兩字無人出口。錦片河山。甘心腥穢。忠臣義士。有負戟長歎而已。未幾。高陽解兵柄。公亦移疾乞歸。迄今十四年。舉世無復有言恢復者矣。嗚呼。此可爲痛哭者也。公在關門。不以邊吏邀一階半級。以久次轉員外。陞武選司郎中。家居四年。上卽家起公爲尚寶司卿。陞太嘗寺少卿。管光祿寺寺丞事。公再起。物望崇重。精勤吏事。夙夜在公。一如爲郎吏時。未三載。復請告歸。以沒。已巳冬。虜薄城下。公昌言於朝。非急召高陽。出馬世龍於獄。無可辦虜者。先是。公物色世龍於羣帥中。薦之高陽。推穀爲大將。諸排謗高陽者。皆以世龍爲質的。及高陽再鎮。手復四城以還。主上世龍之功爲多。而世龍亦卒以功名終。於是人咸謂公能知世龍。世龍不負公。而公與高陽果能相與以有成也。公天性純孝。母既沒。念太公獨居。共臥起者二十年。其子亦馴行孝謹。四世一堂。更衣并食。雍雍穆穆。如



也。里居教授生徒以百數。攝齊升堂。離經辨志。江邛之上有河汾濂雒之風。畿南之士殖學修行。鏃礪自好者。不問而知爲鹿氏之徒也。晚而師事高陽曰。不圖周孔猶在人間。高陽亦曰。伯順在幕中。如清風止水。助我神明者多矣。公之沒也。高陽哭之慟。爲挽詩六十四章。又二年。高陽亦殉虜難。公與高陽與遼事相終始。公又與高陽相終始。嗚呼痛哉。公爲人。齋莊中正。明允篤誠。辭受取與。如水之有坊。而不以一節加人。是非可否。如食之必吐。而不以一青掩人。以身命歸君父。以心膽質鬼神。以深心冶鑄善人。以至誠變化異類。其道之不行。而以完節自見。則天也。斯世之不幸也。公之沒也。年六十有二。娶王氏。贈恭人。再娶王氏。封恭人。子化麟。天啓辛酉。舉鄉試第一人。後公一年卒。孫男四人。盡心舉崇禎丙子鄉試。洗心以蔭入太學。悅心從心。皆幼。孫女二人。曾孫男三人。所著有四書說約三十一卷。文集若干卷。公與子俱出高陽之門。予以枚卜被訐。公正告蒲州。當爲上別白忠。俟無以門牆故。混淆國論上負明主。蒲州不

能用。遂終身不見蒲州。當是時。子待罪邸舍。公數過子執手。而不使子知也。于是以愧公。銘曰。幽朔之地。斗極崆峒。三光五岳。萬生駿雄。生不獨生。有孔鑄顏。高陽定興。二百里閒。堂堂鹿公。羽儀斯世。矩方規圓。渾然元氣。錫奴鳴張。全遼如燬。白首郎吏。獨抱國恥。帝命視師。輟我綸閣。公辭銓郎。出贊戎幕。枕戈席馬。抱冰履霜。指授將吏。魚麗武剛。軍書少閒。危坐促膝。麤飯瓦盆。寒燈土室。羯奴外訐。讒夫內扇。白山未勒。黑水猶戰。誓涓七尺。以報天子。吁嗟鹿公。與遼終始。碧血不變。白光如虹。江邛之阡。有氣熊熊。彗星角芒。參旗先後。驟乘高陽。扈我三后。高墳宿草。我友我師。人之云亡。孰知我悲。

鍾謙益撰（牧齋初學集）卷五〇

明儒碑傳集卷九十四

劉永澄 楊彝 顧夢麟 周順昌 吳鍾巒

藏方劉靜之先生墓誌銘

孔子曰三軍可奪帥也匹夫不可奪志也故曰隱居以求其志曾皙季路顏淵之徒侍側曰盍各言爾志如或知爾以此往矣孟氏亦曰士之事在尚志故士平居辨途慎術擇乎中庸蓋兢兢業業千里云及乎得善固執之死矢靡他焉即功業文章不少槩見于天下天下信之如星辰之災祥善惡之凶吉以其身卜世之安危豈非篤仁義誠之不可掩者哉萬歷壬子五月七日劉靜之卒于家靜之官未列大夫年不及強仕海內士咨嗟痛悼以為國家失其柱石人倫失其冠冕如可賄者人百其身矣此何以故嗟乎此所謂誠不可掩者也靜之名永澄別號練江靜之其字也世為揚之寶應人大父德齋公曰憲父春宇公曰繼善司訓鎮江母曰王氏靜之生有至性八歲誦文信國正氣歌衣帶贊即立信國

位朝夕謁拜人以此見其志矣十四補諸生十九舉賢書同年中召靜之飲酒有媼佐觴靜之即謝不往二十而娶家貧不能具新衣王孺人力經營之靜之曰休矣吾意中自新不必衣也戊戌下第築土室自鉅并晝夜讀又善病室中書籤藥裹外無一長物辛丑成進士選讀中秘書為有力者所奪人為不平靜之無幾微見顏色以善病告授順天教授慨然曰師失其道久矣進諸生相期勉以聖人之學嚴程課飭行檢仲寬抑鬱汗濁審勤惰寒者衣之飢者食之羔雉之贄不及于門北方學者稱淮南夫子而靜之益考求國家典章名臣言行六曹之職九邊之要兵農錢穀之數矻矻如居土室時已遷國子學正權要為子弟居間一切格不行會雷震郊壇有詔令禮部具修省事靜之曰災異求直言自漢唐宋及我祖宗未有改也往萬安劉吉時惡人言災異鄒汝愚一疏炳烈千古今者一切報罷塞諤諤之門務容容之福傳之史冊尚謂朝廷有人乎當事者為靜之

座師亟言之不省。亡何楚宗獄妖書獄及京察事繼起。靜之具疏陳得失。而司訓公適至京。不果上。靜之作甲乙雜志。郎中雜記。又為歸德相國所器重。咨對出處之道。時人愈側目。滿三載不遷。靜之曰。昔陽城為國子師。斥諸生三年不省親者。京兆李諤久不歸省。李皋謂無親之子不可與事君。吾歸矣。遂歸杜門讀書三年。而司訓公王孺人俱未艾。健飯會皇太后覃恩。人謂靜之奈何。不以一命賁兩尊人。靜之乃至京候命。而王孺人訃矣。靜之力行喪禮。墨面染骨。三年苦塊外寢。壬子春補職方主事。未赴卒。靜之質甚弱。獨目炯炯然。英采逼人。善談論。其于古今治亂。人才短長。如指之掌。嘗曰。某當某時有某事。惜放過。彼寧知千載而下有劉靜之者。指其空缺處。然吾輩在今日。寧知千載而下無劉靜之者。母訓迪子弟。出于至誠。每謂子弟不類。非盡子弟過。父兄鑑錘不具。火力不足。不能使入鑄鑄中也。常書薛西

原語于座右云。雖小事不可為人囑托。自損廉心。故竿牘不及郡邑大夫。至伸人冤抑。援人疾苦。不啻若身受毒螫者。以呼吸間去之為快。靜之即尸居蠅伏乎。其神常周六合以內。于世道民生所關。下至邊疆情偽。江海盜賊。咨諏詢度。無不得其要領。世固不乏修身潔行士也。然徃徃飭治象貌。不為世管詬而已。至神理血脈與斯人之徒。通洽無二者。視靜之如何哉。靜之官不過七品。其志以為天下事莫非吾事。若何而聖賢吾君。若何而聖賢吾相。若何而聖賢吾百司庶職。斯道一日行于天下。即死可不恨。生不過三十年。其志以為千古事莫非吾事。生前吾者若何。揚揭之。生當吾者若何。左右之。生後吾者若何。矜式之。斯道一日不明于天下。即死有餘責。其所謂道何道也。正人心。息邪說。距跛行。使天下曉然知君君臣臣父父子子。天理民彝。自不容已。匪是者。即入無父無君之途。下弑父弑君之種。喪世此道不。明務黨人之偷樂。誤皇輿之敗績。蓋千古一轍也。故靜



之註離騷于此三致意焉。推此志也。百世以俟聖人可矣。靜之得年三十有七。配韓孺人。弟永沁子心學。山陰劉起東。按國論私謚曰貞脩先生。長洲文文起。據遺事為貞脩狀。攀龍知靜之深矣。得文起為誌其大者。人言靜之成進士。三年郡學。三年國學。三年洗沐。三年宅憂。世曾不能用其萬分之一。余謂靜之所為靜之。不以用不用也。銘曰。自昔聖賢。與時衰盛。盛時所駕。衰世所屏。浩蕩乾坤。不容何病。川泳巖遊。理情繕性。明吾之是。不與世競。吁嗟靜之。天之所命。愜此道微。以是亂正。俾示正見。為千秋鏡。世所取正。是謂為政。有如不信。上視孔孟。

高華龍撰 高子遺書卷二

楊顧兩先生傳

楊先生彝。字子常。常熟唐墅里人。少與同郡顧先生後先補諸生。兩先生相親善。皆明經飭行。矜尚氣節。每試各占高等。時人並稱楊顧云。顧先生之生也。其母陳夢

神人授以石麒麟。故名夢麟。字麟士。吳丞相雍後裔也。世居太倉之雙鳳里。明萬厯天啓末。士之為時文者。喜倡新說。畔違傳注。兩先生慨然思振其弊。相與講說辨難。力明先儒之學。遠近受經門下。稱弟子者。嘗不下數百人。會吳中諸名士興文社曰應社。兩先生俱在焉。諸名士及其門下弟子。往往遵用兩先生說。相次取科第。而兩先生卒浮沉學宮中。顧先生僅中應天乙榜。援例入國子學。楊先生以歲貢生授松江府學訓導。居五歲。擢都昌知縣。移疾不往。而顧先生亦訖不及仕也。然名聲方大噪。凡四方賢公卿大夫有事於吳者。必請兩先生相見。與講釣禮賓客。雜還造門。以不獲面為恥。東陽張公國維巡撫三吳。聞兩先生名高。數親禮之。又延顧先生為公子師。然顧先生嚴正。自注書說經外。未嘗少干以私。一武人夜以賄至。先生駭曰。此何為至於我哉。其人惶遽去。太倉守鄞縣錢侯肅樂與顧先生過從甚歡。亦命其子弟受業。終侯之任。顧先生絕不以事請也。



以故錢侯入官京師。輒誦言顧先生於朝。而楊先生自明亡即杜門不出。有貴人往投刺。趨起門外者。移時。訖不得一見。乃歎息而去。蓋其耿介略相類。先是。明季辟舉法行。張公與提學御史力欲掎薦。兩先生以應詔。兩先生同聲固辭。凡往返再四。知不可奪而止。本朝順治初。或冒顧先生姓名。走謁當路貴人。貴人不知其偽也。遂被款接。且委職至府通判。楊先生先刺知之。遺書以告。顧先生怡然曰。我自為我。彼豈能浼我哉。竟不發其事。時人推為長者。顧先生少於楊先生二歲。年六十有九。以順治十年卒。閱八年。楊先生始卒。年七十有九。兩先生性並孝友。尤好周人之急。楊先生遭母歿。嘔血數升。斷酒肉者竟其喪。撫孤姪具有恩意。少所事師。死獨力殯埋之。且為婚嫁其子女。鄰人或侵楊先生屋址。置不與校也。顧先生遭母歿。其守禮一如楊先生。崇禎中。連歲浹饑。吳中米價大踴。顧先生首倡巨室者。糜粥以活餓者。語人曰。吾非饒於家也。勉為善而已。兩先生終

身力學。楊先生為諸生。每晝夜苦益。輒納足巨甕中以請。晚而目盲矣。猶請友人讀書其側。為諸生講說。必連日夜。而顧先生老病。亦必手一書。卧視不輟也。顧先生尤好著述。所纂四書說約二十卷。詩經說約二十八卷。四書十一經通考二十卷。織簾居詩集四卷。又重訂說約二十卷。織簾居文集四卷。中菴瑣錄一卷。韻珠四卷。雙鳳里志八卷。楊先生方謨次大全節要一書。及見說約行世。乃謂顧先生曰。子之書猶吾書也。遂削其彙。兩先生皆工詩歌。楊先生詩多不存。存懷舊詩一卷。同郡有善詩者。序顧先生詩以擬陶南村。龔安節二人。吳人咸以為允。集中和陶諸篇。尤為時所傳誦。楊先生有子諸生靜。又庶出子緒。皆天。顧先生有子潛。字伊人。亦工詩歌。嘗纂虎邱新志。子極稱之。方知名於世。舊史氏曰。予聞楊先生頽然長身。骨稜稜不勝衣。顧先生豐頤飄鬚。其議論尤和婉可聽。兩先生生同郡。長同學。遂爾齊名當世。至今天下言經學者。多宗之。惜乎予

不及游其門也。故倣孟堅傳楚兩龔為兩先生合傳以志嚮往。以俟後之良史採焉。

汪琬撰（堯峰文鈔）卷三四

周忠介公遺事

周忠介公順昌字景文。明萬曆中進士。歷官吏部文選司員外郎。請告歸。是時太監魏忠賢亂政。故給事中嘉善魏忠節公忤忠賢被逮。過蘇。公往與之飲酒三日。以季女許嫁其孫。忠賢聞之。意甚。御史倪文煥承忠賢指劾公。遂削籍。而會蘇杭織造太監李實與故應天巡撫周公起元及公有隙。追劾起元。竄公姓名其中。遂遣官旗逮公。公知之。怡然不為動。比宣旨公解。巡撫都御史毛一鷺巡按御史徐吉及道府以下皆在列。小民聚觀者數千人。爭為公呼冤。聲殷如雷。諸生王節等直前詰責一鷺。謂衆怒不可犯也。明公何不緩宣詔書。據實以聞於朝。一鷺實無意聽諸生。姑為好語謝之。諸生復力爭。稍侵一鷺。一鷺勃然曰。諸生誦法孔子。知君臣大義。

詔旨在即。君父在也。顧羣聚而譁如此。皆咎曰。豈惟君父。二祖十宗實式馮焉。諸生奉明公教。萬一異日立朝。不幸遇此等事。決當以死爭之。明公奈何教人諂邪。巡按御史見諸生言切。欲解之。乃語諸生曰。第無譁。當商所以善後者。衆方環聽如堵。官旗見議久不決。又訝撫按官不以法繩諸生也。輒手銀鐺撻之地。有聲大呼。囚安在。且曰。此魏公命。可緩邪。衆遂怒曰。然則偽旨也。爭折關楯。奮擊官旗。官旗抱頭東西竄。或升木登屋。或匿廁中。皆戰栗乞命。曰。魏公誤我。有死者。巡撫幕中諸將率騎卒至。或拔刀脅衆。衆益怒。將奪。乃一鷺偕兵使者張孝鞭卒以徇。始稍定。知府寇慎。知縣陳文瑞素得民復。數為溫言譬之。衆乃解去。或謂公盍返私室。公不可。遂舍一鷺署中。是日也。佗官旗之浙者。道胥門入城。強市酒肉。瞋目叱市人。市人復羣毆之。走焚其舟。投索聚於水。官旗皆泗水以免。一鷺懼。召騎卒介而自衛。夜要御史上疏告變。檄有司捕民。顏佩常等十餘人繫之。



儒藏

越八日公竟就逮。既至京師。下詔獄。坐賊者掠。瘐死獄中。而忠賢復矯旨殺佩章等五人。杖戍馬信等七人。又黜諸生王節等五人。崇禎元年。忠賢敗。公之長子茂蘭刺血上書。白公冤。詔贈太常寺正卿。謚忠介。予特祠。一驚亦以忠賢黨被舉家居。白晝見公乘輿。佩章等騎而從。直入坐中堂。一驚大怖。遂病死。

汪琬曰。亡弟楷九嘗私次忠介公事。予以示公之孫旦齡。以為信。乃稍節其冗者。參以殷氏所作年譜。授其家俾弄之。

莊璣撰 八卷 碑文鈔 卷三十六

明禮部尚書仍兼通政使武進吳公事狀

公諱鍾繼。字峻伯。別字稚山。學者稱為霞舟先生。南直隸常州武進人也。弱冠讀王文成公傳習錄。悅之。繼遊於釋氏。又習養生家言。皆悅之。已聞顧端文公講學東林書院。執經從焉。遂盡棄所學。一意濂洛之旨。又遊高忠憲公之門。而所宗主者為孫文介公之困思鈔。是時公年尚未三十。已嶽嶽稱人師。門下江陰李忠毅公。其最著也。公累應科舉不售。而忠毅以進士入臺。忤逆奄。繼騎遠入京。自江陰過武進。公出逆之。留歸其家飲餞。忠毅歎曰。此後莫令吾兒讀書。公曰。弗為真讀書人已耳。稍讀之庸何傷。忠毅笑曰。然則莫令從真先生讀書。因相與訂婚姻而去。以明經授河南光州學正。遂舉光州籍成崇禎甲戌進士。年五十有八矣。知長興縣。時與諸生講學。從之者如雲。願以旱潦相仍。催科甚拙。已卯。奄人崔璘以巡視鹽糧至。張甚。守令見之。蒲伏如撫按。公獨不往。及以公事見。長揖不屈。璘怒而太守亦怒。中以蜚語削籍。繼被登舟。長興之人送之。公曰。吾宦於此有三樂。其一為戴山先生來弔。丁君長孺得與證明所學。其一為重九日登烏瞻山。其一則丙子校士得錢生肅樂也。公性恬淡。既罷官。即有投老之意。宜興再相。頗

以延攬清流爲事。遣所知道意許登啓事。公笑曰：公爲山巨源，請容我爲嵇叔夜。公爲富彥國，請容我爲邵堯夫。宜興不樂，公泊如也。辛巳，滿除左降諸官，補紹興府照磨。陞桂林府推官。甲申六月，聞國難，絕而復醒。曰：吾友馬素修必死矣。已而果然。南中授禮部主事，未上國。亡。是年，公叔子福之以起兵死閩中，以原官召之。遷員外郎。上書言事，權貴不喜。公曰：今日何日，尚欲拒人言耶？唐王將爲贛州之行，公曰：閩海雖非立國之區，然今日所急者，選鋒銳進克復南昌，聯絡吳楚，以得長江，或可自固。若舍此他圖，關門一有騷動，全閩震驚矣。唐王不能用，出爲廣東副使。未行，閩中又亡，遁跡海濱。公憤士大夫多失節，乃作十願齋說。其一曰：吾願子孫世爲儒，不願其登科第。其二曰：吾願其讀聖賢書，不願其乞靈於西竺之三車。其終曰：吾願其見危授命，不願其偷生事仇。又集累朝革命之際，上自夷齊，下至遜國，諸忠爲歲寒松柏集，而從客問以寄。其詞曰：客有問曰：諸君子之死，節誠忠矣，然無救於國之亡也。子何述焉？應之曰：子不云乎？歲寒知松柏，歎知之晚也。夫諸君子皆公忠直亮之臣，較然不欺其志者也。臨難而能勵其操，必授命而能盡其職，使人主早知而用之，用爲宰執，則如

中國相司馬而遠邊息警，用爲諫議，則如漢廷有汲黯而淮南寢謀，用爲鎮帥，則如軍中有范韓而西賊破膽。又安得有亡國事乎？惟不知而不用，即用之而不柄用，漸且憚其方正而疏之，惑於讒佞而斥之，甚且錮其黨而并其同道之朋一空之。於是高爵厚祿徒以參養庸碌貪鄙之輩，相與招權納賄，阻塞賢路，天下之事日就敗壞而不爲補救。及其亡也，奉身鼠竄，反顏事仇，嗟嗟烈女不更二夫，況薦枕席於手刃其夫之人乎？若輩之內尚足食耶？易曰：小人勿用，必亂邦也。吾將以告後世人主之誤於小人而後知君子者。又烏容以無違。客又問曰：諸君子之抗節者誠清矣，曷不死之？應之曰：記云：君子謀人之國，國亡則死之；謀人之軍，軍敗則死之。諸君子皆不柄用，未嘗與謀軍國事。易曰：介於石，不終日。儉德避難，夫安得死之？守吾義焉耳。曰：然則恢復可乎？曰：事去矣，是非其力所能及也，存吾志焉耳。志在恢復，環堵之中不汙異命，居一室是一室之恢復也。此身不死，此志不移，生一日是一日之恢復也。尺地莫非其有，吾方寸之地終非其有也。一民莫非其臣，吾先朝之老終非其臣也。是故商之亡不亡於牧野之倒戈，而亡於微子之抱器；宋之亡不亡於華亭之出壘，而亡於柴市。



之臨刑。國以一人存。此之謂也。曰。其人亡。則如之何。曰。子不見朱子綱目之書法乎。書曰。晉處士陶潛卒。在宋元嘉四年。是靖節千古存而晉未始亡也。故商亡而首陽采薇之歌不亡。則商亦不亡。漢亡而武侯出師之表不亡。則漢亦不亡。宋亡而零丁正氣諸篇什不亡。則宋亦不亡。子謂空言無補。將謂春秋之作曾不足以存周乎。客慨然而退。時有以公流離海外勸之歸者。公作止歸說謝之。丁亥冬。監國至閩。閩中士大夫皆觀望不出。公曰。出固無益也。雖然。不出則人心遂渙。以死繼之耳。乃入朝。拜通政使。至則申明職掌。言今者遠近章奏。武臣則自稱將軍都督。文臣則自稱都御史侍郎。三品以下不屑署也。至所在游食江湖者。則又假造偽印。販鬻官爵。僣臥邱園。而曰聯師齊楚。保守僕御。而曰聚兵十萬。以此聲聞。徒致亂階。臣請自後嚴加覈實。集兵則稽其軍籍。職兵則攷其敕符。王是其言。陞禮部尚書。原官如故。兼督學政。從王幸浙。所至錄其士之秀者。入見於王。僕僕拜起。人笑其迂。公曰。濟濟多士。維周之積。可以亂世而失教士耶。時朝政盡歸武臣。公卿不得有所可否。公歎曰。當此之時。惟見危授命。是天下第一等事。不死以圖恢復。成敗尚聽諸天。非立命之學也。當此之時。

惟避世深山。亦天下第一等事。微幸以就功名。禍福全聽諸人。非保身之學也。姚江黃都御史宗義招公居四明洞天。公答之曰。故人有母。固應言歸。老生從王。所在待盡而已。遂退居補陀舟山。師潰。公曰。昔者吾師高忠憲公與吾弟子李仲達死奄難。吾爲詩哭之。吾友馬君常死國難。吾爲詩哭之。吾門生錢希聲從亡而死。吾爲詩哭之。吾子福之倡義而死。吾爲詩哭之。吾老矣。不及此時。尋一塊乾淨土。卽一旦疾病死。其何以見先帝。謝諸君於地下哉。乃復渡海入城。九月初二日。與張閣部肯堂訣曰。吾以前途待公。至文廟右廡設高座。積薪其下。捧先師神位。舉火自焚。賦絕命詞曰。只爲同志催程急。故遣臨行火浣衣。時年七十有五。僕徐甲負骨以歸。夫人劉氏。福之字公介。公第三子。少聰穎。年十五能文。侍父之任光州。集光庠諸名士較藝。福之卽與對壘。尋循例應州試。卽成州諸生。尋歸應本邑童子試。卽成邑諸生。從諸生應歲試。卽成廩膳生。從諸廩生應貢試。卽成選貢生。故自成童以至弱冠。無不以科名期。福之者。福之亦雅自負。落筆不作凡近語。與思怪字。初閱之不可句讀。徐解之法。脈井然。非以艱深文淺易也。讀書該博。無所不窺。而尤留心經濟。感時事亟。嘗上箋其父曰。

天下事無非兵理。處今亂世，非將畧兵法，無以處事。取人杜牧注孫子云：「得其一二者爲小吏，盡得其道則可爲大吏也。」今見當事統數百兵，卽譁矣。大吏見數十亂民卽倉皇矣。有地方之責者，凡其地弁將營卒縉紳耆老吏胥役隸以及盜賊土豪，無不留心著眼，以法詰糾，部勒之密，密有心腹爪牙之用，則卒有事變，可以制置。公深異其言。乙酉，常州城破，職方吳易起兵太湖，福之應之，兵敗死焉。吳氏之先本無錫人，其遠祖有以革除去御史之官歸隱者。三遷至武進之橫林，卒而葬焉。遂家於此。公所著有周易卦說、大學衍注、霞舟樵卷、語錄藏於家。海外有稚山集在吾鄞，至今長興人有霞舟書院。

全祖望撰《鮚埼亭集》外編卷九

校記

①不輟：當作「不輟」。

明儒碑傳集卷九十五

劉宗周

子劉子行狀上

學人黃宗義狀

本貫浙江紹興府山陰縣水澄里年六十八。

曾祖槩妣茅氏。

祖焯妣陳氏。

父璠妣章氏三代皆歷贈。

先生諱宗周字起東學者稱爲念臺先生。漢長沙定王劉發之後。在宋有退翁先生禮。徒廬陵四傳而爲揚州別駕廷玉。廷玉生文質。尉於山陰。始爲其縣之人。又四傳而生謹。故明之孝子也。以童子入滇。脫父於戍。又三傳而爲贈兵部右侍郎鐸。以其孫棟之貴也。鐸生濟。濟生槩。槩生焯。號兼峰。焯生璠。號秦臺。有名諸生間。當其卒時。太夫人章氏年二十七。越五月而先生生。兼峰喪其嫡子。家道喪失。先生依於外家。從外祖章公穎受學。十二歲。章公在壽昌。先生徒步從之。學足者數月。不顧也。凡三上壽昌。已學經義於魯念彬。念彬令取裁左史。授以縱橫變化之法。而章公老儒。墨守先輩。先生從此則失彼。徘徊兩岐。每遇私試。一題必爲二義。以正者呈章公。奇者呈念彬。交相善也。萬曆二十五年舉於鄉。先生二十歲。又四年舉進士。丁帝太夫人憂。先生於中門之外。創爲聖室。高廣容膝。日哭泣其中。陶文簡望齡弔之。歎曰。汝衰禮壞久矣。吾未見善喪若

劉君者也。服闋。以兼峰年老不欲出。兼峰不可。又一年。就選授行人司行人。當慶元枋國。方興楚宗妖書之獄。以陷君子。先生草疏劾慶元。同年生見之曰。君亦曾爲老親計乎。先生默然深念者數日。遂請終養。尋丁兼峰憂。毀瘠而病。病愈亦不出。居家七年。孫公丕揚爲太宰。聞其名。以原官起之。充益府冊封副使。光宗儲位未定。先生因報使竣。言陛下深居宮禁。務與臣下隔絕。雖皇太子至親。未嘗宣召寢門。春秋鼎盛。講席不設。托之阿保之手。豈陛下之所厭者賢士大夫。復推之。而於皇太子亦厭之也。陛下之所仰者宦官。官妾。復推之。而使皇太子亦仰之也。初。顧端文憲成。高忠憲攀龍講學東林書院。其議論是非。若秋霜烈日。朝野憚之。是時崑山顧天垓。宣城湯賓尹。收召黨與。將傳。之衣鉢。爲小人宗主。辛亥京察。孫公掌計事。皆以不謹坐罷。其黨金明時。秦象奎。起而訐之。禮部郎丁公元薦言。太宰是聚奎等排奏丁公。往復甚苦。太宰既引咎去。舉朝螭蟠沸羹。聚族分部。以丁公故。端文講學之弟子也。東林。崑山。遂爲黨魁之目。未幾而荆熊之爭起。湯賓尹之居鄉。以媒娼著。有施氏女不受壘而死。其鄉諸生頌之。斷斷然實尹耻之。繼梅生者。淫徐尚書之女。諸生復發其事。御史荆養喬以梅生蔽罪。薦延弼督學至宣。則盡反其獄。出梅生而撲殺諸生之爲首者。爰書謂今之公舉皆施湯故智。蓋延弼黨賓尹。借梅生以灑賓尹耳。養喬爭不得而去。掌院孫公瑋議延弼解職聽勘。宣黨復大譁。謂東林主使之。先生上奏曰。東林云者。先臣顧憲成倡道於其鄉。以淑四方之學者也。從之游者不乏氣節耿介之士。而



儒藏

真切學問如高攀龍、劉永澄，其最賢者。說者曰：東林未嘗無小人固矣，乃今之攻人，往往不於流品而於其意見，以意見分門戶，即以門戶分流品，如意見而已。高攀龍、姜士昌、劉元珍，望而知其不同量者也。儻朝廷一日賜環，則人爭按劍矣。然則以于玉立、丁元薦爲亂天下者，亦豈遂爲定論乎？略迹而論心，二臣皆較然不欺其志，有國士之風。且今之發難於廷弼者，果何人之報復乎？是故摘流品可也，爭意見不可也。攻東林可也，黨其宣不可也。臣聞世之治也，君子衷於和，及其亂也，小人尚同。今日和衷之道，其可不講乎？臣請言憲成之學。憲成學朱子者也，其言朱子也，世日尚奇，朱子以平，平則一毫播弄不得。世日尚圓，朱子以方，方則一毫假借不得。無有假借，方之至也。無有播弄，平之至也。合方與平，和之至也。臣願學東林者，反其宜之戈而卒業於此，無遺憲成羞可乎？嗚呼，學術之難言也。王守仁之言良知也，無善無惡，其弊也必爲老莊頑鈍而無耻。顧憲成之學朱子也，善善而惡惡，其弊也必爲申韓慘刻而不情。佛老之害，得憲成而救，臣懼一變復爲申韓。自今日始，虞廷授受曰中，孔門得之爲傳心要法，斯則有進于東林者矣。南道御史孫光裕謂先生顛倒是非，借東林以袒養喬、飛章攻之。當是時，東浙銓曹衆論屬先生，同邑商周祥謂先生曰：「慎毋及時事，且晚吏部矣。」先生不聽。於是浙人僉曰：「非吾家種草，可使之居相厄之地乎？」先生乃給假歸，教授鄉里，門士日進。先生曰：「昔伊川讀易，多得之涪州。朱子奉祠，其道益光。吾儕可無自厲乎？」天啓元

年，起禮部儀制司添註主事。受事九日，即劾奄人魏進忠、保姆客氏、進忠者，大逆魏忠賢未改之名也。與客氏爲對食，官衛近侍，並所親樹，出于朝政威權大震，而小人之攻東林者多出其門下爲舍人。故事，大婚則保姆出居民間，客氏既出，熹宗涕泣不食，復召之。臺省倪思輝、朱欽相、王心一各上疏爭，俱降謫。先生言：「頃者奉聖夫人客氏於陛下，有阿保之恩，不忍遽出，至出而復入，夫以大內森嚴，一官人出入不禁，非所以閑內外也。陛下以人言及之一舉而逐諫臣三人，罰者一人，至閣部以下，舉朝爭之不得，則陛下又以一官人成拒諫之名矣。古者公卿有罪，則下廷議而理之，不聞以其禁中決也。今朝逐一諫官，中旨也，暮逐一諫官，中旨也。此中旨者，陛下方用之以快一時之喜怒，而孰知前後左右又不難乘陛下之喜怒以快其私乎？方且日調狗馬鷹犬以蕩陛下之心，日進聲色貨利以蠱陛下之志，凡可以結人主之歡者，無所不至，使人主日視此法家弱士如仇讐，而後得以指鹿爲馬，盜陛下之威福，斜封之勅，鈎黨之獄，生殺予奪，惟所自出，而國家之大命隨之。試問今日得時用事，親幸於陛下，如左右手者，非魏進忠耶？然則道陛下逐諫官者，魏進忠也。并道陛下以優人雜劇射擊走馬者，亦魏進忠也。陛下清明在躬，方將追邁古先哲王，乃爲忠等所誤，豈不深可恨哉？奉旨罰俸。御史董翼請啓聖祠增祀孔子，皇祖防叔王父伯夏先生曰：「自叔梁紇以上，宜特立一廟於闕里，孟孫氏亦然。顏路曾皙伯魚進於孔子之庭，居四配上路之長也。點之賢



也。鯉之趨庭也，不妨各率其子以傳聖人之道。十哲諸賢於顏曾多倍年之長，於思孟皆私淑之列，降之兩廡，使不相壓，一舉而父子長幼朋友之義順矣。學官啓聖祠，當罷又曰：禮葬從死者，祭從生者。孔子不王，誠不當用天子禮樂，不知以天子而祀孔子，其禮樂豈可降乎？在太學從天子，在郡邑從諸侯，翼出疏辨，先生與之往復，乃兩報罷。光宗升祔，議祫憲宗，先生曰：與獻帝非繼統之君，不當入廟。稱宗當祫，祫憲宗非是。并請復建文景泰年號，廟號宗廟之禮，庶幾無憾。不聽。廣寧之役，先生請先問在內者之罪，而後及於在外者。其所列崔文昇、盧受、楊鎬、李如楨，皆黨人之所庇也。焚會試錄於孝陵，轉光祿寺添註寺丞，未至陞尚寶司少卿，又陞太僕寺添註少卿。先生疏辭，不允。繼以告病回籍，或謂先生曰：今甲無小臣辭官禮。先生曰：廉耻之在人，不因小臣而奪也。曰：衆君子在位，國事可爲，何若是其慈耶？先生曰：進退之義不明，而欲正君匡俗，未之有聞。四年，起通政司右通政。先生又辭曰：世道之衰也，士大夫不知禮義爲何物，往往知進而不知退，及其變也，或以退爲進。至於以退爲進，而下之藏身愈巧，上之持世愈無權。舉天下賢賢焉，奔走於聲利之場，於斯時也，廟堂無真才，山林無矯節，陸沈之禍，何所底止？臣方懼以前日之進，故惴惴辭太僕之命。何意前日之退，轉成今日之進，將敗壞世道，實臣一人爲戎首。時朝局已變，逆閹明扼大政，內批劉某覲視朝廷，矯情厭世，革職爲民，追奪誥命，鈞黨之禍，蔓延天下。楊忠烈連、左忠毅光斗、魏忠節大中、袁忠

愍化中，周忠毅朝瑞、顧裕愍大章死，詔獄。先生作賦，哀正直，暴奸邪，悲歌慷慨，若旦暮從而遊者。高忠憲聞之曰：此何異公子無忌約賓客入秦軍乎？杜門謝客，此是正當道理，彼欲殺我，豈杜門所能免？然卽死是盡道而死，非立巖牆而死也。大抵道理極平，嘗有一毫逃死之心，固害道，有一毫求死之心，亦害道。想公於極痛憤時，未之思也。先生然之，輟講通跡，而惠公世揚被逮，招辭連染先生，有詭行頗僻之劉某，狠心辣手之黃某，先忠著語先生自分不免，以子托之門人陳竟年。提騎入浙，家人惶遽，先生曰：毋恐，寧今日而知有是乎？既而知其逮先忠端公也。先忠端公至郡，先生餞之蕭寺，危言深論，涕泣流連，而別。謂門人曰：吾平生自謂於生死關打得過，今利害當前，此中怛怛欲動，始知事心之功，未可以依傍承當也。思陵登極，黨禁解，先生出弔蒙難諸賢，無錫則高忠憲，吳門則周忠介，順昌江陰則繆文貞，昌期李忠毅，仲達桐城則左忠毅，吳江則周忠毅，宗建姚江則先忠端公，皆爲文哭之，拂拭其棺塵而去。楊忠烈周忠憲起元，俱以辨香告哀，又請建五君子祠於西湖，風厲浙人。先忠端公與魏忠節、忠節之子學泮生於浙，周忠毅宦於浙，高忠憲講學於浙也。崇禎二年，起順天府府尹，上方綜核名實，分別功罪，羣臣救過不遑。先生曰：皇上具大有爲之資，未有以二帝三王之道進之，故使爲治不得其方。於是矢責難之義，而上言曰：堯舜之道，仁義而已矣。出乎仁義，則爲功利，爲刑名，其究也爲猜忌，墮閉與亂同事。以陛下屬精求治，宵旰靡寧，雖堯舜之憂

勤弗切於此矣。然程效太急，不免見小利而速近功，何以效唐虞之治乎？夫今日所急急於近功者，非兵事乎？試得在事之臣以屯守爲上策，簡卒節餉，修其政刑，而威信布之，需之歲月，未有不望風東甲者。而陛下方銳意中興，剝期以出塞爲事，當此三空四盡之日，竭天下之力以奉饑軍，而軍愈驕，聚天下之軍以搏一戰而戰無日。此計之左也。夫今日所規規于小利者，非理財之事乎？陛下留心民實，惻然病癘，而輒以司農告匱，一時所講求者皆括剋聚歛之政，正項之不足，繼以雜派科罰之不足，加以火耗水旱災傷，一切不問，其他條例紛紛，大抵輟轉得之民手，爲病甚於加賦。以若所爲，欲求國家有府庫之財，不可得矣。功利之見動而廟堂之上有不勝其煩苛者。頃者陛下嚴賊吏之誅，自宰執以下坐重典者十餘人，輔臣劉鴻訓亦蒙嚴譴，雖法在不赦，臣猶爲揆地惜。厥庫諸臣既發覺其見在矣，又勅問既往積弊，相仍事屬賡昧，比而置之重典，是謂不教之誅。從此深文巧詆，習爲頑鈍，無耻矯飾外觀，以欺陛下，亦豈能一一問之？且陛下所以焦心勞思而不解者，正以未得賢人君子而用之也。聖明天縱，諸所肇畫，動出諸臣意表，不免有自用之心。臣下自以爲不及，益務爲謹密，救過護諂者因而間之，猜忌之端遂從此起。夫天下可以一人理乎？恃一人之聰明而使臣下不得關其忠，則陛下之耳目有時而壅矣。憑一人之英斷而使諸大夫國人不得衷其是，則陛下之意見有時而移矣。方且爲內降爲留中不報，又何以追喜起之盛乎？然則兵陳而不戰，

財散而不私，刑以不殺爲威，求天下之賢人以自輔，遂可以希法堯舜乎？未也。堯舜之道，堯舜之學爲之也。學之大者在執中，數語陛下求治之心，操之過急，不免醞釀而爲功利。功利之不已，轉而爲刑名。刑名之不已，流而爲猜忌。猜忌之不已，積而爲壅蔽。正人心之危，所潛滋暗長而不自知者，於焉默證。此心之出於道者止此。仁義之良而希以擇之，一以守之，則隨吾心所發，自無過不及之差，而中道在我矣。中者，天命之性，仁義之極則也。仁以育天下，義以正天下，自朝廷達於邊境，舉而措之，陛下已一日躋於堯舜矣。上見疏不俾批，爲迂闊未幾，京師戒嚴。先生曰：吾守土官，當以民生爲急，請捐門稅以通煤米，行保甲法以核奸細，發內帑二萬金，三分之一食餉者，一資守陴者，一給戰士有妻子者。出太倉米數千石平糶，遷化難民，集京師日以千計，議置之郊關。先生曰：民心一失，何恃以守？此京兆事，無煩諸君過慮也。分遣僚佐出城，籍其姓名里業，給驗以入，分處蘭若，無失所。上自聞警，不出視朝，章奏皆留中不報。中旨辦布囊八百，官奴競獻馬騾，又勅大小臣工各進馬一疋。先生曰：是必有以遷幸邪？說動皇上者，吾守土官，義當與城存亡。乃諸午門叩頭奏曰：國勢之強弱視人心之安否，又必皇上自安其心，而後上下之心始安。臣請皇上出御皇極門，召見羣臣，明言宗廟山陵在此，固守之外，無有它計。一面批發章奏，勿輕羣策，俯伏待報。自晨至暮，中涓傳旨，先生始退。復造閣門，揖輔臣曰：皇上不視朝者二旬，訖言繁興，宗社隳危，宗周雖竭愚誠，不足



上悚主聽。閣下可不力爲之所。輔臣曰：公且休矣，走也得聞圖之。已而上收督師袁崇煥於詔獄，大學士錢龍錫、兵部尚書王洽、戎政尚書李邦華、工部尚書張鳳翔皆坐煥黨，簿問復以他事杖殺。郎署數人，益疑羣臣謀國不忠。廢督師，以總兵滿桂爲總理統諸帥，召白永申甫授以副將軍，又以奄人提督京營，協理城守，一切刑賞皆亂。先生諫曰：今日第一室開示誠心，爲濟難之本。日御便殿，延見羣臣，相對如家人父子，以稟擬歸閣臣，以庶政歸部院，以獻可替否付言官。乃者聖謨淵遠，悉取獨斷，如軍旅重任，必用文臣提督，定制也。今以不信文臣之故，付之武臣之手，而今使邊將以跋扈進，申甫以雕賊隙，其他入援諸將，大率視此，則桂果能以寡取勝乎？夫皇上今日所倚重者，莫武臣若矣。張鴻功、侯世祿皆以援兵潰而與之以戴罪，萬一滿桂失事，又何以處之？至是文武之途盡矣。曰：吾舍一二內臣，無可同患難者。於是降提協之命，稍試以城守，而關以外將次第委之乎？自古未有宦官典兵，不誤國者，魚朝恩、童貫、千古炯鑑。皇上幡然感悟，以親內臣之心，親外臣以重武臣之心，重文臣則太平之業一舉而定也。書御不報。越二日，桂甫以敗沒聞，自上誅逆奄之後，凡由逆奄而至大官者，定爲逆案。逆案之小人出奇計以翻案，行開金數萬於外，而後疆場之事起，上亦不能無憾志。首輔韓爌、左都御史曹于汴、侍郎胡世賞、朱世守次第罷官，動以東林爲口實。先生言萬曆之季，高攀龍講紫陽之學，世以東林名，卒構逆璫之禍以死。皇上首表遺忠，攀龍已爭光

日月，而近時言者猶指一二異已者，推入攀龍之黨，卽如李邦華之振刷，朱世守之端方，胡世賞之清謹，在起廢中有用之才，猥以時危見短。議者方謂老成不可不惜，而立異同之見者，無不鼓掌稱快。朝處一人焉，坐之曰黨，暮去一人焉，坐之曰黨，猶以爲未足，特設四面之網，使天下之人不出於假道學，則出於假事功，不出於假忠義，則出於假氣節。人主又安得有用賢之路乎？留中。滿桂既敗，上出總兵馬世龍於獄爲總理，召張鳳翼爲總督，御史吳阿衡爲監軍。鳳翼名雖總督，不敢節制世龍，而諸帥亦不受世龍節制，未嘗接一戰。先生劾之曰：今所稱關以外將將之任者，非張鳳翼乎？鳳翼係附奄人，朝廷不難以高爵厚祿起之田間，而鳳翼輒曰：事在總理，朝廷亦何利有此？尚方付之坐觀之手乎？以馬世龍之總理無能也，皇上任之不疑，舉朝遂無敢異同者。閣部孫承宗亦倡爲不必用文臣之說，以佞之。御史吳阿衡則監世龍軍者也，受命之日，與世龍八拜定交，通國之人駭之。由是而白簡不聞，其風采猶足觀乎？進而求之廟堂之上，諫官不論事，中樞不集思，宰相不運籌，可謂禁中有顧牧乎？京師解嚴，先生乃進所天永命之說，從前所以治天下者，不可不更也。曰：臣聞皇天無親，惟德是輔。皇天無德，惟好生是德。故人主代天而理天下也，苟法天心，務以元氣長養成就天下，而督責股削之私不設焉。法天之大者，莫過於重民命，則刑罰安肯宥乎？陛下卽位以來，勵精振刷，不免以重典繩臣下，逆黨有誅，封疆失事有誅。又因及一切誑謬者，重者以杖死，輕

者以謫去。紛紛狼籍。朝野中半染赭衣。而最傷國體者。無如詔獄一事。卽邇者易應昌之以回奏獲罪也。亦處之以詔獄。應昌之罪。坐越獄一案過於平反。夫以平反爲欺罔。則必以鍛鍊爲忠直。膏肓乳虎之輩。接踵於天下矣。臣願陛下體上天好生之心。首除詔獄。自今臣下有罪。一槩下法司處分。寬應昌以開天下平反之路。則祈天永命之一道也。法天之大者。莫過於厚民生。則賦斂宜緩。宜輕。陛下卽位以來。軍興告匱。不免以重斂責小民。宿逋既誅。見征必盡。又督及來年之預征。有司有逮。司道有罰。節節追呼。閭閻中旣已不勝繹騷。而最爲民厲者。無如貪官汚吏。卽邇者御史蘇瑛之按貴州也。一旦以輜重被許於監司。夫以巡方而騷貨。又何問下吏之操守。金魚鼈麀之風。空谷於天下矣。臣願陛下體上天好生之心。首除新餉。俟賦役全書既定。以節省之物力抵之。而有餘。勘蕪瑛職証示天下。以撫字之倡。則祈天永命之。又一道也。雖然。陛下天之宗子。而輔臣則宗子之家相也。尤願聞臣體一人好生之心。勿驅除異己。構朝士以大獄。終國家朋黨之禍。勿寵利居功。阿人主以富強。釀天下土崩之勢。則所以終奏此祈天永命者。相臣實與有責焉。周延儒溫體仁方窺伺上意。新得相位。見而惡之。以先生禱旱稱疾激上怒。上詰曰。除新餉。省物力。朕所深願。但軍興急需。何法措應。劉宗周必有便計。卽明白奏來。先生言。遼東一鎮。原設之兵。儘足以固圉。遼東一鎮。原設之餉。儘足以養兵。新兵新餉。安所用之乎。更令沿邊州縣三輔之地。各選土兵。酌州縣銜倅。自

三百名以上至千名。量給口糧器械。以時訓練。有事而爲兵。備餉之額。無事而歸農。懸餉之額。秋冬而講武。備兵之賞。春夏而務農。懸兵之賞。卽不能盡廢新餉。又何取於五百餘萬之多。臣近於順天一府賦役清出。冗員冗役。冗費等項。約至一萬六千餘金。已足準續派雜項一萬二千三百而有餘。推之天下。亦猶是也。清賦之法。清其賦之隱於民者。什一。清其賦之耗於官者。什九。清役之法。清其役之冒於舊者。什一。清其役之冒於新者。什九。而尤在進求之廟堂之上。陛下躬修聖德於上。而天下化之。士大夫孰爲競刀錐者。自古未有民貧而君獨富。尤未有人心豫附中國又安。而四方不從之賓服者。上復以爲迂濶。上意在功利。先生封章多扞格不入。遂請告。旨許回籍。先生之治京兆也。風裁孤峻。其過豪貴。不啻利刃之齒腐朽。每坐堂皇。奄人闖入言事。先生不應。或出語相詬詈。先生若爲不聞也者。治事自如。奄人計塞。反笑而謝曰。公執拘人。吾固知其如是也。武清伯奴子與諸生爭道。諸生受毆投牒。先生使吏入武清家捕之。武清及門言狀。先生拒不見。曰。奴辱士而主擁護之。是罪在主。吾將上告天子。武清知不可。但已。別遣一奴。先生心識其僞也。令其自理爭道之由。奴不能答。叱之去。乃撲前吏而推搡益急。始出之。捶撲數十。何校武清門外。先生厲禁倡優。輦轂之下。優人服飾有千金以上者。一日先生出。籠篋累累。不及撻。停車何問。曰。此司禮太監樂器。先生曰。干禁者。卽公侯不汝貸也。况官奴乎。焚之通衢。單丁下戶。則緩其銜轡。周其情隱。雖兵革匡勦。



皆有恃而不恐。先生出門，都人罷市而哭。八年，溫體仁久居政地，導上以禁刑厚斂，海內盜起，臺諫攻之甚力。體仁不自安，杜門求退。上念置相不得其人，進大小九卿詹翰於廷，親試之。復命吏部推在籍堪任者。太宰以孫慎行、林釡及先生上。上降詔召三臣入。長吏催促上道，尋擢文文肅。至直閣，起用黃漳浦道周。上意頗欲更始，而體仁乃大懼，亟稱疾愈入直。明年正月，召對於文華殿。孫文介病卒，先生與林釡俱入。上問曰：「方今人才匱乏，糧餉不敷，流寇猖獗，二臣可奏來。」釡爲支吾之語以違上。先生對曰：「天下原未嘗乏才，自是以供一代之用止。因皇上求治太急，用法太嚴，布令太煩，進退天下士太輕，遂使在事諸臣相率以畏罪飾非爲事，不肯盡心職業，所以有人而無人之用。有餉而無餉之用，有將而不能治兵，有兵而不能殺賊。」臣愚謂今日一一改前日之所爲，天下方有太平之望。流寇本朝廷赤子，若能撫之有道，則寇還爲吾民。今日急務當以收拾人心爲本。欲收拾人心，當先寬有司之參罰。小民困於加派，猶可言；轉困於有司參罰，不可言。蓋參罰重則吏治壞，吏治壞則民生不得其所，以致盜賊日起。詩云：「靡盬盜賊，莫知其歸。」臣竊痛之。上又問：「兵事如何處置？」先生對曰：「臣聞禦外亦以治內爲本。內治既修，則遠人自服。帝舜之時，苗頑逆命，益贊於禹，曰：『滿招損謙，受益惟德。』動天無遠勿届。卒以干羽舞兩階，而有苗格。臣願皇上以堯舜之心行堯舜之政，則天下太平。對畢，趨出。上顧溫體仁曰：「廷哉，宗周之言也。」兩杖相撞，聲震與尸之際。于此時而

說于羽兩階耶。傳旨：林釡入閣，劉宗周別用，監工部左侍郎。先生上封事曰：「皇上卽位之初，銳意太平，且欲躋一世而唐虞三代之甚盛心也。至於二帝三王所以治天下之道，猶未暇一一講求，致施爲大第之闊，多有未得其要領者。於是首屈意於出塞，而壬人銳口承當。已巳之役，謀國無良，朝廷始有積輕士大夫之心。自此耳目參於近侍，腹心寄於干城，治術劣以刑名，政體歸之叢脞。天下事遂日底於壞而不可救。故自嚴衛司機務而告訐之風熾，自詔獄及士紳而堂簾之等夷，自人人救過不給而欺罔之習轉盛。自事事仰成獨斷而諂諛之風日長。自三尺法不伸於司寇而犯者日衆，自謬旨雜治五刑，歲躬斷獄以數千計，而好生之德愈泯。自刀筆治絲綸而王言變，自誅求及瑣屑而政體傷。自參罰在錢糧而官念貪，吏愈橫，賦愈迫。自嚴撲繁而民生瘁，自嚴刑重徵交困天下而盜賊蜂起。自總理任而臣下之功能薄，自監紀遠而封疆之責任輕。自督撫無權而將日懦，自武弁廢法而兵日驕，自將儒兵驕而朝廷之威令并窮於督撫。自朝廷勅限盜賊而行關日狃，良報級以幸無罪，使生靈益歸塗炭，事亟矣。天驕聖衷，一旦撤總監之任，重守令之選，下弓旌之徵，收酷吏之威，維新之政，次第舉行。方與二三臣工洗心滌慮，以聯秦交而不意君臣相遇之難也。得一文震孟之賢而以卑辭報罷，使大臣失和衷之誼，得一陳子壯之忠而以過意坐事，使朝野無吁咈之風。此其所關於國體人心又有非淺鮮者。夫皇上所恃以治天下者法也，而非所以法者也。

所以法者則道也。如以道則必首體上天生物之心以敬天而不徒倚用風雷則必重念祖宗鑑古之統以率祖而不至輕言改作則必法堯舜之恭已無爲以簡要出政令。法堯舜之舍已從人以寬大養人才法堯舜之從欲而治以忠厚培國脉并法三王之發政施仁亟議拊循以收天下泮渙之人心而且還內廷以掃除之役杜後世宦官之釁正儒帥以失律之誅杜後世藩鎮之釁慎宗賢以改職之途杜後世宗藩之釁除此三大釁而國家苞桑之業已在此世今之所以日勤聖慮者亦何有哉。皇上但下尺一之詔痛言前日所以致賊之繇與今日不忍輕棄斯民之意遣廷臣賁內帑巡行郡國爲招撫使以招其無罪而流亡者陳師險隘堅壁清野聽其窮而自解來歸誅渠之外猶可不殺一人不損一矢而畢此役自此四海知中國有聖人將聞風慕義之恐後又奚煩於觀兵哉。此聖人以道治天下之明効也。然有天德而後可以語王道其要在於慎獨。故聖人之道非事事而求之也。臣願皇上視朝之暇時近儒臣聽政之餘益披經史日講求二帝三王之學求其獨體而慎之則中和位育庶幾不遠於此而得之上覽之大怒命文書官口傳重擬次輔錢士升票擬以進上猶謂其輕也發改票溫體仁從重票擬上之每票擬至御前上手先生之疏必繕閱數過起行數匝久之而意解難曰劉宗周素有清名召來亦多直言但大臣論事須體國度時不當效小臣圖占地步盡咎朝廷如流寇靜聽其窮中原豈堪盤據烽火照於甘泉虛文何以撐柱若封疆甘心

棄置貪欺一任所爲宋無三疊終困外國可爲前鑑堯舜事業詎不願慕無乃士風又不及宋總理未任之前有何功能表見以後還定虛心酌慮毋自誤以誤國家先生復言堯舜之所以爲聖者致謹於人心道心之辨求其所謂中者而執之由是以之官人而知人則哲以之治天下而安民則惠皇上已具堯舜之心矣惟是人心道心不能無倚伏之機出於人心而過不及之端授之政事之地即求治而過不免害治者有之乃時時而提醒之曰得無與亂同事歟又時時而謹凜之即此一念謹凜爲道心之主爲精一爲執中皇上已一日而堯舜矣皇上但心堯舜之心以撫民不患寇之不還爲吾民也皇上但心堯舜之心以蒞中國不患四方之不歸我戎索也蓋天下之治從本原執要則事不勞而功集自教化推行則神不役而智周惟皇上深致意焉工作繁興度支告匱上命諸臣捐助溫體仁與勲臣朱純臣爲倡又議罷明年朝覲聽其進奉先生諫曰臣聞爲人臣者竭股肱之力濟之以忠貞不聞其出於利也國步艱難就爲匪躬自効者而瑣瑣進奉何當報稱乃時奉急公之旨此臣所謂利也且夫輯瑞何典而議以捐助罷儀遂行之辱國滋甚上不悅然上意欲大用先生會推開員廷臣一再推俱不及上皆置之三推始以姓名上上將點用而溫體仁大懼舉會稽人許珣上疏謂先生才諳不足道學有餘上疑珣同邑知之必真乃已體仁益修黨人之隙舉動決裂先生三疏請告上允之行至德州念上欲求治而爲體仁所蔽荷上殊絕之知潔身去國



所不忍也。復上疏曰：臣惟皇上勤心遠略，夙興夜寐，而邦畿震蕩，禍至於此。臣以爲非一朝一夕之故也。往者已已，之變坐誤國者衰崇煥一人，其他爲法受惡耳。有小人者競起而假手於門戶，舉朝士之異已者，樂坐以煥黨，次第置之重典。自此小人進而君子退，中官用事而外廷浸疎於人主，則今日之禍實已已以成。陳成之也。且夫以丁魁楚等之失事於邊也，而與之以戴罪，何以服劉策之死？張鳳翼之溺職中樞也，而與之以專征，何以服王治之死？諸鎮巡勤王之師，爭先入衛者幾何人，而不聞以逗留蒙誅責，何以服耿如杞之死？今也幸以二州八縣結一捲土之局，則朝臣之繫繫若若可幸無罪者，又何以謝韓爌、張鳳翔、李邦華諸臣之或戍或去？豈昔之小人一一爲異已驅除者，今不難以同己互相容與乎？臣於是而知小人之禍人國無已時也。語曰：大奸似忠，大佞似信。頻年以來，皇上惡私交而臣下多以告訐進，皇上錄清節而臣下多以曲謹容。皇上崇勵精而臣下奔走承順以爲恭，皇上尚綜覈而臣下吹求瑣屑以示察。凡若此者，正似忠似信之類。竊其用心，無往不出於身家利祿。皇上往往不察而用之，則聚天下之小人立於朝，而皇上亦有所不覺。人才之不競也，非無才之患，而無君子之患也。今天下卽稱乏才，亦何至盡出一二寺人下，而皇上每當緩急之際，必倚以大任。此在前日已成覆轍，方亟亟更絃之不暇，乃者三協有遺，通津臨德復有遺，又重其體統等之總督。中官總督將置總督於何地？總督無權將置撫按於何地？撫按無權將置

置司道守令於何地？是率天下而奔走於中官也。於疆事必無幸矣。且小人與中官氣誼一類，每相爲引重而君子獨岸然有以自異。故天下有比中官之小人，必無合於君子之小人。有用小人之君子，終無勝於中官之君子。皇上誠欲進君子退小人，爲今日決消長理亂之機，奈何復用中官以參之？此明示天下以左右袒也。當是時，有明於治理如御史金光辰者起而爭之，亦天下之昌言也。卽不達用其言，亦何至并逐其人而尤辰遂以言見逐？若惟恐傷中官之心者，非所以示天下也。至於近日刑政之最舛者，成德傲吏也，而以賊戾何以肅懲貪之令。申紹芳十餘年監司也，而以莫須有之鑽刺戾何以昭抑競之典。鄭那驤久干鄉議，而杖母之獄，欲以無告坐，何以示敦倫之化。此數事皆爲故輔文震孟引繩披根，卽向者驅除異己之故智。廷臣無敢言者，皇上亦無從而知之。嗚呼！八年之間，誰秉國成而至於此？臣不能爲首輔溫體仁解矣。詩云：誰生厲階，至今爲梗。體仁之謂也。卽惟皇上念亂圖存，首以進君子退小人爲挽回世道之根本，亟罷三協通津之使，責成中外諸臣各修職業，不以人國爲僥倖，則宗社生靈實式憑之，而體仁所以爲桑榆之收者，庶幾在此乎。內批：邊臣一味欺蒙，遇警輒至疎虞，特遣監守查飭，夫豈得已。金光辰姑從輕處，乃謂恐傷中官之心，是爲何語。已已諸臣各有罪案，此番失事正在議處，有何異同黨比。成德等貪酷鑽利，壞法滅倫，反指爲刑政之舛，率捏首輔尤屬不倫。劉宗周明係比私亂政，顛倒是非，姑著革職爲民。十四年

起吏部左侍郎。上知先生而溫體仁害之。體仁去後。薛國觀傳其衣鉢。國觀以罪先。上念先生者久之。適會推少宰。上意不屬。臨朝而歎。謂大臣如劉宗周。清正敢言。廷臣莫能及也。罷朝。遣文書官傳諭吏部而用之。再疏請告。上不可。先生以爲天下治亂。決不能舍道而別有手援之法。一涉功利。皆爲苟且。上書明之。其一曰。明聖學以端治本。臣聞天下無無本之治。本一端而萬化出焉。人主之心是也。虞廷之訓曰。人心惟危。道心惟微。惟精惟一。允執厥中。此萬世心學之源也。臣請陛下求之吾心。當其清明在躬。獨知之地。炯然而不昧者。得好惡相近之幾。此正所謂道心也。致此之知。卽是惟精。誠此之知。卽是惟一。精且一則中矣。隨吾喜怒哀樂之所發。無往非未發之中。而中其節矣。此慎獨之說也。蓋上聖猶是此人心。下愚不能無道心。故雖聖如堯舜。卒不廢精一執中之說。以此後之學聖人者。亦曰慎獨而已矣。二曰。躬聖學以建治効。臣聞天下大矣。而以一人理。非徒以一人理天下也。故曰君職要。臣職詳。陛下留心治道。事事躬親。羣臣奔走受成之不暇。益相與觀望。爲自全之計。致一人孤立於上。而莫之與。豈非知人之道未之或講與。仰惟陛下躬親聖學。法堯舜之明目達聰。而推本於舍己。亟舍其聰明而歸之闇。非獨舍聰明。并舍喜怒。舍好惡。舍是非。至於是非可舍。而後以天下之是非爲真是非。斯以天下之聰明爲大聰明。廣開言路。合衆論之同。建用中之極。卽譏說殄行。亦不至震驚朕師。自此陛下端拱無爲。而天下治矣。三曰。崇聖學以需治化。天春

生萬物。而秋以肅之。莫非生也。王者以仁育天下。而義以正之。莫非仁也。必也求端於聖學。以明德化天下乎。化天下自朝廷始。請自今百僚有犯。一切下之法司。永除詔獄。不至以非刑辱士。至廷杖一節。原非祖宗故事。願與廠衛一體並罷。還天下以禮義廉耻之坊。由是化羣臣以化兆民。乘此中原殘破之餘。亟議撫循之法。特遣才望大臣宣示德意。一面經略農田。悉捐天下勦餉金錢。改爲牛種。廬舍之資。聽有司設法招徠。聯以保甲。進以鄉約。仍罷天下督師等官。明示與民休息。而專責兵事於巡撫。陛下但躬修明德於上。坐收千羽之化可矣。上終以爲迂闊。不能施用也。先生未至。又陞都察院左都御史。十五年冬。召對於文華殿。面辭不允。上問都察院職掌安在。先生對曰。都察院之職在於正己。以正百僚。必其存諸中者。上可以對君父。下可以質天下士大夫。而後百僚則而象之。大臣法。小臣廉。紀綱振肅。職掌庶在是乎。由是而求之諸御史。端不乏上行下效之機。而責成巡方。其首務也。巡方得人。則吏治清。吏治清。則民生安。於以化成天下。不難矣。上曰。卿力行以副朕命。先生又辭。上曰。已有旨了。乃謝恩退。而列風紀六事以上。一曰建道揆。請復京師首善書院。崇祀馮從吾爲誓宗。昭聖明興道致治之意。復天下社學。選明德老成者爲之師。聚里中彥士教之。一曰貞法守。自今一切輕重獄詞。聽三法司聽斷。不得下詔獄。其有不公不法。五城御史覺察之。廉其情罪之重。送刑部究擬。一曰崇國體。自今著令。大臣三品而上有犯罪者。先行九卿科道會議。議



詳乃付司寇。司寇議定，坐殊死者始收繫。其他卽以其罪行遣。一曰清伏奸。自今朝紳交結近侍，蹤跡顯著者，立置典刑。此外大小臣僚，或借事呈身，或假途干進，因而勑類斜封，官同傳奉者，臣衙門以白簡從事。一曰懲官邪。官之失德，由寵賂始，其途多自臺省而上。自今有輦金入長安者，臣單辭檄之，立置三尺。一曰飭吏治。察吏之責，專在巡方。天下事事，空歸惇大，獨於風憲受賄之律，毫不可赦。且亟罷減俸，行取之例，行久任之法。上雖可之，亦不能盡行也。御史王孫蕃劾奄人劉元斌縱兵搜牢，疏未下而元斌辯入。上知爲司禮秉筆奄人王裕民所漏也，并下裕民三法司雜治之。尋改刑部徐石麒以侍郎署事，擬裕民戍仍列院寺姓名於疏。上怒，三法司故縱，召入面詰之。先生趨朝而石麒始出，爰書入對。上首傳先生責以擬律不當。先生對曰：「此事非臣鞠問，不敢妄奏。上益怒其譎，委先生對曰：『前下法司，臣未受事。後改刑部，臣不得與聞。』然聞石麒具案已曲盡情事。上乃霽顏曰：『此奴錢神有靈，辟如百足之蟲，至死不僵。』先生對曰：『司寇所執者三尺法耳。法如是而止，石麒非有意貸裕民也。』上曰：『裕民欺罔實甚，卿等不知耳。』先生對曰：『就事論事，裕民之罪止於是。若內廷有隱微之奸，自有聖斷在。非臣等所知也。』越日，裕民棄市。已又京師戒嚴，先生言：『皇上以一心爲天地神人之主，必鎮靜以立本，而無失之張皇。安詳以應變，而無失之造天。此匡濟時艱第一義也。至於施行急務，旌血戰先鋒之虛象，昇以作天下忠義之氣，追戮誤國奸臣楊嗣昌以謝九

廟之靈，速跋扈悍將左良玉以肅軍紀，防關以備反攻，防路以備透渡，防通津臨德以傳南下。上曰：『責重朕心亦是，但旌虛象昇，追戮楊嗣昌，何遠能退敵乎？』周延儒之再相也，起用正人，一反其曩日妒賢嫉能之政，而君子亦遂喜其附已，深相結納，乃獨不能得之於先生。每朝畢，士大夫多與延儒接迹屏語。先生魁然孤峙，士大夫皆慚而止。會考選，推知多以賑濟建城防河諸名色減俸行取。郎署有自行陳乞者，皆通賄於延儒。先生言：『禮義廉耻，士君子居身之本係焉。有廉耻而後有功名，有功名而後有事業。今不難呈身如彼，速化如此，一身之廉耻既不恤，又奚有異日立殿廷爭可否，其爲植黨營私欺君罔上有必至者。』延儒不悅，授意於兵部尚書張公國維，令以邊才錄用。其私人國維薦某某等皆知兵，請上考定次第。太宰鄭公三俊曰：『考選者，部院之事。皇上且不得專，况樞部乎？』上疏明職掌，宜俟部院考後再請面裁，否則爲僭官。上怒，召吏部都察院出其疏詰之曰：『大權者，人主所自出。朕欲親考諸臣，何謂僭官？』三俊對曰：『考選之屬部院，祖宗舊制也。上意未解。』先生奏曰：『冢臣之意，欲俟部院考後，別其居官之稱否，品行之純疵，議定進之於皇上，皇上再延試而授之官。在朝廷因爲總攬大權，而在臣等亦得盡職掌。若止就面對衡量，則一時之語言不足盡終身之梗槩，往往有論列明而其人傾邪者，有論列庸而其人樸實者，以言取人，失之宰子，皇上何以定其流品乎？』乞從宰臣請，幸甚。上不可，宜旨召候考官時敘等十二員對畢，先生又奏曰：『聆諸臣奏

對出於勦說居多。終祈皇上發臣等再考。上默然已。俱授兵科給事中。中書王育民爲絳州知州。孫順行賄。先生自劾曰。臣忝列風紀。此曹不難爲非義之干。實臣生平不足取信於人所致。大負皇上任使。乞賜罷斥。上革孫順。王育民職。法司提問。先生又申飭憲綱。上讀至言及乘輿則天子改容。意不懌。先是會推閣員。一時聲名之士多與焉。小人忌之。爲無名子書粘之殿壁。以當路二十四人分配二十四氣。上亦遂疑會推之事。此二十四人中有把持其間者。成吏部尚書李長庚。罷左都御史王道直。至是上戒臺省代人規卸。爲人出缺。給事中姜埰上言。皇上何所聞而云然。此奸人工爲蜚語。以中君子。卽二十四氣之故智也。然事故非無據者。上怒其黨比。行人司副熊開元奏劾周延儒於上前。請避左右。上許之。而延儒獨留。開元請并避延儒。上曰。卽所言機密。輔臣豈得不與。開元乃奏延儒不足當國狀。然延儒在旁。開元故氣奪而辭蹇。退而補疏。又漏奪失次。上怒其陰陽反覆。乃下姜埰。熊開元於詔獄。先生曰。皇上方開弘政門求直言。一日而逮二言官。非所以昭聖德也。九卿當公疏救之。鄭太宰以下皆唯唯。閏十一月己未。召對羣臣。皆候於廷。相傳旨授錦衣衛官。賜姜埰熊開元死。先生曰。爵人於朝。刑人於市。古今通義也。惡得私獎諫臣與。今日空署爭之。必得改發司寇而後已。否則何顏立交戰之下耶。衆亦唯唯。上御中左門。御史楊若僑薦西人湯若望善火器。請上召試。先生奏曰。御史之言非也。臣聞用兵之道。太上湯武之仁義。其次桓文之節制。

下此非所論矣。邇來邊臣於安攘禦侮之策。戰守屯戍之法。槩置不講。恃火器爲司命。今破城陷邑。豈無火器而然哉。我用以制人。人得之亦可以制我。不見河間反爲火器所破乎。先臣戚繼光在塞上。謹烽燧。嚴斥堠。軍法修舉。數十年無窺邊者。未嘗專恃火器。不恃人而恃器。國威所以愈頓也。湯若望唱邪說以亂大道。已不容於堯舜之世。今又作爲奇巧以惑君心。其罪愈無可道。乞皇上放還本國。永絕異教。上曰。火器乃中國長技。湯若望不過命其監制。何必深求。若仁義節制之說亦是。先生又奏曰。火器終無益於成敗之數。國家大計當以法紀爲主。法紀修則人心肅。人心肅則闔外用命。如大帥之跋扈。援師之逗留。實王法所不容。如何反從姑息而爲此紛紛無益之舉乎。上曰。正召卿等議此耳。先生奏曰。罪有輕重。罰有大小。今日當先按罪之重者以及其餘。叛帥家屬寄居京師。彼此潛通。禍出叵測。乞皇上早正典刑。以肅國憲。此臣所謂修法紀之大端也。上曰。朕亦知之。姑議督撫去留可也。先生對曰。如議督撫去留。請自督師范志完始。志完身督寧薊。關門三協。皆其責任。平時既忽邊防。聽其闖入。今又借援南下。爲脫卸計。從此關門無阻。決裂至此。志完當首議處分。上曰。范志完自不能辭咎。但入援乃奉旨而行。何云脫卸。先生對曰。十五年來。皇上處分未當。致有今日敗局。乃不追原禍始。更絃易轍。欲以一切苟且之政。補目前罅漏。非長治之道也。上變色曰。從前已不可追。今日事後之圖安在。先生對曰。今日第一義在皇上開誠布公。先豁疑關。公

天下爲好惡、合國人爲用舍、慨然引爲皇極主。於是進賢才以資治理、開言路以決壅閉、次第與天下更始。宗社幸甚。上曰：目下烽火逼甸、如何堵截？且國家敗壞已極、如何整頓？先生對曰：武備必先練兵、練兵必先選將、選將必先擇賢督撫。欲擇賢督撫、必先吏兵二部得其人。二部得人、則庶司莫不稱職、而於以制禦邊鄙、不難矣。然有要焉。宋臣有言曰：文官不愛錢、武官不惜死、則天下太平。斯言誠今日鍼砭也。近來持論者、但論才望、不論操守、不知天下真才望出於天下真操守、自古未有操守不謹而遇事敢前者、亦未有操守不謹而軍士畏威者。若徒以議論之捷、給奉動之快、張稱曰才望、以之取爵位、則有餘、以之責事功、則不足究、何益於成敗之數哉？上曰：濟變之日、先才而後守。先生對曰：正以前人敗壞、皆由貪縱使然、故以濟變言、愈宜先守後才。上曰：大將別有才局、非徒操守可望成功。先生對曰：他不具論、如范志完、操守不謹、上自大將下至偏裨、凡補一官、授一職、無不得賄數百金、所以三軍解體、士卒莫肯用命。由此觀之、豈不信以操守爲主乎？上色解曰：知道了。勅先生起。時太宰以病註籍、戶部尚書傅淑訓申救姜埰、能開元不能力、上拒不納。禮部以下無言者。先生出班奏曰：皇上方下詔求言、而二臣遽以言得罪、甚有傷於聖政。國朝無言官下詔獄者、有之自二臣始。甚有傷於國體。皇上度量卓越、如臣宗周累多狂妄、幸寬鉄鑕。又如詞臣黃道周、亦以懇直宥鑒聖明、復其原職。臣等何幸而蒙皇上使過之典、二臣何不幸而不邀皇上法外之

恩、伏乞聖慈、少視同仁。上曰：黃道周有學有守、豈二臣可比？先生對曰：二臣學守誠不及道周、然朝廷待言官有體、其言可用則用之、不可用則置之、卽有應得之罪、亦當勅下法司、原情定罪。遽下詔獄、終於國體有傷。上怒曰：三法司、錦衣衛皆朝廷刑官、何公何私？且朕處一二言官、如何遂傷國體？假有貪賄壞法、欺君罔上、俱不可問乎？先生對曰：掌衛刑者多膏粱子弟、未必讀書、知禮義者也。每聽寺人之役使、勢不容於不私矣。卽皇上欲問貪賄壞法、欺君罔上者、亦不可不付之法司也。上大怒曰：如此偏黨、豈堪憲職？候旨處分。先生謝罪。文武班行各申救。上曰：開元疏必有主使、疑卽宗周。僉都御史金光辰奏曰：宗周賦性確直、與開元並無交與、實從君德起見、請皇上勿疑。且其振揚風紀、整飭朝常、百僚中所不易得、終所寬宥。上曰：金光辰也。監議處。先生出待罪朝房。內降劉宗周、懷拘偏迂、朕累優容、念其新任、望之更改。今乃藐抗徇私、大負委任。本當重處、輔臣奏其年老、姑著革了職。金光辰奏對尤屬恣肆、姑從輕降二級調外用。上雖怒先生、亦遂不敢置姜埰、能開元於死、而發刑部擬罪。部擬不具招、上益震怒。杖埰開元各百、刑部尚書徐石麟奪官。先生以未解嚴、不忍恣然竟去、出止門外之僧舍。士大夫問學者交錯於途。時李忠文邦華代先生而未至。鄭太宰上疏留先生計吏、先生遂行。其冬、東陽亂、漸之在朝者公疏請練鄉勇。浙西徐石麟主之、副以在籍監司錢繼登。浙東先生主之、副以在籍給事中姜應甲。制曰可。

（南齊文集附）



明儒碑傳集卷九十六

劉宗周二

子劉子行狀下

北變聞先生徒號慟哭。謂諸生曰：「既不能戮力圖君，以至於此，又不能身先討賊，可斬我頭謝先帝。君等各守所學，無交臂事賊也。」諸生進曰：「先生負天下之望，一死不足以塞責。編素發喪，檄召四方復君父之讐，定社稷之難，此今日事也。」先生乃曰：「諸生責宗周是也。身雖老，尚當先驅効死。遂荷戈出，從者數千人。守道王鄭嚙不能發一語，尤生曰：「此不足與謀，乃至行省，語巡撫黃鳴俊，一面發喪，一面整旅北進。鳴俊請少鎮靜以安人心，先生勃然變色曰：「君父變出非常，公專闕外，義當枕戈泣血，以激同讐，乃反藉口安民作遜避之計，豈忠臣烈士所扼腕而望公者哉？鳴俊慚而退。明日，士民洶洶聚先生所不散。鳴俊來，先生指而示之曰：「羣情如此，公不欲安人心則已，誠欲安人心，亦莫若發喪出師也。」鳴俊曰：「故事，發喪必待哀詔。先生曰：「嘻，此言其嘗也。今日頒詔者何人？安所得哀詔乎？夫禮有嘗有變，九廟震驚，社稷淪喪，臣子無食稻衣錦之理。公即疑凶問，亦當行哭廟禮。鳴俊不得已從之。於五月甲午行禮，佑聖觀。先生尺布裹頭，伏地而號，官吏士民和者數萬，聲震屋瓦。先生問師期，鳴俊以甲仗未備對。先生曰：「出師而後甲仗從之。向者諸公以勤王而不應，今再爲觀望計，吾儕蹈東海而死耳。鳴俊唯唯，而使客以封守言。先生太息曰：「封守者，君父之封守。君父殉國，欲守此千里提封，屬之誰氏？而吾儕又爲誰氏之民乎？先生度鳴俊不能用，乃

與章公正宸、熊公汝霖、朱公大典召募義旅，將出而福王監國之詔至，先生乃解。初有說先生入南中定策者，先生曰：「在我有赴難討賊而已，餘非所知。」詔起原官。先生言：「一旦違此鞠凶，臣即不致死於賊，亦當歸死司敗。席藁以待，上批卿忠直清正，朕從藩邸知之。今憂患相倚，無以難進爲辭。」先生上言：「今日宗社大計，舍討賊復讐，無以表陛下渡江之心，而苟非陛下毅然決策親征，亦何以作天下忠臣義士之氣？」至討賊之大策，一曰據形勝以規進取，江左非偏安之業，請進圖江北。鳳陽號稱中都，東扼徐淮，北控豫州，西顧荆襄，而南去金陵不遠，則請以駐親征之師。大小銓除暫稱行在，少存臣子負罪引慝之心，從此漸進，秦晉燕齊必有響應而起者。一曰重藩屏以資捍禦，淮揚數百里間，設有兩節鉞，不能禦亂卒南下。路振飛坐守淮城，久以家屬浮舟遠地，是倡之逃也。於是鎮臣劉澤清、高傑、逃相率有家屬寄江南之說。軍法，臨陳脫逃者斬。臣謂一撫二鎮皆可斬也。請自今重撫臣事權，以彈壓鎮臣，且不多設督臣以滋掣肘。一曰慎爵賞以肅軍情，請分別各帥封賞，就應執濫，輕則收侯爵，重則奪伯爵。夫以左師之恢復而封高劉之敗逃，而亦封，又誰爲不封者？武臣既封，文臣隨之，外臣既封，中璫隨之，恐天下聞而解體也。一曰核舊官以立臣紀，燕京既破，有受僞官而叛者，有受僞官而逃者，有在封守而逃者，有奉使命而逃者，法皆不赦。亟宜分別定罪，爲憲將來。至於僞命南下，徘徊順逆之間，實繁有徒，必且倡爲曲說以惑人心，尤宜誅絕。又言：「賊入秦流晉，漸過畿南，遠近洶洶，獨大江南北晏然，而二三督撫不



聞遣一騎以壯聲援。賊遂得長驅犯關。坐視君父之危亡而不救。則封疆諸臣之坐誅者一。凶問已確。諸臣奮戈而起。決一戰以贖前愆。又當不俟朝食。方且仰聲息於南中。爭言固圉之策。卸兵權於關外。首圖定策之功。則封疆諸臣之坐誅者又一。新朝既立之後。謂且不俟終日。首遣北伐之師。不然而亟馳一介。使問道北進。檄燕中之父老。起塞上之名王。哭九廟。指梓宮。訪諸王。萬無容自諉者。更不然而起閭帥鄭芝龍。以海師下直沽。九邊督鎮。各謀急擊。事或可幾。而諸臣計不出此。則舉朝謀國不忠之坐誅者又一。罪廢諸臣。量從昭雪。自應援先帝遺詔及之。今乃棄用新恩。誅奄定案。前後詔書。鶻突勢必彪虎之類。盡從平反而後已。則舉朝謀國不忠之坐誅者又一。臣爲今日問罪之師。當自中外諸臣不職者始。上答曰。親統六師。光復舊物。嚴文武恒怯之大法。激臣子忠義之良心。慎新爵核舊官。朕拜昌言。宣付史館。弘光帝之立也。羣臣意多不屬。中樞史公可法以七不可寓書於總督馬士英。七不可者。言其好色好酒好貨不孝不讀書。便有司近匪人也。士英與其客阮大鍼楊文驄謀之大鍼則入而交關于誠意伯劉孔昭。吏科李沾以爲內主。文驄則出而迎弘光于淮上。史公儒緩未定議。而四鎮之納弘光者已至江上。錯愕迎拜。既登極。士英乃以鳳陽總督印前書宣示中外。史公內不自安。以政府讓士英。而出太宰張公慎言起用吳姓鄭三俊。孔昭以爲急黨人。緩定策。遂廷叱之。召阮大鍼。陛見用奄人治兵調食。修提立之報。日不暇給。方利思陵之

禍。凡言討賊者誅之。先生連疏請告不得。遂言天道有陰陽而人事應之。其象爲君子小人。君子小人之進退。則否泰之理也。方陛下之龍飛淮甸也。天實與之。人曷故焉。乃有護蹕微勞。入內閣。晉中樞。官銜世蔭。晏然當之不疑者。非馬士英乎。于是李沾侈言定策。挑激廷臣矣。劉孔昭又以功賞不均。發憤家臣。朝端譁然聚訟矣。而羣陰且翺翺起矣。借知兵之名。則逆案可以然灰。寬反正之路。則逃臣可以汲引。而閣部諸臣且次第言去矣。中朝之黨論方興。何暇圖河北之賊。立國之本計已疎。何以言匡攘之略。高傑一逃將也。而奉若驕子。浸浸有尾大之憂。淮揚失事。至不難遣撫臣。遣臣以謝過。安得不長其桀驁。則亦恃士英之羽翼也。劉黃諸將。各有舊信。而置若奕棋。洵洵爲連雞之勢。至分割江北四鎮以慰之。安得不競啓其雄心。則皆高傑一人有以倡之。京營一旅。自祖宗以來皆勦臣爲政。樞貳佐之。陛下立國伊始。正可講求祖制。而不意又有內臣盧九德之命。則士英有不得辭其責者。總之。兵戈盜賊皆從小人氣類感召而生。而小人與奄宦又往往相爲表裏。自古未有奄宦用事。而閹臣能樹功於方域者。惟陛下首辦陰陽消長之幾。出士英仍督鳳陽。聯絡諸鎮。決用兵之策。史可法卽不還中樞。亦可自淮而北。歷河以南。別開募府。與士英相犄角。京營提督獨斷寢之。書之史冊。允爲弘光第一美政。宗社幸甚。上報曰。卿忠言議論。朕所樂聞。至于文武將相未盡調劑。官府表裏皆出權宜。卿風憲老成。望其速入。面諮大政。當是時。奸人雖不利先生。然耻其

不能致先生以爲天下笑。反急先生之一出。于是馬士英言先生負海內重名。自稱草莽孤臣。不書新命。明示不臣天子也。奸人朱統鎭言先生請移蹕鳳陽。蓋謂鳳陽高牆之所。欲以罪宗處皇上。而與史可法擁立潞王。其兵已伏丹陽。所當急備。四鎮皆言先生欲行定策之誅。意在廢立。先生在丹陽。高傑、劉澤清遣刺客數輩往。先生危坐僧舍。終日無情容。刺客亦心折。不敢犯天下之惡名。皆去。不知所之。黃鳴俊入覲。其兵抵京口。與防江兵角。殺士英一聞。浙兵則以統鎭之言爲信。亦震恐。上傳云。昔漢宣起于艱難。丙魏合志。唐肅興于靈武。李郭同心。今若祖分左右。口構玄黃。天下事不堪再壞。諸臣各宜和衷集事。息競圖功。庶幾君臣之間。禮全終始。先生不得已受命。上言。董仲舒曰。正心以正朝廷。正朝廷以正百官。正百官以正萬民。正萬民以正四方。臣願陛下先求之正心之地。心正而朝廷從之。百官則而象之。其爲風紀之地。肅如也。是故內閣而千六部之事。任爲專權。六部而承內閣之風。旨爲亂政。臺省而依附閣部。爲植黨。介冑而與議朝政。爲要君。外官而通賄朝士。爲作奸。各衙門而交結近侍。爲罔上行私。臣院皆得過而問之。臺省諫嚴。衛給事中袁彭年謫外。先生言。嚴衛設而宦官從此用事矣。宦官用事而外廷因緣爲奸矣。言路阻而宵人得志。徑實開而賄賂公行。釐數之下。廢官充斥。長此不已。紹述魏崔之政。養成彪虎之奸。宗社之禍。所不忍言。尋以阮大鍼爲兵部右侍郎。先生諫曰。國家莫大于邪正消長之辨。而才次之。大鍼而才。臣慮其爲黨。

邪害正之才。病世道而有餘。其進其退。江左之興衰繫焉。上批大鍼進退繫江左安危。是否確論。先生又再疏請告。子驥驛歸。先生去國。無不唏噓感歎。老校廬見亦相聚而語。知南都之不能久立也。其後左良玉移檄。亦以不聽先生罪。士英從民望也。弘光元年五月。南都亡。先生語守道于穎。爲戰守計。不應。六月丙寅。十五先生聞浙省降。方食。推案慟哭曰。此余正命之時也。遂不食。諸生請曰。今日繫天下望者先生也。先生何遂言死。先生曰。同者累請于公。城守。哀如充耳。今欲爲於國亡勢去之餘。亦已知其難矣。在余之自處。惟有一死。先帝之變。空死。今上蒙塵。空死。吾越納降。又空死。不死尚俟何日。世豈有偷生御史大夫乎。諸生曰。不然。夫死非先生所難。處死爲難。死而有益于天下。死之可也。死而無益于天下。奈何以有用之身。輕棄之。先生曰。吾固知國事賢于捐生。顧余老矣。力不能勝。子之所言。異日不可知之功也。余之所守。人臣之正也。身爲大臣。敢舍今日之正。而冀異日不可知之功乎。吾死矣夫。丁卯。諸生請先生出城。先生曰。國存與存。國亡與亡。古之制也。吾將安之。諸生曰。古人云。擇一塊乾淨土死。城降矣。卽欲死。豈先生死所。先生曰。然。戊辰。先生辭祖廟。出居郭外之水心菴。癸酉。門人王毓著自沈于柳橋。先生聞之。曰。王生死。吾尚何滿涕哉。秦祖軾曰。江萬里身爲宰相。義難苟免。先生則有文山、愛山、袁闕故事在。先生曰。北都之變。可以死。可以無死。以身在削籍也。而事尚有望于中興。南都之變。主上自棄其社稷而逃。僕在懸車。尚曰可以死。可以。



無死以俟繼起者有君也。而吾越又降矣。區區老臣尚何之乎。若曰身不在位。不當與城爲存亡。獨不當與土爲存亡乎。故相江萬里所以死也。世無逃死之宰相。亦豈有逃死之御史大夫乎。若必待疊山之徵聘而後死。於義未嘗不可。然疊山封疆之吏。非大臣也。且安仁之敗而不死。終爲遺憾。宋亡矣。然猶不死。則以九十三歲老母在。戀戀難自決耳。我又何戀乎。君臣之義。本以情決。舍情而言義。非義也。父子之親。固不可解于心。君臣之義。亦不可解于心。今謂可以不死而死。可以有待而死。死爲近名。則隨地出脫。終成一貪生畏死之徒而已矣。王玄趾字義著赴水而死。所謂士死義也。玄趾真可以不死。我又非玄趾比也。以玄趾之死。決我之死。萬萬無逃矣。繫之辭曰。信國不可爲。偷生豈能久。止水與疊山只爭死先後。若云袁夏甫時地皆非。偶得正而楚焉。庶幾全所受。丙子辭墓舟過西洋港。再拜叩頭曰。老臣力不能報國。聊以一死明臣諫。投洋中。願久不得溺。舟子入水扶之而出。會聘書至。先生口授答曰。國破君亡。爲人臣子。惟有一死。七十餘生業已絕。食經旬。正在彌留之際。其敢尚俟遷延。遺玷名教。戊寅。遷楊枋。王統芝侍。先生字呼之曰。嗟。紫宸當以道義相成。勿作兒女子態。統芝曰。然。語及統著死事。先生爲淚下。曰。吾講學十五年。僅得此人。又曰。始吾不食數日。渴甚。飲茶。覺如甘露。因知茶亦能續命也。今後勺水不入口矣。統芝問曰。先生心境何如。先生曰。他人生不可以對父母妻子。吾死可以對天地祖宗。他人求生不得生。吾求死得死。他人終日憂

疑驚恐。而吾心泰然。如是而已。庚辰。秦祖軾侍。先生口吟絕命辭曰。留此旬日死。少存臣濟意。決此一朝死。了我平生事。慷慨與從容。何難亦何易。祖軾欲書之。先生曰。偶然爾。先生謂祖軾曰。爲學之要。一誠盡之矣。而主敬其功也。敬則誠。誠則天。若良知之說。鮮有不流於禪者。又曰。吾日來靜坐小庵。胸中渾無一事。浩然與天地同流。蓋本來原無一事。凡有事皆人欲也。若能行其所無事。則人而天矣。又曰。餓死事小。失節事大。吾今而後知孟子所言人能無以饑渴之害爲心害。明乎此者。其于道也幾矣。嗣子均請謁。先生曰。常將此心放在寬蕩蕩地。則天理自存。人欲自去矣。屬之曰。死後葬吾于下蔣。碑曰。有明秦臺先生藏衣冠處。子某婦某合葬之墓。言訖。泫然淚下。曰。吾平生未嘗言及二親。以傷心之甚。不忍出諸口也。已而曰。胸中有萬斛淚。半灑之二親。半灑之君上。祖軾曰。先生此苦奈何。先生指其心曰。孤忠耿耿。閏六月辛巳朔。先生謂統芝曰。吾今日自處合義否。統芝曰。甚正。雖聖賢處此。不過如是。先生曰。吾豈敢望聖賢哉。求不爲亂臣賊子而已矣。門士有傳金華建議。請先生忍死待之。先生曰。古人一飯之德必酬。我一窮秀才。官至御史大夫。焉得不死。語曰。正其誼不謀其利。明其道不計其功。功利之說。倡此國事。所以不競也。死則死耳。何待爲。門士固請。先生曰。吾學問千辛萬苦。做得一字。汝輩又要我做兩字。張應鰲問曰。今日先生與高先生兩實事相類。高先生曰。心如太虛。本無死生。先生印合何如。先生曰。微不同。非本無死生。君親之念重耳。先

生謂應鰲曰：頻夜夢見朱文公。應鰲曰：先生固文公後身。竊謂先生學問精切入微處，當軼文公而上之。至其晚年，自焚諫草，號遜翁。先生今日所遭微不同耳。先生曰：還讓先賢。應鰲曰：鰲非阿所好。先生之學，直是去聖不遠。先生勃然曰：不意汝言狂悖乃爾。乙酉，先生撫心謂祖軾曰：此中甚涼快。祖軾問先生自裁不出他途，而必以絕食者，非但從容就義，蓋欲爲全歸之孝乎？先生微笑不答。丁亥，祁中丞彪佳投水死，王毓芝以告先生，先生已不能言。張日舉手者再，指几上筆硯，至則書一「字」，毓芝曰：先生問「事乎」？領之戊子，先生卒，前後絕食二十日，勺水不入口。十三日卒，猶不瞑。娶章氏，贈夫人。子一，為字伯繩，能傳先生之學。學者宗之。亞于先生女三，皆諸生陳剛、王毓芝、秦祖軾。孫男四：茂林、士林、長林、道林，而茂林則義之甥也。孫女一，適吳善禎。先生之學，始自外祖章公，頴公號南湖，陶文簡周寧宇名應皆出其門。喜與門士激揚風節，先生心竊慕之。長師許敬菴先生，字遠，已交劉靜之、永澄、丁長孺、元薦，而入東林，與高忠憲問答，首書書院，初立，鄒忠介、馮恭定設主講席。忠介宗解悟，恭定重躬行。先生爲兩家騎郵，通彼我之懷。忠憲、忠介恭定既沒，講學中絕。先生始有証人社之會。南都而後，門人問學者，先生曰：守所聞，行所知足矣。今乾坤何等時，猶堪我輩從容擁鼻比而講學論道乎？此所謂不識人間羞耻者也。先生宗旨爲慎獨。始從主敬入門，中年專用慎獨工夫。慎則敬，敬則誠。晚年愈精微，愈平實，從嚴毅清苦之中，發爲光風霽月消息。

動靜步步實歷，而見故發先儒之所未發者，其大端有四。一曰靜存之外無動察。問：慎獨專屬之靜存，則動時工夫果全無用否？先生曰：如樹木有根，方有枝葉，栽培灌溉只在根上用，枝葉上如何著得？一毫靜存不得力，纔喜纔怒時，便會走作。此時如何用工？工夫苟能一如其未發之體而發，此時一毫私意著不得，無工夫可用。若走作後便覺得，便與他痛改。此時喜怒已過了，仍是靜存工夫也。門人葉潤山延秀疑誠意不足以攝內外，先生曰：意誠則心之主宰處止於至善而不遷矣。止善之量雖通乎身心家國天下，而根據只在心上。蓋謹其微者而顯者不能外矣。知此則動而省察之說可廢。省察即是存養中最得力處，不省不察，安得所謂常惺惺者？存又存个何物？養又養个何物？今專以存養屬之靜，一邊安得不流而爲禪？又以省察屬之動，一邊安得不流而爲偽？不特此也，又于二者之間，方動未動之際，求其所謂幾者而謹之，安得不流而爲雜？二之已不足，况又分而爲三乎？潤山曰：然則學問之要只是靜而存養乎？曰：道著靜便不是。潤山曰：幾者動之微，有動則必有靜矣。曰：此所謂動非以動靜之動言也，復其見天地之心是也。心只是一个心，常惺而常覺，不可以動靜言。動靜者時位也，以時位爲本體，傳註之訛也。雖然時位有動靜，則性體與之俱動靜矣。但事心之功，動也是常惺惺，此時時不增毫末，增毫末則物于動矣。靜也是常惺惺，此時不減毫末，減毫末則物于靜矣。此心極之妙，所以無方無體，而慎獨之功必于斯爲至也。一曰意爲心之所行，非所

發。傳曰：如惡惡臭，如好好色。言自中之好惡，一于善而不二于惡。一于善而不二于惡，正見意之有善而無惡，所謂幾者動之微，吉之先見者也。正指所存言也。如意爲心之所發，將就爲所存者乎？如心爲所存，意爲所發，是所發先于所存，豈大學知本之旨乎？蓋心無體，以意爲體，意無體，以知爲體，知無體，以物爲體，物無用，以知爲用，知無用，以意爲用，工夫結在主意中，方爲真工夫。如離却意根一步，亦更無格致可言。問：意爲心之所存，好善惡惡，非以所發言乎？曰：意之好惡與念之好惡不同。意之好惡一幾而互見，念之好惡兩在而異情。以念爲意，何啻千里。一曰：已發未發，以表裏對待言，不以前後際言。謂程子云：喜怒哀樂之未發，謂之中。此時下不得个靜字，已是千古卓見，却不肖下个動字。夫喜怒哀樂非以七情言也，一心耳而氣機流行之際，自其盎然而起也，謂之喜，仁之德也。自其油然而暢也，謂之樂，禮之德也。自其肅然而歛也，謂之怒，義之德也。自其愀然岑寂而止也，謂之哀，智之德也。乃四時之氣所以循環而不窮者，獨賴有中氣存乎其間，而發之卽爲太和元氣，是以謂之中，謂之和，性之德也。故人有無七情之時，而無無四德之時。儒者苦于未發前求氣象，不已惑乎。須知一喜怒哀樂，自其存諸中，言謂之中，卽天道之元亨利貞運於於穆者是也。陽之動也，自其發於外，言謂之和，卽天道之元亨利貞呈于化育者是也。陰之靜也，存發總是一機，中和渾是一性。內有陽舒之心，爲喜爲樂，外卽有陽舒之色，動作態度無不陽舒者。內有陰慘之心，爲

怒爲哀，外卽有陰慘之色，動作態度無不陰慘者。推之一動一靜，一語一默，莫不皆然。一曰：太極爲萬物之總名。謂子曰：易有太極，周子則云：無極而太極。無極則有極之轉語，故曰：太極本無極。蓋恐後人執極于有也。而後之人又執無于有之上，則有是無矣。轉云：無是無，語愈玄而道愈晦矣。不知一奇卽太極之象，因而偶之卽陰陽兩儀之象。兩儀立而太極卽隱于陰陽之中，故不另存太極之象。于是縱言之，道理皆從形氣而立，離形無所謂道，離氣無所謂理。天者萬物之總名，非與物爲君也。道者萬器之總名，非與器爲體也。性者萬形之總名，非與形爲偶也。知此則道心卽人心之本心，義理之性卽氣質之性。粵自大學中庸散于禮記，釋朱表章，以爲心學之書，有功于道術，信乎不淺。而後之言大學者，以把持念慮爲誠意之功，道心濶于危殆。言中庸者，以靜觀氣象，窺未發之朕，中體落于偏枯。二書矛盾，非先生身體而力行之，又何以知未發之中卽誠意之實體段，而二書相爲表裏也。當是時，浙河東之學新建一傳而爲王龍溪，繼再傳而爲周海門，改發南文簡，則湛然澄之禪入之。三傳而爲陶石梁，與翁輔之以姚江之沈國模，皆宗聖史孝成，而密雲悟之禪又入之。會稽諸生王朝式者，又以擇園之術鼓動以行其教。証人之會，石梁與先生分席而講，而又爲會于白馬山，雜以因果，僻經妄說，而新建之傳掃地矣。石梁言識得本體，不用工夫。先生曰：工夫愈精密，則本體愈昭然。今謂既識後遂一無事，可以縱橫自如，六通無碍，勢必至爲無忌憚之歸，而



已其徒甚不然之曰識認即工夫惡得少之先生曰識認終屬想像邊事即偶有所得亦一時恍惚之見不可據以爲了徹也其本體只在日用常行之中若舍日用常行以爲別有一物可以兩相湊泊無乃索吾道於虛無影響之聞乎先生以謂新建之流弊亦新建之擇焉而不精語焉而不詳有以啓之也其駁天泉証道記曰新建言無善無惡者心之體有善有惡者意之動知善知惡是良知爲善去惡是格物如心體果是無善無惡則有善有惡之意又從何處來知善知惡之知又從何處起爲善去惡之功又從何處用無乃語語絕流斷港乎其駁良知說曰知善知惡從有善有惡而言者也因有善有惡而後知善知惡是知爲意奴也良在何處又反無善無惡而言者也本無善無惡而又知善知惡是知爲心崇也良在何處止因新建將意字認壞故不得不進而求良于知仍將知字認粗故不得不進而求精于心非大學之本旨明矣蓋先生于新建之學凡三變始而疑中而信終而辨難不遺餘力而新建之旨復顯先生以禮記雜出漢人之手記中夫子之言皆出家語有去其問答私爲已有者于是取而考定爲尙書逸經二篇曰夏小正附月丹書儀禮逸經六篇曰公冠投壺明堂奔喪諸侯饋廟諸侯還廟儀禮傳二十三篇曰冠義附深衣昏義士相見義鄉飲酒義燕義射義朝事附見公食大夫義附解喪記附三喪義附祭法祭義附禮本二本禮器禮坊附解樂記附考則者四篇曰緇衣帝繫官人明堂位禮察保傳餘篇附考其檀弓禮運經解哀公問

燕居閒居表記儒行曾子問凡係夫子之言還家語家語正集三十三篇曰相魯王言大昏問禮五儀三恕好生親周賢君辨政六本顏回子路初見入官困誓五帝執轡本命論禮觀射郊問五刑刑政禮運冠頌廟制辨樂問玉正論子夏問子貢問公西赤問曾子問家語補集二篇曰表記雜記雜取說苑韓詩外家語外集七篇曰千乘四代虞德誌志少辨用兵少問即大戴家語附集十二篇曰始誅儒行致思辨物楚聘經解五帝德屈節本始終記七十二弟子弟子行皆從削也古學經曰小學附禮少儀內大學學記上大戴保傳學記下本四書曰曾子論語孟子子思子附取孔孟之言仁者類之曰合璧周程張朱五子之言仁者益之曰連珠附以吃緊三關一曰人已二曰敬肆三曰迷悟言求仁所有事也擇五子書之醇者解之爲聖學宗要周子則太極圖說程伯子則識仁定性書張子則東西銘朱子則答張敬夫中和說及答湖南諸公書陽明子則陸元靜良知問答及塞源拔本論先生謂朱子著大學于誠意章反章章平日不知作何解至易養乃定爲今章句曰實其心之所發不過是就事盟心伎倆于法已疎矣至慎獨二字明是盡性吃緊工夫與中庸無異旨而亦以心之所發言不更疎乎朱子一生學問得力于主敬今不從慎獨二字認取而欲綴敬于慎獨之前所謂握燈而索照也作誠意章章句袁了凡功過冊盛行因而有做爲遷改格者善與過對舉先生曰此意最害道有過非過也過而不改是謂過矣有善非善也有意爲善亦過也此



處路頭不清、未有不入于邪者。故論本體有善無惡、論工夫則先事後得、無善有惡也。作人講、太極圖說謂天以陰陽五行化生萬物、物鍾靈爲人、人合德爲聖。先生獨言人卽天卽地、人心具有太極陰陽五行萬化之理。作讀易圖說。先生在京邸、有問太極之說者、輒舉易以答、遂從而詮次之。每卦首彖辭、次爻辭、次象傳、大小象、一如乾卦位置繫辭以下、間有更定。太極兩儀四象八卦六十四卦方圓圖、皆與先儒不同、以發明太極卽在陰陽之中。作古文易抄、以方文正孝孺從宋潛溪得金華何王金許之脉、有明理學當爲第一。作遜志正學錄、陽明之良知、本以救末學之支離、姑借大學以明之、未盡大學之旨也。而後人專以言大學、使大學之旨晦。又借以通佛氏之玄覺、使陽明之旨復晦。又何怪其說愈詳而言愈龐也。作陽明傳信錄、有明學術龐雜、先生依名臣言行錄例、以次諸儒、有特書者、有附見者、不以成論爲然。薛敬軒、陳白沙、羅整菴、王龍溪、皆有貶辭、而方文正、吳康齋、人所不屬者、先生以正傳歸之。又常謂義陽明之後、不失其傳者、鄒東廓、羅念菴耳。作有明道統錄。先生自家庭以至宗族、朋友、鄉黨、施之無不各當其節。其事太夫人也、以筋力致養、柴水之事皆躬親之。兼峰公病、先生俯伏左右、抱扶臥起、身爲薦席。居喪則飲粥飲水、闔門蔬食。次女患病、醫用黃雞爲藥、先生勿許也。三世七喪、尙在淺土。先生營立塚墓、御史徐縉芳資之百金。先生謝曰、百金之餽、其所取義乎、不義乎。卽使君有以處僕僕、則何以自處也。已矣、勿污我先人墓上石。僕所

未了者、固厪有先人一事、試將茹荼帶索、以畢餘生、何至煩故人爲念。御史不敢復言。事女兄如母、女兄病瘵、醫藥之資、力所不能致者、致之。先生赴官、聞其不豫、輕軻徑返。卒則養其子、子卒又養其孫、曰聊以終吾事、母之念爾。叔母朱氏無子、先生迎養于家。朱氏欲異居、先生輒自艾曰、古人數世同居、今吾一叔母不能安其心、何古今人之不相及耶。再從弟宗祐流落閩中、先生尋歸、冬月製衣、家人與之以布、先生見而恚曰、兄弟一體、弟衣布、兄能安于帛耶。易之初、劉氏家廟所行皆世俗之禮。先生一一正之。置祀田、輯宗譜、乃立宗長一人、總宗教、宗翼二人、佐之。宗老一人、以齒、宗幹一人、司錢穀、宗糾一人、司賞罰。舉宗之事皆質成于宗長。宗長未聽而投牒于官者、罪之。月朔、宗長率宗人而謁廟、有善惡皆書之。置義田百畝、定卹例、一卹賢、二卹鰥、三卹孤、四卹癯、五卹喪、六助婚。罪人與醜婦不卹。先生自終養歸、聞許敬菴先生之卒于途中、不至家而往哭焉。丁長蘅、劉靜之卒後、每過必哭。先生不妄交、其平生希登慕義于先生者、滿天下。所稱性命之友、則周寧宇、高忠憲、丁長蘅、劉靜之、魏忠節、先忠端公六人而已。崇禎八年、十年、越郡飢、先生募米、分遣諸生賑之、全活五萬餘人。十三年、又飢、復募米、活者又萬人。郡邑下放、每坊積米二百石、爲明年平糶張本。先生所居昌安坊、卽以所積爲社倉、損益舊法行之。一坊遂無飢者。鄉黨有冤結、先生必爲之平理。好吏跼蹐、唯恐先生之知也。先生通籍四十五年、立朝僅四年、在家強半、教授、做帷穿榻、瓦竈破釜、不

改儒生之舊。士大夫飾其輿服而來者，不覺慚阻，故見先生者多毀衣以入。甲戌乙亥之間，先生偶服紫花布衣，士大夫從而效之，其價爲之頗高。先生飯客不過數器，而士大夫之享先生者亦遂以乾飯寒漿。先生未嘗不心知其僞也。會稽令趙士諤問疾，至先生榻前，見其單陋，歎曰：「豈意今日得親管幼安。」丁巳京察，劉廷元、韓浚等怨于東林，士諤時爲考功，曰：「劉大行之清修，人所不堪，此諤之親見者也。」乃止。給事中徐耀使浙，渡江來見先生，方閉門掃軌。耀曰：「昔人不得見劉元城，以爲如過泗州不得見大聖。耀若徒返，亦何顏見歸之父老乎？」先生乃見之。都督劉應國、遼東中前所人固請見，見輒涕泗再拜，自言不遠萬里，得見先生，不覺喜極而悲也。金壇周仲駿鑲謁先生，先生留之飯，仲駿語人以七箸長短若何，杯盤大小若何，爲一生未有之榮。郎官秦祖襄入京，止宿逆旅，僕從紛紜，主人俱應不給。周視同旅者一人，幅巾危坐，童子侍側，問之曰：「劉都御史也。」祖襄惶恐遁去。其爲世所欣慕畏憚如此。先生門牆高峻，不特小人避其辭色，君子亦未嘗不望崖而返。周廷儒使其客薦誠于先生，先生不答。其後有爲馬士英言者曰：「所貴大君子，以其能化小人爲君子，國事爲重，不宜拒絕太深。先生亦不答。有司馬自附君子，先生惡其佞也，同朝不交一言。司馬每晨必詣先生言事，先生默坐，司馬瀾翻布帛，言盡而去。黃漳浦祭告禹陵，及門者三，先生不見。曰：「際此亂朝，豈大臣徜徉山水之日。」漳浦聞之，卽行。先生德日慎，小心日謹，微官行人時，旁轉衛經歷，不樂，覺

而自責曰：「此夢從何來，終有不忘榮進念頭在。」乃知平日滿腔子都是聲色貨利，不經發覺，自不察耳。待罪中左門時，諸生憚日初欲上書留先生於經筵，先生聞之，曰：「僕自反必是名利場打不過，洗不淨，盡有一種聲音笑貌爲人所覷及處，至使朋友中有迎風而動者，益覺悶然一關不易過也。」世之言先生者，無不曰其理學似周元公，死節似江古心，論諫似胡澹庵，鉤黨似李元禮，絕俗似范史雲。至先生之所以告思陵者，歸本德化，不妄急急以兵食爲先務，學術不明，小儒不知治道，往往信不能及。卒之思陵以爲勦寇則必強兵，強兵則必捐餉，捐餉則必加派，增生靈之膏血以奉軍旅之費，豈知驅天下之民而盡歸于寇餉，無所出而愈不足，兵無所食而愈不強，其無兵無食者皆于務兵食一念始基之也。思陵亦時憶先生之言，罷而召名而罷，終不能用，而天下事已去矣。然後知先生之言爲思陵對証之藥也。其時爲救時之論者，以爲朝野屬意于先生，先生稍霽其威嚴，則前之陽美後之貴陽不至決裂如是。此說在孟子枉尺直尋之喻也。天下人心方趨于假借，由假借而至于無所不爲，江河日下，先生而假借一時之國，未必不亡，而千古之聖學先亡矣。浙中之爲禪學者，以爲忠義名節無關於理學，而先生清心忌惡，終陷黨議，是意氣之未融也。蓋聞之子朱子矣，風俗頹弊，浙中爲尤甚，大率習爲軟美之態，依阿之言，而以不分是非、不辨曲直爲得計，不復知有忠義名節之可貴。萬曆以來，排擠詆辱，出而殺君子者多自浙人。蓋由宋至今，沿之爲俗，故朝

廷之上成之爲黨。遂使草野之間講之爲學。非先生與先
忠端。魏忠節三數公振拔汗險之中。則亦何以使忠義名
節如今日之漸之盛也。先儒心與性對。先生曰。性者心之
性。性與情對。先生曰。情者性之情。心統性情。先生曰。心之
性情分。人欲爲人心。天理爲道心。先生曰。心只有人心。道
心者。人心之所以爲心。分性爲氣質。義理。先生曰。性只有
氣質。義理者。氣質之所以爲性。未發爲靜。已發爲動。先生
曰。存發一機。動靜一理。推之存心致知。聞見德性之知。莫
不歸之于。然則彼皆非與。曰。孔子已言之矣。吾道一以
貫之。工夫之與本體有二。便不一也。書曰。德唯一。動罔
不吉。德二三。動罔不凶。詩曰。士也罔極。二三其德。易曰。天
下之動貞夫一者也。自有六經以來。未之有。

于萬曆六年正月戊寅。享年六十有八。卒之。

城東南二十里下蔣之原。海軍吳貞肅麟徵于壬戌榜前
夢至古寺。有角巾而書碑者。所書爲文信公過零丁洋詩。
問之在旁者。曰。此隱士劉某也。覺而不知爲何人。已而
有言之者。曰。此講學之劉先生也。忠節識之。忠節死。國難
兩陸符謂義曰。夢驗于忠節。將無驗于先生乎。蓋以忠節
之誌銘請于先生以當之也。義然之。先生身殉宇宙。關乎
晦明。嗟乎。吾黨之愚也。義幼而孤。鄉邑之間多逆奄之黨。
人推築之無所不至。先生從而封殖之。曰。不佞白安先生
先忠端之末亡友也。有致難于其家者。不佞請以蠟臂當
之。哀門由是得安。長授先生教誨。質性下愚。亦自謂書本
中可以自得。痛掌血痕。不沾牛革。今也稍有所知。而普說

橫流。微言將散。高天厚地。此恨何極。因次其始終。先生之
學術。庶幾存其十一。而思陵欲治天下之心。亦耿然而見
之也。謹狀。

（南雷文集附）



儒藏

明儒碑傳集

卷九六

明左都御史戴山劉先生傳

先生名宗周，未生而其父秦臺公亡，念之號念臺，起東其字也。少無衣綿，外家為之製纓袍，拓落如襪，長猶衣之。嘗從外舅學壽昌，走烈日百里，攀一足，萬曆辛丑成進士，授行人。故事，舉人入國子，始預謁選。宗周急祿養，冀以舉人得早授，就國子試，乃釋褐。而太夫人逝，服闋以薦起原官。疏東林學，不報，因告歸。先是，宗周於服闋之隙，曾講學東林書院。東林者，宋楊文靖祠，而顧選郎與高大行講學其中，後所稱東林黨是也。時選郎已死，朝士從大行游，務持清論，別流品，而小人不便，攻之。宗周負清望，政府之銜東林者，思借以引重，且擬處宗周選部以奪其志。及疏入，而攻者四至。時宗周以行人告歸，御史韓浚糾其後，且欲中以考功法。考功郎趙士諤訟之，免。熹宗初政，盡起廢籍諸君子，諫官惠世揚薦宗周，而大理卿鄒元標繼之，起禮部主事。自二十四歲釋褐，至是已四十四歲，始一遷。凡二十一年。時客魏將亂，

政諫官言者相繼去。宗周起九日拜封事，糾魏進忠、客氏進忠、忠賢也。時多言客氏而進忠之糾自宗周始。進忠銜甚，然終以勢未橫，傳旨杖六十。輔臣葉向高力救，改罰俸。於是遷宗周光祿寺丞。未幾，遷尚寶少卿。又未幾，遷太僕寺少卿。宗周以一歲三遷未安，且客魏勢轉盛，疏辭三上，不報，以病行。故事，三品以下無辭官禮，宗周獨辭之。太宰趙南星、重宗周起，宗周通政會副都御史楊漣劾忠賢、忠賢怒，盡逐東林諸君子。宗周甫疏辭，即革職奪其誥命。於是大興鉤黨獄，緹騎遍天下。御史惠世揚被逮，辭連宗周。王侍御業浩救之，乃止。崇禎改元，忠賢誅，給削籍官誥，起順天尹。宗周集諸師儒，示聖賢為學之要，誥三老嗇夫，興利剔弊。所屬奸胥有乾沒帑金狀，論如律。勲戚家人及豪強不法，抑之絕。中貴請謁，盡驅伎童優女，焚權家所畜戲仗，炫服。武清伯奴客爭道毆諸生，直入武清第，捕得之，榜掠，加三木，示長安街會。



王師大入邊所屬老少奔都城乃請撤九門諸稅發內帑賑給平糶立保甲法其法十戶為甲甲有長十甲為保保有帥十保為鄉鄉有伯由鄉而坊而城而畿各以五為數而攝以官一戶容奸九戶舉之一甲容奸九甲舉之不舉者坐適遵化失守而近輔之流移者日千百至廷臣慮藏奸議勿納宗周曰此京兆事耳遣屬籍姓氏居業記以篆符宗周驗符入分插之而聯于保甲發贖鍰設粥僮者使就火室道殣給藁其間左單戶令富民互相恤時

王師攻德勝門督師袁崇煥抵之不勝上不視朝而中旨辦布囊八百內官進馬騾宗周曰是必有以遷幸之說欺上者夫與斯土為存亡者京兆也疏請臨御自卯至酉跪午門不去諭遣之乃集京兆官屬暨鄉大夫士父老子弟子城隍廟設于忠肅公位哭而祭之布死守之誓衆皆哭

王師退宗周瘞戰亡將士自德勝門凉水盧溝諸處瘞

骨三萬標以柳榆乃復陳善後之策曰選有司撫流亡聯保甲練民勇已下部而宗周於保甲之法尤加申飭曰籍曰政曰教曰禮曰養曰備曰禁輯書以獻乃復裁京兆冗費一萬六千餘金而大興宛平費額尤甚悉裁以舊籍權貴無敢難者於是陳祈天永命之要為更化之端其旨在除詔獄捐新餉而要歸于化門戶意見語侵輔臣時上方持法切責黨人無財賦以佐軍興而宗周所言適中之怒曰必捐新餉則軍需何措着奏宗周覆奏謂遼左額兵額餉原自相副若緣邊州縣各選土兵自三百以上至千而止量給食械為兵餉給為農餉懸何至如新餉五百餘萬之多哉且京兆裁冗萬六千金抵之續派萬二千三百金而有餘推諸天下猶是也且陛下修德廷臣孰敢私其利者上終以為迂責之宗周疏乞歸越五年上以體仁在閣久專務刑欽致民窮盜起且念前此置相不得人乃大破資格進大小臣工親試之且推在籍堪任者廷臣推禮部尚書孫慎行侍

郎林鈺并宗周而慎行道死。陛見有日，承旨范仁誤傳令宗周先見，上不悅。論仁城旦。及見而宗周以修德舞干為禦敵計。上顧體仁曰：滿桂之敗，宗周在朝也。此時能舞干羽耶？因相鈺改宗周工部左侍郎。宗周乃直陳時政，思轉亂為治，其要在抑宦侍，不使侵政，去市井言事。若陳啓新者，而下尺一以招流亡。上怒甚。輔臣因爭指其隙。上反改顏曰：宗周直臣，不度勢量時。夫盜賊遍天下，而欲以尺一勦除，何也會推閣員三推皆不報。上意在宗周，而究以迂濶。且謂宗周學有餘而不足於用，遂止。既而體仁修黨人隙，擠文震孟諸公去，循吏如成德、申紹芳輩皆得罪。宗周復請告，自起用至是凡百日。瀕行，貽體仁書數之。會

王師再入，宗周在道，聞復用中官監軍，馳疏諫。中官恚甚，羣詬之。而體仁復指以為黨革職。越六年，復起吏部左侍郎。甫就道，復改都察院左都御史。召對文華殿，退集御史于庭，嚴飭之。臺中肅然。乃申巡城職掌，察九門

官吏不法，設鄉三老，揚高皇帝大訓，即以鄉老行保甲法，咨五城御史著為令。無何，上惡諫官姜琛言已下吏議，而行人熊開元糾輔臣延儒、縉、開元并琛付詔獄。宗周思救之時，上方召對，或傳中旨，斃二人獄。宗周昌言曰：刑人于市，禮也。焉得私斃諫官？此不可不諫。衆許諾。及對竟，戶部尚書傅淑訓頓首請釋琛。開元上不納，餘無言者。宗周直前爭之，且曰：言官可用即用之，不用即置之。縱或得罪，亦當救法。司擬議而遽下詔獄，是朝廷有私刑也。上怒曰：司衛皆朕刑官，何公何私？且朕不得自問一在廷官乎？宗周爭不止，上大怒，乃曰：吾固知開元疏有主使也。宗周免冠，廷臣為宗周謝。僉都御史金光辰特申救之。上怒甚，目為朋黨，敕革宗周職，而光辰亦降調外。次日有舉人祝淵赴公車，疏留宗周，上益怒，坐淵妄言朝政，下吏議。而宗周以掌憲六十日去。甲申之變，宗周荷戈號咷，呼督撫討賊。而南都新建，以原官起。至丹陽，劾輔臣馬士英，責其不討賊而變亂新政。士英

怒會浙撫黃鳴俊提卒入覲抵京口與防江兵爭道關事聞朝廷士英遽指宗周與鳴俊懷異將入清君側為廢立計。宗周入朝不聽見。士英乃修黨人隙特薦逆案阮大鍼知兵既而起大鍼兵部右侍郎。宗周糾大鍼不報。拊膺曰吾不可復居此矣。遽歸。

王師入浙將軍李羅遣書徵宗周。會宗周絕食死。死前一日門人王毓著自沈柳橋上。宗周書曰毓著已得死所矣。先生早自決幸毋為王炎午所弔。宗周得書呼其字嘆曰元趾吾講學數十年得子隨之足矣。宗周幼學外大父南洲章公既而師事許孚遠分別理欲遂與同籍劉永澄詣高人行攀龍受古本大學及歸魏給諫大中造講既而同總憲鄒元標講首善書院至避璫難輒皇明道統錄始遜志終陽明涇野大抵所學由刻厲而漸就涵養。嘗曰吾今而知主靜之要也。崇禎辛卯由京兆請告立證人社同郡祁彪佳受學是時弟子日衆乃著第一義等說九篇輯聖學宗要以瀟洛關閩姚江為

合一學。及為少司空每於在官頃記所獨得曰獨證篇。于是辯太極之誤闡大學誠意中庸未發之旨大抵一中和兼動靜合本體工夫而要歸于立誠。晚年著讀易經說著易鈔既又著經籍考編輯十三經諸子史傳之有裨于教者其言逾博而旨逾謹。夫道一而已矣。宗周家會稽戴山稱戴山長居貧食不兼蔬入官寓朝房嘗起少宰道乏食臨朐令以十金餉受之。至前途得故人所遺金趣遣還令。及罷總憲歸不能行朝士歛贖餽之不受其後赴南都以冠服久做假冠于從子之宦者歸而還之笑曰吾不可掛他人冠也。其介如此。

毛奇齡撰（西河集）卷七六



明儒碑傳集卷九十七

黃尊素 陳仁錫 呂維祺

山東道監察御史贈太僕寺卿黃公墓誌銘

天啓逆奄之難。荆河東西忤奄考死者兩人。故交科都給事中諡忠介魏公。山東道御史黃公也。先是。神廟末年。荆人浸淫黨論。雄唱雌和。一詞同軌。一二方正之士離而不服者。如蘭蕙之孤。生於荆棘而已。自兩公之死。然後兩荆之人曉然知此之爲正。彼之爲邪。雖樵夫牧豎。皂隸庸丐。語及忠臣義士。靡不嗟咨涕洟。如不獲見其人也。語及於閹兒媼子。靡不呼號罵詈。恨不得食其肉也。三十年以來。士大夫立名矯行。聚徒植黨。所以鼓動激颺者至矣。而人未必從。兩公以死教。而人從之。子言之。有殺身以成仁。豈不大哉。黃公諱尊素。字真長。其先江夏人。十六世祖諱萬河。爲明州錄事。徙家餘姚。國初菊東先生諱珏。精皇極經世之學。祖諱大綬。父諱曰中。世有儒行。母盧氏。公少負軼才。擣詞揆藻。下筆不能自休。年三十未補博士弟子員。授徒

茗雪間。意豁如也。萬曆乙卯。舉於鄉。丙辰。舉進士。授寧國府推官。郡多能人。以氣力漁食閭里。持吏長短。公精強廉辨。執法如山。咸相戒莫敢犯。入爲山東道御史。當是時。先帝冲幼。官府晦蒙。都城一日三震。公上疏曰。阿保重於趙嬈。禁旅近於唐末。蕭牆之禍。慘於戎狄。宵人爲之。昨指應山楊忠烈公劾奄二十四罪。公抗疏繼之。極論廷杖非祖制。曰。後世史臣書之曰。某年某月。工部郎萬燦以言某事死杖下。可不爲惜哉。乙丑。黨禍大作。楊公魏公考死。公除名爲民。丙寅。以織監疏逮繫。坐贓考掠。體無完膚。慷慨談笑抵死。不少屈。臨難賦詩一章。南北向叩頭以謝君父。丙寅閏六月朔日也。年四十有三。越五日出獄。肌肉漲爛。頭面不可別識矣。公爲人通敏博達。明習掌故。自爲理官。引大體。折大獄。多所保全。耆定。及爲御史。南樂附逆。奄入相。朝右交關。鼓扇楊公。魏公暨高邑趙忠毅公。無錫高忠憲公。出死力相檣柱。公語門人徐石麒曰。乾六龍一亢。姤豕至矣。姤一豕蹢躅。玄黃至矣。羣賢之龍戰。可謂亢矣。南樂其姤豕也。不務堅



貞用晦、敦復以俟時而出、一決無復之計、其可幾乎。羣公善其言、而不能用也。公去郡、郡人持短長蜚語相中、總憲鄒公力持之。初入臺、即進規於鄒曰：京司非講學地也。徐文貞已叢議於盛世矣。鄒公卒用是去。羣小之憾君子自此始也。萬燥之杖也。公語楊公可以去矣。楊曰：苟濟國、生死以之。公曰：言不用、何濟？君子不顧生死成敗、不可不顧出處。魏公將攻南樂、公曰：頒朔後朝、小過也。攻之急、勢不反顧、二憾交作、不可爲矣。魏曰：一死可以盡節。公曰：不然。李固機失謀、乖遺梁冀書、猶戀戀不能已。君子愛國之心、甚於愛臣節也。公志在弘濟艱難、雅不欲婢直僨事、每有搏擊、飛章廷爭、未嘗不爲人先。公固曰：吾寧不與諸君子同其功、不願不與諸君子同其禍也。臺省詣閣請救、止廷杖、羣奄數百人咆哮、司禮不奉命、不得至。若等何爲？皆稍引去。京朝官奉詔乘馬、羣奄顧京營馬馳突爭道、公語京營嚴顧馬之禁、奄無所得、馬遂少戢矣。彰德進玉璽、將御門受賀、公執奏曰：宋誥

宗得璽、蔡確等爭言祥瑞、改年元符。其後朋黨煩興、宋祚不永。弘治十三年、陝西進玉璽、止命取進。祖宗成例、當法、不應踵襲宋事。其據經守正、援据切當、皆此類也。楊魏死、公爲位慟哭。是夕夢楊公告曰：大禍未解、公之與諸君子同禍。天爲之矣。又何尤哉。公沒之次年、子宗義詣閣訟寃。天子贈公太僕寺卿、祖父皆如其官。蔭一子入太學、立祠於邑之文昌閣前。慈谿馮公元颺與其弟元颺具特牲往拜。諸生馮文昌等數百人胥會祠下、溯河西東與魏公相望焉。於是宗義以己巳十一月廿五日葬公、又十餘年而以墓銘屬予。公娶某氏、封恭人。子五人、長卽宗義、次宗炎、宗燧、宗懷、葬在化安之新阡。予往識公長安、退而語人、黃公豐順廣額、長身山立、巋然福德大人也。公沒人或以恭子。在昔元季、有以南臺大夫抗節死、僞吳者、袁廷玉相之曰：公大貴人也。當秉忠致命、名垂後世。公必勉之。繇此言之、士大夫非具福德相、其能以忠義顯聞乎。予之相公、蓋未爲不驗也。銘曰：夷之初旦、明末周虹、蜺揚輝、蔽贅旒。天門訖蕩

叫莫繇一夫九首擇肉投。高冠長劔部黨儔。一
輩誓塞江河流。一擊不中恥下綈。衣冠血肉填
廁廡。艱難弘濟需巨舟。風顛纜弱拖不收。人謀
不遠輸鬼謀。長年三老空嘲啁。抗解同日自我
求。芳膏煎灼非我尤。天晶日光死何憂。幸哉不
從李范游。淋漓碧血悶一丘。蓀芳蘭茁天汝醅。
我銘其藏語不偷。丹青青史俱千秋。

錢謙益撰（牧齋初學集）卷五〇

黃忠端公傳

邵廷采

公名尊素字真長號白安紹興餘姚人性嚴介諸生時以經濟
名節自許持論操行卓犖不為苟同萬曆甲子四年成進士除平
陽府推官能治強宗以廉直稱天啓三年擢御史時廷奉魏忠賢
與保母家氏為對食專竊朝權用王體乾李實崔呈秀等為腹心
阮大鋮曹欽程楊維垣等司搏擊許顯純田爾耕等任爪牙又聽
大學士沈寯謀大開內樞震驚宮廷四年三月公因星變指陳時
政十失求云阿保重于趙姚禁掖近于唇末肅清之憂係于伏莽
遂求不戒將尋斧柯奉旨責其疏中有天下誰之天下語奪俸三
月未幾而汪文官之獄起文官者徽人本名守太以武學不第約
監入王安墓邵輔忠論劾下刑部徙三年更令名仍入監遇赦仍
定錄授中憲往來諸大老門頗驕蹇顧傑慨脫大義食都御史左
光斗吏部給事魏大中皆與遊時廷在久欲傾陷君子擬憲刑科
阮大鋮造謀大鋮乃遣吏部尚書趙南星書吏部陞轉請告者率
引人相代有頂首之語南星不知墮其欺毅然以為前漢堂碑上
疏曰吏部四司惟稽勲一人餘皆二人以稽勲事少故然今日之
稽勲定儲文選考功用如就近量推不拘資及即一省二人亦可
引陸光祖楊昌坤黃克念同邑同司例為下上從之遂調職方郎



中郎雖連為猶勉管外察而維漢與原任主事吳羽文並江西籍于是刑科傳挺論兩星連制并及光斗大中御史下文言招獄其後因之延夏羅織挺與大獄始禍也大中片低求殺于忠端公曰事急矣勿殺義士公即至北鎮撫司劉備所密計不竟其獄吏因此得寬忠賢怒以他事削傷用許顯紅代之六月左副都御史楊漣論忠賢二十四罪忠賢欲結輔臣韓爌為地爌嚴拒遂令魏廣微條言切責漣而溫慰忠賢自廣微顧乘機入關紫向高張半註籍干門杖殺即中萬燦又遠御史林汝業汝業恐先斃草奄手亡走詣遷化獄羣奄疑汝業關人向高臣之直入即寫獄罵坐索向高奏之亦置不問文言竟杖一百為民于是向高奏數十年不行之廷杖用之旬日定傷國體且自楊漣首劾衆朝聞然皇上誠欲保全忠賢莫若聽其自請且歸私第遠勢避嫌其于時禍亦福直俄頃耳山樛一事祖宗朝所無聚斂千兵甲于宮廷肘腋間休屬隱憂不聽向高燦于告去漣先斗皆削籍先是公從漣上疏言小人為惡至于情見勢極先時臺諫折之不足後恐干戈取之亦難及萬燦杖死又言廷杖之禁為廷杖者必曰祖制亦思後行之者何人耶二正之朝行之者王振劉瑾也嘉靖時行之者嚴嵩也萬曆時行之者張居正也曾見二祖宣孝之世有此事耶公深

斥謀計或羣小能不為己甚大中劾魏廣微公曰不可此小人之包羞者也大中不聽廣微遂決與正人救忠賢知劉備寬汪文言之獄其謀出公尤忌之五年二月遂與周采建李應昇等同劾籍去而後漣汪文言秋七月逮漣光斗大中下鎮撫司賜文言極其受然漣歸時文言不肯承顯仁乃自為憂書縋入定罪追贓酷掠皆死于獄六年三月復逮高攀龍周順昌及公先是五年冬三冬許言翻案以公為主用蘇材繼造太監李實為張永株連奄逆悉開之大恨判事至江南四策無影響刑部侍郎沈演欲自以為功奏記逆奄口亦有跡矣遂奄使人日趨訶李實取其印信空本填七君子姓名皆指為兵人而不知公越人也繼龍拜跪坐因池上命兵人周順昌脫殿後騎而縱騎之逮公者方泊齊門求供急榜笞驛官義士許爾成似祖一呼眾發擊焚其舟沈其柩于水有司捕獲出境杖杖問失駕帖竟不內去撫按逮公赴京與李應昇同就詔獄考身無完膚再考及公公仰首頓頭純曰吾忍見李君負病受楚辱乎顯純為之動容閏六月卒于獄前一日從吏告以內傳欲罷公上有語至寄家即于三木上賦詩南北向拜謝君親不及他事先後死瑯琊者十有七人召列兩朝忠烈祠碑而中書汪文言其懷賢不與焉莊烈帝登極贈公太僕寺卿謚忠端

子祭葬。廢子宗義入監。而封其父曰中如其官。妻姚氏封淑人。鄉黨榮之。曰中號鯤溪。通易春秋。與人言必原本經緯。忠端公之喪。得令弔之于達。鯤溪公曰。此卿弔也。明府以春秋起家。豈宜有此。一邑利害。他人不敢言者。公獨言之。有伍伯倚令勢。魚肉市民。公拔以治生帖。伍伯叩頭請死。令亦從此不敢近伍伯。逆黨尚書某使其僮僕越境追人。公呼僮僕杖之曰。吾非杖汝。聊以寄汝主耳。其疾惡如此。姚淑人上虞人。從忠端公在京。楊左諸公多夜過邸。需商於時事。竭累見。發謔句。悉錯酒器無失。侯魏大中尤數過。以小人陰謀相告。形之歎息。客去。輒迎謂公得無又有歎息事耶。從。急上書求代。每哭公至半絰。諸子前相慰解曰。無庸。第無忘大父粘壁書耳。藝起濟公于諸孫。出入處大書兩忘句。錢穀爾公守八。子于壁。諸子更教惕之。淑人亦哭。一生經術艱危。後三十年並遭亂離。播遷無定居。每以舊國存亡係念。康熙十九年卒。年八十七。子五人。宗義。宗炎。宗會。宗輔。宗彝。宗義自有傳。

贊曰、黃氏之系、出于潁州。漢相慶元不屈、厥支是延。法然慶元延
慶元之三子分地、建兵東發、發宋。名桂茂卿、茂卿。文茂
一居定海、為東、始復。東發發宋、名桂茂卿。文茂
兵革盛、主從學、學、以火其整、輝堂、避國、思效金忠、天造多奇、割
數于卿。賊請為臣、其欲效金忠伯川有詩、小野望、東河撫、
與叛同。賊請為臣、其欲效金忠伯川有詩、小野望、東河撫、

不先一領。伯川華天昭士平主考決而有行爲。咏他小行傳牛
 市必向共所之而。蕭散開。尤素卷生動。既東河要津。民無不子。不子入城
 立待其歸。始食。忠節之後。斯文之傳。知孫必昌。慰我對川。公大
 三品及封。七品死節。始起不符。休乃葬合。公言三品封祖。後必無
 封。得同文之獄。孰非錦歸。天壽其翁。善終不違。公言三品死。贈同考。取三
 原。碑峙孤山。六忠祠祀。越城具瞻。我遊竹浦。制赫斯怒。宛在其中。
 笑。白露。

（思復堂集）卷

陳文莊傳

公名仁錫字明卿南直長洲人父允堅以進士爲縣令有能聲卒于官公少有至性哀毀幾不欲生以祖父母在堂勉進漿粥侍祖父母疾衣不解帶經旬始一飯祖父母歿親營葬具手足重爾然亦未嘗釋卷時公已舉于鄉數上春官蕭然寒士也辛酉游西湖方與諸士啜茗較藝顧西北黑雲起愀然嘆曰吾萬曆所養士今一西矣四海遇害寸善莫施何勝詠爲及聞堯宗皇帝還升輶治裝北上泣別母前曰兒爲朝廷進士幾三十年雖未沾圭擢得優游色養詎不薄今朝廷重有大故邊疆多事諸孝廉莫足朝紳走家南婦兒當自溺風耳比至京師卽攜孝廉衣冠走定慶二陵哭甚哀聲達于殿或問曰先生是舉得毋過禮乎公曰吾世受恩愧不能及兩朝豎報情至義起何例之有是歲壬戌及第授編修偕庶常尙戶讀書禮樂兵農無不博涉屢乞終養不得居亡何丁內艱時魏瑞用事諸走徑廢貨漸多超其門者又文肅尙忠介諸賢謫逐相繼而天下方以官配爵爵之

事盡公公外示閑曠中實介然不可干撓既服闋請官每進講多所規正瑞甚銜之以公負重望不敢自絕會瑞父子給鉄券欲得誥詞再遣人趣公公不可瑞怒曰屬草則鉉鼎不屬草則齒劍奚擇乎公笑謝之數日遂有孫文勇之獄文勇以謁步天歌見捕坐妖言亂朝政軍詞連公及文文肅削籍瑞卽日就道瑞發十數騎偵公無所得至海上有吏受瑞旨掠公僅僕悉跳去公坐舟中忽風起發櫓櫓幾碎諸卒亦俱潰公夷然不動也毅宗登極起原官稍還中允典武閣出宣詔三韓肅油素記阮憲甚倚爲小異可出粟米也諸輟轉衣裘一壞謝之庚午陞國子監司業所教士修詞立誠道甚脩是秋克經筵諱官凡所敷陳皆本心得切時務不事訓詁辛未分典禮闈秋冊封周藩帝遂乞身甲戌三月起南祭酒亡何疾卒甲申贈禮部左侍郎于謚文莊所著有皇明世法錄四書語錄衍義補易簡錄經濟八編潛室集稿十餘卷行世子濟生官太僕丞懷奇貢璋以舉著述能世其家學云



論曰、吳郡著述之富、推余用司寇瑋、二子之義、
然文苑中南面王。公後百年、而萬卷、百載、與之彷彿、
何其盛也。然司寇所著論、雖足補國乘、其間風雲月
露、應酬筆札、酒食游戲、居其大半、視公經史史、抄
花討論、微而月宮天根、大而 祖功宗德、小而兵刑
禮樂、裨官野史、無不鑿鑿、如五穀濟飢、藥石伐病者
何如哉。雖用後來、居上可矣。

鄭清撰（許柏野乘）卷四

太傅兵部尚書呂忠節公神道碑銘

偉業待罪史館、獲交於宿儒大僚、仰見我神宗顯皇帝
制科得士、貽之子孫、以保乂王家。廼冠褐、脫流淪、胥其
掾。後生執筆、輒敢擬議老成、以吾所見聞、學術醇正、忠
孝完人、若江夏賀公、雒陽呂公者、斯可謂之無媿也已。
當思陵之季、此二公者、兩河去就、三楚安危、名藩乃磐
石之宗、元老實腹心之舊。身搢狂冠、家扞嚴疆、其効節
同瀛、雖橫經湖湘、講學心惟致命、道在成仁、既入水而
不濡、雖結纆而何懼。其畢志同、余欲訪求其軼事、而世
人罕有言之者。悲周哀郢之作、不可得而聞矣。今年呂
公之子兆琳、跡淮右、致書以公隧道之碑為請。嗚呼、呂
公之歿也、太常大書其官、博士詳誅其行、雖陳鄭皆災、
穀雉交鬪、而丹青垂於猶側、出於橫流劫火之中。今已
二十餘年、吾黨微柱下以遺編、訪長弘之青血、欲以弔
北邙而備南史、不亦傷乎。此吾所以撫公家乘、嘆窮而
繼之以泣也。呂氏宋文穆公之後、河南之新安人。祖諱



鄉父諱孔學，皆以公貴，贈如其官。祖執牛氏守節，而孔學稱仁孝，詔書兩旌其門。妣孟淑人夢月入懷，生公。公諱維祺，字介孺，別號豫石。萬曆癸丑進士，位至南京兵部尚書。居雒陽，抗節死寇難。事聞，賜祭葬，贈太子少保，再贈太傅，謚忠節。其所歷官，初除山東兗州推官，舉最入吏部，更主事者四司，為員外於考功，於文選而驗封，遷郎中。熹宗朝，以前乞省，換補考功郎，逆璫矯旨弗用。思陵更化，起家尚書司卿，改太常寺，以少卿管四譯館，尋陟為正，陞南京戶部侍郎，領糧儲，超拜兵部尚書，中糾拾以免公死難。在國史，其餘服官立政，講學著書，他事多可紀，而最著者有三。曰持大議，裕大命，立大經。光廟上賓，請見嗣君於慈慶宮門中，貴導駕，幸小南城，抗言梓宮在殯，大寶未登，不宜動屬車，輕萬乘。正色當階，仗出中止。再疏調護起居，戒近習不宜干政，請選侍移宮，按問諸醫侍疾無狀，持大議也。南司展既多通賊，無北部之所咨借不貲，以出入本折多寡鈎考不及額者

百二十萬有奇，即舉郡邑負課算之以當經費，尚虧十有九萬。京軍旬旬索餉，憂在根本。公題疏十事二十四弊以聞於朝，其不得已者，請以上命填補，次與其屬講求區畫，定期會之，今以趣辦除導行之費以勸懲有司。累息奸吏斂手。又以國府乃國息之本，為之禁放銷清雜而專行法錢，權其子母以瞻用。行之三年，累積如坻，貨流如泉，裕大命也。馮恭定之於關西，郝忠介之於江右，曹自梁之於晉中，同時講學，公則以門推篤行，居近先儒即鄭氏之禮堂，寫曾子之家策，著孝經本義大全，或問三十餘卷，表獻諸朝，請以之進經筵，端蒙教頒，諸學宮為永法。芝生於庭十有八莖，如顏本篇目之數。建芝泉書院，用彰厥瑞，立大經也。斯三者皆公經世猷略，為學本原，視夷險為同歸，通死生於一致，故能處患難蹈白刃而無所悔也。嗚呼！若我公者，豈偶然哉？公之為南司馬辦賊也，上完江淮，中顧宛雒，家國綽有成算，既免歸，寇禍大作，新安城庫土惡，災螟洊青，窮民極負，無

歸公乃調穀以賑凶飢、捐金而就板築。父仁孝公實贊成之。曰：「天下方亂，吾父子幸有餘祿，可賙鄉里，庸足多者。」當事者主撫議，見河汝蕭條，請斥空城以綏徠。新附公則謂腹心要害，勢難養虎，移書力爭。事乃中寢。土寇王之典桀黠反覆，公不動聲色，微而戮之餘黨，莫敢動者。戊寅秋，李自成敗於潼關，已而復振，蹂宜陽，躡永寧，熊耳以西，屠屯壁以十數。雒陽震恐，福邸在城中，積金錢綵物累鉅萬，謹錄舊牘，不問賊。援兵之過者，糗糒悉投之地。詢曰：「王家擁金貲，厭梁肉，而令吾輩枵腹死寇乎？」公聞而憂之，具以大計動王。王弗省。明年正月，賊侵逼河南，總兵王紹禹堅以其兵入城。公門於北，紹禹門於西，副將羅岱之兵背西門而舍。詭云逐賊，實迎之。迺而合圍，勢張甚，守陴者無人色。公疾呼，家將絕下，鬪殺十數人。賊再用羅軍礮具來攻，公積眉戟張坐城頭，叱左右弓弩亂發，賊多死。紹禹之兵視而嘻，道上竊竊耳語，旦暮以城下賊，燕王府而分之羅軍，招與同叛。或得

其語告公，且勸之去。公歎曰：「我向固憂之，今事已去矣，計安出？雖然，雒陽重地，王神祖愛子，猶有神靈，此城必全。萬一蹉跌，吾奉身以死之，臨難苟免，豈儒者事耶？」越日，王紹禹之兵果夜揮刀殺守者，懸布於堞，賊衆之上城陷。公北向慟哭，子弟牽衣請避賊。公曰：「我一死以上谷所受內副所學於義得矣，去將何之？天明，賊大至，有起於賊中者曰：『公非厭饑，呂尚書耶？我能活公，可乘間去。』公弗動。其衆擁以下，遇福王於道，已反接。公奮其首顧王曰：『王綱常至重，等死耳，毋誑於賊，辱國體。』賊渠見公於周公廟，曰：『呂尚書日請兵餉殺我曹，今定何如耶？』公瞋目罵曰：『吾天子大臣，恨無兵以磔汝狗鼠。』今日之事，惟有死耳。死不愧天地，不愧聖賢，復何憾？賊梓之地，欲屈之。公叱曰：『吾君在北，北向再拜，又西向拜父母，申脰就刃，容色自若。』是日也，福王亦遇害。嗚呼！吾觀雒陽之亡，公之死於王室荒枯之際，惘乎有餘痛焉。神祖在宥日久，天府之藏不可以辜技宮省舊史皆云：鄭貴妃



緣愛子之故、斥大半辦治國裝、再撥莊田二萬頃、鹽引數千綱、收其贏以滋封殖、他王莫埒。自中原用兵、思陵封椿、置趾、推光廟天顯之愛、不忍以憂叔父、掌計老臣如呂公者、身在雒陽、熟知王宮緡錢藏鏹、小發取其中、可充軍興之半、號咷叫呼、懼傷親親之恩、迴屏人極論、開曉禍福、王亦但領之而已。捐私橐、出家糧、譬之捧土堙河、萬分何濟。老臣不惜以身率眾、冀幸王聞之寤、自輸以佐縣官、而緡膝局縮、卒棄之克徒悍卒之手。此公聞國言籍籍、拊膺嚔指而歎王之失其會也。孝經之三章不云乎、高而不危、所以長守貴也。滿而不溢、所以長守富也。保社稷和民人、是為諸侯之孝。漢文帝四子、梁最親。王實太后少子、居天下膏腴地、珠玉寶器多於京師、以史攷之、亦可謂之驕且溢矣。七國作難、王恐上憂太后、日夜泣、梁將士力戰、吳楚不敢過而西。王之歿也、得謚曰孝。今夫神祖之所以愛王且厚王者、樹億萬年維城之助也。天下有急、王屬尊地近、能為宗室倡首、蓋

當有聞而應者、社稷安則王安、兩宮在天之靈罔不安矣。斯非諸侯之孝乎。當自成之敗、潼關所餘不過數十騎。雒陽之變、繇於內潰、彼非能肉薄而攻也。克東都、據形勝、發王中府金以號召饑民、一朝響應百萬、華夏因之土崩。若使早從公言、天下事必不至此。喪亂方多、吾謀不用、痛宗周之板蕩、感大道之銷沉、公於是灑熱血以澆孤城、抱殘經而覲三后、講舍則芝焚可歎、故宮則麥秀堪哀。天實為之、公其如天何哉。公攷正六書、多所論著、他文及奏議、無慮數百卷。晚年乃著存古十二篇、士戒七則、其說歸乎敦本訓俗、下至肴核衣履之微、事為之制、人或疑公宜濶達濟變、而規規小節、得無非其急者。余則謂數十年來、士大夫極滋味、盛倡樂以自奉、子弟儻從通倪放橫、侵枉小民、故螟蛉特蠹賊、殺戮姦軌、相因而起。公此書所以塞亂源而消害氣、謂之拯世可也。而豈區區者乎。公司李兗州、曉文法、識利病、折獄多所平反、定保甲法、蓮妖之變、賴以無恐。駁歷銓曹、公廩

不受私謁。釐正選簿。年稽月攷。周忠介聯事郎署。嘗亟稱之。獨堂官忤政府。據故事以面折臺諫。侃侃克舉其職。修南都二十六倉五塲。清屯糧八十八萬。汰冗軍。補脫卒。募趨敢之士。簡其樓船甲仗。自采石至瓜步。為江防。蓋公之為人。內服儒宗。外精吏職。其言行本之鄒魯。而間出於范蠡之治越。管子之治齊。精強廉辦。自許為有用之學。不獨一經專門已也。南侍郎陞辭。上目而偉之。既受事。得所上章。皆精切於職掌。一無骫骳。上以此切責前計臣。而見公分憂辦職。公亦謂得行其志。盡力以自効於上。言者乃撫他事中。公既畏惡其能。人皆數廢數起。公獨一跌不復退。居嵩山之陽者七年。以邈世無悶為學。不欲與世之君子競其短長。然自以遭不世之知。顧用毀去。每生徒擁卷。父老登陴之日。其中有不合然者。故沒身卒以忠顯。嗟乎。千載而下。可以知公心矣。余以詞林後進。識賀公。公弔弔謹厚。未為通人所許。然不失為醇儒。以理學多所講貫。今散佚弗傳。武昌之

變。楚王委國儲百萬以資賊。與雒陽事相類。故牽連書之。呂公仕宦參錯。余未及見。然在南中時。遊公豐芑書院。諸生多稱之。流寇從涇池初渡。淮泗晏然。呂大司馬首以鳳陵單外為憂。勸上宿重兵為衛。人皆服其先見。又雒陽未破。苦言以借箸。福邸而終不顯其謀。賊去之後。雒人士避亂渡江。頗有言其事者。余籍而記之。二十年矣。今呂公之子兆璜知解州。而兆琳成進士。於故家遺老訪購公之遺文。淮安守吾友張公藍。獨寶公之塔手自警校。刻之於淮上。余既受而卒讀。江村寒夜。從廢簾敗紙中。追理舊聞。補公家傳所不載。庶於國家存亡大故。後人知所攷估。非為公一人已也。公論瑩在新安之某原。以郭夫人祔。其月日譜系。茲不載。載其大者。余以公在祀典。配啓宗。作家廟。諸生雅吹擊磬。登歌進酒。是不可以無辭。乃系之以詩曰。巖巖兮孔宮。漆經將出兮壞壁生鏽。我公其來兮章甫。以從奕奕兮周廟。鷄鳴鼓室兮弁斯載道。我公其死兮

四國是悼。滌埃風兮上征。御旗嶺兮王孫。謁我后兮天
門。執羈勒兮微臣。瞻虎妃兮在旁。撫愛子兮沾巾。辭九
閭兮心惻。降周覽兮下國。骨藉藉兮無人。掛宮牆兮叢
棘。噫嘻。曾與閔其不見兮。寒吾法夫仲縣。苟髮膚之罔
愧兮。知父母終不我尤。位鷹揚之苗裔兮。功不遂乎營
丘。庶斯文之弗墜兮。吾奚負於宗周。甘芝蘭之萎絕兮。
忍化此蕭艾也。卷靈泉之消潔兮。雖抱石其何悔也。重
曰。鼓填填兮血輪困。巫陽下招兮陰房青。北邙巖岌兮
碑出雲。綫余馬兮河之滸。酹椒漿兮進蘭脯。刻貞珉兮
誓終古。

吳偉業撰 〔梅村集〕卷三〇



儒藏

明儒碑傳集卷九十八

華允誠 顧天錫 顧景星

華鳳超先生傳

先生諱允誠字汝立無錫人。舉天啓二年進士。歸而受學鄉先輩高忠憲公攀龍之門。踰一年。從忠憲公北上。授工部都水司主事。是時魏忠賢與閣臣魏廣微等亂政。方欲盡誅逐東林黨人。凡士大夫爲世指名者悉謫黨中。先生將草疏以爭。忠憲公力止之。會楊忠烈公建以疏劾忠賢得罪。忠憲公與諸賢相次去位。先生遂請告以歸。崇禎二年。赴補營繕司監督琉璃廠。減經費銀數萬兩。以繕城工。南御史疏薦天下清官四人。首列先生姓名。衆以爲允久之。擢兵部職方司員外郎。協贊郎中事。於是溫體仁在內閣。閔洪學在吏部。兩人相表裏。謀翻故時所定逆案。一切是非進退俱不厭衆望。先生憤然曰。去河北賊易。去朝中朋黨難。吾非以養母引退。即當死職。官下耳。先上母老乞休疏。不許。遂直陳三大可惜。四大可憂。數千言。其末謂。次輔與家臣以同邑爲朋比。吏部惟阿閣臣之意。造門請命。晝夜爲常。加膝墮淵。惟其所欲。甚至此同鄉則逆黨可因事保舉。排正類則講官可借題通逐。皇上惡諸臣之欺欺莫大於此。怒諸臣之專專莫甚於此。厭諸臣之黨黨莫固於此。威福下移而舉錯倒置。臣竊寒心。疏上。凡再奉旨詰責。先生遂發洪學冒功冒蔭諸微言益侃侃不阿。且謂喪師辱國之王化貞。何以不正法也。察已愛民之余大成。何以不矜恤也。唐世濟之黨。護逃臣。何以驟得美官也。劉宗周之孤忠自立。何以不登啓事也。時體仁方擅寵中朝。見先生疏者悉爲危之。先生亦自分禍及。然帝意頗悟。僅奪俸半年。是後釋大成誅化貞而逐洪學。最後世濟下獄。體仁亦竟罷去。詔如先生言。其年竟以終養告歸。歸十二年而弘光主即位於南京。始調吏部文選司員外郎。尋改驗封。到署

南十有三日。復引疾歸。凡通籍二十餘年。立朝不滿五載。其剛方蓋天性也。中間疏爭者率國家大計。而訖未究其用。知先生者惜之。自諸生時。讀忠憲公心性靜坐諸說。即深信不疑。及從公游。造詣益深遠。公既歿。先生發明高氏之學。歸然稱東南大儒。蓋忠憲公之後一人而已。平時閉門家居。有司罕識其面。尤爲巡撫都御史張公國維。巡按御史祁公彪佳所重。每先生至吳門。兩公必先造舟虛心咨訪焉。先是周延儒再召。過無錫。迂道詣先生門。且屬其私人傳語。許以殊擢。及在南京。馬士英亦詣門。如延儒然。先生俱不報謝也。先生嘗論經有曰。易者聖人之體。春秋者聖人之用。又論爲學曰。居謹。歟之時。常自收歛。常自鎮靜。處閑。宋之地。常自震懷。常自生發。其所得蓋如此。本朝順治五年。避地鄒氏鎮。標兵猝至。先生以不難髮被執。送抵江寧。諸滿漢官咸集。竝以緩言款先生。先生植立南向。舉手曰。二祖列宗神靈在上。允誠髮不可去。身不可降。乃遇害。年六十有一。是日天大雷電。晦冥風雨驟至。父老見者相語曰。此不要錢華吏部也。無不歎息泣下。從孫尚灝從先生死。僕薛成聞先生執長慟不食。先一日死。僕朱孝聞訃亦號哭立死。十五年。縣人作神主。附東林道南祠。學者因先生自號尊之曰鳳超先生。

前史氏曰。予聞先生之當鼎革也。間指頭上髮歎曰。留此必費禍。然吾食祿先朝。去之無以見故主地下。此其定志久矣。嗟乎。忠憲公授命於前。先生又仗節於後。所遭之變雖殊。而就義則一也。不負所學。誠哉。是師是弟子云。

顧天錫傳 子景星

顧天錫字重光。祖闕。父大訓。自有傳。天錫生十歲。從祖
關山居。讀書穎悟。十五治尚書。十八治春秋。二十一治
禮。督學華亭。董其昌深鑒賞之。萬曆癸丑。闕卒。哀經處
別廢者三年。與太倉張溥。金壇張明弼。東鄉艾南英。臨
川陳際泰。羅萬藻。章世純。萬時華。聲氣遙集。倡爲古學。
值遼東事變。佗僚鬱悵。脫略縱酒。或以粉塗面。走林莽
間。挽拍吟歌。悲來泣下。或束書泛舟。孤往獨月。忘歸。癸
亥。改國子生。對策及奄寺。主司大恐。落其名。監生曹某
請生祀魏忠賢於太學。強以署名。天錫投筆徑去。客居
保定。值莊烈帝卽位。監生錢嘉徵袖疏密示曰。急署名。
上將誅奄。此必得當。天錫謝曰。某歸不徇曹君之非。今
豈敢分君之是邪。太僕米萬鍾館之海站。課其子弟。過
永平。登陽山。置酒望東北。雲氣如五色綵絲。成龍虎文。
天錫歎曰。王者氣也。酒酣長歌。悲壯激越。時太白經午。
雨土。故鄉地震。釜底皆有篆文。有鄉民四歲兒。一夜髮
番僧狀。楓樹生花如蓮。江上雷震一物。魚身牛首。青山
鄉民水漲。汲滿立涸。漩渦作聲。城東李氏地中有聲如
牛。天錫方轉徙天津河間。以詩禮教授。弟子凡數百人。
遠近稱顧夫子。五試太學。再登乙榜。所指授爲制舉文。

學者多用以售。及門或登館局。臺省。而天錫卒不遇。以
積分詣部。當除知縣。不就。詔徵辟。特用人才。不應。丁丑。
出都。漳浦黃道周歎曰。劉向南矣。遂由齊得河淮。作河
淮江三策。歸築嵩園。盡出先世遺書。教子景星。蒐釐攻
辨。無間寒暑。夜必聞雞。深究漢劉向氏學。用洪範五行。
皇極經世。推明天人。儆戒後世。著戒史七十卷。大旨以
謂劉向用五事配五行。說本夏侯氏與天文五星樂律
之書。貌屬水。言屬火。視屬木。聽屬金。思屬土。劉氏從而
行之。宋儒疑九疇本九則。詆譏劉氏。並疑雉圖。蓋劉意
深。特其說未盡合耳。繕一水二火三木四金五土一貌
二言三視四聽五思。曰雨曰暘曰燠曰寒曰風。何以言
之。升降俯仰。血氣也。胚胎血氣之本也。故貌從水。雨水
也。正月坎九五始雨水。九月天根見。雨止。水始涸。貌恭
血氣和。則休徵。時雨。不恭則狂。狂則咎徵。恒雨。水失德。
汎濫淫佚。故爲大水。爲不潤下。地忽變甘鹹。或涌溢飛
圖。皆不潤下也。潛伏爲介。故爲介蟲之孽。魚水族也。故
爲魚孽。鼠水屬也。性陰賊。故爲鼠妖。禾黑色。善下。故爲
禾厥。服制所以飭貌。貌不恭。故爲服妖。支離淫亂。故爲
下體生上之瘡。其應爲僞爲姦。狂之謂也。凡物不當上
而上者。皆是也。水色墨。故爲黑青黑祥。雪白。內生。祥祥。



儒藏

外致也。坎爲隱伏，爲加憂，故爲恒陰，爲夜妖。惟水沍木，沍金沍土。凡我沍彼，其咎在我不在彼也。聲成言，言成文，明離象也。故言從火，離爲日，爲電，故陽火德也。言從則休微，時暘不從則僭，僭則咎微，恒暘雨少陰之氣，金德主順也，僭則不順，火來乘金，是爲燥金，故不雨也。火失其性，則不炎上。凡火光轉行，火不熱，蒸襲不烈，微火噴噴，皆不炎上也。天見隕火，不爲不炎上，何也？天火炎下，地火炎上，天火太陽也，地火雲雷木石金水土之火也。故地見流火爲陰火，爲不炎上，天見殞火，不爲不炎上也。不爲不炎上，故但爲赤祥也。飛陽就燥爲羽，故爲羽蟲之孽。雞羽屬赤色爲正，故爲雞獸。蝗介而羽，離象陰驕陽亢，是生蝗孽，亦爲火沍水。馬火屬也，火氣逸，故爲馬獸。火藏發竅於口舌，故爲口舌之疴，爲詩妖，爲詭言，災或爲妖，則諸譴興也。離爲乾，爲大腹，爲孽，爲烈，故爲鼓妖。凡物不當聲而聲，皆曰鼓妖也。火色赤，故爲赤祥。惟火沍水，沍金沍土，東方震，震來虩虩，故禍屬木。木藏發竅於目，故爲目疴。於時爲春煥，則蠶蟲啟，草木茂，視明則休微，時煥不明則僭。僭者之行猶僭也。豫則咎微，恒煥凡無冰無雪，霜不殺草，冬溫桃李冬華，冬不電而雷，冬春雷，春無雷，春不風雨，春秋大熱，秋旱復

禁，恒陽亂生，皆恒煥也。亦木沍水，少陽之氣所泄也。爲木不曲直，連理倒生，易種，皆不曲直也。爲草妖，木類也。曲直爲龍蛇，故爲龍蛇之孽。艮爲狗，艮東北，方少陽之位，素問曰：春木令，其畜狗。狗蒼色爲正，故爲狗獸。木色青，故爲青畜，青祥。惟木沍水，沍火，沍金，沍土，金主聾，聾主聽，聽主耳，耳屬水。金水清寒，則耳中空，空則聰，聰則休微，時寒不聰，厥咎急如聾者，禍急自信也。急則咎微，恒寒，金主殺伐，殺伐過肅，故恒寒也。爲金不從革，金自成敗，不聽陶冶也。爲耳病，耳聽官也。西方兌，兌爲羊，故爲羊獸。羊白色爲正也。金通氣，爲毫毛，故爲毛蟲之孽。爲虎妖。金色白，故爲白虎，白祥。惟金沍水，沍火，沍木，沍土，五行宅中爲土，五藏宅中爲心，心之官則思，思審則休微，時風，風土氣之發，思之象也。不容則蒙，蒙則咎微，恒風，甚則輶弱矣，爲不稼穡。不稼穡者，不早潦而百穀草木不實也。凡石麴聖米，野麥穉穀，稗草化稻，稻化稗，草野蠶成蠶，地中得米穀，皆不稼也。爲雨土，不風不霧，而塲塲埽埽然而著於物也。爲虹沍，土氣淫泄，陰陽亂合也。爲瘟疫，火土交厲也。爲人疴，萬物惟人善思，其爲疴也，爲民多癩，多狂悖，多暴厥，死復生，生異形，男化女，女化男，男女具體，童子暴長是也。爲蠱蠱之孽，蠱類也。



爲孽男女媾精草木孳榮國有 爲華妖乃生爲心腹
之病。爲果蔬之孽果蔬仁慈象人心也。爲牛馬牛大心
而少慮者也。土色黃故爲黃帝黃祥。惟土沴木沴水沴
火沴金土宅中而寄王失德則厭沴歸之。故惟水火金
木沴土災之大至焉矣。王者有震德則不爲災。周易曰
震無咎者存乎悔。因衍五行交沴爲二十五類列以爲
圖。一六曰水爲親爲後宮爲庶謀爲禮官。二七曰火爲
言爲外戚爲庶官爲吏官。三八曰木爲親爲相爲庶民
爲工官。四九曰金爲親爲將爲兵刑官。五十曰土爲思
爲君爲庶事爲戶官。擴劉氏說而詳焉。崇禎己卯明太
祖孝陵蝦蟆石樹災。五月家園古樟災。筮之得旅之小
過。曰異哉。是爲烏焚其巢飛鳥離之凶。與漢河平元年
歲災其巢占同。先是乙亥流賊初渡河知州築關城名
曰符乾。天錫曰嘻其轉言爲乾符王仙芝陷淮南之年
也。新淮南地也。癸未之變賊由符乾闖入遂屠嘶城。天
錫爲世子遣左良玉督良王得書泣歛軍還屯武昌。天
錫辭世子南下歸祖籍崑山祖居甲申順治元年故明
福王監國南京改元宏光。術者言光者盡也。天錫曰異
哉是爲言不從。昔漢元帝建元竟寧時以爲終極。曹丕
禪位關澤以爲不十。齊天保爲大人只十。隋廣運爲軍

走大業爲苦末元至正爲一止。言之不從應亦隨之。又
言本朝前後禮臣不學年就有可異者前涼張重華五
代張遇賢宋賊方臘皆號永樂。夏王李乾順號正德西
魏孝武號泰昌。五代史契丹兀欲號天順皇帝金大安
三年山東賊楊安兒元泰定帝子阿速吉八皆號天順
齊立後梁永嘉王莊爲梁帝改元天啟。唐僞漢世隆號
天啟何其沓歟。因著政元考分正統僞盜賊外域凡
八卷。乙酉南京禮部失印。天錫曰嗚乎天戒若曰無用
禮也。禮失喪無日矣。筮之殫思終日因爲禮廢二章述
寇亂慨當時一章曰五沴始今災殫震牛首兮江干著
雍單闕兮人病四齡暴長兮更喘肅殺宵兮亥氣食戾
土坎兮木先僭奧亢兮隆蟲胸腹兮土童江汜兮蜚鴻
既既悉兮時運極神靈怒兮鬼夜泣雷填填兮雪霰集
長矢挾兮短兵接崇墉墮兮震羈絏匪夜明兮天紳帶
朝蟻兮追泐屍覆兮牙搜負髮烈兮異類服至艱渡兮
胡之屋遺黎何辜兮名洗巢元顏烝敵兮江之阜漫江
許兮迢遙頭白厓兮干臘罪霧兮沈瘞藹藹兮自穀音
卷局芳華兮辨綺難切悲風第兮可奈何進屯屯兮
退漫漫岫森連蹇兮難以久延蜩蟬螻蛄兮蟬播碧
唐二章曰郵傳兮遲遲仄望兮馳驅年遠逝兮世不治

全躬浴德兮忠孝維倪。奮身名後兮道有固然。策策爲
愁兮奮奮爲賢。促促既以偏即兮。弔機槍之指茲。悠世
莫予知兮。爰謬喻於亂詞。亂曰。歟。歟。后育兮。莫八百之
不基。禍崩厓溺兮。何革命之斯須。赤烏脫夫駿馬兮。五
馬歸於一龍。占厥遲於闕遲兮。慮二僕之旃蒙。謝鳴夷
於東門兮。泊平吾將易從。右帶留江南八年。舉子景星
歸。薪結茅爲廬。年僕。柏葉飲水。歷數月不病。環堵無
門。石爲几榻。既脫著書。十年石稜盡滅。撰書具於後序。
天錫少孤。鞠養於姊。即其姊妻事姊如嚴父焉。姊卒。赴
闕。自投牀下。以爪撈面。流血沾衣。祖父母。父母。姊忌辰。
長跽移日。至老不衰。天錫抗爽好罵。然不暴人短。不發
人私隱。有族父無嗣。分遺百緡。罵曰。吾豈以父無嗣爲
利哉。卽取以周貧族。有族子貧。自鬻身。罵之。賈衣賂歸。
而分之。田出都。有友寄金帛數千段。密託他所。歲餘還。
都。或告曰。某怨君。天錫罵之。及指物往取。封識如故。康
熙癸卯卒。年七十五。子景星。

景星字亦方。一字黃公。生時父夢星降於庭。形如半月。
因名景星。三歲不語。一日忽語。稱彌月及前生事甚悉。
五歲值葬大父。哭踊如成人。歲饑。荆王命有司元夕張
燈。象人衣以彩襦。俾往觀。卽蹙然曰。何不以此賑飢。遂
不往。六歲能賦詩。八九歲。獨讀經史。日數行下。時稱聖
童。有詩文一囊。束髮就府試。合肥興鼎華爲薪水。一

見卽曰。江夏黃童。天下無雙。薦於知府。試風簫下。立草
十數。日未戾也。知府驚異。與論古今。歎曰。此王佐才
也。拔冠屬第一。督學試亦第一。已卯。鄉試中副榜。旋丁
母憂。時饑疫相仍。寇氛四熾。張獻忠等蟠結旁邑。日伺
薪城。先是總督熊文燦舉獻忠等十餘營降賊。過蕪。荆
王止賊首飲。令走馬後宮。與龍姬同觀。景星年方十六。
急謁知州曰。熊公不得死所矣。獻忠於諸賊最黠。不早
除之。必貽後患。奈何。既不爲備。反令此輩得窺王宮。知
州色變。勒技勇入衛。周旋竟日而罷。明年獻忠果叛。癸
未屠蕪。戮王相。虜其龍姬。天錫父子避亂崑山。依族氏
居。甲申。鼎革。福王監國南京。試七省流寓生貢。御史陳
夏鼎舉景星第一。武英殿廷試。特授推官。隨上疏敬陳
四事。一曰。車駕宜駐淮。以張國勢。陛下承運。卽位南都。
海內仰戴。爲神人主。然以先帝臨之。則陛下臣也。三月
之變。背契以來。所未有。臣子義不共天。聞內外義師合
起。已破賊關中。爲先帝復讐。而江南不聞出一旅。加一
矢。將來何辭以對義師乎。況今死賊遺魂。苟存旦夕。非
如前日豬突狼戾。不可制也。其逃入楚境者。鵠面裹創。
掠野剝食。不遑寧南。侯偏裨力可奮勦。臣竊謂陛下宜
駐蹕於淮。大集將吏。蒐練補卒。誓討賊。而實不動。降
良玉璽書。懸厚賞。使大江之中。羽節相望。牛酒日至。獻
誠執俘。內鼓軍懷。外借聲援。用兵大計。無違此者。豈可



坐失機會、以阻海內忠義之心。夫人情孰不惡勞喜逸、然堅於圖功、勇於改過、故棄庸眾之情而後、可成非常之功。昔晉公子重耳出亡、過齊、桓公妻以宗女、有馬二十乘、公子安之、無返國意。趙衰咎犯乃醉公子而載以行。漢高入咸陽、封秦苑、府庫、還軍霸上、故重耳卒伯諸侯、而漢高奄有天下。陛下自五月即位以來、安居宮禁、將謂萬乘至尊、不宜輕動、而長江天塹、恃以無虞乎。臣前於七月初十日、仰見禮部恭上武英殿御座、見時天氣晴朗、忽有黑雲自西北來、森風堀堀、霹靂聲碎、大中橋居民屋瓦震斃二人。蓋天警陛下、欲陛下號令征伐、如天之有風雷也。八月丙辰朔日、食張十一度五十七秒、分野爲中州、陛下龍潛之地。天之示警、亦云甚矣。伏望陛下念已往之失、圖將來之成、翠華一幸、中外改觀。其二曰、宜罷大工等役。高皇帝定鼎應天、闕廷制度、雖峨壯麗、誠使後世無有復加。陛下龍飛武英、乾清、首行修葺、其餘宮殿、宜在所緩。而大工繁興、耗散軍餉、臣竊以謂不可。當國恥未雪、正陛下臥薪嘗膽之時、而非修未央宮之日也。臣前廷試時、見匠作數百從東華門入、每十人執一小旗爲小隊、百人一大旗爲大隊、自日出行、已刻乃盡。須臾之間、轟應築創、噓嘆邪許、聞於國

中。曾不三時、復引隊出、自日入行、黃昏乃盡。臣竊大懼。夫雜作之徒、多四方乞丐、工部備僱而來、無賴子弟、妄行保結。今通寇未殲、輦轂之下、尙多反側、設此輩有覲、謁宮門、筦鑰者、陛下將何以制之乎。且遠近聞之、必謂陛下安江南、無恢復意、尤非所以風動觀聽。三曰、宜停大昏禮。夫大昏萬世之嗣也、以承宗廟、母俟天下、顧不重乎。故訪德而後聘、六禮而後備、衰冕而後迎、廟見而後正位。蓋慎之又慎也。陛下自五月登極、七月即敕禮部選在京內外良家子、送掖廷親選。民間訛傳、中貴且出都城、盤淮揚、不問門第少壯、爭相嫁娶。以近傳遠、將謂陛下何如主乎。且陛下大典所關、不更有急於此者。海內義士枕戈待命、義不顧家、此令一行、眾必解體。況今宮中給侍有人、御物粗備、陛下自謂較龍潛時何如、較五六月時又何如也。昔孫權以妹嫁昭烈、作珍珠步幃、欲驕昭烈、昭烈卒不留意。竟取韓鉤、銅鑄錢以充國用。唐太宗時、隋通事舍人鄭仁基女、容色絕世、文德皇后聘爲充華。魏徵言女已許人、太宗大驚、廷臣或言未字、太宗竟從徵。諫深自刻責、以女還鄭。陛下聰明勇斷、遠邁前古、臣下不能仰體、致此謠傳、風聞一播、奈陛下何。且陛下今日丁先帝之變、則在喪禮。國方用兵、則在

軍旅軍喪之中皆無昏禮。願陛下熟思之。四曰斟酌將相。勢有內外。權有重輕。臣輕君重則宜外重。君輕臣重則宜內重。漢文帝於周亞夫是也。內重。唐肅宗於藩鎮是也。今不可不內重明矣。臣竊見興平伯高傑等各擁外重之勢。而閣臣史可法出鎮揚州。分損奉祿以養賓客。步兵不滿二千。據吏幾於百六。日與傑等議餉和事。易曰。剝牀以膚。又曰。履霜。堅冰至。陛下謂諸鎮之力。僅能迫脅一宰相而已乎。此外重之弊也。臣愚謂興平伯寧南侯宜稍稍調遣。宋南渡諸將各雄視。汪藻疏言。劉光世距賊數十里。若不相知。儼然宴飲。張俊自明州引兵至溫。道路一空。韓世忠掃鎮江儲資。盡裝海船。焚城郭。爲逃遁計。至秀州放兵四掠。執縛縣宰以取錢糧。宸翰召之三四而不至。元夕取民間子女。張燈高會。用古法皆常誅之。不可盡誅也。莫若擇有威望一人。盡護其軍。雖朝廷親軍亦聽節制。據藻所言。張韓所爲略同今日。然史稱南宋功臣必曰張韓劉岳。何者。待之得術。節制得宜也。劉光世屯鎮江池州太平。韓世忠屯湖北武昌九江江陰。岳飛屯湖南宜興。蔣山位雖藩鎮。聽調立功。將無分疆。兵不戀土。爭地之患。何繇而生。臣故謂宜如汪藻計。委重相權。相重則內重。當令何

者一軍。俾可法自將。與諸將犄角。相宜應接。韓信稱漢高善於將將。陛下正將將之時矣。且今江北諸將反戈鬭爭。非維揚一城乎。陛下誠能縣揚駐淮。署立行殿。是陛下六飛清蹕之地。孰敢復爭。太阿指揮。移屯進取。孰敢不服。離如晨星。聯若首尾。孰敢復離。所謂將將。莫如此也。詞指愷切。通政抑不敢上。又代太學生上閣部書。議大行廟號。馬士英使人密招附已。景星力卻去。游黃山白嶽。歸言時事。痛哭失聲。因浮家嚴湖。爲長隱計。大清兵既下崑山。多羅貝勒土賴固山額真強致軍中。命以原職隨征。景星力辭。養親還里。荷若幅巾錦襜。酒漿自全。已而奉父歸。薪結茅舊舍。若述爲賦。歲大歉。糴糴不具。鄰里意自得也。景星絕意仕進。而當事或詢以民生國計。則未嘗不爲愷切敷陳。兵荒之後。田里經界不明。而清量滋擾。因與當道書曰。丈量荒田。因官病里長隱匿。履畝清弊。愚民躍然稱善。及官役下鄉。又聞言不便。何也。鄉路寫遠。有一日二日三日之程。派書弓手衙役供給紙價。賄賂需索不一。今歲大旱。鰥寡茆糶。略盡。所以無大殍死者。則戶口少。新畬未起。稅故耳。一旦丈量。費將安出。況荒田半在荊棘虎狼中。自古開國荒田多行蠲免。招徠墾闢。漸增富強。卽以近代言之。宋



有天下、當五代大亂之餘、至景德凡四十餘年、天下賦租田纔一百七十萬頃、又七十餘年爲元豐、始有四百六十萬頃、外此仍多、租賦所不加、神宗用呂惠卿手實法、郵箱抗疏、不三月而罷、理宗令州郡排定保甲、戶稅丞相謝方叔力爭得罷、元既得朱、命諸路達魯花赤勸誘開墾、阿合馬謂江南稅不實、宜蠲世祖處髮民而止、延祐初、章闡言熟田隱匿、宜令按實數、年民不聊生、盜賊蠭起、縣是觀之、利害瞭然可見、洪武二十八年、令新開田地不起科、所以勸墾闢也、頃者大軍饑饉連年、藉口攤賠、在在揭竿、丈量一行、必加急迫、以方招徠之時、而行府怨之、政事之不便、無如此者、上臺必欲文填、少假歲月、哀鴻稍集、行之差易、又與布政使書論積弊、曰、大河以南、吳楚大熟、數十年未有、故雖大兵、民獲休息、景星聞難得者勢、易失者時、凶豐十年、率相往復、往者飢饉、加以軍旅、有司束手、相繼得罪去者、爲公私無儲蓄、而不預策於平時也、楚俗不知遠慮、歲凶、富戶封園待價、貧者詣門、貸升斗不肯假、而年穀一登、還乘相望、掉臂不顧、以致出賣他境、四五月間、雨暘稍霽、穀價頓踊、封園乞貸如前、豈不大可恨哉、今連歲大熟、明歲或不可知、春秋書大有年、劉向以爲災、何者、變生於盛

滿、而禍伏於不備也、宜令州縣乘時收糶、夫荒政不在凶年、而在豐歲、豐歲勸糶、凶歲勸糶、勸糶則賤不傷農、勸糶則價不頓起、今穀賤農傷、折銀不得、如期足額、何如勿令改折、止納本色、泥沙狼戾之時、一聞此令、必騁躍輸將、以今年事勢計之、兩三月後、本色所值過於折色、利入於公、而民不困、猝遇軍旅凶荒、出以應之、而民不知、此李悝所以強魏、長孫平戴胄所以富隋也、漢元鳳時、以百姓未贍、許三輔太常郡以菽粟當贍、古有行之者矣、當事多采用之、順治己亥、詔徵天下山林隱佚之士、撫藩強之不起、康熙戊午、詔舉鴻儒六科公薦、景星所司、敦催上道、景星辭曰、景星正值臥病、捧檄戰慄、感激慚愧、如何可言、伏念景星昔遭寇亂、流離江南、順治二年秋、輔政叔德豫親王行查、多羅貝勒土賴固山額真、承制隨軍、纔至軍中、雙親齊病、無人侍養、告懇歸籍、未試民社、曾乏寸長、順治六年、丁母憂、扶柩還、斬、嚴親亦逝、貧苦流連、奔走乞食、家無墳典、腹匪書廚、心已瘁於飢寒、力不遑於咕嗶、四十年來、著述絕少、塵市淺言、方悔少作、豈堪玷名薦牘、況野性麋鹿、取適起居、又酷嗜酒、飲不二斗、酩酊大叫、中宵枯坐、白晝沈眠、以致脾胃傷損、洩矢數動、偶一周旋、嘔唾不仕、慙劣若

此何以上侍。至尊兼素善征仲，志慮懽悅，讀書則健忘，講詞益思純。耳順之年，復舊眩暈。去歲八月內，石臂染疾，痠腫麻木，有似風痺，自腕至指，搔掬不知，或當食失七箸，或臨書墮管，舐湯液熨摩，亦少停止，驟一發動輒逾旬時。願臂自悲，恐成廢癢。昨榮徽下頒，感而流涕，雨露施惠，蒲柳蚤凋，雲水閒心，惟冀縣延化日。明公舉主責任，談何容易。生平知己，誰過臺下。倘別青垂恩，曲成有造，樂借孝標之齋，時分仁祖之米，求醫有藥，叨庇延年，以其暇日，綴綴篇章，紀敘恩知，鋪揚聖德，野人之願，自可千秋。懸膽輸情，不勝戰慄。吏部咨報推病規避，例當題參。因與王追騏同劾奏上，溫詔仍令暫撫。起送景星又具狀乞寬假。明年扶病就道，給檢討奉米。三月朔入覲，保和殿賜坐，賜茶，賜饌，再以病懇放還。願其堂曰白茅，取易无咎義也。辛酉卒，年六十七。白茅堂集四十六卷，其自序曰：三經蒙解若干卷，戒史七十卷，紀五行災異，舉史三十卷，紀選舉，燕京物紀十卷，戴元集二卷，茅軒集三十八卷，津門三書四卷，先君子壬午以前作也。童子集三卷，願學集八卷，書目十卷，景星壬午前作也。癸未正月癸亥，並先世遺集燬於寇。石樞集六卷，五經論孟說七卷，讀史平論二十卷，歷代

政元考八卷，新州志六十卷，素問靈樞直解六卷，鍼灸至道三卷，焦氏筮法二卷，玉京括錄紀道家言一百卷，先君子癸未以後作也。願氏歷代列傳五十卷，阮嗣宗詠懷詩注二卷，李長吉詩注四卷，讀史集論九卷，贈池錄百十八卷，南渡來耕二集七十三卷，盤歲有增者，景星癸未以後作也。丙午十二月壬子，燬於火。南渡集有選鈔，在宣城施氏、梅氏、錢塘宋氏、山東郭氏、武進楊氏、邵氏、寶應陶氏、桐城何氏、萊州姜氏、丹徒江氏、商邱練氏、黃山沙門楚雲，去取不同。歷年增損復異。阮詩注有本，今在候官許氏。李詩注，鎮江段氏錄數十條，刻十家注於濟南。當火作，室人取南渡來耕十之三，幼兒自塾奔歸，取十之一，人閒鈔寫，兒輩隨收，即茲集也。故無歲月先後。嗚呼！自先大父明道經國之書，兵燹不傳，先君子晚年奮志著述，真有以傳先大父之不傳，確乎可傳矣，而又不傳。景星詩文，十猶三四在，必可傳而不傳，則不必傳而傳焉，未可知也。白香山自恐不傳，雜之東都蘇州廬山藏典中，不識今本果出諸此邪？抑人間原自流傳不廢者，僕未暇慮，請以茲集始。

志曰：願氏自序云爾。今存尚有黃公說字二百三十卷，而序所不及，豈書成在其後邪？或云：即贈池錄增廣而

成、然序丙午之燬、則潭池已在燬中、豈後又記憶而成說字邪。有明湖北人文風尙敷、贊至公安、竟陵而益靡矣。勢極則反、蕪州顧氏父子以鴻才絕學、振起衰頹、固由興朝氣運之隆、亦山川靈秀有所鬱、而後乃暢達也歟。

章學誠撰（章氏遺書）卷二六

校記

①眩運：當作「眩暈」。



明儒

傳集 卷九八

明儒碑傳集卷九十九

陳弘緒 倪元璐

故徵君晉州知州陳公墓志銘

陳徵君者、南昌之新建人也、諱弘緒、字士業、用徵辟得官、仕不稱志、四方多稱之曰陳徵君、及其歿也、皆驚悼曰、嗟乎、陳徵君死矣、至為出涕、君博聞強記、長於文辭、下筆輒千百言、少補諸生、以父蔭當得仕京朝、不就曰、吾自取之所、與交同郡萬茂先時華、徐巨源世溥、劉士雲斯陸、萬美叔曰佳、余小星正垣輩、凡十餘人、皆知名、君進而折衷於道德、學益醇、其文章閎達浩行、出入歐曾諸大家、以其餘溢為詩、風雨馳驟、士大夫避畏其才、而卒以不售、崇禎中、兵寇交作、丈吏多棄城失職、上浸厭科目為亡用、特徵處士賢良奇碩者、巡撫中丞劉公宗祥以君應詔、君在途、擬上書見天子言事、至則不得名、除知晉州、晉故偏畿輔、守禦無備、君百計修繕、儲芻粟、治火具、甫三月而晉受圍、君登陴誓死守、眾皆感奮、

環攻七晝夜不下、乃解去、當是時、真定屬邑大城多潰、而晉以褊小獨全、莫為上其功、坐不肯納關部劉宇亮兵入奪民居、中遭語連繫、而晉州數百人走訟宛關下、得釋不問、謫經歷湖州、權長興孝豐兩縣事、逮完通餉、改知舒城縣、巨室濮氏與巡按御史有連、秉勢撫事、脅州縣罔敢拂、君獨起叱之、居亡何、為御史臺所論罷、君剛介寡合、不樂州縣、而是時天下重科目數百年、君又不以是進、故三歲三易官、卒坐罷斥、於是徵辟之典寢墜、格士皆卧不起、而天下事日壞、久之、太宰鄭公三俊強起君、安廬監軍推官、逾年甲申、遂有京師之變、恟哭累日、絕復甦、君故自負史才、至是、馬士英等用事南京、殘滅善類、給事中馬公嘉植荐修國史、不赴、蓋知金陵之必敗也、丁母憂、廬墓西山、輯南宋遺賢錄以見志、山中盜起、求躬耕不可得、順治癸巳、始置一樓、章江上、作江城懷古詩六十首、讀者多隕涕、中丞蔡公制府張公聞其名、先後禮遇、張公屬修南昌郡志、成書五十卷、四



方以他文請者盈筭堆案皆立應人人滿志去。康熙甲辰六月病壺明年乙巳三月五日端坐卒享年六十有九。所著石莊集、恒山存稿、寒崖集、鴻橋編、留書、凡若干卷行世。其藏於家者、周易借攷詩經羣義、尚書廣錄、山房讀書跋、江城名蹟記、崑齋詩、荷鋤雜志等書、又十餘種。君性疾惡、議論侃侃、及發諸文詞、罕所刺譏。服官清慎、俸入輒購書、累車舁還、家人發之、咸相視歎笑。家居食貧、客至未嘗不留。當事有造廬者、指陳古今利病、以經術自任、語終日不及私。有得輒記、謂之病榻雜語。最後喀血、將歿前數日、猶為王祠部士禎作詩序、蓋絕筆云。君生萬曆丁酉十一月十有二日。考諱道亨、萬曆丙戌進士、南京兵部尚書、贈太子少保、謚清襄。妣劉氏、誥封夫人。曾祖諱棟、祖諱瑞、並贈兵部尚書。曾祖妣余、祖妣袁、並贈太夫人。君娶熊宜人、善筆札、凡所屬草皆熊為書。先二月卒。生女一副室王氏、生二子、涂、澍、皆諸生。宗早卒。娶周教諭以璣女、年十八守志。澍篤孝力學、康

於庠。娶熊封君洪奎女。幼子澗、妻魏氏出。女二人、一適湖廣左布政使熊公宇、奇子啟峻、早卒。一適尚書劉公定國孫紹節。將以某日塋君某山之陽、孤澍泣具狀、屬其同姓兄允衡來請銘。銘曰：父命也。子既敏其文、又詳其行事。銘曰。

謂子為最富、有文史。謂子為達、三仕三已。其誰為之、俾豐於此、而壽於彼。嗚呼命矣。

施潤章撰 《學餘堂文集》卷二〇

明戶部尚書死義倪文正公傳

邵廷采

公諱元珪，字玉汝，一字鴻寶，紹興上虞人。父贈尚書諫議，徙郡城。諫有經國才，隆慶辛未，執南宮對策，指陳時政得失，下第。甲戌成進士，官南工部郎，定船政，軍衛皆便之。江陵相居正，使其直，出之知撫州。歷守撫、淮、荆、瓊四郡，所至有循吏聲。公幼承諱戾，諱聞忠孝大節，居身矜重，才氣絕世。天啟二年成進士，充翰林院庶吉士。四年授編修。舊輔葉向高待謫，公曰：「三年來無片利及吾門，何處得此風來？」於是時瑞、熹、廷熹、向高未幾罷相。五年，公奉使封德王，使竣，即乞假省太夫人。尋召還京，魏忠賢已進爵上公，至配享孔子。公與試江西，命題議切，忠賢大恨。會熹廟崩，思陵登極，誅忠賢，公乃得免於禍。崇禎始政，天下清明，而逆黨阮大猷、楊維垣等猶在班列，所刊三朝要典，皆頗公論。季小陰持其說以動播國常。楊左衆君子死，士氣未復，莫幸小安，莫能盡言。公以為此邪正之幾，治亂之本，遂不謀同列，獨上疏曰：「臣頃見邸報，凡攻在魏者必引東林，並稱邪黨。在魏而既邪黨矣，向之彈忠賢、糾羣芳者，又邪黨乎？大東林則亦天下之才數也，其所宗主者，大抵秉清挺之標，而或絕人過刻，樹高明之幟，而或持論太深，謂非中行則可，非狂則則不可。且天下之議論，牽涉假借，而不可不歸於名義。士之行已，率

近矯激而不可不準諸廉隅，可以假借矯激，深啓前人而彪虎之。使公然毀裂廉隅，背叛名義，連屬頌德，匝地生祠，夫頌德不已必將勸進，生祠不已必且萬呼。乃從寬之曰：「無可奈何。」嗟乎，充此無可奈何之心，又將何所不至哉？議者能以忠厚之心曲原此輩，而獨持已甚之論，苛責吾徒，亦所謂悖也。天祚明德，陛下親親，出諸臣於縶之中，恩綸酌用，凡屬在魏之異己，即可化牛馬為同心，而猶堅執方隅，深虞報復。夫棄年借東林媚魏者，其人自敗，無可施報復之端。若其不附在魏，又能攻而去之者，其人既已為教矣，雖百東林烏能報復哉？疏未請，召用韓爌、文震孟，而後天下諸學書院、蓋書院生祠相為負勝，生祠毀，書院直不當復。上方深思未即納用，而維垣起爭，公疏甚力。公復上疏曰：「觀聖臣維垣所奏，事事與君子為仇，言言與明詔相背。明詔成諸臣無立同異，天下為公，而維垣論列，輒曰孫家、趙黨、鄭黨，動分門戶，持此彌縫。陛下當陽收日既出，而維垣猶舞魍魎於容光臨照之下，欲起地下諸奸而更生之，取正人反爐重加煅炙，乃快其願。臣竊以為計過矣。維垣怪臣盛稱東林，意東林于季三才而維垣廷尉也。然當時議三才，特推其揮霍之累，而未嘗不指之為貪，于廷尉特未即西市之刑，而未嘗不坐之以罪，則未為大論失刑也。若維垣之稱



有一人矯激假借、猶足以主朝野之坊。若東林已散、諸賢解元標、王紀、高攀龍、楊捷而外、又有若顧憲成、馮從吾、陳大統、周順昌、魏大中、周宗建、周起元、其人遠戾摘放、有若趙南星其人、臣不敢隱名、以侵薦舉之職、其為理學清節、要何可疑、存沒不同、並歸真品、豈有所矯激假借其間、而以臣抑揚之詞為一成之論、謂臣大壞臣益不受也。若維垣特論之博者、謂小人待其惡給、乃攻而去之、待小人惡給、天下事已壞矣、殺天下正人亦已盡矣、惡攻而去之、不豈何及乎。在魏惡給、不過聖明、誰攻而去之。又始終以無可奈何為附庸解嘲、脫一旦舞陷稱臣、挺戈弑逆、亦托之無可奈何乎。又言、忠良不當以在魏為對案、夫今日亂賊非在魏而誰。王安石非真小人、而附安石者皆真小人。豈在魏真亂賊、而附在魏者反非真亂賊。以維垣之邪說、護亂賊之崔魏、孔孟復生、為世道懼、必有甚於前日矣。夫古今惟意見不同、議論偶異、如宋臣蘇軾、程頤互相訶詆、均不失為正人。本朝大禮之爭、折衷未平、皆主於愛君尊祖、若品節大閑、豈有兩是。品節試之於崔魏而充、無問其為東林與非東林也。總之、人才不可不惜、我見不可不除、衆弊不可不宣、清議不可不畏。臣前疏論列、本為維垣、不斥其名、慮使之聞而愧恨、面熱發顙、而食不下咽。不意其怙終遷惡、乃至於是。且猶揚

惕以正人自負。語言甘美。直能上達帝鑒。嘗曰。作偽心。勢日壯。臣願維垣之熟思之也。書奏。上嘉獎。公於是請毀三朝要典。畧曰。伏見提學。紅丸。移宮。三案。始自清流。當事起議。與政庭互松。主提學。者力護東宮。事提學。者計安神祖。主紅丸者。仗義之言。事紅丸者。原情之論。主移宮者。辨定於幾先。爭移宮者。持平於事後。六者各有其是。不可偏非。至親忠賢。竊命。始假三案。以殺人。而求富貴者。萬口和之。此又編主私書。名為要典。凡推慈歸孝於先皇。正其頌德。稱功於義父。批報今日。則東正之黨。碑。免死他年。即上公之鐵券。聖神御世。誅罰既行。則於此書。唯毀之而已。假垂鑒之權。使史官之筆。互古未聞。當毀一。未易代而有偏年。不直書而加論斷。當毀二。矯誣先帝。偽託宸篇。既不可比。乃馬光資治之書。亦不得援宋神宗手序為例。當毀三。此書不毀。必有受其累者。非主三案者之累。而爭三案者之累。又纂脩三案者之累也。願勅部立將要典。焚毀。明詔廷臣。革奏無得漫舉。而時點將之誤。進佛之說。一切市語妖言。以應聽覽。舊染汙俗。咸與更新。昭陛下寬簡蕩平之治。天下幸甚。上從之。時公已遷侍講。屢上書言事。海內傳其奏疏。希望光儀。同郡大學士朱宗道曰。渠何事多言。我詞林故事。唯有香茗耳。時謂宗道清客宰相公。後與其兄御史元珙進論。前大學士魏

所徵。願秉謙削籍。詔以廣徵實為稱首。持國柄。校瑞。毒偏宇內。以先朝素芳。例除名為民。於是御史毛羽健劾阮大鍼。御史鄒元祚劾楊維垣。御史高弘圖劾劉應選。崇禎初。詔給事中顧錫祖。勅李晉生。李蔚。盧維華。旬月之間。親忠賢之黨。以次盡去。上親定逆案。分七等。錮之。終身。皆公三疏放之也。四年。遷右中允。自朱崇煥敗後。罷大學士韓爌。錢龍錫。劉鴻訓。而相溫體仁。周延儒。史鑒等。謀借封疆。制逆案。日夜汲汲。龍錫下獄。論成。上疑延臣朋黨。無狗國心。會大凌河久圍。復遣中官督戰。公嘆曰。此觀軍容之漸也。外廷無人使。主上不得已出此。是時前右中允黃道周。以教龍錫。請外。公上疏。願以己官。讓道周。道周行清絕俗。與深經史。精謀持。宜。天為陛下生此一人。非臣等所及。請用道周。出臣。猶棄魚目。以珠。得隋和。又前順天府尹劉宗周。清恬剛介。正典道周。相類。宜召還京師。風厲臣節。不報。四乞歸省。政府以公人望。藉客。致殷勤慰勞。喻以美遷。公辭焉。謂所知曰。平生不受熱官。不喜居要人牢籠之內。今石齋九一既去。而我獨留。有靦面目。詩其謂我哉。引退。益力。上不許。六年。遷左諭德。充日講官。七年。陞右庶子。掌坊事。上制實制虛名八策。制實者。成敗得失。見於行事之實。制虛則本之心。運之廟堂。以虛應實。可包百世。利子孫。黎民無遠勿局。內規執政。

於戶部侍郎張捷薦呂純如事。又請蓋撤監視內臣以重邊疆。上
置公署御榻。時時省覽焉。八年正月。賊陷鳳陽。焚皇陵享殿。故高
增非器。公上疏。以為寇情非常。祖宗大辱。人心所在。思亂賊據南
北。斷事實未可知。請上亟下詔罪己。悉蠲樂禍七年以前逋賦。并
東南難解改折錢糧追贖。勿或根接清濫。并寬有司。悉罰使官民
咸得安枕。以祈天永命。十月。上避居武英殿。撤東廠。布袍視事。
命匠工共加修葺。務存寬恤。時禮部侍郎陳子壯亦條蠲租清獄
有罪。使還省。工。東兵改折。器。恤。宗。寬。釋。旌。叙。事。例。十二事。與公
疏俱下。詔。而溫體仁每事拂抑。率以名塞。未能盡行也。是年。聖國
于祭酒。上疏。禮王制。造。造。三。升。然後。論。游。授。官。簡。不。率。則。有。郊。遂
之。移。請。做。其。意。分。貢。進。為。正。流。授。約。為。閏。流。授。納。拔。年。改。正。流。與
貢。選。同。科。然。貢。選。不。才。退。處。閏。流。比。郊。遂。又。暨。祖。制。六。堂。進。升。所
教。崇。德。行。明。經。術。講。求。兵。農。水。利。律。曆。開。朔。射。倍。公。卿。將。帥。之
用。最。下。使。請。律。令。稍。通。治。民。毋。致。靖。而。博。訪。品。端。崇。正。多。開。儒。者。
充。六。堂。司。教。官。不。拘。甲。科。久。任。教。成。特。與。優。擢。天下。府。州。縣。有。通
三。經。尤。卓。者。撫。按。送。部。奏。請。廷。試。發。難。肄。業。仿。高。皇。帝。遺。制。因。子
生。留。請。春。秋。以。明。大。義。斷。世。事。學。成。按。洪。武。開。張。唯。將。學。等。校。編
修。餘。事。中。餘。御。史。印。書。方。面。如。此。則。太。學。終。士。可。與。周。治。凡。隆。次

亦有光洪宋。明倫之教。始不徒設。又請勸諸子弟十以上。三十
以下入塾教習。如古宵子。漢四姓小侯法。不由監宮不得承襲。上
可其奏。體仁又知上意密公。處一旦進用。且奪其位。力謀去公。而
實有無可喻意。一日上手書公名於校內閣。命以履歷進。體仁大恐。
喉。誠。意。伯。劉。孔。昭。許。公。月。封。典。事。擬。吉。刑。籍。上。察。其。詔。改。命。于。告
歸。里。十五。年。起。兵。部。右。侍郎。兼。翰林。院。侍。讀。學。士。以。母。老。辭。有。詔
教。從。已。聞。京。師。被。兵。徵。四。方。兵。入。援。翼。然。起。曰。詔。以。臣。貳。樞。而。聞
警。不。前。非。義。也。遂。散。家。財。募。義。從。得。敢。死。數。百。人。持。滿。夾。趨。衝。險
出。濟。明年。正月。抵。阜。城。時。王。師。深入。自。良。澤。豆。山。左。連。營。九。百。里。
將。騎。四。六。裨。較。將。暫。止。觀。望。公。正。色。曰。再。三。千里。赴。召。豈。復。顧。身。
且。北。兵。日。南。進。退。等。危。耳。遂。進。十日。達。京。師。京。師。城。門。盡。閉。行。旅
斷。絕。援。兵。皆。不。能。前。聞。公。至。皆。驚。即日。陟。見。帝。陳。虛。實。條。守。禦。之
策。亡。何。叛。帥。劉。趙。就。擒。叙。功。蔭。一。子。錦。衣。衛。指揮。食。事。當。是。時。上
注意。相。公。而。陳。演。欲。據。前。權。既。同。廷。儒。視。師。構。成。其。罪。又。慮。公。柄
用。詭。入。告。曰。天下。切。為。患。兵。農。不。得。人。今。使。元。略。為。司。農。元。略。為
司。馬。事。濟。兵。上。不。察。演。意。以。為。推。鼓。即日。拜。公。戶。部。尚。書。兼。翰林
院。學。士。馮。元。略。兵。部。尚。書。召。對。論。曰。國家。艱。難。兵。食。方。今。一。卿。而
人。同。卿。里。負。才。望。朕。故。用。以。協。心。規。畫。卿。其。有。以。報。朕。公。引。浙。人



不得為戶部力辭，上不聽。謂曰：朕知卿久矣，卿忠誠敏練，我不疑。雖勉為朕分憂，至以高皇帝用宋濂、劉基成大業比說，公乃拜命。既陳生節要義，以為天下財賦什九成耗於兵，耗於將之虛費，請用戶部官行其部事，或臨操頗備，或就營面給，以杜侵漁。至於軍興以來，正賦之外有逸餉，有新餉，比復議抽練邊兵，既果捕賊，又加練餉，其實有抽無練。從遷金鎮原伍，惟舉抽練之數，號稱壯盛。非因抽練而兵精，乃因抽練而兵寡。自今請罷抽練，悉還原伍。又一兵食三餉，一民供三餉，各項紛然，吏緣為奸，額設民運屯堡，督撫徵收，徑視行間者，違帥發遣，不啻而唯責京運，即欠籍口債事。江河漏卮，莫知所底。請著令凡徵民糧，悉去違餉，新餉練餉之名，止開正賦、兵餉二項。正賦為世常經，兵餉事平陽復，庶歸虛一，民知所守。又條上恤車戶、改雜折、省弁職數事，上皆從之。京倉僅支二月，上發帑金四十萬石買米石，大家素賈，並深藏居奇，米價驟貴。公計不如收清於天津，歲運關軍餉永三百萬石，內扣五十萬石輸京倉，用四十萬金折給四鎮米石入錢，大倉得米而邊軍喜得金，上下便利。諸所變通悉此類。公當極弊之後，盡力補苴，稅政少整，而度支終告絀。保定巡撫徐標奏請從滿屯之制，可省漕運銀兩，北下部，公議先於都城訓引十萬，未及舉行，會公以

開礦鈔法動上者，陳演附贊其說，言利之人益紛紛進措施，俱拂人心。當是時，天下苦於兵多將驕，上不能御將，將獨以索餉為事。上意益專措餉，括膏血以來完軍，稍庸將而不符一戰。盜賊因之以括盡，盡之命，則哄然從風靡。柿園既敗，李自成兵不前行，公仰屋反思，請上招秦晉二王，悉輸所有餉軍，無齎盜糧。自成已入潼關，陷西安，秦晉世府庫盡為賊有矣。成敗頃刻，諸為民條奏，非除俱不得施技。上雖虛中任公，然責餉嚴，陳演、魏藻德等猶固寵專位。十二月二十四日萬壽節，上不舉，漏下十刻，與宰相咨求長策。澤汪戚發，藻德承間言計臣才品俱優，但起家詞林，錢穀終非所長。上默然。徐曰：計臣實心任事，頗時艱未能建效，即撤誰代之者。方岳貢具言公清操練事，在廷無出其右，不可易。藻德曰：代之誠難，顧軍國事大，幸聖主熟思其人。上竟或德藻言。十七年正月，傳諭諸臣元略專供講職，仍視部事候代。二月十九日，以大理寺丞其履中為戶部左侍郎，筭計務，公解部事。先是正月晦，上諭公積餉百萬，時部帑留貯不滿二千，公奏外解未至，道路阻梗，且陳許都之變，東南震動，上滋不悅。是日，上怒將德璟條言言練餉事有聚斂小人語，詰問德璟不屈。公以鈔餉戶部職掌引外，上乃稍霽。命起德璟，出，又補疏極言練餉之失，且求還。詰旦，諭拔練餉。是月，



命李廷泰督師而討自成。公奏言：黃河五千百里，處處可渡，兵分必不能及，宜責洛河州縣各自為防，量度要口築砲臺，大軍得非辦賊。故今年田租半，使人有固志。又免軍籍為民，立可致千萬。不聽。二月，自成渡河，陷太原，至黎城，他賊陷臨晉，建泰聞山西陷，取破，遂巡畿內，兵竟不進。是月，上猶遣中官王坤及科臣辜朝薦等四出偵餉，并周延儒具昂時賊勢，朱大典請援。公上言：賊贖重大，究何容勢，勢必波蔓遷延，民不聊生，提思走險，亂人乘之，恐遂無漸。乃罷遣坤。三月，賊長驅向宣府，紀保定所在迎降。公上言：賊勢披猖，皆自人心離渙，請急降溫旨，問畿民疾苦，分別罪繫，情可矜原，及罰贖徒以下悉與肆赦。祖宗兩都並設，原有深心，正為今日，宜重留都事體，外引鳳淮以通南北之路。事急，又密疏請命東宮撫軍南出，不報。公嘆曰：今無兵無餉，無將無謀，而賊如破竹，然吾心泰然。以上憂勤，初無荒淫失德之事，積蠹火積，豈有如此聖明而一敗塗地者？第北來聽言用人，定封行賞，多是手忙心亂。吾受恩深重，無可報者，唯有七尺耳。丁未，都城陷，公將致命。門人金廷策進曰：公何不效文信國出外募兵，以圖興復？乃輕自擲。公曰：吾誠信國罪人，然事勢無及，祇俾天下事非一人所為，以待能者，吾姑順受其正。塔及太夫人，淚下曰：老母年八十四矣，日食飲幸如

初，復何憾？死帶出懸事，北謝闕，南謝太夫人，單據筆題數凡曰：南都尚可為，死吾分也。又謂家人曰：上必殉社稷，俟大行殯，方收吾屍，還南面坐，引弔自縊而絕。賊入則見公如生，驚羅拜庭下，嘆息呼忠臣。去頃之，偽兵政榜賊檄，家人乃得治款。南都贈太保、吏部尚書、諡文正。順治九年，卹明李殉難忠臣十五人，公為首。諭祭賜地，命有司春秋致祭。

論曰：崇禎之世，天下非無人，患用之後時與阻語之不得達其用。如倪文正公之掌計，患務收拾人心，竟與人生背馳。及迄入關門，中外土崩，而所養百萬之兵，勢身焦思以蓄足食者，曾無一人御敵。事勢已去，乃擬悔過罪己，恩威俱不足以威畏其民。視臣世臣，稽首賊廷，素三百年之主如敵。甚哉！兵民之心不可失，有國者不以利為利也。其偉業嘗稱公與馮元龍分都實共事，元龍數被病，上賜藥餌雜物，居數月不得參。公并三餉，清邊兵，吏吾匿拙，多非其意。每相見，輒頻足曰：使吾兩人早受知，竭狗馬力，天下事或不至潰裂，今定何及耶？孫傳庭之出關也，貽書元龍，雅不欲連戰。上意及朝論起之急，不得已督師。既下汝州，克寶蓋，三日五捷，上坐便閱，喜甚。召元龍曰：傳庭果勝，賊滅亡在旦夕，卿居中調度，有方，朕且加殊賞。元龍頻首曰：賊故見虞以誘我師，兵法之所忌

也。臣不能無憂。上然其言。良久。因罷去。無何。改書閣。

近來革流公傳。復據拾元功先生先德五語中。違事為後序。公才性奇敏。五六歲。屬對射覆。出語驚座。嘗戲作牡丹賦。父而曰。公見之。喜告曹太夫人曰。二郎他年公輔才也。其為詩。文。經。義。灑然流倫。多涉翰墨。丹青圖箴。無不深妙。四方名士請教。公未嘗辭。然內明藏。為導翰時。有以楚紙乞。擊案書者。皆筆精。行。意。疾。揮。忽。間。紙。所。自。來。則。中。資。所。屬。請。耳。公。遂。閣。筆。請。續。竟。不。許。客。懷。惜。去。數。人。得。十。字。曰。一。箭。尚。可。名。齊。十。字。容。不。闕。乎。因以名樓曰十閣。崇禎十四年。四太保弘遇以貴妃父。奉詔禮陀逆越。冠紳傳冊徵詩。報以二絕。竟不交而還。無慎于取予進退。一縣令求革刺。致束帛。受而焚之。中有貧金。不悅。曰。以禮求文。事本光大。何為私秘。以成暖昧。東還一緡。反其金焉。為大司農。定其規。門可羅雀。有故例。向供錄沐。公不取一錢。其昌時橫經公門。壬午將賓興。適還湖上。酒脯召客。欲為公。楊徐某卷于內。蘇徐某。渡江走告公。公溫曰。士當先行節。後科名。今出門。輒圖苟且。異時何望監立。且求之志。斷才疏。吾方慮其適宜與否。又可就其執乎。及周兵敗。成思公言。入平林。卜召翰林。商書九卿。堂上官。將試以票擬。公引疾。方杜門。政府寄山。尋移兩

使至。胡上憲久屬公。即召。無假遷理。文公震益亦勸駕。公曰。請公。誠愛我。然我屢疏終養。今聞枚下。遂爾突出。即此面目。何以對君親。況置相大典。自當旁求良弼。豈如科場考選。可一試而得。得亦不光。還堅卧。其日應召者七十餘人。各給一札。使平章之。及宣麻。唯文公入閣。文亦以病卧不赴。乃其嘆服。謂平友曰。鴻寶每事為我一籌。公其賢。容能笑語。和光接人。司成歸。慈雅歌投壺。以意制為百官。彈。張正經法。設五筮之事。招客。聞人。余仲吉亦典。酒行。忽嘆曰。流涕。言方今中外多事。士君子致令守身之道。不可不講。須于平日設身當境處之。不然。鮮不廢名節。諸生王毓等咸在坐。聞公言。無不感動。終後。毓等。卒如公教。嚴山劉先生亦言。公任戶部。知不支。嘗懷一鏡于袖中。曰。時至即行。或稱公徒以一死報國。談何容易哉。方公戊辰三疏。天下稱為鳳鳴朝陽。可當公行事。世最忠。白黑不明。邪正混淆。若宋時。照費諸君子。或主調停。馴至大壞。公之忠言立錄。與烈皇帝相終始。一同琴璫。終殉社稷。此亦宋時明良之會。非偶然也。公操履超邁。意主于成天下之事。與人寬。守禮自信。人亦卒不以非道相疑。壬午赴召。經涿州。時馮銓助守州城。獲全。聞公至。即迎供紙。公欲往。從吏叩頭諫。公曰。非汝所知。遂往。



一若而起。或請其故。公曰。國家多難。庶功賞一途。可奔走群力。承鹿所親。不過繁帶。拒之過深。且南北走今日軍國為重。倘欲開端翻案。明主持之自堅。霍呂其前事矣。周延儒賜死。朝士無敢言者。公曰。往論龐巨公。群思剏。必存腹宜。與獨以文章容我。肯蔡邕變類于董卓。睦素服于崔浩。明主厲法。素來伸情。何嫌何疑。上竟不問。所至汲引人才。在司農。侵義歸部。必延接文士。容詢僚屬。無休容。政府有以拒容明介者。公笑曰。宰相以用人濟世。而乃避人避世乎。其風流幹畧。與戴山劉先生不同。同歸于道。天啟時。戴山直聲已震天下。而同里七大夫未有以真儒相推者。公每向人言。念董今之考亭。及崇禎五六年。又書劉先生當今第一人物。又數年。謂此老真大賢。最止信為清談。今乃知其無所不有。公之深思樂道。好學善下如此。諸凡待論。必與君德時政相依切。論學術曰。孔孟之道。自能刑人教人。未須字中韓。少正卯之誅。原情按法。天下極平。今有孔國重典。加一等之論。則是有申韓。無孔孟。此等生心發政。最足害事。論及知曰。平天下之道。不過用人理財。好君子。惡小人。無智愚賢。然正所謂不慮而知者。今乃為之說曰。君子無術。或亦誤事。小人

之。故事。謂義撰自辯官。取裁內閣。公初直講。用催科賦額。緩切待政。體仁謂語意峭急。發政中書。往後數四。公持不可。曰。敢沃自辯官事。此後峭急有甚此者。必爾。吾當自陳求罷。體仁衛之。時上意向公。進講無不前席。一日。講說命惟暨乃僚。固不同心。體仁在側。公語直侵政府。上拂然。以手抵書。盡几端。印首上視。公徐中正義。旁吐弘亮。率寡容受焉。賦券已通。上猶御經筵。講生財有大道。上疑公諷刺。詰曰。今國計益艱。生求為疾。何所措手。公對。聖明經權互用。臣書生。止知周民之情。藏書于國。退亦不引謝。翌日。上謂閣臣曰。故事。講筵有問難。而無詰責。卿等之言。是朕過也。公司計凡十閱月。解部。事未二十日。即國變。著書數十種。代言奏讀。諸篇。兒易尤行于世。泥滂者。分內外二儀。外儀墨守先儒。有因無創。內儀。薛仲尼以兼三聖。又分之以兩編。以者本諸大象。如豫以作樂。樂德。全卦皆歸。樂。革以治曆。明。全卦皆歸。曆之者。等子易林六十四卦。因而重之。卦占一辭。取易所固有。為之箋釋。自攸曰。漢人說經。古本經。以兒強解。事者。宋人說。求通。遂成學究。學究不如兒。兒強解。事不如兒。不解事也。又曰。子雲太玄。堂島共之。童島子雲九歲見也。或以古文兒。倪通用。固以姓稱倪。步。俱矣。

明儒碑傳集卷一百

毛晉 錢啓忠 談遷 張溥

來集之 朱之瑜 沈壽民 劉灼

隱湖毛君墓誌銘

兵興以來海內雄俊君子不與刼反俱燼者豫章蕭伯玉徐巨源德州盧德水華州郭胤伯浮囊片紙異世相存各以身在相慰藉不及十年寢門之外赴哭踵至余乃喟然歎曰古之老于鄉者杖屨來往在在東阡在在北陌今諸君子雖往矣江鄉百里雞豚近局南村河渚之間尚有人焉吾猶不忠乎無徒也少年間黃子子羽毛子子晉相繼捐館舍咸請余坐榻前抗手訣別嗟夫陸平原年四十作歎逝賦以塗葬意廷爲感今余老髦殘軀慣爲朋友送死世咸指目以爲怪鳥惡物而余亦不復敢以求友累人所謂託末契于後生者將安之乎斯其可哀也已子晉初名鳳苞晚更名晉世居虞山東湖父清孝弟力田爲鄉三老而子晉奮起爲儒通明好古強記博覽不屑儷花鬪葉爭妍削間壯從余游益深知學問之指意謂經術之學原本漢唐儒者遠祖新安近考餘姚不復

知古人先河後海之義代各有史史各有事有文雖東萊武進以鉅儒事鉤纂要以岐枝割剝使人不得見宇宙之大全故于經史全書勘讎流布務使學者窮其源流審其津涉其他訪佚典據秘文皆用以裨輔其正學于是縹囊細帙毛氏之書走天下而知其標準者或鮮矣經史既竣則有事于佛藏軍持在戶貝多盪几捐衣削食終其身芒芒如也蓋世之好學者有矣其于內外二典出世間之法兼營并力如飢渴之求飲食殆未有如子晉者也余老歸空門擬棄世間文字每思以經史舊學朱黃油素之緒言悉委付于子晉子晉晚思入道余觀箋注首楞嚴若則又思刊落枝葉迴向文字因緣以從事于余而今皆不可得矣悠悠人世可爲興悲豈但東阡北陌而已哉子晉爲人孝友恭謹遲重不洩交知滿天下平生最受知者故令應山楊忠烈公所莊事者縵布衣仲淳張家宰金銘蕭太常伯玉也與人交不翁熱撫王德操之孤卹吳去塵沈璧甫之亡皆有終始著書滿家多未削稿其子皆鐵礪著學能弄而讀之異時有聞焉子晉娶范氏康氏繼嚴氏生五子襄褒表展襄褒皆先卒女四人孫男女十一人生于己亥歲之



儒藏

正月五日卒于己亥歲之七月二十七日年六十有一。越三年辛丑十一月朔葬于戈莊之祖塋。銘曰：君爲舉子提筆如虹。丁卯鎖院。試于掌夢。明遠麗譙。蟠龍正中。口銜珠膏。山宇冠空。兩旂旁列。史右經東。明年改元。歲集辰龍。高山崔嵬。觀象在崇。爰刺經史。敬嗣辟雍。泰鏡漢囊。表應受終。魯誥既藏。三墳攸崇。玉牒縹緗。昱耀龍宮。劫塵浩狀。噩夢衝衝。維茲吉夢。帝命克從。翠如嶺如。有丘宛隆。文字海光。長賁柏松。

錢謙益撰 《牧齋有學集》卷三一

朝議大夫奉勅提督山東學政布政司右參議兼按察司僉事清獻錢先生墓誌銘

昔明道汎濫諸家。出入于老釋者幾十年。而後返求諸六經。考亭于釋老之學。亦必究其歸趣。訂其是非。自來求道之士。未有不然者。蓋道非一家之私。聖賢之血路。散殊于百家。求之愈艱。則得之愈真。雖其得之有至有不至。要不可謂無與于道者也。崇禎間。士大夫之言學者。尚廣。大多以宗門爲入處。蔡雲怡、黃海學、林可任、錢清齋其尤也。雲怡、海岸終爲綱常人物。可任、白根、秉拂一什。不返清溪。未見其止。四先生者。所至各異。其求道之心。則一也。清溪先生諱啟忠。字沃心。錢氏爲鄞中望族。方伯奐而下五世爲若麀。若選若麀守臨江。生三子。靖忠、舉人。益忠、訓導。敬忠、知寧國府。益忠之子肅樂。卽忠介。若選生二子。長爲先生。次孚忠。先生登崇禎戊辰進士第。時承逆奄之後。天下書院皆經折毀。先生上言。臣觀崔魏亂政。奄禍遍于天下。乾兒義子。人頭畜焉。斯孔孟學術一大厄也。三尺童子。猶知笑之。而中朝誦功勳。進轉相效尤者。正以諸臣平日理學不明。不識節義爲何物。但知有身家。不知有君父。但知迎合流俗。不知反照良心。良心泯而道術晦。道術晦而治術墮矣。是故生祠書院。相爲貞勝者也。應將已毀書院。盡行修復。此聖政之急務也。疏出。廷臣皆寤之。除南康府推官。興利除害。如不及。案無留牘。國土之中。饑者與食。寒者與衣。疾者與醫。藥民是以不冤。郡固有白鹿書院。爲司李職掌。司李多未嘗學。開徒稽其田稅出入而已。先生集士于

講學、隨機指點、當其得意忘言、三三兩兩、便覺沂水春風不遠。歸宗寺為常相重典、先生刻其集于寺中。恐山葬五孔峯下、其地不吉、先生為之重卜。有明白楚石以後、佛法中衰、得紫柏憨山而再振。先生之為佛氏金湯如此。改理撫州、尋遷刑部主事。江夏郭昭封以草履事論死、先生念其為文毅子、未減得成。粵中陳秋濤、臨川湯伯開先後建言下獄、抗疏救之、皆得出。丁憂服闋、轉禮部員外郎。山左兵荒、餓殍載道、疏請濟糴十萬石賑之、活者無算。已而提督山東學政、至李家庄、流寇奔至、先生諭之、皆放兵羅拜。則先生昔日所活之饑民也。以註誤歸、未幾得白。崇禎癸未八月十一日卒、距生萬曆甲午十二月二十三日、年五十。娶戎氏李氏、高氏、贈封皆安人。子三人：肅、鏞、鏞。俱早卒。在者惟廉女一、適諸生許曰璠。孫一中、盛。孫女一、適諸生萬經。先生師事鄒忠介、故其學問源流多在江右。如顏山農、何心隱、皆欽崎豪傑、乃介洲改愛者以為傳世。遂持撥。先生理其緒言、刻而傳之。吾觀先生當日、朱震青易理隱微、金伯玉苦身持力、金正希體認靜虛、動直相與、水火醴醢、未嘗封域自守也。天假之年、豈復如可任之不及乎。凡先生師友、後來獲遺、流多歸節義。然先生當服闋入都、流氛漸熄、寓書高安人曰：寇至我必死、汝等不必來。是先生不幸而不值橫流、不得以節義顯也。歲壬午、余在京師、與震青論學、當其險絕處、震青每日吾友清溪、曾為是言矣。海岸司李寧波、余嘗與之同舟入省、可任有知已之言。伯玉門巷蕭然、曾數過之、先生亦欲過余而不果。

先生卒後三十三年、高安人方卒、廉以某年某月日卜葬鳳下溪山麓、手為行狀、再拜求銘。于時中原之師友盡矣、廉生也晚、不及見此盛時、聊以所憶者語之當世、守其家學也。銘曰：

科名禪位、嶸崿螢光。舉某未復、姓氏已忘。先生之歿、一世之長。學舍馬廐、師友劒鏘。嘉言善行、散落四方。亦有後死、掇拾其旁。以慰哲嗣、上下傍惶。此心此理、未嘗滅亡。

黃宗義撰（南雷文集）卷八

談儒木墓表丁巳

君談氏名遷、字孺木、歙寧縣人。初為諸生、不屑場屋之僻、固狹陋而好觀古今之治亂。其尤所注意者、在明朝之興故。以為史之所憑者實錄耳、實錄見其表、其在裏者已不可見。况革除之事、楊文貞未免失實。泰陵之盛、焦泌陽又多醜正。神煮之載筆者、皆倖逆奄之舍人。至於思陵十七年之憂勤惕勵、而太史避荒、皇族烈燭、國滅而史亦隨滅。普天心痛、於是汰十五朝之實錄、正其是非。訪崇禎十七年之邸報、補其缺文。成書名曰國輔。當是時、人士身經喪亂、多欲追敘緣因、以顯來世。而見聞窄狹、無所憑藉。聞君之有是書也、思欲竊之以為己有。君家徒四壁、立不見可欲者、夜有盜入其室、盡發藏稿以去。君喟然曰：吾手尚在、寧遂已乎。從嘉善錢相國借書、復成之。陽城張太宰、膠州高相國、皆以君為奇士、折節下之。其在南都、欲以史館處君、不果。亡何、太宰相國相繼野死、君亦棄諸生、北走昌平、哭思陵。西走陽城、欲哭太宰、未至而卒。丙申歲冬十一月

也。蓋君於君臣朋友之間，實有至性，故其著書亦非徒爲盜名之秘經而已。余觀當世不論何人，皆好言作史，豈真有三長，足掩前哲，亦不過此因彼襲，攘袂公行，苟書足以記名姓，輒不難辦。推而論之，史之體有三年經而人與事緯之者，編年也；以人經之者，列傳也；以事經之者，紀事也。其間自有次第，編年之法，春秋以來未之有改也。有編年而後有列傳，故本紀以爲列傳之綱，有編年而後有紀事，故紀事爲通鑑之目。奈何今之作者，矢口遷固而不屑於悅宏，夫作者無乘傳之求，州郡鮮上計之集，不能通知一代盛衰之始終，徒據殘書數本，說墓畢辭，便思抑揚人物，是猶兩造不備而定愛書也。以余所見，近日之爲者，其人皆無與乎文章之事，而公然長篇累牘，行世藏家，輒欲與五經方駕，三志競爽，豈以後世都可欺乎？君乃按實編年，不銜文彩，未嘗以作者自居，異日有正明世之事者，知在此而不在彼也。君之子祺求余表墓，余美無溢辭，亦史法也。

黃宗羲撰《南雷文案》卷八

張庶常傳

公諱溥，字天如，號西銘，遠近學者稱天如先生，南直太倉人也。見時奇慧，好學，如成人，日讀書數千言。年十五喪父，奉母金居西郭，偏戶下帷，上自皇古，下迄今茲，凡治亂興廢，賢愚是非，無不殫厥理要。十九補諸生，聲聞藉甚。同邑吳公偉業從公受易，相期以天下事，志爲大儒，且不欲以科名義人。與張公采尤稱合志同方，創立復社，聯絡吳越俊造，凡經明行修之士，羣萃其中，士以不得與爲恥。崇禎辛未成進士第七人，除庶吉士。公好別白邪正，在中秘以激否人物，觸執政要人怒，要人思有以中之。公乞假歸，要人伺隙不得，乃指變東社黨，招里中豪猾，條事入疏，而蘇州司李某望風復訐公，謂已去官，由復社。上下提學御史，巡撫都御史，勘議。議上，拂執政意，有青切責必批根乃已。牽連六七年，而公以暴病卒。公死後，復有攻公希燒獄者，再得嚴旨，責公及張公采各自陳。采具陳備述顛末，中云：謂復社是臣事，則出處年月不符。謂復社非臣事，則生同砥礪，死避難亡，首義圖全。



儒藏

臣不出此。未且云、念博日夜解經論史、矢心報稱、曾未一服官、懷忠人地、雖今歲給之下、并不得泣血自明、良足哀悼。就上、上亦鑒書生結社、不過倡率文教、無他罪、置勿問。後御史劉公熙祚、給事中姜公埰交章爲公訟寃、言公砥行方聞、所纂修經史有功典學、請悉徵遺籍、脩史館。奉旨如御史給事言、書局提學御史呈進、天下傳而頌之。公事親孝、既長、依母若孺子。兄弟愛極、天倫親賢下士、赴義行仁、孜孜不倦。諸生沈承負才、天公抱其遺孤、歸撫爲子、周恤備至。蒙師劉振溪歿于水、公爲營葬、廬廬其妻子。何孝康南來、杜荆部廉徵、曾憲副三用、許給諫國榮、歿時皆以孤托公、咸經總其家。居鄉亟求民瘼、汲汲布惠。吳水國舟子多榜官、問予雄、公禁不許。所爲文融洽經史、高出西漢。詩皆三唐風格。嘗言、昔稱三不朽、要各有類。如德則修身及家、均平天下、否者俯仰問、泰對三雍、爲國家作述禮樂、昭宣教化、功則爲社稷臣、勒銘旂常、否者表章六經、裁量子史、俾後學有脈低微、稽顙亦不在捷伐下。言則冠豸朝陛、屈軼指佞、言行道

亦行、否者著成一家、藏諸名山、使千萬世知有其人、比于龍門扶風。其立志宏遠如此。所著有七錄彙集、史論一編二編、及論學、春秋三書、十三經合纂、歷代文典、文乘、通鑑紀事本末、宋元紀事本末、古文五屬、漢魏百名家、歷代名臣奏議等書行世。

論曰、予爰未履額、卽誦張先生制舉義、願以未得御元禮、識荊州爲恨。然予獲侍教、公夫子、猶之乎親見天如先生也。讀先生之遺書、上追典謚、下斥齊梁、豈非一代宗工乎。乃以才高觸忌、一仕卽已。卒之道垂宇內、名動天子、是豈曲學小儒所得異其萬一哉。先生子、是乎不朽矣。

鄭澐撰（唐慎野乘）卷七

故明中憲大夫太常寺少卿兵科給事中來君墓
碑銘

君諱集之字元成。曾祖日升。以嘉靖甲午舉人官雲南師
宗州知州。有文名。而君繼之。早歲通經。稍長。即能以詩古
文詞爭雄藝林。而阮于童試。崇禎六年。始以附學改學生
廩食高等。八年。禮臣請特科舉天下士。每學取廩食高等
者。設兩場試。分經義論策。硃其書與鄉試埒。而君舉第一。
貢之南京國子監。領己卯鄉薦。庚辰成進士。時房官陳函
輝能文。同房所收皆一時名下士。聲大噪。而館選數隄擠
之。改南京安慶府推官。會天下多故。獻賊破斬黃流及旁
郡。沿江烽火接安慶。君力措拄之。晝營儲峙。夜率伍伯邏
雉堞間。顧兵民雜糅。楚師防江者駐安慶營。日以蒭芟不即
給。糗糒闕然。洶洶懷亂心。而前後撫軍擁幕府自大。鮮
所獻替。君獨竭忠誠。以告。陰為調劑。得遂所陳請。以故
羈縻之。雖賊三薄城。而得以不壞。方是時。二京臺省聞
君名。疏記其所為。爭起薦之。章凡十數上。而畿輔踵寇。

留不下。乃以壬午鄉試充南京同考官。薦賊藩等凡九
人。平賊鎮帥者。寧南侯左良玉也。遇賊湖湘間。不利。且
匱餉。大掠而東。舳艫衝于江。聲言勤王師。所至譟譟不
可測。君駕舟見良玉。良玉擁糧具。謁展。出接。噴噴稱君為推
官。有名。握手深結納。由是下江悉無恙。既而賊犯闕事。
棘南京拒賊者。取君為兵科。君不就。先是。鳳督馬士英
以招永城賊。募兵。然南道徽州兵饑。剽食于婺源村民。
民拒且鬪。殺傷。然南兵士英大怒。特檄君往治。欲以亂
民律掩殺。而君撫諭之。覆言民殺劫人賊。非殺兵無罪。
宜勿問。士英心恨之。而外憚其直。顧無如何也。至是。君
取召而士英方以故督入柄政。反言君可用。署以兵科。
將欲收之為私人。而君恥不附。遽改兵科為兵部。後以
他臣薦。仍改兵科。且並進太常少卿。而

王師已南下矣。初。君父舜和公亦廩食于學。課君及君
弟子儻湖之濱。君嘗過念之曰。此先公授書處也。至是
髭髮匿湖濱。以著書自娛。購古今載籍弄其中。日與客



論文及古今興喪得失。兼近代掌故與夫身之所聞見者。燃薪繼景。娓娓不能已。四方請教者踵趾相錯。共稱爲倘湖先生。明制輕武士。遇獸衣輒嫚易之。視若蒯隸。即季世用兵。稍稍敢自桀。而終壓于制。不得遂。方君爲推官時。安慶帥馬君投糧儲道。以名刺。以爲鎮將與參政可平行也。參政責易板不報。既而參政驟開府。巡撫其地。乃修宿憾。將置帥于法。而君力解之。且薦用馬。至是帥歸。命略地江東。

世祖皇帝嘉其能。賜之以名。且令提督江南兵。開牙吳淞。于是擇使拜書幣。乞君況臨。君以角巾往。開轅迎君。饗于堂。膝地行酒。臚列山海。不可識人。以爲此國士之報云。康熙十七年。

上開博學鴻儒科。召天下才學官人可備著作顧問之選者。撫軍以君應。君辭之。且曰。吾年七十餘。已嫗矣。尚能爲成君作衣補耶。康熙乙卯。君自爲誌銘。以爲他人莫能言。且多諛也。越八年壬戌。君始卒。又三年。其四子

燕雲以己酉舉人赴公車門。值子直史館。闕分明史文苑傳。得君名。已起草去。燕雲適詣子。具言寢門之石。先公已自銘之矣。惟是嘉懿未盡。學者將勒文于饗醴之版。比之顏光祿之碑。靖節此非先生文不足重。亦惟是先生與先公爲忘年交。文章親昵。足徵信勿諛。子曰諾。又十年。乃始爲此。君所著書。目備載明史經籍志。其在經曰讀易隅通。曰易圖親見。曰卦義一得。曰春秋志在。曰四傳權衡。在籍曰倘湖文案。曰南行偶筆。曰南行載筆。曰倘湖近刻。曰倘湖詩餘。在雜著曰樵書初編。曰樵書二編。曰茗餘錄。君嘗曰。讀易隅通者。一隅之通也。然予是時方嬰城。藏燈木樵。每從塹隅旁通之。自爲誌曰。予所著有某書及雜劇之兩紗。秋風三疊而已。案兩紗三疊。史志皆不載。以雜劇故也。顧予知君事。君以崇禎己巳赴童試。縣斥之。粘其文于門。庚午再試。再斥之。然而府試拔第一。時年二十七。始附學。于是作兩紗劇。一紅紗。謂以紗幪目。昧五色也。一碧紗。則紗蒙其舊所爲。



君功在一方而名垂四涯其文可傳者則藏之倘湖之
湄誌而銘君自為之遺言軼事不可既于是乎有墓旁
之碑然而遲之以至于今日非諛墓辭。

毛奇齡撰
《西河集》卷八五

朱先生傳荀任

朱之瑜字魯曉號舜水餘姚諸生從朱永祜張肯堂吳鍾惺學崇禎十七年特徵不就弘光一年復徵不就授江西按察使司副使兼兵部職方清吏司郎中監方國安軍復不拜被劾避于舟山永曆五年兵屠城肯堂等死之瑜知事既去豫避日本移交趾復還舟山尋將之越南而風不利再至日本又還舟山其指欲乞外援以圖光復乃三至日本而援兵竟不可得于是復至越南（各王一月始召）
一主上少夢寐思靜行候更前於犬馬應主之誠日本力能忠明之所
便明言弄水文之書引不十二年鄭成功將大舉招至厦門瑜見其將吏萬紳皆佻達屏禮知大事難成居其營中舳艫日接避不相見事後寄書規之曰六月七八日入南京兵圍瓜州十七晨克城斷脛折股馬截傷驚馳浮屍積野蔽江束手就縛遠近歡躍聲動天地扼江而守列礮如星馬玉環甲直衝一鼓登陣騎所稱獷悍驍雄者殲夷殆盡大管效忠最爲桀黠噉息鼠竄惟恐不前二十三日鎮江內降市肆不易然而紀律時有未嚴上情不能下究有識蚤已憂之從陸無救焚之策侯風有師老之虞藩臺似謂在目中徒使英雄頓足耳七月八九日至南京其下驕而不戢渙而不萃中有一二要人剛愎貪忌狃於小勝不用上命舍其瑕攻其堅不離之使分反慢而使合徒效姚萇之覆羌羯不念苻堅之潰合肥遂而一敗至此雖死何足贖罪上游則豫章江黃迤北則淮陽廬鳳高目以待王師拔於水火輸糧運米會同有繹送印內款懼於後期

民心思漢之誠於茲大驗。一日辜負之責可大勵。今退守舟山。浙閩意在重來。若能自怨自艾。深思前過。則轉敗爲功。直唾手開耳。幸總督忠靖伯陳燦老成持重。鎮定周詳。提督馬玉雄豪激烈吐氣吞。況復謙雅和衷。剛柔相濟。分陝猶興文武同心。豈不足以復高皇哉。其憤惜金陵之役。責備延平。愀夫詞志之悲。嗟也。當是時。既蕩定禹域。璩義不媚。四至日本。遂終身焉。永曆十三年也。初經署直浙。兵部左侍郎王翌最善璩。及討。戰死。實八月十五日。璩聞之。於邑爲文祭之。自是每歲中秋必杜門廢節。居恆窮困。柳河安東守約師事之。贈半祿。久之。水藩主德川光國聘爲賓師。寵待孔厚。歲致饒裕。然儉節無所費。遂儲三千餘金。嘗歎曰。吾老矣。金多奈何。然移用中國。則事濟矣。臨卒。盡內于水戶庫。東邦君子若源白石之儔。皆謂其儉蓄餘財。志謀義舉。常有恢復中原之圖。然而時機悟。至齋憤以歿。可閔也已。子二。長大成。字集之。次大成。字咸一。皆殉節先璩卒。明亡後十六年。大成子毓仁墓璩義。至長崎時。幕府禁內外人不得見而歸。光國纂其遺文。都二十有八卷。今版尙藏于水戶彰考館云。

《碑傳集補》卷三五

徵君沈耕巖先生墓誌銘

有明之輔臣以奪情見勅者三人。曰李賢。張居正。楊嗣昌。然勅賢之羅一峰。勅居正之趙吳。艾沈。鄒皆有祿位於朝。唯勅嗣昌之沈耕巖則諸生也。賢與居正當天下無事之日。所失不過一身。嗣昌當危急存亡之秋。所關乃在社稷。耕巖之言。拯溺救焚。縣記後來。不與累黍。又非一峰諸公所言。僅在一時也。崇禎丙子。復保舉之制。應天巡撫張國維以耕巖應詔。時中原流寇決裂。特起嗣昌於苦塊。倚以辦賊。而嗣昌以雋文燦之招。撫爲嘗試。遣通司馬堂中。敗問日至。掩飾徒工。耕巖慨然。國事至此。朝端尙無一人言之者。乃草綱常正而後。可以正世風。一疏。謂金革無避。漢儒之曲說。君子必不出此。卽嗣昌迫於君命。亦宜躬歷戎行。衽革荷戈。而乃支吾旦夕。安枕京畿。外飾勤勞。中懷規避。將來誤國。嗣昌之肉其足食乎。繼又草樞臣籌國已誤一疏。謂嗣昌既不能循先朝大臣起復故事。軍旅之寄。一付文燦。使其解罪除凶。徐持降議。亦豈爲後。以一十二萬方張之師。不爲不武。以二百八十餘萬成集之餉。不爲不充。整旅以往。何兇弗摧。卽使而縛與梟。應宣布皇威。而後懲其歸死。以有之。詎有漫無勇治。招之不來。強而後可。援賊之認帖。以爲金石。講盟結約。猶同與國。天下有不能殺人而能生人者乎。有授柄於敵。而可懾敵者乎。臣不知其所終矣。通政司張紹先以疏字逾額。存案不上。耕巖上書通政。言無使獲罪執事。幸甚。紹先始請上。裁嗣昌亦惶恐待罪。請進勅已之章。有旨。這本既違式。卿不必更請封。



進耕巖乃聚括兩疏以就格上之留中不報黃漳海嘆曰此何等事在朝者不言而草野言之乎吾輩真愧死矣豈省何楷錢增林蘭友詞林劉同升趙士春相繼勸嗣昌最後而漳海有廷辭之事則皆發端于耕巖也向若耕巖之說行斯時易置嗣昌文燦流冠之禍豈至若是哉故識者以爲此番保舉得耕巖一人可以謂之不虛矣耕巖姓沈氏諱壽民字眉生別號耕巖世爲宜州人曾祖寵官至參政學省所稱古林先生是也祖懋敬蒲州丞封德慶知州叔祖懋學翰林修撰父有恒太學生耕巖孤憤不妄言笑爲文深入理窟而出之清真江右艾千子至宛上評許在盛名之上人駭其言而卒莫之能易焉故其選時文耕巖之文多人文定不敢輕置於文待一時聲名之盛吳中二張與江上二沈相配二張謂天如受先二沈謂崑銅耕巖不以名位相甲乙也上書報罷不復屑意經生之業與周鹿溪掩關茅曲俱理佐王之學無何而黨禍作阮大鍼之在留都也以新聲高會招來天下之士利天下有事行其擇圖耕巖効楊疏尾有大鍼妄畫條陳鼓煽豐邑於是顧某吳應箕推耕巖之意出南都防亂揭合天下名士以攻之大鍼恨甚以爲主之者鹿溪也及大鍼得志曲殺鹿溪按揭中姓氏次第欲誅之而以耕巖爲首余亦與焉且聞深陽亡命投止耕巖矯詔將下深陽返北耕巖遂變姓名入金華山中南都亡而事解耕巖遂不返故園東遷西徙入山惟恐不深瓶粟既罄採薇藉以續食有知而餉之悉行謝絕曰士不窮無以見義不寄窮無以明操郡守朱元

錫曾寄十金耕巖意不欲受度置壁中三年塵滿未嘗一發視也深陽既相將特疏薦之帝使密書耕巖不開封對使焚之深陽意猶未已耕巖寄書謂之曰錢勝謝枋得其智非不若舉羽所南也而卒以闕厥舉者緣多此物色故耳故凡今之欲徵僕薦僕者直欲死僕者也深陽嘆曰先生所謂名可聞身不可得見者也乙未始返故廬松菊無存田園半割或請直詣曰身既隱矣焉用直之然避人愈深其名愈著當事或邀之半道則望望而去比之元亮人以此爲隘焉乙卯五月屬疾門人吳肅公侍耕巖命其執筆曰以此心還天地以此身還父母以此學還孔孟諸甲而卒是月之三日也年六十九遺集若干卷開道錄若干卷配徐肅人先十九年卒子六人沐發倫鑑璣璣璣以某年葬於某所耕巖重然諾一切皆有至性友人周梅骨死海外其子幼耕巖渡海養其母鹿溪之歿也家業零落親諸孤爲通負所逼耕巖贈田以償之不足貸諸人又不足屬諸門人鹿溪始有完卵故自言才疎意廣甲申以前貸金至六百以上皆急朋友之急也余少遭患難輟業者久之庚午邂逅耕巖於南中惻惻之力何日忘之癸酉耕巖訪余至姚江戊寅余訪耕巖至宛上而不遇改輩以後兩番寄詩亦不知其達不達也甲辰在姑蘇與鄉文江約將以秋冬之際同訪耕巖日復一日文江不來而老母年登九旬余遂不可遠行矣茫茫禹跡余之不可以告人者欲向耕巖盡之豈料竟無相見之期耶乙卯八月接耕巖永訣一書乃是年四月二十日所寄去易簣十有三日耳以數

年不通尺一，忽得之易簪之際，不可謂非吾兩人之冥契也。先生之子遠不遠千里，求誌幽石，余泣然和淚而銘曰：吳門之卒，即攻王氏之人，西臺之哭，即幼似道之臣。嗚呼，耕巖千載同論。

黃宗義撰（南雷文集）卷八

劉伯繩先生墓誌銘 丙午

劉伯繩先生將薨，其子求予銘其墓。嗟夫，道之難明也，數百年而生一人焉，如五行麗天，芒寒色正，標示宗旨，繭絲牛毛，亦可謂嚴矣。乃入耳過口，輒焉失之，源流分同，出一先生之門，而不啻楚越之相遠，即以明儒論之，康齋之學出而爲白沙，爲敬齋爲一齋，而主敬之宗旨裂；陽明之學分而爲東浙，爲淮南，爲江右，而致良知之宗旨裂。然則墨守師說者，豈不爲難哉？當子劉子講學之時，吾越之承風接響者，以想像爲本體，權謀爲作用，子劉子之言格於浸淫之僻，說而不相下。先生憂之曰：此禪門種草，寧可移植於吾室乎？於是推擇王業洵、王統著及予等十數人者，進之爲弟子。諸弟子進而受子劉子之教，有未達者，退而私於先生，未嘗不氷釋也。許元溥、孟宏疑儒釋體一而用殊，先生曰：吾儒之言體也，至善由是而發之，其宰於身也，在親謂之明，在羣謂之聰，在言謂之忠，在動謂之敬，其宰於人也在父子謂之仁，在君臣謂之義，在夫婦謂之別，在長幼謂之序，在朋友謂之信，其達於上下也，則民之胞物之與，乾稱父，坤稱母也，有至善之體，自有至善之用，吾儒之體用不可分也。佛氏之言體也，無善由是而發之，無所

謂親聽言動也，又何有聰明忠敬乎？無所謂父子君臣夫婦長幼朋友也，又何有仁義序別信乎？無所謂民物乾坤也，又何有胞與父母乎？有無善之體，自有無善之用，佛氏之體用亦不可分也。視淵開美問求仁，先生曰：天地之所以常運萬物之所以相生而不已者，止此春和之氣循環而無端也。自其暢達而言之，則曰夏，自其收斂而言之，則曰秋，自其凝靜而言之，則曰冬，而總一春氣之卷舒，非截然分而爲四也。人得天地之氣以爲人，則曰仁，自其裁制而言之，則曰義，自其節文而言之，則曰禮，自其明斷而言之，則曰智，而總一仁之周流，亦非截然分而爲四也。是故宜事變制秩序，辨是非者，義禮智也，而所以能宜事變制秩序，辨是非者，則仁之爲也。卽或能宜事變矣，義其所義，而非吾之所謂義，能制秩序矣，禮其所禮，而非吾之所謂禮，能辨是非矣，智其所智，而非吾之所謂智，何也？吾之所謂仁義禮智者，合仁而言之也，合仁而言之者，析之各得其分，而統之適完其仁也。是故儒者言求仁而不言求義，禮智者此也。當是時，問學者雲擁其門，雖所得各有淺深，而山陰慎獨宗旨暴白於天下，不爲越中之舊說所亂者，先生有權陷廓清之功焉。子劉子既沒，宗旨復裂，海寧陳確乾初以大學有古本有收本，有石經言人人殊，因言大學非聖經也。自來學問由正以入誠，未有由誠以入正者。孟子言求放心，夫子言志學從心，其主敬功夫從心始，不從意始。先生辨之曰：慎獨者，主敬之別名也。若在正心條下，則正心傳中當言下手功夫，乃獨於誠意傳中詳言之。



而正心傳中反不及者蓋一誠意而心已正身已修齊治平一以貫之大畧聖賢言心有二端語孟之言心也合意知物而言者也合意知物而言者故不言誠意而誠意在其中如求放心必有所以求之之道操則存其求之之道也非即誠意之慎獨乎心之所之謂之志非心即志也所之者意也由志學而後能從心非即意誠而後心正乎大學之言心也分意知物而言者也分意知物而言者非外心以言意即心而指其最初之幾曰意蓋必言意而心始有主宰言誠而正始有實功也兵火奔播叢林之點者網羅失職之士以張其教武進憚曰初仲升將嗣臨濟先生謂之曰古來賢士隱於禪者不少有讀易者有歌楚辭者有汎舟賦詩然其草者豈不知業已圓頂方袍而故爲此狂激之態乎蓋曰吾非真禪也聊以抒艱貞之志云耳猶之趙岐李燮避身傭保非愛傭保之業也今足下搥鼓白槌欲嗣其法則向之圓頂方袍者從其教也非有托而逃焉者亦猶趙岐李燮無故而美心傭保徒其衣冠詩書之業也不亦惑乎仲升乃止二十一年以來一輩學人悉皆稱謝子劉子宗旨雖若滅若沒先生之墨守未嘗不爲田單之卽墨也先生諱洵姓劉氏伯繩其字家世具余所撰子劉子行狀子劉子者念臺先生諱宗厚先生之父也年十餘歲釣黨禍起避地武林僧舍晝則隨衆傭作夜分惟燈禪板聲寂發而讀書侍子劉子處官舍中門庭落然不聞人聲脫粟寒漿僮僕逃遁先生方擁卷危坐自若也用功過苦遂至徹夜不能交睫如是者數年子劉子曰此把捉

之過也久之而後平子劉子野死先生嬰故業踐荆棘於群虎之中孤蹤萬山歲餘復返塞門慨隣右莫窺其面初子劉子考定六經發凡舉例而未業先生發篋陳書究竟先志監司郡縣募其操行下車請先生了不容接錮疾報聞與王爾祿天錫遊息共學天錫爲海道欲申把臂先生引范史雲周小泉之事以拒之大錫嘆息而去生於某年癸丑六月十日卒於某年甲辰九月八日明年某月某日葬於某山之原母章氏贈夫人配周氏光祿寺少卿夢尹真維之女先三月卒子四人茂修士林長林道林女一人適吳善禎孫三人先生既絕交息遊左對孺人右顧稚子鬱鬱無可告語余亦老屏空山不相聞問故其群經疑義冥搜獨得至述儀禮鐘律如與余往復未幾而先生謝世矣先生云亡今而後山陰宗旨恐愈裂矣執筆而自慙者久之銘曰

伯繩之學膠解東釋吾未知其所臻清定名教閉關絕津

之人也耶

蚍蜉蟻子不容巡遁殆陳同父所謂積穀做米把鏡放船

[General Information]

书名=儒藏 史部 儒林碑传一十一

作者=杨仕文，舒大刚主编

页数=713

SS号=12315585

DX号=000007485843

出版日期=2005.05

出版社=四川大学出版社